


Nuevo Testamento en  
mixteco



New Testament in Mixtec, Atatláhuca (MX:mib:Mixtec,  
Atatláhuca)

# Nuevo Testamento en mixteco

## New Testament in Mixtec, Atatláhuca (MX:mib:Mixtec, Atatláhuca)

copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

### Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files dated 29 Jan 2022  
9665e546-39d0-5bd5-8b10-38916a94951f

## Contents

SAN MATEO . . . . .	1
SAN MARCOS . . . . .	66
SAN LUCAS . . . . .	107
SAN JUAN . . . . .	175
HECHOS . . . . .	226
ROMANOS . . . . .	289
1 CORINTIOS . . . . .	315
2 CORINTIOS . . . . .	339
GÁLATAS . . . . .	355
EFESIOS . . . . .	365
FILIPENSES . . . . .	374
COLOSENSES . . . . .	380
1 TESALONICENSES . . . . .	386
2 TESALONICENSES . . . . .	391
1 TIMOTEO . . . . .	394
2 TIMOTEO . . . . .	401
TITO . . . . .	406
FILEMÓN . . . . .	409
HEBREOS . . . . .	411
SANTIAGO . . . . .	430
1 PEDRO . . . . .	437
2 PEDRO . . . . .	444
1 JUAN . . . . .	448
2 JUAN . . . . .	455
3 JUAN . . . . .	456
JUDAS . . . . .	457
APOCALIPSIS . . . . .	459

## JNUHUN VAHA NI TEE SAN MATEO

### *Lista ñayuu yucün jeē ní quiji Jesucristo*

*(Lc. 3.23-38)*

<sup>1</sup> Yāha cūu lista ñayuu yucün jeē ní quiji Jesucristo. Te máa yá ni quiji nuū yucün rey David, te David ni quiji nuū yucün Abraham.

<sup>2</sup> Abraham ni cuu de tátá Isaac, te Isaac ni cuu de tátá Jacob, te Jacob ni cuu de tátá Judá jiín táca ñani i.

<sup>3</sup> Te Judá ni cuu de tátá Fares jiín Zara, te náná ndindúú i ni cuu Tamar. Te Fares ni cuu de tátá Esrom, te Esrom ni cuu de tátá Aram.

<sup>4</sup> Te Aram ni cuu de tátá Aminadab, te Aminadab ni cuu de tátá Naasón, te Naasón ni cuu de tátá Salmón.

<sup>5</sup> Te Salmón ni cuu de tátá Booz, te náná i ni cuu Rahab. Te Booz ni cuu de tátá Obed, te náná i ni cuu Rut. Te Obed ni cuu de tátá Isaí.

<sup>6</sup> Te Isaí ni cuu de tátá David, tēe ni cuu rey. Te rey David ni cuu de tátá Salomón, te náná i, xīhna gā ni cuu ña ñasihí Urías.

<sup>7</sup> Te Salomón ni cuu de tátá Roboam, te Roboam ni cuu de tátá Abías, te Abías ni cuu de tátá Asa.

<sup>8</sup> Te Asa ni cuu de tátá Josafat, te Josafat ni cuu de tátá Joram, te Joram ni cuu de tátá Uzías.

<sup>9</sup> Te Uzías ni cuu de tátá Jotam, te Jotam ni cuu de tátá Acaz, te Acaz ni cuu de tátá Ezequías.

<sup>10</sup> Te Ezequías ni cuu de tátá Manasés, te Manasés ni cuu de tátá Amón, te Amón ni cuu de tátá Josías.

<sup>11</sup> Te Josías ni cuu de tátá Jeconías jiín táca ñani i, máa tiempo jeē cuángoo ñayuu Israel preso nde ñuu Babilonia.

<sup>12</sup> Te náa cáyücü i yücuán, te Jeconías ni cuu de tátá Salatiel. Te Salatiel ni cuu de tátá Zorobabel.

<sup>13</sup> Te Zorobabel ni cuu de tátá Abiud, te Abiud ni cuu de tátá Eliaquim, te Eliaquim ni cuu de tátá Azor.

<sup>14</sup> Te Azor ni cuu de tátá Sadoc, te Sadoc ni cuu de tátá Aquim, te Aquim ni cuu de tátá Eliud.

<sup>15</sup> Te Eliud ni cuu de tátá Eleazar, te Eleazar ni cuu de tátá Matán, te Matán ni cuu de tátá Jacob.

<sup>16</sup> Te Jacob ni cuu de tátá José, tēe ni cuu yí María. Te María ni cuu ña náná Jesús, Yāa naní Cristo.

<sup>17</sup> Te nde Abraham te nde David ni iyo uxí cuñ yucün. Te nde David te nde náa cuángoo ñayuu Israel preso ñuu Babilonia ni iyo inga uxí cuñ yucün. Te nde ná ni jengoo i preso te nde ni cacu Cristo, suni ni iyo inga uxí cuñ yucün.

### *Jeē ní cacu Jesucristo*

*(Lc. 2.1-7)*

<sup>18</sup> Te jeē ní cacu Jesucristo, súcuan ni cuu: Náná yā María, je ni cundaā jeē quijnáhan ña jiín José. Te nde ná tu quijnáhan ña jiín de, te ni jecūhun séhe ña ni sáha Espíritu Santo.

<sup>19</sup> Te José, tēe quijnáhan ña jiín, chi tēe ndaā cúu de. Te tu ní cúní de cuāha de jñuhun canu ña, chi sa cúní de jeē na jécuiñī sāhi jéé ma quijnáhan de jiín ña.

<sup>20</sup> Te níni súcuan nácani ni de, te jíin jéni ni quee-ni ñn ndajéhé maá Jítoho yō Yaā Dios nuū de, te ni cahān yā jíin de:

José, sēhe yucūn David, ma yūhu ró cueca ró ñasihí ró María, chi sēhe jeé scácu ña, vēji i nde nuū maá Espíritu Santo.

<sup>21</sup> Te scácu ña ñn sēhe yíí. Te snání ró i Jesús, chi máa i cúu Yaā jnama ñayuu nuū cuéchi i, áchí ndajéhé.

<sup>22</sup> Súcuan ni cuu táca jniñu yáha, návāha squícu jnūhun Jítoho yō Yaā Dios jeé ni cáhān tēe ni nacani jnūhun ya nde jenahán. Te suhva ni cahān de:

<sup>23</sup> Coó ñn sūchi síhí, te nihīn sēhe i, te scácu i ñn sēhe yíí,

te conaní sūchí un Emanuel.

Achí tutu. Te síhví yáha cúní cahān: Yaā Dios ndeé yá jíin yó.

<sup>24</sup> Te ni natahū ni José, te ni sáha de nájñūhun ni cahān ndajéhé Jítoho yō jíin de. Te ni jeca de María ni cuu ña ñasihí de.

<sup>25</sup> Te tu ní quíxí de jíin ña, chi nde ni scácu ña sēhe yíí núú ña. Te ni snaní de i Jesús.

*Jeé ní quijicoo tēe mago nuū yā*

## 2

<sup>1</sup> Te ná ni cacu Jesús ini ñuu Belén ndañūū Judea, te tiempo un ndácu rey Herodes jniñu. Yūcuán na te jecu tēe ndíchí jéé cascuáha siquí quími, ni quijicoo de nde jicá, ichi nuū cáne niāndii, te ni jinūcoo de ñuu Jerusalén.

<sup>2</sup> Te ni cacajnūhún de ñayuu:

¿Nde nuū íne sūchí jeé ní cacu jeé coo rey ñayuu hebreo? Chi ichi núú cáne niāndii ni cajito ná ñn quími cáhnu jeé cúu seña jeé ní cacu i. Te vējicoo ná chíñūhún ná i, áchí de.

<sup>3</sup> Te rey Herodes, ná ni jini de jnūhun yáha, te ni cunéé ni de, nde jíin táca ñáyuu ñuu Jerusalén.

<sup>4</sup> Te ni nastútú de táca sūtú cácujuhnu jíin tēe cástéén tutu ley Yaā Dios nuū ñáyuu. Te ni cajñūhún de tēe un ndé nuū cacu Cristo achí tutu.

<sup>5</sup> Te ni cacachi nuū de:

Ini ñuu Belén ndañūū Judea. Chi suhva cáhán nuū tútu ni tee tēe ni nacani jnūhun ya nde jenahán:

<sup>6</sup> Te róhó ñáyuu ñuu Belén ndañūū Judá, cújuhnu ga ñuu rō vēsú táca gá jeé cujuhnu ini Judá. Chi suu ini ñuu rō quenda ñn Yaā ndacu jniñu, te coto ya ñayuu maá rí Israel, achí Yaā Dios. Achí tutu.

<sup>7</sup> Yūcuán na te Herodes ni cana sáhi de táca tēe ndíchí un jéé naní mago. Te ni cajñūhun yúcún de ndé quíhví ní cane quími ún.

<sup>8</sup> Te ni tají de tēe un quíngoo de ñuu Belén. Te ni cahān de:

Cuángoo ní te cajñūhun yúcún ní ndé nuū íne sūchi lúlí un. Te núu ni nanihīn ní i, te quijicoo ní castūhun ní nuū ná, návāha suni máa ná quichiñūhún ná i, áchí rey.

<sup>9</sup> Te jeé ní cajini de jnūhun ni cahān rey, te cuangoo de. Te máa quími cáhnu jeé ní cajito de ichi núú cáne niāndii, yósnúu núú de cuahān nde ni jinū nuū íne sūchi lúlí un, te yūcuan ní jecuiñí.

<sup>10</sup> Te ná ni cajito de jeé ní jecuiñí quími ún, te yōhoyo ni cacusī ni de.

11 Te ni jinūcoo de ni quivicoo de ini vehe, te ni cajito de nuū sūchi lúli un jíin náná i María. Te ni cajecuiñi yití de nuū i, te ni cachiñuhún de i. Te ni canune de yejnū de, te ni casocō de oro jíin sūje cūtū jíin sūje uvuā nuū i.

12 Yūcuán na te ni scóto jēni de, ni cachi nuū de jeē ma nuhún de nuū Herodes. Te inga ichi cuanuhun de ñuu de.

*Jeē ní jinu José cuangoo de nación Egipto*

13 Te náa cuánuhun táca téé mago, te ni scóto jēni José jeē ñin ndajéhé maá Jitoho yō Yaā Dios ni cahān yā jíin de:

Ndocuiñi te cunu ró quingoo ró jíin sūchi lúli jíin náná i nde nación Egipto. Te yūcuán coyūcu ró nde castūhun rí nuū rō. Chí Herodes je yajni nanducú de sūchi lúli jíin jeē cáhni de i. Achí yá.

14 Te ni natahū ni José. Te cuangoo de jíin sūchi lúli jíin náná i, te ñuu ní cajica de cuangoo de nación Egipto.

15 Te ni coyūcú de yūcuan ndé ni jihī Herodes. Te sūcuan ni cuu návāha squícu jnūhun Jitoho yō Yaā Dios jeē ni cáhān téé ni nacani jnūhun ya nde jenahán: Nde nación Egipto ni cana ri Sēhe ri vēji i, achí Yaā Dios, achí tutu.

*Jeē ní ndacu Herodes jniñu jeē na cúu táca sūchi yí lúli*

16 Yūcuán na te Herodes ni jini de jeē sūcuan ni castáhú téé mago un de, te yōhyo ni quití ni de. Te ni tají de soldado cuangoo, te ni cajehni táca sūchi yí lúli jéé uú cuiyā jíin jéé yiquín gá jeē cáyūcú ini ñuu Belén jíin táca ñuu yajni. Chí je ni cajnūhun yúcún de táca téé mago un nasaa tiempo ni cuu jeē ní cacu Jesús.

17 Te sūcuan ni squícu jnūhun ni cahān Jeremías, téé ni nacani jnūhun Yaā Dios nde jenahán, chí ni cahān de:

18 Ini región Ramá ni jini sōho ri jeē cándahyū te cándahyū cohó.

Chí ñahan cácuu yucūn Raquel, cándahyū ña jehē séhe ña, te tu cácuni ña ndusiñi ni ña, chí ni cajihī i.

Achí tutu.

19 Yūcuán na te ni jihī Herodes. Te ni scóto jēni José jeē ñin ndajéhé Jitoho yō Yaā Dios ni cahān yā jíin de nuū ndeé de nación Egipto.

20 Te ni cahān yā jíin de:

Ndocuiñi te nuhun rō ñuu rō Israel jíin sūchi lúli jíin náná i. Chí je ni cajihī téé cánducú cahni sūchi lúli jíin nuū. Achí ndajéhé.

21 Yūcuán na te ni ndocuiñi de, te cuanuhun de nación Israel jíin sūchi lúli jíin náná i.

22 Te ni nihin de jnūhun jeē Arquelao ni nucuiñi de nuū tatá de Herodes, te máa de ndácu jniñu región Judea. Te ni yūhú de nuhun de yūcuán. Te ni scóto jēni de jeē na quihín de región Galilea, te cuangoo de.

23 Te ni jinū de yūcuán, te ni coyūcú de ñuu naní Nazaret. Sūcuan ni cuu návāha squícu jnūhun ni cacahān téé ni canacani jnūhun Yaā Dios nde jenahán. Chí ni cacachi de jeē cahān ñayuu jeē téé ñuu Nazaret cúu Jesús.

*Jnūhun Juan téé scuándute*

(Mr. 1.1-8; Lc. 3.1-9, 15-17; Jn. 1.19-28)

### 3

1 Te ni yāha tiempo, te ni jinū Juan téé scuándute nde nuū ñūhun téhé ndañúu Judea, nácani de jnūhun suhva:

<sup>2</sup> Nacani ni rō jijnáhan ró jéé stóo ró cuéchi ró, chi je ni cuyajni Yaā ndeé andiví jéé ndacu ya jniñu nuū rō. Achí de.

<sup>3</sup> Te Isaías, tēe ni nacani jñūhun Yaā Dios nde jenahán, suhva ni tee de jñūhun Juan nuū tūtu:

Coo ñin tēe cana jee nde nuū ñūhun téhé:

Sátūhva ró máá ró jijnáhan ró, chi quee maá Jítóho yō.

Te sáha ró jniñu ndaā, chi vēji ya, achi de.

Achí Isaías.

<sup>4</sup> Te sahma ñūhun Juan cúu ixi quiti nání camello, te núhni ñin cinturón ñiñi chíji de. Te jeé técu de cúu tíca ndicuéhyí jíin ndúxi yocō.

<sup>5</sup> Te ñayuu ñuu Jerusalén jíin táca ñáyuu región Judea jíin ñáyuu yúcu yajni yuyúte Jordán, ni quijicoo i nuū de.

<sup>6</sup> Te ni canacani ndaā i cuéchi i nuū Yaā Dios, te ni scuándute de i ini yūte Jordán.

<sup>7</sup> Te ná ni jito de jeé véjicoo cuehē tēe grupo fariseo jíin tée grupo saduceo nuū scuándute de, te ni cahān de jíin:

Va sēhe coō cácuu ró, chi xeēn rō nájñūhun coō. ¿A cájeni ni rō jeé cuu cunu ró cácu ró núū castigo xeēn jeé quíji?

<sup>8</sup> Núu súcuan te sáha ró jniñu vāha, te súcuan steén rō jeé ní canacani ndije ni rō jeé stóo ró cuéchi ró.

<sup>9</sup> Te ma cáni ni rō cahān rō jeé cuu cácu ró síqui jeé cácuu ró yúcūn Abraham. Chí cahān rí jíin ró jeé cuu sáha Yaā Dios jeé táca yúu yáha nduu sēhe Abraham jeé candíje vāha, te núu cúní yā.

<sup>10</sup> Te cácuu ró nájñūhun nundéhé jeé tu jéhe ndehē vāha. Te vijna je íyó túhva Yaā Dios jeé cuáha ya castigo xeēn, nájñūhun je íyó túhva ñin cāa jeé cahnde nde yoho yujnu. Núu súcuan te sáha ya jíin ró nájñūhun jíin táca yujnu jeé tu cúun ndehē vāha, jeé tahndé te cayū nuū ñuhún.

<sup>11</sup> Te ruhú chí jíin ndute scuándute rí rohó, te yūcuan cúu jeé steén rō jeé ní canacani ni rō jeé stóo ró cuéchi ró. Te Yaā jeé quíji, chí nájñūhun scuándute ya rohó cúu jeé cuáha ya Espíritu Santo condee ini anuá ró, te poder yā cúu nájñūhun ñuhún. Te Yaā quíji chí cújéhnu ndasí yá. Chí tú na vé jéhnu cuiti cúu rí nuū yā, ni jeé cuajniñu rí nuū yā vesú ñin jniñu lúlí gá nájñūhun jeé quénehen rí ndijén yā.

<sup>12</sup> Te sáha ya nájñūhun sáha tēe scānda trigo, chí sásñin ya ñayuu vāha jíin ñáyuu cunéé, nájñūhun cúndoo trigo jeé quénda sñin paja. Te nastútú yá trigo yā ndiví ini yacá yā. Te paja chí jnaa yā nuū ñuhún jeé ma ndahvá cuiti. Achí Juan.

### *Jeé ní jendute Jesús (Mr. 1.9-11; Lc. 3.21-22)*

<sup>13</sup> Yūcuán na te ni quenda Jesús región Galilea, te ni quee yā yūte Jordán nuū íne Juan, návaha scuándute de ya.

<sup>14</sup> Te tu ní cúní Juan scuándute de ya, chí ni cahān de jíin yá:

Sa suhva cánuú jeé scuándute máá ní sãñá, ¿te ndese cúu jeé sa nuū ná vēji ní? áchí de.

<sup>15</sup> Te ni cahān Jesús jíin de:

Tuú chí sáha ró, chí súcuan cánuú squícu yó táca jniñu ndácu Yaā Dios, achí yá.

Yūcuán na te ni scuándute de ya.

<sup>16</sup> Te ná ni cuu ni jendute Jesús, te ni quenda ya nuū ndúte. Te ni nune-ni andiví, te ni jito ya jeē cúun Espíritu Yaā Dios vēji, te cáa nájñuhun ñin paloma, te ni quee xinī yā.

<sup>17</sup> Te ichi andiví ni cahān ñin jñuhun:

Yāha cúu Sēhe ri jeē maní ndasí rí jíin, te yōhyo cúsiñ ni rī jíin, áchí.

*Jeē ní jito ndee jexeén Jesús  
(Mr. 1.12-13; Lc. 4.1-13)*

## 4

<sup>1</sup> Yūcuán na te ni jinū Jesús nde nuū ñuhun téhé ní sáha Espíritu Santo. Te yūcuán coto ndee jexeén yā, chi cúní jeē sáha ya cuēchi.

<sup>2</sup> Te ni Iyo ndite ni yā uū xico nduú uū xico ñuú, sáa te jíi yā sōco.

<sup>3</sup> Te ni quee maá jéxeén jeē cóto ndee un yá, te ni cahān jíin yá:

Núu máa ró cúu Sēhe Yaā Dios, te cahān rō jeē yuū yúcu yáha na ndúu staā caji rō, achí.

<sup>4</sup> Te ni cahān yā jíin:

Tuú chi yósó núu tútu iñ: Nasūu máni máa jíin stáa cátecu ñayuu, chi suni jíin táca jñuhun cáhán Yaā Dios, achí yá.

<sup>5</sup> Yūcuán na te cahān jexeén un jíin yá nde ñuu iñ Jerusalén. Te ni jeni ya xinī torre templo.

<sup>6</sup> Te ni cahān jíin yá:

Te núu Sēhe Yaā Dios cúu ró, te síngava ró máa ró nde nuū ñuhun, chi jnama ya rohó. Chi yósó núu tútu:

Tejníñu ya ndajéhé yā quijicoo coto rōhó.

Te cunundee yā rohó jíináhan ya,

návaha ma cáchihí ró jéhé rō nuū yuú.

Achí tutu. Achí jexeén.

<sup>7</sup> Te ni cahān Jesús:

Tuú chi suni yósó núu tútu jeē ma cóto ndee ñayuu Jitoho i Yaā Dios, núu jnama ya i chí tuú, achí yá.

<sup>8</sup> Te jexeén un ní jeca tucu ya cuahān jíin yá nde xinī ñin yucu súcún ndasí. Te ni steén táca nación ñí cáhnu ñayiví núu yā, te yōhyo luu cáa ndihí.

<sup>9</sup> Te ni cahān jíin yá:

Táca ñuu yáha cuáha ri nuū rō, te núu cuiñi yítí ró chiñuhún ró ruhū, achí.

<sup>10</sup> Yūcuán na te ni cahān Jesús nuū jexeén:

Satanás, cujiyo quihñ rō, chi yósó núu tútu jeē chiñuhún ñayuu maá Jitoho i Yaā Dios, te nuū maá-ni ya cuajníñu i. Achí yá.

<sup>11</sup> Yūcuán na te ni cujiyo-ni jexeén un cuahān. Te ni quecoo ndajéhé Yaā Dios ni cajejníñu nuū yā.

*Jeē ní quejé Jesús nacani ya jñuhun región Galilea  
(Mr. 1.14-15; Lc. 4.14-15)*

<sup>12</sup> Te ná ni nihñ Jesús jñuhun jeē íne Juan vecā, te cuanuhun yā región Galilea.

<sup>13</sup> Te tu ní cóndee yā ñuu Nazaret, chi ni jehēn yā ni condee yā ñuu Capernaum. Te ñuu un íne yumar, máa región Zabolón jíin Neftalí.

<sup>14</sup> Te súcuan ni squícu jñuhun ni tee Isaías, tēe ni nacani jñuhun Yaā Dios nde jenahán:

<sup>15</sup> Región Zabolón jíin Neftalí,

ichi jeē yihí yumar, lado yūte Jordán nuū cáne niāndii,



jiín región Galilea nuū cáyūcú ñayuu tācá nación tu jíni jnūhun ya.

<sup>16</sup> Ñayuu ún chi nájnūhun cáyūcú i nuū nées, te coto i nájnūhun ñn luz cáhnu.

Te ñayuu je yajni naa, nihin i jnūhun váha ndasí, suu jnūhun jeē jnama ya anuá i.

Achí Isaías.

<sup>17</sup> Te nde quivī yúcuan ní quejéé Jesús nácani ya jnūhun, te ni cahān yā suhva: Nacani ni rō jijnáhan ró jéé stóo ró cuéchi ró, chi je ni cuyajni Yaā ndeé andiví jéé ndacu ya jniñu nuū rō, achí yá.

*Jeē ní cana ya cuūn tēe jnū chācá*

*(Mr. 1.16-20; Lc. 5.1-11)*

<sup>18</sup> Te jica Jesús yumar Galilea cuahān yā. Te ni jito ya nuū uú jnáhan ñani. Te ñn de cúu Simón jeē suni nání Pedro, te inga de cúu Andrés. Te tēe cájni chācá cácuu de, te cásinga de ñunu de ini mar.

<sup>19</sup> Te ni cahān yā jíni de:

Condiquin ruhū na quihín yō, te nasáha ri rohó tēe nihin cuehē ñayuu candije ruhū, nájnūhun cánihin rō chācá, achí yá.

<sup>20</sup> Yūcuán na te ni castóo-ni de ñunu de, te ni candiquin de ya.

<sup>21</sup> Te ni jica ya jecu gā, te ni jito ya nuū inga uú jnáhan ñani. Te cácuu de Jacobo jíni Juan, sēhe Zebedeo. Te cáyūcú de ini barco jíni tátá de Zebedeo, cánachijnñ de ñunu de. Te suni ní cana ya de jeē condiquin de ya.

<sup>22</sup> Te ni castóo-ni de tátá de jíni barco, te ni candiquin de ya cuango de.

*Jeē ní steén yā nuū cuehē ñayuu*

*(Lc. 6.17-19)*

<sup>23</sup> Te ni jica cuu Jesús ní región Galilea, ni steén yā jnūhun ini tācá vehe ñi jeē cúu sinagoga. Te ni nacani ya jnūhun váha ndese ndácu Yaā Dios jniñu. Te ni nasávaha ya ñayuu cácuu tācá-ni cuehyí.

<sup>24</sup> Te ni jitē núu jnūhun ya cuahān ní región Siria. Te nuū yā ni caquindeca i tāca ñayuu cácuu, ñayuu cándoho tijni nuū cuehyí, jíni jéé jetú, jíni jéé ñūhun tachí ini, jíni jéé jihí yihí, jíni jéé ni ljin. Te ni nasávaha ya i jijnáhan i.

<sup>25</sup> Te cuehē ñayuu región Galilea jíni Decápolis, jíni ñayuu ñuu Jerusalén jíni región Judea, jíni táca ñuu ichi núu cáne niándii yūte Jordán, ni cacondiquin i ya.

*Jeē ní nacani ya jnūhun nde nuū yúcu*

## 5

<sup>1</sup> Te ni jito Jesús nuū ñayuu cuehē. Te ni caa ya yucu cuahān yā, te ni cucōo ya. Te tēe cácuaha jíni yá, ni jinūcoo de nuū yā yūcuán.

<sup>2</sup> Te ni quejéé yá ni steén yā tāca jnūhun yáha nuū de:

*Jnūhun yōhyo ndetū*

*(Lc. 6.20-23)*

<sup>3</sup> Yōhyo ndetū ñayuu jeē cánacuni i jeē tu íyó váha ánuá i siquí cuéchi i, chi je ni quivícoo i ndaha Yaā andiví jéé ndácu ya jniñu nuū i.

<sup>4</sup> Yōhyo ndetū ñayuu cácuuñhyá ni, chi ndusñ ni i sáha Yaā Dios.

<sup>5</sup> Yōhyo ndetū ñayuu cáhíyo vítá suchí ini, chi ni jejnūhun ya jeē cutahū i ñayiví.

<sup>6</sup> Yōhyo ndetū ñayuu jeē nájnūhun jeē cájii i sōco cájichí i, súcuan jnāā i sáha i jniñu ndaā, chi máá yá chindéé ñáhán yá i jeē cuu sáha i.

7 Yōhoyo ndetū ñayuu cákundáhú ni jnáhan, chi suni cundáhú ni Yaā Dios i.

8 Yōhoyo ndetū ñayuu cáhīyo ndoo ini anuá, chí coto i nuū Yaā Dios.

9 Yōhoyo ndetū ñayuu cánasámanī jnáhan, chi cahān Yaā Dios jeē sēhe ya cácuu i.

10 Yōhoyo ndetū ñayuu jeē cájito xeēn inga ñayuu i siquī jeē casáha i jniñu ndaā, chí je ni quīvicoo i ndaha Yaā andiví jēē ndácu ya jniñu nuū i.

11 Yōhoyo ndetū maá ró jijnáhan ró núu cácahān neé i nuū rō jeē siquī ruhū, te coto xeēn i róhó, te stáú yáhu i róhó, vēsú tú cuēchi ró.

12 Na cúsi ni rō jijnáhan ró núu súcuan, te sa víhyá gā cusī ni rō, chí cáhnu ndasí coo tahū rō nde andiví. Chí suni súcuan ni cajito xeēn i tāca tée ni canacani jnūhun Yaā Dios jeē ní quijicoo xihna gā vēsú rohó.

*Jnūhun yátá siquī ñī jín siquī luz  
(Mr. 9.50; Lc. 14.34-35)*

13 Máá ró jijnáhan ró cájejniñu ró ini ñayiví nájñūhun jéjniñu ñī nuū cúñu návaha tú tehyū. Te núu ñī ún na náā jeē uhvuá, ¿te ndese nduu uhvuá tucu? Tuá cuajniñu cuiṭi gā, chí sa cate ñayuu te cueñū i siquī.

14 Máá ró cácuu nájñūhun luz jeē steén ini anuá ñayuu ñayiví. Te cácuu ró nájñūhun iñ ñuu íne xinī yúcu, jeē ma cúu quisáhí.

15 Te ni tu nástēn ñayuu iñ lámpara te chune i chíji cajón, chí sa suhva jéni i nuū sucún, návaha cundijin nuū tāca jēē cáyūcú ini vehe.

16 Te suni súcuan na steén rō luz maá ró nuū tāca ñayuu, te suu cúu jeē cúni i jniñu váha casáha ró, te cahān i jeē yóhoyo váha Yaā cúu Tátá rō jeē ndeé yá andiví.

*Jeē ni steén yā siquī ley Yaā Dios*

17 Ma cáni ni rō jijnáhan ró jēē véji ri snáā rī ley jeē ni jéhe Yaā Dios nuū Moisés, jín jēē snáā rī tāca jnūhun ni cacahān tēe ni canacani jnūhun ya jenahán. Tú véji ri jeē snáā rī, chí sa suhva jeē steén cají rí jnūhun ndíso.

18 Chí jendaá cahán rī jín ró jeē núu ní ní íyó andiví jín ñayiví, te ma náā cuiṭi ni iñ punto ni iñ letra nuū tútu ley yā, chí nde na squícu tācá ndhi jnūhun jeē cahán.

19 Núu súcuan te núu iñ ñayuu tu squícu i iñ jnūhun yáha jēē ndácu ley yā, vēsú iñ jnūhun lulí gá cúu, te núu steén i jeē suni súcuan sáha sava ga ñayuu, núu súcuan te cuu i ñayuu núu ga ichi andiví nuū ndácu Yaā Dios jniñu. Te núu iñ ñayuu squícu i te steén i jeē squícu ñayuu, yūcuán na te cujéhu i ichi andiví nuū ndácu Yaā Dios jniñu.

20 Chí cáhán rī jín ró jeē núu tú coo ndaā gā jniñu casáha ró vēsú jniñu casáha tēe cásteén tutu ley yā jín tée grupo fariseo, te ma quívicoo cuiṭi rō ndaha Yaā andiví jēē ndacu ya jniñu nuū rō.

*Jeē ni steén yā jeē ma quiṭí ni yō  
(Lc. 12.57-59)*

21 Je ni cajini ró jnūhun ni cacahān jín ñayuu jenahán, jeē ma cáhni i ndīyi, te na-ñi ñayuu núu cahni i ndīyi, te cundaā cuēchi i nuū tāca tóhō, achí.

22 Te ruhū chí cáhán rī jín ró, vēsú núu máá jēē quiṭí ni iñ ñayuu jito i jnáhan i, suni cundaā siquī cuēchi i ún. Te núu iñ ñayuu cahān neé i nuū jnáhan i, núu súcuan te cundaā cuēchi i un núu justicia cujéhu ga. Te núu iñ ñayuu cahān i nuū jnáhan i: Róhó jēē canéé íi, achí i, núu súcuan te quiví i nuū ñuhún infierno te núu ma nácani ni i.

23 'Jeē yúcuán te núu ni jinū rō nuū altar jín jéē socó rō nuū Yaā Dios, te núu ni nucūhun ni rō jeē ni sáha ró cuéchi siquī jnáhan ró,

24 núu súcuán te squéndōo ró jéē socó rō ún xiin altar, te xihna gā quihīn rō ndumanī rō jín jnáhan ró. Yūcuán na te nandicó ró socó rō.

25 'Te núu in ñayuu quihīn i jín ró nuū tohó jeē cacān i cuéchi siquī rō, núu súcuán te níni cuahān rō jín i ichi te sándaá maá ró jín i, návāha ma squívi i róhó núu juez. Chi juez siáha de róhó núu policía, te chune de róhó vecāa.

26 Te jendaá cahán rī jín ró jeē ma quénda cuiiti rō yūcuán, chi nde chunaa rō ndihī cuiiti xūhun jéē cájicān de.

*Jeē ni stéén yā jeē ma cósiquí ndéē jnáhan*

27 'Ni cajini ró jnúhun ni cacahān jenahán jeē ma cósiquí ndéē jnáhan ñayuu.

28 Te ruhū chi cáhán rī jín ró jeē núu in tēe ndéhe de nuū in ñahan jeē ndíyo ni de ña, yūcuán na te je ni casíquí ndéē de ñahan ún iní anuá de.

29 'Núu súcuán te núu tinūu lado váha ró sáha jeē quívi ró cuéchi, váha ga quenehen ró te scáne ró, návāha tuá sáha ró cuéchi. Chi váha gā jeē náá in tinūu ró vésú jeē cóo ndihī yiqui cúñu rō te quihīn rō infierno.

30 Te núu ndaha váha ró sáha jeē quívi ró cuéchi, váha ga cahnde rō te scáne ró, návāha tuá sáha ró cuéchi. Chi váha ga jeē náá in ndaha ró vésú jeē cóo ndihī yiqui cúñu rō te quihīn rō infierno.

*Jeē ni stéén yā jeē ma ndusin jnáhan  
(Mt. 19.9; Mr. 10.11-12; Lc. 16.18)*

31 'Te suni ni cacahān nde jenahán: Núu ndé in cúní stóo ñasihí, te na cuáha acta nuū ña jeē ndusin jín ña.

32 Te ruhū chi sa cáhán rī jín ró jeē núu in tēe stóo de ñasihí de, te núu nasūu jéē tíjni ni ña, núu súcuán te sáha de jeē casíquí ndéē ña de, chi condee ña jín inga tēe. Te núu in tēe condeca de ñahan ní ndusin, suni casíquí ndéē de ña.

*Jeē ni stéén yā siquī jnúhun jéjnūhun téyí*

33 'Te suni ni cajini ró jnúhun jeē ni cáhán jín ñáyuu nde jenahán: Núu ni jéjnūhun téyí ró jeē squícu ró, jito jínúu Yaā Dios, núu súcuán te canuú squícu ró jéē ni cáhán teyí ró un, áchí.

34 Te ruhū chi cáhán rī jín ró jijnáhan ró jeē ní in siquī jníñu ma cahán teyí ró nde jín síhvī Yaā Dios, ni ma cahán teyí ró jeē jito jínúu yā. Te núu jéjnūhun téyí ró te tú váha jeē ndácunehen ró andiví ni ñayiví. Chi andiví cúu nuū in mesa nuū ndácu Yaā Dios jniñu.

35 Te ñayiví cúu nájñūhun teyū nuū in jehē yā. Te ni ma ndácunehen ró ñuu Jerusalem, chi suu cúu ñuu maá Yáa cúu Rey kujéhu.

36 'Ni ma cahán rō jeē na cóndee cuéchi siquī rō núu tu squícu ró. Ma cahán rō súcuán, chi ma cúu cuiiti sáha ró jéē ni in íxi xíní rō nducuíjn chí ndujnúu.

37 Chi suhva-ni cahán rō: Cuu, achi rō. Tuú, achi rō. Chi núu chisóó gá rō jnúhun cahán rō, te nuū jexeén vēji.

*Jeē ni stéén yā jeē ma cuáha yó jéē ndútahū ñayuu  
(Lc. 6.29-30)*

38 'Ni cajini ró jnúhun jeē ni cáhán jín ñáyuu jenahán: Núu in tēe ndahva de tinūu jnáhan de, suni súcuán na ndáhva tinūu de. Te núu in tēe stáva de jnúhun jnáhan de, suni súcuán na stáva jnúhun de, áchí.

<sup>39</sup> Te ruhū chi sa cáhán rī jíin ró: Ma nácuāha ró jéē ndútahū tēe sáha ndevāha jíin ró. Chi sa núu ndé tēe cani de yíqui núu lado váha ró, te váha ga suni cuāha ró inga lado cani de, vēsú jeē nácuāha ró jéē ndútahū de.

<sup>40</sup> Te núu ndé tēe stáu yáhu de róhó te quénde de camisa rō, suni cuāha ró jnūhun jeē na quhín de jíin ndé ticāchi ró.

<sup>41</sup> Te núu ndé tēe scāca de róhó jéē condiso ró ndajníñu de ñin kilómetro, te caca ró úu kilómetro jíin de.

<sup>42</sup> Te na-ni ñayuu núu jíicán i ndajníñu ró, te cuāha ró núu i. Te ñayuu jíicán núu ndajníñu nuū rō, ma sasáhán ró cuāha ró núu i.

*Jnūhun jeē cundáhú ni yō ñayuu cájito uhū yohó*  
(Lc. 6.27-28, 32-36)

<sup>43</sup> Te suni ni cajini ró jnūhun jeē ni cáhán nde jenahán: Cundáhú ni rō ñayuu cáhīyo manī jíin ró, te coto uhū rō ñayuu cájito uhū rohó, áchí.

<sup>44</sup> Te ruhū chi sa cáhán rī jíin ró: Cundáhú ni rō ñayuu cájito uhū rohó. Te cacān rō jeē váha coo ñayuu cácahān ndevāha síquī rō. Te sáha váha ró jíin ñayuu cáquitī ni nuū rō. Te cacān tahú rō jehē ñayuu cácahān neé núu rō te cájito xeēn i róhó.

<sup>45</sup> Te súcuan stéén rō jeē cácuu ró séhe máa Tátá rō, Yaā ndeé andiví, chi máa yá jéhe niāndii cúndijin nuū ñayuu cunéé jíin ñayuu váha. Te jéhe ya saū nuū ñayuu casáha jniñu ndaā jíin núu ñayuu casáha jniñu néé.

<sup>46</sup> Chi núu íyó mánī rō jíin máa-ni ñayuu jeē manī jíin ró, te tú na tahū nihín rō nuū yā. Chi nde tēe cástútú xúhun renta jeē castáhú, suni súcuan casáha de.

<sup>47</sup> Te núu mánī jnánhan ró cáhán yíñúhún ró jíin, ¿te na vé jeē váha ga sáha ró núu súcuan? Chi nde ñayuu tu cácadíje Yaā Dios, suni súcuan casáha i.

<sup>48</sup> Núu súcuan te ndaā na cóo ndihí jeē sáha ró, nájñūhun íyó ndaā ndihí jeē sáha Tátá rō, Yaā ndeé andiví.

*Jeē ni stéén yā ndese sáha yó jniñu váha*

## 6

<sup>1</sup> Te jeē sáha ró táca jniñu váha nuū Yaā Dios, coto ró jéē ma sáha ró máa síquī jeē cūni ñayuu te cuajnúhún i róhó. Chi núu súcuan sáha ró, te tú na tahū rō cuāha máa Tátá rō, Yaā ndeé andiví.

<sup>2</sup> Jeē yúcuan te jeē sáha ró caridad, te ma sáha ró jéē cūni táca ñayuu, nájñūhun casáha tēe stáhú-ni, cáhīn de nuū cúchitú ñayuu ñi táca vehe ñi sinagoga jíin núu yáhu. Chi súcuan casáha de návāha cuajnúhún ñayuu de jeē váha casáha de. Jendaá cáhán rī jíin ró jeē tahū de cúu jeē jejnúhún ñayuu de.

<sup>3</sup> Te róhó jíinánhan ró, núu casáha ró caridad, te sáha yuhu rō, návāha nde amigo váha ró tú cuni jeē sáha ró.

<sup>4</sup> Súcuan na sáha yuhu rō caridad. Te máa Tátá rō jeē jíto ya jeē sáha yuhu rō, ñin quiví te cuāha ya tahū cuu ró.

*Jeē ni stéén yā ndese cacān tahú yō*  
(Lc. 11.2-4)

<sup>5</sup> Te jeē cájicān tahú rō, te ma sáha ró nájñūhun casáha tēe stáhú-ni. Chi cánujnahan ni de cuiñi de cacān tahú de nuū íyó chitú ñayuu ñi táca vehe ñi sinagoga jíin táca yíqui yáhu, návāha cuni ñayuu te cuajnúhún i de. Jendaá cáhán rī jíin ró jeē máa yúcuan-ni cúu tahū jeē nihín de, suu jeē jejnúhún ñayuu de.

<sup>6</sup> Te róhó jijnáhan ró, núu cájicān tahú rō, te ndīvi ró ini vehe ró te casi rō yehyí. Te cacān tahú rō nuū maá Tátá rō, Yaā ndeé yuhu jiín ró. Yūcuán na te maá Tátá rō jeē jito ya jeē súcuan sáha yuhu rō, sáha ya jeē jicān rō.

<sup>7</sup> Te jeē cájicān tahú rō, te ma cahán saá-ni ró jnúhun jeē tu cájecūhun ni rō, nájnūhun casáha ñayuu tu cájini jnúhun Yaā Dios. Chi cájeni ni i jeē núu cuehē jnúhun súcuan cahān i, te saá te cuni sōho ya, te tuú.

<sup>8</sup> Núu súcuan te ma sáha ró nájnūhun casáha maá i. Chi maá Tátá rō, je jíní yā na vé cájini ñúhún ró nde ná tu cacān rō nuū yā.

<sup>9</sup> Núu súcuan te suhva cacān tahú rō:

Tátá maá ná jijnáhan ná jéé ndeé ní andiví,  
níní na cóo yíñúhún ná nuū ní, chi Yaā ñí cúu ní.

<sup>10</sup> Te ñúhun ni na jéé yachī quiji quiví ndacu ní jniñu ní ñáyiví yáha.

Te na cóo táca jniñu nújnahan ni ní,

nájnūhun iyó ini andiví, súcuan na cóo ini ñáyiví.

<sup>11</sup> Staā jeē cátecu na táca quiví, cuāha ní nuū ná vijna.

<sup>12</sup> Te cone cahnu ni ni nuū táca cuéchi casáha ná núu ní,  
nájñūhun cáhine cáhnu ni na núu ñáyuu casáha cuéchi nuū ná.

<sup>13</sup> Te ma cuāha ni jnúhun jeē coto ndee jexeén sáñá,

chi sa suhva jnama ní sáña núu táca jéé neé.

Chi maá ní cúu Yaā ndácu jniñu, te jñí ní poder,  
te yōho luu cújéhu ní ní cáni. Súcuan na cóo. Amén.

Achi rō jijnáhan ró.

<sup>14</sup> Chi núu cone cáhnu ni rō nuū ñáyuu casáha cuéchi nuū rō, te suni súcuan cone cáhnu ni maá Tátá rō andiví nuū cuéchi ró.

<sup>15</sup> Te núu ma cóne cáhnu ni rō nuū ñáyuu casáha cuéchi nuū rō, te suni súcuan ma cóne cáhnu ni maá Tátá rō nuū cuéchi ró jijnáhan ró.

### *Jeē ni stéén yā siquí jnúhun condite ni*

<sup>16</sup> Te núu condite ni rō jeē chiñúhún ró Yaā Dios, te ma sáha ró nájnūhun casáha tēe stáhú-ni. Chi casáha de jeē coto xíí de, te súcuan stéén de nuū ñayuu jeē iyó ndite ni de, návāha cuajnúhún i de. Jendaá cahán rī jiín ró jeē maá yúcuán-ni cúu tahū jeē nihín de, suu jeē jejnúhún ñayuu de.

<sup>17</sup> Te maá ró jijnáhan ró, núu iyó ndite ni rō, te sa chuhun vāha ró xíní rō te nandahá núu rō,

<sup>18</sup> návāha ma cúni ñayuu jeē iyó ndite ni rō. Chi maá-ni Tátá rō jeē ndeé yuhu yā jiín ró, cuni yā, te ñn quiví te cuāha ya tahū cuu ró.

### *Ndese coo cúcá yó nde andiví*

*(Lc. 12.33-34)*

<sup>19</sup> Ma cóndihví ni rō caya rō ndajniñu cúcá ini ñáyiví yáha, chi quiví tiquíxin, te cáne xehyu, te tiví. Te suni quívicoo ñacuñhá te sácuñhá.

<sup>20</sup> Chi sa suhva sáha ró táca jniñu vāha návāha cayā tahū rō nde andiví. Chi yūcuán má quiví tiquíxin ni ma cáne xehyu jeē tiví. Ni ma cúu quiví ñacuñhá sácuñhá.

<sup>21</sup> Chi nde nuū nihín rō tahū vāha ró, yūcuán cúu nuū cóndihví ni rō siquí.

### *Tinūu cúu lámpara yiquí cúñu*

*(Lc. 11.34-36)*

<sup>22</sup> Tinūu ró cúu nájnūhun lámpara nuū yiquí cúñu rō. Núu súcuan te núu tinūu ró iyó ndijin, te ní-ni yiquí cúñu rō cúndijin.

<sup>23</sup> Te núu tinūu ró tu íyó ndijin, te ní-ni yiqui cúñu rō iyó nee. Te suni súcuan cúu ánuá rō, chí núu máni jeē jéni néé ni rō, te nacā jeē nee gā iyó ini anuá rō núu súcuan.

*Jeē ma cóndihvī ni yō siquī xúhun*  
(Lc. 16.13)

<sup>24</sup> Ní ñin mozo ma cúu cuajniñu de nuū uū patrón. Chi quitī ni de nuū ñin te coo manī de jíin inga, chí squícu váha de nuū ñin te sájéé ni de nuū inga. Te suni súcuan ma cúu cuajniñu ró núu Yaā Dios te núu máni siquī xúhun ndíhvī ni rō.

*Yaā Dios ndíto ya yohó*  
(Lc. 12.22-31)

<sup>25</sup> Núu súcuan te cáhán rī jíin ró jíjnáhan ró: Ma nácani ndasí ni rō siquī jeē cótecu rō, núu ndese caji rō coho ró, ni siquī sahma, núu ndese cuhun ró. Chi Yaā Dios ní sáha ya jeē técu rō jíin yiqui cúñu rō, te nagā ni cuu jeē ma cuáha ya jeē cáji rō jíin jéé cuhun ró.

<sup>26</sup> Condēhe ró ndese cátecu saa, chí tu cátaji tí, ni tu cánastútú tí jeē chúváha tí, ní tú yacā tí. Te vēsú súcuan te máá Tátá rō andiví scáji yā tí. Te cánuú ndasí gá rō jíjnáhan ró vēsú táca saa ún.

<sup>27</sup> ¿Te ndé ñin ró, á cuu scuéhnu ró máá ró sava metro gā, vēsú na nácani ndasí ni rō?

<sup>28</sup> ¿Te najehē cánacani ndasí ni rō jeē ma nihín rō sahma? Condēhe jíjnáhan ró ndese jéé ita táca yúcū. Chi tu sájniñu, ní tu táú.

<sup>29</sup> Te cáhán rī jíin ró jeē ni rey Salomón, quivī ní ñúhun de sahma váha ndasí, tu ní ñúhun de sahma lúu súcuan nájnūhun ita ún.

<sup>30</sup> Te núu súcuan jéhe Yaā Dios sahma lúu ita un jéé jéé vijna te sajnē cayū nuū ñuhún, te nagā ni cuu rohó jíjnáhan ró jéé ma sáha ya jeē nihín rō sahma. ¿Te naun tu cácandje ñihin ró jéé ndíto ya rohó?

<sup>31</sup> Núu súcuan te ma nácani ndasí ni rō siquī jeē cáji rō, jeē coho ró, jeē cuhun ró.

<sup>32</sup> Chi táca ñáyuu ñayiví jéé tu cácandje cúu jeē máni siquī jeē yáha cándihvī ní i. Te máá ró jíjnáhan ró, chí iyó Tátá rō andiví, te jíni yā jeē cájini ñuhún ró táca jéé yáha.

<sup>33</sup> Te sa suhva cánuú gá jeē cóndihvī ni rō siquī jniñu jeē ndácu Yaā Dios nuū rō, jíin síquī jeē sáha ró jniñu ndaā jeē núnahan ní yā. Yūcuán na te sáha ya jeē nihín rō táca jéé yáha.

<sup>34</sup> Núu súcuan te ma nácani ní rō siquī jeē cóo sajnē, chí vijna cúu vijna te sajnē cúu sajnē. Chi cani ní rō siquī jnúndóho jeē iyó ná ñin ná ñin-ni quiví.

*Jeē ma cahán yō siquī cuēchi jnáhan yó*  
(Lc. 6.37-38, 41-42)

## 7

<sup>1</sup> Ma cahán rō siquī ñayuu ndese sáha i, náváha suni ma cahán Yaā Dios cuēchi siquī máá ró jeē casáha ró súcuan.

<sup>2</sup> Chí nájnūhun cácahán rō siquī cuēchi ñayuu, suni súcuan cahán yā siquī cuēchi ró. Te cūhva jeē cándihvī ní rō siquī í, suni cūhva yúcuan sáha ya jíin ró.

<sup>3</sup> Chí cuēchi jnáhan ró cúu nájnūhun jeē íne ñin yāca lúli tinūú i. ¿Te naun casáha ró cuenta jeē súcuan, te tu casáha ró cuenta cuēchi máá ró jeē cúu nájnūhun jeē íne ñin nduhu tinūu máá ró?

4 ¿Te naun cácahān rō jín jnāhan rō: Na táva rī yāca íne tinūu rō, te tu cánacani ni rō jeē íne ñn nduhu tinūu máá rō?

5 Tēe stáhú-ni cácuu rō núu súcuan. Xihna gā tinūu máá rō tava rō nduhu, te yūcuán na te cuu condēhe váha rō jēē táva rō yāca tinūu jnāhan rō.

6 Ma sáha fuerza rō ñayuu cunéé quívicoo i nuū jnúhun ñi yā núu tu cúní i. Chi ndonda i siquī rō nájñuhun ina jeē cáyihí tí rohó. Te ma nácani rō jnúhun ya nuū ñáyuu jeē tu cúní cuiti cuajnúhún. Chi cándāa i nájñuhun quini jeē jeñú tí siquī perla jeē ndeé yahu ga.

*Cacān yō nuū yā te nihīn yō  
(Lc. 11.9-13; 6.31)*

7 'Cacān rō nuū Yaā Dios, te cuāha ya nuū rō. Te nducú rō tāca jēē váha íyó núu yā, te nihīn rō sáha ya. Te cacān tahú rō nde nihīn rō, nájñuhun sáha ñayuu cahán yehyí ndé nune quívi i.

8 Chi tāca ñáyuu jícán, cuāha ya nuū i. Te ñayuu nducú, suni nihīn i. Te ñayuu cahán, nune ya ichi nihīn i jeē cuní i.

9 ¿Te ndé ñn rōhó núu sēhe rō jícán i staā nuū rō, te á cuāha rō ñn yuū nuū i?

10 ¿Te núu jícán i ñn chācá, te á cuāha rō ñn coō nuū i? Tú cuiti súcuan.

11 Núu súcuan te máá rō jijnāhan rō, vēsú ñayuu iyó cuéchi cácuu rō, te cájini rō cuāha rō jēē váha nuū séhe rō. Te nagā ni cuu máá Tátá rō andiví jēē ma cuāha ya jeē váha nuū ñáyuu jícán nuū yā.

12 Te nájñuhun cúní rō jeē sáha váha ñayuu jín rō, suni súcuan na sáha váha rō jín i. Chi tutu ley Moisés súcuan ndácu jniñu, jín táca tutu tēe ni canacani jnúhun Yaā Dios.

*Siquī jeē quívi yó yéhyí túū  
(Lc. 13.24)*

13 'Condihví ni rō quívicoo rō ndaha Yaā Dios. Chi cúu nájñuhun ñn yéhyí túū. Chi yéhyí jín ichi jeē cuahán nuū jnahnú ndetū ñayuu, jité te cáhnu, te cuehē i quívicoo yūcuán.

14 Te yéhyí jín ichi jeē cuahán nuū nihín tahú i cotecu i, chi tuū yehyí te cuñi ichi, te jecu-ni i cánihīn i.

*Jín jniñu cásáha ñayuu te nácuni yō ndese ñayuu cácuu i  
(Lc. 6.43-44)*

15 Te ma cándíje cuiti rō tēe stáhú jēē cácahān de jeē jnúhun Yaā Dios cánacani de. Chi nájñuhun lanchi, quiti tú xeēn, súcuan cásáha de vējicoo de nuū rō. Te ñni anuá de chi cácuu de nájñuhun yihí, quiti xéén.

16 Jín jniñu cásáha de te nacuni rō de ndese tēe cácuu de. Chi cúu nájñuhun jeē tu scóyo rō ndehē uva xinī ññu, ni tu scóyo rō higo xinī ññu yóquin.

17 Te tācá yujnu váha chi jēhe ndehē váha, te yujnu neé chi cúun ndehē neé.

18 ñn yujnu váha ma cúun ndehē neé, te ni ñn yujnu neé ma cuāha ndehē váha.

19 Te tācá yujnu jeē tu jēhe ndehē váha, chi tahndē te cayū nuū ññuhún.

20 Te suni súcuan cácuu tēe ún, chi jín jniñu cásáha de te nácuni rō ndese tēe cácuu de.

*Nasúú ndihí ñayuu quívicoo andiví  
(Lc. 13.25-27)*

<sup>21</sup> 'Nasūū ndihi ñayuu jeē cahán i Jitoho i ruhū cúu jeē quivicoo nuū ndácu Tátá rī jniñu nde andiví. Chi quivicoo máá nene ñayuu jeē squícu jniñu cúní Tatá rī andiví.

<sup>22</sup> Te quiví jeē sándaa rī jniñu ñayuu, te cuehē i cahān jíin rí: Jitoho na jíjnáhan ná, ni canacani ná jnūhun jíin síhví ní, te ni caquenehen ná táchī jíin síhví ní, te ni casáha ná cuehē jniñu jéhu jíin síhví ní jeē nāa ni ñayuu sáha. Achi i.

<sup>23</sup> Yūcuán na te cahān rī jíin ñáyuu ún: Tu jíin cuiṭi rī rohó. Cujiyo quingoo ró, chi ñayuu casáha jniñu neé cácuu ró, achi rī.

### *Siquí uú vehe*

(Lc. 6.47-49; Mr. 1.22)

<sup>24</sup> 'Núu súcuan te táca ñáyuu jeē cájini sōho jnūhun cahán rī te squícu i, cácuu i nájñūhun iin tēe ni nacani vāha ni, te ni jeni de vehe de siquí cáva.

<sup>25</sup> Te ni cuun saū, te ni ndaa yūte, te ni quee tachī xeén, te ni cachundahá vehe ún. Te tu ní cotúú, chi siquí cáva ndéé.

<sup>26</sup> Te táca ñáyuu jeē cájini sōho jnūhun cahán rī te tu squícu i, cácuu i nájñūhun iin tēe cánéé jeē ní jeni de vehe de nuū ñiti.

<sup>27</sup> Te ni cuun saū, te ni quiji ndute ñúhún cuehē, te ni quee tachī xeén, te ni cachundahá vehe ún. Te ni cotúú-ni, te ni naa iī-ni. Achi yá jíin i jíjnáhan i.

<sup>28</sup> Te ná ni jínu ni cahān Jesús táca jnūhun yáha, te ñayuu cuehē un ní canaa ni i ni cajini i jnūhun ni steén yā.

<sup>29</sup> Chi ni steén vāha ya nuū i, chi máá yá cúu jeē ndiso jniñu siquí ndihi. Te tēe cástéén tutu ley Yaā Dios, tu súcuan cástéén de.

### *Jeē ní nasávāha ya iin tēe ndóho cuehyī stehyú*

(Mr. 1.40-45; Lc. 5.12-16)

## 8

<sup>1</sup> Te ni nanuu Jesús yucu ún, te cuehē ñayuu cándiquin i ya.

<sup>2</sup> Te iin tēe ndóho cuehyī stehyú, ni quee de nuū yā. Te ni jecuiñi yití de nuū yā, te ni cahān de jíin yá:

Jíin na jēe cuu sáha ní jēe nduvāha ná, te núu cúní ni, áchí de.

<sup>3</sup> Te Jesús ni soó yá ndaha ya siquí de, te ni cahān yá:

Cúní rī. Te na nduvāha ró, áchí yá.

Te ná ni cahān yá súcuan, te ni nduvāha-ni tēe ndóho cuehyī stehyú un.

<sup>4</sup> Yūcuán na te ni cahān Jesús jíin de:

Ma cáchi cuiṭi rō nuū ní iin. Chi quisteén rō máá ró nuū sutú, te condahá ró jeē socó rō nuū Yaā Dios, nájñūhun ni ndacu Moisés jniñu jenahán, návāha cuni ñayuu jeē ní nduvāha ró. Achi yá.

### *Jeē ní nasávāha ya mozo capitán*

(Lc. 7.1-10)

<sup>5</sup> Te ni quiví Jesús ñuu Capernaum. Te iin tēe nación Roma jeē cúu capitán, ni quee de nuū yā, te ni cahān ndahú de jíin yá:

<sup>6</sup> Mozo na cátu i vehe ná, chi ni ijin i te ndóho xeén i, áchí de.

<sup>7</sup> Te ni cahān Jesús:

Quihín rī nasávāha rī i núu súcuan, áchí yá.

<sup>8</sup> Te ni cahān capitán jíin yá:

Tu cújéhu ná jēe quihín ni quiví ní vehe ná. Chi máá jēe cahān-ni ní, te na nduvāha-ni mozo na.



<sup>9</sup> Chi máá ná suni ndíso jniñu ná ní casáha tēe cácujuhnu ga. Te cújéhnú ná núu táca soldado na. Te núu cáhán na jíin ñin de jeē na quihín de, te cuahán de. Te núu cáhán na jíin inga de jeē na quíji de, te quíji de. Te núu ndácu ná ñin jniñu nuū mozo na, te sáha i. Achí de.

<sup>10</sup> Te jeē ní jini Jesús jñuhun yáha, te ni naa ni yā. Te ni cahán yā jíin ñayuu cándiquñ yā ún:

Jendaá cahán rí jíin ró jeē ni nación yō Israel tu ní níhín rí ni ñin ñayuu candíje níhin súcuan, nájnūhun cándíje tēe yáha, vēsú tēe nación tu jíin jñuhun Yāā Dios cúu de.

<sup>11</sup> Te cáhán rí jíin ró jeē quíjicoo cuehē ñayuu ichi núu cáne niándii jíin ichi núu quēe niándii. Te cucōo i caji i staā jíin Abraham jíin Isaac jíin Jacob nuū ndácu Yāā Dios jniñu nde andiví.

<sup>12</sup> Te sava ñayuu nación Israel jeē maá i quñvicoo núu, te sa quenehen ya i quihín i nuū néē, chí tu ní cácandíje i. Te yūcuan ndáhyū i te nacayíhí yuhu i jeē ndoho xeēn i. Achí yá.

<sup>13</sup> Yūcuán na te ni cahán yā jíin tēe cúu capitán:

Cuánuhun vehe ró, chí sáha rí nájnūhun cándíje ró jēe sáha rí.

Te mozo de un ní nduvāha-ni i máá hora un.

*Jeē ní nasávāha ya naná chíso Pedro*

*(Mr. 1.29-31; Lc. 4.38-39)*

<sup>14</sup> Te ni jehēn Jesús vehe Pedro. Te ni jito ya naná chíso de jeē catú ña yíhi quíji ña.

<sup>15</sup> Te ni jniñ ya ndaha ña, te ni quenda-ni quíji ún ña. Te ni ndocuññí ña, te ni sáha ña jeē ní cayejí de jíin yá.

*Jeē ní nasávāha ya cuehē ñayuu*

*(Mr. 1.32-34; Lc. 4.40-41)*

<sup>16</sup> Te jeē ní cuaa ní quecoo ñayuu jíin cuehē ñayuu jeē níuhun tachí ini i. Te ni quenehen ya tachí un cuángoo jíin jñuhun cáhán-ni ya. Te suni ni nasávāha ya táca ñayuu cácuñu.

<sup>17</sup> Te súcuan ní cuu návāha cundaā jñuhun ní cahán Isaías, tēe ni nacani jñuhun Yāā Dios jenahán: Máá yá ní tejiyo ndinuū cuehyí cándoho yó, áhí Isaías.

*Siquí ñayuu jeē cácuñi i condiquñ i ya*

*(Lc. 9.57-62)*

<sup>18</sup> Te ni jito Jesús jeē ní ndicó ndúu cuehē ñayuu yā. Te ni cahán yā jíin tēe cácuáha jíin yá jeē na yáha de jíin yá inga lado mar.

<sup>19</sup> Te ñin tēe stéén tutu ley Yāā Dios, ni quee de nuū yā, te ni cahán de:

Maestro, condiquñ na níhín quihín yō ndé-ni cúu-ni nuū quihín ni, áhí de.

<sup>20</sup> Te ni cahán Jesús jíin de:

Tāca ñúcuui, iyó yáú cava cáñuhun ti. Te suni saa, iyó táca tí. Te ruhū, Yāā ní nduu tēe, tuú nuū cusú rí, achí yá.

<sup>21</sup> Te inga tēe ni cahán de jíin yá, te tēe scuáha jíin yá cúu de:

Condetu ní ndé na quíchindūji ná tátá na xíhna gā. Yūcuán na te condiquñ na níhín, áhí de.

<sup>22</sup> Te ni cahán Jesús jíin de:

Condiquñ ruhū na quihín yō. Te stóo táca ndýi na chíndūji jñahan ndýi, chí ndýi cácu ñayuu tu cácandíje. Achí yá.

*Jeē ní jecuíñi tachī nīhin jín mar ní sáha ya*

*(Mr. 4.35-41; Lc. 8.22-25)*

<sup>23</sup> Yūcuán na te ní quívi Jesús ini barco, te tēe cáscuáha jín yá ní quívicoo de cuahān de jín yá.

<sup>24</sup> Te nuū mar ní jecuñi ñin tachī nīhin, te ní stónnda ndute mar, ní quívi ini barco un. Te Jesús chí quíxi yá.

<sup>25</sup> Te tēe cáscuáha jín yá ní castónnda de ya, te ní cacahān de:

Jnama ní yóhó, chí je quée yó chíji ndute, áchí de.

<sup>26</sup> Te ní cahān yá jín de:

¿Naun cáyühú ndasí ró? Te tu cácandíje nīhin ró jéē cácu ró sáha ri, achí yá.

Yūcuán na te ní ndocuñi yá, te ní cahān yá nuū tachī nīhin un jín núu mar. Te ní cuu nayúú í-ní.

<sup>27</sup> Te ní canaa ní de jíjnáhan de, te ní cacahān de:

¿Ndé ñin ga cúu tēe yáha, jéē ndé tachī nīhin jín mar cájetáhú jéē cahán de? áchí de.

*Tēe Gadara jeē cándoho tachī*

*(Mr. 5.1-20; Lc. 8.26-39)*

<sup>28</sup> Te ní jinū yá ñga lado mar, máá región ñayuu Gadara. Te uū tēe ní quendacoo de nde nuū yíndūji ndívi, ní quijnahan de ya. Te cáñuhun tachī ini de, te siquí jeē yóhoyo xeēn tachī ún, te ní ñin ñayuu tu cúu yáha i ichi yúcuán.

<sup>29</sup> Te ní cacana cóhó de ní casáha tachī:

¿Naun véji ní núu ná, Jesús Sēhe Yaā Dios? ¿A véji ní yáha jeē stóho ní sáña ndé ná tu quee máá quívi? áchí.

<sup>30</sup> Te nde jíca jecu cáhñin cuehē quíñi cájitu tí.

<sup>31</sup> Te tachī jeē cáñuhun ini tēe un ní cacahān ndahú jín yá:

Núu quenehen ní sáña, te cuáha ní jñuhun na quívicoo ná ini quíñi cáhñin yūcuán, áchí.

<sup>32</sup> Te ní cahān yá jín:

Cuángoo núu súcuán.

Te ní quendacoo tachī ún ini tēe ún, te ní quívicoo ini quíñi. Te quíñi un ní cajinu tí ní caníngava tí ñin yucáva, te ní ndaquíñi tí ndute mar, ní cajihí tí.

<sup>33</sup> Te tēe cándito tí ní cajinu de cuangoo de jeē ní cayühú de. Te ní najinúcoo de ñuu. Te ní cacastühún de táca jñiñu yúcuán, jín ndese ní cuu jeē ní quendacoo tachī ini ndíndúú tēe ún.

<sup>34</sup> Yūcuán na te ndívi ñayuu ñuu un, ní quendacoo i cuacondēhé i Jesús. Te ná ní jinúcoo i nuū ñe ya, te ní cacahān ndahú i jín yá jeē na quénda ya región yúcuán quíñi yá.

*Jeē ní nasávaha ya ñin tēe ndóho cuehyi ní jín*

*(Mr. 2.1-12; Lc. 5.17-26)*

## 9

<sup>1</sup> Yūcuán na te ní ndívi Jesús ini barco. Te ní nayáha ya cuahān yá ñga lado mar, te ní najinū yá ñuu máá yá.

<sup>2</sup> Te ní caquindeca ñayuu ñin tēe ndóho cuehyi ní jín, cátu de nuū ñin camilla. Te ní jini Jesús jeē cácandíje i jeē cúu nasávaha ya tēe ní jín ún. Te ní cahān yá jín de:

Na ndúndeyí ní rō séhē, chí je ñe cáhnu ní rí nuū táca cuéchi ró, áchí yá.

<sup>3</sup> Yūcuán na te jecu tēe cástéén tutu ley Yaā Dios, ní cajeni ní de siquí yá: Jeē cahán tēe yáha súcuán, chí cáhán de jñuhun ndeváha jeē quítí ní Yaā Dios.

4 Te ni jini Jesús jeē súcuan cájeni ni de, te ni cahān yā jiín de:

¿Naun cájeni ni rō jeē cahān ndevāha rí?

5 Jeē uú jñūhun yáha, ¿ndé ñn yíí gá cáa? ¿A jeē cahān rī jiín tēe cūhú: Je íne cáhnu ni rī nuū tāca cuēchi ró? ¿Chí yíí gá jeē cahān rī: Ndocuñī te caca ró, chí je ni nduvāha ró, achi rī?

6 Te vijna te na steén rī jeē maá rí, Yaā ní nduu tēe, ndíso jñíñu ri ini ñayivi yáha jēe cōne cáhnu ni rī nuū cuēchi.

Yūcuán na te ni cahān yā jiín tēe ni íjin ún:

Ndocuñī te naquihin ró camilla rō te quinhun rō vehe ró, áchí yá jiín de.

7 Yūcuán na te ni ndocuñī-ni tēe ún, te cuanhun de vehe de.

8 Te ná ni cajito ñayuu un jēe súcuan ni sáha ya, te ni cayúhú i. Te ni cacahān i jeē yóhoyo vāha Yaā cúu Yaā Dios jeē súcuan ni jēhe ya poder nuū ñn tēe jeē cúu nasávāha de ñayuu, achí i cajito i Jesús.

### *Jeē ní cana ya Mateo*

*(Mr. 2.13-17; Lc. 5.27-32)*

9 Te ni quenda Jesús yūcuan cuahān yā. Te ni jito ya nuū ñn tēe nání Mateo, néne de nuū cutútú xúhun renta. Te ni cahān yā jiín de:

Condiquín ruhū na quíhín yō.

Te ni ndocuñī de, te cuahān de jiín yá.

10 Yūcuán na te ni jehēn yā ni yeji yā staā vehe de. Te cuehē tēe cástútú xúhun renta jiín inga tēe cásaaha cuēchi, suni cáyúcú de cáyeji de staā jiín Jesús jiín tēe cáscuāha jiín yá.

11 Te tēe grupo fariseo, ni cajito de, te ni cacahān de jiín tēe cáscuāha jiín yá: ¿Naun yeji maestro rō jiín tēe cástútú xúhun renta jiín inga tēe cásaaha cuēchi? áchí de.

12 Te ni jini Jesús, te ni cahān yatá yá jiín de:

Ñayuu cáhiyo vāha, tu jini ñúhún i tēe tájna, chí ñayuu cácuhū cúu jeē jini ñúhún.

13 Cuahān jijnáhan ró núu súcuan, te nacani ni rō na vé cúu jeē cahān jñūhun yáha jēe yosó núu tútu íi: Cúni rī jeē na cúndáhú ni rō jñáhan ró, nasūu jēe socó rō quiñi nuū rī, achí Yaā Dios nde jenahán. Te ruhū nasūu jēe véji ri cana ri ñayuu tú cuēchi, jeē cúu i nájñūhun ñayuu cáhiyo vāha, chí sa suhva véji ri cana ri ñayuu iyó cuēchi, jeē na nácani ni i te stóo i cuēchi i. Achí yá.

### *Jeē ní cacajñúhún de ya siquī jeē cóndite ni*

*(Mr. 2.18-22; Lc. 5.33-39)*

14 Yūcuán na te tēe cáscuāha jiín Juan tēe scuándute, ni quecoo de nuū Jesús. Te ni cacahān de jiín yá:

Saña jiín tēe grupo fariseo, tijni jínu cáhiyo ndite ni na núu Yaā Dios. Te tēe cáscuāha jiín máá ní, ¿naun tu cásaaha de súcuan?

15 Te ni cahān Jesús jiín de:

¿A cuu condite ni de níni jēe iyó rí jiín de? ¿A cuu cucuíhyá ni ñayuu cáhiin vico nándāha, te núu níni néne tēe nándāha? Te quee quivī jeē cújiyo tēe nándāha, te quivī ún chí condite ni i.

16 Te ni cahān yā uú jñūhun yatá siquī jeē tu quíjnáhan jñūhun jeé jēe steén yá jiín táca jñūhun jenahán. Achí yá:

Ñi ñn tu náchuhun ñn pedazo sahma jēe núu ñn sahma túhú. Chí núu súcuan te ndiyi pedazo jeé un, te tahndē gā jeé tuhú un, te nducáhnu ga nuū catáhné un.

17 Te suni tu cáchuhun vino jeé ini ñi# túhú. Chi núu súcuan te ndatá ñi# ún, te naa vino jiín ñi#. Chi cánuú jéé chúhun i vino jeé ini ñi# jéé, te súcuan te quéndō vāha ndindúú. Achí yá.

*Jnūhun sēhe síhí Jairo jiín ñahan ní quehé yusáhma ya*  
(Mr. 5.21-43; Lc. 8.40-56)

18 Te níni cáhán Jesús táca jnūhun yáha, te ñn tēe cújéhnú nuū ñáyuu hebreo, ní quee de nuū yá. Te ní jecuiñi yití de nuū yá, te ní cahān de:

Sēhe síhí ná sá ní jihí i. Te núu na quihín yō soó ní ndaha ní síquī i, te natecu i. Achí de.

19 Te ní ndocuiñi Jesús, te cuahān yā jiín de, te suni cuangoo tēe cáscuáha jiín yá.

20 Te mēhñu ñáyuu cuangoo jiín yá ní quee ñn ñahan, te je ní cuu uxī uū cuiyā ndóho ña cuehyi niñi. Te ní quee ña ichí yátá yá, te ní quehé ña yusáhma ya.

21 Chi ní jeni ní ña: Vēsú maá sahma ya na nihín rī quehé rí, te nduvāha rī, jeni ní ña.

22 Te ní ndió cóto Jesús, te ní jito ya nuū ña, te ní cahān yā:

Na ndúndeyí ní rō, séhē. Ní candíje rō jéé cuu nasávāha rī rohó, te jeé yúcuan ní nduvāha rō, achí yá.

Te ní nduvāha ña máá hora un.

23 Te ná ní jinū Jesús vehe tēe cújéhnú ún, te ní jito ya nuū tēe cácuu músico jeé quíchindūji de i, jiín núu ñáyuu cuehē, cásvāā i.

24 Te ní cahān yā jiín i:

Cujiyo jínáhan rō, chí sūchi síhí yáha, tu ní jihí i chí quixí-ni i, achí yá.

Te ní cajecū catá i jeé ní cahān yā.

25 Te ní quenehen ya ñayuu cuehē ún, te ní quivi ya ini vehe. Te ní jn# ya ndaha sūchi síhí ní jihí ún, te ní ndocuiñi-ni i.

26 Te ñí región yúcuan ní jitē núu jnūhun jniñu jéhnú ní sáha ya ún.

*Jeé ní nasávāha ya uū tēe cuáá*

27 Te ní quenda Jesús yúcuan cuahān yā. Te uū tēe cuáá cuángoo de yatā yā, cácana jee de:

Máá ní jeé cúu ní Sēhe yucūn David, cundáhú ní ní sáña víi, achí de.

28 Te ná ní jinū yā vehe, te ní jinūcoo tēe cuáá un núu yā. Te ní cahān yā jiín de:

¿A cácandíje rō jéé cúu nanune rī tinūu rō? achí yá.

Te ní cacahān de:

Cácandíje ná, achí de.

29 Yūcuán na te ní tee ya ndaha ya tinūú de, te ní cahān yā:

Na sáha rī nájnūhun cácandíje rō, achí yá.

30 Te ní cananune-ni tinūú de. Te Jesús ní cahān ñihin ya jiín de:

Ma cáchi cuiñi rō nuū ní ñn, achí yá.

31 Te máá de chí ní quendacoo de, te ní cajete-ni de jnūhun ñí región yúcuan jéé súcuan ní sáha ya jiín de.

*Jeé ní nasávāha ya ñn tēe ñihín*

32 Te nuū ní quendacoo tēe un cuángoo de, te ní quecoo ñayuu jiín ñn tēe ñihín, jeé ñúhun tachí ini de.

33 Te ní quenehen ya tachí un cuahān. Te tēe ñihín un ní nacahān de. Te ní canaa ní ñayuu ní cajito i, te ní cacahān i:

Ná tu cuní cuiñi yō ní ñn jniñu súcuan ini ñuu Israel, achí i.

<sup>34</sup> Te tēe grupo fariseo chi ni cacahān de:

Tēe yáha chí quénehen de tachī jín fuerza maá jexeén jeē cujéhnū nuū tachī, achí de.

*Jeē cundáhú ni yā ñayuu cuehē*

<sup>35</sup> Te ni jica cuu Jesús tǎcá ñuu jín rancho, te ni steén yā jñūhun ini tǎcá vehe i sinagoga. Te ni nacani ya jñūhun vāha ndese ndácu Yaā Dios jniñu. Te ni nasávāha ya ñayuu cácuñū na-ni cuehyī cándoho i.

<sup>36</sup> Te cundáhú ni yā jito ya nuū ñayuu cuehē ún. Chi cándoho i te cácuñíhyá ni i, chí cácuu i nájnūhun lanchi jeē tú jito ho tī, chí tu ndíquin i Yaā cúu Jito ho i.

<sup>37</sup> Yūcuán na te ni cahān yā jín tēe cáscuáha jín yá:

Ñayuu yáha cácuu i nájnūhun trigo jeē tahndé, te ndaā jeē cuehē cúu, te tēe cahnde chí jecu-ni de cúu.

<sup>38</sup> Núu súcuan te cacān tahu rō nuū maá Jito ho rō Yaā Dios jeē na táji yá cuehē tēe na quíngoo de cahnde de trigo, cúu jeē nácani de jñūhun ya nuū ñayuu. Achí yá.

*Jeē ní nacāji ya uxī uū tēe apóstol*  
(Mr 3.13-19; Lc. 6.12-16)

## 10

<sup>1</sup> Yūcuán na te ni cana ya uxī uū tēe jeē scuáha de jín yá. Te ni jēhe ya poder nuū de jeē quenehen de tachī ini ñayuu, jín jéé nasávāha de ñayuu cácuñū tǎcá ndínūu cuehyī.

<sup>2</sup> Te yáha cúu síhví ndihúxí uū tēe apóstol un: Tēe ñn cúu Simón jeē suni nání Pedro, jín ñani de Andrés. Te uū gā de cácuu sēhe Zebedeo, te nání de Jacobo jín Juan.

<sup>3</sup> Yūcuán na te Felipe, Bartolomé, Tomás, Mateo tēe ni stútú xúhun renta, Jacobo sēhe Alfeo, jín Lebeo jeē suni nání Tadeo,

<sup>4</sup> jín Simón tēe grupo cananista, jín Judas Iscariote, tēe jeē ní nastúu de ya.

*Jeē ní taji yá ndihúxí uū de quinacani de jñūhun*  
(Mr. 6.7-13; Lc. 9.1-6)

<sup>5</sup> Te ni taji Jesús ndihúxí uū tēe yáha jeē quíngoo de. Te ni ndacu ya jniñu nuū de ndese sáha de:

Ma quíngoo ró núu ñayuu jeē násūu ñayuu hebreo cácuu i, ni ma quívicoo ró tǎca ñuu ñayuu Samaria.

<sup>6</sup> Chi nuū maá-ni ñayuu nación yō Israel quíngoo ró, chí cácuu i nájnūhun lanchi jeē ní sana.

<sup>7</sup> Te jeē quíngoo ró te suhva nacani ró jñūhun: Je ni cuyajni Yaā ndeé andiví jeē ndacu ya jniñu nuū rō, achí rō.

<sup>8</sup> Te nasávāha ró ñayuu cándoho cuehyī stehyú jín ñayuu cándoho tǎca gá cuehyī, te nastécu rō ndíyī te quenehen ró táchī ini ñayuu. Te súcuan-ni ni jēhe ri poder nuū rō jeē sáha ró, te suni súcuan-ni sáha ró jín i.

<sup>9</sup> Te ma cóndiso ró xúhun oro, ni xúhun plata, ni centavo cuechí.

<sup>10</sup> Ni ma cóndiso ró ñunu stáá caji rō ichi, ni inga camisa, ni ndijēn, ni vara. Chi siquī jniñu jeē nácani ró jñūhun nuū ñayuu, te cánuu coto i rōhó.

<sup>11</sup> Te na-ni ñuu chí rancho núu ni jinūcoo ró, te yūcuán nducú ró ñn ñayuu vāha, te coyūcu ró vehe i nde quíngoo tucu ró.

12 Te jeē quivī ró vehe ñayuu ún, te cahān rō jeē na quíji jnūhun ndeyí jnūhun sīh ni nuū i.

13 Te núu ñayuu vāha cácuu i, te jnūhun ndeyí ní cahān rō quendōo siquī i. Te núu nasūo ñayuu vāha cácuu i, te jnūhun ndeyí ní cahān rō ma quendōo siquī i.

14 Te núu iyó ñayuu jeē tu cájetáhú i róhó, ni tu cúní i cuni nahín i jnūhun cahān rō, yūcuán na te quendacoo ró vehe un chí ñuu ún, te scóyo ró tícachā jehē rō, te súcuan stéén rō jeē iyó cuéchi i jeē tu ní cájetáhú i.

15 Jendaá cahán rī jīn ró jeē quivī juicio te xeēn gā coo castigo siquī ñuu casáha súcuan vēsú siquī ñuu Sodoma jīn ñuu Gomorra nuū ní casáha ndasí ñayuu cuéchi.

### *Jeē coto xeēn ñayuu de jijnáhan de*

16 \*Cuni sōho ró, chí tájí rí rohó quíngoo ró nájñūhun lanchi mēhñu yíhī. Núu súcuan te coo listo rō nájñūhun coō, te coo vítá ni rō nájñūhun paloma.

17 Te condito ró máá ró nuū ñayuu, chí quee quivī jeē quíndeca i róhó núu tohó, te caní i róhó iní tǎcá vehe ñi sinagoga.

18 Te suni nde nuū tǎcá gobernador jīn rey quíndeca i róhó jéē siquī ruhū. Te súcuan te nune ichi jeē nacani ndaā rō jnūhun ri nuū de jīn núu ñayuu tǎcá nación jeē tu jīn jnūhun Yaā Dios.

19 Te núu ni jendeca i róhó núu tǎca tée ún, ma nácani ndasí ni rō ndese cahān rō. Chí máá hora un te máá yá steén nuū rō ndese cahān rō.

20 Chí nasūu máá ró cúu jeē cahán, chí Espíritu maá Tátá rō cúu jeē cahán jīn yuhu ró.

21 \*Te sava ñayuu tu cácandíje, nastúu i ñani i jeē na cúu. Te tátá nastúu sēhe. Te sēhe ndonda siquī tatá jīn náná jeē na cúu.

22 Te ndihí ñayuu quití ni i nuū rō jeē siquí ruhū. Te ñayuu jeē cuiñi nīhin nde jeē jīnu jnūndóho, ñayuu ún chí cácu ánuá i.

23 Te núu cájito xeēn i róhó ñi ñuu, te cunu ró quíhīn rō inga ñuu. Chí jendaá cahán rī jīn ró jeē ma ndécāva ró caca cuu ró ndihí nación yō Israel te ndiji-ni máá rí, Yaā ní nduu tēe.

24 \*ñi tēe scuáha, tu cújéhnu de nuū maestro de. Ni tēe cúu mozo, tu cújéhnu de nuū patrón de.

25 Tēe scuáha chí nájñūhun ndóho maestro de suni súcuan ndoho nahín máá de, te tēe cúu mozo suni ndoho de nájñūhun ndóho patrón de. Núu súcuan te núu ruhū cácahān i jeē Satanás cúu ri, te nagā ni cuu jeē ma cahán i jeē rohó cácuu Satanás.

### *Jeē ní cachi yā ndé ñi cúu jeē yūhu yó (Lc. 12.2-9)*

26 \*Núu súcuan te ma yūhu ró coto ró ñayuu. Chí tǎca jnūhun cácahān sǎhí i ma quendōo sǎhí cuiiti, chí ndihí natūu ndijin, te cuni ñayuu.

27 Jnūhun ní cahān rī jīn ró jeē tu ní jīn ñayuu, na nácastūhun cájí ró nuū i. Te jnūhun ní nacani sǎhí rí nuū rō, na nácani jee ró yátá tǎcá vehe.

28 Te ma yūhu ró coto ró ñayuu cahni yiqui cúñu rō, chí ma cúu cahni i ánuá rō. Chí sa suhva yūhu ró jéē ma stívi ró núu Yaā Dios, chí cuu snáhnú ndetū yā rohó jéē quiví ánuá rō jīn yiqui cúñu rō infierno.

29 \*Te tǎcá saa chí tú yahu ndéé tí, chí nde uū tí jeē ñi centavo lulí. Te ni ñi tí tu nánga nuū ñūhun te núu tu jéhe Tátá rō jnūhun, chí ndíto ya tí.

30 Te nagā ni cuu rohó jijnáhan ró, chí nde ndihí ixi xíní rō je ni cahu ya.

<sup>31</sup> Núu súcuan te ma yūhu ró jijnáhan ró, chí cánúú ndasí gá rō nuū yā vēsú cuehē tācá saa.

*Ñayuu jejnúhún Jesucristo nuū inga ñayuu*  
(Lc. 12.8-9)

<sup>32</sup> Te tāca ñayuu jeē cuajnúhún ruhū nuū inga ñayuu, suni súcuan cuajnúhún rí i nuū Tatá rí, Yāā ndeé andiví.

<sup>33</sup> Te tāca ñayuu jeē ma cuajnúhún ruhū nuū inga ñayuu, suni súcuan ma cuajnúhún rí i nuū Tatá rí, Yāā ndeé andiví.

*Jeē siquí Jesús te cusín ini ñayuu*  
(Lc. 12.51-53; 14.26-27)

<sup>34</sup> Ma cáni ni rō jijnáhan ró jēē véji ri jeē cóyūcu mání ñayuu ñayiví. Tú véji ri jeē cóyūcu mání ñayuu, chí sa suhva cuajnáhan i jeē siquí ruhū.

<sup>35</sup> Chí jeē siquí ruhū te cusín ini sehe yíí jíin tátá, te sehe síhí jíin náná, te sehe jēnu jíin náná chíso.

<sup>36</sup> Chí tāca ñayuu candíje ruhū, chí jnáhan vehe i cúu jeē quiṭi ni nuū i.

<sup>37</sup> Te núu ndé ñin ñayuu maní gā i jíin tátá i chí jíin náná i vēsú jíin ruhū, nasū ñayuu vāha cúu i jeē cóndiquín i ruhū. Te núu ndé ñin ñayuu maní gā i jíin sehe yíí i chí jíin sehe síhí i vēsú jíin ruhū, te suni nasū ñayuu vāha cúu i jeē cóndiquín i ruhū.

<sup>38</sup> Te na-ni ñayuu núu tu jéhe i jnūhun ndoho i jnūndóho vēsú nde cuu i jeē siquí jeē cóndiquín i ruhū, nasū ñayuu vāha cúu i jeē cóndiquín i ruhū.

<sup>39</sup> Te núu ndé ñayuu cúní i cácu i nuū jnūndóho quiji nuū i jeē siquí ruhū, núu súcuan te jnahnú ndetū i níí cáni. Te núu ndé ñin ñayuu vēsú na cúu i jeē siquí ruhū, te cotecu i níí cáni.

*Jeē iyó táhū yō nuū Yāā Dios*  
(Mr. 9.41)

<sup>40</sup> Te ñayuu cuatáhú róhó jijnáhan ró, núu súcuan te ruhū cájetáhú i. Te ñayuu cájetáhú ruhū, cájetáhú i Yāā ní tají ruhū véji ri.

<sup>41</sup> Núu na-ni ñayuu cuatáhú i ñin tēe nácani jnūhun Yāā Dios, siquí jeē jíca de jniñu Yāā Dios, núu súcuan te inuú-ni coo tahū de nuū Yāā Dios jíin tēe nácani jnūhun Yāā Dios. Te núu na-ni ñayuu cuatáhú i ñin tēe ndaā, siquí jeē tēe ndaā cúu de, núu súcuan te inuú-ni coo tahū de nuū Yāā Dios jíin tēe ndaā.

<sup>42</sup> Te núu ndé ñayuu cuāha i vēsú ñin ñajin ndute míjin coho ñin sūchi yāha, siquí jeē cúu i sūchi cándíje ruhū, ndaā ndije cúu jeē nihín i tahū i. Achí yá.

*Jeē ní tají Juan uū tēe nuū yā*  
(Lc. 7.18-35)

## 11

<sup>1</sup> Te ná ni jīnu ni ndacu Jesús jniñu nuū ndihúxí uū tēe cáscuáha jíin yá, te ni quenda ya yūcuan cuáhān yā jeē steén yā te nacani ya jnūhun tācá ñuu región yūcuán.

<sup>2</sup> Te íne Juan vecāa. Te ni nihín de jnūhun tācá jniñu sáha Cristo. Te ni tají de uū tēe cáscuáha jíin de,

<sup>3</sup> cuacajnúhún de ya:

¿A máá ní cúu Cristo jeē achí tutu jeē quiṭi, chí condetu yó inga tēe quiṭi? achí de.

<sup>4</sup> Te ni cahān yā jíin de:

Cuángoo te castūhun ró nuū Juan tācá jniñu cájito ró jíin jnūhun cájini ró.

<sup>5</sup> Te cachi rō nuū de jeē ñáyyu cuaá cánanune tinūū i, te ñayuu yacuá cánacaca i, te ñayuu ndóho cuehyī stehyú cánduvāha i, te ñayuu sohó cánanune sōho i, te ñayuu jīhī nátecu i sáha ri. Te suni nácani ri jñūhun nuū ñáyyu ndahú jéē jnama Yaā Dios i.

<sup>6</sup> Te yōhyo ndetū tēe jeē ma nácani yátá ni de jeē ruhū cúu Cristo. Súcuan cachi rō nuū Juan. Achí yá jīn de.

<sup>7</sup> Te náa cuanuhun ndíndúú tēe ún, te ni quejéé Jesús cahán yā jñūhun Juan jīn ñáyyu:

¿Na vé ni jécondēhe ró jijnáhan ró nde nuū ñūhun téhé? ¿A ñn tēe jéni ñn jéni uū ni, nájñūhun ite jeē cánda sáha tachī?

<sup>8</sup> Te núu tuú, ¿te na vé ni jécondēhe ró núu súcuan? ¿A ñn tēe cúni cújéhu jeē ñūhun sahma lúu? Tuú chí cájini rō jeē tēe cáñuhun sahma lúu, máni ñni vehe rey cáyúcu de.

<sup>9</sup> ¿Te na vé ni jécondēhe ró núu súcuan? ¿A ñn tēe nácani jñūhun Yaā Dios? Cáhán rī jīn ró jeē suu ni jécondēhe ró, te cújéhu ga Juan yáha vēsú táca gá tēe ni canacani jñūhun Yaā Dios.

<sup>10</sup> Chí jñūhun Juan cúu jeē ni cáhān Yaā Dios jeē yosó núu tútu ñi:

Tají rī tēe nacani jñūhun ri cosnūū de ichi núu Cristo,

návāha coo tūhva ñayuu jeē jinú yā.

Achí Yaā Dios, achí tutu.

<sup>11</sup> Te jendaá cahán rī jīn ró jeē ñni ñayīvi yáha cújéhu ga Juan tēe scuándute vēsú táca gá tēe jeē ni ñyo ñni ñayīvi. Te vēsú súcuan te táca tēe núu ga ñni ñnu nuū ndácu Yaā andivī jñiñu, cújéhu ga de vēsú Juan.

<sup>12</sup> Te nde quivī ní quee Juan tēe scuándute, te nde vijna, chí cánducú ndéyí ñáyyu quívicoo i ndaha Yaā andivī jéē ndácu ya jñiñu nuū i. Te nde ñayuu xeēn cánducú ndéyí i siquī.

<sup>13</sup> Chí nde ná tu quiji Juan, te ni ñyo máá ley Moisés, te suni ni ñyo táca tēe ni canacani jñūhun Yaā Dios. Te ni cacastūhún de ndese coo jeē ndacu Yaā Dios jñiñu.

<sup>14</sup> Te ni cacahān de jeē ndíji Elías. Te núu cáculi rō cuatáhú ró jñūhun, te jíní rō jeē maá Juan cúu tēe jeē ní cachi tutu jeē quíji, chí cúu de nájñūhun Elías.

<sup>15</sup> Táca róhó jéē jíní sōho, na chúsóhó ró.

<sup>16</sup> Yáhá cachi rī ñn jñūhun yátá návāha na cúni rō ndese cúu ñayuu tiempo vijna. Cúu i nájñūhun sūchi lúli cáhīn nuū yáhu cacásiquí i. Te cácana ndee i xiní jnáhan i:

<sup>17</sup> Ni cativi rī scuilí, te tu ní cájita jéhé ró. Te ni cajita ri yaa jeē cuihyá jíta, te tu ní cándahyū rō, achí i. Te nájñūhun cándāa sūchi lúli un jéē tu ní núnjahan ni i ni ñn, súcuan cándāa ró.

<sup>18</sup> Chí ni quiji Juan te cuehē jínu ni ñyo ndite ni de, tu ní yéji de ni tu ní jīhi de. Te tu ní cánujnahan ni rō, chí ni cacahān rō jeē ñūhun tachī ñni de.

<sup>19</sup> Yūcuán na te ni quee maá rí, Yaā ní nduu tēe, te yéji rī jīhi rí, te tu cánujnahan ni rō, te chísoó jñūhun ró cácahān rō jeē máni máá jéē yéji rí jīhi rí vino. Te quíjnahan rí jīn tēe cástútú xūhun renta jīn táca gá tēe cásáha cuēchi, achí rō. Te núu cundíchi ñn tēe jín jñūhun Yaā Dios, te jín jñiñu sáha de te nátuu jeē tēe ndíchí cúu de. Achí yá.

*Jeē ní cuxeēn yā nuū sava ñuu ññni ni  
(Lc. 10.13-15)*

<sup>20</sup> Yūcuán na te ni quejéé yá cuxeēn yā nuū táca ñuu nuū ni sáha ya cuehē jñiñu jéhu, chí tu ní canacani ni i jeē stóo i cuēchi i. Te ni cahān yā:



<sup>21</sup> Nacā jeē xeēn ndoho ró, ñáyyu ñuu Corazín. Te nacā jeē xeēn ndoho ró, ñáyyu ñuu Betsaida. Chi núu ini ñuu Tiro jíin ñuu Sidón ni sáha ri jniñu jéhu jeē ni sáha ri ini ñuu maá ró, te yachī nacani ni ñayuu ñuu un jéē stóo i cuēchi i núú. Te sáha i seña jeē steén jeē nácani ni i siquī cuēchi i, chi cuhun i sahma jnúu te chuhun i yaā xinī i núú.

<sup>22</sup> Núu súcuan te cáhán rī jíin ró jeē quivī coo juicio te xeēn gā coo castigo siquī rō jijnáhan ró vēsú jeē ni íyo siquī ñuu Tiro jíin ñuu Sidón.

<sup>23</sup> Te róhó ñáyyu ñuu Capernaum, ¿á cájeni ni rō jeē cujéhu ró nájñuhun ñn jeē cáa cuahān ichi ándiví? Tuú chi sa nanuu ró ndé lugar nuū cáyūcu ánuá ndiyi. Chi núu ini ñuu Sodoma ni sáha ri jniñu jéhu jeē ni sáha ri nuū maá ró, te coo ñuu yúcuan ndé vijna núú.

<sup>24</sup> Núu súcuan te cáhán rī jíin ró jeē quivī coo juicio te xeēn gā coo castigo siquī rō vēsú jeē ni íyo siquī ñáyyu ñuu Sodoma. Achí yá.

*Nehen nuū rī ndetātu ró, achí yá  
(Lc. 10.21-22)*

<sup>25</sup> Te suni quivī un ní cahān Jesús:

Na cútahū na núu ni Tátā, Jitoho andiví jíin ñáyiví. Chi ni jesi ní táca jnúhun ndichí ní, jeē ma cúní ñayuu ndichí jíin ñáyyu tūhva cuenta ñayiví yáha. Te ni steén ni núu ñáyyu cácuu nájñuhun sūchi lúli.

<sup>26</sup> Chi súcuan ni nujnahan ni ni Tátā, achí yá.

<sup>27</sup> Te ni cahān gā yā:

Ndivii ni jēhe Tátá rī nuū rī. Te tu cájini ñayuu ndé ñn cúu ruhū, Sēhe Yaā Dios, chi máá-ni Tátá rī cúu jeē jiní yā ruhū. Ni tu cájini ñayuu ndese Yaā cúu máá Tátá, chi máá-ni Sēhe cúu jeē jiní. Te íyó ñáyyu jeē cuní maá Sēhe steén yā nuū i ndese Yaā cúu Tátá yā, te máá i suni cuní i.

<sup>28</sup> Táca ró jéē ni cuíta ró jíin táca jniñu jíin ley jeē yí sáha jíin ró, nehen quivīcoo ró ndaha ri, te ndetātu ró sáha ri.

<sup>29</sup> Quiví ró núu jniñu ndácu máá rí, te scuáha ró coo ró nájñuhun íyó máá rí. Chi vitá ni rī te suchí ni rī. Te súcuan te ndetātu ró jíin ánuá rō sáha ri.

<sup>30</sup> Chi tú yí jéē cuandetū rō nuū rī, ni tú yí jéē squícu ró jniñu ndácu ri. Achí yá.

*Jeē ní cataxín de yoco trigo quivī ndetātu  
(Mr. 2.23-28; Lc. 6.1-5)*

## 12

<sup>1</sup> Te ñn quivī ndetātu ní yāha Jesús cuahān yā nuū cáa trigo. Te tēe cáscuáha jíin yá, cáji de sōco. Te ni quejé de cátaxín de yoco trigo cáyeji de.

<sup>2</sup> Te ni cajito tēe grupo fariseo, te ni cacahān de jíin yá:

Condēhé, chi tēe cáscuáha jíin ró casáha de jniñu jeē tu íyó váha sáha yó quiví ndetátú, áchí ley Moisés.

<sup>3</sup> Te ni cahān maá yá jíin de:

¿A tu ní cácahu ró tutu ndese ni sáha David, ñn quiví jeē ni jíi de sōco jíin tēe cáhīn jíin de?

<sup>4</sup> Te ni quiví de ini vehe Yaā Dios. Te ni yeji de pan ii jeē yosó ndijin nuū Yaā Dios. Te tú na ley jeē cáji de, ni tēe cáhīn jíin de, chi máá-ni sutū cuu cají. Te vēsú súcuan te tú na cuēchi ní íyo siquī de.

<sup>5</sup> ¿Te á tu ní cácahu ró tutu ley Moisés, ndese cásájniñu sutū ini templo, vēsū quivī ndétātu cúu? Te tú na cuēchi íyó síquī de, vēsū quivī ndétātu cásájniñu de jniñu jeē cácuu de sutū.

<sup>6</sup> Te cáhán rī jín ró jeē maá rí jeē iyó yáha, cújéhu ga rī vēsū templo.

<sup>7</sup> Te tu cájecūhun ni rō jijnáhan ró jñūhun yáha jeē yosó núu tútu iī jeē ni cáhán Yaā Dios: Jeē cuní gā rī cúu jeē cundáhú ni rō jnáhan ró, vēsū jeē sócō ró quiti nuū rī, achí yá. Te núu jeē ní cajecūhun ni rō jñūhun yáha, te ma cahán rō súcuan síquī tēe jeē tú na cuēchi núu.

<sup>8</sup> Chi ruhū, Yaā ní nduu tēe, maá rí cúu jeē ndácu jniñu síquī ndese sáha ñayuu quivī ndétátú, achí yá.

*Jeē ní nduvāha tēe ni ichī ndaha*

(Mr. 3.1-6; Lc. 6.6-11)

<sup>9</sup> Yūcuán na te cuahán Jesús, te ni quivī ya ini vehe iī sinagoga.

<sup>10</sup> Te yūcuan íne iīn tēe ni ichī iīn ndaha de. Te cácuni tēe grupo fariseo jeē nihīn de cuēchi síquī yá, te ni cacajñūhún de ya:

¿A íyó ley jeē cuu nasávāha yó ñayuu cuhú quivī ndétátú? achí de.

<sup>11</sup> Te ni cahán yā jín de:

¿Ndé iīn róhó, núu névāha ró iīn lanchi, te núu nínga ti ini iīn yaū quivī ndétátú, te á tu jéhén rō natava rō tī, chí naún?

<sup>12</sup> ¿Te á tu cánuu ndasí gá iīn tēe vēsū iīn lanchi? Núu súcuan te vetū-ni sáha yó jniñu váha quivī ndétátú, achí yá.

<sup>13</sup> Yūcuán na te ni cahán yā jín tēe ni ichī ndaha ún:

Scáá ndaha ró.

Te ni scaá de, te ni nduvāha-ni nájnūhun íyó inga.

<sup>14</sup> Yūcuán na te ni quendacoo tēe grupo fariseo, te ni candajñūhún de síquī Jesús, ndese cahni de ya.

*Jñūhun Jesús jeē ni cáhán Isaías nde jengahán*

<sup>15</sup> Te ni jini Jesús jeē súcuan cájeni ni de, te ni quenda ya yūcuan cuáhán yā. Te cuehē ñayuu cándiquín i ya. Te ni nasávāha ya ndihí ñayuu cuhú.

<sup>16</sup> Te ni ndacu ya jniñu nuū i jeē ma stéén i ya.

<sup>17</sup> Te súcuan ni cuu návāha squícu jñūhun ni cahán Yaā Dios síquī Jesús, te ni nacani Isaías jñūhun ya un ndé jengahán:

<sup>18</sup> Yáha cúu mozo rī jeē ní nacāji rī,

te manī rī jín yá, te cúsi rī rī jín yá.

Te cuáha rī Espíritu rī coo jín yá.

Te maá yá sándaā jniñu ñayuu tēcá nación.

<sup>19</sup> Ma tejnáhan ya, ni ma cána jee ya,

te ni ma cahán jee ya ichi jeē cúni ñayuu.

<sup>20</sup> Ma sáha xeēn yā jín ñáyuu ni cunīhin jñūndóho síquī,

ni ma snáa yā ñayuu jeē maá lulí-ni cácañíje.

Chi cújéhu ya síquī ndihí, te ndaā ndacu ya jniñu.

<sup>21</sup> Te ñayuu tēcá nación cocuhun ni i jeē jnáma ya i.

Achí Yaā Dios, achí Isaías nde jengahán.

*Jeē ní cacahán de jeē jejniñu ya fuerza Satanás*

(Mr. 3.19-30; Lc. 11.14-23; 12.10)

<sup>22</sup> Yūcuán na te ni caquindeca i nuū yā iīn tēe cuáá ñíhín, chí ñíhūn tachí ini de. Te ni nasávāha ya de. Te ni ndundijin tñūú de te ni nacahán de.

<sup>23</sup> Te ndihí ñayuu cuehē un ní canaa ni i cájito i, te ni cacahán i:

¿A tée yáha cúu jeē ni cáhān Yaā Dios jeē cacu nuū yucūn David? áchí i.

<sup>24</sup> Te tēe grupo fariseo, ni cajini de jeē súcuan cácahān i. Te ni cacahān de:

Tēe yáha ma cúu quenehen de tachī núu jeē tu sáha de jíin fuerza Satanás jeē cujéhnú nuū tachí, áchí de.

<sup>25</sup> Te Jesús ni jini yā jeē súcuan cájeni ni de, te ni cahān yā jíin de:

Tácá nación jeē casásñn máá te cájejnáhan máá, núu súcuan te snáá jeē iyó váha máá. Te núu ññu chí ññu vehe casásñn máá te cájejnáhan máá, te ma cúu ga coyūcu cáhnu.

<sup>26</sup> Te suni súcuan Satanás núu quénehen jnáhan tachí, núu súcuan te sásñn máá. ¿Te ndese cuiñi nihin Satanás jeē ndácu jniñu núu súcuan?

<sup>27</sup> Chi cácahān rō jeē jíin fuerza Satanás quénehen ri tachí. Te núu súcuan cúu núu, te ñayuu cascuáha jíin máá ró jijnáhan ró, ¿na jíin fuerza cáquenehen máá i tachí, cájeni ni rō? Núu súcuan te máá i jijnáhan i cachi jeē ní castívi ndasí suhva rō ni cacahān rō jeē cáquenehen ri tachí jíin fuerza Satanás.

<sup>28</sup> Te tuú chi sa jíin Espíritu Yaā Dios cúu jeē quénehen ri tachí. Núu súcuan te je ndéé Yaā Dios mēñnu ró jeē ndácu ya jniñu.

<sup>29</sup> ¿Chi ndese cuu quívi ññu tēe ini vehe tēe ndacuí jeē quenehen de ndajniñu de? Chi cánuú jeē xíhna gā cuhni de tēe ndacuí ún, te yūcuán na te cuu quenehen de ndajniñu ún. Te suni súcuan cúu jeē jíhni rī Satanás te quénehen ri tachí.

<sup>30</sup> Te ñayuu tu iyó mánī jíin rí, núu súcuan te jíto uhū i ruhū. Te ñayuu tu nástútú jíin rí, núu súcuan te sa jéte núu i ñayuu vējicoo nuū rī.

<sup>31</sup> Jeē yúcuán cáhān rī jíin ró: Iyó modo coo jñūhun cáhnu ni nuū táca cuéchi cásaáha ñayuu, jíin nuū táca jñūhun néé cácahān i. Te núu cahān ndevāha i siquī Espíritu Santo, te ma cóne cáhnu ni Yaā Dios nuū i.

<sup>32</sup> Te núu na-ni ñayuu cahān i siquī ruhū, Yaā ní nduu tēe, cuu cone cáhnu ni Yaā Dios nuū i. Te núu na-ni ñayuu cahān ndevāha i siquī Espíritu Santo, ma cóne cáhnu ni Yaā Dios nuū i, ni jeē iyó i ñayívi yáha, ni ñí tiempo quíji.

### *Jñūhun yujnu váha jíin yujnu néé* (Lc. 6.43-45)

<sup>33</sup> Núu yujnu váha, te vāha ndehē, te núu yujnu néé, te cánéé ndehē. Chi jíin ndéhē te jíni yō ndese yujnu cúu. Te suni súcuan ñayuu.

<sup>34</sup> Va sēhe coō cácuu ró, chi xeēn rō nájñūhun coō. ¿Ndese cuu cahān rō jñūhun váha, chi ñayuu cásaáha néé cácuu ró? Chi jniñu jeē jéni ni anuá ñayuu, máni yūcuán cáhān i.

<sup>35</sup> Tēe vāha cáhān de jñūhun váha, chi iyó ndáá anuá de. Te tēe sáha néé cáhān de jñūhun néé, chi cánéé ánuá de.

<sup>36</sup> Te cáhān rī jíin ró jeē táca na-ni jñūhun cácahān ñayuu, nacuāha i cuenta jñūhun un quívi coo juicio.

<sup>37</sup> Chi jíin jñūhun ni cahān rō sándaá yā siquī rō, núu jeē quéndōo ndaá rō chí jéé cóndee cuéchi siquī rō. Achí yá.

### *Jeē ní cajicān ñayuu tu cácañje ññu jniñu jéhnú* (Mr. 8.12; Lc. 11.29-32)

<sup>38</sup> Yūcuán na te jecu tēe grupo fariseo jíin tēe cástéén tutu ley Yaā Dios, ni cacahān de jíin yá:

Maestro, cáculi na jéé sáha ní ññu jniñu jéhnú jeē steén núu máá ní cúu Yaā ní tají Yaā Dios, achí de.

<sup>39</sup> Te ni cahān yā jíin de:

Ñayuu yáha jeē casáha jniñu neé, tu cájetáhú cuiti i Yaā Dios. Te cájicān i ñn jniñu jéhu jeē steén núu Yaā ní tají Yaā Dios cúu ri. Te tuá na inga jniñu jéhu steén rī nuū i, chí máá-ni jniñu jéhu nájnūhun ní cuu jíin Jonás, tēe ní nacani jnūhun Yaā Dios.

<sup>40</sup> Chí nájnūhun ní ine Jonás chíji chácá cáhnu unī nduú unī ñuú, suni súcuan ruhū, Yaā ní nduu tēe, cuu rī te cone rī chíji ñuhun unī nduú unī ñuú, te sáá te natecu rī.

<sup>41</sup> Te tāca ñáyuu ñuu Nínive nuū ní nacani Jonás jnūhun, natecu i jíin ñáyuu tiempo yáha, quivī juicio jeē sándaā yā cuēchi, te cahān i cuēchi siquī ñáyuu yáha. Chí máá i ní canacani ní i ní castóo i cuēchi i quivī ní nacani Jonás jnūhun nuū i. Te vijna chí cújéhu ga ruhū Yaā íne yáhá vēsú Jonás, te tu cá candíje ró rúhū.

<sup>42</sup> Te reina jeē ní cújéhu nación ichi sur, natecu ña jíin ñáyuu tiempo yáha, quivī juicio jeē sándaā yā cuēchi, te cahān ña cuēchi siquī i. Chí nde jíca téyí ní quiji ña ní jini nahín ña jnūhun ndíchí ní cahān rey Salomón. Te vijna chí cújéhu ga ruhū, Yaā íne yáhá vēsú Salomón, te tu cá candíje ró rúhū.

*Tachī jeē nastútú jnáhan ndávi ini ñayuu*

*(Lc. 11.24-26)*

<sup>43</sup> Núu ní quenda ñn tachī ini ñn tēe tu cándíje, te jíca cuu nuū ñūhun téhé, ndúcu núu ndétátú, te tu níhín, yūcuán na te jéni ní maá:

<sup>44</sup> Na quínuhun rī vehe nuū ní quenda rī. Te núu ní ndee tucu, te jíto jeē tēe tu cándíje ún, cúu de nájnūhun ñn vehe íyú te ní ndundoo.

<sup>45</sup> Yūcuán na te jéquihin uxā gā tachī neé gā vēsú maá. Te quívicoo ini tēe un jéé cóyūcu yūcuán. Núu súcuan te xeēn gā ndoho tēe un jéé sándíhí vēsú jeé xíhna ñūhún. Te suni súcuan ndoho ñayuu tiempo yáha jeē casáha neé. Achí yá.

*Náná yā jíin ñani yā*

*(Mr. 3.31-35; Lc. 8.19-21)*

<sup>46</sup> Te níni súcuan cáhán yā jíin ñáyuu ún, te ní quee naná yā jíin táca ñani yā, ín ña nuū quéhe, te cúní ña cahān ña jíin yá.

<sup>47</sup> Te ní cachí ñn tēe nuū yā:

Náná ní jíin táca ñani ní cáhīn nuū quéhe, te cá cuni cahān jíin ní, achí de.

<sup>48</sup> Te ní cahān yā jíin tēe ní cahān súcuan jíin yá:

¿Ndé ñn cúu náná rī, te ndé ñn cácuu ñani rī? Achí yá.

<sup>49</sup> Te ní steén ndaha yá nde nuū cáyūcu tēe cáscuáha jíin yá. Te ní cahān yā:

Suni náná rī jíin ñani rī cácuu táca jéé yáha.

<sup>50</sup> Chí táca ñáyuu casquicu jniñu cúní maá Tátá rī, Yaā ndeé andiví, suu cácuu ñani rī, cuāha rī, náná rī. Achí yá.

*Jnūhun yátá siquī tēe jéte trigo*

*(Mr. 4.1-9; Lc. 8.4-8)*

## 13

<sup>1</sup> Te quivī un ní quenda Jesús vehe cuahān yā, te ní jinū yā ní cucōo ya yumar.

<sup>2</sup> Te ní cutútú cuéhē ndasí ñayuu nuū yā. Te ní quivī ya ini ñn barco, ní cucōo ya. Te tāca ñáyuu un cáyūcú i yumar.

<sup>3</sup> Te jíin jnūhun yátá ní cahān yā cuehē jnūhun nuū i, te súcuan ní cahān yā:

Ín tēe cate trigo, ní quenda de jeē cate de.

<sup>4</sup> Te ná ni quejéé de jéte de, te jecu trigo ni jitē yuhíchi. Te ni quecoo saa, ni cayejí tī.

<sup>5</sup> Te jecu gā trigo ni jitē nuū ñuhun yuū, nuū tú cuehē ñuhun. Te yachī-ni ni cane, chi tu cóquin ñuhun.

<sup>6</sup> Te nuū ní cane niándii, te ni ichī-ni, te ni casun, chi tu ní níhín nuū quihín yoho.

<sup>7</sup> Te jecu gā trigo ni jitē nuū náne iñu. Te ni jehnu iñu ún, te ni jesi nuū.

<sup>8</sup> Te jecu ni jitē nuū ñuhun váha, te ni jēhe cuehē nunī. Sava ni jēhe ciento jeē ín in, te sava ni jēhe unī xico, te sava ga ni jēhe ocō uxī.

<sup>9</sup> Tāca rōhó jēē jíni sōho, na chúsóhó ró. Achí yá.

*Najehē cahán yā máni jñūhun yátá*

*(Mr. 4.10-12; Lc. 8.9-10)*

<sup>10</sup> Yūcuán na te tēe cáscuáha jíin yá un ní quecoo de nde nuū yā, te ni cacajñuhún de ya:

¿Najehē cúu jeē máni jñūhun yátá cahán ni jíin ñayuu? achí de.

<sup>11</sup> Te ni cahán yā jíin de:

Róhó jíináhan ró chi sáha ya jeē cájecūhun ni rō jñūhun ni yisáhi yáha, ndese quívicoo ñayuu ndaha Yaā andiví jeē ndacu ya jñiñu nuū i. Te ñayuu yáha jéé tu cáandíje, chi ma jécūhun ni i.

<sup>12</sup> Chi ñayuu je jécūhun ni, chi stéén gā yā nuū i, te víhyá gā cuni i. Te ñayuu tu cáandíje, sa suhva naa jecu jeé je jíni i ún.

<sup>13</sup> Jeé yúcuán cahán rī jñūhun yátá jíin i. Chi vésú cájito i, te quendōo i nájnūhun jeé tú na vé ni cájito i. Te vésú cájini sōho i, te ma jécūhun ni i, te quendōo i nájnūhun jeé tú na vé ni cájini i.

<sup>14</sup> Ñayuu yáha chi squícu siquī i jñūhun ni cahán Yaā Dios jeé ní nacani Isaías, tēe ni nacani jñūhun nde jenahán:

Vésú cuni nahín ró, te ma jécūhun ni rō,  
te vésú coto ró, te ma nácuni rō.

<sup>15</sup> Chi ñayuu yáha yōhyo ni ndunihni ni i,  
te yōhyo uhū chusóhó i,

te nájnūhun cájesi i tinūū i,  
náváha coo nájnūhun jeé tu cájito i,  
ni tu cájini nahín i,

te ni ma jécūhun ni i,  
ni ma násāma ini i quívicoo i nuū rī

jeé nasáváha ri anuá i nuū cuéchi i.  
Achí Yaā Dios, achí tutu.

<sup>16</sup> Te máá ró jíináhan ró, yōhyo ndetū rō, chi cájito ró jíin tñūu ró, te cájini nahín ró jíin sóho ró.

<sup>17</sup> Chi jendaá cahán rī jíin ró jeé cuehē tēe ni canacani jñūhun Yaā Dios jíin cuehē tēe ndaá, ni cacuni de coto de jeé cájito máá ró, te tu ní cájito de. Te suni ni cacuni de cuni sōho de jeé cájini sōho máá ró, te tu ní cájini de. Achí yá.

*Jeé ní castūhun cájí yá jñūhun yátá tēe jéte trigo*

*(Mr. 4.13-20; Lc. 8.11-15)*

<sup>18</sup> Núu súcuán te cuni nahín jíináhan ró na vé cuni cahán jñūhun yátá tēe jéte trigo: Trigo un cúu jñūhun Yaā Dios.

<sup>19</sup> Te ñayuu cájini sōho jñūhun ndese ndácu Yaā andiví jñiñu, núu tu cájecūhun ni i te cácuu i nájnūhun trigo jeé ni jitē yuhíchi. Yūcuán na te quíji jexeén te quénde-ni jñūhun ini anuá i.

<sup>20</sup> Te trigo jeē ni jítē nuū ñúhun yuū cúu nájnūhun ñayuu cájini sōho jnūhun, te yachī-ni cájetáhú i te cácusī ni i jíin.

<sup>21</sup> Te tu cúcutú jnūhun ún ini anuá i, te jecu-ni quivī cájetáhú i. Te núu ni quejéé jnúndóho, chí jító xeēn ñayuu i síquī jnūhun ún, te quejéé nácani yátá ni i.

<sup>22</sup> Te jeē ni jítē nuū náne iñu cúu ñayuu cájini nahín jnūhun, te cándihvī ni i síquī jeē iyó ini ñayīvī yáha, te cúní i cucucá i, te stáhú un i cujnēñu i jíin. Te ndíhi jeē yáha jési nuū jnūhun ya, te tu íje i jíin jnūhun ya.

<sup>23</sup> Te trigo jeē ni jítē nuū ñúhun váha cúu nájnūhun ñayuu cájini nahín jnūhun, te cájecūhun ni i, te cáhije i jíin jnūhun ya. Te sava i cúu nájnūhun nunī jeē jéhe ciento jeē ñn ñn, te sava ga i jéhe unī xico, te sava ga i jéhe ocó uxī. Achí yá.

### *Jnūhun yátá síquī ite lasú*

<sup>24</sup> Te ni cahān yā inga jnūhun yátá jíin de:

Jeē ndácu Yaā andiví jniñu cúu nájnūhun ñn tēe jeē ní jete de trigo váha nuū ñúhun de.

<sup>25</sup> Te iyó ñn tēe jító uhū de tēe chíi trigo. Te náa cáquixī tēe chíi trigo jíin táca jnāhan de, te ni jehēn ni jete ndiquin lású nuū trigo de, te cuahān.

<sup>26</sup> Te nuū ní cane trigo ún, te ní cane yoco i, te suni súcuan ni jehnu ite lasú un.

<sup>27</sup> Yūcuán na te ni jengoo mozo ni cacahān i jíin patrón i: ¿A násūu trigo váha ní jéte ní núu ñúhun ní? ¿Te ndese cúu jeē ní canecoo ite lasú nuū?

<sup>28</sup> Te ni cahān de jíin i: ñn tēe jító uhū ruhū ni sáha jeē yáha. Te ni cacahān mozo un jíin de: ¿Núu súcuan te á cúní ni jéé na quíngoo ná te jnuhun ná? áchí i.

<sup>29</sup> Te ni cahān de: Tuú, chí núu jnuhun ró lású un te sanaa te jnuhun ró ndé jíin trigo.

<sup>30</sup> Váha ga na cuéñnu máá ndé quivī tahndé. Te quivī un cáhān rī jíin tēe cahnde jeē xihna gā ite lasú cahnde de, te chucú tútú de návāha cahmu yó. Yūcuán na te trigo chí cahnde de ndīvī ini yacā rī, achí de. Achí yá.

### *Jnūhun yátá síquī ndiquin mostaza* (Mr. 4.30-32; Lc. 13.18-19)

<sup>31</sup> Te suni ní cahān yā inga jnūhun yátá jéē steén yā ndese ndúcuehē ñayuu ndácu Yaā andiví jniñu nuū:

Ndúcuehē i nájnūhun jéñnu ñn ndiquin mostaza jeē ní jequin ñn tēe nuū ñúhun de.

<sup>32</sup> Te jendaá jeē ñn ndiquin lúlí gá cúu vēsú táca gá ndiquin. Te núu ni jehnu, te cúu cáñnu ga vēsú táca gá yucū, chí ndúu nájnūhun ñn yujnu. Te quíjicoo saa, te cásáha ti tacá tī chíji ndaha ún. Achí yá.

### *Jnūhun yátá síquī levadura* (Lc. 13.20-21)

<sup>33</sup> Te inga jnūhun yátá ní cahān yā jíin de:

Jeē ndácu Yaā andiví jniñu nuū ñáyuu cúu nájnūhun levadura jeē ní quihin ñn ñahan. Te ni saca ña jíin únī kilo harina, nde ni ndaa ndíhi ñujen ní sáha. Achí yá.

### *Jeē máni jnūhun yátá cáhán yā jíin i* (Mr. 4.33-34)

<sup>34</sup> Táca jnūhun yáha ní cahān Jesús jíin ñáyuu cuehē ún. Te táca jéē ni steén yá, máni jnūhun yátá ní cahān yā jíin i.

35 Súcuan ni sáha ya návāha squícu jnūhun ni cahān tēe ni nacani jnūhun Yaā Dios nde jenahán:

Cahān rī tāca jnúhun yátá jíin ñáyuu,  
te cachi rī tāca jnúhun yísāhí ndé quivī ní jecōo ñayīví.  
Achí tutu, áchí yá.

*Jeē ní castūhun cájí yá jnūhun ite lasú*

36 Yūcuán na te ni nacuatáhú Jesús nuū ñáyuu. Te ni ndivī ya ini vehe. Te tēe cáscuáha un ní jinūcoo de nuū yā, te ni cacahān de jíin yá:  
Nacani cájí ní jnūhun yátá ite lasú nuū ná, áchí de.

37 Te ni cahān yā jíin de:

Jeē jéte trigo vāha un cúu máá rí, Yaā ní nduu tēe.

38 Te ñuhun un cúu ñayīví. Te trigo vāha un cúu ñayuu cáyihī ndaha Yaā Dios jeē ndácu ya jniñu nuū i. Te ite lasú un cúu ñayuu cáyihī ndaha jexeén.

39 Te tēe jíto uhū jeē ní jete lasú un cúu máá jéxeén. Te quivī tahndé cúu quivī jínu ñayīví. Te tēe cahnde un cácuu ndajéhé Yaā Dios.

40 Te nájñuhun tahndé ite lasú te cayū nuū ñuhún, súcuan coo quivī jínu ñayīví.

41 Chi máá rí, Yaā ní nduu tēe, tají rí ndajéhé rī quingoo. Te nastútú yá tāca ñáyuu casquívī jnāhan nuū cuéchi, jíin ñáyuu casáha jniñu néé, quenehen ya i mēhñu ñáyuu ndácu ri jniñu nuū.

42 Te jnaa ya i cayū i nuū ñuhún. Te yūcuan ndáhyū i te nacayīhí yuhu i jeē ndoho xeēn i.

43 Yūcuán na te ñayuu squícu nuū yā chi ndindēé i nájñuhun niāndii, te coyúcú i nuū ndácu máá Tátá i jniñu. Tāca róhó jéé jíni sóho, na chúsóhó ró.

*Jnūhun yátá síquī yejñū xūhún jeē yísāhí*

44 Te jeē ndácu Yaā andivī jniñu nuū ñáyuu, suni cúu nájñuhun ñn yejñū xūhún jeē yísāhí chíjí ñn ñuhun. Te ni nanihñ ñn tēe, te ni nacasi tucu de síquī. Te jeē cúsi ní de jíin, te ni jehēn de ni xícó ndihī de jeē névāha de, te ni jeen de ñuhun ún.

*Jnūhun yátá síquī perla jeē ndeé yahu*

45 Te jeē ndácu Yaā andivī jniñu nuū ñáyuu, suni cúu nájñuhun ñn tēe jéen xíco, te ndúcú de perla váha.

46 Te ni jini de ñn perla jeē yáhu ndasí, te ni jehēn de ni xícó ndihī de jeē névāha de, te ni jeen de perla un.

*Jnūhun yátá síquī ñunu jnā chācá*

47 Te jeē ndácu Yaā andivī jniñu nuū ñáyuu, suni cúu nájñuhun ñn ñunu jeē cásingava de ini mar, te quívicoo ndinuū chācá.

48 Te núu ní chítú ñunu ún, te cánatava de yundúte. Te cácucoo de cánacáji de chācá. Te chācá váha cájnaa de ini jíca, te chācá tú vāha cáscáne de.

49 Te suni súcuan coo quivī jínu ñayīví. Chi quijicoo ndajéhé yā, te sásñn ya ñayuu casáha jniñu néé méhñu ñáyuu casáha jniñu váha.

50 Te ñayuu cunéé chí jnaa ya i cayū i nuū ñuhún. Te yūcuan ndáhyū i te nacayīhí yuhu i jeē ndoho xeēn i. Achí yá.

*Jnūhun yátá síquī ndajniñu ndeé yahu*

51 Te ni cajñuhun yá de jíjñáhan de:

¿A ní cajecūhun ní rō tāca jnúhun yáha, chí tuú? áchí yá.

Te ni cacahān de jíin yá:

Ni cajecūhun ni ná, áchí de.

<sup>52</sup> Te ni cahān yā jín de:

Iyó váha núu súcuan. Te ñn tēe stéén tutu ley Yaā Dios, núu je ni cutūhva de ndese ndácu Yaā andiví jniñu, te cuu stéén de tāca jnúhun siquí ún. Chi cúu de nájñuhun ñn tēe chíi vehe. Te ini yejnū de táva de ndajniñu ndéé yahu, sava jeē jeē jín sava jeē je ni cunahán iyó. Achí yá.

*Jeē cuánuhun yā ñuu Nazaret*  
(Mr. 6.1-6; Lc. 4.16-30)

<sup>53</sup> Te ná ni ndihí ni cahān Jesús tāca jnúhun yátá yáha, te ni quenda ya yūcuan cuáhān yā.

<sup>54</sup> Te ni najinū yā ñuu yā Nazaret. Te ni steén yā jnúhun ini vehe ñi sinagoga yūcuán. Te ni canaa ni ñayuu cájini nahín i, te ni cacahān i:

¿Ndé nuū ní cutūhva tēe yáha tāca jnúhun ndíchí? ¿Te ndese cúu sáha de tācá jniñu jéñnu yáhá?

<sup>55</sup> Chi sēhe carpintero cúu tēe yáha, te náná de cúu María, te ñani de cácuu Jacobo, José, Simón, jín Judas.

<sup>56</sup> Te suni cáyūcu cuáha de jín yó yáhá. ¿Te ndese jín de tāca jnúhun yáha núu súcuan? Achí ñayuu.

<sup>57</sup> Te súcuan ni cacujéē ni i nuū Jesús. Te ni cahān yā jín i:

Tāca tēe nácani jnúhun Yaā Dios, iyó yíñuhún ñayuu jín de, te máni ñayuu ñuu maá de jín ñayuu vehe máá de cúu jeē tu iyó yíñuhún jín de. Achí yá.

<sup>58</sup> Te tu ní sáha ya cuehē jniñu jéñnu yūcuán, chi tu cácandíje i ya.

*Jeē ni jhí Juan tēe scuándute*  
(Mr. 6.14-29; Lc. 9.7-9)

## 14

<sup>1</sup> Te tiempo yúcuau te Herodes, tēe ndácu jniñu región Galilea, ni jini jnúhun de jnúhun Jesús.

<sup>2</sup> Te ni cahān de jín ñayuu cáhīn jín de:

Tēe yúcuau cúu Juan tēe ni scuándute, te ni natecu de. Jeē yúcuau iyó poder de sáha de jniñu jéñnu. Achí de.

<sup>3</sup> Chi Herodes, je ni ndacu de jniñu jeē na quívī Juan vecāa, jín jeē na cónuhñi de jín cadena. Súcuan ni sáha de jeē siquí Herodías, ñasihí ñani de Felipe.

<sup>4</sup> Chi Juan ni cahān de nuū Herodes:

Tu iyó ley condeca ró ña, áchí de.

<sup>5</sup> Te jeē yúcuau ní cuni Herodes cahni de Juan. Te yúhú de jeē quiví ni ñayuu, chi ndihí i jéni ndije ni i jeē ñn tēe nácani jnúhun Yaā Dios cúu Juan.

<sup>6</sup> Te ñn quiví ni sáha Herodes ñn vico quiví ní cacu de. Te sēhe síhí Herodías ni quiví i ni jita jéhé i nuū ñayuu ní cana de ún. Te ni cusí ni Herodes ni sáha i.

<sup>7</sup> Te ni jejnūhun téyí de jeē cuáha de núu na vé cacān i nuū de.

<sup>8</sup> Te ni jehēn i ni cajñuhún i náná i na vé cacān i. Te ni ndiví i nuū Herodes, te ni cahān i:

Cuáha ní xini Juan tēe scuándute, cone nuū ñn cohō, achí i.

<sup>9</sup> Yūcuán na te rey Herodes ni cucuíhyá ni de. Te siquí jeē ni jéjnūhun téyí de, jín jeē ní cajni sóho tēe cáyeji staā jín de, jeē yúcuau ní ndacu de jniñu jeē na cuáha nuū i.

<sup>10</sup> Te ni tají de soldado jeē na quícahnde xini Juan ini vecāa.



11 Te ni quee soldado un jíin xíní Juan, íne nuū ñin cohō, te ni jēhe nuū súchi síhí un. Te máá i ni jendeca i nuū naná i.

12 Yūcuán na te ni jengoo tēe cáscuáha jíin Juan, te ni candonehen de yiqui cúñu Juan, te ni cachindūji de. Yūcuán na te ni jengoo de ni cacastühún de nuū Jesús.

*Jeē ni scáji yā uhūn mil tēe*

(Mr. 6.30-44; Lc. 9.10-17; Jn. 6.1-14)

13 Te ná ni jíni Jesús jnūhun, te ni cujiyo ya yūcuan cuáhān yā jíin barco, jeē cóne sñin ya ñin lugar nuū tú ñayuu. Te ni cajini ñayuu jeē cuahān yā. Te táca ñuu ni quendacoo i cájica jéhé i, cuajnahān i ya.

14 Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, te ni nasávāha ya táca ñayuu cácuñū jeē véjicoo i jíin.

15 Te nuū ní ini, te tēe cáscuáha jíin yā, ni quecoo de nuū yā, te ni cacahān de:

Je ni ini, te yāhá chi tú na ñayuu yúcu. Núu súcuan te tají ní ñayuu na quíngoo i táca ñuu, te cuaan i jeē cáji i.

16 Te ni cahān Jesús jíin de:

Tu jíni ñúhún quíngoo i, chi cuāha máá ró jeē cáji i, áchí yā.

17 Te ni cacahān de jíin yā:

Tú na vé cánevāha ná yāha, chi uhūn-ni staā jíin úū-ni chācá, áchí de.

18 Te ni cahān yā jíin de:

Cuāha na quíji, áchí yā.

19 Te ni cahān yā jíin ñayuu un jēe na cúcōo i nuū íte. Te ni quihin ya ndihúhún staā jíin úū chācá un. Te ni ndacoto ya ichi ándiví, te ni nacuatáhú yā. Te ni tahú cuéchí yā staā ún, te ni jēhe ya nuū tēe cáscuáha jíin yā. Te máá de ni casaja de nuū ñayuu cuehē ún.

20 Te ndivii i ni cayejí, te ni candutú chíji i. Te ni canastútú de pedazo jeē ní quendōo, te ni chitú úxí uū jíca.

21 Te tēe ni cayejí un cúu nájñūhun uhūn mil, te sñin ga cúu ñahan jíin súchi lúli.

*Jeē ní jica jéhé yā nuū mar*

(Mr. 6.45-52; Jn. 6.16-21)

22 Yūcuán na te ni cahān-ni Jesús jíin tēe cáscuáha jíin yā jeē na quívicoo de barco, te cosnū de quíngoo de nde inga lado mar, níni jēe nátaji yā ñayuu un quíngoo i.

23 Te nuū ní cuu ni nacuatáhú yā nuū i, te máñúhún-ni ya ni caa ya yucu, cuacacān tahú yā. Te ni cuaa, te íne máñúhún yā yūcuán.

24 Te barco un, je ni cuu sava nuū mar cuahān. Te ndute mar un nátundahá níhin barco, chi vēji tachí ichi núú de.

25 Te jeē yínee gā ni quee Jesús nuū de, jíca jéhé yā nuū mar.

26 Te tēe cáscuáha ún, ni cajito de ya jeē jíca ya nuū mar. Te ni candondava de, te ni cacana cóhó de jeē cáyūhú de.

Jíhná cúu, áchí de.

27 Te ni cahān-ni Jesús jíin de:

Ndeyí coo ni ró, te ma yūhu ró, chi máá rí cúu, áchí yā.

28 Yūcuán na te ni cahān Pedro jíin yā:

Núu máá ní cúu, te cahān ni jíin ná jēe na cáca jéhé ná nuū mar te jeē na núu ní, áchí de.

<sup>29</sup> Te ni cahān yā:

Nehen núu súcuan, áchí yá.

Te ni quenda Pedro ini barco, te ni jica de nuū ndúte cuahān de nuū Jesús.

<sup>30</sup> Te nuū ní jini de jeē níhin yáhi tachī, te ni yūhú de. Te ni quejéé de quéé de chíji ndute. Te ni cana cóho de:

Jnama ní sáña, áchí de.

<sup>31</sup> Te Jesús ni jni-ni ya ndaha de. Te ni cahān yā jíin de:

Tēe tu cándíje níhin cúu ró. ¿Naun ni nayūhu ró? Achí yá.

<sup>32</sup> Te ni quívi ya ini barco un jíin de, te ni jecuiñi-ni tachī.

<sup>33</sup> Yūcuán na te tēe cáhiin ini barco un, ni cajecuiñi yití de nuū yā. Te ni cacahān de:

Jendaá ndije jeē Sēhe Yaā Dios cúu ní, áchí de.

*Jeē ní nasávāha ya ñayuu cácuñi región Genesaret*

*(Mr. 6.53-56)*

<sup>34</sup> Te ni quenda jíyo ya jíin de nuū mar un, ní jinū yā región Genesaret.

<sup>35</sup> Te ñayuu yūcuan ní canacuni i ya. Te ni cascáca i jnūhun táca ndańúu yūcuan jéé ní jíin yā. Te ñayuu ni caquindeca i ñayuu cácuñi nuū yā.

<sup>36</sup> Te ni cacahān ndahú i jíin yá jeē na quéhé i vésú yusáhma ya. Te táca ñayuu jeē ní caquehé sahma ya, ni canduvāha i.

*Siquí ndese cújnehén ñayuu*

*(Mr. 7.1-23)*

## 15

<sup>1</sup> Yūcuán na te jecu tēe grupo fariseo jíin tēe cástéén tutu ley Yaā Dios, ni quendacoo de ñuu Jerusalén, te ni quecoo de nuū yā. Te ni cacahān de jíin yá:

<sup>2</sup> Tēe cácuáha jíin ró, ¿naun cástívi de costumbre jeē ní cajequin ñayuu jenahán? Chí tu ní cáscuicu de costumbre jeē nándahá de nuū yā te cají de staá. Achí de.

<sup>3</sup> Te Jesús ni cajnūhun yá de:

Te máá ró jíinahan ró, ¿suni naun cástívi ró jniñu ní ndacu Yaā Dios nuū ró? Chí sa costumbre máá ró cúu jeē cascuicu ró.

<sup>4</sup> Chí ni cahān Yaā Dios: Coó yíñúhún ró jíin tátá ró jíin náná ró. Te núu ndé in cahān siquí tátá chí siquí naná, na cúu nahín, áchí Yaā Dios.

<sup>5</sup> Te máá ró chí cacahān ró jeē cuu cahān in tēe jíin tátá de jíin náná de: Ma cúu chindéé ñáhán ná níhín cuáha na jéé caji ní jéé cūhun ní, chí ndihí jeē névāha ná, je ni socō na núu Yaā Dios.

<sup>6</sup> Te tēe cahān súcuan, tuá cánuú chindéé ñáhán de tátá de náná de, áchí ró jíinahan ró. Te súcuan cástívi ró jniñu ní ndacu Yaā Dios, jeē siquí costumbre ní cajequin máá ró.

<sup>7</sup> Tēe stáhú-ni cácuu ró. Ndaā ni nacani Isaiás jnūhun siquí ró nde jenahán, yósó núu tútu ii jeē ni cáhān Yaā Dios:

<sup>8</sup> Ñayuu yáha chí máá yuhu-ni i cájetáhú i ruhū, te nasūu ndé jíin ini jíin ánuá i.

<sup>9</sup> Te cáchiñúhún sáá-ni i ruhū, chí jnūhun cástéén i cúu jniñu ní ndacu tēe, te nasūu jéé ní ndacu máá rí cúu.

Achí Yaā Dios. Achí yá.

<sup>10</sup> Te ni cana ya ñayuu cuehē ún, te ni cahān yā jíin i:

Cuni sóho vāha jíinahan ró, te chuhun ní ró:

11 Nasūu jēē quívi ini yuhu ñayuu cujnéhén i sáha. Chi jnūhun jeē quénda yuhu i, yūcuan cúu jeē cujnéhén i sáha, áchí yá.

12 Yūcuán na te tēe cáscuáha jíin yá, ni quecoo de nuū yá, te ni cacahān de: ¿A jíiní ni jeē ní caquitī ni tēe fariseo jeē ní cajini sōho de jnūhun ni cahān ní? áchí de.

13 Te ni cahān maá yá:

Cácuu de nájñūhun yujnu jeē tu ní náchuhun Tátá rī, Yaā ndeé andiví, te ñin quiví te jnūhun ya quihín.

14 Na quíngoo máá de. Chi cácuu de nájñūhun tēe cuáá cástéén ichi nuū inga tēe cuáá. Chi núu ñin tēe cuáá stéén de ichi nuū inga tēe cuáá, te ndindúú de ñinga de xehvā. Achí yá.

15 Te ni cahān Pedro jíin yá:

Castūhun cájí ní jnūhun yátá yáha nuū na jíināhan ná, áchí de.

16 Te ni cahān Jesús:

¿Te á suni máá ró ná tu jecūhun ni rō chí naún?

17 ¿A tu cájecūhun ni rō jeē táca jēē yéji ñayuu, chí quívi chíji i, te quénda-ni cuahān?

18 Te jnūhun jeē quénda yuhu ñayuu, chí nde ini anuá i vēji, te yūcuan cúu jeē cujnéhén i sáha.

19 Chi nde ini anuá ñayuu quénda jeē jéni néé ni, jeē jéhni ndīyi, jeē casíquí ndéé jnāhan, jeē jíca jnéni, jeē sacuíhná, jeē cahān jnūhun stáhú, jeē cahān yāa síquí jnāhan.

20 Táca jēē yáha cúu jeē cujnéhén ñayuu sáha. Te núu tu squícu i costumbre jeē nāndahá i te caji i staā, tu cúnéhén i sáha. Achí yá.

### *Ñahan inga nación jeē ní candíje ñihin*

(Mr. 7.24-30)

21 Te ni quenda Jesús yūcuan cuáhān yā región Tiro jíin Sidón.

22 Te ñin ñahan ñuu Canaán, néne ña región Tiro jíin Sidón, te ni quee ña nuū Jesús. Te ni cana jee ña:

Tátá, Sēhe yucūn David, cundáhú ni ní sáña víi. Chi sēhe síhí ná, ñūhun tachí ini i, te yōhyo xeēn ndóho i, áchí ña jíin yá.

23 Te tu ní cáhān cuití yā jeē ní cáhān ña. Yūcuán na te ni quecoo tēe cáscuáha jíin yá, te ni cacahān de:

Cahān ní jíin ña na quihín ña, chí cána jee ña vēji ña yatā yō, achí de.

24 Te ni cahān yā jíin ña:

Nuū maá-ni ñayuu nación Israel ni tají Yaā Dios sáña véji ná, chí cácuu i nájñūhun lanchi, quití ní sana.

25 Te ñahan ún chí ní quee ña, te ni jecuíñi yití ña nuū yá, te ni cahān ña:

Tátá, chindéé ñáhán ní sáña víi, achí ña.

26 Te ni cahān yatá yá jíin ña:

Tu íyó váha jeē quénde yō staā sēhe, te cuāha yó núu ina, achí yá.

27 Te ni cahān ña:

Jendaá cahān ní Tátá, te chindéé ñáhán ní sáña vēsú cúu ná nájñūhun ina. Chi suni máá tí cánihín nahín tí pedazo staā cuechí jēē cóyo chíji mesa jitoho tí cáyeji tí, achí ña jíin yá.

28 Yūcuán na te ni cahān Jesús:

Yōhyo váha jeē cándíje ñihin ní súcuan, nánā. Te na sáha ná jēē cuní ni, achí yá.

Te máá hora un ní nduvāha-ni sēhe síhí ña.

*Jeē ní nasávāha ya cuehē ñayuu cácuhū*

<sup>29</sup> Te ni quenda Jesús cuahān yā yūcuán, te ni yāha ya yumar Galilea. Te ni caa ya ñin yucu, te yūcuan ní cucōo ya.

<sup>30</sup> Te cuehē ñayuu ni quecoo i nuū yā, te cándeca i tāca jéē cájica chácuá, jeē cuaá, jeē ñihín, jeē cacúhndú, jíin cuehē gā ñayuu cácuhū. Te ni cajequin i nuū jehé Jesús. Te ni nasávāha ya i jíjnāhan i.

<sup>31</sup> Te ni canaa ni ñayuu un cájito i jeē nácahān ñayuu ñihín, ndúvāha ñayuu cuhndú, nácaca vāha ñayuu chacuá, nánune tinūu ñáyuu cuaá. Te ni cacahān i jeē yóhoyo vāha Yaā cúu Yaā Dios ñuu i Israel.

*Jeē ní scáji yā cuñ mil tēe*

*(Mr. 8.1-10)*

<sup>32</sup> Yūcuán na te ni cana Jesús tēe cáscuáha jíin yá, te ni cahān yā jíin de:

Cúndáhú ni rī ñayuu cuehē yāhá, chí je ni cuu unī quivī cáyūcú i jíin rí, te tuá na vé caji i. Te tu cúni rī natají rí i nuhun ndite i, chí núu súcuan te sava ichi te cuíta lí i. Achí yá.

<sup>33</sup> Te ni cacahān tēe cáscuáha jíin yá:

¿Te ndé nuū ñihín yō staa caji ñayuu cuehē yāhá? Chí yāhá tú na ñayuu yúcu, achí de.

<sup>34</sup> Te ni cajnūhun yá de:

¿Nasaa staa cánevāha ró?

Te ni cacahān de:

Uxā-ni, jíin jecu chācá lúli, achí de.

<sup>35</sup> Yūcuán na te ni cahān yā jíin ñáyuu cuehē un jéē na cúcōo i.

<sup>36</sup> Te ni quihin ya ndihúxá staa jíin cháca ún, te ni nacuatáhú yá nuū Yaā Dios. Te ni tahú cuéchí yá, te ni jehé ya nuū tēe cáscuáha jíin yá, te máá de ni casaja nuū ñáyuu.

<sup>37</sup> Te ndihi i ni cayeji, te ni candutú chíji i. Yūcuán na te ni canastútú de pedazo jeē ní quendōo, te ni chitú úxā jíca.

<sup>38</sup> Te tēe ni cayeji ún, nde cuñ mil de cúu, te sñn ga cúu ñahan jíin súchi lúli.

<sup>39</sup> Yūcuán na te ni nacuatáhú yá nuū ñáyuu ún, te cuanungoo i. Te ni ndiví ya ini barco, te cuahān yā región Magdala.

*Jeē cájicān de ñn jniñu jéhnu nuū yā*

*(Mr. 8.11-13; Lc. 12.54-56)*

## 16

<sup>1</sup> Te ni quecoo tēe grupo fariseo jíin tēe grupo saduceo nuū yā. Chí cácuñi de coto ndee de ya, te ni cajicān de jeē na sáha ya ñn jniñu jéhnu jeē coo ñn seña ichi ándiví.

<sup>2</sup> Te máá yá ni cahān yā jíin de:

Núu ni ini, te cacahān rō: Nandii, chí ni nasácuéhé i ándiví, achí ró.

<sup>3</sup> Te jenéhen chí cacahān rō: Vijna te cuun saū, chí ni nasácuéhé i ándiví, achí ró. Tēe stáhú-ni cácuu ró. Chí cájecūhun ni rō ndese stéén seña ándiví, te tu cájecūhun ni rō ndese stéén táca jniñu jéhnu sáha ri tiempo yáha.

<sup>4</sup> Ñayuu yáha jeē casáha jniñu néé, tu cájetáhú cuiti i Yaā Dios. Te cájicān i jeē sáha ri ñn jniñu jéhnu jeē coo ñn seña ándiví. Te tuá na inga jniñu jéhnu stéén rī nuū i, chí máá-ni jniñu jéhnu nájnūhun ni cuu jíin Jonás, tēe ni nacani jnūhun Yaā Dios nde jenahán. Achí yá.

Te ni stóo ya de jíjnāhan de, te cuahān yā.

*Jñūhun levadura tēe fariseo**(Mr. 8.14-21)*

<sup>5</sup> Te tēe cáscuáha jíin yá ni canaa ni de condiso de staā náa cuangoo de jíin barco inga lado mar.

<sup>6</sup> Te ni cahān Jesús jíin de:

Coto má candíje ró levadura tēe grupo fariseo jíin tēe grupo saduceo, achí yá.

<sup>7</sup> Te tēe cáscuáha un ní cacahān maá de:

Va siquī jeē tú na staā ndíso yó, jeē yúcuān cáhān yā súcuān, áchí de.

<sup>8</sup> Te ni jini Jesús, te ni cahān yā:

¿Najehē cácahān ró jeē ni cáhān rī súcuān siquī jeē tú na staā cándiso ró? Tēe tu cándíje nihin cácuu ró.

<sup>9</sup> ¿A ná tu jecūhun ni rō jeē tu ní cáhān rī súcuān siquī jeē tu ndíso ró stāá? ¿A tu cánućūhun ni rō jeē ní tahućuéchí rí uhūn staā ni cayejí uhūn mil tēe, te nasaa jíca ni canastútú ró jeē ni quéndōo?

<sup>10</sup> ¿Te á tu cánućūhun ni rō jeē ní tahućuéchí rí uxā staā ni cayejí cuūn mil tēe, te nasaa jíca ni canastútú tucu ró?

<sup>11</sup> ¿Te najehē tu cájecūhun ni rō jeē násūu siquī staā ni cahān rī jíin ró jeē ni cáhān rī jeē coto má candíje ró levadura tēe fariseo jíin tēe saduceo? Achí yá jíin de.

<sup>12</sup> Yūcuān na te ni cajecūhun ni de jeē tu ní cáhān yā jeē coto de jeē ma cájí de pan jeē yíhi levadura, chí sa suhva ni cahān yatá yá jeē ma cándíje de jñūhun stáhú cástéén tēe fariseo jíin tēe saduceo.

*Jeē ni cáhān Pedro jeē Jesús cúu Cristo**(Mr. 8.27-30; Lc. 9.18-21)*

<sup>13</sup> Te nuū ní jíin Jesús región Cesarea Filipino jíin tēe cáscuáha jíin yá, te ni cajñūhun yá de:

Ruhū, Yaā ní nduu tēe, ¿ndé ĩn cúu rí cácahān ñayuu?

<sup>14</sup> Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jñūhun Yaā Dios nde jenahán. Te sava ga i cácahān jeē Jeremías chí inga tēe ni nacani jñūhun Yaā Dios cúu ní. Achí de.

<sup>15</sup> Te ni cahān yā jíin de:

Te maá ró, ¿ndé ĩn cúu rí cácahān rō? achí yá.

<sup>16</sup> Te ni cahān Simón Pedro:

Maá ní cúu Cristo, Yaā ní tají Yaā Dios. Te cúu ní Sēhe Yaā Dios, Yaā técu ní cáni, áchí de.

<sup>17</sup> Te ni cahān Jesús:

Yōhyo ndetū rō, Simón sēhe Jonás, chí nasūu ĩn ñayuu ni steén jñūhun yáha nuū rō, chí sa suhva maá Tátá rī, Yaā ndeé andiví, ní steén yā nuū rō.

<sup>18</sup> Te ruhū suni cáhān rī jíin ró jeē maá ró cúu Pedro, jeē cuní cahān: yuū. Te jñūhun ndaā jeē ni cáhān rō jeē maá rí cúu Cristo, suu cúu nájnūhun ĩn yuū cáhnu. Te siquī yuū cáhnu yáha sáha rí jeē quítuu vehe, te vehe un cúu ñayuu cácańdíje ruhū. Te tu ndé vé cundeyí cuiti siquī i, ni jñūhun xeēn jeē cájihí i, tuá na vé cúu sáha jíin ánuá i.

<sup>19</sup> Te maá ró condiso jñífu ró sáha ró jéē quívicoo ñayuu ndaha Yaā andiví jeē ndacu ya jniñu nuū i. Te tāca jéé cási rō jeē ma sáha ñayuu ini ñayiví yáha, suni casi jeē cáyūcú nde andiví. Te tāca jéé cuáha ró jñūhun sáha i ini ñayiví yáha, suni jeē cáyūcú nde andiví cuáha jñūhun. Achí yá.

<sup>20</sup> Yūcuán na te ni ndacu ya jniñu nuū tée cáscuáha jíin yá, jeē ma cáchi de nuū ní ñin ñayuu jeē cúu ya Cristo.

*Jeē ní castühún Jesús jeē cúu yā  
(Mr. 8.31-9.1; Lc. 9.22-27)*

<sup>21</sup> Te nde saá ní quejéé Jesús cástühun cáji yá nuū tée cáscuáha jíin yá jeē jíini ñühún quihín yā ñuu Jerusalén. Te táca tée jéhu jíin sūtú cácujuhúnu jíin tée cástéén tutu ley, stóho ndasí de ya. Te cahni de ya, te nuū uní quiví te natecu yā, achí yá.

<sup>22</sup> Yūcuán na te Pedro, ni cana máñühún de ya, te ni quejéé de cáhán de nuū yā:

¿Naun cáhán ni súcuan? Chi tu cúní Yaā Dios jeē cuu súcuan. Tu jíini ñühún cuítí ndoho ní jnündóho yáha, achí de.

<sup>23</sup> Te ni ndío cóto ya nuū Pedro, te ni cahán yā jíin de:

Cujiyo quihín rō, chí cáhán rō ná cáhán Satanás. Chi tēe ndúcú stívi rúhū cúu rō. Te tu jéni ní rō nájnūhun jéni ní Yaā Dios, chí sa suhva jéni ní rō nájnūhun cájeni ní ñayuu. Achí yá.

<sup>24</sup> Yūcuán na te ni cahán yā jíin tée cáscuáha jíin yá:

Na-ni ñayuu núu cúní i condiquín i ruhū, na cási i jeē cuní maá i, te na condiquín i ruhū te cuáha i jnūhun ndoho i jnündóho jeē siquí rí, vésú na cúu i.

<sup>25</sup> Chi núu ndé ñáyuu cuní i cácu i nuū jnündóho quiji nuū i jeē siquí ruhū, núu súcuan te jnahnú ndetū i ní cáni. Te núu ndé ñáyuu, vésú na cúu i jeē siquí ruhū, te cotecu i ní cáni.

<sup>26</sup> ¿Chi ndé cuajniñu vésú na cúndeyí ñáyuu nihín i ní ñáyiví, te núu quiví i nuū jnahnú ndetū i? Chi tú na jíin cuítí chunaa ñayuu jeē cácu ánuá i.

<sup>27</sup> Chi ruhū, Yaā ní nduu tēe, ndiji ri jíin táca ndajéhé rí, te yóhoyo luu cujéhu ri nájnūhun cújéhu Tátá rí. Yūcuán na te cuáha ri tahū nuū ñin ñin ñayuu núu ndese jniñu ní casáha i.

<sup>28</sup> Te jendaá cahán rí jíin ró jeē sava tēe cáhiin yáhá, ma cúu de chí nde cuni de jeē maá rí, Yaā ní nduu tēe, ndácu ri jniñu jíin poder rí.

*Jeē tucu ni nduu ya  
(Mr. 9.2-13; Lc. 9.28-36)*

## 17

<sup>1</sup> Yūcuán na te nuū iñú quiví te Jesús ni jeca ya Pedro jíin Jacobo jíin Juan ñani Jacobo, cuahán sñn ya jíin de ñin yucu súcún.

<sup>2</sup> Te yūcuán, tucu ni nduu ya nuū de. Chi ni ndindēe núu yā nájnūhun niándii. Te sahna ya ni nducujín quiyi ndasí, nájnūhun nduva luz.

<sup>3</sup> Te ni cajito-ni de jeē Moisés jíin Elías, tēe ni cahíyo jenahán, cándajnühún de jíin yá.

<sup>4</sup> Te ni cahán Pedro jíin yá:

Nacā jeē váha jeē cáhiin ná yáha. Te núu cúní ni te na sáha ná úní vehe ramada, ñin cuu máá ní, inga cuu Moisés, te inga cuu Elías, achí de.

<sup>5</sup> Te níni cáhán gā de, te ní quiji vicó nūhun jéé yaa ndasí, ni jesi-ni nuū de. Te nuū vicó un ní cahán ñin jnūhun:

Yáha cúu Sēhe ri jeē maní ndasí rí jíin, te cúsi ní rí jíin. Na cúní nahín ró jnūhun cáhán yā. Achí.

<sup>6</sup> Te jeē súcuan ni cajini sōho tēe cáscuáha ún, te ni cajecava ndeyí de, chí yóhoyo ni cayūhú de.

<sup>7</sup> Yūcuán na te ni quee Jesús, te ni soó yá ndaha ya siquí de. Te ni cahán yā:

Ndocuiñi, te ma yūhu ró jijnáhan ró, áchí yá.

8 Te ni candacoto de, te tuá tēe un ní cájito de, chí máá ñin na Jesús.

9 Te ni cananuu de jíin yá yucu ún. Te ni ndacu ya jniñu nuū de:

Ma cáchi rō nuū ní ñin jeē súcuan ni cajito ró, chí nde na nátecu maá rí, Yaā ní nduu tēe, áchí yá.

10 Yūcuán na te tēe cáscuáha jíin yá, ni cacajnūhún de ya:

Núu súcuan te tēe cástéen tutu ley Yaā Dios, ¿najahē cácahān de jeē cánuú ndiji Elías xīhna gā, te sáa te quiji Yaā cúu Cristo? achí de.

11 Te ni cahān Jesús jíin de:

Jendaá cúu jeē xīhna gā quiji ñin tēe cuu nájnūhun Elías, te sátūhva de ndihi, áchí tutu.

12 Te cáhān rī jíin ró jeē jé ni quiji tēe ni cuu nájnūhun Elías, te tu ní jíiní ñayuu jeē suu de cúu. Te ni casáha ndevāha ñayuu jíin de ndihi jeē ní cacuu ni maá i. Te suni súcuan stóho i ruhū, Yaā ní nduu tēe. Achí yá.

13 Yūcuán na te tēe cáscuáha un, ní cajecūhun ni de jeē cahán yā jeē Juan tēe scuándute, ni cuu de nájnūhun Elías.

*Jeē ní nasávāha ya ñin sūchi jíhí yīhí*

*(Mr. 9.14-29; Lc. 9.37-43)*

14 Te ni najinū yā jíin de nuū ñáyuu cuehē ún. Te ni quee ñin tēe, ni jecuñi yití de nuū yā, te ni cahān de:

15 Cundáhu ní ni séhe yí ná, chí yōhyo xeēn ndóho i cuehyí jíhí yīhí. Te je ni cuu cuehē jíinu cótúu i nuū ñuhún jíin núu ndúte.

16 Te ni quindeca ná i nuū tēe cáscuáha jíin ní, te tu ní cúu sávāha de i, áchí de.

17 Te ni cahān Jesús:

Ñayuu yōhyo ñihni ni cácuu ró chí tu cácandíje ró jéē cuu nduvāha i. ¿Nasaa ga quiví condee rī jíin ró? ¿Te nasaa ga quiví cuandeyí ni rī jíin ró? Cuáquihin sūchí un na quíji i, áchí yá.

18 Te ni cahān yā nuū tachí, te ni quenda-ni ini sūchí un. Te ni nduvāha-ni i maá hora un.

19 Yūcuán na te tēe cáscuáha un, ní cacajnūhun sáin de ya:

¿Najahē tu ní cúu quenehen ná tachí un jíjnáhan ná? achí de.

20 Te ni cahān yā:

Siquí jeē tu cácandíje ñihin ró jéē cuu sáha ró. Chí jendaá cahán rī jíin ró, jeē núu candíje ró vésu ñin tihlí-ni, cūhva nájnūhun ñin ndiquin mostaza, te cuu sáha ró táca-ni jniñu yí. Chí cuu cahān rō jeē na cújiyo yucu yáha quihin inga lado, te cujiyo-ni. Te táca-ni jniñu chí cuu sáha ró, te núu candíje ñihin ró jéē cúu.

21 Te ñin tachí súcuan chí ma quénda cuiti quihñ, te núu tu cacān tahú rō te coo ndite ni rō. Achí yá.

*Jeē ní cahān tucu ya jeē cúu yā*

*(Mr. 9.30-32; Lc. 9.43-45)*

22 Te jíca cuu Jesús jíin de jíjnáhan de región Galilea, te ni cahān yā jíin de:

Máá rí, Yaā ní nduu tēe, nastúu i ruhū nuū táca tēe xeēn.

23 Te cahni de ruhū, te nuū uní quiví te natecu rī, achí yá.

Te ni canducuíhyá ndasí ni de jeē ní cahān yā jñūhun yáha.

*Siquí xūhun cuajniñu ini templo*

<sup>24</sup> Te ni jinū yā ñuu Capernaum jín té cásuáha jín yá. Te tē cástútú xuhun templo ni quecoo de, te ni cacajñuhún de Pedro:

Te maestro maá ró jijnáhan ró, ¿á tú cuáha de xuhún cuajñíñu ini templo, chí naún? áchí de.

<sup>25</sup> Te ni cahān Pedro:

Cuu, áchí de.

Te ná ni quívi de ini vehe, te xīhna gā Jesús ni cahān yā jín de:

¿Ndese jéni ni rō, Simón? Tāca tée cácuu rey ini ñayívi yáha, ¿ndé núu cájicān de xuhun renta jín xuhun cuajñíñu ñuu? ¿A núu séhe de chí núu ñáyuu sīn vehe? áchí yá.

<sup>26</sup> Te ni cahān Pedro:

Nuū ñáyuu sīn vehe, áchí de.

Te ni cahān Jesús:

Núu súcuan te tú na inga cujéhu nuū séhe rey jeē cacán xuhún un núu i.

Súcuan ni cahān yā jeē cujéhu ya cúu ya Sēhe Yaā Dios. Te ni cahān yā:

<sup>27</sup> Te na chúnaa yō, návāha tu squítí ni yō de. Núu súcuan te cuáhán ndé yumar, te scáne ró gancho jeē jnái chácá, te tava rō chácá jéē jnái xīhna gā. Te ndica ró yuhu ti, te yūcuan níhñ rō ñn xuhun jéē cánda chunaa ró jeē cájicān de. Te quindēca ró núu de jeē cúu ruhū jín rōhó. Achí yá.

*Ndé ñáyuu cúu jeē cujéhu ga  
(Mr. 9.33-37; Lc. 9.46-48)*

## 18

<sup>1</sup> Te suni quívi un ní quecoo tē cásuáha un núu yā, te ni cacajñuhún de ya: ¿Ndé ñn cújéhu ga nuū ñáyuu jeē ndácu Yaā andívi jniñu nuū? achí de.

<sup>2</sup> Te ni cana ya ñn sūchi lúli, te ni jeni ya i mēhñú de.

<sup>3</sup> Te ni cahān yā:

Jendaá cahán rī jín ró, núu tú nandió cóo ni rō te cani ni rō nájñuhun ñn sūchi lúli, ma quívi cuítí rō ndaha Yaā andívi jéē ndacu ya jniñu nuū rō.

<sup>4</sup> Núu súcuan te ñayuu jeē jéni ni i jeē tu cújéhu i, nájñuhun jéni ni sūchi lúli yáha, suu i cújéhu ga nuū ñáyuu jeē ndácu Yaā andívi jniñu nuū.

<sup>5</sup> Te na-ni ñayuu núu jeē siquí ruhū jetáhú i ñn sūchi lúli nájñuhun sūchi yáha, te ruhū jetáhú i. Achí yá.

*Xeēn coo siquí ñáyuu quívi nuū cuéchi  
(Mr. 9.42-48; Lc. 17.1-2)*

<sup>6</sup> Te núu ñn sūchi lúli yáha cándíje i ruhū, te núu quívi i cuéchi sáha na-ni ñayuu, te vāha ga núu ni conuhñi ñn yōso cáhnu sucūn ñayuu ún, te quēe i chíji ndute mar nuū.

<sup>7</sup> Nacā xeēn cúu jín ñáyuu ñayívi, chí máni íyó jéē nducú squívi ñayuu nuū cuéchi. Te máni súcuan coo ini ñayívi. Te nacā xeēn ndoho ñayuu jeē squívi jnāhan nuū cuéchi.

<sup>8</sup> Núu súcuan te núu ndaha ró chí jéhē rō sáha jeē quívi ró cuéchi, vāha ga cahnde rō te scáne ró na quíhñ, návāha tuá sáha ró cuéchi. Chí vāha ga jeē coo chácá ró chí coo tícuñdu ró te quívi ró núu cotecu rō ñí cáni, vēsú jeē cóndee ndíndú ndaha ró jéhē rō te quívi ró núu ñuhún jeē cayú ñí cáni.

<sup>9</sup> Te núu tinūu ró sáha jeē quívi ró cuéchi, vāha ga tava rō te scáne ró na quíhñ, návāha tuá sáha ró cuéchi. Chí vāha ga jeē coo ñn-ni tinūu ró te quívi ró núu cotecu rō ñí cáni, vēsú jeē cóndee ndíndú tinūu ró te quívi ró núu ñuhún infierno.



*Jñuhun yátá siquī lanchi jeē ní sana*  
(Lc. 15.3-7)

<sup>10</sup> Coto ma sájéē ni rō nuū ní ñin sūchi lúli yáha. Chi cáhán rī jín rō jeē tācá ndajéhé andiví jeē ndíto ya i, níni cáhñin ya nuū maá Tátá rī andiví.

<sup>11</sup> Chi ruhū, Yaā ní nduu tēe, vēji rī jeē jnáma rī ñayuu jeē ní sana i nuū Yaā Dios.

<sup>12</sup> ¿Te ndese cájeni ni rō? Núu ñin tēe ndéca de ñin ciento lanchi, te núu sana ñin ti, ¿á tu stóo de cuñin xico xahūn cuñin gā tī yucu, te ndicó de quinanducú de quiti ní sana ún?

<sup>13</sup> Te núu ni nanihñin de ti, te ndaā jeē yóhoyo ga cúsiñi ni de jín quiti ún vēsú jín cuñin xico xahūn cuñin gā quiti jeē tu ní sana.

<sup>14</sup> Te suni súcuan maá Tátá rō, Yaā ndeé andiví, tu cúní yā jeē jnahnú ndetū ni ñin sūchi lúli yáha.

*Siquī jeē cóne cáhnu ni yō nuū jnáhan yó*  
(Lc. 17.3)

<sup>15</sup> Te núu jnáhan rō ní sáha de cuēchi siquī rō, núu súcuan te castūhun rō nuū mañuhñin-ni de jeē ni sáha de cuēchi siquī rō. Te núu ni jetáhú de jñuhun ni cahñ rō jín de, núu súcuan te je ni ndumaní de jín rō ní sáha rō.

<sup>16</sup> Te núu tu ní jétáhú de jñuhun cáhán rō, te quicāna rō ñin chí úu gā ñayuu quihñ rō jín nuū de, cuu i testigo jín rō, te cundaā cuēchi de te ndumaní de jín rō.

<sup>17</sup> Te núu tu ní jétáhú tucu de jñuhun cácahñ tēe ún, yūcuán na te castūhun rō nuū ñayuu cácadñje. Te núu tu ní jétáhú tucu de jñuhun cahñ ñayuu cácadñje ún, te siáá rō de na cóo de nájnūhun ñin tēe tu cádnje nuū Yaā Dios chí tēe stútú xūhun renta.

<sup>18</sup> Jendaá cahñ rī jín rō jéē tāca jéē cási rō jeē ma sáha ñayuu ini ñayiví yáha, suni casi jeē cáyucú nde andiví. Te tāca jéē cuáha rō jñuhun sáha i ini ñayiví yáha, suni jeē cáyucú nde andiví cuáha jñuhun.

<sup>19</sup> Te suni cáhán rī jín rō, núu uñ jnáhan rō ini ñayiví yáha, ñnuú cani ni rō siquī ñin jeē cacán tahú rō, núu súcuan te maá Tátá rī andiví cuáha ya jeē cájicān rō.

<sup>20</sup> Chi núu ndé mí ndútútú úu chí únñi ñayuu jeē cáchiñuhñ i ruhū, te yūcuan ñe rī jín i, áchí yá.

<sup>21</sup> Yūcuán na te ni quee Pedro nuū yā, te ni cajnūhñ de ya:

¿Nasaa jínu cone cáhnu ni na núu jnáhan ná jéē sáha de cuēchi siquī ná? ¿A ndé uxā jínu chí nañn? áchí de.

<sup>22</sup> Te ni cahñ Jesús:

Tu cáhán rī jín rō jeē maá uxā jínu, chi nde uxā jínu jeē uní xico uxí.

*Jñuhun yátá siquī mozo jeē tu ní ñne cáhnu ni*

<sup>23</sup> Núu súcuan te Yaā ndeé andiví, suhva cúu jeē ñne cáhnu ni yā nuū ñayuu ndácu ya jniñu nuū: Cúu nájnūhun ñin rey jeē cúní de sándaā de jín mozo de jeē cátaū nuū de.

<sup>24</sup> Te ni quejéē de sándaā de jín i. Te ni caquindecá i ñin mozo jeē taú tijni millón peso nuū de.

<sup>25</sup> Te tú na vé névaha mozo un chunaa nuū de. Te ni ndacu de jniñu jeē na cúyahu mozo un jín ñasihí jín séhe jín táca ndajniñu, te nucūnaa xūhun táú.

<sup>26</sup> Yūcuán na te ni jecuiñi yití mozo un, te ni cahñ ndahú de jín patrón de ún: Condetu ní, te na chúnaa ndihí ná xūhun ní, áchí de.

<sup>27</sup> Te máá patrón ni cundáhú ni de mozo de. Te ni ine cáhnu ni de jeē taú mozo de ún, te ni siaá de jeē ma chúnaa gā.

<sup>28</sup> Te ni quenda mozo un cuáhān de, te ni najnáhan-ni de jíin ñn jnáhan mozo de jeē taú jecu peso nuū de. Te ni jñi de tēe ún, te ni quitu de sucūn, te ni cahān de: Chunaa jeē taú rō nuū rī, achí de.

<sup>29</sup> Te jnáhan mozo de un ní jecuññi yití nuū de, te ni cahān ndahú jíin de: Condetu te na chúnaa ndihí rī xūhun ró, achí.

<sup>30</sup> Te máá de tu ní cúní de, chí ni chune de tēe un vecāa nde quiví nachunaa jeē taú nuū de.

<sup>31</sup> Te tāca jnáhan mozo de ni cajito jeē súcuan ni sáha de, te ni cajnahuhū ndasí ni de. Te cuango de nuū patrón de, te ni cacachi de ndihí ndese ni cuu.

<sup>32</sup> Yūcuán na te patrón un ní nacana de mozo un, te ni cahān de jíin: Mozo ndevāha cúu ró. Chí ni ine cáhnu ni rī ndihí jeē taú rō nuū rī, chí ni cahān ndahú ró jíin rī.

<sup>33</sup> Te nájnūhun ni cundáhú ni rī rohó, suni súcuan ni jini ññuhún cundáhú ni rō jnáhan mozo rō nuū, achí de.

<sup>34</sup> Te ni quití ndasí ni patrón, te ni ndacu de jniñu jeē na quiví vecāa nde nachunaa ndihí jeē taú nuū de.

<sup>35</sup> Te ni jīnu ni cahān yā, te achí yá:

Nájñūhun ni sáha rey un jíin mozo de, suni súcuan sáha máá Tátá rī andiví jíin tāca rōhó núu tu cone cáhnu ni rō nuū jnáhan ró nde jíin ini jíin ánuá rō, núu na-ni cuēchi sáha i nuū rō. Achí yá jíin de jijnáhan de.

*Siquí jeē ma stóo jnáhan tēe jíin ñahan  
(Mr. 10.1-12; Lc. 16.18)*

## 19

<sup>1</sup> Te nuū ní ndihí ni cahān Jesús tāca jnúhun yáha, te ni quenda ya Galilea cuahān yā. Te ni jinū yā región Judea, inga lado yūte Jordán, ichi núu cáne niāndii.

<sup>2</sup> Te cuehē ñayuu ni candiquín i ya, te yūcuan ní nasávāha ya ñayuu cácuñū.

<sup>3</sup> Yūcuán na te ni quecoo jecu tēe grupo fariseo nuū yā, chí cácuni de coto ndee de ya núu ndese cahān yā. Te ni cacajnūhún de ya:

¿A íyó ley jeē cuu ndusñn ñn tēe jíin ñasihí de núu na-ni siquí cúu, chí naún? achí de.

<sup>4</sup> Te ni cahān yā:

¿A tu ní cácahu ró tutu i ndese ni sáha Yaā Dios ñayuu nde xīhna ññuhún? Chí tēe jíin ñahan ni sáha ya, achí.

<sup>5</sup> Te suni ni cahān Yaā Dios: Jeē yūcuan cúu jeē stóo tēe tátá de náná de, te quijnáhan de jíin ñasihí de, te ñn na cuu ndindúú de, achí Yaā Dios, achí tutu.

<sup>6</sup> Núu súcuan te tuá cúu uū jnáhan de, chí ñn na cúu. Jeē yūcuan tu íyó váha jeē stóo jnáhan, chí jeē ni squijnáhan Yaā Dios cúu, achí yá.

<sup>7</sup> Te ni cacajnūhún de ya:

Núu súcuan ¿te naun ni ndacu Moisés jniñu jenahán jeē núu stóo ñn tēe ñasihí de, te na cúvāha acta jeē ndusñn de jíin ña? achí de.

<sup>8</sup> Te ni cahān yā jíin de:

Siquí jeē níhni ni rō jijnáhan ró, jeē yūcuan ní jēhe Moisés jñūhun jeē stóo ró ñasihí ró. Te nde xīhna ññuhún chí nasūu súcuan ní cuu.

9 Te ruhū chi cáhán rī jíin ró, núu ìn tēe stóo de ñasihí de, te núu nasūu jéē tijni ni ña, te quijnáhan de jíin inga ñahan, núu súcuan te cásiquí ndéē de ña. Te núu ìn tēe condeca de ñahan ní ndusín, suni cásiquí ndéē de ña, áchí yá.

10 Yūcuán na te ni cacahān tēe cáscuáha jíin yá:

Te núu ma cúu stóo tēe ñasihí de, núu súcuan te vāha ga ma cóndeca de ñahan, áchí de.

11 Te ni cahān yā jíin de:

Jnūhun ni cahān rō yāhá, tu níhín jniñu nuū ndihí tēe, chi máá nene tēe jeē ní sáha Yaā Dios jeē níhín jniñu nuū.

12 Chi iyó tijni siquí jeē jési jeē ma cóndeca tēe ñahan. Chi sava tēe ni cacacu de jeē ma cúu condeca de ñahan. Te sava ga tēe ni sáha ñayuu jeē ma cúu condeca de ñahan. Te sava ga tēe ni cajeni ni maá de jeē ma cóndeca de ñahan siquí jeē ndihí ni de jíin jniñu jeē ndácu Yaā andiví nuū de. Tēe jeē cúu cuatáhú jnūhun jeē ma cóndeca de ñahan, na cuatáhú de núu súcuan. Achí yá.

*Jeē ni jíicān tahú Jesús jehē sūchi lúli*  
(Mr. 10.13-16; Lc. 18.15-17)

13 Yūcuán na te ni quecoo ñayuu jíin sūchi lúli, jéē na sóo yá ndaha ya xiní i te cacān tahú yā jehē i. Te tēe cáscuáha jíin yá, ni cacahān de nuū ñayuu vējicoo jíin i.

14 Te ni cahān Jesús:

Cuāha jnūhun na quíjicoo sūchi lúli jíin nuū rī, te ma cási rō jeē quíjicoo i. Chi ñayuu jeē ndió cóo ni i cani ni i nájnūhun sūchi yáha, suu i quíví ndaha Yaā andiví jéē ndacu ya jniñu nuū i, áchí yá.

15 Te ni soó yá ndaha ya xiní i jíin áhan i. Te ni quenda ya yūcuan cuáhān yā.

*Jnūhun tēe cúcá*  
(Mr. 10.17-31; Lc. 18.18-30)

16 Te ìn tēe suchí ní quee de nuū Jesús, te ni cajnūhún de ya:

Tēe vāha cúu ní Maestro. Te cachi ní, ¿na jniñu vāha sáha ná te nihín tahú na cotecu na ní cáni andiví? áchí de.

17 Te ni cahān yā jíin de:

¿Naun cáhán rō jeē tēe vāha cúu rí? Tú ni ìn tēe vāha iyó, chi máá ìn-ni Yaā Dios. Te núu cúní rō cotecu rō ní cáni, te squícu ró jniñu ní ndacu ya. Achí yá.

18 Te ni cahān de:

¿Ndé-ni jniñu cúu núu súcuan?

Te ni cahān yā:

Ma cáhni rō ndīyi. Ma cosíquí ndéē jnáhan ró. Ma sacuíhná ró. Ma sajnūhún ró.

19 Cuatáhú ró nuū tatá rō nuū naná rō. Te cundáhú ni rō jnáhan ró nájnūhun cundáhú ni rō maá ró, áchí yá.

20 Te ni cahān tēe suchí un:

Tácá jniñu yáha je ni squícu ná ndé ná lúli ná. ¿Te na vé cúmaní gā sáha ná núu súcuan?

21 Te ni cahān Jesús:

Núu cúní rō squícu ndihí ró, cuáhán te xīco ró ndihí jeē névāha ró, te cuāha ró núu ñayuu ndahú. Te nde andiví cuáha ya jeē ndetū ndasí coo ró. Yūcuán na te quijí ró condiquín ró ruhū quihín yō, áchí yá.

22 Te tēe suchí un, ná ni jini sōho de jnūhun yáha, te ni cucuíhyá ni de te cuahān de, chi cúcá ndasí de.

23 Yūcuán na te ni cahān Jesús jíin tēe cáscuáha jíin yá:

Jendaá cahán rī jín ró, tēe cúcá chi yōhyo yí quívicoo de ndaha Yaā andiví jéé ndacu ya jniñu nuū de.

<sup>24</sup> Te cáhán tucu rī jín ró jeē yachī gā yāha ñn camello yaū yutícuí, vēsú jeē quíví ñn ñayuu cucá ndaha Yaā Dios jeē ndacu ya jniñu nuū i, áchí yá.

<sup>25</sup> Te tēe cáscuáha jín yá, yōhyo ni canaa ni de jeē ní cajini de jñuhun yáha, te ni cacajñuhun jñáhan de:

¿Ndé ñáyuu cúu jeē cácu núu súcuan?

<sup>26</sup> Te ni ndacoto Jesús nuū de, te ni cahān yā:

Ñayuu chi ma cúu squíví i máá i ndaha Yaā Dios, te máá yá chi ndihí-ni cuu sáha ya, achí yá.

<sup>27</sup> Yūcuán na te ni cahān Pedro:

Saña jínáhan ná ní castóo ná ndihí jeē cánevāha ná, te cándiquín na níhín. ¿Te na vé níhín na núu súcuan? áchí de.

<sup>28</sup> Te ni cahān Jesús jín de:

Ruhū, Yaā ní nduu tēe, jendaá cahán rī jín ró jijnáhan ró jéé ñn quíví conene rī mesa ndacu rī jniñu, te yōhyo luu cujéhu rī ini ñayíví jéé. Te quíví ún te máá ró jeē ní cacandiquín rō ruhū, suni coyūcu ró nuū uxí uū mesa ndacu ró jniñu. Te sándaā rō jniñu ndihúxí uū yucūn ñayuu Israel.

<sup>29</sup> Te táca ñáyuu jeē ní stóo vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, siquí jeē cóndiquín i ruhū, te nanihín i ñn ciento gā jeē súcuan. Te suni nihín tahú i cotecu i ní cáni.

<sup>30</sup> Te cuehē ñayuu jeē vijna cácuu i nuū, nduu i sandihí. Te ñayuu jeē vijna cácuu i sandihí, nduu i nuū. Achí yá.

*Jñuhun yátá siquí tēe cásjniñu*

## 20

<sup>1</sup> Te suhva cúu jeē ndácu Yaā andiví jniñu nuū ñáyuu: Cúu nájñuhun ñn tēe chíí ñuhun. Te ñn nehen ni quenda de, ndúcú de tíjni mozo jeē taxín ndehē uva de.

<sup>2</sup> Te ni sándaā de jín mozo un jéé chúnaa de ñn denario jeē quíví. Te ni tají de tēe un cuángoo jeē taxín uva de.

<sup>3</sup> Yūcuán na te ni quenda tucu de nájñuhun cahñn. Te ni jito de nuū sava ga tēe cáyūcu sáa-ni de nuū yáhu.

<sup>4</sup> Te ni cahān de jín: Róhó jínáhan ró, cuángoo taxín ró uva rī, te chunaa vāha rī yāhu ró, áchí de. Te tēe un cuángoo de.

<sup>5</sup> Te ni quenda tucu de jeē cuácuu cahuxí uū jín jéé cuácuu cahuní, te suni súcuan ní nihín tucu de mozo.

<sup>6</sup> Te jeē cuácuu cahuhūn ni quenda tucu de. Te ni nihín tucu de jecu gā tēe cáyūcu sáa-ni nuū yáhu. Te ni cahān de jín: ¿Najehē cáhñn sáa-ni ró yáha ní ndiáca? áchí de.

<sup>7</sup> Te ni cacahān tēe ún: Siquí jeē tú ni ñn ní cána saña jéé sájniñu ná. Te ni cahān de jín tēe ún: Núu súcuan te suni máá ró quingoo ró taxín ró ndehē uva rī, chi chunaa vāha rī yāhu ró, áchí de.

<sup>8</sup> Te nuū ní ini, te tēe chíí ñuhun ni cahān de jín tēe cújéhu nuū mozo de: Cana xiní tēe cásjniñu te chunaa rō yáhu de, te xihna gā tēe ni quívicoo sandihí, te sáa te tēe ni quívicoo xihna ñuhún, áchí de.

<sup>9</sup> Te ni quecoo tēe jeē ní quívicoo cahuhūn. Te ñn denario ni caquihñ ñn ñn de.

10 Yūcuán na te ni quecoo tēe jeē ni quívicoo xīhna ñúhún. Te cájeni ni de jeē cuehē gā quiyāhu de. Te ñn-ni denario ni caquihin ñn ñn de.

11 Te nuū ní caquihin de, te ni caquejéé de cácahān sōo de siquī tēe chí ñuhun, áchí de:

12 Máá ná jijnáhan ná, ndiáca ni casájniñu ná, te ni candoho ná jéé jihní. Te tēe yáha jéé ni quívicoo sandihí, chí máá ñn hora-ni ni casájniñu de. Te inuú-ni ni chiyāhu ní sáña jíin de, áchí de.

13 Te tēe chí ñuhun ni cahān jíin ñn de: Amigo, nasūu jéé tú vāha sáha ri jíin ró. ¿A tu ní sándaā yō jeē ñn denario quiyāhu ró, chí naún?

14 Núu súcuan te quihin yāhu ró te quinhun rō. Chí cúní rī jeē tēe ni quívicoo sandihí yáha, inuú quiyāhu de jíin máá ró.

15 ¿Te á tu cuu sáha ri ndese cúní rī jíin xúhun máá rí? ¿Te chí cúcuésún ni rō jeē ní chiyāhu vāha ri de jijnáhan de siquī jeē vāha ní rí? áchí de.

16 Te nájnūhun ni sáha tēe chí ñuhun, suni súcuan sáha Yaā Dios. Chí ñayuu cácuu sandihí, nduu i nuū. Te ñayuu cácuu nuū, nduu i sandihí. Chí cuehē ñayuu cána ya jeē candíje i ya. Te jecu-ni i cándíje, te nácaji ya máá i jeē ndúu i sēhe ya. Achí yá.

### *Jeē ni cáhān tucu Jesús jeē cúu yā*

*(Mr. 10.32-34; Lc. 18.31-34)*

17 Yūcuán na te ná ni quihin Jesús ichi cuahān yā ñuu Jerusalén, te ni cana sīn ya ndihúxí uū tēe cáscuáha jíin yá. Te ni cahān yā jíin de:

18 Cuni sōho ró, chí je cuángoo yō ñuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácujeñhu jíin núu tēe cástéén tutu ley. Te ndonda de siquī rī jeē cúu rī.

19 Te squívi de ruhū nuū tēe nación Roma jeē cáyūcú Jerusalén cándacu jniñu. Te tāca tēe un sácata de nuū rī. Te cani de ruhū, te sáa te cahni de ruhū jicá cruz. Te nuū uní quívi te natecu rī. Achí yá.

### *Jeē ni jíicān naná Jacobo jíin Juan ñn favor nuū yā*

*(Mr. 10.35-45)*

20 Yūcuán na te ni quee ñasihí Zebedeo nuū yā jíin séhe ña Jacobo jíin Juan. Te ni jecuiñi yití ña nuū yā, jíicān ña ñn favor nuū yā.

21 Te ni cajnūhun yā ña:

¿Na vé cuní rō?

Te ni cahān ña:

Cuāha ní jnūhun jeē quívi ndácu ní jniñu te conēne ndindúú séhe ná yáha xiin ní, ñn i lado vāha ní, te inga i lado jecó ní, achí ña.

22 Yūcuán na te ni cahān Jesús jíin Jacobo jíin Juan:

Tu cájini rō na vé cúu jeē cájicān rō. ¿A cuu ndoho ró jnúndóho nájnūhun jeē quíji siquī rí? ¿Te á canda ró ndoho xeēn rō nájnūhun ndoho rí? Achí yá.

Te ni cacahān de:

Cuu sáha ná.

23 Te ni cahān yā jíin de:

Jendaá jeē ndoho ró jnúndóho nájnūhun jeē quíji siquī rí, te ndoho xeēn rō nájnūhun ndoho rí. Te jeē conēne ró lado vāha ri jíin lado jecó rí, nasūu rúhū cúu jeē cuáha jnūhun. Chí je íyó túhva cuu tāca tēe jeē ní nacāji Tátá rí, te tēe un níhīn. Achí yá.

24 Te uxí gā tēe cáscuáha jíin yá ní cajini de jnūhun yáha. Te ni caquiti ni de nuū uú ñani ún.

25 Te Jesús ni cana ya de, te ni cahān yā jíin de:

Cájini rō ndese cásáha tēe cécujéhnū nuū ñáyuu tǎcǎ nacióon. Chi cándacu nihin de jniñu nuū i, te máá de cáchí ndese coo.

<sup>26</sup> Te máá ró jijnáhan ró, chi ma sáha ró súcuan. Chi núu ndé ñin ró cúní cujéhnū, sa suhva cuajniñu ró núu jnáhan ró.

<sup>27</sup> Te núu ndé ñin ró cúní cuu nuū, sa suhva sáha ró máá ró mozo nuū jnáhan ró.

<sup>28</sup> Chi suni súcuan sáha ruhū, Yaā ní nduu tēe, chi nasūu jēe véji ri jeē cuajniñu ñayuu nuū rī, chi sa suhva véji ri jeē cuajniñu ri nuū ñáyuu. Te cuáha ri máá rī cuu rī náváha jnama ri cuehē ñayuu, achí yá.

*Jeē ní nasáváha ya uū tēe cuáá*

*(Mr. 10.46-52; Lc. 18.35-43)*

<sup>29</sup> Yūcuán na te ni quenda ya jiin de ñuu Jericó. Te cuehē ndasí ñáyuu ni candiquín i ya.

<sup>30</sup> Te yuhíchi un cáyūcu uū tēe cuáá. Te ni cajini de jnūhun jeē yáha Jesús cuahān yā, te ni cacana jee de:

Máá ní jeē cúu ní Séhe yucūn David, cundáhú ni ni sáña, achí de.

<sup>31</sup> Te ñayuu un ní cacahān i nuū de jeē na cási de yuhu de. Te víhyá gā ni cacana jee de:

Máá ní jeē cúu ní Séhe yucūn David, cundáhú ni ni sáña ví, achí de.

<sup>32</sup> Te ni jecuiñi Jesús, te ni cana ya ndindúú tēe cuáá un, te ni cajnūhun yá de:

¿Na vé sáha ri jiin ró cécuni rō?

<sup>33</sup> Te ni cacahān de jiin yá:

Jeē na ndúndijin tinūu ná cécuni ná, achí de.

<sup>34</sup> Te ni cundáhú ni yā de. Te ni tee ya ndaha ya tinūú de. Te ni candundijin-ni tinūú de. Te ni candiquín de ya cuango de jiin yá.

*Jeē ni quávi Jesús ñuu Jerusalén*

*(Mr. 11.1-11; Lc. 19.28-40; Jn. 12.12-19)*

## 21

<sup>1</sup> Te nuū cuácuyajni ya ñuu Jerusalén, te ni jinū yā jiin tēe cáscuáha jiin yá ñuu Betfagé, jeē íne jehē yucu Olivos. Te ni tají yá uū tēe cáscuáha jiin yá jeē quíngoo de.

<sup>2</sup> Te achí yá jiin de:

Cuáhān ñuu lúlí íne ichi núú. Te yūcuan nihin rō ñin burra, núhní tī jiin ñin burro lúlí. Te ndají ró tī, quijicoo ró jiin tī nuū rī.

<sup>3</sup> Te núu ndé ñin cahān jiin ró, te cachi rō nuū: Máá Jítoho yō jini ñúhún yá tī, achi rō. Yūcuán na te siáá-ni i tī, quiji ró jiin tī, achí yá.

<sup>4</sup> Te súcuan ni cuu tǎcǎ jniñu yáha náváha squicu jnūhun ni cahān tēe ni nacani jnūhun Yaā Dios nde jenahán, yósó núu tútu:

<sup>5</sup> Cachi ró nuū ñáyuu ñuu Jerusalén jeē naní ñuu Sión:

Yáhá condēhe ró jeē véji Rey rō.

Tu sájéhnū ya máá yá, chi máá burra-ni yósó yá,

jíin burrito, sēhe quiiti ndíso.

Achí tutu.

<sup>6</sup> Yūcuán na te tēe cáscuáha un cuango de, te ni casáha de nájnūhun ni ndacu Jesús jniñu nuū de.

<sup>7</sup> Te ndéca de burra jiin séhe tī, ni ndecoo de nuū yā. Te ni casoó de sahma de siquí tī, te ni jecosó yā tī.

<sup>8</sup> Te cáhīn cuehē ñayuu, te ni cascáa i sahma i ini ichi. Te sava ga i ni cajehnde ndaha ñúú, te ni cachucun i ini ichi.

<sup>9</sup> Te ñayuu cuangoos ichi núú jíin ñáyuu cuangoos ichi yátá, cácana jee i: Yōhoyo cújēhnu Yaā cúu Sēhe yucūn rey David. Yōhoyo vāha Yaā cúu Yaā jeē véji jíin jniñu máá Jítoho yō Yaā Dios. Te yōhoyo cújēhnu máá Yaā Dios. Achí i.

<sup>10</sup> Te nuū ni quívi ya ñuu Jerusalén, te ndihi ñayuu ñuu un ní cacuvaá i, te cuehē i cájnūhun jnāhan:

¿Ndé téé cúu téé yáha? áchí i.

<sup>11</sup> Te ni cacahān ñayuu vējicoo jíin yá:

Yāha cúu Jesús jeē nácani jnūhun Yaā Dios, jeē véji nde ñuu Nazaret ndañúú Galilea. Achí i.

*Jeē ní quenehen ya ñayuu ini templo*  
(Mr. 11.15-19; Lc. 19.45-48; Jn. 2.13-22)

<sup>12</sup> Yūcuán na te ni quívi Jesús ini templo cáhnu Yaā Dios. Te ni quenehen ya tāca ñáyuu cájeen quiti te cánaxico núú ñáyuu jeē socō i. Te ni scotúú ndeyi ya tāca mesa tēe cástáyi xūhún, jíin silla tēe cáxīcō paloma.

<sup>13</sup> Te áchí yá jíin i:

Yósó núú tútu ñi jeē cahán Yaā Dios: Vehe ri chi vehe nuū cájicān tahuú cúu, áchí Yaā Dios. Te máá ró jijnáhan ró, chí nájñūhun yaū cava ñacuñhná ní canasáha ró. Achí yá.

<sup>14</sup> Yūcuán na te sava ñayuu cuaá jíin ñáyuu chacuá ní quecoo i nuū yā ini templo un. Te ní nasávāha ya i.

<sup>15</sup> Te sutū cácujeñnu jíin téé cástéén tutu ley Yaā Dios, ní cajito de tācá jniñu jēhnu sáha ya, te ní cajini de jeē cácana jee sūchi lúlí ini templo: Yōhoyo cújēhnu Yaā cúu Sēhe yucūn rey David, achí i. Te ní caquiti ní de.

<sup>16</sup> Te ní cacahān de jíin yá:

¿A tu jíni ró jéé súcuan cacahān sūchi yáha? áchí de.

Te ní cahān Jesús jíin de:

Jíni ri. ¿Te á ná tu cahu ró jéé yosó núú tútu ñi jeē suhva cáhán ñn tēe jíin Yaā Dios?

Sáha ní jéé tāca sūchi lúlí jíin sūchi cájexin, vāha ndasí cáhán i jeē Yaā cujēhnu cúu Cristo.

Achí.

<sup>17</sup> Te ní stóo ya de. Te ní quenda ya ñuu Jerusalén, cuahān yā nde ñuu Betania. Te yūcuan ní ndōo ya jecuáá ún.

*Jeē ní cáhān yā nuū yújnu higo*  
(Mr. 11.12-14, 20-26)

<sup>18</sup> Te jenéhen inga quívi cuanuhun yā ñuu Jerusalén, te jíi yā sōco.

<sup>19</sup> Te ní jito ya ñn nundēhe higo, ñn yuhíchi. Te ní jehēn yā jehē. Te tú na ndehē ní níhín yā, chí máá ndaha-ní ñn. Te ní cahān yā jíin:

Vijna te ma cúun cuiti gā ndehē xinī rō, achí yá.

Te ní ichí-ni yujnu higo ún.

<sup>20</sup> Te tēe cáscuáha jíin yá, ní canaa ní de cájito de. Te ní cacajnūhún de ya:

¿Ndese ní sáha ní jéé yachí-ni ní ichí yujnu higo? achí de.

<sup>21</sup> Te ní cahān yā jíin de:

Jendaá cahán rī jíin ró, núu candíje ró te tú cani siquí ní rō, te cuu sáha ró jniñu jēhnu nájñūhun ní sáha ri jíin yujnu higo. Te nde jniñu jēhnu ga cuu sáha

ró, chi nde cuu cahān rō jeē cújiyo yucu yáha, quihīn nuū mar, te sāha nájñuhun cahān rō.

<sup>22</sup> Te tāca jéē cacán tahú rō jijnáhan ró, te núu candíje ró jéē nihín rō, te nihín rō. Achí yá.

*Siquī jeē ndíso jniñu Jesús*  
(Mr. 11.27-33; Lc. 20.1-8)

<sup>23</sup> Te ni quīvi tucu ya ini templo cáhnu. Te níni stéén yā jñuhun, te sutū cácujeñhu jíin táca téé jéñhu jeē cándacu jniñu nuū ñáyuu hebreo, ni quecoo de nuū yá. Te ni cacajñuhún de ya:

¿Ndé ní nihín jniñu ró jéē sāha ró jniñu yáha? ¿Te ndé ñin ni tee jniñu siquī rō jeē sāha ró súcuan? Achí de.

<sup>24</sup> Te ni cahān Jesús:

Suni ruhū, cajñuhun rí rohó ñin jñuhun jijnáhan ró, te núu cuu stíó cuñí rō, yūcuán na te cachi rí nuū rō ndé ní nihín jniñu rí jeē sāha rí jniñu yáha.

<sup>25</sup> ¿Ndé ñin ni tee jniñu siquī Juan jeē ní scuándute de? ¿A Yaā Dios chí táca téé? áchí yá jíin de.

Yūcuán na te ni candajñuhun máá de:

Núu cahān yō jeē Yaā Dios ni tee ya jniñu un síquī Juan, te cahān de jíin yó: Núu súcuan ¿te najehē tu ní cácandíje ró de?

<sup>26</sup> Te núu cahān yō jeē ñáyuu ni catee jniñu un síquī de, te cáyūhu yó ñáyuu, chí ndivii i cácandíje i jeē téé ni nacani jñuhun Yaā Dios ni cuu ndíje Juan. Achí de cácahān maá de.

<sup>27</sup> Te ni cacahān de jíin Jesús:

Tu cájini rí, achí de.

Yūcuán na te ni cahān yā jíin de:

Ni ruhū, suni ma cáchi rí nuū rō ndé ñin ni tee jniñu siquī rí sāha rí jniñu yáha, áchí yá.

*Jñuhun yátá síquī uú sēhe yí*

<sup>28</sup> Te ni cahān gā yā jíin de:

Cuni nahín ró jñuhun yátá yáha: ñin tēe ni Iyo uú sēhe yí de. Te ni cahān de jíin ñin i: Séhē, quihīn rō taxín ró ndehē uva rí vijna, áchí de.

<sup>29</sup> Te ni cahān i: Ma quihín na, áchí i. Te ni cunúu, te ni nacani ni i, te cuahān i nuū jniñu ún.

<sup>30</sup> Te tēe un ní jehēn de nuū ínga sēhe de, te suni súcuan ni cahān de jíin i. Te ni cahān i: Cuu núu súcuan, te quihīn na, áchí i. Te tu ní jéhén i.

<sup>31</sup> ¿Te ndese cájeni ni rō? Jeē ndíndúú i, ¿ndé ñin i ni squícu jniñu cúní tatá i? áchí yá.

Te ni cacahān de:

Sūchi jéē ní cáhān de jíin xíhna gā, achí de.

Te ni cahān Jesús jíin de:

Súcuan cúu, te jendaá cahān rí jíin ró jeē téé cástútú xúhun renta jíin ñahan cájica jnéni, yachí cánacani ni i jeē stóo i cuēchi i te quívicoo i ndaha Yaā Dios jeē ndacu ya jniñu nuū i, te máá ró jijnáhan ró chí ma quívi ró.

<sup>32</sup> Chí ni quiji Juan, ni steén de ndese condiquín rō jñuhun ndaā, te tu ní cácandíje ró jñuhun ni cahān de. Te sa suhva tēe cástútú xúhun renta jíin ñahan cájica jnéni, ni cacandíje i jñuhun ni cahān de. Te máá ró, vēsú ni cajito ró jéē ní cacandíje i, te tu ní cánacani cuíti ni rō jeē candíje ró. Achí yá.



*Jnūhun yátá síquī tēe néé cásájniñu nuū uva  
(Mr. 12.1-12; Lc. 20.9-19)*

33 'Cuni sōho inga jnūhun yátá jijnáhan ró: Ni iyo ñin tēe chíi ñuhun. Te ni nachuhun de cuehē ndehē uva. Te ni jesi de corral, te ni sáha de ñin nuū cúhun ndehē un táxīn. Te ni jeni de ñin vehe súcún návāha cuu coto de níí cáhnu.

'Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi cuahān jicá de.

34 Te máá tiempo ndutútú uva, te ni tají de jecu mozo cuanuquñhin sava uva nuū tēe cásájniñu ún.

35 Te tēe un ní cajñi de mozo un. Te ñin i ni cacani de, te inga i ni cajehni de, te inga i ni cajēhe de yuū xini.

36 Te tēe chíi uva ni tají tucu de jecu gā mozo cuango, cuehē gā vēsú jeē xíhna ñúhún. Te suni súcuan ni casáha tēe un jíin ndihí mozo un.

37 'Te jeē sándihí na te ni tají de sēhe de cuahān. Te jéni ni de: Tēe ún chi cuatáhú de jijnáhan de nuū séhe ri.

38 Te tēe cásájniñu ún, núu ní cajito de nuū séhe tēe chíi uva, te ni cacahān maá: Tēe chíi táhú cúu jeē yáha. Na cáhni yō de, te ndōo tahū de cuu yó, áchí.

39 Te ni cajñi de i, te ni caquenehen de i inga lado, te ni cajehni de i. Achí yá.

40 Yūcuán na te ni cajñūhun yá de:

Núu súcuan te núu na quíji tēe chíi uva un, ¿te ndese sáha de jíin tēe cásájniñu ún? áchí yá.

41 Te ni cacahān de jíin yá:

Ma cundáhú cuiti ni de táca tēe cásáha jniñu néé un, chi cahni de. Te cuāha de ñuhun cáá uva un núu inga sava tēe sájniñu nuū, cuu sava de ndehē jíin. Te quivī ndutútú ndehē, te tēe ún nacuāha de sava ndehē nuū tēe chíi uva. Achí de.

42 Te ni cahān Jesús jíin de:

¿Te á ná tu cahu ró jnūhun yáha jeē yosó núu tútu ñi, jeē ruhū cúu nájñūhun ñin yuū? Chi áchí tutu:

Yuū jeē ní casquéhichí tēe cájeni vehe,

yuū yáha nduu jeē quítuu vehe.

Máá Jítóho yō Yaā Dios ni sáha ya súcuan,

te cánaa ni yō jíto yó jniñu yáha.

Achí tutu.

43 Núu súcuan te cáhān rī jíin ró jeē cujiyo-ni jeē ndácu Yaā Dios jniñu nuū rō jijnáhan ró, te nacuāha ya jniñu un núu inga ñayuu jeē squícu váha i jniñu ndácu ya nájñūhun cúní yā.

44 Te ñayuu tu cácandíje, ndoho i nájñūhun ndóho ñayuu jeē cotúú síquī yuū te jnánhú i. Te quivī sándaā Yaā Dios cuēchi, te ñayuu tu cácandíje, ndoho i nájñūhun ndóho ñayuu jeē nínga yuū síquī i te cundihí i sáha. Achí yá.

45 Te sutū cácujeñhu jíin tēe grupo fariseo ni cajini sōho de táca jnūhun yátá ní cahān yā. Te ni cajecūhun ni de jeē síquī maá de cúu jnūhun yátá ní cahān yā síquī tēe cásájniñu nuū uva jíin tēe cájeni vehe.

46 Te ni canducú de modo jñi de ya. Te cáyūhú de jeē quiti ni ñayuu, chi cájeni ni i jeē tēe nácani jnūhun Yaā Dios cúu ya.

*Jnūhun yátá síquī vico nándāha*

## 22

1 Yūcuán na te ni cahān tucu Jesús inga jnūhun yátá jín de jijnáhan de:

2 Súcuan cúu jeē ndácu Yaā andiví jniñu nuū ñáyuu: Cúu nájnūhun ñin rey jeē sáha de ñin vico jeē nándāha sēhe yí de.

3 Te ni tají de táca mozo de cuacana ñáyuu jeē ni cáhān de jín jéē quíjicoo. Te ñáyuu ún tu ní cácuni i quíjicoo í.

4 Te ni tají tucu de jecu gā mozo quingoo, te áchí de jín: Cahān jín ñáyuu ní cana ri un jéē iyó túhva ndeyu. Chí je ni jehni rī stiḡuḡ rī jín táca gá quiti ní nduu, te ndíhi je iyó túhva. Nehen jijnáhan ró vico nándāha. Achí ró jín í. Achí de.

5 Te ñáyuu ní cana de ún tu ní cásáha i cuenta. Chí ñin i cuahān nuū ítu i, te inga i cuahān nuū jniñu sáha i.

6 Te sava ga i ni cajñi i táca mozo rey, te ni casácatā i nuū, te ni cajehni i.

7 Yūcuán na te yōhyo ni quití ni rey. Te ni tají de soldado de ni jengoo, ni cajehni de ñáyuu ní cajehni ndiyí ún, te ni cajehmu de ñuu í.

8 Yūcuán na te ni cahān de jín sava ga mozo de: Ndihi je iyó túhva jeē cóo vico nándāha. Te ñáyuu ní cana ri ún, tu iyó váha jeē quíjicoo i chí nasūu ñáyuu váha cácuu í.

9 Núu súcuan te cuahān jijnáhan ró táca núu náquijnáhan calle. Te cana ró núu nasaa ñáyuu nihīn rō, na quíjicoo i vico nándāha. Achí de.

10 Te ni quendacoo mozo un cuángoo táca ichi. Te ni castútú de ndíhi ñáyuu ní canihīn de, cúu ñáyuu cunéé, cúu ñáyuu váha. Te súcuan te ni chitú ñáyuu ñin vehe nuū iyó vico nándāha.

11 Te ni quívi rey ñin vehe jeē cahán de jín ñáyuu ni cutútú. Te ni jito de nuū ñin tēe jeē tu ñūhun sahma jeē ni jéhe de cuhun ñáyuu quíjicoo vico nándāha.

12 Te ni cahān de jín tēe ún: Amigo, ¿ndese ni quívi ró yáha jéé tu ñūhun ró sahma vico nándāha? áchí de. Te máá tēe ún tu ní cahán cuiti de.

13 Yūcuán na te ni cahān rey jín tēe cájeni cohō: Jñi de te cuhni rō ndaha de jehé de, te quenehen ró de na quihín de nuū quéhe nuū néē. Te yūcuan ndáhyū de te nacayíhi yuhu de jeē ndóho xeēn de. Achí rey.

14 Chí cána Yaā Dios cuehē ñáyuu jeē na cándíje í. Te jecu-ni i candíje, te máá i nácāji ya jeē ndúu i sēhe ya. Achí Jesús.

### *Siquí xūhun renta*

(Mr. 12.13-17; Lc. 20.20-26)

15 Yūcuán na te cuangoo tēe grupo fariseo. Te ni candajnūhún de núu ndese sáha de návāha cahān yā ñin jnūhun jeē nihín de cuēchi siquḡ yā.

16 Te ni catají de jecu tēe cáscuáha jín máá de jín tēe grupo Herodes cuangoo de. Te ni cacahān de jín yá:

Maestro, cájini na jéé tēe cáhān ndaā cúu ní, te stéén ndaā ní ndese squícu ñáyuu nuū Yaā Dios. Te tu yúhú ní jeē cahán ni ñin ñáyuu siquḡ ní, chí tu sáha ní cuenta ndese cúu ñin ñin í, chí inuú-ni sáha ní jín í.

17 Núu súcuan te cahān ní ndese jéni ni ní: ¿A iyó váha jeē chúnaa yō renta nuū rey nación Roma jeē jñá nación yō, chí tuú? áchí de.

18 Te ni jini Jesús jeē cájito ndee de ya. Te ni cahān yā jín de:

Tēe stáhú-ni cácuu ró. ¿Najehé cájito ndee ró ruhú?

19 Stéén xūhun jéé jéconaa renta na cóto rí, achí yá.

Te ni castéén de ñin denario nuū yā.

20 Te ni jito ya, te ni cajñūhun yá de:

¿Ndé ñin nuū cúu jeē ndeé nuū xūhun yáha, te ndé síhví cúu jeē ndeé yáhá?

21 Te ni cacahān de jíin yá:

Nuū jíin síhví rey un cúu, áchí de.

Yūcuán na te ni cahān yā jíin de:

Núu súcuan te nacuāha ró núu rey un jéē yíhi cuenta nuū de, te nacuāha ró núu Yaā Dios tāca jéē yíhi cuenta nuū maá yá, achí yá.

22 Te nuū ní cajini de jeē ndichí ní cahān yā jnūhun yáha, te ni canaa ni de, te ni castóo de ya, te cuango de.

*Jeē ní cacajnúhún de síquī jeē nátecu ndīyi*  
(Mr. 12.18-27; Lc. 20.27-40)

23 Te suni quiví un ní quecoo jecu tēe grupo saduceo nuū yā. Te tēe un cácahān jeē tu nátecu cuítí ndīyi. Te ni cacahān de jíin yá síquī ñn jnūhun, áchí de:

24 Maestro, Moisés ni cahān de jeē núu ñn tēe cuu de, te ndōo ñasihí de, te núu tú sēhe de ní íyo jíin ña, núu súcuan te cánuú jeē ñani de naquihñ ñasihí de, te sēhe de jeē cácu jíin ña nucuññí nuū ndīyi ñani de. Achí Moisés.

25 Te ñuu na ní íyo uxā ñani. Te tēe núu ní quijnáhan de jíin ñahan. Te ni jihí de. Te jeē tú sēhe de ní íyo, te ni ndōo ñasihí de nuū ñáni de.

26 Te tēe ún suni ní jihí de, te tú na sēhe de ní íyo tucu. Te suni súcuan tēe uní, nde jíin ndihúxá de.

27 Te nuū ní ndihí de ni cajihí, te suni ní jihí ñahan ún.

28 Núu súcuan te quiví nátecu ndīyi, ¿ndé ñn de cuu ña ñasihí de? Chi ndihúxá de ní condeca de ña. Achí de jíin yá.

29 Yūcuán na te ni cahān yā jíin de:

Yōhoyo cástívi ró jnūhun síquī jeē tu cájecūhun ní rō jeē cahán tutu ñi, ni tu cájini rō jeē iyó poder Yaā Dios jeē nastécu yā ndīyi.

30 Chi quiví nátecu ndīyi, te tuá na jnūhun quijnáhan tēe jíin ñahan coo. Chi coo i nájnūhun ndajéhé Yaā Dios andiví.

31 Te síquī jeē nátecu ndīyi, ¿á tu ní cácahu ró tutu jnūhun jeē cahán Yaā Dios jíin ró?

32 Máá rí cúu Yaā Dios Abraham jíin Isaac jíin Jacob, achí Yaā Dios. Chi vésú je ni cajihí de, te cátecu de nuū iyó máá yá, chi cúu ya Yaā sáha jeē técu ñayuu ní cáni. Achí yá jíin de.

33 Te ñayuu un ní canaa ni i cájini nahín i jnūhun stéén yā.

*Jniñu cánuú ndasí gá jeē ní ndacu Yaā Dios*  
(Mr. 12.28-34)

34 Yūcuán na te tēe grupo fariseo ni cajini de jeē ní cajesi tēe saduceo yuhu de ní sáha ya. Te ni candutútú de nuū yā.

35 Te ñn de jeē cúu tēe stéén tutu ley Yaā Dios, ni cajnúhún de ya, chi coto ndee de ya cuní de:

36 Maestro, ¿ndé ñn cúu jnūhun ndácu jniñu cánuú ndasí gá nuū tútu ley? achí de.

37 Te ni cahān Jesús jíin de:

Coo maní ndasí ró jíin máá Jítoho ró Yaā Dios, nde jnāá ndasí ró sáha ró ndihí jeē cúsní ni yā, nde jíin ini jíin ánuá ró, jíin ní jéē níjnūní ró, achí tutu.

38 Yáha cúu jniñu ndácu ya jeē cujéhu ga te cánuú ndasí gá.

39 Te jniñu uñ jeē ní ndacu ya, suni súcuan cáhán: Cundáhú ní ró jnáhan ró nájnūhun cundáhú ní ró maá ró.

40 Te chíji ndindúú jnūhun yáha ní quenda ndihí ley jeē ní tee Moisés, jíin ndihí jeē ní castéén tēe ni canacani jnūhun Yaā Dios, achí yá.

*Siquī jeē cūu Cristo sēhe yucūn David  
(Mr. 12.35-37; Lc. 20.41-44)*

<sup>41</sup> Te níní cáyūcu tūtú gá tēe fariseo un, te Jesús ni cajnūhun yá de:

<sup>42</sup> ¿Nde se cájeni ni rō siquī Cristo? ¿Sēhe ndé yucūn cūu ya?

Te ni cacahān de:

Sēhe yucūn David, achí de.

<sup>43</sup> Te ni cahān yā jíin de:

Núu súcuan ¿te ndese cūu jeē David ni cahān de Jitoho de ya, ni sáha Espiritu Santo nde jenhán? Chi ni cahān de:

<sup>44</sup> Máá Jítoho yō Yaā Dios ni cahān yā jíin Jítoho rī, Yaā quiiji:

Cucōo ró lado váha ri nuū cujéhnú ró,

te na sáha ri jeē quende rō poder táca jéē cájito uhū rohó.

Achí Yaā Dios. Achí David.

<sup>45</sup> Te núu sēhe yucūn David cūu Cristo, ¿te ndese cūu jeē ni cahān de jeē Jítoho de cūu ya? áchí yá.

<sup>46</sup> Te ni iin de tu ní cūu stió cuíñi cuiti de jnūhun nuū yā. Te nde quiví ún tuá ni iin de ní chūndeyí ni de cajnūhún de ya.

*Jeē ni cahān yā jeē iyó cuéchi de jíjnáhan de  
(Mr. 12.38-40; Lc. 11.37-54; 20.45-47)*

## 23

<sup>1</sup> Yūcuán na te ni cahān Jesús jíin ñáyuu jíin tēe cáscuáha jíin yá:

<sup>2</sup> Tēe cástéén tutu ley Yaā Dios jíin tēe grupo fariseo, cájeni ni de jeē ndíso jnínū de jeē steén de ley jeē ni jéhe ya nuū Moisés.

<sup>3</sup> Núu súcuan te cuatáhú ró te squícu ró táca jéē cándacu de nuū rō. Te ma sáha ró nájnūhun casáha máá de. Chi cacahān-ni de, te tu cáscuicu de.

<sup>4</sup> Chi suni cástéén de táca ley ni catava maá de jeē yíi sáha, te cátee de siquī ñáyuu, te tu cácuñdeyí i squícu i. Te máá de jíjnáhan de, chi ni iin xiní ndáha de tu cáscánda de jeē squícu de.

<sup>5</sup> Te máni siquī jeē na cuájnúhún ñáyuu de cūu ndihí jeē casáha de. Chi cánujnahan ni de cuhni de cuéhē jnūhun tutu i jneé de jíin ndaha de. Te suni cáscácani ga de yuhvā yusáhma de jeē steén jeē cácujuhnu ga de vésú inga ñayuu.

<sup>6</sup> Te cánujnahan ni de cucōo de nuū silla yíñúhún ga nuū cáyeji ñayuu vico, jíin silla yíñúhún gá ini vehe i sinagoga.

<sup>7</sup> Te suni cánujnahan ni de jeē cahán yíñúhún ñáyuu jíin de nuū calle, jíin jéé cahán i maestro jíin de.

<sup>8</sup> Te máá ró jíjnáhan ró, ma cuáha ró jnūhun jeē cahán ñayuu maestro jíin ró. Chi inuú cácuu ndihí ró jéé cácuu ró hermano, te iyó iin-ni Maestro ró jeé cūu ruhū, Cristo.

<sup>9</sup> Te ma chíñúhún ró ni iin tēe ñayiví yáha jeē cahán ró padre jíin de. Chi iyó iin-ni Tátá ró jíjnáhan ró, Yaā ndeé andiví.

<sup>10</sup> Te suni ma cuáha ró jnūhun jeē cahán i jitoho jíin ró. Chi iyó iin-ni Jitoho ró, te suu cūu ruhū, Cristo.

<sup>11</sup> Te tēe mēhñu ró jíjnáhan ró jeē jejnínū nuū jnáhan, suu de cūu jeé cujéhnú ga.

<sup>12</sup> Chi tēe jeé sajuhnu de máá de, sa ndululí de. Te tēe jeé sálulí de máá de, sa ndujéhnú de.

<sup>13</sup> Nacā xeēn ndoho róhó tēe cástéén tutu ley jíin róhó tēe fariseo, chi tēe stáhú-ni cácuu ró. Chi cájesi ró jeé quiví ñayuu ndaha Yaā andiví jéé ndacu

ya jniñu nuū i. Chi tu quivicoo máá ró, ni tu cájēhe ro jnúhun quivicoo ñayuu nducú quívi.

14 'Nacá xeēn ndoho róhó téé cástéén tutu ley jín róhó téé fariseo, chi tē stáhú-ni cácuu ró. Chi cáquende rō vehe ñahan ní caquendōo ndáhú. Yūcuán na te cájicān tahú nahán ró návaha cani ni ñayuu jeē tú na cuēchi ró. Jeē yūcuan xeēn gā ndoho ró castigo.

15 'Nacá xeēn ndoho róhó téé cástéén tutu ley jín róhó téé fariseo, chi tē stáhú-ni cácuu ró. Chi ní ñuhun ichi jín ní mar cájica cuu ró cánducú ró in ñayuu scandíje ró sáhān maá ró. Te núu ni candíje i, te cásaha ró jēe vihyá gā cúu cuēchi i jeē quihín i infierno vēsú maá ró.

16 'Nacá xeēn ndoho ró, chi cácuu ró nájñuhun tēe cuáá jēe steén ichi nuū ñayuu. Chi cácahān rō: Núu ndé téé jéjnūhun téyí de, te núu cahān de jeē Yaā Dios jeē ndeé ini templo na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíí oro jeē iyó ini templo, na cuáha ya castigo núu ma squícu de, yūcuán na te cánuú squícu nahín de, cácahān rō.

17 Tēe cánéé tēe cuáá cácuu ró jēe castívi ró jñuhun cácahān rō. ¿Ndeé in cúu jeē cujéhu ga, á oro un chí Yaā Dios jeē ndeé ini templo jeē sáhií oro un?

18 Te suni cácahān rō: Núu ndé téé jéjnūhun téyí de, te núu cahān de jeē Yaā Dios jeē chíí altar na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíí ndajniñu jeē cásocō nuū altar, na cuáha ya castigo núu ma squícu de, yūcuán na te cánuú squícu nahín de, cácahān rō.

19 Tēe cánéé tēe cuáá cácuu ró jēe castívi ró jñuhun cácahān rō. ¿Ndeé in cúu jeē cujéhu ga, á ndajniñu yúcu nuū altar, chí Yaā Dios jeē sáhií yā ndajniñu ún?

20 Núu súcuan te tēe jéjnūhun téyí, te núu ndácunehen de Yaā Dios jeē chíí altar, núu súcuan te nde jín ndajniñu yúcu nuū altar ndácunehen de.

21 Te tēe jeē jéjnūhun téyí, te núu ndácunehen de templo, núu súcuan te nde jín Yaā Dios jeē ndeé ini templo ndácunehen de.

22 Te tēe jéjnūhun téyí, te núu ndácunehen de andívi, núu súcuan te suni ndácunehen de mesa Yaā Dios te nde jín máá Yaā Dios jeē ndeé nuū mesa un.

23 'Nacá xeēn ndoho róhó téé cástéén tutu ley jín róhó téé fariseo, chi tē stáhú-ni cácuu ró. Chi cásaha ró úxí úxí nuhní taminú jín yucū anís jín yucū comino, te cásocō rō in in siquí tāca úxí un núu Yaā Dios. Te cástóo ró jnúhun cánuú ndasí gá nuū ley, suu jeē cáca ndaā rō, jín jēe cundáhú ni rō jñahan ró, jín jēe candíje ró. Tāca jēe yáha cánuú sáha ró núú, te suni ma stóo ró jēe socó rō tāca yúcu ún.

24 Cácuu ró nájñuhun tēe cuáá jēe steén ichi nuū ñayuu. Chi cásquícu ró in jeē lulí gá un, te cástóo ró jēe cánuú gá. Te suu cúu nájñuhun jeē cátava rō chūcún ndíhi jeē ñuhun nuū ndúxi, te cácocó ró in quiti cáhu jeē naní camello.

25 'Nacá xeēn ndoho róhó téé cástéén tutu ley jín róhó téé fariseo, chi tē stáhú-ni cácuu ró. Chi nájñuhun jeē cánacate ró yātā vaso jín yātā cohó. Te ichi íni rō chí ñuhun máni máá jnúhun cuíhná jín jnúhun ndíyo ní.

26 Tēe cuáá cácuu ró, fariseo. Xíhna gā sáha ró jēe coo ndoo ini anuá rō, te yūcuán na te suni coo ndoo tāca jēe casáha ró jēe cájito ñayuu nuū.

<sup>27</sup> Nacā xeēn ndoho rōhó tēe cástéén tutu ley jíin rōhó tēe fariseo, chí tēe stáhú-ni cácuu ró. Chí cándāa ró nájñuhun vehe ndíyí nuū panteón jeē cáyaa. Chí ichi yátá jíto luu, te ichi íni ñúhun chítú yiqui ndíyí jíin táca jéē tehyú.

<sup>28</sup> Te súcuan cácuu máá ró, chí ichi yátá ró casáha ró jeē tēe ndaā cácuu ró nuū ñáyuu. Te ichi íni ró ñúhun chítú jñuhun stáhú-ni jíin jñuhun néé.

<sup>29</sup> Nacā xeēn ndoho rōhó tēe cástéén tutu ley jíin rōhó tēe fariseo, chí tēe stáhú-ni cácuu ró. Chí casáha ró vehe siquī nuū yíndūji ndíyí jíi ró, tēe ni canacani jñuhun Yaā Dios nde jenahán. Te casáha luu ró vehe siquī nuū yíndūji táca tēe ni Iyo ndaā.

<sup>30</sup> Te cácahān rō: Núu jeē suni yúcu yó tiempo jeē ní cotecu ndíyí jíi yō, te ma squívi nduu yō jíin de jeē cáhni yō tēe ni canacani jñuhun Yaā Dios, achí ró.

<sup>31</sup> Te súcuan cácahān ndaā ró jeē maá ró cácuu yucūn ñayuu ni cajehni tēe ni canacani jñuhun ya.

<sup>32</sup> Núu súcuan te táca cuéchi jeē ní casquéjéé ndíyí jíi ró, máni un casáha ga maá ró.

<sup>33</sup> Va sēhe coō cácuu ró, chí xeēn ró nájñuhun coō. ¿Nde se cácu ró jéē ma jñahnú ndetū ró quingoo ró infierno?

<sup>34</sup> Núu súcuan te tají rí táca tēe nacani jñuhun Yaā Dios nuū ró, jíin táca tēe ndíchí jéē cástéén jñuhun ya. Te sava de cahni ró, te sava de cata caa ró jíicā cruz. Te sava ga de cani ró de ini táca vehe íi sinagoga, te scūnu ró de quingoo de táca ñuu.

<sup>35</sup> Te súcuan te condee cuéchi siquī maá ró jeē ní cajehni jíi ró táca tēe ndaā, xīhna gā nde Abel tēe ndaā, te nde Zacarías sēhe Berequías, tēe ni cajehni de ini templo sava mēhñu cuarto íi jíin altar.

<sup>36</sup> Jendaá cahán rí jíin ró jeē táca cuéchi yáha condee siquī ñáyuu iyó vijna.

### *Jeē cucuñhá ni yā jíto ya ñuu Jerusalén*

*(Lc. 13.34-35)*

<sup>37</sup> Róhó ñuu Jerusalén, jéhni ró tēe cánacani jñuhun Yaā Dios, te jéhe ro yúu xiní tēe tají Yaā Dios vējicoo nuū ró. Te cuehē jínu ni cuni rí nastútú rí sēhe ró, nájñuhun ndují jéē nastútú tí sēhe tí chíji ndijēn tí, te tu ní cúní ró.

<sup>38</sup> Núu súcuan te vijna te stóo uun na rí rohó jíin séhe ró.

<sup>39</sup> Chí cáhān rí jíin ró jéē ndé vijna te ma cóto cuíti gā ró nuū rí, chí nde quiji quívi jeē cahán sēhe ró: Yōhho vāha Yaā cúu Yaā véndiji jíin jniñu máá Jítoho yō Yaā Dios, achí i. Achí yá.

### *Jeē ní cachi yā jeē náa templo*

*(Mr. 13.1-2; Lc. 21.5-6)*

## 24

<sup>1</sup> Te ni quenda Jesús ini templo cáhnu cuahān yā. Te ni quecoo tēe cáscuáha jíin yá, te ni cacahān de jíin yá siquī táca vehe jeē ndejnáhan jeē cúu máa templo un.

<sup>2</sup> Te ni cahān yā jíin de:

Táca jéē cájito ró yáha, jendaá cahán rí jíin ró jeē quiji quívi jeē ma cóso jñáhan ga ni ñin yuū, chí ndíhi jñanū. Achí yá.

*Na seña coo nuū cuácuyajni ndíhi ñayívi*

*(Mr. 13.3-23; Lc. 21.7-24; 17.22-24)*

<sup>3</sup> Te ni jehēn yā jíin tēe cáscuáha jíin yá nde yucu Olivos, te ni cucōo ya yūcuán. Te ni quecoo de nuū yā, te ni cacajñuhun sñin de ya:

Castūhun ní ndé quiví coo tāca jéé ní cachi ní jéé coo. ¿Te na seña coo núu ni cuyajni quiví ndíji ní jín jéé jínu ñayiví? áchí de.

4 Te ni cahān Jesús:

Coto ró jéé ma stahú ni ñn de róhó.

5 Chi quijicoo cuehē tēe jeē stahú jín síhví rí. Máá rí cúu Cristo, achi de. Te súcuan stáhú de cuehē ñayuu.

6 Te nihīn rō jñūhun jeē tāca lado iyó guerra, chí je yajni coo guerra. Te ma yūhu ró, chí cánuú coo súcuan. Te ni ná tu jínū quiví ndíhi ñayiví.

7 Chi ndonda nación síquí inga nación, te ndonda ñuu síquí inga ñuu jeē cuajnáhan. Te coo jnamā jín cuehyí xeēn. Te cháha chúcuan jñāa.

8 Te tāca jéé yáha cácuu jñūndóho quejéé xíhna ñūhún gá.

9 Yūcuán na te nastúu i róhó jíjnáhan ró jéé stóho i róhó te cahni i róhó. Te ndíhi ñayuu quití ni i nuū rō jeē síquí ruhū.

10 Te quiví ún chi cuehē ñayuu candíje caca yátá i, te quití ni i nuū jnáhan i, te nastúu jnáhan i.

11 Te canecoo cuehē tēe stáhú, te cahān de jeē jnúhun Yaā Dios cánacani de, te stáhú de cuehē ñayuu.

12 Te nducuehē jñiñu néé, te jeé yúcuan cuehē i ma cóo maní gā i.

13 Te ñayuu cuiñi nihīn jín jnúhun rí nde quiví jínu, ñayuu ún chí cácu.

14 Te jnúhun yáha síquí ndese ndácu Yaā Dios jñiñu, cuitē núu ní cáhnu ñayiví, návāha cuni ñayuu tācá nación. Yūcuán na te jínu ñayiví.

15 Te Daniel, tēe ni nacani jnúhun Yaā Dios, ni tee de jnúhun ñn tēe néé jéé quíji. Te róhó jéé cácahu tutu ún, na jécūhun ni rō. Chi ñn quiví te cuni rō jeē sáha ndevāha de jeē stívi de tācá ndajñiñu ñi ini templo, te cuiñi de ini lugar ñi.

16 Te núu cuni rō jeē súcuan cúu, te ñayuu cáyūcú región Judea, na cúnu i caa i yucu quingoo i.

17 Te ñayuu cáyūcu núu quéhe, ma ndívi i ini vehe jeē quénehen i ndajñiñu i, chí cánuú cunu yachí i návāha cácu i.

18 Te ñayuu cáhīn nuū ítu, ma ndíji i vehe jeē quíhin i sahma i.

19 Te quiví ún nacā jeē ndahú ñahan cáñuhun sēhe jín ñahan cándeca yiquín, chí ma cúnihin ña cunu yachí ña.

20 Te cacān tahú rō jeē ma quíji jñūndóho un jéé cunu ró máá tiempo cúun yuhvā ni quiví ndétātú.

21 Chi jeē quejéé un te coo cuehē jñūndóho xeēn, jeē ná tu coo súcuan nde quiví ní jecōo ñayiví te nde vijna. Te jeē ndíhi jñūndóho ún te ni ma cóo ga jeē súcuan.

22 Te núu tú nastívi Yaā Dios tiempo jñūndóho ún, te ni ñn ñayuu ma cácu cuiti i. Te jeē síquí ñayuu cáncandíje jeē ní nacāji ya, jeé yúcuan nastívi ya tiempo un.

23 Núu súcuan te núu ñn ñayuu cahān jín ró: Yáhá condēhe ró íne Cristo, chí: Yūcuán condēhe ró íne ya, achi i, te ma candíje ró jéé cahān i.

24 Chi canecoo tēe cástáhú jéé achi de jeē Cristo cúu de, chí achi de jeē tēe nácani jnúhun Yaā Dios cúu de. Te sáha de jñiñu jéhnu jeē naa ni ñayuu coto i, návāha stáhú de nde máá ñayuu ní nacāji ya, te núu na cúu.

25 Je ni castūhun rí nuū rō vijna nde ná tu coo.

26 Núu súcuan te núu cahān ñayuu jín ró: Cuácondēhe ró, chí nde nuū ñūhun téhé íne ya, achi i, te ma quíhīn rō condēhe ró. Chí núu cahān i: Nehen condēhe ró, chí ini vehe yáha íne ya, achi i, te ma candíje ró jíjnáhan rō.

<sup>27</sup> Chi nájnūhun jeē ndíndēe sáha taja te cúndijin nde ichi núū cáne niāndii jín ndé ichi núū queé niāndii, suni súcuan coo quiví ndiji ruhū, Yaā ní nduu tēe, chi ndihi ñayuu coto.

<sup>28</sup> Te nájnūhun jeē cutútú téji ndé-ni cúu nuū catú quiti ní jíhī, suni súcuan coo tāca jēe ni cáhān rī ndé-ni cúu-ni nuū cáhīyo ñayuu.

*Ndese coo quiví ndiji Yaā ní nduu tēe*

*(Mr. 13.24-37; Lc. 21.25-33; 17.26-30, 34-36)*

<sup>29</sup> Yūcuán na te núu ni ndihi tāca jnúndóho quiví ún, te cojnúú niāndii, te yoō ma ndíi gā. Te ningoo quimi andiví. Te tāca jēe ín andiví chí quisi i.

<sup>30</sup> Yūcuán na te coto ñayuu nuū maá rí, Yaā ní nduu tēe, ndiji ri ichi ándiví. Te ndahyū ñayuu tācá nación ní cáhnu ñayiví. Te coto i nuū ruhū, Yaā ní nduu tēe, ndiji ri jín vícō andiví, te condiso ri cuehē poder, te yōhyo luu kujéhu ri.

<sup>31</sup> Te tají rí ndajéhé rī quingoo, te tiví nihin ya trompeta. Te quínastútú yá ñayuu ní nacāji ri ndicúún lado ñayiví, nde ñin lado ñayiví jín ndé inga lado.

<sup>32</sup> Vijnā te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihní.

<sup>33</sup> Te suni súcuan núu ni cajini rō jeē ní quejéé cúu tācá jniñu jeē ni cáhān rī, yūcuán na te na jécūhun ni rō jeē ní cuyajni quiví ndiji ri, te yachī coo.

<sup>34</sup> Jendaá cahán rī jín ró jeē ma cúu ndihi ñayuu jeē cóto jnúndóho ún, chi nde squícu ndihi jniñu ún.

<sup>35</sup> Andiví jín ñayiví chí naa, te tāca jnūhun cáhān rī chí ma náā, chí ndihi squícu.

<sup>36</sup> Te quiví jín hora jeē ndiji ri, tú ni ñin ñayuu jini, ni maá ndajéhé cáhīyo andiví, ni maá rí, Sehe Yaā Dios. Chi maá ñin ni Tátá rī Yaā Dios cúu jeē jini.

<sup>37</sup> Chi nájnūhun ni cuu quiví ni iyo Noé, suni súcuan coo quiví ndiji ruhū, Yaā ní nduu tēe.

<sup>38</sup> Chi quiví ún, nde ná tu cuun saū xeén, te cáyeji i cájini i, cánandāha i, te cájēhe i sēhe síhí i jeē nándāha, nde ni jinū quiví jeē ni quiví Noé ini barco cáhnu jeē naní arca.

<sup>39</sup> Te tu ní cácandije ñayuu jeē cuun saū xeén, te ni cuun, te ni ndaa ndute ni cajihí ndihi i. Te suni súcuan coo núu na ndíji ruhū, Yaā ní nduu tēe.

<sup>40</sup> Te quiví ún cone uū tēe sájniñu nuū ítu. Te ñin de naquihin ri, te inga de ndōo.

<sup>41</sup> Te coo uū ñahan jeē ndíco cáhnu, te ñin ña naquihin ri, te inga ña ndōo. Súcuan cuu jeē sava ñayuu naquihin ri te sava i quendōo, chí tu ní cácandije i.

<sup>42</sup> Núu súcuan te ndito na cóo ni rō, chí tu cájini rō na quiví ndiji jitoho rō.

<sup>43</sup> Te na chúhun ni rō jeē cahán jnūhun yátá yáha: Tēe chíí vehe, núu jeē jini de na hora quiji ñaculhná, te condito de, te ma cuáha de jnūhun sáculhná ndajniñu vehe de núu.

<sup>44</sup> Te róhó jijnáhan ró, suni súcuan coo tūhva ró, chí maá hora jeē tú na vé cájeni ni rō, te ndiji ruhū, Yaā ní nduu tēe.

*Jnūhun yátá síquī mozo*

*(Lc. 12.41-48)*

<sup>45</sup> Núu súcuan te coo ró nájnūhun ñin mozo jeē ndíto xiní te squícu vāha. Te maá patrón ni jeni de mozo un jēe cóto i ñayuu vehe de, návāha scáji i maá hora.

<sup>46</sup> Te yōhyo ndetū mozo un jēe núu ni ndee patrón, te cuni de jeē súcuan squícu vāha i.

<sup>47</sup> Jendaá cahán rī jín ró jeē cani de mozo un jēe cóto i ndihi ndajniñu de.



48 Te núu mozo sáha néé cúu i, te jéni ni i jeē ma ndíji yachī patrón i,  
 49 te quejéé i cani i jnánhan mozo i, te caji i coho i jíin téé cánajīni,  
 50 núu súcuan te ndee-ni patrón quivī jeē tu ndétu i jíin hora jeē tú na vé jéni ni i.  
 51 Te stóho xeēn de i, te squívī de i nuū cáhīin tēe stáhú-ni. Te yūcuan ndáhyū i te nacayihí yuhu i jeē ndoho xeēn i. Achí yá.

*Jñuhun yátá síquī uxī sūchi síhí*

## 25

1 Te suhva cúu jeē ndácu Yaā andívī jniñu nuū ñáyuu: Cúu nájñuhun ñin vico nándāha. Te ni ñyo uxī sūchi síhí jeē ní caquihin i linterna cándaha i, te ni quendacoo i cuajnahán i ñin tēe nandāha.

2 Te uhūn i chí tú ndito xinī i, te uhūn i chí ndito xinī i.

3 Te sūchi tú ndito xinī, cándaha i linterna i, te tu cándaha i petróleo jeē náchuhun i.

4 Te sūchí ndito xinī, chí cándaha i botella petróleo jíin linterna i.

5 Te níni cúcuéé quiji tēe nandāha ún, te ni quee máhná, te ni caquixī ndihi i.

6 Te nuū ní cuu sava ñuú, te ni cajini i jeē cácana jee: Je vēji tēe nandāha. Cuángoo quijnahan rō de jíjnánhan rō, áchí.

7 Yūcuán na te tāca sūchi síhí un ní candonda i, te ni casátūhva i linterna i.

8 Te sūchi tú ndito xinī, ni cacahán i jíin sūchi ndito xinī: Cuāha jecu petróleo nuū rī jíjnánhan rō, chí cuandahvā linterna rī, achí i.

9 Te ni cacahán sūchí ndito xinī: Ma cúu, chí ma cánda jeē cúu máá rí jíin máá rō. Vāha ga quingoo rō núu cūyāhu, te cuaan rō jéé cúu máá rō. Achí i.

10 Te níni cuángoo i cuaan i, te ni quee-ni tēe nandāha. Te sūchi cáhīyo tūhva un, ní quívicoo i jíin de vico nándāha de. Te ni ndihyū yehyí.

11 Te ni cunúu, te ni quecoo uhūn gā sūchi síhí un. Te ni cacahán i jíin téé nándāha: Nune ní yéhyí na quívicoo ná, áchí i.

12 Te ni cahán maá de: ¿Ndé nuū véjicoo rō? Chí tu jíni rī rohó, áchí de. Achí yá.

13 Yūcuán na te ni cahán yā:

Núu súcuan te ndito coo ni rō, chí tu cájini rō na quivī na hora ndiji ruhū, Yáá ní nduu tēe. Achí yá.

*Jñuhun yátá síquī téé ní jēhe núu xūhun núu tāca mozo*

14 Te suhva cúu jeē ndácu Yaā andívī jniñu nuū ñáyuu: Cúu nájñuhun ñin tēe jeē quihīn jicá de inga ñuu. Te nde ná tu quihīn de te ni cana de mozo de jíjnánhan, te ni jēhe núu de xūhún de nuū i, jeē na sájniñu i jíin návāha nducuehē.

15 Te nuū ñin i ni jēhe de uhūn mil xūhun cáa. Te nuū inga i ni jēhe de uū mil. Te nuū inga i ni jēhe de ñin mil. Súcuan ni jēhe de, chí jíni de nasaa canda ñin ñin i sájniñu i jíin. Yūcuán na te ni quihin de ichi cuahán jicá de.

16 Te mozo jeē ní quihin uhūn mil xūhún, ni sájniñu de jíin. Te ni nihīn de uhūn gā mil síquī.

17 Te mozo jeē ní quihin uū mil xūhún, suni ni nihīn de uū gā mil síquī.

18 Te mozo jeē ní quihin ñin mil xūhún, ni jehēn de ni jete de yaū, te ni chisāhí de xūhún patrón de.

19 Te ni yāha cuehē tiempo, te ni ndee patrón mozo un jíjnánhan. Te ni nandacān de cuenta nuū i.

20 Te ni quee mozo jeē ní quihin uhūn mil xūhún un, te ni nacuāha de xūhún un núu patrón de jíin úhūn gā mil jeē ni níhīn de síquī. Te ni cahān de: Ni jēhe ní úhūn mil nuū ná, te yāha íyó úhūn gā mil jeē ni níhīn na síquī. Achí de.

21 Te ni cahān patrón jíin de: Iyó váha núu súcuan. Yōhyo váha mozo cúu ró jēē squícu váha ró. Chi váha ni squícu ró ñin jniñu lúli-ní, te vijna te cuāha ri jniñu jéhu ndacu ró. Te quiví ró núu cusñ ní ró jíin rí. Achí de.

22 Yūcuán na te ni quee mozo jeē ní quihin úu mil xūhún un. Te ni cahān de: Ni jēhe ní úu mil nuū ná, te yāha íyó úu gā mil jeē ni níhīn na síquī. Achí de.

23 Te ni cahān patrón jíin de: Iyó váha núu súcuan. Yōhyo váha mozo cúu ró jēē squícu váha ró. Chi váha ni squícu ró ñin jniñu lúli-ní, te vijna te cuāha ri jniñu jéhu ndacu ró. Te quiví ró núu cusñ ní ró jíin rí. Achí de.

24 Te ni quee mozo jeē ní quihin ñin mil xūhún un, te ni cahān de jíin patrón: Je jíni na níhīn jēē téē xeēn cúu ní. Chi cuehē gā cuní ní vēsú jeē cúu sáha mozo ní, te cuehē gā nándacān ní vēsú jeē ní jēhe ní.

25 Te jeē yūcuan ní yūhu ná, te ni jehēn na ní chisāhi ná xūhun ní chíji ñuhun. Te yāhá na nácuāha na xūhun ní. Achí de.

26 Te ni cahān patrón jíin de: Mozo cuxí cúu ró te máni jniñu neé sáha ró. Chi jéni ní ró jeē cuehē gā cuní rí vēsú jeē cuu sáha mozo rí, te cuehē gā nándacān rí vēsú jeē ní jēhe ní.

27 Núu jeē ní chūne ró xūhun rí nuū banco nuú, te jeē ní ndee rí te naquihin ri xūhun rí nde jíin séhe xūhun núu. Achí de jíin i.

28 Te ni cahān de jíin táca gá mozo de: Núu súcuan te quende rō mil xūhun jíñā nuū i, te cuāha ro núu mozo névāha uxí mil.

29 Chi ñayuu jeē névāha, sa quiji ga nuū i, te coneváha cuehē i. Te ñayuu jeē tu névāha, sa cujiyo-ní vēsú jecu jeē névāha i.

30 Te mozo yáha jéē tu sájniñu váha, quenehen ró i na quíhīn i nuū quéhe nuū neé. Te yūcuan ndáhyū i te nacayñí yuhu i jeē ndoho xeēn i. Achí patrón un.

### *Siquí jeē cóo juicio táca nación*

31 Te ni cahān gā yā:

ñin quiví te ndiji máa Yaā ní nduu tēe, te cuu ya Rey nuū ñayuu. Te táca ndajéhe yā cuiñí ñí xiin ya. Te cucōo ya mesa nuū ndácu ya jniñu, te yōhyo luu cujéhu ya.

32 Te ndutútú ñayuu táca nación nuū yā. Te sásñin ya i jíjnáhan i, nájnūhun cúsñin lanchi jíin ndixúhú sáha tēe ndíto ti.

33 Te ñayuu váha jeē cúu nájnūhun lanchi, chucú yá i lado váha ya. Te ñayuu neé jeē cúu nájnūhun ndixúhú, chucú yá i lado jecó yá.

34 Yūcuán na te cahān Rey jíin ñayuu cáhīn lado váha ya: Nacā ndetú rō jeē ní sáha Tátá rí jíin ró. Nehen quivícoo ró núu ndácu ró jniñu. Chi nde quiví ní jecōo ñayiví te je ni sátūhva ya nuū ndacu ró jniñu.

35 Chi ní jíi rí sōco, te ni cajēhe ro jéē ní yeji rí. Ni jíhī rí ndute, te ni cajēhe ró jéē ní jíhi rí. Ni quiji rí nde ñuu jicá, te ni cajēhe núu ró vehe ni ndōo rí.

36 Ni cumaní sahma ri, te ni cajēhe ró. Ni cocuhū rí, te ni jecondēhe ró ruhū. Ni ine ri vecāa, te suni ni jecondēhe ró ruhū. Súcuan cahān yā jíin ñayuu cáhīn lado váha ya.

37 Yūcuán na te cahān ñayuu váha un jíin yá: ¿Na quivī ní cajito ná níhín jéé jíi ní sóco, te ni cajēhe na jéé ní yeji ní, chí jéé jichí ní ndute, te ni cajēhe ná ní jíhi ní?

38 ¿Te na quivī ní cajito ná jéé ní quiji ní ndé ñuu jicá, te ni cajēhe núú ná vehe ni ndōo ní, chí jéé cúmanī sahma ní, te ni cajēhe ná?

39 ¿Te na quivī ní cajito ná jéé cuhú ní, chí jéé íne ní vecāa, te ni jecondēhe ná níhín? achi i.

40 Yūcuán na te cahān Rey jíin i: Jendaá cahán rī jíin ró jéé ná ni casáha ró súcuán jíin ñin táca hermano rī jeē cácanđije, vēsú ñayuu núu ga cúu i, te nuū maá rī ni casáha ró.

41 Yūcuán na te suni cahān Rey jíin ñáyuu cáhīin lado jecó yá: Ñayuu jnahnū ndetū cácuu ró. Cuiyo quingoo ró núú ñuhún jeē cayú níí cáni, nuū iyó túhva cone jexeén jíin táca táchī jeē cájegniñu nuū.

42 Chí ni jíi rī sóco, te tu ní cájēhe ro jéé cáji rī. Ni jichī rī ndute, te tu ní cájēhe ro jéé coho rī.

43 Ni quiji ri nde ñuu jicá, te tu ní cájēhe núú ró vehe ndōo ri. Ni cumanī sahma rī, te tu ní cájēhe ró. Ni cocuhū rī, ni ine ri vecāa, te tu ní jécondēhe ró ruhū. Súcuán cahān yā jíin ñáyuu cáhīin lado jecó yá.

44 Yūcuán na te cahān ñayuu un jíin yá: ¿Na quivī ní cajito na níhín jéé jíi ní sóco, chí jéé jichí ní ndute, chí jéé ní quiji ní ndé ñuu jicá, chí jéé cúmanī sahma ní, chí jéé cuhú ní, chí jéé íne ní vecāa, te tu ní cájēhe na jéé cúmanī nuū ní? Achi i.

45 Yūcuán na te cahān yā jíin i: Jendaá cahán rī jíin ró, jeē tu ní casáha ró súcuán jíin ni ñin táca hermano rī jeē cácanđije, vēsú ñayuu núu ga cúu i. Núu súcuán te suni nuū maá rī cúu jeē tu ní casáha ró, achi yā.

46 Yūcuán na te quingoo ñayuu un núú ndóho i níí cáni. Te ñayuu váha un quívicoo i nuū cótecu i níí cáni. Achí Jesús.

*Jeé ní casquijnáhan de jnūhun jeé jn# de Jesús*

*(Mr. 14.1-2; Lc. 22.1-2; Jn. 11.45-53)*

## 26

1 Te nuū ní ndihi ni cahān Jesús táca jnūhun yáha, te ni cahān yā jíin téé cáscuáha jíin yá:

2 Je cájini rō jeē uū na quivī te coo vico pascua. Te ruhū, Yaā ní nduu tēe, nastúu i ruhū jeē cúu rī jicá cruz, achi yá.

3 Yūcuán na te sutū cácujuhnu, jíin téé cástéén tutu ley, jíin táca téé jéhnu jeē cándacu jniñu nuū ñáyuu hebreo, ni candutútū de ini patio vehe palacio maá sūtū cujéhnu ga jeé naní Caifás.

4 Te ní candajnūhún de ndese jn# de Jesús jíin jnūhun stáhú, te cahni de ya.

5 Te ni cacahān de:

Ma jn# yó de maá quivī víco, chí ndonda ñayuu siquī yō, achi de.

*Jnūhun ñahan jeé ní chuhun perfume xinī yā*

*(Mr. 14.3-9; Jn. 12.1-8)*

6 Te íne Jesús ñuu Betania vehe Simón, tēe ni ndoho cuehyī stehyú.

7 Te ni quee ñin ñahan nuū yā, ndáhá ña ñin frasco yuū luu jeē ñuhun aceite perfume jeé yóhoyo yahu ndéé. Te ni chuhun ña xinī yā níni jéé yéji yā staā.

8 Te ni cajito tēe cáscuáha jíin yá, te ni caquitī ní de, te ni cacahān de:

¿Najehē cúu jeē náā saá-ni perfume jíiñā?

9 Chí cuu xícó yahu yó núú, te cuáha yo xúhun núú ñáyuu ndahú. Achí de.

10 Te ni jini Jesús jnūhun cácahān de. Te ni cahān yā jīn de:

¿Naun cása ha ró jēe nácani uhū ni ñahan yáha? Chi ñin jniñu váha cúu jeē ni sáha ña jīn rí.

11 Chi níni coyūcu ñáyuu ndahú jīn ró, te ruhū chi tuá condee rí jīn ró.

12 Chi jeē ní chuhun ña perfume yáha ruhū, suu cúu jeē ni sátūhva ña ruhū nde quivī quíndūji rí.

13 Jendaá cahān rí jīn ró jeē ní cáhnu ñayiví ndé-ni cúu nuū cuité jnūhun yáha jēe jnáma ri ñayuu, suni nacani i jnūhun jeē ni sáha ñahan yáha, návaha cocuhun ni ñayuu ña, áchí yá.

*Jeē ní nastúu Judas yā*

*(Mr. 14.10-11; Lc. 22.3-6)*

14 Yūcuán na te ñin jeē ndihúxí uū tēe cáscuáha ún, nání de Judas Iscariote, ni jehēn de nuū sutú cácujeñu.

15 Te ni cahān de jīn:

¿Nasaa cuáha ní núu ná, te na nastúu ná de nuū ní? áchí de.

Te ni cajēhe ocō uxí xūhun plata nuū de.

16 Yūcuán na te nde quivī un ní quejé de ndúcú de modo ndese nastúu de ya nuū sutú jijnáhan.

*Jeē ní jequín yā Cena yā*

*(Mr. 14.12-25; Lc. 22.7-23; Jn. 13.21-30; 1 Co. 11.23-26)*

17 Te máa quivī jeē quejé vico jeē cáyeji ñayuu pan jeē tú na levadura yñi, te ni quijicoo tēe cáscuáha un núu Jesús. Te ni cacahān de jīn yá:

¿Ndé nuū cuní ní jēe quísatūhva ná cuxíni ní vico pascua? áchí de.

18 Te ni cahān yā:

Cuángoo nde ñuu, vehe tēe jeē jé ni cacahān yō, te cahān rō jīn de: Achí máa Maestro jeē ní cuyajni quivī cuu yā. Te vijna te caji yā vico pascua ini vehe ní jīn tēe cáscuáha jīn yá, achí rō. Achí yá.

19 Te tēe cáscuáha jīn yá, ní casáha de nájnūhun ni ndacu Jesús jniñu nuū de, te ni casátūhva de jeē cuxíni ya vico pascua.

20 Te jeē cuácuaa, te ni quee yā, te ni cucōo ya mesa jīn ndihúxí uū tēe cáscuáha jīn yá.

21 Te níni yéji yā jīn de te ni cahān yā:

Jendaá cahān rí jīn ró jeē ñin rōhó nastúu ruhū vijna, áchí yá.

22 Te ni cacucuíhyá ndasí ní de. Te ná ñin ná ñin de ní cacajnūhún de ya:

¿A sáña cúu? áchí de.

23 Te ni cahān yā:

Ñin rōhó jēe cáyeji cáhnu jīn rí ñin cohō, suu ró nastúu ruhū.

24 Te ruhū, Yaā ní nduu tēe, jendaá cúu jeē quihín rí cuu rí, nájnūhun yósó jnūhun ri nuū tútu ñi. Te nacā xeēn ndoho tēe nastúu ruhū. Váha ga núu tu ní cácu tēe un núu, áchí yá.

25 Yūcuán na te ni cahān Judas, tēe nastúu ya:

¿A sáña cúu, Maestro? achí de.

Te ni cahān yā jīn de:

Suu ró cúu, áchí yá.

26 Te níni jēe cáyeji de jīn yá, te ni quihín ya pan, te ni nacuatáhu yá, te ni tahú cuéchi yá, te ni jēhe ya nuū tēe cáscuáha jīn yá. Te ni cahān yā:

Caji rō jijnáhan ró, chí yáha cúu yiqui cúñu rí, achí yá.

27 Yūcuán na te ni quihín ya ñin copa ndūxi uva, te ni nacuatáhu yá, te ni jēhe ya nuū de. Te ni cahān yā:

Coho jijnáhan ró.

<sup>28</sup> Chi yáha cúu niñi rī jeē cuáha ri jeē cúu contrato jeé, te cati jeē ndundoo cuéchi cuehē ñayuu, te coo jnūhun cáhnu ni nuū cuéchi i.

<sup>29</sup> Te cáhan rī jín ró jeē ndé vijna te ma cóho ga rī ndūxi ndehē uva yáha, chi nde quiji quivī ndacu Tátá rī jniñu ní ñayiví, te saá te coho tucu ri jín ró jijnáhan ró. Achí yá.

*Jeē ní cachi yá jeē yūhu Pedro cahān de jeē jiní de ya*  
(Mr. 14.26-31; Lc. 22.31-34; Jn. 13.36-38)

<sup>30</sup> Te ni jita ya ñn yaa ñ jín de jijnáhan de. Te ni quenda ya cuahān yā jín de nde yucu Olivos.

<sup>31</sup> Yūcuán na te ni cahān yā:

Ndivii rō nayūhu ró jeē siquī ruhū jecuáa vijna. Chi suhva je yósó jnūhun ri nuū tútu ñ, ni cahān Yaā Dios: Cuáha ri jnūhun jeē cáhni ñayuu tēe ndíto lanchi, te lanchi un cuítē núu ti jeē yūhu tí, achí.

<sup>32</sup> Te jeē nátecu rī, te xihna ruhū cosnúu rí quihīn rī región Galilea, te saá te najinūcoo ró, achí yá.

<sup>33</sup> Yūcuán na te ni cahān Pedro:

Vēsú ndihí de na náyūhú de, te máa ná chi ma náyūhú cuiti ná, achí de jín yá.

<sup>34</sup> Te ni cahān yā jín de:

Jendaá cahān rī jín ró jeē jecuáa vijna, nde ná tu cana líhli, te yūhu ró jeē jniñ ñayuu rohó, te uní jínu cahān rō jeē tu jíní rō ruhū, achí yá.

<sup>35</sup> Te ni cahān Pedro jín yá:

Vēsú núu cuu na jín ní, te ma cahān cuiti na jéē tu jíní na níhín, achí de.

Te suni súcuan ni cacahān ndihí tēe cáscuáha jín yá.

*Jeē ní jicān tahú yá nuū huerto Getsemaní*  
(Mr. 14.32-42; Lc. 22.39-46)

<sup>36</sup> Yūcuán na te ni jínú Jesús jín tēe cáscuáha jín yá ñn lugar nuū naní Getsemaní. Te ni cahān yā jín de:

Yáha-ni cucōo ró, te na quihín rī yūcuan cácan tahú rī, achí yá.

<sup>37</sup> Te ni jeca ya Pedro jín ndindúú séhe Zebedeo cuahān yā jín de. Te ni quejéé yá cucuíhyá ndasí ni yā te cúxíí ni yā jeē quíji jnūndóho siquī yā.

<sup>38</sup> Yūcuán na te ni cahān yā jín de:

Yōhoyo cucuíhyá ni rī, te ndúcú sáha jeē cúu rī. Yáha condetu ró te condito ró jín rí.

<sup>39</sup> Te ni jica ya jecu gā, te ni jecuñi yití yá ni jequin ya nuū yā nuū ñūhun, te ni jicān tahú yā suhva nuū Yaā Dios:

Tátá maá ná, núu cuu te tejyo ní jnūndóho yáha jéē ma quíji siquī ná. Te nasūu jéē cuní maá ná, chi jeē cuní maá ní na cóo, achí yá.

<sup>40</sup> Yūcuán na te ni ndee yā nuū ndinúní tēe cáscuáha jín yá, te ni jito ya jeē cáquixí de. Te ni cahān yā jín Pedro:

¿A tu ní cánda ró condito ró jín rí vēsú ñn hora?

<sup>41</sup> Coo ndito ni rō te cacān tahú rō jeē chindéé ñáhán yá rohó jéē ma sáha ró cuéchi jeē coto ndee jeneé rohó. Chi cuní ndije ánuá rō squícu váha ró, te yiqui cúñu rō chi tu fuerza, achí yá.

<sup>42</sup> Te ni jehēn tucu ya vuelta uū, te suhva ni jicān tahú yā:

Tátá maá ná, te núu ma cúu cujiyo jnūndóho yáha jeē ma ndóho ná, te na cóo jeē cuní maá ní núu súcuan, achí yá.

<sup>43</sup> Te ni ndee tucu ya nuū de, te ni jito ya jeē cáquixī tucu de, chi yōhyo cájii de māhná.

<sup>44</sup> Te ni stóo ya de, te cuahān tucu ya cuacacān tahú yā vuelta unī. Te suni jnūhun yūcuan ní cahān yā.

<sup>45</sup> Yūcuán na te ni ndee tucu ya nuū de jijnáhan de, te ni cahān yā jín de:

Vijna te cusū rō te ndetātu rō. Te je ni quee hora, te ruhū, Yāá ní nduu tēe, natūu ri te jnī tēe cáhiyo cuēchi ruhū.

<sup>46</sup> Ndocuñī jijnáhan rō, chi je vēji tēe nastúu ruhū, te quihīn yō jín de, áchí yá.

*Jeē ní cajñī de Jesús*

(Mr. 14.43-50; Lc. 22.47-53; Jn. 18.2-11)

<sup>47</sup> Te sá cáhán gā yā súcuan, te ni quee-ni Judas, ñn jnáhan jeē uxí uū tēe cáscuáha jín yá. Te vējicoo cuehē tēe jín de, cándaha de espada jín yujnu. Chi sutū cácujuhnu jín táca tēe jéhnū cándacu jniñū nuū ñáyuu hebreo, ni catajái tēe ún.

<sup>48</sup> Te Judas, tēe nastúu ya ún, je ni jēhe de ñn seña nuū tēe un jijnáhan, chi ni achi de:

Tēe jeē téchūhu rí un cúu. Te jnī rō jijnáhan rō, áchí de.

<sup>49</sup> Te ni quee-ni de nuū Jesús, te ni cahān de:

Ta ni cuaa, Maestro, achí de.

Te ni techūhú de ya.

<sup>50</sup> Te ni cahān Jesús jín de:

Amigo, ¿na jniñū vēji rō? áchí yá.

Yūcuán na te ni jinūcoo tāca gá tēe ún, te ni cajñī de Jesús.

<sup>51</sup> Te ñn tēe jeē cáhīn jín Jesús, ni tava de espada de, te ni jehnde de sōho ñn mozo maá sūtū cujéhnū ga.

<sup>52</sup> Yūcuán na te ni cahān Jesús jín de:

Nachuvāha espada rō, chi táca jēe cájejnáhan jín espada, suni jín espada cuu.

<sup>53</sup> ¿Te á tu cájini rō jeē cuu cacān tahú rī nuū Tatá rī, te vijna ñúhún tají yá víhyá gā uxí uū mil ndajéhe andiví jeē jnama ruhū?

<sup>54</sup> Te núu súcuan, ¿te ndese cuu squícu jnūhun cáhán tutu ñi jeē cánuú ndoho rí súcuan? áchí yá.

<sup>55</sup> Yūcuán na te ni cahān yā jín ñáyuu cuehē ún:

¿Te va tēe cuihná cúu ri jeē véjicoo rō jín espada jín yujnu jeē jnī rō rúhū jeē súcuan. Táca quívī ni cucōo ri jín rō jijnáhan rō ñni templo cáhnū, ni steén rī jnūhun, te tu ní cájñī rō rúhū.

<sup>56</sup> Te súcuan cásáha rō návāha na squícu jeē cahán tutu ñi jeē ní catee tēe ni canacani jnūhun Yāá Dios, achí yá.

Yūcuán na te ndihī tēe cáscuáha jín yá, ni castóo de ya, ni cajinu de cuango de.

*Jeē ní indichi Jesús nuū junta tēe cácujuhnu ga*

(Mr. 14.53-65; Lc. 22.54-55, 63-71; Jn. 18.12-14, 19-24)

<sup>57</sup> Te tēe ni cajñī Jesús, cuango de jín yá nuū Caifás, tēe cúu sutū cujéhnū ga. Te yūcuan cáhīn tūtú tēe cástéén tutu ley jín táca tēe jéhnū cándacu jniñū.

<sup>58</sup> Te Pedro chí jicá-ni ndíquín de ya, te ni jinū de patio sutū cujéhnū ga. Te ni quívī de ini patio, te ni cucōo de jín táca policía, návāha coto de ndese coo squícu yá.

59 Te sutū cácujuhnu jíin táca tée jéhu jíin ndihí tēe cásáha junta cujéhu ga, ni canducú de tēe cahān jnūhun yáá síquī Jesús, chí cahni de ya cáconi de.

60 Te vēsú ni quecoo cuehē ñayuu cácahān yaá, te tu ní cánihin de cuēchi síquī yā jeē cáhni de ya. Te jeē sándihí te ní quecoo uū testigo jeē cahān yaá síquī yā.

61 Te áchí:

Tēe yáha ní cahān de jeē cuu canu de templo Yaā Dios, te nuū uní-ni quiví te nucondichi sáha de, áchí.

62 Yūcuán na te ní ndocuññí maá sūtū cujéhu ga, te ní cahān de jíin yá:

¿Naun tu cáhān cuiti rō? ¿A íyó ndāā jeē cácahān tēe yáha síquī rō? Achí de.

63 Te Jesús tu ní cáhān cuiti yā. Te ní cahān maá sūtū cujéhu ga:

Ndácu ri jniñu nuū rō jeē cahān ndaā rō cuni nahín maá Yaā Dios, Yaā técu. Cachi cají te núu maá ró cúu Cristo, Sēhe Yaā Dios, achí de jíin yá.

64 Te ní cahān yā:

Suu ri cúu, nájñuhun cáhān rō. Te na cástūhun rí nuū rō jijnáhan ró jéē táca quiví jeē quíji te coto ró rúhū, Yaā ní nduu tēe, condee rí lado váha Yaā íyó poder. Te coto ró jéē ndívi ri ichi ándiví jíin vícō. Achí yá.

65 Yūcuán na te sutū cujéhu ga ní jehnde de sahna de jeē quití ndasí ní de, te ní cahān de:

Tēe yáha chí cáhān de jnūhun ndevāha jeē quití ní Yaā Dios, chí sáha de maá de Sēhe Yaā Dios. ¿Ndé jíni ñúhún gá yō testigo núu súcuan? Chí je ní cajini ró jnūhun ndevāha cáhān de.

66 ¿Te ndese cájeni ní rō? achí de.

Te ní cacahān tēe cuehē ún:

Cuēchi cúu jeē cáhān de súcuan, te jíni ñúhún cuu de, áchí.

67 Yūcuán na te ní catesihí de nuū yā, te ní cacani de ya. Te sava ga de ní cacatu de nuū yā.

68 Te ní cacahān de:

Te núu Cristo cúu ró, te cachi rō ndé ñn cúu jeē ní cani róhó, áchí de.

*Jeē ní cachi Pedro jeē tu jíni de ya*

*(Mr. 14.66-72; Lc. 22.56-62; Jn. 18.15-18, 25-27)*

69 Te níni jéē súcuan cúu, te Pedro néne de nuū quehe ini patio. Te ní quee ññ ñahan jéjniñu vehe ún, te ní cahān ña jíin de:

Róhó chí suni ní jica ró jíin Jesús tēe Galilea, achí ña.

70 Te maá de tu ní cáchi de, chí ní cahān de ní cajini ndihí ñayuu:

Tu jíni rí na jnūhun cáhān rō, achí de.

71 Te ní quenda de yéhyí núu quehe, te ní jito ñnga ñahan nuū de. Te ní cahān ña jíin ñayuu cáhiin yūcuán:

Tēe yáha chí suni ní jica de jíin Jesús, tēe ñuu Nazaret, achí ña.

72 Te ñnga jínu tu ní cáchi tucu de, chí sa ní cahān teyí de:

Tu jíni rí tēe ún, achí de.

73 Te ní cunúu jecu gā, te ñayuu cáhiin yūcuan ní quecoo i nuū Pedro, te ní cacahān i:

Jendaá ndije jeē suni jnáhan tēe un cúu ró, chí ndijin cahān rō jeē tēe Galilea cúu ró, achí i.

74 Yūcuán na te ní quejéé de cáhān teyí de jeē na cóndee cuēchi síquī de núu tu cáhān ndaā de:

Tu jíni cuiti rí tēe ún, achí de.

Te ní cana-ni líhli.

<sup>75</sup> Te ni nucūhun ni de jñūhun ni cahān Jesús jíin de: Nde ná tu cana líhli, te yūhu ró te cahān rō unī jínu jeē tu jíni rō ruhū. Te ni quenda de cuahān de, te yōhyo ni ndahyū de jeē ní cachi de jeē tu jíni de ya.

*Jeē cuángoo de jíin yá nuū Pilato  
(Mr. 15.1; Lc. 23.1-2; Jn. 18.28-32)*

## 27

<sup>1</sup> Yūcuán na te ni cundijin. Te táca sūtū cácujeñnu jíin táca téé jéñnu jeē cándacu jniñu nuū ñáyuu hebreo, ni casquíjnáhan de jñūhun ndese sáha de jeē cuu Jesús.

<sup>2</sup> Te ni cajihni de ya, te cuango de jíin yá nuū Poncio Pilato, téé cúu gobernador.

*Jeē ni jíhī Judas*

<sup>3</sup> Yūcuán na te Judas, téé ni nastúu ya un, ní jito de jeē ní cunīhin siquī yā jeē cúu yā. Te ni jnahuhū ní de, te ni nacuāha de ocō uxī xūhun plata jeē ní níhīn de nuū sūtū cácujeñnu jíin núu táca téé jéñnu.

<sup>4</sup> Te ni cahān de jíin:

Cuēchi ní sáha ná jéé ní nastúu ná ñin téé cuu de, te tú na cuēchi de.

Te máá sūtū un ní cacahān de:

¿Vé jíitú ní ruhū? Cuēchi máá ró cúu. Achí de.

<sup>5</sup> Te ni scāne Judas xūhún un ini templo. Te ni quenda de cuahān de, te ni scuéhne de máá de.

<sup>6</sup> Te sūtū cácujeñnu ní canastútú de xūhún un, te ni cacahān de:

Ma cúu chuhun yó xūhun yáha ini yejnū nuū cásocō ñayuu, chí xūhun jéé ní jéconā jeē cúu ñin téé cúu, áchí de.

<sup>7</sup> Yūcuán na te ni casándaā de jeē xūhun yúcuu cuaan de ñuhun jeē naní Lugar Ñuhun Quíxin, návāha yūcuán quindūji ñayuu ñuu jíca.

<sup>8</sup> Jeē yúcuu cúu jeē ndé vijna nání ñuhun ún Lugar Ñuhun Niñī.

<sup>9</sup> Te súcuu ní squícu jñūhun ní cahān Jeremías, téé ní nacani jñūhun Yaa Dios nde jenahán: Ni caquihin de ndihócó uxī xūhun plata, te súcuu-ni cúu ñin yāhu jeē ní casáha ñayuu Israel cuenta jeē ndeé yā nuū i.

<sup>10</sup> Te jíin xūhun un ní cajeen de ñuhun quíxin, nájnūhun ní ndacu máá Jítoho yō Yaa Dios jniñu nuū rī. Achí Jeremías.

*Jeē ní indichi Jesús nuū Pilato  
(Mr. 15.2-5; Lc. 23.3-5; Jn. 18.33-38)*

<sup>11</sup> Te nuū ní jinūcoo de jíin Jesús nuū gobernador, téé cúu Pilato, te ni cajnūhún de ya:

¿A máá ró cúu Rey ñayuu hebreo? achí de.

Te ni cahān Jesús:

Suu rí cúu, nájnūhun cáhán rō.

<sup>12</sup> Te sūtū cácujeñnu jíin téé jéñnu cándacu jniñu, ni cacahān de cuēchi siquī yā. Te tú na vé ní cáhán cuiti yā.

<sup>13</sup> Yūcuán na te ni cahān Pilato jíin yá:

¿A tu jíni ró jéé cácahān de cuehē cuēchi siquī rō? achí de.

<sup>14</sup> Te tu ní cáhán cuiti yā ní ñin jñūhun jíin de. Te nahán ní naa ní gobernador jeē tú na vé ní cáhán yā jíin de.

*Jeē ní cundaā jeē cúu yā  
(Mr. 15.6-20; Lc. 23.13-25; Jn. 18.38-19.16)*



15 Te iyó costumbre gobernador jeē quivī vico un siaá de ñn tēe ñe vecāa, núu na-ni tēe cáculi ñayuu.

16 Te suu quivī un iyó ñn tēe ñe vecāa, nání de Barrabás, te je ni jitē núu jñuhun jeē ni sáha de cuēchi xeēn.

17 Te nuū ní candutútú ñayuu, te ni cahān Pilato jíin i:

¿Ndé tēe cáculi rō jeē siaá rī vijna: á Barrabás, chí Jesús jeē cúu Cristo, Yaa ní tají Yaa Dios? achí de.

18 Súcuán ni cahān de chí cúní de siaá de Jesús. Chí je ni jecūhun ni de jeē ní cacucúesún ni táca sūtū un cájito de ya, te jeē yúcuan ní quijicoo jíin yá nuū de.

19 Te níni jēe néne Pilato silla nuū sándaā de jniñu, te ñasihi de ni tají ña jñuhun nuū de: Ma quivī nduu rō jíin ñáyuu siquī tēe ndaā jíinā, chí yōhyo ni siūhu jéni ruhū cuni jeē siquí de, achí ña.

20 Te sutū cáculjénu jíin táca tēe jénu, ni cascáhán de ñayuu jeē na cáculi i jeē siaá de Barrabás, te na cúu Jesús.

21 Yūcuán na te ni cajñuhún tucu gobernador:

Jeē uú de, ¿ndé ñn de cáculi rō jeē siaá rī? achí de.

Te ni cacahān i:

Siaá ni Barrabás, achí i.

22 Te ni cajñuhún Pilato:

Núu súcuán te ¿ndese cáculi rō jeē sáha ri jíin Jesús, tēe cúu Cristo? achí de.

Te ni cacahān ndihi i:

Cata caa ní de jíicā cruz, na cúu de, achí i.

23 Yūcuán na te ni cahān Pilato:

¿Na cuēchi ni sáha de núu súcuán? achí de.

Te ñayuu un ní cacana jee ndasí i:

Cata caa ní de jíicā cruz, na cúu de, achí i.

24 Te ni jíni Pilato jeē tu cundeý de jíin ñáyuu, chí sa víhyá gā cáculvaā i. Te ni ndacu de jniñu jeē na quíjī ndute, te ni nandahá de nuū ñáyuu cuehē ún. Te ni cahān de:

Jeē nándahá rí yāha cúu seña jeē tú na cuēchi condee siquī rī jeē cúu tēe vāha yāhá. Chí siquī maá rō jíinánhan ró na cóndee. Achí de.

25 Te ni cacahān ndihi ñayuu:

Suu siquī maá ná jíin siquī séhe ná na cóndee cuēchi jeē cúu de, achí i.

26 Yūcuán na te ni siaá de Barrabás. Te ni ndacu de jniñu jeē na cáni táca soldado un Jesús, jíin jēe cáta caa de ya jíicā cruz.

27 Yūcuán na te soldado un cuango de jíin Jesús ini palacio. Te ni cacana de ndihi jnāhan de ni candutútú nuū yā.

28 Te ni caquenehen de sahma ya, te ni cachuhun de ya ñn sahma cuehé jeē cúu sahma rey.

29 Te ni casáha de ñn corona iñu, ni cachuhun de xiní yā. Te ni cachihi de ndaha váha ya ñn yujnu jeē nájnūhun bastón. Te ni casácatā de nuū yā, chí ni cajecuiñí yití de, casáha de jeē chíñuhún de ya.

Nacá jeē váha rey cúu Rey ñayuu hebreo, achí de.

30 Te ni catesihí de nuū yā. Te ni caquihin de yujnu jeē ní cachihi de ndaha ya, te ni cacani de xiní yā.

31 Te nuū ní cuu ní casácatā de nuū yā, te ni catava de sahma cuehé un, te ni canachuhun de ya sahma maá yá. Te cuango de jíin yá jeē cata caa de ya jíicā cruz.

*Jeē ní cacata caa de ya jicā cruz  
(Mr. 15.21-32; Lc. 23.26-43; Jn. 19.17-27)*

32 Te nuū ní quendacoo soldado un jíin yá, te ni canajnáhan de jíin ñn tēe ñuu Cirene, naní de Simón. Te ni catejníñu de tēe un jeē cóndiso de cruz yā.

33 Te ni jinūcoo de ñn lugar nuū naní Gólgota, jeē cuní cahān Lugar Yiqui Xíní.

34 Te ni cajēhe de vino jeē ni sácā núu jíin ñn jeē uvuá jeē cóho ya. Te nuū ní jito ndee ya, te tu ní cúní yā coho ya.

35 Te nuū ní cuu ni cacata caa de ya jicā cruz, te ni casáha de sorteo jeē siquí ndese nihīn ñn ñn de sahma ya. Te súcuan ni squícu jnūhun ni tee tēe ni nacani jnūhun Yaā Dios jenahán: Ni casáha de sorteo siquí ndese nihīn ñn ñn de sahma ri, achi yā, achí tutu.

36 Yūcuán na te ni cacucōo de yūcuan jéē cóto de nde cuu yā.

37 Te ni catee de ñn jnūhun xiní cruz yā jeē cahán na siquí ni jíhī yā: Yāha cúu Jesús, Rey ñayuu hebreo, achí.

38 Te suni ni cacata caa de uū tēe cuíhná núu uū gā cruz, ñn de lado váha ya, te inga de lado jecó yá.

39 Te ñayuu cáyāha yūcuan cáscuicó i xiní i, te cácahān neé i:

40 Róhó chí cáhán rō jeē cánu rō templo cáhnu, te nuū uní quiví te nacani ró. Núu súcuan te jnama ró máá ró vijna. Te núu Sēhe Yaā Dios cúu ró, te nuu ró jíca cruz ví, achí i.

41 Te sutū cácujeñnu, jíin tēe cástéén tutu ley, jíin tēe grupo fariseo, jíin tēe jéñnu jíjnánhan de, suni súcuan ni cacahān catá de, te achí de cácahān maá de:

42 Núu inga ñayuu ni jnama de, ¿te naun tu cúu jnama de máá de vijna? Núu Rey ñayuu Israel cúu de, te na núu de jicā cruz, návāha candíje yó de.

43 Ni candíje de Yaā Dios, te na jnáma ya de vijna te núu cúndáhú ni yā de, chí ni cahān de jeē cúu de Sēhe ya. Achí de jíjnánhan de.

44 Te tēe cuíhná jeē cándita caa xiin ya, suni súcuan ni cacahān neé de.

*Jeē ni jíhī Jesús  
(Mr. 15.33-41; Lc. 23.44-49; Jn. 19.28-30)*

45 Te nuū ní cuu cahuxí uū, te ni cunee ní cáhnu nde cahuní.

46 Te nájnūhun cahuní, te ni cana jee Jesús:

Elí, Elí, ¿lama sabactani? achí yá. Te jnūhun un cúní cahān: Yaā Dios maá ná, Yaā Dios maá ná, ¿naun ni stóo ní sáña?

47 Te sava ñayuu cáhīin yūcuan ní cajini i jnūhun ún, te ni cacahān i:

Tēe yáha cána de xiní Elías, tēe ni nacani jnūhun Yaā Dios jenahán, achí i.

48 Te ni jinu-ni ñn tēe, ni jequihin de ñn cachí, te ni chundaji de nuū vinagre iyá. Te ni tee de xiní ñn yujnu, te ni tee de yuhu ya jeē coho ya.

49 Te sava ga de ni cacahān:

Condetu ró, na cóndēhe yó núu quiiji Elías jnama de chí tuú, achí de.

50 Te Jesús ni cana jee ya inga jínu, te ni jíhī-ni ya.

51 Te sahma ndíta caa jeē ndihyú cuarto ñi ini templo cáhnu, ni ndatā-ni sava sava nde xiní te nde nuū jehé. Te ni jnāa, te ni catahū sava toto.

52 Te ni cananune yaū nuū yíndūji ndiyi. Te cuehē ndiyi jeē ní cacandíje i Yaā Dios, ni canatecu i.

53 Te nuū ní natecu Jesús, te ni quendacoo i nuū yíndūji i. Te ni ndivicoo i ini ñuu ñi Jerusalén, te cuehē ñayuu ni cajito nuū i.

54 Te ná ni jihí Jesús, te tēe cúu capitán jíin tēe cáhīin jíin de jeē cándito de nde cuu yā, ni cajini de jeē ni jnáa, jíin táca gá jniñu ní cuu. Te yōhoyo ni cayūhú de, te ni cacahān de:

Jendaá ndije jeē Séhe Yaā Dios cúu tēe yáha, áchí de.

55 Te yūcuan cáhīin cuehē ñahan, cándēhe jíca ña. Te suu ñahan un ní candiquin ña Jesús nde Galilea, vējicoo ña cájejniñu ña nuu yā.

56 Te uní ñahan un cácuu María ñuu Magdala, jíin María naná Jacobo jíin José, jíin naná ndindúu séhe Zebedeo.

### *Jeē ní quindūji Jesús*

(Mr. 15.42-47; Lc. 23.50-56; Jn. 19.38-42)

57 Te nuu ní ini quivī ún, te ni quee ñn tēe cúca, nání de José, te tēe ñuu Arimatea cúu de. Te suni tēe ni scuáha jíin Jesús cúu de.

58 Tēe un ní jehēn de nuu Pilato, te ni jicān de yiqui cúñu Jesús. Te ni ndacu Pilato jniñu jeē na cuáha nuu de.

59 Te José ni quihin de yiqui cúñu yā, te ni chusúcun de ñn sahma cuitá íyó ndoo.

60 Te névāha de ñn yaū jeē ní caan jeé jíca ñn cava, nuu ná tu quindūji ndīyí. Te yūcuan ní chindūji de ya. Te ni jesi de ñn yuū cáhnu yuhu yáú un, te cuahān de.

61 Te María ñuu Magdala, jíin inga María, cáyucú ña ichi núu nuu yindūji ya.

### *Jeē ní cacondito soldado nuu yindūji ya*

62 Te ni cuu táca jniñu yáha máa quivī jeē casátuhva ñayuu jeē quiji quivī ndétátú. Yūcuán na te ni cundijin máa quivī ndétátú. Te sutú cácujeñu jíin tēe grupo fariseo ni jengoo de nuu Pilato.

63 Te ni cacahān de:

Cánucūhun ni na jēe nde na técu tēe stáhú néé un te ni cahān de jeē nátecu de nuu uní quivī.

64 Núu súcuan te ndacu ní jniñu na cóto vāha táca soldado yuhu yáú un nde núu ni yāha uní quivī. Chi núu tuú te sanaa te quijicoo tēe ni cascuáha jíin de, te tava cuihná de ndīyí ún jecuáa, quingoo de jíin. Yūcuán na te cachi de nuu ñáyuu jeē ní natecu tēe ún. Te cáhu gá cuu jñuhun stáhú yúcuuan vēsú jeē xíhna ñúhún. Achí de.

65 Te ni cahān Pilato:

Yáha cáhīyo soldado. Cuángoo jíin de, te sácutú váha ró yuhu yáú un, te coto vāha ró, núu ndese vāha ga cuu sáha ró. Achí de.

66 Te cuangoo de, te ni casácutú de yuū jeē ndihyú yuhu yáú nuu yindūji ya, te ni castān ñihin de. Te ni castóo de táca soldado un cándito.

### *Jeē ní natecu Jesús*

(Mr. 16.1-8; Lc. 24.1-12; Jn. 20.1-10)

## 28

1 Te ni yāha quivī ndétátú un, te ni cundijin quivī domingo. Te María ñuu Magdala jíin inga María un, ní jecondēhé ña nuu ní yindūji Jesús.

2 Yūcuán na te ñn sanaa-ni te ni jnáa ñihin ndasí. Chi ñn ndajéhé máa Jítoho yō Yaā Dios ni cuun ya ichi ándiví, ni quee ya nuu ní yindūji Jesús. Te ni stáa ya yuū ndihyú yuhu yáú un, te ni cucōo ya siquí.

3 Te ndíndēe núu yā nájnūhun taja, te sahma ñúhun ya yaa quiyi nájnūhun yuhvá volcán.

<sup>4</sup> Te soldado cándito yūcuan ní quisi i de jeē cáyūhú de cájito de ya. Te ni cacuu ndīyí de.

<sup>5</sup> Te ni cahān ndajéhé jíin ndindúú ñahan ún:

Ma yūhu ró, chí jíin rī jeē vécondēhe ró Jesús, Yaā ni jíhi jicā cruz.

<sup>6</sup> Tuá yā yāhá, chí je ni natecu yā, nájñūhun ni cahān yā. Nehen condēhe ró nuū ní cachindūji de ya.

<sup>7</sup> Te yachī quingoo ró, te cachi rō nuū tée cáscuáha jíin yá jeē ní natecu yā. Te xīhna gā maá yá jinū Galilea, te sáa te najinūcoo de. Te yūcuán coto de nuū yā. Achí rō na cúni de. Je ni castūhun rí nuū rō, achí ndajéhé.

<sup>8</sup> Te ni quendacoo ña nuū ní yindūji ya, te yachí cuangoo ña. Te cáyūhú ña, te suni yōhyo cácusī ni ña. Te ni cajinu ña cuacastūhún ña nuū tée cáscuáha jíin yá.

<sup>9</sup> Te níni cuángoo ña, te ni quee-ni Jesús nuū ña, te ni cahān yā jíin ña. Te ni quecoo ña nde nuū yā, te ni canundee ña jehē yā, te ni cachiñúhún ña ya.

<sup>10</sup> Te ni cahān yā jíin ña:

Ma yūhu ró jíināhan ró. Cuángoo te castūhun ró nuū tācá hermano rī, tēe ni cascuáha jíin rī, jeē na núngoo de nde Galilea, te yūcuán coto de nuū rī. Achí yá.

### *Jñūhun ní cacahān soldado*

<sup>11</sup> Te níni cuángoo ña, te sava soldado jeē ní condito ún, cuánungoo de nde ñuu. Te ni cacastūhún de nuū sutú cácujuhnu tācá jniñu jeē ní cuu.

<sup>12</sup> Te sutú cácujuhnu ni candutútú de nuū tāca tée jēhnu cándacu jniñu, te ni casquijnāhan de jñūhun. Yūcuán na te ni cajēhe de cuehē xūhun núū soldado jíināhan.

<sup>13</sup> Te ni cacahān de jíin:

Cahān rō jíināhan ró jēe tée cáscuáha jíin de ni quijicoo jecuāā, te ni catava cuīhna ndīyí un níni cáquixí rō, achí rō.

<sup>14</sup> Te núu na cúni gobernador jñūhun yáha, te maá rí quiscahán rī de, návāha tú nihīn rō castigo jíināhan ró. Achí de.

<sup>15</sup> Te soldado un ní caquihīn de xūhún un, te ni cacachi de nájñūhun ni cacahān jíin de. Te nde vījna chí súcuan cácahān ñayuu hebreo nájñūhun ni cacahān soldado un.

### *Jeē ní tejniñu ya de nacani de jñūhun*

*(Mr. 16.14-18; Lc. 24.36-49; Jn. 20.19-23)*

<sup>16</sup> Te ndihúxí iin tēe ni cascuáha un cuánungoo de nde Galilea, nde yucu nuū ní cachi Jesús jeē quingoo de.

<sup>17</sup> Te nuū ní cajito de nuū yā, te ni cachiñúhún de ya. Te sava de tu cácandíje vāha de jeē maá yá cúu.

<sup>18</sup> Te ni quee ya nde nuū de, ni cahān yā jíin de:

Je ni jēhe Tátá rī ndīhi poder nuū rī jeē ndácu rí jniñu andiví jíin ñáyiví.

<sup>19</sup> Núu súcuan te cuángoo nuū ñayuu tācá nación, te stéén rō jñūhun rí nuū i návāha na cándíje i. Te scuándute ró i jeē ní cacandíje i maá Tátá jíin Séhe jíin Espíritu Santo.

<sup>20</sup> Te stéén rō nuū i jeē na cuátáhú i tācá jniñu ní ndacu rí nuū rō. Te cocuhun ni rō jeē maá rí íne rí jíin ró ñí cáni nde quiví jinu ñayiví. Achí yá. Te ni cuu. Amén.

## JNUHUN VAHA NI TEE SAN MARCOS

### *Jñuhun Juan tēe scuándute*

(Mt. 3.1-12; Lc. 3.1-9, 15-17; Jn. 1.19-28)

<sup>1</sup> Yáha quejéé jñuhun váha máá Jesucristo Sēhe Yāā Dios, jeē ní quiji ya jeē jnama ya yohó.

<sup>2</sup> Isaías, tēe ni nacani jñuhun Yāā Dios nde jenahán, súcuan ni tee de jñuhun Juan nuū tútu:

Tají rí tēe nacani jñuhun ri cosnūú de ichi núú rō, návāha coo túhva ñayuu jeē jinú rō, achí Yāā Dios jíin Cristo.

<sup>3</sup> Te tēe ún cana jee de nde nuū ñúhun téhé:

Sátúhva ró máá ró jijnáhan ró, chí quee maá Jítoho yō.

Te sáha ró jniñu ndaā, chí vēji ya, achí de.

Achí Isaías.

<sup>4</sup> Te Juan ni jinú de nde nuū ñúhun téhé, scuándute de ñayuu. Te cáhán de jíin i jeē na nácani ni i jeē stóo i cuēchi i te cuandute i, návāha cone cáhnu ni Yāā Dios nuū cuēchi i.

<sup>5</sup> Te táca ñayuu región Judea jíin ñayuu ñnu Jerusalén, ni quijicoo i nuū de. Te ni canacani ndaā i cuēchi i nuū Yāā Dios, te ni scuándute de i ini yūte Jordán.

<sup>6</sup> Te sahma ñúhun Juan cúu ixi camello, te núhni ñn cinturón ññ chíji de. Te jeē técu de cúu tíca ndicuéhyí jíin ndúxi yocō.

<sup>7</sup> Te suhva ni nacani de jñuhun:

Quiji máá Yāā cujéhnu ndasí. Chí tú na vé jéhnu cuíti cúu ri nuū yā, ni jeē cuajniñu ri nuū yā vesú ñn jniñu lúli gá nájnūhun jeē cuíta ndeyi ri ndají rí correa ndijēn yā.

<sup>8</sup> Te ruhú chí jíin ndute scuándute ri rohó jíjnáhan ró, te Yāā ún chí nájnūhun jeē scuándute ya rohó cúu jeē cuáha ya Espíritu Santo condee ini anuá rō, achí Juan.

### *Jeē ní jendute Jesús*

(Mt. 3.13-17; Lc. 3.21-22)

<sup>9</sup> Te ni cuu jecu quiví, te Jesús ni quenda ya ñnu Nazaret ndañú Galilea, te Juan ni scuándute de ya ini yūte Jordán.

<sup>10</sup> Te ná ni quenda ya nuū ndúte, te ni jito ya jeē ní nune-ni andiví, te ni cuun Espíritu Santo ni quee xiní yā, te cáa nájnūhun ñn paloma.

<sup>11</sup> Te ichi ándiví ní cahān ñn jñuhun:

Máá ró cúu Sēhe ri jeē maní ndasí rí jíin, te yōhoyo cúsiñ ni rí jíin ró, achí.

### *Jeē ní jito ndee jexeén Jesús*

(Mt. 4.1-11; Lc. 4.1-13)

<sup>12</sup> Yūcuán na te ni jinú Jesús nde nuū ñúhun téhé ní sáha Espíritu Santo.

<sup>13</sup> Te uū xico quiví ni condee yā nuū ñúhun téhé un núú íin quítí yúcu. Te ni jito ndee Satanás yā, chí cúní jeē sáha ya cuēchi. Te nuū ní cujiyo Satanás cuahān, te ni quecoo ndajéhé Yāā Dios, ni cajejniñu nuū yā.

### *Jeē ní quejéé Jesús nácani ya jñuhun*

(Mt. 4.12-17; Lc. 4.14-15)

<sup>14</sup> Yūcuán na te ná ni cachune de Juan vecāa, te ni jinú Jesús región Galilea, nácani ya jñuhun váha ndese ndácu Yāā Dios jniñu.

15 Te ni cahān yā:

Je ni jinū quivī, te je ni cuyajni jeē ndācu Yaā Dios jniñu nuū rō. Nacani ni rō jeē stóo ró cuēchi ró jínáhan ró, te candíje ró jnúhun jeē jnáma ya rohó. Achí yá.

*Jeē ní cana ya cuūn tēe jñ# chācá*

*(Mt. 4.18-22; Lc. 5.1-11)*

16 Te jica Jesús yumar Galilea cuahān yā. Te ni jito ya nuū Simón jín ñani de Andrés. Te tēe cájni# chācá cácuu de, te cásinga de ñunu de ini mar.

17 Te ni cahān yā jín de:

Condiquīn ruhū na quihín yō, te nasáha ri rohó tēe nihīn cuehē ñayuu candíje ruhū, nájnūhun cánihīn rō chācá, achí yá.

18 Yūcuán na te ni castóo-ni de ñunu de, te ni candiquīn de ya.

19 Te ni jica ya jecu gā, te ni jito ya nuū Jacobo jín ñani de Juan, sēhe Zebedeo, suni cáyūcú de ini barco de, cánachijñ# de ñunu de.

20 Te suni ni cana ya de jeē cōndiquīn de ya. Te ni castóo-ni de tátá de Zebedeo ini barco un jín mozo de, te ni candiquīn de ya cuango de.

*Jeē ní quenehen ya tachī ini #n tēe*

*(Lc. 4.31-37)*

21 Te ni jinū yā jín de ñuu Capernaum. Te quivī ndétātu ní quivī ya ini vehe iī sinagoga, te ni steén yā jnúhun.

22 Te ni canaa ni ñayuu ni cajini i jnúhun steén yā. Chi ni steén vāha ya nuū i, chi máa yá cúu jeē ndíso jniñu siquī ndihi. Te tēe cástéén tutu ley Yaā Dios, tu súcuán cástéén de.

23 Te ini vehe iī sinagoga ñuu un íne #n tēe jeē ñúhun tachī ini. Te ni cana cóhó de:

24 ¿Naun vēji ní núu na jínáhan ná, Jesús ñuu Nazaret? ¿A vēji ní jéē snāā ní sáña, chí naún? Je jíní na ndé #n cúu ní, chí Sēhe iī Yaā Dios cúu ní. Achí de.

25 Te Jesús ni cahān xeēn yā jín táchī ún:

Casi yuhu ró te quenda ró ini de, achí yá.

26 Te tachī ún xeēn ni jehni yīhí tēe ún. Te ni cana cóhó, te ni quenda ini de cuahān.

27 Te ndihi ñayuu ni cayūhú i, te cácajnūhun jnáhan i:

¿Na vé cúu jeē yáha? ¿A #n jnúhun jéé cúu jeē yáha? Chi tēe yáha cújéhu de jeē ndācu de jniñu nde nuū tachī te quéndacoo, achí i.

28 Te yachī ni jitē núu jnúhun Jesús cuahān ní# cáhnu región Galilea.

*Jeē ní nasávāha ya naná chīsó Simón Pedro*

*(Mt. 8.14-15; Lc. 4.38-39)*

29 Te ni quenda ya jín de jínáhan de ini vehe iī sinagoga. Te Jesús ni jehēn yā jín Jacobo jín Juan nde vehe Simón jín Andrés.

30 Te naná chīsó Simón, catú ña y#hi quiji ña. Te ni cacastühún de nuū yā jeē cuhú ña.

31 Yūcuán na te ni quindehe ya nuū catú ña, te ni jñ# ya ndaha ña, te ni ndonehen ya ña. Te ni quenda-ni quiji ún ña, te ni sáha ña jeē ní cayejí de jín yá.

*Jeē ní nasávāha ya cuehē ñayuu*

*(Mt. 8.16-17; Lc. 4.40-41)*

32 Te ni quēe niāndii te ni cuaa. Te ni quecoo ñayuu jín táca ñáyuu cácu#hú jín jéē ñúhun tachī ini.

33 Te tāca ñáyyuu ñuu un ní cacutútú i yéhyí un.

34 Te ni nasávāha ya cuehē ñayuu cácuḥū tijní nuū cuehyí, te ni quenehen ya cuehē tachí un cuángoo. Te tachí chí je cájini un yá, te tu ní jéhe ya jñūhun jeé cástūhun ndé ñin cúu ya.

*Jeé ní nacani ya jñūhun región Galilea*

*(Lc. 4.42-44)*

35 Te nehen ndasí ní ndonda ya, nde yínee gā. Te ni quenda ya cuahān sñin ya yatā ñūū nuū tú ñayuu, te yūcuan ní jicān tahú yā.

36 Te Simón jíin téee cáhīin jíin de, ni jenanducú de ya.

37 Te ni cananihīn de ya, te ni cacahān de jíin yá:

Tāca ñáyyuu cánanducú i níhīn, áchí de.

38 Te máá yá ni cahān yā:

Sa suhva na quihín yō tāca gá ñuu íne yajni, návāha suni nacani ri jñūhun nuū i, chí jeé yūcuan ní quee rī. Achí yá.

39 Te súcuan te ní jica cuu ya ní región Galilea, ni nacani ya jñūhun ini vehe ñi sinagoga tācá ñuu, te ní quenehen ya tachí ini ñayuu.

*Jeé ní nasávāha ya ñin tēe ndóho cuehyí stehyú*

*(Mt. 8.1-4; Lc. 5.12-16)*

40 Te ñin tēe ndóho cuehyí stehyú, ni quee de ni jecuññí yití de nuū yā, te ni cahān de jíin yá:

Jíni na jeé cuu sáha ní jéé nduvāha ná, te núu cúni ní, áchí de.

41 Te Jesús ní cundáhú ní yā de, te ní soó yá ndaha ya siquí de, te ní cahān yā:

Cúni rī. Te na ndúvāha ró, áchí yá.

42 Te ná ni cahān yā súcuan, te ní nduvāha-ni tēe ndóho cuehyí stehyú un.

43 Yūcuán na te nátají yá de quinhun de, te ní cahān níhin ya jíin de:

44 Ma cáchi cuiṭi rō nuū ní ñin. Chí quisteén rō maá ró nuū sutú, te condahá ró jeé socó rō nuū Yaā Dios siquí jeé ndúndoo ró núu yā, nájnūhun ní ndacu Moisés jniñu jenahán. Te súcuan te cuni ñayuu jeé ní nduvāha ró. Achí yá.

45 Te ní quenda de cuahān de, te ní quejéé de nácani de jñūhun nuū ndihi ñayuu ndese ní nduvāha de. Te siquí yūcuan tuá ní cúu quívi Jesús tācá ñuu, chí cúchitú ndasí ñáyyuu nuū yā. Te ní jica ya yatā tācá ñuu nuū tu cúchitú ñayuu. Te tāca lado ní quijicoo ñayuu nuū yā.

*Jeé ní nasávāha ya ñin tēe ndóho cuehyí ní íjin*

*(Mt. 9.1-8; Lc. 5.17-26)*

## 2

1 Te ní cuu jecu quívi, te ní quívi tucu Jesús ñuu Capernaum. Te ní cajini ñayuu jeé néne ya vehe.

2 Te ní cacutútú-ni cuehē ñayuu, te ní chitú vehe jeé ndé yehyí tuá núne. Te ní nacani ya jñūhun Yaā Dios nuū i.

3 Yūcuán na te ní quecoo cuñin tēe nuū yā, cándiso de ñin tēe ndóho cuehyí ní íjin.

4 Te tu ní cúu quívicoo de nuū yā siquí jeé chitú ñayuu. Te ní cacao de siquí véhe, te ní canue de ndaā nuū íin ya, te yaū un ní cascúun de tēe cúhú, cátu de nuū ñin camilla.

5 Te ní jini Jesús jeé cácanđje de jeé cúu nasávāha ya tēe cúhú un. Te ní cahān yā jíin téee cúhú un:

Séhē, je íne cáhnu ni rī nuū tāca cuéchi ró, áchí yá.

<sup>6</sup> Te yūcuan cáyūcú jecu tēe cástéén tutu ley Yaā Dios, te tēe un ní cajeni ni de siquī yā:

<sup>7</sup> ¿Naun cáhán tēe yáha súcuan? Cáhán de jnūhun ndevāha jeē quití ni Yaā Dios, chí nasūu Yáā Dios cúu de jeē cóne cáhnu ni de nuū cuéchi.

<sup>8</sup> Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahān ndevāha rī?

<sup>9</sup> Jeē uú jnūhun yáha, ¿ndé iin yí gá cáa? ¿A jéé cahān rī jíin tēe cúhú: Je íne cáhnu ni rī nuū tāca cuéchi ró? ¿Chí yí gá jeē cahān rī: Ndocuiñī te naquihin ró camilla rō, te caca ró, achi rī?

<sup>10</sup> Te vijna te na stéén rī jeē maá rí, Yaā ní nduu tēe, ndíso jniñu ri ini ñayīvi yáha jéé cóne cáhnu ni rī nuū cuéchi.

Yūcuán na te ni cahān yā jíin tēe ni íjin ún:

<sup>11</sup> Cáhán rī jíin ró, ndocuiñī te naquihin ró camilla rō, te quinhun rō vehe ró, áchí yá jíin de.

<sup>12</sup> Yūcuán na te ni ndocuiñī-ni tēe ún, te ni naquihin de camilla de, te ni quenda de cuahān de, jito jíinúu ndihī ñayuu. Te ndívi i ni canaa ni i cájito i, te ni cacahān i jeē yóhyo vāha Yaā cúu Yaā Dios. Te áchí i:

Ná tu coto cuíti yō ni iin jniñu súcuan, áchí i.

### *Jeē ní cana ya Leví*

*(Mt. 9.9-13; Lc. 5.27-32)*

<sup>13</sup> Te ni quenda tucu ya cuahān yā nde yumar. Te tāca ñayuu ni jinūcoo i nuū yā, te ni steén yā jnūhun nuū i.

<sup>14</sup> Yūcuán na te ni yáha ya cuahān yā, te ni jito ya nuū Leví séhe Alfeo, néne de nuū cutútú xúhun renta. Te ni cahān yā jíin de:

Condiquīn ruhū na quihín yō.

Te ni ndocuiñī de, te cuahān de jíin yá.

<sup>15</sup> Yūcuán na te ni jehēn yā ni yeji yā staā vehe de. Te cuehē tēe cástútú xúhun renta jíin inga tēe cásáha cuéchi, suni cáyūcú de cáyeji de staā jíin Jesús jíin tēe cáscuáha jíin yá, chí íyó cuéhē de jeē cándiquīn de ya.

<sup>16</sup> Te tēe cástéén tutu ley Yaā Dios jíin tēe grupo fariseo, ni cajito de jeē yéji yā staā jíin ndihī tāca tēe ún. Te ni cacahān de jíin tēe cáscuáha jíin yá:

¿Naun yéji maestro rō jíin tēe cástútú xúhun renta jíin inga tēe cásáha cuéchi? áchí de.

<sup>17</sup> Te ni jini Jesús, te ni cahān yā jíin de:

Ñayuu cáhīyo vāha, tu jini ñuhún i tēe tájné, chí ñayuu cácuñú cúu jeē jíni ñuhún. Te ruhū nasūu jéé véji rī cana rī ñayuu tú cuéchi, jeē cúu i nájñuhun ñayuu cáhīyo vāha. Chí sa suhva véji rī cana rī ñayuu cáhīyo cuéchi, jeē na nácani ni i te stóo i cuéchi i. Áchí yá.

### *Jeē ní cacajñuhún de ya siquī jeē cóndite ni*

*(Mt. 9.14-17; Lc. 5.33-39)*

<sup>18</sup> Te ni cuu iin quivī jeē cáhīyo ndite ni tēe cáscuáha jíin Juan, jíin tēe cáscuáha jíin grupo fariseo. Te ni quecoo jecu tēe, ni cacahān de jíin Jesús:

Tēe cáscuáha jíin Juan jíin jéé cascuáha jíin grupo fariseo, tijni jínu cáhīyo ndite ni de. Te tēe cáscuáha jíin máá ní, ¿naun tu cásáha de súcuan?

<sup>19</sup> Te ni cahān Jesús jíin de:



¿A cuu condite ni de níni jéé iyó rí jíin de? ¿A cuu condite ni ñayuu cáhīin vico nándāha, te núu níni néne tēe nándāha? Chi núu néne tēe nándāha, te ma cúu condite ni i.

<sup>20</sup> Te quee quivī jeē cújiyo tēe nándāha, te quivī ún chi condite ni i.

<sup>21</sup> Te ni cahān yā uū jnūhun yátá síquī jeē tu quíjnāhan jnūhun jeē jéé steén yā jíin táca jnūhun jenahán. Achí yá:

Ni ĩn tu náchuhun ĩn pedazo sahma jéé núū ĩn sahma túhú. Chi núu súcuan te ndiyī pedazo jeé un, te tahndē gā jeē tuhú un, te nducáhnū ga nuū catáhné un.

<sup>22</sup> Te suni tu cáchuhun vino jeé ini ñīi túhú. Chi núu súcuan te vino jeé un ndatá ñīi ún, te naa vino jíin ñīi. Jeé yúcuan cánuú jéé chúhun i vino jeé ini ñīi jéé.

*Jeē ní cataxín de yoco trigo quivī ndétātú*  
(Mt. 12.1-8; Lc. 6.1-5)

<sup>23</sup> Te ĩn quivī ndétātu ní yāha Jesús cuahān yā mēhñū nuū cáa trigo. Te tēe cáscuáha jíin yá, cájica de cuahān de, te ni quejéé de cátaxín de yoco trigo cáyeji de.

<sup>24</sup> Yūcuán na te tēe grupo fariseo ni cacahān de jíin yá:

Condéhé. ¿Najehē casáha tēe cáscuáha jíin ró súcuan? Chi áchí ley Moisés jeé ma cúu sáha yó ni ĩn jniñu quivī ndétátú. Achí de.

<sup>25</sup> Te ni cahān maá yá jíin de:

¿A tu ní cácahu cuítī rō tutu ndese ni sáha David, ĩn quivī ní cumaní jeé cáji de, te ni jíi de sōco jíin tēe cáhīin jíin de?

<sup>26</sup> Te ni quivī de ini vehe Yāā Dios. Te Abiatar ni cuu sutū kujéhnū ga. Te ni yeji de pan ĩi jeē yosó ndijin nuū Yāā Dios. Te tú na ley jeé cáji ni ĩn tēe, chi máa-ni sutū cuu caji. Te suni ni jēhe de ni cayeji tēe cáhīin jíin de. Te tú na cuēchi ní iyo síquī de. Achí yá.

<sup>27</sup> Te suni ni cahān yā jíin de jíjnāhan de:

Tu ní jéconāā ñayuu jeé ndóho i nuū quivī ndétátú, chi ni jeconāā quivī un jéé ndétátú i.

<sup>28</sup> Núu súcuan te ruhū, Yāā ní nduu tēe, maá rí cúu jeé ndácu jniñu síquī ndese sáha ñayuu quivī ndétátú, áchí yá.

*Jeē ní nduvāha tēe ni ichī ndaha*  
(Mt. 12.9-14; Lc. 6.6-11)

### 3

<sup>1</sup> Te ni quivī tucu Jesús ini vehe ĩi sinagoga. Te yúcuan íne ĩn tēe ni ichī ĩn ndaha de.

<sup>2</sup> Te tēe grupo fariseo cájito yuhu de ya núu nasávāha ya tēe un quivī ndétátú, návāha nihīn de cuēchi síquī yā.

<sup>3</sup> Yūcuán na te ni cahān yā jíin tēe ni ichī ndaha ún:

Ndocuñī te condíchi rō mēhñu yáha, áchí yá.

<sup>4</sup> Te ni cajnūhun yá de jíjnāhan de:

¿Ndese cáhán ley síquī quivī ndétátú? ¿A jéé sáha vāha yó, chí sáha néé yó? ¿A jéé nasávāha yó ñayuu je yajni cuu, chí sáha yó jéé cúu i? áchí yá.

Te máa de tú na vé ni cacahān de.

<sup>5</sup> Te ni quítī ni yā ni jito ya nuū de jíjnāhan de, te ni cucuíhyá ni yā jeé níhni ni de. Te ni cahān yā jíin tēe ni ichī ndaha:

Scáá ndaha ró.

Te ni scaá de, te ni nduvāha-ni ndaha de.

<sup>6</sup> Yūcuán na te ni quendacoo tēe grupo fariseo, te ni casquijnáhan de jnūhun jíin tēe grupo Herodes siquī yā, ndese cahni de ya.

*Jeē ní quecoo cuehē ñayuu nuū yā yumar*

<sup>7</sup> Te Jesús cuahān yā nde yumar jíin tēe cáscuáha jíin yā. Te cuehē ñayuu región Galilea ni candiquīn i ya.

<sup>8</sup> Te suni ñayuu región Judea, jíin ñayuu ñuu Jerusalén, jíin ñayuu Idumea, jíin ñayuu ichi núu cáne niāndii yūte Jordán, jíin ñayuu región Tiro jíin Sidón, cuehē ndasí ñayuu ni cajini jnūhun i jniñu jéhnū ni sáha ya, te ni quecoo i nuū yā.

<sup>9</sup> Te ni cahān yā jíin tēe cáscuáha jíin yā jeē na cóo tūhva ñin barco quīvi ya, návāha ma chitú níhin ñayuu cuehē ún xiin ya.

<sup>10</sup> Chi cuehē ñayuu je ni nasávāha ya, te jeē yúcuan vējicoo cuehē gā ñayuu cándoho tāca núu cuehyi, te chitú níhin i xiin ya jeē quehé i ya cáconi i.

<sup>11</sup> Te ñayuu cáñuhun tachí ini, núu ni cajito nuū yā, te cájecuīñi yití núu yā, te cácana cóhó:

Máá ní cúu Sēhe Yaā Dios, achí.

<sup>12</sup> Te ni ndacu níhin ya nuū tachí un jéē ma cáhán gā jeē cúu ya Sēhe Yaā Dios.

*Jeē ní nacāji ya uxī uū tēe apóstol*

*(Mt. 10.1-4; Lc. 6.12-16)*

<sup>13</sup> Yūcuán na te ni caa ya cuahān yā ñin yucu. Te ni cana ya tāca tēe jeē cuní maá yá cacá jíin yā, te ni quecoo de nuū yā.

<sup>14</sup> Te ni jeni ya uxī uū de jeē cuñi de jíin yā, te tají yá de quingoo de nacani de jnūhun.

<sup>15</sup> Te ni sáha ya jeē cóndiso jniñu de nasávāha de ñayuu cuhú te quenehen de tachí ini ñayuu.

<sup>16</sup> Te yāha cúu ndihúxí uū tēe jeē ní nacāji ya: Simón jeē ní nasnání yá de Pedro.

<sup>17</sup> Te Jacobo jíin ñani de Juan, sēhe Zebedeo. Te ni nasnání yá ndindúú de Boanerges, jeē cuní cahān: Tēe yíhi fuerza nacani jnūhun, nájñuhun yíhi fuerza taja.

<sup>18</sup> Te sava ga de nání de Andrés, Felipe, Bartolomé, Mateo, Tomás, Jacobo sēhe Alfeo, Tadeo, Simón tēe grupo cananista,

<sup>19</sup> jíin Judas Iscariote, tēe jeē ní nastúu de ya.

*Jeē ní cacahān ñayuu jeē jejniñu ya fuerza Satanás*

*(Mt. 12.22-32; Lc. 11.14-23; 12.10)*

Yūcuán na te ni quīvi ya ñin vehe jíin tēe cáscuáha jíin yā un.

<sup>20</sup> Te ni ndutútú tucu cuehē ñayuu, te ni tuá ni cúu caji yā staā jíin de.

<sup>21</sup> Te tāca jnáhan vehe ya ni cajini jnūhun jeē súcuan cúu. Te ni quecoo de venūquihin de ya. Chi cacahān de jeē ní sana xinī yā.

<sup>22</sup> Te suni tēe cástéén tutu ley Yaā Dios jeē ní quijicoo nde ñuu Jerusalén, ni cacahān de:

Tēe yáha ñūhun Satanás ini de, jeē cujéhnū nuū tachí. Te jíin fuerza un quénehen de tachí, achí de.

<sup>23</sup> Te ni cana ya de jijnáhan de, te ni cahān yā ñin jnūhun yátá jíin de:

¿Ndese cuu quenehen Satanás maá?

<sup>24</sup> Chi núu ñin nación sásñin máá te cuajnáhan máá, nación un má cúu ga coyūcu cáhnu.

25 Te núu ñayuu ñin vehe sásñn máá te cuajnáhan máá, ñayuu un má cúu ga coyūcu cáhnu.

26 Te suni súcuan Satanás jíin jnáhan tachī, chí núu sásñn máá te cuajnáhan máá, núu súcuan te ma cóo ga, chí sa suhva naa.

27 Te ni ñin tēe ma cúu quīvī de ini vehe tēe ndacuī jeē quenehen de ndajññu de. Chí cánuú jeē xíhna gā cuhni de tēe ndacuī ún. Te suni súcuan cúu jeē jíhni rī Satanás te quēnehen rī tachī.

28 Te jendaá cahán rī jíin ró jeē iyó modo coo jñūhun cáhnu ni nuū tāca cuéchi cásáha ñayuu, te suni nuū tāca jñūhun néé cácahān i.

29 Te núu cahān ndevāha i siquī Espíritu Santo, te ma cóne cáhnu ni Yaā Dios nuū i, chí sa suhva condee cuéchi siquī i níí cáni, áchí yá.

30 Súcuan ni cahān yā, chí ni cacahān i jeē quēnehen ya tachī jíin fuerza Satanás.

*Náná yā jíin ñani yā  
(Mt. 12.46-50; Lc. 8.19-21)*

31 Yūcuán na te ni quee naná yā jíin tāca ñani yā. Te ín ña nuū quehe, te ni tají ña jñūhun cuahān nuū yā jeē cána ña ya.

32 Te ñayuu cáyūcu níí xiin ya, ni cacahān i jíin yá:

Náná ni jíin tāca ñani ni cáhñin nuū quehe, te cácuñi cahān jíin ní, áchí i.

33 Te ni cahān máá yá:

¿Ndé ñin cúu náná rī jíin ñani rī? achí yá.

34 Yūcuán na te ni ndacoto ya nuū ñayuu cáyūcú xiin ya ún, te ni cahān yá: Suni náná rī jíin ñani rī cácuu tāca ñayuu yáha.

35 Chí tāca ñayuu casquícu jñññu cúní Yaā Dios, suu cácuu ñani rī, cuāha rī, náná rī, achí yá.

*Jñūhun yátá siquī tēe jéte trigo  
(Mt. 13.1-9; Lc. 8.4-8)*

## 4

1 Te yumar ni quejéé tucu Jesús steén yā jñūhun. Te ni cutútú cuéhē ndasí ñayuu nuū yā, te jeē yúcuan ní quīvī ya ni cucōo ya ini ñin barco nuū mar. Te tāca ñayuu un cáyūcú i yumar.

2 Te jíin jñūhun yátá ni steén yā cuehē jñūhun nuū i, te súcuan ni cahān yā:

3 Cuni nahín jíjñáhan ró: ñin tēe cate trigo, ni quenda de jeē cate de.

4 Te ná ni quejéé de jéte de, te jecu trigo ni jítē yuhíchi. Te ni quecoo saa, ni cayejí tī.

5 Te jecu gā trigo ni jítē nuū ññūhun yuū, nuū tú cuehē ññūhun. Te yachī-ni ni cane, chí tu cóquin ññūhun.

6 Te nuū ní cane niāndii, te ni ichī-ni, te ni casun, chí tu ní níhín nuū quihín yoho.

7 Te jecu gā trigo ni jítē nuū náne iñu. Te ni jehnu iñu ún, te ni jesi nuū, te tu ní jéhe nunī.

8 Te jecu ni jítē nuū ññūhun váha. Te ni cane, te ni jehnu, te ni jéhe cuehē nunī. Sava ni jéhe ocó uxí jeē ñin ñin nunī, te sava ga ni jéhe unī xíco, te sava ga ni jéhe ciento. Achí yá.

9 Yūcuán na te ni cahān yā jíin de:

Tāca róhó jéé jíni sōho, na chúsóhó ró. Achí yá.

*Najehē cahán yā máni jñūhun yátá  
(Mt. 13.10-17; Lc. 8.9-10)*

<sup>10</sup> Yūcuán na te ni quendōo máa na yā, jíin ndihúxí uū tēe cáscuáha jíin yá, jíin jecu gā ñayuu cáhīin jíin de. Te ni cacajnúhún de ya na vé cuní cahān jnúhun yátá un.

<sup>11</sup> Te ni cahān yā jíin de:

Róhó, chí sáha Yaā Dios jeē cájecūhun ni rō jnúhun ni yisāhi yáha, ndese quívicoo ñayuu ndaha ya ndacu ya jniñu nuū i. Te ñayuu jeē cáhīin sūn siquī, chí máni jíin jnúhun yátá cáhán rī tāca jnúhun jíin i.

<sup>12</sup> Súcuán cáhán rī návāha vēsú cájito i, te quendōo i nájnúhun jeē tú na vé ni cájito i. Te vēsú cájini sōho i, te ma jécūhun ni i, te ma násāma ini i quívicoo i nuū rī, te ma cóo jnúhun cáhnu ni nuū cuéchi i, áchí yá.

*Jeē ní castūhun cájí yá jnúhun yátá tēe jete trigo*

*(Mt. 13.18-23; Lc. 8.11-15)*

<sup>13</sup> Te ni cahān gā yā jíin de jíjnāhan de:

Núu tu cájecūhun ni rō jnúhun yátá yáha, ¿te ndese jecūhun ni rō tāca gá jnúhun yátá núu súcuán?

<sup>14</sup> Tēe jete trigo cúu tēe scuíté núu jnúhun Yaā Dios.

<sup>15</sup> Te trigo jeē ni jítē yuhíchi cúu nájnúhun ánuá sava ñayuu. Chí cájini nahín i jnúhun ya, te ná ni cajini i, te quíji-ni Satanás te quēnde-ni jnúhun ini anuá i.

<sup>16</sup> Te trigo jeē ni jítē nuū ñúhun yuū, chí cúu nájnúhun ánuá sava ñayuu cájini nahín jnúhun, te yachī-ni cájetáhú i te cácusī ni i jíin.

<sup>17</sup> Te tu cúcutú jnúhun ún ini anuá i, te jecu-ni quívī cájetáhú i. Te núu ni quejéé jnúndóho, chí jito xeēn ñayuu i siquī jnúhun ún, te quejéé nácani yátá ni i.

<sup>18</sup> Te jeē ni jítē nuū náne iñu cúu nájnúhun jecu gā ñayuu. Chí vēsú ni cajini sōho i,

<sup>19</sup> te cándihvī ni i siquī jeē iyó ini ñayīvi yáha. Te cácuni i cucúcá i, te stáhú un i jeē cutóo ni i siquī táca ndajniñu. Te ndihi jeē yáha cácuñēñu i jíin, te jési nuū jnúhun ya, te tu íje i jíin jnúhun ya.

<sup>20</sup> Te trigo jeē ni jítē nuū ñúhun váha cúu nájnúhun ñayuu cájini nahín jnúhun, te cájetáhú i, te cáhije i jíin jnúhun ya. Te sava i cúu nájnúhun nunī jeē jéhe ocó uxī jeē ñn ñn, te sava i jéhe unī xico, te sava ga i jéhe ciento. Achí yá.

*Jnúhun yátá siquī lámpara*

*(Lc. 8.16-18)*

<sup>21</sup> Suni ni cahān yā jíin de:

Núu nástān ñayuu ñn lámpara, ¿a chūne i chíji ñn cajón chí chíji jíto? Tuú, chí jéni i nuū sucún návāha cundijin.

<sup>22</sup> Te suni súcuán, tu íyó ni ñn jnúhun sāhi jéē ma cúni ñayuu, chí ndihi tāca jnúhun natūu ndijin te cuni ñayuu.

<sup>23</sup> Tāca róhó jéē jíni sōho, na chúsóhó ró, áchí yá.

<sup>24</sup> Te suni ni cahān yā jíin i:

Cuni sōho vāha ró. Chí cūhva jeē chusóhó ró jnúhun Yaā Dios, suni cūhva un cuáha ya nuū rō, te víhyá gā cuáha ya nuū maá ró jeē chusóhó váha ró.

<sup>25</sup> Chí ñayuu je jécūhun ni, stéén gā yā nuū i. Te ñayuu tu cándije, máa jecu jeē jíni i ún, sa suhva naa. Achí yá.

*Jnúhun yátá siquī trigo jeē jéhnu*

<sup>26</sup> Te ni cahān gā yā:

Súcuán cúu jeē ndácu Yaā Dios jniñu nuū ñayuu: Cúu nájnúhun trigo jeē ní jete ñn tēe.

<sup>27</sup> Yūcuán na te quíxí de te ndónnda de, te súcuan jíca quivī cuahān. Te trigo un cáne te jéhnū. Te máá de tu jíni de ndese cúu jeē jéhnū.

<sup>28</sup> Chī máá ñuhun sáha jeē jéhnū trigo, xihna gā yucū, sáá te cáne yoco, yūcuán na te íje máá núnī.

<sup>29</sup> Te núu ni cuaan trigo un, te quejéé ñáyuu cájehnde i, chí je ni jinū quivī tahndé. Achí yá.

*Jñuhun yátá síquī ndiquin mostaza*

(Mt. 13.31-32; Lc. 13.18-19)

<sup>30</sup> Te suni ni cahān yā:

Na cáhān rī ñn jñuhun yátá návāha cuni rō ndese ndúcuehē ñayuu jeē ndácu Yaā Dios jniñu nuū.

<sup>31</sup> Ndúcuehē i nájñuhun jéhnū ñn ndiquin mostaza jeē jequin i nuū ññuhun. Te yūcuán cúu ñn ndiquin lúli gá vésú tacá ndiquin jeē iyó.

<sup>32</sup> Te ná ni jequin i, te cáne te jéhnū ga vésú taca gá yucū, te cúnáhnū ndaha. Te tacá saa chí sáha tí tacá tí nuū cuándahū xinī ún. Achí yá.

*Jeē máni jñuhun yátá cáhān yā jíin i*

(Mt. 13.34-35)

<sup>33</sup> Te cuehē jñuhun yátá súcuan ni cahān yā jíin ñáyuu, núu nasaa cánda i jecūhun ni i.

<sup>34</sup> Te taca jéé ni stéén yā, máni máá jñuhun yátá ní cahān yā jíin i. Te nuū tēe cáscuáha jíin yá chí ni nacastūhun cájí yá jñuhun ún.

*Jeē ní jecuiñī tachī ñihin jíin mar ní sáha ya*

(Mt. 8.23-27; Lc. 8.22-25)

<sup>35</sup> Te jeē cuácuuaa quivī ún, te ni cahān yā jíin tēe cáscuáha jíin yá:

Na yáha yó quíhñ yō inga lado mar; achí yá.

<sup>36</sup> Te ni casquéndōo de ñayuu cuehē ún, te ni quivicoo de ini barco nuū je íne Jesús, cuangoo de jíin yá. Te suni cuangoo jecu gā barco jíin de jíinánhan de.

<sup>37</sup> Te ni jecuiñī ñn tachī ñihin, te ni stónnda ndute mar, te ni quivī ini barco. Te je yajni chítú ndute ini barco.

<sup>38</sup> Te Jesús cáttú yá yatā de ini barco, quíxí yā te yíhi ñn sahma cástíhi xinī yā. Te ni castónnda de ya, te ni cacahān de:

Maestro, ¿á tu sáha ní cuenta jeē quēe yó chíji ndute te cuu yō? achí de.

<sup>39</sup> Te ni ndocuiñī yā, te ni cahān yā nuū tachī ñihin un jíin núu mar:

Jecuiñī te nayúu-ni coo ró, achí yá.

Te ni jecuiñī tachī, te ni cuu nayúu í-ni.

<sup>40</sup> Te ni cahān yā jíin de jíinánhan de:

¿Naun cáyūhú ndasí ró? ¿Naun tu cácadíje ró jéé cācu ró sáha rí?

<sup>41</sup> Te yōhoyo ni cayūhú de, te ni cacahān de jíin jnánhan de:

¿Ndé ñn ga cúu tēe yáha jéé nde tachī ñihin jíin mar cájetáhú jéé cahán de? achí de.

*Tēe Gadara jeē ndóho tachī*

(Mt. 8.28-34; Lc. 8.26-39)

## 5

<sup>1</sup> Te ni jinū Jesús jíin de jíinánhan de inga lado mar, región Gadara.

<sup>2</sup> Te ná ni quenda ya ini barco un, te ñn tēe ññuhun tachī ini, ni quenda de nde nuū yíndūji ndíyí, te ni quee de nuū yá.

3 Tēe un ndéé de nuū yíndūji ndīyi. Te tu jéjníñu jeē jíhni ñayuu de, ni jíin cadena.

4 Chi cuehē jínu ni conuhnī jehē de ndaha de jíin cadena. Te tāca jínu jéhnde de, te sácuéché de. Te tú ni ñn cúndeyí jíin de.

5 Te nduú ñuú jíca de yucu jíin núú yíndūji ndīyi, te cána cóhó de, te stújí de máa de jíin yúu.

6 Te náa jíca gá vēji Jesús, te ni jito de ya. Te jínu de ni quee de nuū yā, te ni jecuiñī yití de nuū yā.

7 Te ni cana cóhó de:

¿Naun vēji ní núú ná, Jesús Sēhe Yaā Dios, Yaā cujéhnu téyí? Cáhán ndahú ná jíin ní, jíni nahín Yaā Dios, ma stóho ní sáña, áchí de.

8 Súcuau ni cahān de, chi je ni cahān Jesús:

Táchī, quenda ini tēe yáha quíhñ rō.

9 Te ni cajñūhun yá de:

¿Na vé naní ró?

Te ni cahān de:

Legión naní ná, chi cuehē tachī ñūhun ini ná, áchí de.

10 Te ni cahān ndahú ndasí de jíin yá jeē ma tájí yá tachī quendacoo región ún.

11 Te yajni yucu yúcuan cáhñin cuehē quíñí cájitu tí.

12 Te tachī jeē ñūhun ini tēe un ní cacahān ndahú jíin yá:

Núu tájí ní sáñá, te cuāha ní jñūhun quívicoo ná ini quíñí yūcuán, áchí.

13 Te Jesús ni jēhe ya jñūhun. Te ni quendacoo tachī ún ini tēe ún, te ni quívicoo ini quíñí, te íyó nájnūhun uū míl tí. Te quíñí un ní cajinu tí ni ñingoo tí ñn yucáva, ni quívicoo tí nuū mar. Te ni ndaquíhi tí ndute, ni cajihí tí.

14 Te tēe cándito tí, ni cajinu de cuangoo de jeē ní cayūhú de. Te ni jinūcoo de ni cacastūhún de nuū ñáyuu ñuu un jíin ñáyuu tāca rancho. Te cuangoo ñayuu un cuácondéhé i na vé ní cuu.

15 Te ni jinūcoo i nuū íne Jesús, te ni cajito i nuū tée ni ñuhun cuehē tachī ini. Te néne de, te ñūhun de sahna, te je ni nducájí xíní de. Te ni cayūhú ñáyuu ún.

16 Te tēe ní cajito, ni canacani de jñūhun nuū ñáyuu, ndese ni nduvāha tēe ni ñuhun tachī ini, jíin ndese ni candoho quíñí ún.

17 Yūcuán na te ni caquejéé i cácahān ndahú i jíin yá jeē na cújiyo ya región yúcuan quíhñ yā.

18 Te ni ndīvi ya ini barco. Te tēe ni ñuhun tachī ini un ní cahān ndahú de jíin yá jeē na cuāha ya jñūhun quíhñ de jíin yá.

19 Te Jesús tu ní jēhe ya jñūhun, chi ni cahān yā jíin de:

Cuánuhun vehe ró núú jñáhan ró, te nacani ró jñūhun nuū i ndese yōhoyo jéhnu jñiñu ni sáha máa Jítóho rō jíin ró, te ndese ni cundáhú ni yā rohó, áchí yá.

20 Te ni quenda de cuahān de, te ni quejéé de nácani de jñūhun tācá ñuu Decápolis ndese yōhoyo jéhnu jñiñu ni sáha Jesús jíin de. Te ndīvi ñayuu un ní canaa ni i cájini nahín i.

*Jñūhun sēhe síhí Jairo jíin ñahan ní quehé yusáhma ya (Mt. 9.18-26; Lc. 8.40-56)*

21 Te ni nayāha tucu Jesús cuanuhun yā inga lado mar jíin barco. Te ni quecoco cuehē ñayuu nuū yā, nuū íne ya yumar.

22 Te ni quee ñn tēe cújéhnu ini vehe íi sinagoga, naní de Jairo. Te ná ni jito de nuū yā, te ni jecuiñī yití de nuū jehé yā.

23 Te ni cahān ndahú ndasí de jíin yá:

Séhe síhí ná je yajni cuu i. Na quihín yō vehe ná te soó ní ndaha ní síquī i návāha na ndúvāha i te cotecu i, áchí de.

24 Yūcuán na te cuahān yā jíin de. Te cuehē ñayuu cándiquīn i ya, te ni chitú nihin i xiin ya cuango i.

25 Te mēhñu ñayuu un cuáhān ñin ñahan cúhú, jeē ní cuu uxī uū cuiyā ndóho ña cuehyī niñī.

26 Te yōhoyo ni ndoho ña, chi ni jexin ña tāca jéē névāha ña jíin cuehē tēe tájna, te tu ní jéjnñu jeē ndúvāha ña, chí sa suhva víhyá gā sáha.

27 Te ñahan yáha ná ni nihín ña jñūhun Jesús, te ní quee ña ichi yátá yā mēhñu ñayuu cuehē ún, te ni quehé ña yusáhma ya.

28 Chi ni jeni ni ña: Vēsú maá sahma ya na níhín rī quehé rí, te nduvāha rí, jéni ni ña.

29 Te ni jecuiñī-ni niñī ña, te ni jini ña jeē ní nduvāha ña cuehyī ún.

30 Te Jesús ni jini yā jeē ní nduvāha ñin ñayuu jíin fuerza yā. Te ni ndió cóto ya nuū ñayuu cuehē, te ni cahān yá:

¿Ndé ñin ni quehé sahma rí? Achí yá.

31 Te tēe cáscuáha jíin yá, ni cacahān de:

Jító ní jéē ñayuu cuehē yáha ní chitú nihin i xiin ní te cáquīhī i níhín ní cáni ichi, te cájnūhun ní ndé ñin ni quehé sahma ní.

32 Te máá yá jító ya cháha chúcuan, cúní yā jeē na cáchi ñayuu ni sáha.

33 Te ñahan un yúhú ña te quisi i ña, te je jíin ña jeē ní nduvāha ña. Te ni quee ña, te ni jecuiñī yiti ña nuū yā, te ni cachí ña ndihí ndese ni cuu jíin ña.

34 Te ni cahān yā jíin ña:

Séhē, ni candíje ró jéē cuu nasávāha ri rohó, te jeē yúcuan ní nduvāha ró. Cuáhān te na ndúsī ní ró, chí je ni nduvāha ró cuehyī ní ndoho ró, áchí yá.

35 Te níni cáhán gā yā súcuan, te ni quecoo ñayuu cáyūcú vehe tēe cújéhnu ini vehe iī sinagoga, te ni cacahān i jíin de:

Je ni jíhī séhe síhí ní. Te ma sajnēñu ga ní Maestro, achí i.

36 Te Jesús tu ní sáha ya cuenta jeē súcuan cácahān i, te ni cahān yā jíin tēe cújéhnu ini vehe iī sinagoga:

Ma yūhu ró, chí candíje ró jéē nastécu rī i, áchí yá.

37 Te tu ní jéhe ga yā jñūhun condiquīn ñayuu yā, chí máá-ni Pedro jíin Jacobo, jíin Juan ñani Jacobo.

38 Te ni jinū yā vehe tēe cújéhnu ini vehe iī sinagoga, te ni jito ya ñayuu, cácuvaā i, te cándahyū i, te cácana cóhó i.

39 Te ni quiví ya, te ni cahān yā:

¿Najehē yōhoyo cásaavaā rō te cándahyū rō? Sūchi síhí yáha, tu ní jíhí i, chí quixí-ni i, áchí yá.

40 Te ni cajecú catá i jeē ni cáhān yā. Te ni quenehen ndihí ya i cuahān i nuū quéhe. Te ni cana ya máá-ni tátá jíin náná sūchi síhí un, jíin tēe cáhīn jíin yá, te ni quiví ya jíin de nuū catú sūchi síhí ní jíhí ún.

41 Te ni jñū ya ndaha i, te ni cahān yā jíin i:

Talita cumi, achí yá. Te jñūhun un cúní cahān: Síhī, cáhán rī jíin ró, ndocuiñī, achí yá.

42 Te ni ndocuiñī-ni sūchi síhí un, te ni nacaca i, chí je iyó i uxī uū cuiyā. Te yōhoyo ni canaa ni ñayuu cájito i.

43 Te ni ndacu nihin ya jññu nuū i jíjnāhan i jeē ma cáchi cuiti i nuū ni ñin. Te ni cahān yā jeē na cuáha ña jeē cáji sūchi síhí.

*Jeē cuánuhun yā ñuu Nazaret  
(Mt. 13.53-58; Lc. 4.16-30)*

## 6

<sup>1</sup> Te ni quenda Jesús yūcuán, te cuanuhun yā ñuu yā. Te tēe cáscuáha jíin yá cuangoo de jíin yá.

<sup>2</sup> Te máá quíwī ndétatu ní steén yā jnūhun ini vehe iī sinagoga. Te cuehē ñayuu ní canaa ní i cájini nahín i, te ní cacahān i:

¿Ndé nuū ní cutūhva tēe yáha tāca jnūhun yáha? ¿Te ndese cúu jeē cahán de jnūhun ndíchí yáha jíin jéē sáha de jniñu jéhu yáha?

<sup>3</sup> Chi tēe yáha cúu carpintero, te sēhe María cúu de, te ñani Jacobo jíin José jíin Judas jíin Simón cúu de. Te suni cáyūcu cuáha de jíin yó yāhá. Achí i.

Te súcuan ní cacujéē ní i nuū Jesús.

<sup>4</sup> Te ní cahān yā jíin i:

Tāca tēe nácani jnūhun Yaā Dios, íyó yíñúhún ñayuu jíin de, chi máni ñayuu ñuu maá de, jíin jnāhan de, jíin ñáyuu vehe de cúu jeē tu íyó yíñúhún jíin de. Achí yá.

<sup>5</sup> Te tu ní cúu sáha ya cuehē jniñu jéhu yūcuán. Chi jecu-ni ñayuu cácuñu ní soó yá ndaha ya siquī i, te ní nasávāha ya i.

<sup>6</sup> Te náá ní yā jíto ya jeē tu cácandíje ñayuu jijnáhan i. Yūcuán na te ní jica cuu ya táca ñuu yajni, ní steén yā jnūhun.

*Jeē ní tají yá ndihúxí uū de cuanacani de jnūhun  
(Mt. 10.5-15; Lc. 9.1-6)*

<sup>7</sup> Te ní cana ya ndihúxí uū tēe cáscuáha jíin yá, te ní tají yá ndihuū ndihuū de quingoo de. Te ní sáha ya jeē cóndiso jniñu de quenehen de tachí ini ñayuu.

<sup>8</sup> Te ní ndacu ya jeē tú na vé condiso de jeē cuajniñu de ichi, ní ñumu, ní staā, ní xūhún. Chi máá vara-ni condahá de.

<sup>9</sup> Te quihí de ndijēn, te ma quihín de jíin uū sahma, áchí yá.

<sup>10</sup> Te suni ní cahān yā jíin de:

Na-ni vehe núu ní quíwīcoo ró, te yūcuán coyūcu ró ndé quenda tucu ró quíhīn rō inga ñuu.

<sup>11</sup> Te núu iin ñuu tu cájetáhú i róhó, ní tu cúní i cuni nahín i jnūhun cahān rō, na quéndacoo ró yúcuo, te scóyo ró tícachā jehē rō, te súcuan stéén rō jeē íyó cuéchi i jeē tu ní cájetáhú i. Jendaá cahán rī jíin ró jeē quíwī coo juicio te xeēn gā coo castigo siquī ñuu casáha súcuan vésú siquī ñuu Sodoma jíin ñuu Gomorra nuū ní casáha ndasí ñayuu cuéchi.

<sup>12</sup> Te ní quendacoo de cuahān de, te ní canacani de jnūhun jeē na nácani ní ñayuu jeē stóo i cuéchi i.

<sup>13</sup> Te suni ní caquenehen de cuehē tachí ini ñayuu. Te ní cachihí de aceite cuehē ñayuu cácuñu, te ní canduvāha i.

*Jeē ní jhī Juan tēe scuándute  
(Mt. 14.1-12; Lc. 9.7-9)*

<sup>14</sup> Te rey Herodes ní jini jnūhun de jnūhun Jesús, chi ní jitē núu jnūhun ya ní cáhnu. Te ní cahān de:

Tēe yúcuo cúu Juan tēe ní scuándute, te ní natecu de. Jeē yúcuo íyó poder de sáha de jniñu jéhu. Achí de.

<sup>15</sup> Te sava ga ñayuu ní cacahān i:

Tēe un cúu Elías jeē ní nacani jnūhun jenahán.

Te sava ga i ní cacahān:



Tuú chí ìn tēe nácani jnūhun Yaā Dios cúu de, nájñūhun tēe ni canacani jnūhun ya nde jenahán, áchí i.

<sup>16</sup> Te ná ni jini Herodes, te ni cahān de:

Tuú chí yūcuan cúu Juan jeē ní ndacu ri jniñu ni tahndē xinī, te ni natecu de núu súcuan, áchí de.

<sup>17</sup> Chí máá Herodes ni ndacu de jniñu jeē na quívi Juan vecāa, jíin jéē na cónuhñi de jíin cadena. Súcuan ní sáha de jeē siquí Herodías, ñasihí ñani de Felipe. Chí Herodes ni quihin de ña jeē cúu tucu ña ñasihí de.

<sup>18</sup> Te Juan ni cahān de nuū Herodes:

Tu íyó ley jeē cóndeca ró ñasihí ñani rō, achí de.

<sup>19</sup> Te jeē yūcuan Herodías ní jito uhū ña Juan, te cúní ña jeē na cúu de, te tu ní nhín ña modo.

<sup>20</sup> Chí Herodes yúhú de cahni de Juan, chí jíin de jeē tēe ndaā tēe ndoo cúu Juan. Te jeē yūcuan ní jesi de jeē nducú ña jeē cúu Juan. Te nújnahan ní de jíin nahín de jnūhun cáhán Juan, vésú tu jécūhun vāha ní de.

<sup>21</sup> Te ní quee ìn quívi jeē ní cundeyí Herodías. Chí ní sáha Herodes ìn vico quívi ní cacu de, te ní jēhe de jeē ní cacuxíni tēe cándiso jniñu nuū de, jíin tēe cácuu capitán, jíin tēe cácujuhnu región Galilea.

<sup>22</sup> Te ní quívi sēhe síhí máá Herodías, ní jita jéhé i nuū chitú un. Te ní cacusí ñi rey Herodes jíin tēe cácuuxíni jíin de. Te ní cahān de jíin súchi síhí un:

Cacān na vé cuní rō, te cuāha ri nuū rō, achí de.

<sup>23</sup> Te ní cahān teyí de jeē cuāha de núu na vé cuní i cacān i, vésú nde sava región jeē yíhi ndaha de.

<sup>24</sup> Te ní quenda i, ní jecajñūhún i náná i:

¿Na vé cacān na núu de? áchí i.

Te ní cahān ña:

Xinī Juan tēe scuándute cacān rō nuū de, áchí ña.

<sup>25</sup> Yūcuán na te ní ndívi-ni i nuū rey, te ní cahān i:

Cúní na jéē vijna ñúhún-ni cuāha ní xinī Juan tēe scuándute, cone nuū ìn cohō, achí i jíin de.

<sup>26</sup> Yūcuán na te ní cucuíhyá ndasí ni rey un jeē ní cundeyí Herodías jeē cúu Juan. Te siquí jeē ní jéjñūhun téyí de, jíin jéē ní cajini sōho tēe cáyeji staā jíin de, jeē yūcuan tu ní cúní de sásáhán de jeē ní jícān i.

<sup>27</sup> Te ní tají-ni de ìn soldado jeē quíquihin de xinī Juan.

<sup>28</sup> Te ní jehēn soldado un vecāa, te ní jehnde de xinī Juan. Te ní quee de jíin xinī Juan, íne nuū ìn cohō. Te ní jēhe de nuū súchi síhí un, te máá i ní jēhe i nuū naná i.

<sup>29</sup> Te tēe cácuāha jíin Juan ní canihín de jnūhun, te ní jengoo de, ní candonehen de yíqui cúñu Juan, te ní cachindūji de.

*Jeē ní scáji yā uhūn mil tēe*

*(Mt. 14.13-21; Lc. 9.10-17; Jn. 6.1-14)*

<sup>30</sup> Yūcuán na te tēe cácuu apóstol jeē ní tají yá cuango nacani jnūhun, ní ndecoo de nuū Jesús. Te ní canacani de nuū yā tácá jniñu ní casáha de, jíin jnūhun ní castéén de.

<sup>31</sup> Te ní cahān yā jíin de:

Na quíngoo yó ìn lugar nuū tú ñayuu, te ndetātu yó jecu, achí yá.

Chí cuehē ñayuu cuahān i vēji i nuū yā, te ní tu ní núne ya jeē cáji yā staā jíin de.

<sup>32</sup> Yūcuán na te ni quívi ya ñn barco jíin táca téé apóstol un, te cuangoo sñn ya jíin de ñn lugar nuū tú ñayuu.

<sup>33</sup> Te cuehē ñayuu ni cajito i jeē cuahán yā jíin de, te ni canacuni i jeē maá yá cúu. Te nde táca ñuu ni quendacoo i, te yachí cuangoo i, te xihna gā i ni jinūcoo vēsú maá yá.

<sup>34</sup> Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yá i, chí cúu i nájñuhun lanchi jeē tú jito ho tí. Te ni steén yā cuehe jñuhun nuū i.

<sup>35</sup> Te nuū ní ini, te téé cáscuáha jíin yá, ni quecoo de nuū yā, te ni cacahān de:

Je ni ini, te yāhá chí tú na ñayuu yúcu.

<sup>36</sup> Núu súcuan te tají ní ñayuu na quíngoo i táca rancho jíin ñuu yajni, te cuaan i staā caji i, chí tú na vé cándiso i caji i, áchí de.

<sup>37</sup> Te ni cahān Jesús jíin de:

Cuāha máá ró jeē caji i, áchí yá.

Te ni cacahān de:

¿Te ndese cuu? Chí ni ma cúu vēsú núu quicuaan ná ndé uū ciento denario staā caji ñayuu, áchí de.

<sup>38</sup> Te ni cahān yā jíin de:

¿Nasaa staā cánevāha ró? Cuacondēhe, áchí yá.

Te nuū ní cajini de, te ni cacahān de:

Uhūn-ni staā jíin úu chācá íyó, áchí de.

<sup>39</sup> Yūcuán na te ni cahān yā jíin ñayuu jeē na cúcōo sñn i cuenta grupo nuū íte.

<sup>40</sup> Te ni cacucōo sñn ciento ciento i, jíin cincuenta cincuenta i.

<sup>41</sup> Te ni quihñ ya ndihúhún staā jíin úu chācá un, te ni ndacoto ya ichi ándiví, te ni nacuatáhú yá. Te ni tahu cuéchi yá staā ún, te ni jēhe ya nuū téé cáscuáha jíin yá, te máá de ni casaja de nuū ñayuu cuehē ún. Te suni ni jēhe ya ndíndúu chācá, ni casaja de nuū i.

<sup>42</sup> Te ndivii i ni cayejí, te ni candutú chíji i.

<sup>43</sup> Yūcuán na te ni canastútú de pedazo staā jíin chāca jéé ní quendōo, te ni chítú úxí uū jica.

<sup>44</sup> Te téé ni cayejí, chí uhūn mil de cúu.

*Jeē ní jica jéhé yá nuū mar*  
(Mt. 14.22-27; Jn. 6.16-21)

<sup>45</sup> Yūcuán na te ni cahān-ni Jesús jíin téé cáscuáha jíin yá jeē na quívicoo de barco, te cosnúu de yāha de inga lado mar ñuu Betsaida. Te máá yá chí natají yá ñayuu quinhun i, te sáá te suni quihñ yā.

<sup>46</sup> Te nuū ní cuu ni natají yá i, te ni caa ya yucu cuacacān tahu yā.

<sup>47</sup> Te jeē ní cuaa, te barco un je ni cuu sava nuū mar cuahān, te máñuhún-ni ya ni quendōo nuū ñuhun íchi.

<sup>48</sup> Te ni jito ya jeé yóhyo jñúndóho cáscaca de barco, chí nñhin vėji tachí ichi núu de. Te jeé yínee gā ni quee ya nuū de, jica jéhé yá nuū mar. Te yāha ya nuū de quihñ yā nuú.

<sup>49</sup> Te ni cajito de jeé jica ya nuū mar, te ni cajeni ni de jeé jhna cúu, te ni cacana cóhó de.

<sup>50</sup> Chí ndihí de ni cajito nuū yā, te ni cayuhú ndasí de. Te ni cahān-ni ya jíin de:

Ndeyí coo ni rō, te ma yūhu ró, chí máá rí cúu, áchí yá.

<sup>51</sup> Te ni quīvi ya ini barco un, te ni jecuiñi-ni tachī. Te yōhyo ni canaa ni de cájito de.

<sup>52</sup> Chi cándaā neé gá jeē njñnūnī de, chi ni jín jniñu jéhu jeē ní nducuehē staa, tu ní cájecūhun ni de jeē maá yá cúu Yaā ní tají Yaā Dios.

*Jeē ní nasávāha ya ñayuu cácuñū región Genesaret  
(Mt. 14.34-36)*

<sup>53</sup> Te ni quenda jíyo ya jín de nuū mar ún, ní jinū yā región Genesaret. Te yundúte un ní cajihni de barco.

<sup>54</sup> Te nuū ní quenda ya jín de ini barco, te ñayuu yúcuān ni canacuni-ni i ya.

<sup>55</sup> Te yachī ní jengoo i táca ndañūū yūcuán, te ni caquindeca i ñayuu cácuñū, cáyosó i nuū camilla, vējicoo ñayuu nuū ní jito i íne ya.

<sup>56</sup> Te ndé-ni cúu-ni núu ni quīvi ya, núu ñuu lulí, chí ñuu cáhnu, chí rancho, te cájequin i ñayuu cácuñū yuhíchi, te cácahān ndahú i jín yá jeē na quéhé i vēsú yusáhma ya. Te táca ñayuu jeē ní caquehé sahma ya, ni canduvāha-ni i.

*Siquī ndese cújnéhén ñayuu  
(Mt. 15.1-20)*

## 7

<sup>1</sup> Yūcuán na te tēe grupo fariseo jín jecu tēe cástéén tutu ley Yaā Dios, ni quendacoo de ñuu Jerusalén, te ni quecoo de nuū Jesús.

<sup>2</sup> Te tēe un ní cajito de jeē sava tēe cáscuáha jín Jesús, ni cayeji jnehén de staa, chi tu ní cáscuicu de costumbre jeē nándahá de nuū Yaā Dios. Te ni cacahān siquī de.

<sup>3</sup> Chi tēe fariseo jín ndihi ñayuu hebreo, névāha i costumbre jenahán jēe ma cáji i staa núu tu nandahá váha i xihna gā.

<sup>4</sup> Te núu ni ndecoo i jeē ní jéngoo i nuū yáhu, te tu cáyeji i te núu tu nandahá i. Te íyó cuéhē gā costumbre jenahán jeē casquicu i, nájnūhun jeē ndúndoo taza, tindohō, cohō cáa, jín jíto.

<sup>5</sup> Te tēe fariseo jín tēe cástéén tutu ley Yaā Dios, ni cacajñūhún de ya:

Tēe cáscuáha jín ró, ¿naun tu cáscuicu de costumbre ñayuu jenahán? Chi sa cáyeji jnehén de staa, achí de.

<sup>6</sup> Te ni cahān yā jín de:

Ndaā ni nacani Isaías jñūhun siquī rō jijñāhan ró jēe tēe stáhú-ni cácuu ró. Chi súcuān ni tee de jñūhun ni cahān Yaā Dios nde jenahán:

Ñayuu yáha chi máá yuhu-ni i cájetáhú i ruhū, te nasūu ndé jín ini jín ánuá i.

<sup>7</sup> Te cáchiñúhún sáá-ni i ruhū, chí jñūhun cástéén i cúu jniñu ní candacu tēe, te nasūu jēe ní ndacu máá rí cúu.

Achí Yaā Dios. Achí Isaías.

<sup>8</sup> Súcuān cácuu ró, chí ni casiáá rō jniñu ní ndacu Yaā Dios nuū rō, te cáscuicu ró costumbre jeē ní cajequin ñayuu, jeē ndúndoo tindohō jín taza. Te cuéhē gā costumbre súcuān cáscuicu ró, achí yá.

<sup>9</sup> Te suni ni cahān yā:

Cásiáá rō jniñu ní ndacu Yaā Dios, návāha squicu ró costumbre ni cajequin máá ró.

<sup>10</sup> Chi Moisés ni cahān de: Coó yíñúhún ró jín tátá rō jín náná rō. Te núu ndé ññ cahān siquī tatá chí siquī naná, na cúu nahín. Achí Moisés.

11 Te máá ró chi cácahān rō jeē cuu cahān iin tēe jīn tātá de náná de: Ma cúu chindéé ñáhán ná nihín cuáha na jéé cáji ni jéé cúhun ní, chi ndihí jeē névāha ná, chi Corbán cúu, áchí rō. (Te jnūhun Corbán cuní cahān jeē ni sócō nuū Yaā Dios.)

12 Te cácahān rō jeē núu súcuan cahān iin tēe, te tuá cánuú chindéé ñáhán de tātá de náná de.

13 Te súcuan cástívi rō jniñu ní ndacu Yaā Dios, jeē siquí costumbre ni cajequin ñayuu jenahán vēji. Te cuehē gā jniñu súcuan cásaáha rō, áchí yá.

14 Te ni cana tucu ya ñayuu cuehē ún, te ni cahān yā jīn i:

Cuni sōho vāha rō jijnáhan rō, te chuhun ni rō:

15 Tāca jéé iyó, te núu ni quívi yuhu ñayuu te tu cújnehén i sáha. Chi jeē quénda ini anuá ñayuu, yūcuan cúu jeē cujnehén i sáha.

16 Tāca rōhó jéé jini sōho, na chúsóhó rō, áchí yá.

17 Te ni stóo ya ñayuu cuehē ún, te ni quívi ya ini vehe. Te tēe cáscuáha ún, ni cacajñuhún de ya siquí jnūhun yátá yáha jéé ni cahān yā.

18 Te ni cahān yā jīn de:

¿A máá ró suni ná tu jecūhun ni rō, chí naún? ¿A tu cájini rō jeē tāca jéé quívi ini ñayuu, ma cúu cujnehén i sáha?

19 Chi tu quívi ini anuá i, chí chíji i quívi, te quénda-ni cuahān, achí yá.

Súcuan ni steén yā jeē tāca jéé yéji ñayuu, tu cújnehén ánuá i sáha.

20 Te ni cahān gā yā:

Jeē quénda ini anuá ñayuu, yūcuan cúu jeē cujnehén i sáha.

21 Chi nde ini anuá ñayuu quénda jeē jéni néé ni, jeē casiquí ndéé jnāhan, jeē jíca jnéni, jeē jéhni ndíyi,

22 jeē sacuíhná, jeē ndíyo ni ndajniñu jnāhan, jeē sáha néé, jeē stahú jnāhan, jeē máni cuéchi sáha, jeē cucuésún ni, jeē cahán yā siquí jnāhan, jeē sandúxi máá, jeē canéé xini.

23 Tācá jniñu néé yáha, máni ini anuá ñayuu quénda, te cújnehén i sáha, áchí yá.

### *Ñahan inga nación jeē ní candíje nñhin*

*(Mt. 15.21-28)*

24 Te ni quenda ya yūcuan cuáhān yā región Tiro jīn Sidón. Te ni quívi ya iin vehe, te cuní yā jeē tú ni iin ñayuu cuni jeē íne ya yūcuán. Te vésú súcuan, te tu ní cúu cone sáhi yá.

25 Te iin ñahan íyó séhe síhí ña jeē ñūhun tachí ini i, ni nihīn-ni ña jnūhun jeē íne ya. Te ni quee ña, te ni jecuíñi yití ña nuū jehé yá.

26 Te ñahan ñuu jíca cúu ña, chi nde Sirofenicia cúu nación ña. Te ni cahān ndahú ña jīn yá jeē na quénehen ya tachí ini séhe síhí ña.

27 Te ni cahān Jesús jīn ña:

Nasūu núu máá ní vēji ná, chí máni nuū ñáyuu cácuu séhe Israel. Chi tu íyó vāha jeē quénde yō staá séhe te cuáha yó núu ína, achí yá.

28 Te ni cahān ña:

Jendaá cahán ni Tātá, te chindéé ñáhán ní saña vésú cúu ná nájñuhun ina. Chí suni máá tí cáhīn tí chíji mesa, cánihīn tí staá cuechí jéé cóyo yuhu sūchi lúli cáyeji tí, achí ña.

29 Yūcuán na te ni cahān yā jīn ña:

Vāha ni cahān ní. Cuáhán ní núu súcuan, chí je ni quenda tachí ún ini séhe síhí ní, achí yá.

30 Te ni najinū ña vehe ña, te ni jito ña jeē catú sēhe síhí ña nuū jíto, te je ni quenda tachī ún ini i.

*Jeē ní nasávāha ya ñn tēe sóhó cástété*

31 Te ni quenda tucu ya región Tiro, ni yāha ya Sidón jíin táca ñuu Decápolis, te ni jinū yā mar Galilea.

32 Te ni caquindeca i ñn tēe sóhó cástété nuū yā, te ni cacahān ndahú i jíin yá jeē na sóo yá ndaha ya siquī de.

33 Te ni quenehen síin ya de nuū ñáyuu cuehē ún, te ni chune ya xinī ndáha ya sōho de, te ni tesíhi yá, te ni quehé yá yaá de.

34 Te ni ndacoto ya ichi ándiví, te ni jítu ni yā, te ni cahān yā:  
Efata, achí yá, jeē cuní cahān: Nanune.

35 Te ni nanune-ni sōho de, te ni nduvāha yaá de, te ni nacahān vāha de.

36 Te ni ndacu ya jniñu nuū ñáyuu un jéē ma cáchi i nuū ní ñn. Te vēsú ni cahān ñihin ya jíin i, te víhyá gā ni cajete i jnūhun.

37 Te yōhyo ni canaa ni i cájito i, te ni cacahān i:

Vāha sáha ya táca jniñu, chí nde tēe cásohó, cánacuni sōho de, te tēe cándāa ñhín, cánacahān vāha de sáha ya, achí i.

*Jeē ní scáji yā cuūn mil ñayuu  
(Mt. 15.32-39)*

## 8

1 Te tiempo un ní candutútú cuehē ndasí ñáyuu, te tuá na vé caji i. Te ni cana Jesús tēe cáscuáha jíin yá, te ni cahān yā:

2 Cúndáhú ni rī ñayuu yāhá, chí je ni cuu unī quiví cáyūcú i jíin rí, te tuá na vé caji i.

3 Te núu natajī rí i quinhun ndite i vehe i, te cuūta í i sava ichi, chí íyó sava i jeē jicá véjicoo i, achí yá.

4 Te tēe cáscuáha un ní cacahān de:

¿Te ndé nuū ñhín yō staā caji i jíjnāhan i? Chí yāhá tú na ñayuu yúcu, achí de.

5 Te ni cajnūhun yá de:

¿Nasaa staā cánevāha ró?

Te ni cacahān de:

Uxā-ní, achí de.

6 Yūcuán na te ni cahān yā jíin ñáyuu cuehē un jéē na cúcōo i. Te ni quihin ya ndihúxá staā ún, te ni nacuatáhú yá nuū Yaá Dios. Te ni tahú cuechí yá, te ni jēhe ya nuū tēe cáscuáha jíin yá. Te máá de ni casaja de nuū ñáyuu cuehē ún.

7 Te suni cándiso de jecu chācá lúlí. Te ni nacuatáhú yá siquī, te ni cahān yā jeē suni saja de jíjnāhan de.

8 Te ndihi i ni cayeji, te ni candutú chíji i. Yūcuán na te ni canastútú de pedazo jeē ní quendōo, te ni chítú úxā jíca.

9 Te tēe ni cayeji un, íyó nájñūhun cuūn mil de. Te ni nacuatáhú yá nuū ñáyuu ún, te cuanungoo i.

10 Yūcuán na te ni ndiví-ni ya ini barco jíin tēe cáscuáha jíin yá, te cuahān yā región Dalmanuta.

*Jeē ní cajicān de ñn jniñu jéhu nuū yā  
(Mt. 16.1-4; Lc. 12.54-56)*

11 Yūcuán na te ni quecoo tēe grupo fariseo, te ni caquejéé de stíchí de Jesús. Te cáconi de coto ndee de ya, te ni cajicān de jeē sāha ya ñn jniñu jéhu jeē coo ñn seña ichi ándiví.

12 Te ni jitú ni yā siquī jeē tu cácandíje de jíjnáhan de, te ni cahān yā:

¿Naun cájicān ñayuu yáha ñn jniñu jéhu nuū rí? Jendaá cahán rí jeē ma stéén rí ñn jniñu jéhu nuū ñayuu yáhá.

13 Te ni squéndōo ya de jíjnáhan de, te ni ndīvi tucu ya ini barco, te cuahān yā inga lado mar.

### *Jñuhun levadura tēe fariseo*

(Mt. 16.5-12)

14 Te tēe cáscuáha jíin yá ni canaa ni de condiso de jeē cáji de, chí ñn-ni pan cánevāha de ini barco.

15 Te ni ndacu ya jniñu nuū de:

Coto má candíje ró levadura tēe grupo fariseo jíin levadura Herodes, achí yá.

16 Te ni cacahān tēe cáscuáha un jíin táca jnáhan de:

Va siquī jeē tú na staā ndíso yó, jeē yúcuán cáhán yā súcuán, áchí de.

17 Te ni jini Jesús, te ni cahān yā:

¿Najehē cándajnūhun ró jeē ni cáhán rí súcuán siquī jeē tú na staā cándiso ró? ¿A ná tu cuni rō, á ná tu jecūhun ni rō jeē tu ní cáhán rí súcuán siquī jeē tu cándiso ró stáā? ¿A yóhyo uun ni rō candíje ró?

18 Iyó tinūu ró ¿te á tu cájito ró? Iyó sóho ró ¿te á tu cájini ró? ¿Te á tu cánućūhun ni rō?

19 Chí ná ni tahú cuéché rí uhūn staā ni cayejí uhūn mil tēe, ¿te nasaa jíca ni chitú pedazo staā jeē ní canastútú ró? Achí yá.

Te ni cacahān de:

Uxī uū jíca, áchí de.

20 Te suni súcuán ná ni tahú cuéché rí uxā staā ni cayejí cuūn mil tēe, ¿te nasaa jíca ni chitú pedazo staā jeē ní canastútú ró? Achí yá.

Te ni cacahān de:

Uxā jíca, áchí de.

21 Te ni cahān yā jíin de:

Te nde vjna ¿á ná tu jecūhun ni rō jíjnáhan ró?

Súcuán ni cahān yatá yá jeē ma cándíje de jñuhun stáhú cástéén tēe ún.

### *Jeē ní nasávāha ya tēe cuáá ñuu Betsaida*

22 Yūcuán na te ni jinū yā jíin de ñuu Betsaida. Te ni caquindeca ñayuu ñn tēe cuáá núu yā, te ni cacahān ndahú i jíin yá jeē na tēe ya ndaha ya nuū de.

23 Yūcuán na te ni jññi ya ndaha tēe cuáá un, te ni quenehen ya de yatā ñūú ún. Te ni tee ya tesíhi yá tinūu de, te ni tee ya ndaha ya siquī. Te ni cajñuhun yá de núu cuu coto de jecu.

24 Te ni ndacoto de, te ni cahān de:

Jito ná ñayuu jeē cájica i, te tu jito cájí ná, chí ná cáa yujnu cáa i, áchí de.

25 Yūcuán na te ni tee tucu ya ndaha ya siquī tinūu de. Te ni ndacoto vāha de, te ni nduvāha-ni tinūu de, te ni jito cájí de ndíhi-ni.

26 Te ni natají yá de quinhun de vehe de, te áchí yá:

Ma quívi ró ñuu, ni ma cáchi cuiti rō nuū ní ñn, áchí yá.

### *Jeē ni cáhán Pedro jeē Jesús cúu Cristo*

(Mt. 16.13-20; Lc. 9.18-21)

<sup>27</sup> Yūcuán na te Jesús jíin tée cáscuáha jíin yá, cuahān yā tācá ndañúū Cesarea Filipino. Te ichi un ní cajñūhun yá de:

Ruhū, ¿ndé ñn cúu rí cácahān ñayuu?

<sup>28</sup> Te ní cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jñūhun Yaā Dios nde jenahán. Te sava ga i cácahān jeē ñnga tēe ni nacani jñūhun Yaā Dios cúu ní.

<sup>29</sup> Yūcuán na te ní cajñūhun yá de:

Te máá ró, ¿ndé ñn cúu rí cácahān rō?

Te ní cahān Pedro:

Máá ní cúu Cristo, Yaā ní tají Yaā Dios, achí de.

<sup>30</sup> Te ní ndacu ya jñiñu nuū de jíjnáhan de jeē ma cáchi de jñūhun yáha nuū ní ñn ñayuu.

*Jeē ní castühún Jesús jeē cúu yā*

*(Mt. 16.21-28; Lc. 9.22-27)*

<sup>31</sup> Te ní quejéé yá steén yā nuū de:

Máá rí, Yaā ní nduu tēe, cánuū ndoho xeēn rī. Te tāca tée jéhu jíin sūtū cácujeñhu jíin tée cástéén tutu ley, squéhichí de ruhū, te cahni de ruhū. Te nuū uní quiví te natecu rī, achí yá.

<sup>32</sup> Te cájí ní cahān yā jñūhun yáha. Yūcuán na te Pedro, ní cana máñúhún de ya, te ní quejéé de cáhán de nuū yā jeē ma cuáha ya jñūhun coo súcuan.

<sup>33</sup> Te máá yá ní ndió cóto ya ní jito ya nuū tée cáscuáha jíin yá. Te ní cahān yā nuū Pedro:

Cujiyo quihīn rō, chí cáhán rō ná cáhán Satanás. Chí tu jéni ní rō nájnūhun jéni ní Yaā Dios, chí sa suhva jéni ní rō nájnūhun cájeni ní ñayuu, achí yá.

<sup>34</sup> Te ní cana ya tée cáscuáha jíin yá jíin ñáyuu cuehé ñn, te ní cahān yā:

Na-ni ñayuu núu cúní i condiquīn i ruhū, na cási i jeē cuní maá i, te na cóndiquīn i ruhū te cuāha i jñūhun ndoho i jñúndóho jeē síquí rī, vésú na cúu i.

<sup>35</sup> Chí núu ndé ñáyuu cuní i cácu i nuū jñúndóho quiji nuū i jeē síquí ruhū, núu súcuan te jnahnū ndetū i ní cáni. Te núu ndé ñáyuu, vésú na cúu i jeē síquí ruhū jíin síquí jeē scáca i jñūhun jeē jnáma rí ñayuu, núu súcuan te cotecu i ní cáni.

<sup>36</sup> ¿Chí ndé cuajñiñu vésú na cúndeyí ñáyuu nihīn i ní ñáyiví, te núu quiví i nuū jnahnū ndetū i?

<sup>37</sup> Chí tú na jíin cuiñi chunaa ñayuu jeē cácu ánuá i.

<sup>38</sup> Te ñayuu yáha tu cácanñe cuiñi i, te máni máá cuéchi cása ha i. Te núu na-ni ñayuu cúcanu i nuū ñáyuu yáha jeē síquí ruhū, Yaā ní nduu tēe, jíin síquí jñūhun cáhán rī, suni súcuan cucanu rī jeē síquí máá i, quiví ndíji rí jíin táca ndajéhé ndoo rí. Te quiví ún chí yóhoyo luu cujéñhu rí nájnūhun cújéñhu Tátá rī. Achí yá.

## 9

<sup>1</sup> Te suni ní cahān yā jíin de jíjnáhan de:

Jendaá cahán rí jíin rō jeē sava tēe cáhīn yáha, ma cúu de chí nde cuni de jeé ndácu Yaā Dios jñiñu jíin poder yá, achí yá.

*Jeē tucu ní nduu ya*

*(Mt. 17.1-13; Lc. 9.28-36)*

<sup>2</sup> Yūcuán na te nuū iñú quiví te Jesús ní jeca ya Pedro jíin Jacobo jíin Juan, cuahān sñn ya jíin de ñn yucu súcún. Te yūcuán, tucu ní nduu ya nuū de.

<sup>3</sup> Te sahma ya ni ndindēé, te ni nducujín quiyi, nájñuhun yuhvā volcán. Te tú ni ñin ñayuu ñayivī yáha cuu nacate jeē ndúquiyi ndasí súcuan.

<sup>4</sup> Te ni cajito de jeē Elías jiín Moisés cándajnūhún de jiín yá.

<sup>5</sup> Yūcuán na te ni cahān Pedro jiín Jesús:

Maestro, nacā jeē váha jeē cáhīn na yáha. Te na sáha ná únī vehe ramada, ñin cuu máá ní, inga cuu Moisés, te inga cuu Elías, achí de.

<sup>6</sup> Chi yōhyo ni cayūhu téé cáscuáha ún, te Pedro tu ní sáha de cuenta na vé cúu jeē cahán de.

<sup>7</sup> Te ni quiji vicó nūhun ní jesi-ni nuū de. Te nuū vicó un ní cahān ñin jñuhun: Yáha cúu Sēhe ri jeē maní ndasí rí jiín. Te na cúni nahín ró jñuhun cáhán yā. Achí.

<sup>8</sup> Te ni candacoto-ni de, te tuá tēe un ní cájito de, chi máá ñin na Jesús.

<sup>9</sup> Te ni cananuu de jiín yá yucu ún. Te ni ndacu ñihin ya jñiñu nuū de jeē ma cáchi de nuū ní ñin jeē súcuan ni cajito de, chi nde na nátecu máá yá, Yaā ní nduu tēe, achí yá.

<sup>10</sup> Jeē yúcuán ní cachuváha de táca jéé ní cuu ún, te cácajnūhun jñáhan de na jñuhun cúu jeē nátecu yā.

<sup>11</sup> Te ni cacajnūhún de ya:

Te tēe cástéén tutu ley Yaā Dios, ¿najahē cácahān de jeē cánuú ndiji Elías xīhna gā, te sáá te quiji Yaā cúu Cristo? achí de.

<sup>12</sup> Te ni cahān yā:

Jendaá cúu jeē xīhna gā quiji ñin tēe cúu nájñuhun Elías, te sátūhva de ndihi, achí tutu. ¿Te ndese cáhán tucu tutu ñi siquī ruhū, Yaā ní nduu tēe? Cáhán jee ndoho xeēn rī, te sájéé ni i nuū rī.

<sup>13</sup> Te cáhán rī jiín ró jeē jé ní quiji tēe ni cuu nájñuhun Elías, te ni casáha ndeváha ñayuu jiín de táca jéé ní cacuu ni máá i, nájñuhun cáhán jñuhun de nuū tútu, achí yá.

*Jeē ní nasávāha ya ñin sūchi ñūhun tachī ini*  
(Mt. 17.14-21; Lc. 9.37-43)

<sup>14</sup> Te ni najinū yá jiín de nuū sava ga tēe cáscuáha jiín yá, te ni cajito ya ñayuu cuehē ndasí, ni cajicó ndúu i de. Te suni cáhīn tēe cástéén tutu ley Yaā Dios, cátejnáhan jiín de.

<sup>15</sup> Te nuū ní cajito táca ñayuu un jéé véji ya, te ni canaa ni i. Te cájinu i cuangoo i nuū yá jeē cahān i jiín yá.

<sup>16</sup> Te ni cajñuhun yá i:

¿Na siquī cátejnáhan ró jiín de jijnáhan de? achí yá.

<sup>17</sup> Te ni cahān ñin tēe íne yūcuán:

Maestro, vendeca ná séhe ná núu ní, chi ñūhun ñin tachī ini i, te ni cuñhín i ní sáha.

<sup>18</sup> Te ndé-ni cúu nuū íne i, te tachī un scótúú i, te jehni yīhí-ni i. Te jée tiñū yuhu i, te squihñi jñuhun i. Te cuacuxí ndasí i sáha. Te ni cahān ndahú ná jiín téé cáscuáha jiín ní jeē na quénehen de tachī ún, te tu ní cúu sáha de, achí de.

<sup>19</sup> Te ni cahān yá jiín de jijnáhan de:

Ñayuu tu cándije cuiti cácuu ró. ¿Nasaa ga quivī condee rí jiín ró? ¿Te nasaa ga quivī cuandeyí ni rí jiín ró? Cuáquihin sūchí un, na quiji i, achí yá.

<sup>20</sup> Te ni caquindeca de i nuū yá. Te nuū ní jito tachī un núu yá, te ni jehni yīhí-ni i. Te ní cotúú i, te cónéhén cócáni i, te jée tiñū yuhu i.

<sup>21</sup> Te Jesús ni cajñuhun yá tatá i:

¿Nasaa cuiyá ni cuu jeē sáha súcuan jiín i?



Te ni cahān de:

Nde lulí i.

<sup>22</sup> Te ni cuu cuehē jínu scótúú táchī ún i nuū ñuhún nuū ndúte, jeē cáhni i cúní. Te núu cuu sáha ní, te cundáhú ni ní chindéé ñáhán ní sãña jéē ndúvāha sēhe ná, áchí de.

<sup>23</sup> Te ni cahān Jesús jíin de:

Núu cuu candíje ró jéē sáha ri, chi ñayuu candíje te cuu tāca jéē cuní i, áchí yá.

<sup>24</sup> Te máá tátá sūchí un ní cahān jee de:

Candíje ná, te chindéé ñáhán ní sãña jéē candíje ñihin ga ná, áchí de.

<sup>25</sup> Te ni jito Jesús jeē ní cutútú cuehē ñayuu nuū yā. Te ni cahān yā nuū tachí:

Tachí jeē sañhín sásóhó, ruhū ndácu ri jniñu jeē na quenda ró ini sūchi yáha, te ma ndávi ga rō ini i, áchí yá.

<sup>26</sup> Yūcuán na te ni cana cóhó táchī ún, te ni jehni yíhí tucu i, te ni quenda cuahān. Te sūchí un ní cuu i nájnūhun ndíyi. Te ni cacahān cuehē ñayuu jeē jé ni jihí i.

<sup>27</sup> Te Jesús ni jniñi ya ndaha i, te ni ndonehen ya i, te ni nucuiñi-ni i.

<sup>28</sup> Yūcuán na te ni quívi ya ini ñin vehe, te tēe cáscuáha jíin yá, ni cacajnūhun sán de ya:

¿Najehē tu ní cúu quenehen ná tachí un jíjnáhan ná? áchí de.

<sup>29</sup> Te ni cahān yā:

ñin tachí súcuan chi ma quenda cuiti te núu tú cacān tahú rō te coo ndite ni rō, achí yá.

*Jeē ni cahān tucu ya jeē cúu yā  
(Mt. 17.22-23; Lc. 9.43-45)*

<sup>30</sup> Te ni quenda ya yūcuan jíin de jíjnáhan de, te ni yāha ya ndaíúú Galilea cuahān yā. Te tu ní cúní yā jeē cúní ni ñin ñayuu.

<sup>31</sup> Chí stéén yā nuū tēe cáscuáha jíin yá, te áchí yá:

Máá rí, Yāá ní nduu tēe, nastúu i ruhū nuū tāca tēe xeēn. Te cahni de ruhū, te núu ni jihí rí, te nuū uní quívi te natecu rí, achí yá.

<sup>32</sup> Te tu ní cájecūhun ni de jnūhun yáha, te cáyūhú de cajnūhún de ya siquí jnūhun ni cahān yā.

*Ndé ñayuu cúu jeē cujéhnu ga  
(Mt. 18.1-5; Lc. 9.46-48)*

<sup>33</sup> Te ni jinū yā jíin de ñuu Capernaum, te nuū ni quívi ya ini vehe, te ni cajnūhun yá de:

¿Na jnūhun ni candajnūhun ró ichi véji yó? áchí yá.

<sup>34</sup> Te tu ní cacahān cuiti de, chí ichi un ní cacahān de siquí núu ndé ñin de cújéhnu ga.

<sup>35</sup> Yūcuán na te ni cucōo ya, te ni cana ya ndihúxí uū de, te ni cahān yā:

Núu ndé ñin ró cúní cujéhnu ga, na cúu ró tēe núu ga nuū tāca jnáhan ró, te cuajniñu ró núu jnáhan ró.

<sup>36</sup> Yūcuán na te ni jniñi ya ndaha ñin sūchi lulí, te ni jeni ya i mēhñú de jíjnáhan de. Te ni nundee yá i, te ni cahān yā jíin de:

<sup>37</sup> Na-ni ñayuu núu jeē siquí ruhū jetáhú i ñin sūchi lulí nájnūhun sūchi yáha, te ruhū jetáhú i. Te ñayuu jetáhú ruhū, nasūu máá ñin-ni ruhū, chí suni Yāá ní tají ruhū jetáhú i, áchí yá.

*Ñayuu tu cáhán siquī yā, ín i jín yá  
(Mt. 10.42; Lc. 9.49-50)*

<sup>38</sup> Yūcuán na te ni cahán Juan jín yá:

Maestro, ni cajito ná ñn tēe jeē jín síhví ní quénehen de tachī ini ñayuu. Te ni cajesi ná jeē sáha de, chí tu jíca de jín yó, achí de.

<sup>39</sup> Te ni cahán Jesús jín de:

Ma cási rō jeē sáha de. Chí ni ñn tēe jeē jín síhví rí sáha de jniñu jéhnū, ma cúu nacahán de siquī rī.

<sup>40</sup> Chí tēe tu cáhán siquī yō, ín de jín yó.

<sup>41</sup> Te na-ni ñayuu núu jeē siquí ruhū cuāha i vēsú ñn ñajin ndute coho rō, siquī jeē cácan díje rō ruhū, ndaā ndije cúu jeē nihín i tahū i. Achí yá.

*Xeēn coo siquī ñáyuu quíví nuū cuéchi  
(Mt. 18.6-9; Lc. 17.1-2)*

<sup>42</sup> Te núu ñn sūchi lúli yáha cándíje i ruhū, te núu quíví i cuéchi sáha na-ni ñayuu, te vāha ga núu ni conuhnī ñn yōso cáhnu sucūn ñayuu ún, te quēe i chíji ndute mar nuū.

<sup>43</sup> Te núu ndaha rō sáha jeē quíví rō cuéchi, vāha ga cahnde rō na quihín, návāha tuá sáha rō cuéchi. Chí vāha ga jeē cóndee ñn-ni ndaha rō te quíví rō núu cotecu rō ní cáni, vēsú jeē cóndee ndindúú ndaha rō te quíví rō infierno, nuū cayú ñuhūn jeē ma ndahvá cuítí.

<sup>44</sup> Te yūcuán chí tu cájihī tindacú, te tu ndahvá cuítí ñuhūn.

<sup>45</sup> Te núu jehē rō sáha jeē quíví rō cuéchi, suni vāha ga cahnde rō na quihín, návāha tuá sáha rō cuéchi. Chí vāha ga jeē cóo cúhndu rō te quíví rō núu cotecu rō ní cáni, vēsú jeē cóndee ndindúú jehē rō te quíví rō infierno, nuū cayú ñuhūn jeē ma ndahvá cuítí.

<sup>46</sup> Te yūcuán chí tu cájihī tindacú, te tu ndahvá cuítí ñuhūn.

<sup>47</sup> Te núu tinūu rō sáha jeē quíví rō cuéchi, vāha ga tava rō na quihín, návāha tuá sáha rō cuéchi. Chí vāha ga jeē quíví rō ñuu nuū ndácu Yaā Dios jniñu jín ñn na tinūu rō, vēsú jeē cóndee ndindúú tinūu rō te quíví rō infierno.

<sup>48</sup> Te yūcuán chí tu cájihī tindacú, te tu ndahvá cuítí ñuhūn.

<sup>49</sup> Chí nájñuhun quénda vāha oro sáha ñuhūn, súcuan quénda vāha ñayuu sáha jnūndóho. Te tāca cúñu jeē socó ñayuu nuū yā, cúhuhvuā sáha ñī.

<sup>50</sup> Vāha íyó ñī, te núu ñī ún na náā jeē uhvuā, ¿te ndese nduu uhvuā tucu sáha rō? Núu súcuan te cuu rō ñáyuu vāha, nájñuhun íyó vāha ñī. Te na cóyūcu vāha rō jín jnahan rō. Achí yá jín de.

*Siquī jeē ma stóo jnahan tēe jín ñahan  
(Mt. 19.1-12; Lc. 16.18)*

## 10

<sup>1</sup> Te ni quenda ya ñuu Capernaum, te ni jinū yā región Judea, inga lado yūte Jordán, ichi nuū cáne niāndii. Te yūcuán ní cutútú tucu ñayuu nuū yā, te ni steén tucu ya jñuhun nuū i, nájñuhun sáha ya.

<sup>2</sup> Yūcuán na te jecu tēe grupo fariseo ni quecoo de nuū yā, chí cácuni de coto ndee de ya núu ndese cahán yā. Te ni cacajñuhún de ya núu íyó ley jeē cuu ndesín ñn tēe jín ñasihí de.

<sup>3</sup> Te ni cahán yā jín de:

¿Na jniñu ni ndacu Moisés nuū rō nde jenahán?

<sup>4</sup> Te ni cacahán de:

Moisés ni jēhe de jnūhun jeē cūvāha ñn acta jeē ndusñn de jíin ña, te ndōo ña, áchí de.

<sup>5</sup> Te ni cahān Jesús jíin de:

Siquī jeē níhni ni rō jijnáhan ró, jeē yúcuān ní ndacu de jniñu yáha núū rō.

<sup>6</sup> Te nde xīhna ññuhún, ná ni sáha Yaā Dios ndihí, chí tēe jíin ñahan ni sáha ya.

<sup>7</sup> Jeē yúcuān cúu jeē stóo tēe tátá de naná de, te quijnáhan de jíin ñasihí de.

<sup>8</sup> Te ñn na cuu ndíndúú de, áchí Yaā Dios. Núu súcuān te tuá cúu uū jnáhan de, chí ñn na cúu.

<sup>9</sup> Jeē yúcuān tu íyó váha jeē stóo jnáhan, chí jeē ni squíjñáhan Yaā Dios cúu, áchí yá.

<sup>10</sup> Te tēe cáscuáha ún nuū ni quívicoo de vehe, te ni cacajñuhún tucu de ya squíjñuhún ún.

<sup>11</sup> Te ni cahān yā jíin de:

Núu ndé tēe stóo de ñasihí de te condeca de inga ñahan, núu súcuān te cásiquí ndéē de ñasihí de.

<sup>12</sup> Te núu ñn ñahan stóo ña yñ ña te condeca ña inga tēe, suni cásiquí ndéē ña de. Achí yá.

*Jeē ni jicān tahú Jesús jehē sūchi lúlí*

*(Mt. 19.13-15; Lc. 18.15-17)*

<sup>13</sup> Yūcuān na te ni quecoo ñayuu jíin sūchi lúlí, jēē na sóo yá ndaha ya xiní i. Te tēe cáscuáha jíin yá, ni cacahān de nuū ñáyuu vējicoo jíin i.

<sup>14</sup> Te ni jito Jesús, te ni quiñi ni yá, te ni cahān yā jíin de:

Cuāha jnūhun na quíjicoo sūchi lúlí jíñā nuū rī, te ma cási rō jeē quíjicoo i. Chí ñayuu jeē ndió cóo ni i cani ni i nájnūhun sūchi yáha, suu i quíví ndaha Yaā andiví jeē ndacu ya jniñu nuū i.

<sup>15</sup> Te jendaá cahán rī jíin ró, núu ñn ñayuu tú cuatáhú i jeē ndacu Yaā Dios jniñu nuū i, nájnūhun jétáhú ñn sūchi lúlí, ma quíví cuiti i ndaha ya, achí yá.

<sup>16</sup> Te ni nundee ya i, te ni sóo yá ndaha ya xiní i, te ni jicān tahú yā jehē i jíjnáhan i.

*Jnūhun tēe cúca*

*(Mt. 19.16-30; Lc. 18.18-30)*

<sup>17</sup> Yūcuān na te ni quiñin tucu ya ichi cuahān yā. Te jínu ñn tēe ni quee de, te ni jecuiñi yití de nuū yā, ni cajñuhún de ya:

Tēe váha cúu ní Maestro. Te cachi ní, ¿na jniñu váha sáha ná te nihñn tahú na cotecu na ní cáni andiví? áchí de.

<sup>18</sup> Te ni cahān yā jíin de:

¿Naun cahán rō jeē tēe váha cúu rí? Tú ni ñn tēe váha íyó, chí máá ñn-ni Yaā Dios.

<sup>19</sup> Je jíni rō tēcá jniñu ní ndacu Yaā Dios: Ma cosíquí ndéē jnáhan ró. Ma cáhni rō ndíyí. Ma sacuíñhá ró. Ma sajñuhún ró. Ma stahú ró jnáhan ró. Cuatáhú ró nuū tátá rō nuū naná rō. Achí yá.

<sup>20</sup> Te ni cahān tēe un jíin yá:

Tēcá jniñu yáha je ni squícu ná ndé ná lulí ná, Maestro, achí de.

<sup>21</sup> Yūcuān na te ndáhú jito ya nuū de jeē cúsiñi ni yā jíin de. Te ni cahān yā:

Ñn na jniñu cúmani sáha ró núu súcuān. Cuahán te xico ró ndihí jeē névaha ró, te cuāha ró núu ñáyuu ndahú. Te nde andiví cuāha ya jeē váha ndasi núu rō. Yūcuān na te quiji ró condiquín rō ruhū, te cuāha ró jnūhun ndoho ró jnúndóho jeē siquí rī, achí yá.

<sup>22</sup> Te ná ni jini sōho de jnūhun yáha, te ni jnahuhū ni de, te cúcuíhyá ni de cuahān de, chí cúcá ndasí de.

<sup>23</sup> Yūcuán na te Jesús ni ndacoto ya ní xiin ya, te ni cahān yā jíin téé cáscuáha jíin yá:

Téé cúcá chí yōhyo yí quívicoo de ndaha Yaā Dios jeē ndacu ya jniñu nuū de, áchí yá.

<sup>24</sup> Te téé cáscuáha jíin yá, yōhyo ni canaa ni de jeē ní cajini de jnūhun ni cahān yā. Te ni cahān tucu ya jíin de:

Séhē, ñayuu ténuū xūhún, yōhyo yí quívicoo i ndaha Yaā Dios jeē ndacu ya jniñu nuū i.

<sup>25</sup> Yachí gā yāha ñin camello yaū yutícuí, vēsú jeē quívi ñin ñayuu cucá ndaha Yaā Dios jeē ndacu ya jniñu nuū i, áchí yá.

<sup>26</sup> Te víhyá gā ni canaa ni de cájini de, te ni cacajñuhun jnāhan de:

¿Ndé ñayuu cúu jeē cácu núu súcuan?

<sup>27</sup> Te ni ndacoto ya nuū de, te ni cahān yā:

Ñayuu chí ma cúu squívi i máá i ndaha Yaā Dios, te máá yá chí cuu sáha ya, chí ndihi-ni jniñu cuu sáha ya, achí yá.

<sup>28</sup> Yūcuán na te ni cahān Pedro jíin yá:

Saña jíināhan ná, ní castóo ná ndihi jeē cánevāha ná, te cándiquín na níhín, áchí de.

<sup>29</sup> Te ni cahān Jesús:

Jendaá cahán rí jíin ró jijnāhan ró, núu na-ni ñayuu stóo i vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, jeē siquí ruhū jíin síquí jeē scáca i jnūhun jeē jnáma rí ñayuu,

<sup>30</sup> núu súcuan te nanihín i ñin ciento gā jeē súcuan vijna, cúu vehe, cúu ñani, cúu cuāha, cúu náná, cúu séhe, cúu ñuhun, te nde jíin jéé cóto xeēn ñayuu i. Te nde inga vida quiji te cotecu i ní cáni.

<sup>31</sup> Te cuehē ñayuu jeē vijna cácujuhnu, nduu i ñayuu núu ga. Te ñayuu jeē núu ga vijna, chí ndujéhu i, áchí yá.

*Jeē ni cahān tucu ya jeē cúu yā*

*(Mt. 20.17-19; Lc. 18.31-34)*

<sup>32</sup> Te cáñuhun de ichi jeē cáa cuahān ñuu Jerusalén. Te Jesús yósnúu yá nuū téé cáscuáha ún. Te cánaa ni de ni cajini sōho de jnūhun ni cahān yā. Te cáyūhú de cuángoo de jíin yá. Yūcuán na te ni cana sún tucu ya ndihúxi uū téé cáscuáha, te ni quejéé yá cástūhún tucu ya nuū de tāca jéé quíji siquí yā.

<sup>33</sup> Achí yá:

Cuni sōho ró, chí je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu téé, nuū sutú cácujuhnu jíin núu téé cástéén tutu ley. Te ndonda de siquí rí jeē cúu rí, te squívi de ruhū nuū téé nación Roma jeē cáyúcu Jerusalén cándacu jniñu.

<sup>34</sup> Te tāca téé un sácatā de nuū rí, te caní de ruhū, te tesihí de nuū rí, te sáa te cahni de ruhū. Te nuū uní quívi te natecu rí, achí yá.

*Jeē ni jícān Jacobo jíin Juan ñin favor nuū yā*

*(Mt. 20.20-28)*

<sup>35</sup> Yūcuán na te Jacobo jíin Juan, ndindúú séhe Zebedeo, ni quecoo de nuū Jesús, te ni cacahān de:

Maestro, cácuni na jéé sáha ní ñin jeē cacán na núu ní, áchí de.

<sup>36</sup> Te ni cahān yā jíin de:

¿Ndese cácuni rō jeē sáha rí jíin ró? achí yá.

37 Te ni cacahān de:

Cuāha ní jnūhun jeē cōnēne ná xiin ní quívi ndujéhu ní, ìn ná lado váha ní, te inga ná lado jecó ní, áhí de.

38 Yūcuán na te ni cahān Jesús jíin de:

Tu cájini rō na vé cúu jeē cájicān rō. ¿A cuu ndoho ró jnúndóho nájnūhun jeē quíji siquī rī? ¿Te á canda ró ndoho xeēn rō nájnūhun ndoho rī? achí yá.

39 Te ni cacahān de:

Cuu sáha ná.

Te ni cahān yā jíin de:

Jendaá jeē ndoho ró jnúndóho nájnūhun jeē quíji siquī rī, te ndoho xeēn rō nájnūhun ndoho rī.

40 Te jeē cōnēne ró lado váha ri jíin lado jecó rí, nasūu rúhū cúu jeē cuáha jnūhun. Chi je íyó túhva cuu tāca tēe jeē ní nacāji Tátá rī, te tēe un níhīn, achí yá.

41 Te uxī gā tēe cáscuáha un, ní cajini de jnūhun yáha, te ni caquitī ni de nuū Jacobo jíin Juan.

42 Te Jesús ni cana ya de, te ni cahān yā jíin de:

Cájini rō ndese cásaha tēe cácujuhnu nuū ñayuu tācá nación. Chi cándacu níhin de jniñu nuū i, te máá de cáhí ndese coo.

43 Te máá ró jíjnáhan ró, chí ma sáha ró súcuan. Chi núu ndé ìn ró cúní cujéhu, sa suhva cuajniñu ró núu jnáhan ró.

44 Te núu ndé ìn ró cúní cuu nuū, sa suhva sáha ró máá ró mozo nuū tāca jnáhan ró.

45 Chí suni súcuan sáha ruhū, Yaā ní nduu tēe, chí nasūu jéē véji ri jeē cuajniñu ñayuu nuū rī, chí sa suhva véji ri jeē cuajniñu ri nuū ñayuu. Te cuāha ri maá rí cuu rī návāha jnama ri cuehē ñayuu, achí yá.

### *Jeē ní nasávāha ya Bartimeo tēe cuáá*

*(Mt. 20.29-34; Lc. 18.35-43)*

46 Yūcuán na te ni jinū yā ñuu Jericó jíin tēe cáscuáha jíin yá. Te sáá te ni quenda ya yūcuan jíin de jíin ñayuu cuehē ndasí. Te Bartimeo tēe cuáá, sēhe Timeo, néne de yuhíchi, jíicán de caridad.

47 Te ni jini de jnūhun jeē Jesús ñuu Nazaret véji ya. Te ni quejéé de cána jee de:

Jesús Sēhe yucūn David, cundáhú ni ni sáña, áhí de.

48 Te cuehē ñayuu ni cacahān i nuū de jeē na cási de yuhu de. Te máá de víhyá gā ni cana jee de:

Máá ní jeē cúu ní Sēhe yucūn David, cundáhú ni ni sáña víi, achí de.

49 Yūcuán na te ni jecuíñī Jesús, te ni cahān yā:

Cana de na quíji de.

Te ni cacana i tēe cuáá un:

Ndeyí coo ní rō. Ndocuñī, na quíhín yō, chí cána ya rohó, áhí i jíin de.

50 Yūcuán na te ni scáne de ticáchí de, te yachī ní ndocuñī de, te ni jinū de nuū Jesús.

51 Te ni cahān yā jíin de:

¿Na vé cúní rō jeē sáha ri jíin ró?

Te máá de ni cahān de:

Maestro, jeē na ndúndijin tinūu ná cúní na, áhí de.

52 Te ni cahān Jesús jíin de:

Cuahán núu súcuan. Ni candije ró jeē cuu nasávaha ri rohó, te jeē yúcuan ní nduvaha ró, áchí yá.

Te ni ndundijin-ni tinúú de, te ni ndiquin de Jesús cuahán de jín yá ichi ún.

*Jeē ni quivi Jesús ñuu Jerusalén  
(Mt. 21.1-11; Lc. 19.28-40; Jn. 12.12-19)*

## 11

<sup>1</sup> Te ni cuyajni ya ñuu Jerusalén, vēji ya ñuu Betfagé jín ñuu Betania, jeē íne jehē yucu Olivos. Te ni tají yá uū tēe cáscuaha jín yá jeē quingoo de.

<sup>2</sup> Te áchí yá jín de:

Cuangoo ñuu lulí íne ichi núú. Te núu ni quivi-ni ró yúcuan, te nihin rō ñin burro núhni tī, jeē ní ñin tēe ná tu coso de tī. Te ndají ró tī, quijicoo ró jín tī.

<sup>3</sup> Te núu ndé ñin cajnúhún naun cándají ró tī, te cachi rō: Máá Jítoho yō jini ñuhún yá tī, te yachí natajái yá tī ndiji tī, achi rō. Achí yá jín de.

<sup>4</sup> Te cuangoo de, te ni canihin de burro un núhni tī yehyí núú quéhe nuū náquijnáhan ichi. Te ni cándají de tī.

<sup>5</sup> Te sava ñayuu cáhín yúcuan ní cacahán jín de:

¿Na vé cúu jeē casáha ró jeē cándají ró burro jiñā? achí i.

<sup>6</sup> Yūcuán na te ni cacahán de nájnūhun ni cachi Jesús. Te ni casiáá i tī vējicoo de jín tī.

<sup>7</sup> Te ni ndecoo de jín tī nuū Jesús, te ni caso<sup>7</sup> de sahma de siquū tī, te ni jecosō yā tī.

<sup>8</sup> Te cuehē ñayuu ni cascáá i sahma i ini ichi. Te sava ga i ni cajehnde i ndaha ñúú, te ni cachucun i ini ichi ún.

<sup>9</sup> Te ñayuu cuangoo ichi núú jín ñayuu cuangoo ichi yátá, cácana jee i:

Yōhyo cújéhnua ya. Yōhyo vaha Yaā cúu Yaā jee véji jín jniñu máá Jítoho yō Yaā Dios.

<sup>10</sup> Te yōhyo luu coo, chi je yajni ndacu ya jniñu nájnūhun ni ndacu jí yō rey David. Te yōhyo cújéhnua máá Yaā Dios. Achí i.

<sup>11</sup> Te ni quivi Jesús ñuu Jerusalén, jín ini templo cáhnu. Te ni jito ya nuū táca ndajniñu yúcu ní yúcuan. Te ni quenda ya cuahán yā ñuu Betania jín ndihúxí uū de, chi je ni ini.

*Jeē ni cáhán yā nuū yujnu higo  
(Mt. 21.18-19)*

<sup>12</sup> Te inga quivi ún, nuū ní quenda ya ñuu Betania cuahán yā jín de, te jí yā sōco.

<sup>13</sup> Te nde jicá ni jito ya ñin nundēhe higo jeē ín ndaha. Te ni jecondēhe yá núu sanaa te nihin yā ndehē caji yá. Te tú na vé ni níhín yā, chi máá ndaha-ni ñin. Chi nasūu tiempo ndehē cúu.

<sup>14</sup> Yūcuán na te ni cahán yā nuū yujnu ún:

Tuá na ndehē cuun cuiti xini rō jeē cáji ñayuu, achí yá.

Te tēe cáscuaha jín yá ni cajini de jeē súcuan ni cahán yā.

*Jeē ní quenehen ya ñayuu ini templo  
(Mt. 21.12-17; Lc. 19.45-48; Jn. 2.13-22)*

<sup>15</sup> Te ni najinū yá jín de ñuu Jerusalén. Te ni quivi ya ini templo cáhnu, te ni quenehen ya ñayuu cájeen quiti te cánaxico núú ñayuu jeē socó i. Te ni scotúú ndeyi ya táca mesa tēe cástáyi xuhún, jín silla tēe cáxícó paloma.

<sup>16</sup> Te tu ní jéhe ya jnūhun jeē yáha ñayuu ini templo jín ndajniñu ndiso i.

<sup>17</sup> Te ni steén yá jnūhun nuū i, achí yá:

Yósó núū tútu ii jeē cahán Yaā Dios: Vehe ri chi vehe nuū cájicān tahú ñayuu tācā naciōn cúu, áchí yá. Te máá ró jijnáhan ró chi nájnūhun yaū cava ñacuīhna ní canasáha ró, áchí yá.

<sup>18</sup> Te tēe cástéén tutu ley Yaā Dios jíin sūtū cájucjéhnū, ni cajini de jnūhun yáha, te ni quejéé de cánducú de modo ndese cahni de ya. Chi cáyūhú de jeē ndujéhnū ga maá yá vēsú maá de, chi tāca ñayuu yōh̄yo cācusī ni i cájini i jnūhun stéén ya.

<sup>19</sup> Te jeē cuácuaa, te ni quenda ya ñuu Jerusalén cuahān yā.

*Jeē ni íchī nundēhe higo*  
(Mt. 21.20-22)

<sup>20</sup> Te jenéhen inga quivī ni nayāha ya jíin de cuahān yā. Te ni cajito de jeē nundēhe higo un je ni íchī nde yoho.

<sup>21</sup> Yūcuán na te ni nucūhun ni Pedro, te ni cahān de jíin yá:

Maestro, cundēhe ní nundēhe higo jeē ni cáhān ni núū, te vijna je ni íchī caján, áchí de.

<sup>22</sup> Te ni cahān Jesús jíin de:

Candíje ró jéé sáha Yaā Dios jeē jicán rō.

<sup>23</sup> Chi jendaá cahán rī jíin ró, núū ndé ñayuu cahān i jeē cújiyo yucu yáha quihīn nde nuū mar, te núū tú nacani siquī ní i, chi sa suhva candíje i jeē cóo nájnūhun ní cahān i, yūcuán na te cundaā jeē ní jicān i.

<sup>24</sup> Jeē yúcuán cahān rī jíin ró, tāca jéē cacān tahú rō, te núū candíje ró jéē nihīn rō, te nihīn rō.

<sup>25</sup> Te jeē cájicān tahú rō, te cone cáhnu ni rō nuū ñayuu casáha cuēchi siquī rō, návāha máá Tátá rō jeē ndeé yá andiví, suni cone cáhnu ni yā nuū cuēchi ró.

<sup>26</sup> Chi núū tú cone cáhnu ni rō nuū jnáhan ró, te suni máá Tátá rō jeē ndeé yá andiví, ma cóne cáhnu ni yā nuū cuēchi ró, áchí yá.

*Siquī jeē ndíso jniñu Jesús*  
(Mt. 21.23-27; Lc. 20.1-8)

<sup>27</sup> Yūcuán na te ni najinū tucu ya ñuu Jerusalén. Te jica cuu ya ini templo cáhnu. Te sūtū cájucjéhnū jíin tēe cástéén tutu ley Yaā Dios jíin tēe jéhnū cándacu jniñu, ni quecoo de nuū yā.

<sup>28</sup> Te ni cacajnúhún de ya:

¿Nde ní nihīn jniñu ró jéé sáha ró jniñu yáha? ¿Te ndé ñn ni tee jniñu siquī rō jeē sáha ró sūcuán? áchí de.

<sup>29</sup> Te ni cahān Jesús:

Suni ruhū, cajnúhūn rī rohó ñn jnūhun jijnáhan ró. Te núū cuu stío cuñī rō, yūcuán na te cachi rī nuū rō ndé ní nihīn jniñu rī jeē sáha rī jniñu yáha.

<sup>30</sup> ¿Nde ñn ni tee jniñu siquī Juan jeē ni scuándute de? ¿A Yaā Dios chí tāca tēe? Cachi nuū rī, áchí yá.

<sup>31</sup> Yūcuán na te ni candajnúhūn máá de:

Núū cahān yō jeē Yaā Dios ni tee ya jniñu un siquī Juan, te cahān de jíin yó: Núū sūcuán ¿te najehē tu ní cácandíje ró de?

<sup>32</sup> Te núū cahān yō jeē ñayuu ni catee jniñu un siquī de, te quitī ni ñayuu nuū yō, áchí de cácahān maá de.

Chi cáyūhú de jeē quitī ni ñayuu, chi ndivii i cácandíje i jeē tēe ni nacani jnūhun Yaā Dios ni cuu ndije Juan.

<sup>33</sup> Jeē yúcuán ní cacahān de jíin yá:

Tu cájini rī, achí de.

Yūcuán na te ni cahān Jesús:

Ni ruhū, suni ma cáchi rī nuū rō ndé ñn ni tee jniñu siquī rī sáha ri jniñu yáha, achí yá.

*Jñuhun yátá siquī tēe néé cásájniñu nuū uva  
(Mt. 21.33-46; Lc. 20.9-19)*

## 12

<sup>1</sup> Te ni quejéé yá cahán yā jñuhun yátá jíin de jíjnáhan de:

ñn tēe ni nachuhun de cuehē uva, te ni jesi de corral, te ni sáha de ñn nuū cúhun ndehē un táxin. Te ni sáha de ñn vehe súcún návāha cuu coto de ní cáhnu.

<sup>2</sup> Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi cuahān jicá de.

<sup>3</sup> Te máá tiempo ndutútú uva, te ni tají de ñn mozo de cuanuquihin sava uva nuū tēe cásájniñu ún.

<sup>4</sup> Te tēe un ní cajñi de mozo un, te ni cacani de i, te ni canatajé de i cuanuhun i súcuan-ni.

<sup>5</sup> Yūcuán na te tēe chíí uva un ní tají tucu de inga mozo cuahān. Te tēe cásájniñu un ní cajēhe de yuū xinī mozo un, te ni castújí de, te ni cacahān ndevāha de nuū.

<sup>6</sup> Te tēe chíí uva ni tají tucu de inga mozo cuahān. Te ni cajehni de i. Te suni súcuan ni tají de cuehē gā mozo cuahān, te sava i ni cacani de, te sava i ni cajehni de.

<sup>7</sup> Te tēe chíí uva, íyó ñn sēhe de jeē maní ndasí de jíin. Te jeē sándihí na ni tají de sēhe de un cuahān nuū tēe cásájniñu. Te jéni ni de: Tēe ún chi cuatáhú de jíjnáhan de nuū séhe ri.

<sup>8</sup> Te tēe cásájniñu un ní cacahān maá: Tēe chíí táhū cúu jeē yáha. Na cáhni yō de, te ndōo tahū de cuu máá yó, achí.

<sup>9</sup> Te ni cajñi de i, ni cajehni de i, te ni cascáne de i inga lado. Achí yá.

<sup>10</sup> Yūcuán na te ni cajñuhun yá de:

Núu súcuan ¿te ndese sáha tēe chíí uva un? Ndiñi de te cahni de tēe cásájniñu ún, te cuāha de ñuhun cáá uva un núu inga sava tēe sájniñu nuū.

<sup>11</sup> ¿Te á ná tu cahu ró jñuhun yáha jéé yosó núu tútu ñi, jeē ruhū cúu nájñuhun ñn yuū? Chi achí tutu:

Yuū jeē ní casquéhichí tēe cájeni vehe, yuū yáha nduu jeē quítuu vehe.

<sup>12</sup> Máá Jítoho yō Yaā Dios ni sáha ya súcuan, te cánaa ni yō jíto yó jniñu yáha.

Achí tutu, achí yá.

<sup>13</sup> Yūcuán na te ni canducú de modo jñi de ya. Chi ni cajecūhun ni de jeē siquī maá de cúu jñuhun yátá ní cahān yā siquī tēe cásájniñu nuū uva jíin tēe cájeni vehe. Te siquī jeē cáyūhú de jeē quítí ni ñayuu, te ni castóo de ya te cuango de.

*Siquī xūhun renta  
(Mt. 22.15-22; Lc. 20.20-26)*

<sup>14</sup> Yūcuán na te ni catajé de sava tēe grupo fariseo jíin tēe grupo Herodes cuango de nuū yā, ndúcú de ndese sáha de návāha cahān yā ñn jñuhun jeē nihín de cuéchi siquī yá.



14 Te ni quecoo de, te ni cacahān de jíin yá:

Maestro, cájini na jée tée cáhān ndaā cúu ní, te tu yúhú ní jeē cahán ni ñn ñayuu siquī ní. Chi tu sáha ní cuenta ndese cúu ñn ñn i, chí inuú-ni sáha ní jíin i. Te stéén ndaā ní ndese squícu ñayuu nuū Yaā Dios. ¿Te á íyó váha jeē chúnaa yō renta nuū rey nación Roma jeē jnāi nación yō, chí tuú? ¿A chúnaa yō, chí má chúnaa yō? Achí de jíin yá.

15 Te máá yá jini yá jeē stahú-ni de, te ni cahān yá jíin de:

¿Najehē cájito ndee rō ruhū? Cuāha ñn xūhún na cóto ri, achí yá.

16 Te ni cajēhe de xūhún. Te ni jito ya, te ni cajnūhun yá de:

¿Ndé ñn nuū cúu jeē ndeé nuū xūhun yáha, te ndé síhvi cúu jeē ndeé yāhá?

Te ni cacahān de jíin yá:

Nuū jíin síhvi rey un cúu, áchí de.

17 Yūcuán na te ni cahān yá jíin de:

Núu súcuan te nacuāha rō núu rey un jéē yñi cuenta nuū de, te nacuāha rō núu Yaā Dios tāca jée yñi cuenta nuū máá yá, achí yá.

Te ni canaa ni de ni cajini de jeē ndichí ní cahān yá.

*Jeē ní cacajnūhún de siquī jeē nátecu ndīyi*

*(Mt. 22.23-33; Lc. 20.27-40)*

18 Yūcuán na te jecu tēe grupo saduceo ni quecoo de nuū yá. Te tēe un cácahān jeē tu nátecu cuiti ndīyi. Te ni cacahān de jíin yá siquī ñn jnūhun, achí de:

19 Maestro, Moisés ni tee de nuū tútu jeē cánevāha yó: Núu ñn tēe cuu de, te ndōo ñasihí de, te núu tu ní íyo sēhe de jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuñi i nuū ndīyi ñani de, achí tutu.

20 Núu súcuan te ni íyo uxā ñani. Te tēe núu ní quijnāhan de jíin ñahan. Te ni jihí de, te tú sēhe de ní íyo.

21 Te tēe uū ni naquihin de ña, te suni ni jihí de, te tú sēhe de ní íyo. Te suni súcuan tēe unī.

22 Te ndihúxá de ni condeca de ña, te ni ñn de tú sēhe de ní íyo. Te jeē sándihí te suni ni jihí ñahan ún.

23 Núu súcuan te núu na nátecu de jíjnāhan de quivī nátecu ndīyi, ¿te ndé ñn de cuu ña ñasihí de? Chi ndihúxá de ni condeca de ña. Achí de jíin yá.

24 Yūcuán na te ni cahān yá jíin de:

Yōho cástivi rō jnūhun siquī jeē tu cájecūhun ni rō jeē cahán tutu ñi, ni tu cájini rō jeē íyó poder Yaā Dios jeē nastecu yá ndīyi.

25 Chi quivī nátecu ndīyi, te tuá na jnūhun quijnāhan tēe jíin ñahan coo. Chi coo i nájnūhun ndajéhé Yaā Dios andiví.

26 Te siquī jeē nátecu ndīyi, ¿á tu ní cácahu rō tutu ní tee Moisés, ndese ni cahān Yaā Dios jíin de mehñu yúcū jeē cayú yáñuhūn? Máá rí cúu Yaā Dios Abraham jíin Isaac jíin Jacob, achí yá jíin Moisés.

27 Chi vésú je ni cajihí de, te cátecu de nuū iyó máá yá, chí cúu ya Yaā sáha jeē técu ñayuu ní cáni. Yōho cástivi rō jnūhun núu súcuan. Achí yá jíin de.

*Jniñu cánuú ndasí gá jeē ní ndacu Yaā Dios*

*(Mt. 22.34-40)*

28 Te ni quee ñn tēe stéén tutu ley Yaā Dios, te ni jini de jeē castichí jnāhan tēe un jíin Jesús. Te ni jini de jeē váha ni nastió cuñí yá jnūhun. Te ni cajnūhún de ya:

¿Nde ñn cúu jñūhun ndácu jniñu cánuú ndasí gá nuū tāca gá jniñu ni ndacu ya jengahán? áchí de.

<sup>29</sup> Te ni cahān Jesús jín de:

Yāha cúu jniñu jeē cánuú ndasí gá nuū tāca gá. Achí tutu: Ñayuu Israel, cuni nahín ró. Máá Jítóho yō Yaā Dios, maá ñn-ni ya iyó.

<sup>30</sup> Núu súcuan te coo maní ndasí ró jíin máá Jítóho rō Yaā Dios, nde jnāá ndasí ró sáha ró ndihi jeē cúsiñ ní yā, nde jíin ini jíin ánuá rō, jíin ní jeē níjnūni rō, jíin ní fuerza rō. Yāha cúu jniñu ndácu ya jeē cánuú ndasí gá.

<sup>31</sup> Te jniñu uū jeē ní ndacu ya, suni súcuan cáhán: Cundáhú ni rō jnāhan ró nájñūhun cundáhú ni rō maá ró. Tuá inga jñūhun ndácu jniñu cánuú gá iyó, chí suu máá jeē yāha-ni. Achí yá jíin de.

<sup>32</sup> Yūcuán na te ni cahān tēe stéén tutu ley jíin yá:

Vāha ni cahān ní, Maestro. Chí ndaá chí iyó ñn-ni Yaā Dios, te tuá na inga yā iyó.

<sup>33</sup> Te cánuú jeē coo maní ndasí yó jíin yá nde jíin ini jíin ánuá yō, jíin ní jeē níjnūni yō, jíin ní fuerza yō, te cundáhú ni yō jnāhan yó nájñūhun cundáhú ni yō maá yó. Te cánuú ndasí gá jeē yāha vēsú jeē cáhmu yó quiti jíin tāca gá jeē socó yō nuū yā. Achí de jíin yá.

<sup>34</sup> Yūcuán na te ni jini Jesús jeē váha ni stió cuñí de, te ni cahān yā jíin de:

Je yajni cuu quívi ró ndaha Yaā Dios jeē ndacu ya jniñu nuū rō, achí yá.

Yūcuán na te ni ñn ga de, tuá ní chūndeyí ni de cajñūhún de ya.

*Siquí jeē cúu Cristo sēhe yucūn David*

*(Mt. 22.41-46; Lc. 20.41-44)*

<sup>35</sup> Te stéén Jesús jñūhun ini templo, te ni cahān yā:

¿Ndese cúu jeē cácahān tēe cástéén tutu ley Yaā Dios jeē Cristo cúu sēhe yucūn David?

<sup>36</sup> Chí máá David suhva ni cahān de jñūhun ya ni sáha Espíritu Santo nde jengahán:

Máá Jítóho yō Yaā Dios ni cahān yā jíin Jítóho rī, Yaā quiji:

Cucōo ró lado váha ri nuū kujéhu ró,

te na sáha ri jeē quende rō poder tāca jeē cájito uhū rohó.

Achí Yaā Dios. Achí David.

<sup>37</sup> Te núu sēhe yucūn David cúu Cristo, ¿te ndese cúu jeē ni cáhān de jeē Jítóho de cúu ya? áchí yá.

Te ñayuu cuehē, cánujnahan ni i cájini nahín i tāca jñūhun cáhán yā.

*Jeē ni cáhān yā jeē iyó cuéchi de jíjnāhan de*

*(Mt. 23.1-36; Lc. 11.37-54; 20.45-47)*

<sup>38</sup> Te stéén yā jñūhun, te ni cahān yā jíin i:

Coto má candíje ró tāca tēe cástéén tutu ley. Chí cácusí ni de cáñuhun de sahma cáni jeē stéén jeē kujéhu de, cájica cuu de jíin. Te cánujnahan ni de jeē cahān yíñúhún ñáyuu jíin de ini calle.

<sup>39</sup> Te cánujnahan ni de cucōo de nuū silla yíñúhún gá ini vehe ñi sinagoga, jíin silla yíñúhún gá nuū víco cáyeji ñayuu.

<sup>40</sup> Te cáquende de vehe ñahan ní caquendōo ndáhú. Te nahán cájicān tahú de návāha caní ni ñayuu jeē tú na cuéchi de. Tēe yáha jíjnāhan de chí xeēn gā ndoho de castigo. Achí yá.

*Jeē ni sócō ñahan viuda xūhún*

*(Lc. 21.1-4)*

41 Te ñn quivĩ néne Jesús ini templo ichi núú tãca yéjñũ nuũ cásocō i xũhún. Te jito ya ndese cáchuhun ñayuu xũhún ini yejñũ ún. Te cuehẽ ñayuu cucá ní cachuhun i cuehẽ xũhún.

42 Te ni quee ñn ñahan viuda jeẽ ndóho ndáhú. Te ni chuhun ña uũ centavo luli ini yejñũ ún.

43 Yũcuán na te ni cana ya tẽe cáscuáha jíin yá, te ni cahãn yã jíin de:

Jendaá cahán rĩ jíin ró jeẽ cuehẽ gã cúu jeẽ ni sócō ñahan viuda ndahú yáha, vesú jeẽ ní casocō tãca ñayuu cucá.

44 Chi tãcá i ni casocō i jeẽ ni ndóo siquĩ xũhun cuéhẽ i. Te ñahan yáha, vesú ndahú ndóho ña, te ni chuhun ndihĩ ña jeẽ cótecu ña. Achí yá jíin de.

*Jeẽ ní cachi yã jeẽ nãa templo  
(Mt. 24.1-2; Lc. 21.5-6)*

## 13

1 Te ni quenda Jesús ini templo cáhnu, te ñn tẽe scuáha jíin yá ni cahãn de: Maestro, condẽhe ní ná luu jito tãcá vehe yáha jeẽ cúu templo, jíin táca yũũ jeẽ ní cuvãha, áchĩ de.

2 Te ni cahãn yã jíin de:

Tãcá vehe náhnu yáha jeẽ cájito ró, chi ma cóso jnáhan ga ni ñn yuũ, chi ndihĩ jnanũ. Achí yá.

*Na seña coo nuũ cuácuyajni ndihĩ ñayĩví  
(Mt. 24.3-28; Lc. 21.7-24; 17.22-24)*

3 Te ni jehẽn yã jíin de yucu Olivos jeẽ ñne ichi núú templo cáhnu. Te ni cucōo ya yũcuán. Te Pedro jíin Jacobo jíin Juan jíin Andrés ni cacañũhun sñn de ya:

4 Castũhun ní nuũ ná, ¿ndé quivĩ coo tãca jeẽ ní cachi ní jeẽ coo? ¿Te na seña coo núu cuacuyajni squĩcu tãca jeẽ ni cahãn ní? áchĩ de.

5 Te ni cahãn yã jíin de:

Coto ró jeẽ ma stahú ni ñn de róhó.

6 Chi quijicoo cuehẽ tẽe jeẽ stahú jíin síhvĩ rí. Máá rí cúu Cristo, achi de. Te súcuan stahú de cuehẽ ñayuu.

7 Te nihĩn rō jñũhun jeẽ tãca lado iyó guerra, chí je yajni coo guerra. Te ma yũhu rō, chí cánuú coo súcuan. Te ni ná tu jĩnũ quivĩ ndihĩ ñayĩví.

8 Chi ndonda nación siquĩ inga nación, te ndonda ñuu siquĩ inga ñuu jeẽ cuajnáhan. Te cháha chúcuan jñãa, te coo jnamã, te ndonda ñayuu siquĩ jnáhan i. Te tãca jeẽ yáha cácuu jñũndóho quejéẽ xĩhna ñũhún gá.

9 Te condito ró máá ró, chí nastúu i róhó núú tãca tóhō, te ini tãcá vehe ñi sinagoga canĩ i róhó. Te quindeca i sava ró núú tãcá gobernador jíin núú tãca rey, te cahãn i cuẽchi siquĩ rō siquĩ jeẽ cácanđje ró rúhũ. Te súcuan te cuu nacani ró jñũhun ri nuũ de.

10 Te jĩni ñũhún jeẽ xĩhna gã cuitẽ núu jñũhun nuũ tãcá nación ndese jnáma ri i, te sáa te ndihĩ quivĩ.

11 Te núu ni cajñi de róhó cuángoo de jíin ró nuũ tãca tóhō, te ma nácani ni rō xĩhna gã ndese stío cuĩñĩ rō nuũ de te cácu ró. Chí máá hora un te máá Yã Dios cuãha ya jñũhun nuũ rō ndese cahãn rō, te jñũhun ún cahãn rō. Chí nasũu máá ró cúu jeẽ cahãn, chí Espĩritu Santo cúu jeẽ cahãn.

12 Te ñani jíin ñani nastúu jnáhan jeẽ na cúu. Te tátá nastúu sẽhe jeẽ cúu. Te sẽhe ndonda siquĩ tatá jíin náná jeẽ cahni.

13 Te tãca ñayuu quĩtĩ ni i nuũ rō jeẽ siquĩ ruhũ. Te ñayuu cuiñi ñihin jíin jñũhun ri nde quivĩ jínu, chí cácu i.

14 Te Daniel, tēe ni nacani jnūhun Yaā Dios, ni tee de jnūhun in tēe néé jéé quíji. Te róhó jéé cácahu tutu ún, na jécūhun ni rō. Chi in quiví te cuni rō jeé sáha ndevāha de jeé stíví de táca ndajniñu i in templo, te cuiñi de nuū tú na ley cuiñi de. Te núu cuni rō jeé súcuan cúu, te ñayuu cáyūcú región Judea, na cunu i caa i yucu quingoo i.

15 Te ñayuu cáyūcu nuū quehe, ma ndívi i ini vehe jeé queñehen i ndajniñu i, chi cánuú cunu yachí i návāha cácu i.

16 Te ñayuu cáhīin nuū itu, ma ndíji i vehe jeé quíhin i sahma i.

17 Te quiví ún nacā jeé ndahú ñahan cáñuhun sēhe jíin ñahan cándeca yiquín, chi ma cūnihin ña cunu yachí ña.

18 Te cacān tahu rō jeé ma quíji jnūndóho un jéé cunu ró máá tiempo cúun yuhvā.

19 Chi jeé quejéé un te coo cuehē jnūndóho xeēn, jeé ná tu coo súcuan nde quiví ní sáha Yaā Dios ñayiví te nde vijna. Te jeé ndíhi jnūndóho ún te ni ma cóo ga jeé súcuan.

20 Te núu tú nastívi máá Jítoho yō Yaā Dios tiempo jnūndóho ún, te ni in ñayuu ma cácu cuiñi i. Te jeé siquí ñayuu cácañdije jeé ní nacāji ya, jeé yúcuan nastívi ya tiempo un.

21 Núu súcuan te núu in ñayuu cahān jíin ró: Yāhá condēhe ró íne Cristo, chí: Yūcuán condēhe ró íne ya, achi i, te ma candíje ró jéé cahān i.

22 Chi canecoo tēe cástáhú te cahān de jeé Cristo cúu de, chí cahān de jeé tée nácani jnūhun Yaā Dios cúu de. Te sáha de jniñu jéhu jeé naa ni ñayuu coto i, návāha stáhú de nde máá ñayuu ní nacāji ya, te núu na cúu.

23 Te ndito na cóo ni rō, chí je ni castūhun rí nuū rō vijna nde ná tu coo.

*Ndese coo quiví ndiji Yaā ní nduu tēe  
(Mt. 24.29-35, 42-44; Lc. 21.25-36)*

24 Te quiví ún, núu je ni ndíhi jnūndóho ún, te cujnúú níandii, te yoō ma ndí gā.

25 Te ñingoo quími ín andiví. Te táca jéé ín andiví chí quisí i.

26 Yūcuán na te coto ñayuu nuū máá rí, Yaā ní nduu tēe, ndíji rí jíin vícō, te condiso rí cuehē poder, te yōhoyo luu cujéhu rí.

27 Yūcuán na te tají rí ndajéhé rí quinastútú yá ñayuu ní nacāji rí ndicúun lado ñayiví, nde nuū ndíhi ñayiví te nde nuū ndíhi andiví.

28 Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeé jé ni cuyajni tiempo jihni.

29 Te suni súcuan núu ni cajini rō jeé ní quejéé cúu táca jniñu jeé ni cáhān rí, yūcuán na te na jécūhun ni rō jeé ní cuyajni quiví ndíji rí, te yachí coo.

30 Jendaá cahān rí jíin ró jeé ma cúu ndíhi ñayuu jeé cóto jnūndóho ún, chi nde squícu ndíhi jniñu ún.

31 Andiví jíin ñayiví chí naa, te táca jnúhun cahān rí chí ma náā, chí ndíhi squícu.

32 Te quiví jíin hora jeé ndíji rí, tú ni in ñayuu jíni, ni máá ndajéhé cáhīyo andiví, ni máá rí, Sēhe Yaā Dios. Chi máá in ni Tátá rí cúu jeé jíni.

33 Núu súcuan te na cócuhun ni rō táca jnúhun yáha, te ndito na cóo ni rō, te cacān tahu rō, chí tu cájini rō na quiví ndíji rí.

34 Chí coo nájñuhun in tēe jeé quíhin jíca de, te nde ná tu quenda de vehe de, te ni ndacu de jniñu nuū táca mozo de ndese sáha in in de. Te ni ndacu de jniñu nuū tée ndíto yéhyí jéé na cóndito de.

<sup>35</sup> Te suni súcuan rôhó jijnáhan ró, ndito na cóo ni rō. Chi cúu ri nájñuhun jitohe vehe ún, te tu cájini rō na hora ndiji ri, á jéē cuácuaa, chí ñuú, chí jéē cána líhli, chí jénéhen.

<sup>36</sup> Chi ñn sanaa-ni te ndiji ri, te coto ró jéē ma nánihīn rī rôhó jéē tu ndíto ró.

<sup>37</sup> Te jñuhun cáhán rī jín ró jijnáhan ró, suni cáhán rī jín ndivī ñayuu: Ndito na cóo ni rō jijnáhan ró. Achí yá.

*Jeē ní casqujínahan de jñuhun jeē jñ# de Jesús*  
(Mt. 26.1-5; Lc. 22.1-2; Jn. 11.45-53)

## 14

<sup>1</sup> Te cúmanī uū gā quivī te quejéé vico pascua jeē cáyeji ñayuu hebreo pan jeē tú na levadura yíhi. Te sutú cácujeñhu jín téē cástéén tutu ley, ni canducú de modo ndese jñ# de Jesús jín jñuhun stáhú, te cahni de ya.

<sup>2</sup> Te ni cacahān de:

Ma jñ# yó de máá quivī víco, chi ndonda ñayuu siquī yō, achí de.

*Jñuhun ñahan jeē ní chuhun perfume xinī yā*  
(Mt. 26.6-13; Jn. 12.1-8)

<sup>3</sup> Te íne Jesús ñuu Betania vehe Simón, tēe ni ndoho cuehyī stehyú. Te níní yéji yā staa, te ni quee ñn ñahan nuū yā, ndáhá ña ñn frasco yuū luu jeē ññuhun aceíte perfume, jeē máni ita nardo cúu, te yōhyo yahu ndéé. Te ni tahu ña frasco un, te ni chuhun ña xinī yā.

<sup>4</sup> Te sava tēe cáhīn yūcuan ní caquitī ni de, te ni cacahān de:

¿Najehē cúu jeē náá saá-ni perfume jñā?

<sup>5</sup> Chi cuu xīcō yahu yó víhyá gā unī ciento denario, te cuāha yo núū ñáyuu ndahú núú, achí de.

Te ni cacahān sōo de jín ña.

<sup>6</sup> Te ni cahān Jesús:

Ma stáhān rō ña. ¿Naun casáha ró jéē nácani uhū ni ña? Chi ñn jññu váha cúu jeē ní sáha ña jín rí.

<sup>7</sup> Chi níní coyūcu ñáyuu ndahú jín ró, te núu cácuni rō te cuu sáha vāha ró jín i. Te ruhū chí tuá condee rī jín ró.

<sup>8</sup> Chi ní sáha ña ndihí jeē cuu sáha ña jeē maní ña jín rí. Chi nde ná tu quindūji ri te je ni sátūhva ña ruhū jeē ní chuhun ña perfume ruhū.

<sup>9</sup> Jendaá cahán rī jín ró jeē ní cáhnu ñayivī ndé-ni cúu nuū cuité núu jñuhun jeē jnáma rī ñayuu, suni nacani i jñuhun jeē ní sáha ñahan yáha, návāha cocuhun ní ñayuu ña, achí yá.

*Jeē ní nastúu Judas yā*  
(Mt. 26.14-16; Lc. 22.3-6)

<sup>10</sup> Yūcuán na te Judas Iscariote, ñn jeē ndihúxí uū téē cáscuáha un, ní jehēn de nuū sutú cácujeñhu, ní sándaā de jín jéē nastúu de Jesús nuū jijnáhan.

<sup>11</sup> Te nuū ní cajini sóho sutú un jéē cahán de, te ni cacusī ni, te ní cajejnñuhun jeē cuáha xūhun núū de. Te nde quivī un ní nducú de modo ndese nastúu de ya.

*Jeē ní jequín yā Cena yā*  
(Mt. 26.17-29; Lc. 22.7-23; Jn. 13.21-30; 1 Co. 11.23-26)

<sup>12</sup> Te ni quee máá quivī jeē quejéé vico pascua jeē cáyeji ñayuu pan jeē tú na levadura yíhi, te suni quivī un cájehni i londe nájñuhun ní ndacu Yāā Dios jññu jeē sáha i vico pascua un. Te tēe cáscuáha un ní cacajnñuhún de ya:

¿Ndé nuū cuní ni jéé quisátūhva ná cuxíni ní vico pascua? achí de.

<sup>13</sup> Te ni tají yá uū tēe cáscuáha ún quingoo de, te áchí yá jíin de:

Cuángoo nde ñuu, te yūcuán najnáhan ró jíin ñn tēe ndíso quiyi ndute. Te condiquín rō de quihín rō jíin de.

<sup>14</sup> Te vehe jeē ndívi de, yūcuan cáhān rō jíin tēe chíi vehe: Achí máá Maestro: ¿Ndé ñn cúu cuarto vehe ní cuāha núú ní núú cuxíni ya vico pascua jíin tēe cáscuáha jíin yá? achi rō.

<sup>15</sup> Te máá de stéen de ñn cuarto cáhnu nde xiní véhe jeē je íyó túhva. Te yūcuan sátūhva ró jéé cuxíni yó, áchí yá jíin de.

<sup>16</sup> Te cuangoo tēe cáscuáha ún, te ni jinūcoo de ñuu, te ni canihín de nájñūhun ní cahān yá jíin de. Te ni casátūhva de jeē cuxíni ya vico pascua.

<sup>17</sup> Te jeē cuácuaa, te ni quee ya jíin ndihúxi uū de.

<sup>18</sup> Te ni cacucōo de mesa cáyeji de staā, te ni cahān yā:

Jendaá cahán rī jíin rō jeē ñn róhó jéé yéji jíin rī, nastúu ro rúhū, achí yá.

<sup>19</sup> Yūcuán na te ni cacucuíhyá ni de, te ná ñn ná ñn de ni cacajñūhún de ya:

¿A sáña cúu? áchí ñn de.

Te suni súcuan inga de:

¿A sáña cúu? áchí ñn ñn de.

<sup>20</sup> Te ni cahān yā jíin de:

ñn jeē uxí uū rō jeē cáyeji cáhnu jíin rī ñn cohō, suu nastúu ruhū.

<sup>21</sup> Te ruhū, Yaā ní nduu tēe, jendaá cúu jeē quihín rī cuu rī, nájñūhun yósó jñūhun rī nuū tútu ñ. Te nacā xeēn ndoho tēe nastúu ruhū. Vāha ga núu tu ní cácu tēe un núú, áchí yá.

<sup>22</sup> Te níní cáyeji de jíin yá, te ni quihín ya pan, te ni nacuatáhú yá, te ni tahú cuéchi yá, te ni jēhe ya nuū tēe cáscuáha jíin yá. Te ni cahān yā:

Caji rō jijnáhan ró, chí yāha cúu yiqui cúnu rī, achí yá.

<sup>23</sup> Yūcuán na te ni quihín ya ñn copa ndūxi uva, te ni nacuatáhú yá, te ni jēhe ya ni cajihí ndihí de.

<sup>24</sup> Te ni cahān yā jíin de:

Yāha cúu ññī rī jeē cuáha rī jeē cúu contrato jeé, te cati jeē ndundoo cuēchi cuehē ñayuu.

<sup>25</sup> Te jendaá cahán rī jíin ró jeē ndé vijna te ma cóho ga rī ndūxi ndehē uva yāhá, chí nde quiji quiví ndacu Yaā Dios jniñu nñ ñayiví, te sáá te coho tucu rī jíin ró jijnáhan ró. Achí yá.

*Jeé ní cachi yā jeé yūhu Pedro cahān de jeé jini de ya  
(Mt. 26.30-35; Lc. 22.31-34; Jn. 13.36-38)*

<sup>26</sup> Te ni jita ya ñn yaa ñ jíin de jijnáhan de. Te ni quenda ya cuahān yā jíin de nde yucu Olivos.

<sup>27</sup> Yūcuán na te ni cahān yā:

Ndívii rō nayūhu ró jeē siquí ruhū jecuāá vijna. Chi suhva je yósó jñūhun rī nuū tútu ñ, ní cahān Yaā Dios: Cuāha rī jñūhun jeē cáhni ñayuu tēe ndíto lanchi, te lanchi un cuítē núu ti jeē yūhu tí, achí.

<sup>28</sup> Te jeē nátecu rī, te xīhna ruhū cosnúu rī quihín rī región Galilea, te sáá te najinūcoo ró, áchí yá.

<sup>29</sup> Yūcuán na te ni cahān Pedro:

Vēsú ndihí de na náyūhú de, te máá ná chí ma náyūhú cuiti ná, áchí de jíin yá.

<sup>30</sup> Te ni cahān yā jíin de:

Jendaá cahán rī jín ró jeē jecuāā vijna, nde ná tu cana líhli uū jínu, te yūhu ró jeē jnī ñayuu rohó, te unī jínu cahán rō jeē tu jíní rō ruhū, achí yá.

<sup>31</sup> Te ni cahán teyí de jín yá:

Vēsú núu cuu na jín ní, te ma cahán cuiti na jēē tu jíní na níhín, áchí de.

Te suni súcuan ni cacahán ndihi de.

*Jeē ni jicān tahu yā nuū huerto Getsemaní*

*(Mt. 26.36-46; Lc. 22.39-46)*

<sup>32</sup> Yūcuān na te ni jínú Jesús jín tēe cáscuáha jín yá ñn lugar nuū naní Getsemaní. Te ni cahán yā jín de:

Yāhá-ni cucōo ró, te na quihín rī cacān tahu rī, achí yá.

<sup>33</sup> Te ni jeca ya Pedro jín Jacobo jín Juan, cuahān yā jín de. Te ni quejéé yá cucuíhyá ndasí ni yā te cúxí ni yā jeē quíji jnūndóho siquī yā.

<sup>34</sup> Te ni cahán yā jín de:

Yōhoyo cucuíhyá ní rī, te ndúcú sáha jeē cúu rī. Yāhá condetu ró te condito ró, áchí yá.

<sup>35</sup> Te ni jica ya jecu gā, te ni jecuiñī yití yá ni jequin ya nuū yā nuū ñúhun. Te ni jicān tahu yā nuū Yāā Dios jeē núu cuu te ma ndóho ya jnūndóho jeē quejéé quíji siquī yā.

<sup>36</sup> Te suhva ni cahán yā:

Tátá maá ná, ndihi-ni jniñu cuu sáha maá ní. Te tejiyo ní jnūndóho yáha jéē ma quíji siquī ná. Te nasūu jéē cuní maá ná, chi jeē cuní maá ní na cóo, áchí yá.

<sup>37</sup> Te ni ndee yā nuū ndinúní tēe cáscuáha jín yá, te ni jito ya jeē cáquixí de. Te ni cahán yā jín Pedro:

Simón, ¿á quíxí rō? ¿A tu ní cánda ró condito ró jín rí vēsú ñn hora?

<sup>38</sup> Coo ndito ni rō te cacān tahu rō jeē chindéé ñáhán yá rohó jeē ma sáha ró cuéchi jeē coto ndee jeneé rōhó. Chi cúní ndije ánuá rō squícu vāha ró, te yiqui cúñu rō chí tu fuerza, achí yá.

<sup>39</sup> Te ni jehēn tucu ya, ni jicān tahu yā, te suni jnūhun yúcuan ní cahán yā.

<sup>40</sup> Te ni ndee ya nuū de, te ni jito ya jeē cáquixí tucu de, chi yōhoyo cájii de māhná. Te tuá ní cániñ de jnūhun stío cuíñi de nuū yā.

<sup>41</sup> Te ni ndee yā jeē vuelta unī, te ni cahán yā jín de:

Vijna te cusū rō te ndetātu ró. Te tuú chi je ni cuu, chi je ni quee hora, te ruhū, Yāā ní nduu tēe, natūu ri te jnī tēe cáhiyo cuéchi ruhū.

<sup>42</sup> Ndocuiñī jijnáhan ró, chi je vēji tēe nastúu ruhū, te quihín yō jín de. Achí yá.

*Jeē ní cajñi de Jesús*

*(Mt. 26.47-56; Lc. 22.47-53; Jn. 18.2-11)*

<sup>43</sup> Te sá cáhán gā yā súcuan, te ni quee-ni Judas, ñn jnáhan jeē uxí uū tēe cáscuáha jín yá. Te vējicoo cuehē tēe jín de, cándaha de espada jín yujnu. Chi sutū cácujeñnu jín tēe cástéén tutu ley jín tēe jéñnu cándacu jniñu, ni catajii de tēe ún.

<sup>44</sup> Te Judas, tēe nastúu ya ún, je ni jēhe de ñn seña nuū tēe un jijnáhan, chi ni cachi de:

Tēe jeē téchūhu rí un cúu. Te jnī ró jijnáhan ró quihín rō jín, te ma siaá cuiti rō, achí de.

<sup>45</sup> Te ni quee de nde nuū Jesús, te ni cahán de jín yá:

Maestro, Maestro, achí de.

Te ni techúhú de ya.

46 Te tāca gá tēe un ní cajni de ya, te cuangoo de jín yá.

47 Te ìn tēe ìne jín yá ní tava de espada de, te ní jehnde de sōho ìn mozo maá sūtū cujéhnū ga.

48 Te ní cahān Jesús jín ñáyyu cuehē ún:

¿Te va tēe cuihná cúu ri jeē véjicoo ró jín espada jín yujnu jni ró rúhū jeē súcuan?

49 Tāca quivī ni ine ri jín ró jijnáhan ró ini templo cáhnu, ní steén rī jnūhun, te tu ní cajni ró rúhū. Te súcuan cásáha ró návaha na squícu jeē cahán tutu ì, achí yá.

50 Yūcuán na te ndihi tēe cáscuáha jín yá, ní castóo de ya, ní cajinu de cuangoo de.

### *Tēe suchí jeē ní jinu*

51 Te ìn tēe suchí, ndíquín de ya cuahān de jín yá. Te ndí de máá ìn sahma cuitá. Te ní cajni tēe ún de.

52 Te máá sahma cuitá un ní canihīn. Te ní jinu máá ñi-ni de cuahān de.

### *Jeē ní indichi Jesús nuū junta tēe cácujehnū ga*

(Mt. 26.57-68; Lc. 22.54-55, 63-71; Jn. 18.12-14, 19-24)

53 Yūcuán na te ní jinūcoo de jín Jesús nuū sutū cujéhnū ga. Te tāca sūtū cácujehnū jín tēe jéhnū cándacu jniñu jín tēe cástéén tutu ley, ní candutútú de.

54 Te Pedro chí jíca-ni ndíquín de ya, te ní jinū de nde ini patio sutū cujéhnū ga. Te ní cucōo de jín táca policía, násaā de ñuhūn.

55 Te sutū cácujehnū jín ndihi tēe cásáha junta cujéhnū ga, ní canducú de cuēchi síquī Jesús, chí cahni de ya cácuni de. Te tu ní cánihīn de.

56 Chí cuehē de ní cacahān yaá síquī yā, te tu ní quíjnáhan jnūhun ní cacahān de.

57 Yūcuán na te ní candocuiñī sava de, te ní catee de cuēchi síquī yā, achí de:

58 Máá ná ní cajini ná cáhān de jeē canu de templo yáha jéé ní cuvāha ní casáha tēe, te nuū uní quivī te nacani de inga jeē násūu jín ndaha tēe cuvāha, achí de. Achí jíjnáhan.

59 Te ní jnūhun yáha tu ní quíjnáhan tucu jeē cácahān de síquī yā.

60 Yūcuán na te sutū cujéhnū ga ní ndocuiñī de nuū ñáyyu cuehē ún, te ní cajnūhún de Jesús:

¿Naun tu cáhān cuiti rō? ¿A íyó ndáā jeē cácahān tēe yáha síquī rō? achí de.

61 Te máá yá tu ní cáhān cuiti yā, chí tú na vé ní stío cuiñī yā. Te sutū cujéhnū ga ní cajnūhún tucu de ya:

¿A máá ró cúu Cristo, Sēhe Yaā váha jeē cujéhnū? achí de jín yá.

62 Te ní cahān yā:

Suu ri cúu. Te coto ró jéé ruhū, Yaā ní nduu tēe, condee rī lado váha Yaā iyó poder, te ndiji ri ichi ándiví jín vícō, achí yá.

63 Yūcuán na te sutū cujéhnū ga ní jehnde de sahma de jeē quití ndasí ni de, te ní cahān de:

¿Ndé jíni ñúhún gá yō testigo núu súcuan?

64 Chí je ní cajini ró jéé cahán de jnūhun ndevāha jeē quití ní Yaā Dios, chí sáha de máá de Sēhe Yaā Dios. ¿Te ndese cájeni ní rō? Achí de.

Te ndihi de ní cacahān jeē na cúu yā.

65 Te sava de ní catesihí de nuū yā, te ní cajesi de sahma nuū yā, te ní cacani de ya. Te cácahān de jín yá:

Cachí ndé ìn cúu jeē ní caní róhó, achí de.



Te tāca tēe policia ni cacani de nuū yā.

*Jeē ní cachi Pedro jeē tu jíní de ya*  
(Mt. 26.69-75; Lc. 22.56-62; Jn. 18.15-18, 25-29)

<sup>66</sup> Te íne Pedro ini patio ichi chíji nuū cáhīn de jín Jesús. Te ni quee ñin ñahan jéjníñu vehe sutū cujéñu ga ún.

<sup>67</sup> Te ni jito ña nuū de jeē néne de násaā de yuñhún. Te ni jito vāha ña nuū de, te ni cahān ña:

Róhó chí suni ni jica ró jín Jesús, tēe ñuu Nazaret, achí ña.

<sup>68</sup> Te máá de tu ní cáchi de, chí ni cahān de:

Tu jíní rī de, ni tu jíní rī na jñūhun cáhán rō, achí de.

Te ni quenda de yéhyí nuū quéhe. Te ni cana-ni líhli.

<sup>69</sup> Te ñahan jéjníñu un ní jito tucu ña nuū de, te ni quejéé ña cáhán ña jín ñáyuū cáhīn yūcuán:

Tēe yáha suni jñáhan tāca tēe un cúu, achí ña.

<sup>70</sup> Te máá de tu ní cáchi tucu de. Te ni cunúu jecu gā, te ñayuu cáhīn yūcuan ní cacahān tucu i jín Pedro:

Jendaá ndije jeē suni jñáhan de cúu ró, chí tēe Galilea cúu ró, te ñnuū-ni cáhán rō jín de jñáhan de. Achí i.

<sup>71</sup> Yūcuán na te ni quejéé de cáhán teyí de jeē na cóndee cuēchi siquī de núu tu cáhán ndaā de:

Tu jíní rī tēe un jéē cácahán rō jñūhun de, achí de.

<sup>72</sup> Yūcuán na te ni cana-ni líhli vuelta uū. Te ni nucūhun ni de jñūhun ni cahān Jesús jín de: Nde ná tu cana líhli uū jínu, te yūhu ró te cahān rō uní jínu jeē tu jíní rō ruhū. Te ni nacani ni de siquī jñūhun ún, te ni ndahyū de.

*Jeē ní indichi Jesús nuū Pilato*  
(Mt. 27.1-2, 11-14; Lc. 23.1-5; Jn. 18.28-38)

## 15

<sup>1</sup> Te jeē ní cundijin, te sutū cácujeñu ni candutútú de jín tēe jéñu cándacu jñíñu, jín tēe cástéén tutu ley, jín ndihi tēe casáha junta cujéñu ga, te ni casquijñáhan de jñūhun. Te ni cajihni de Jesús, te cuango de jín yá nuū Pilato, tēe cúu gobernador.

<sup>2</sup> Te Pilato ni cajñūhún de ya:

¿A máá ró cúu Rey ñayuu hebreo? achí de.

Te ni cahān yā:

Suu rí cúu, nájñūhun cáhán rō.

<sup>3</sup> Te sutū cácujeñu un ní cacahān de cuehē cuēchi siquī yā.

<sup>4</sup> Te Pilato ni cajñūhún tucu de ya:

¿Naun tu cáhán cuiti rō? ¿A tu jíní ró jéē cuehē cuēchi cácahán de siquī rō? achí de.

<sup>5</sup> Te tu ní cáhán cuiti yā ni ñin jñūhun jín de. Te nahán ní naa ni Pilato ndéhé de nuū yā.

*Jeē ní cundaā jeē cúu yā*  
(Mt. 27.15-31; Lc. 23.13-25; Jn. 18.38-19.16)

<sup>6</sup> Te íyó costumbre Pilato jeē quiví víco un síáá de ñin tēe íne vecāa, núu na-ni tēe cácuñi ñayuu.

<sup>7</sup> Te íyó ñin tēe nání Barrabás, íne de vecāa jín táca jñáhan de siquī jeē ní candonda de siquī tohō te ni cajehni de ndiyi.

<sup>8</sup> Te ni quecoo ñayuu cuehē, te ni cacahān i jíin Pilato jeē na sáha de nájñuhun iyó costumbre de.

<sup>9</sup> Te ni cahān Pilato jíin i:

¿A tu cáconi rō jeē siaá ri tēe cúu Rey rohó ñayuu hebreo? achí de.

<sup>10</sup> Súcuán ni cahān de, chí cúní de siaá de Jesús. Chí je ni jecūhun ni de jeē ní cacacuésún ni tāca sūtū un cájito de ya, te jeē yúcuan ní quijicoo jíin yá nuū de.

<sup>11</sup> Te sutū cácujeñnu un ní cascáhán de ñayuu cuehē un jéē váha ga na cácan i jeē siaá Pilato Barrabás.

<sup>12</sup> Yūcuán na te ni cajñuhún tucu Pilato:

Núu súcuán ¿te ndese cáconi rō jeē sáha ri jíin tēe jeē cacahān rō jeē cúu de Rey rohó ñayuu hebreo? áchí de jíin i.

<sup>13</sup> Te ni cacana jee i:

Cata caa ní de jicā cruz, na cúu de, áchí i.

<sup>14</sup> Te ni cahān Pilato:

¿Na cuēchi ni sáha de núu súcuán?

Te ñayuu un ní cacana jee tucu i:

Cata caa ní de jicā cruz, na cúu de, áchí i.

<sup>15</sup> Te Pilato cuní de jeē na cúsiñ ni ñayuu jíin de, te ni siaá de Barrabás. Yūcuán na te ni ndacu de jñiñu jeē na cáni tācá soldado Jesús, jíin jéē cata caa de ya jicā cruz.

<sup>16</sup> Yūcuán na te soldado un cuángoo de jíin yá ini patio palacio, jeē sácata de nuū yā. Te ni canastútú de ndíhi jnáhan de.

<sup>17</sup> Te ni cachuhun de ya ññ sahma cuehé ndíhí jéē cúu sahma rey. Te ni casáha de ññ corona iñu, ni cachuhun de xiní yā.

<sup>18</sup> Yūcuán na te ni cacana de:

Nacā jeē váha rey cúu Rey ñayuu hebreo, achí de.

<sup>19</sup> Te ni cacani de yujnu xiní yā, te ni catesihí de nuū yā, te ni cajecuiñ yití de nuū yā, casáha de jeē chíñuhún de ya.

<sup>20</sup> Te nuū ní cuu ní casácata de nuū yā, te ni catava de sahma cuehé ndíhí un, te ni canachuhun de ya sahma máá yá. Te ni caquenehen de ya jeē cata caa de ya jicā cruz.

*Jeē ní cacata caa de ya jicā cruz  
(Mt. 27.32-44; Lc. 23.26-43; Jn. 19.17-27)*

<sup>21</sup> Te ññ tēe naní Simón ñuu Cirene, tēe cúu tátá Alejandro jíin Rufo, vendiji de jeē ni jéhēn de rancho. Te ni yāha de yūcuán, te ni catejñiñu soldado un de jeē cóndiso de cruz yā.

<sup>22</sup> Te cuangoo de jíin yá ññ lugar nuū naní Gólgota, jeē cuní cahān Lugar Yiquí Xiní.

<sup>23</sup> Te ni cajēhe de vino jeē ní sácā núu jíin sūje uvuā jeē cóho ya, te tu ní jíhi ya.

<sup>24</sup> Te ni cacata caa de ya jicā cruz. Te ni casáha de sorteo jeē siquí ndese nihīn ññ ññ de sahma ya.

<sup>25</sup> Te cahīn ni cacata caa de ya.

<sup>26</sup> Te jñuhun ni catee de xiní cruz cahán na siquī ni jihí yā: Yāha cúu Rey ñayuu hebreo, achí.

<sup>27</sup> Te suni ni cacata caa de uū tēe cuíhná núu uū gā cruz, ññ de lado váha ya, te ññga de lado jecó yá.

<sup>28</sup> Te ni squícu jnūhun cáhán tutu ií: Ni casquíjnáhan de ya jíin tée cásáha neé, áhí.

<sup>29</sup> Te ñayuu cáyāha yūcuán cáscuícó i xiní i, te cácahān neé i: Jājaān. Róhó chí cáhán rō jeē cánu rō templo cáhnu, te nuū uní quivī te nuondichí sáha rō.

<sup>30</sup> Núu súcuan te jnama ró máá ró, te nuu ró jicā cruz vií, achí i.

<sup>31</sup> Te suni súcuan ni cacahān catá sutū cácujeñhu jíin tée cástéén tutu ley, te áhí de cácahān maá de:

Núu inga ñayuu ni jnama de, ¿te naun tu cúu jnama de máá de vijna?

<sup>32</sup> Núu na cúni yō jeē Cristo, Rey ñayuu Israel, nuu de jicā cruz vijna, yūcuán na te candíje yó, áhí de jíjnáhan de.

Te tēe cándita caa jíin yá, suni súcuan ni cacahān neé de.

### *Jeē ni jihí Jesús*

(Mt. 27.45-56; Lc. 23.44-49; Jn. 19.28-30)

<sup>33</sup> Te nuū ní cuu cahuxí uū, te ni cunee ní cáhnu nde cahuní.

<sup>34</sup> Te nuū ní cuu cahuní, te ni cana jee Jesús:

Eloi, Eloi, ¿lama sabactani? achí yá. Te jnūhun un cúni cahān: Yāā Dios maá ná, Yāā Dios maá ná, ¿naun ní stóo ní sáña?

<sup>35</sup> Te sava ñayuu cáhīin yūcuan, ní cajiní i jnūhun ún, te ni cacahān i:

Cuni nahín, chí cána de xiní Elías, tēe ni nacani jnūhun Yāā Dios jenahán, achí i.

<sup>36</sup> Te ni jinu ĩn tēe, ni jechundaji de cachí nuū vinagre iyá. Te ni tee de xiní ĩn yujnu, te ni tee de yuhu ya jeē cóho ya. Te ni cahān de:

Na cóndēhe yó núu quiji Elías nasnú de, áhí de.

<sup>37</sup> Te máá Jesús ni cana jee ya, te ni jihí-ni ya.

<sup>38</sup> Yūcuán na te sahma ndíta caa jeē ndihyú cuarto ií ini templo cáhnu, ni ndatā sava sava nde xiní te nde nuū jehé.

<sup>39</sup> Te tēe ñuu Roma jeē cúu capitán, índichi de nuū yá, te ni jini de jeē ní cana jee ya te ni jihí yá. Te ni cahān de:

Jendaá ndíje jeē Séhe Yāā Dios cúu tēe yáha, áhí de.

<sup>40</sup> Te suni cáhīin sava ñahan, cándēhe jicá ña. Te uní ña cácuu María ñuu Magdala, jíin María naná José jíin Jacobo suchí, jíin ñahan naní Salomé.

<sup>41</sup> Te ñahan yáha ní candiquín ña ya, ni cajejníñu ña nuū yá nde náa jíca ya Galilea. Te suni cáhīin cuehē gā ñahan jeē ní jéngoo jíin yá ñuu Jerusalén.

### *Jeē ní quindūji Jesús*

(Mt. 27.57-61; Lc. 23.50-56; Jn. 19.38-42)

<sup>42</sup> Te ni ini quivī ún. Te quivī sátūhva cúu, chí sajnē cúu quivī ndétātú.

<sup>43</sup> Te ni quee José, tēe ñuu Arimatea. Te cúu de ĩn tēe cújēhnu nuū junta cújēhnu ga. Te suni ñūhun ni de jeē quiji quivī jeē ndacu Yāā Dios jniñu. Te tu yúhú de chí ni quivī de nuū Pilato, ní jicān de yiqui cúñu Jesús.

<sup>44</sup> Te Pilato chí náa ni de jeē yachí ni jihí yá. Te ni cana de capitán, te ni cajñuhún de tēe un núu je ni jihí yá.

<sup>45</sup> Yūcuán na te ni cucáhnu ni de jeē ni cáhān capitán jíin de, te ni jēhe de jnūhun jeē quihin José yiqui cúñu yá.

<sup>46</sup> Te José ní jeen de ĩn sahma cuitá váha. Te ni snúu de yiqui cúñu yá, te ni chusúcún de sahma ún. Te ni chindūji de ya ini ĩn yaū jeē quindūji ndiyi, jeé ní caan jíca ĩn cava. Te ni jesi de ĩn yaū yuhu yá un.

<sup>47</sup> Te María ñuu Magdala, jíin María naná José, ni cajito ña nuū ní cachindūji de ya.

*Jeē ní natecu Jesús  
(Mt. 28.1-10; Lc. 24.1-12; Jn. 20.1-10)*

## 16

<sup>1</sup> Te ni ini quivī ndétátú, te María ñuu Magdala, jíin María naná Jacobo, jíin Salomé, ni cajeen ña táca perfume jeē quíchuhun ña yiqui cúñu yā.

<sup>2</sup> Te jenéhen quivī domingo, jeē ní cane niāndii, te ni jinūcoo ña nuū ní yindūji ya.

<sup>3</sup> Te cácahān ña:

¿Ndé níhīn yō tēe tejiyo yuū ndihyú yuhu yáú? áchí ña.

<sup>4</sup> Te ni candacoto ña, te ni cajito ña jeē jé ni cujiyo yuū cáhnu un cuáhān.

<sup>5</sup> Te ni quivicoo ña ini yaū ndāyi. Te ni cajito ña ñn ndajéhé Yaā Dios jeē cáa nájñuhun tēe suchí, néne ya ichi lado váha, ñúhun ya ñn sahma cuijín cáni. Te ni cayūhú ña.

<sup>6</sup> Te ni cahān yā jíin ña:

Ma yūhu ró jijnáhan ró. Chi vecondēhe ró Jesús ñuu Nazaret, Yaā ni jíhī jicā cruz. Tuá yā yāhá, chi je ni natecu yā. Yāhá condéhé ró nuū ní cachindūji de ya.

<sup>7</sup> Cuánungoo te cachi rō nuū tēe cáscuáha jíin yá, jíin nuū Pedro, jeē xīhna gā maá yá jinū Galilea, te saá te najinūcoo de. Te yūcuán coto de nuū yā, nájñuhun ni cahān yā jíin de nde saá, áchí yá jíin ña.

<sup>8</sup> Yūcuán na te ñahan un ní quendacoo ña nuū ní yindūji ya, te cájinu ña cuangoo ña. Chi quísi i ña jeē cáyūhú ña. Te tu ní cácachi cuiñi ña nuū ní ñn, chi cáyūhú ña.

*Jeē ní nane Jesús nuū María ñuu Magdala  
(Jn. 20. 11-18)*

<sup>9</sup> Te Jesús ni natecu yā jenéhen quivī domingo. Te xīhna gā ni nane ndijin yā nuū María ñuu Magdala, ñahan jeē ní quenehen ya uxā tachī ini.

<sup>10</sup> Te cuahān ña cuacastūhún ña nuū táca tēe ni cajica jíin yá jeē ní nane ya nuū ña. Te cácuuihyá ni de te cándahyū de.

<sup>11</sup> Te nuū ní cajini de jñuhun jeē ní jito ña nuū yā jeē técu yā, te tu ní cácañdije de jñuhun cáhān ña.

*Jeē ní nane ya nuū uū tēe cáscuáha jíin yá  
(Lc. 24.13-35)*

<sup>12</sup> Yūcuán na te ni quendacoo uū jñahan tēe ún, cájica de cuahān de ichi rancho, te sñn modo ni nane ndijin yā nuū de.

<sup>13</sup> Te ni canandicó de, ni cacastūhún de nuū táca gá jñahan de. Te ni tu ní cácañdije tucu jñahan de jeē cácahān ndindúú de.

*Jeē ní tejñíñu ya de nacani de jñuhun  
(Mt. 28.16-20; Lc. 24.36-49; Jn. 20.19-23)*

<sup>14</sup> Te cúcuéé gá te ni nane ndijin yā nuū ndihúxí ñn de jeē cáyūcú de mesa cáyeji de staā. Te ni cahān yā nuū de, chi níhni ni de jeē tu cácañdije de jeē cácahān jñahan de un, jéē ní natecu yā ni cajito de ya.

<sup>15</sup> Te ni cahān yā jíin de:

Cuángoo jijnáhan ró ní ñayiví, te nacani ró jñuhun ri nuū táca ñayuu ndese jñama ri i.

<sup>16</sup> Te ñayuu candije te cuandute i, chi cácu i. Te ñayuu tú candije, chi jñahnū ndetū i.

<sup>17</sup> Te ñayuu candíje, sáha i tãcá jniñu jéhnú yáha jeē steén jeē iyó rí jíin i: Jíin síhví rí quenehen i tachí ini ñayuu. Te cahān i tijni yuhu jéé.

<sup>18</sup> Te núu ni jniñi sanaa i coō, chí núu ni jiji i veneno, te ma sáha dañó jíin i. Te suni soó i ndaha i siquí ñáyuu cácuñu, te nduvāha. Achí yá jíin de.

*Jeē ní ndaa ya cuanuhun yā andiví*

*(Lc. 24.50-53)*

<sup>19</sup> Yūcuán na te nuū ní ndihí ni cahān maá Jítóho yō jíin de jíjnáhan de, te ni ndaa ya cuanuhun yā andiví, te ni cucōo ya lado váha Yaā Díos nuū cujéhnú ya.

<sup>20</sup> Te máá de ni quendacoo de, ni canacani de jnūhun ya tãca lado ndese jnáma ya ñayuu. Te máá Jítóho yō ni chindéé ñáhán yá de. Te ni jēhe ya fuerza jeē sáha de tãcá jniñu jéhnú jeē steén jeē iyó ndáā jnūhun cánacani de. Te ni cuu. Amén.

## JNUHUN VAHA NI TEE SAN LUCAS

<sup>1</sup> Cuehē tēe ni cajicu de ni catee yúcún de historia Jesús, tãcá jniñu jeē ni sáha ya ni cajito yó.

<sup>2</sup> Te ni catee de tãca jnúhun jeē ní cacastúhun ñáyuu nuū yō, jeē ní cajito i jniñu yúcuan nde ná ni quejéé, te ni canacani i jnúhun ya.

<sup>3</sup> Te máá ná, suni ni nanducú yúcún ná tãca jnúhun ya, nde nuū ní quejéé. Te ni jeni ni na jéé suni iyó váha jeē tée cáji ná tãca jnúhun yáha nuū ní, amigo Teófilo.

<sup>4</sup> Te súcuan te cuni ni jéé iyó ndáá tãca jnúhun jeē ní cacastúhún i nuū ní.

### *Jeē ní cachi ndajéhé jeē cacu Juan tēe scuándute*

<sup>5</sup> Tiempo jeē ní cuu Herodes rey región Judea, te ni iyo iin sutū ñayuu hebreo, naní de Zacarías, te grupo Abías cúu de. Te ñasihí de naní ña Elisabet, te suni sēhe yúcún maá sūtū Aarón cúu ña.

<sup>6</sup> Te ndindúú de cahíyo ndaá de nuū Yaā Dios, te ndaá váha cásquícu de jniñu ndácu ley maá Jítoho yō Yaā Dios, cájito tãca ñáyuu.

<sup>7</sup> Te tú sēhe de iyó, chí ñahan númá cúu Elisabet, te je jéhnu ndindúú de.

<sup>8</sup> Te iin quiví te jéjniñu Zacarías nuū jniñu jeē cúu de sutū nuū Yaā Dios, chí ní quee quiví jeē ndívi grupo de.

<sup>9</sup> Te ní casáha de sorteo, nájnūhun iyó costumbre sutū. Te ní sáha tocar Zacarías jeē quiví de ini cuarto i templo Jítoho yō Yaā Dios, te cahmu de sūje cūtú.

<sup>10</sup> Te hora jeē cayú sūje cūtú, te tãca ñáyuu cuehē cáhlin i fuera, cájicān tahú i.

<sup>11</sup> Te ní cane iin ndajéhé maá Jítoho yō nuū de, iin ya lado váha altar nuū jéhmu de sūje cūtú.

<sup>12</sup> Te ní cunéé ní Zacarías ní jito de nuū yā, te yōhoyo ní yūhú de.

<sup>13</sup> Te ní cahān ndajéhé un jín de:

Zacarías, ma yūhu ró, chí je ní chíhi Yaā Dios cuenta jeē ní jícān tahú rō. Te ñasihí ró Elisabet, scácu ña iin sēhe yí, te snání ró i Juan.

<sup>14</sup> Te yōhoyo cusí ní rō. Te cuehē ñayuu cusí ní jeē cácu i.

<sup>15</sup> Chí cujéhnu sēhe ró sáha máá Yaā Dios. Te ma cóho i vino ní ndixi cuí. Te cunuú máá Espíritu Santo jín i, nde ná tu cacu i.

<sup>16</sup> Te sáha i jeē cuehē ñayuu nación rō Israel ndívicoo i nuū Jítoho i Yaā Dios.

<sup>17</sup> Te xihna gā Juan quiji nacani jnúhun Jítoho yō Jesús, te sáa te quiji ya. Te sáha i nájnūhun ní sáha Elías, tēe ní nacani jnúhun Yaā Dios jenahán, te conevāha i poder jeē nácani i jnúhun, nájnūhun ní conevāha Elías. Te sáha i jeē tãca tátá ndumaní de jín sēhe de. Te suni sáha i jeē ñáyuu níhni ní cuatáhu i nuū Yaā Dios, nduu i ñayuu ndaá. Súcuan sátúhva i ñayuu návāha candíje i máá Jítoho yō jeē quiji ya. Achí ndajéhé.

<sup>18</sup> Te Zacarías ní cajnúhún de ya:

¿Ndese cucáhu ní na núu jendaá cúu? Chí tēe jéhnu cúu ná, te suni jéhnu ñasihí ná, áchí de.

<sup>19</sup> Te ní cahān ndajéhé un jín de:

Máá rí cúu Gabriel, te íne ri nuū Yaā Dios, jejniñu ri nuū yā. Te ní tají yá ruhú vèji ri cahān rí jín ró, te nácani ri jnúhun váha yáha nuū rō.

<sup>20</sup> Te jeē tu ní cándíje ró jnúhun ni cahān rī, te cuñhín ró, te ma cúu cahān rō, chi nde na cácu sēhe ró. Te squícu nahín jnúhun cáhán rī yāhá, na quée quivī, achí ndajéhé.

<sup>21</sup> Te ñayuu cáhīin ichi fuera, cándetu i Zacarías, te cájeni ni i na vé ni cuu jeē cucuéé de ini cuarto īi templo.

<sup>22</sup> Te nuū ní quenda de, te tuá ní cúu cahān de jín i. Te ni cajecūhun ni i jeē ini templo ni jito ndijin de ñn jeē ní stéén yā nuū de. Te máá seña na ni sáha de nuū i, chi ni cuñhín de.

<sup>23</sup> Te nuū ní jínu quivī ni jejniñu de ini templo, te cuanuhun de vehe de.

<sup>24</sup> Te ni cuu jecu quivī, te ñasihí de Elisabet ni jecūhun sēhe ña. Te ni īyo ña vehe ña uhūn yoō jeē tuá nde ní jéhén ña. Te jéni ni ña:

<sup>25</sup> Súcuan ni sáha máá Jítoho yō jín rí, te ni tejiyo ya jnúhun jeē cúcanu rī nuū ñáyuu jeē tú sēhe rī, jéni ni ña.

### *Jeē ní cachi ndajéhé jeē cacu Jesús*

<sup>26</sup> Te nuū iñú yoō, te ni tají Yaā Dios ndajéhé yā Gabriel, ni jehēn yā ñn ñuu naní Nazaret, ndañúu Galilea.

<sup>27</sup> Te ni jehēn yā nuū ñn sūchi síhí nání María. Te je ni cundaā jeē quijnáhan ña jín ñn tēe nání José, te sēhe yucūn rey David cúu de.

<sup>28</sup> Te ni quivī ndajéhé un núu ndeé ña, te ni cahān yā:

Tandii, nacā ndetū cúu ró. Chi máá Jítoho yō Yaā Dios iyó yá jín ró, te ni sáha ya jeē yóhyo ndetū gā cúu ró núu táca gā ñahan, achí yá.

<sup>29</sup> Te nuū ní jito ña nuū yā, te ni cunéé ni ña jeē súcuan cáhán yā, te jéni ni ña naun cáhán yā súcuan jín ña.

<sup>30</sup> Te ni cahān gā ndajéhé un jín ña:

Ma yūhu ró María, chi ni sáha Yaā Dios jeē váha jín ró.

<sup>31</sup> Te jecūhun sēhe ró te scácu ró ñn sēhe yíi, te snání ró i Jesús.

<sup>32</sup> Te kujéhnui, te conaní i Sēhe Yaā kujéhnui téyí. Te máá yá jeē cúu ya Jítoho yō Yaā Dios, sáha ya jeē cuu i rey, nájnúhun jíi i David ni cuu de rey.

<sup>33</sup> Te ní cáni ndacu i jniñu nuū ñáyuu nación Israel. Te ma ndíhi cuiti jeē ndácu i jniñu. Achí ndajéhé.

<sup>34</sup> Yūcuán na te ni cajnúhún María:

¿Ndeese coo jeē ní cáhán ní? Chi ná tu coo yí ná, achí ña.

<sup>35</sup> Te ni cahān ndajéhé un:

Máá Espiritu Santo quiji síquī rō, te poder maá Yaā kujéhnui téyí sáha ñn jniñu jéhu jín ró. Te jeē yúcuan máá sūchi lí jeē cácu, quihi cuenta i nuū Yaā Dios, te cahān ñayuu jeē Sēhe Yaā Dios cúu i.

<sup>36</sup> Te suni cástūhun rí nuū rō jeē jnáhan ró Elisabet, suni scácu ña ñn sēhe vésū je jéhnui ña. Te vijna iyó iñú yoō jeē tuá cácahān ñayuu jeē cúu ña ñahan númá.

<sup>37</sup> Chi ndíhi-ni cuu sáha Yaā Dios, te tu iyó ni ñn jeē ma cúu sáha ya, achí ndajéhé un.

<sup>38</sup> Yūcuán na te ni cahān María:

Cuu núu súcuan, chi sáha ná táca jniñu ndácu Jítoho yō Yaā Dios, te na cóo jín ná nájnúhun ni cachi ní, achí ña.

Te máá ndajéhé un cuáhān-ni ya.

### *Jeē ní jécondéhé María Elisabet*

<sup>39</sup> Te ni cuu jecu quivī, te yachí cuahān María, ni caa ña yucu cuahān ña ñn ñuu región Judea.

<sup>40</sup> Te ni jinū ña vehe Zacarías, te ni cahān ña jíin Elisabet.

<sup>41</sup> Te nuū ní jini Elisabet jeē cahán María jíin ña, te sūchi ñúhun chīji ña ni canda-ni i. Te ni cunuú Espiritu Santo ini anuá ña.

<sup>42</sup> Te ni cahān jee ña:

Ni sáha Yaā Dios jeē yóhoyo ndetū gā cúu ró nuū tāca gá ñahan, jíin jéē yóhoyo ndetū sēhe ró.

<sup>43</sup> ¿Te ndese cúu jeē ní quee naná maá Jítóho rī nuū rī? Chi tu cújéhnū cuiti rī.

<sup>44</sup> Chi jeē ní jini-ni ri jnūhun ni cahān rō jíin rī, te sūchi ñúhun chīji ri ni canda i jeē cúsiñ ni i.

<sup>45</sup> Te nacā ndetū rō jeē ní candije ró, chi squicu nahín tāca jnūhun ni cahān maá Jítóho yō jíin ró. Achí Elisabet.

<sup>46</sup> Yūcuán na te ni cahān María:

Cáhán rī jeē cújéhnū ndasí maá Jítóho yō Yaā Dios,

<sup>47</sup> te cúsiñ ni rī jíin Yaā Dios, Yaā jnáma ruhū.

<sup>48</sup> Chi ni sáha ya cuenta ruhū, vésu tu cújéhnū ri.

Te na squicu ri jniñu ndácu ya.

Te nde vijna te tāca ñáyuu jeē nácacu, cahān i jeē yóhoyo ndetū rī.

<sup>49</sup> Chi Yaā jnái ndihi poder, ni sáha ya jniñu jéhnū jíin rī.

Te Yaā ñ ndoo cúu ya.

<sup>50</sup> Te ní cáni cundáhú ni yā tāca ñáyuu ndíso ñyo nuū yā.

<sup>51</sup> Ni sáha ya jniñu jéhnū jíin poder yā,

chi ni scúnu ya ñáyuu casándúxi maá,

<sup>52</sup> te ñáyuu cácujeñhū, ni quende ya jeē cújéhnū i.

Te ñáyuu ndahú chi ni sajéhnū ya i,

<sup>53</sup> te ñáyuu cájiñ sōco ni jēhe ya jeē cáji vāha i.

Te ñáyuu cucá ní natají yá i súcuan-ni.

<sup>54</sup> Te ni chindéé ñáhán yá yohó, ñáyuu nación Israel, jeē cácuu yó mozo yā,

te tu náa ni yā jeē cundáhú ni yā yohó.

<sup>55</sup> Chi súcuan ni jejnūhun ya nuū tāca jíi yō,

nuū Abraham jíin táca yúcūn de jeē cóo ní cáni.

Achí María.

<sup>56</sup> Te ni condee ña jíin Elisabet nájnūhun uní yoō. Yūcuán na te cuanuhun ña vehe ña.

### *Jeē ní cacu Juan tēe scuándute*

<sup>57</sup> Te ni jinū quiví jeē scácu Elisabet sēhe ña, te ni scácu ña ñn sēhe yíí.

<sup>58</sup> Te tāca ñáyuu ndeé yajni jíin ña jíin táca jnáhan ña, ni cajini i jeē yóhoyo ni cundáhú ni Yaā Dios ña, te ni jengoo i ni cacahān i jnūhun sñ ni jíin ña.

<sup>59</sup> Yūcuán na te nuū uná quiví jeē ní cacu i, te ni jengoo ñáyuu ni sáha i circuncidar sūchi yíquín un. (Te yūcuán cúu ñn jnūni nuū yíqui cúñu tāca sūchi yíí hebreo jeē steén jeē cácuu i ñáyuu Yaā Dios.) Te snání i sūchí un síhví tátá i Zacarías nuú.

<sup>60</sup> Te ni cahān naná i:

Ma cúu, chí Juan conaní i, áchí ña.

<sup>61</sup> Te ni cacahān i jíin ña:

¿Te naun? Chi tú ni ñn jnáhan ró nání súcuan, áchí i.

<sup>62</sup> Yūcuán na te jíin seña ni cacajnūhún i tátá sūchí un ndese cúni de jeē cónaní i.



<sup>63</sup> Te máá de ni jicān ĩn tutu, te ni tee de: Juan conaní i. Te tāca ñáyyuu un ní canaa ni i cájito i.

<sup>64</sup> Te ni nduvāha Zacarías jeē ní cuñhín de, te ni quejéé de cáhán de jeē yóhyo vāha Yaā cúu Yaā Dios.

<sup>65</sup> Te tāca ñáyyuu ndeé yajni jíin de, yóhyo ni canaa ni i. Te ní yucu región Judea ni jitē núu tāca jnūhun yáha jeē súcuan ni cuu.

<sup>66</sup> Te tāca ñáyyuu jeē ní cajini jnūhun, ni quejéé i cánacani ni i, te cácajnūhun jnāhan i:

¿Ndese coo na cuéhnu sūchi yáha? áchí i.

Chi máá Jítóho yō yóhyo ni sáha ya jeē vāha jíin i.

### *Jnūhun luu jeē ní nacani Zacarías*

<sup>67</sup> Te tátá i Zacarías ni cunuú Espíritu Santo jíin de, te ni nacani de jnūhun ni steén Yaā Dios nuū de:

<sup>68</sup> Yóhyo vāha Yaā cúu máá Jítóho yō, Yaā Dios yohó ñáyyuu Israel, chi ni quiji ya nuū yō jeē cácuu yó ñáyyuu yā, te ni jnama ya yohó.

<sup>69</sup> Te ni jeni ya ĩn Yaā iyó poder jeē jnáma ya yohó,

te Yaā ún cacu yucūn mozo yā rey David.

<sup>70</sup> Chi súcuan ni jejnūhun ya, ni cacahān tāca téé ndoo ánuá jeē ní canacani de jnūhun ya jenahán.

<sup>71</sup> Chi ni cacahān de jeē jnáma ya yohó núu jeē cájito uhū yohó, jíin núu jeē cáquitī ni nuū yō.

<sup>72</sup> Chi ni cundáhú ni yā tāca jíí yō jijnáhan, te tu ní náa ni yā contrato ĩi yā.

<sup>73</sup> Chi suu un ní jejnūhun téyí yá nuū jíí yō Abraham,

<sup>74</sup> suu jeē jnáma ya yohó núu ñáyyuu cájito uhū yohó, návāha cuajniñu yó núu yā, te ma yūhu yó i.

<sup>75</sup> Te coo ndaā coo ndoo ánuá yō, cuajniñu yó núu yā tāca quívi jeē cótecu yō.

<sup>76</sup> Te róhó súchi lúli, cuu ró téé nacani jnūhun Yaā cujéhu téyí.

Chi cosnúu ró ichi núu máá Jítóho yō, návāha sátūhva ró ñáyyuu, te sáá te quiji ya.

<sup>77</sup> Te castūhun ró nuū ñáyyuu máá yá jeē jnáma ya i, jíin jéé cóne cáhnu ni yā nuū tāca cuéchi i.

<sup>78</sup> Chi Yaā Dios máá yó, vāha ni yā te cundáhú ni yā yohó.

Jeē yúcuan tají yá máá Yaā jeē sáha jeē cundajin ini anuá yō, quiji ya nde andiví,

<sup>79</sup> návāha jecūhun ni yohó jéé cáyūcu nájñūhun nuū néé nuū jé yajni cuu yō.

Te chuhun ya yohó ichi nuū cóo ndeyí coo sīi ni yō.

Achí Zacarías.

<sup>80</sup> Te sūchi lúli un ní jehnu i te ni ije i jíin jnūhun ya. Te ni condee i nde nuū ñūhun téhé ndé quívi ní quenda ndijin i nuū ñáyyuu Israel.

### *Jeē ní cacu Jesús (Mt. 1.18-25)*

## 2

<sup>1</sup> Te ni cuu jecu quívi, te Augusto, téé cúu rey, ni ndacu de jniñu jeē coo censo jeē núcosō síhvi ndivii ñáyyuu ní cáhnu nuū ndácu de jniñu.

<sup>2</sup> Yāha cúu censo xihna ñūhún jéé ní casáha de ná ni cuu Cirenio gobernador nación Siria.

<sup>3</sup> Te ndivii ñáyyuu cuanungoo i ná ñuu ná ñuu máá i jeē nácuāha i síhvi i.

4 Te suni José ni quenda de ñuu Nazaret, ndañúú Galilea. Te cuanuhun de región Judea, te ni najinū de ñuu Belén, jeē cúu ñuu nuū ní cacu rey David jenahán. Chi sēhe yucūn David cúu de.

5 Te ni jehēn de návaha nacuaña de sǎhví de jíin María, chi je yajni quijnáhan ña jíin de. Te ñúhun sēhe ña ni sáha Espíritu Santo.

6 Te níni cáhīn de yūcuán te ni jinū quiṽi jeē cacu sēhe ña.

7 Te ni scácu ña sēhe yǎ núú ña, te ni chusúcūn ña i sahma cuitá, te ni jequin ña i ini ñn nundōo núú yéji quiṽi, chi tuá núne mesón condee ña.

### *Jeē ní canecoo ndajéhé yā nuū pastor*

8 Te yajni ñuu Belén cáhīn tēe cácuu pastor, te cándito de lanchi de ní ni ñuu jecuáá nde yucu ún.

9 Te ñn sanaa-ni te ni cane ñn ndajéhé maá Jítóho yō nuū de, te nduva maá Jítóho yō ni ndindēe ní núú cáhīn de. Te yóhoyo ni cayūhú de.

10 Te ni cahān ndajéhé un jíin de:

Ma yūhu ró jijnáhan ró, chi vēji ri castūhun rí jnūhun vāha nuū rō, te sáha jeē cúsiñ ndasí ní táca ñáyuu:

11 Chi vijna nde ini ñuu David ni cacu ñn Yaā ñnama róhó, te maá Jítóho yō Cristo cúu ya.

12 Te súcuan nacuni rō sūchi yíquín un, chi ñúsúcūn i sahma cuitá te cá tú i ini ñn nundōo núú yéji quiṽi. Achí yā.

13 Te ñn sanaa-ni te ni canecoo cuehē gā ndajéhé andiví, cáhīn ya jíin ndajéhé un, te cácahan yā jeē yóhoyo vāha Yaā cúu Yaā Dios. Te achí yá:

14 Yóhoyo luu cújéhun Yaā Dios nde nuū sucún.

Te na ndúvāha ni táca ñáyuu ñayívi, sáha ya jeē cúsiñ ni yā jíin i. Achí táca ndajéhé.

15 Yūcuán na te cuanungoo ndajéhé un andiví. Te tēe cácuu pastor ni cacahān de jijnáhan de:

Na quihín yō nde ñuu Belén, te cuni yō na vé ni cuu jeē ní castūhun maá Jítóho yō nuū yō, achí de.

16 Te yachí cuangoo de, te ni nanihīn de María jíin José jíin sūchi yíquín un, cá tú i ini nundōo núú yéji quiṽi.

17 Te nuū ní cajini de nuū i, te ni canacani de jnūhun jeē ní cachi ndajéhé yā nuū de siquī sūchi yíquín un.

18 Te ni canaa ni táca ñáyuu cájini nahín i jnūhun cácahān tēe cácuu pastor.

19 Te María, ni quendōo táca jnūhun yáha nuū jeē níjnūni ña, te nácani ni ña siquī.

20 Te tēe cácuu pastor cuanungoo de, te ni cacahān de jeē yóhoyo vāha Yaā cúu Yaā Dios siquī táca jēe ní cajini sōho de jíin jēe ní cajito de, chi ni squícu nahín nájnūhun ni cahān ndajéhé yā jíin de.

### *Jeē ní castéén de i nuū Yaā Dios ini templo*

21 Te ni cuu unā quiṽi jeē ní cacu ya, te ni casáha de circuncidar sūchi yíquín un. Te ni casnání de i Jesús, chi sǎhví yúcuan ní cachi ndajéhé yā nuū María nde ná tu jecūhun i.

22 Te ni jínu quiṽi jeē casquícu ña costumbre jeē ndúndoo ña nuū Yaā Dios jijnáhan ña, nájnūhun cáhán ley jeē ni jéhe ya nuū Moisés. Te ni jengoo de jíin i ñuu Jerusalén jeē nácuña de i nuū maá Jítóho yō Yaā Dios.

23 Súcuan ni casáha de, chi yósó núú tútu ley yā: Táca sūchi yǎ núú jēe cácacu, quihi cuenta i nuū Jítóho yō Yaā Dios, achí tutu.

24 Te suni cuasocō de nájñuhun cáhán ley maá Jítoho yō: Socō rō uū livi chí úú paloma, achí tutu.

25 Te ni iyo ñn tēe nání Simeón, ndéé de ñuu Jerusalén tiempo un. Te tēe ndaā, tēe chíñúhún váha nuū Yaā Dios cúu de. Te ññuhun ni de jeē quée maá Yaā jnama ñayuu nación de Israel. Te maá Espíritu Santo íyó yá jíin de.

26 Te je ni castúhun yá nuū de jeē ma cúu cuiiti de chí nde coto de nuū Cristo jeē tají maá Jítoho yō Yaā Dios.

27 Te ni steén yā nuū de jeē quihín de templo quiví ún. Te suni tátá naná sūchi yíquín Jesús, ni quivícoo de ini templo jíin i, jeē nácuāha de i nuū Yaā Dios nájñuhun cáhán ley Moisés.

28 Te Simeón ni ñnunundee de i, te ni cahān de jeē yóhyo váha Yaā cúu Yaā Dios, te áhí de:

29 Tátá Yaā Dios, vijna te cuu cuāha ni jñuhun jeē cuu ná, chí je ni cusī ni ná. Chí je ni squícu ní jñuhun ni jejnūhun ní nuū sãña jeē cúu ná mozo ni.

30 Chí ni jito jíinú na nuū Yaā jnama sãña jíjnáhan ná.

31 Chí ni jeni ní yá jeē jnama ya táca ñáyuu ñayiví.

32 Te maá yá sáha jeē cúndijin ini anuá ñayuu táca nación, návāha jecūhun ní i siquí ní.

Te sáha ya jeē cujéhu ñayuu maá ní Israel.

Achí Simeón.

33 Te José jíin náná i cánaa ni de cájini nahín de jñuhun ni cahān Simeón siquí i.

34 Te ni jíicán tahú Simeón jehē de jíjnáhan de, te ni cahān de jíin náná i María: Sūchi yáha vēji i jeē candíje cuehē ñayuu nación yō Israel, te cácu i jíjnáhan i. Te sava i ma candíje i, te jnahñú ndetú i. Chí cúu i Yaā ní tají Yaā Dios, te sa squéhichí ní cuehē ñayuu i.

35 Te súcuan te quenda ndijin ndese cájeni ni táca ñáyuu. Te maá ró chí jnahuhū ndasí ní rō coto ró jéé ndóho i. Achí Simeón.

36 Te suni íne ñn ñahan nácani jñuhun Yaā Dios, naní ña Ana. Te sēhe Fanuel, yucūn Aser cúu ña. Te je jéhu ndasí ña. Te nde ná lulí ña te ni condee ña jíin yí ña uxā cuiyā.

37 Yūcuán na te ni quendōo ndáhú ña, te ni cuu cuñ xico cuñ cuiyā ña. Te tu cújijo ña ini vehe íi, chí jéjñíñu ña nuū Jítoho yō Yaā Dios nduú ñuú, te ndite ni ña te jíicán tahú ña.

38 Te suni hora un ní quee ña, te ni nacuatáhú ña nuū Yaā Dios. Te ni cahān ña jñuhun sūchi yíquín un jíin táca ñáyuu Jerusalén jeē cáñuhun ni i jeē quée Yaā jnama i.

### *Jeē cuánungoo de ñuu Nazaret*

39 Te ni jñu ni casquícu de táca jniñu ndácu ley maá Jítoho yō Yaā Dios, te cuanungoo de ñuu de Nazaret, ndañúú Galilea.

40 Te sūchi lulí un ní jehnu i, te ni ije i, te ni cundíchí gá i. Te ni sáha Yaā Dios jeē váha ndasí jíin i.

### *Jeē íne sūchi lulí Jesús ini templo*

41 Te ndíjnahan cuiyā jéngoo tátá i náná i ñuu Jerusalén, jeē cúu vico pascua.

42 Te nuū ní cuu uxí uū cuiyā i, te cuangoo tucu de Jerusalén, nájñuhun sáha sáha de quiví víco ún.

43 Te ni yáha vico, te cuanungoo de. Te sūchi lulí Jesús, ni quendōo i Jerusalén, te tu ní cájini José jíin náná i.

<sup>44</sup> Te cájeni ni de jeē cuahán i mēhñu ñáyyu cájica ichi ún. Te ni cajica de ñn quiví, te sáa te ni cananducú de i mēhñu táca jnánhan de jíin ñáyyu cájini jnánhan de jíin.

<sup>45</sup> Te tu ní cánanihIn de i. Te ni canandicó de cuango de Jerusalén, cuananducú de i.

<sup>46</sup> Te nuū uní quiví te ni cananihIn de i ini templo, néne i mēhñu téé cástéén tutu ley Yaā Dios, te jíni nahín i jeē cácahān de te cájnūhún i de siquī jnūhun ún.

<sup>47</sup> Te táca ñáyyu cájini jnūhun cáhán i, cánaa ni cájito jeē váha cájí xíní i te váha nástíó cuiñí i jnūhun.

<sup>48</sup> Te nuū ní cajito tátá i náná i nuū i, te ni canaa ni de. Te ni cahān naná i jíin i:

Séhē, ¿naun ni sáha ró súcuan jíin rí? Chi ruhū jíin tátá rō, yōhyo ni canacani ni rí cánanducú rí rohó, achí ña.

<sup>49</sup> Yūcuán na te ni cahān i:

¿Naun cánanducú ní sãña? ¿A tu cájini ni jéē cánuú cocu ná jíin jniñu Tátá na Yaā Dios? Achí i.

<sup>50</sup> Te tu ní cájecūhun ni tátá i náná i jnūhun ni cahān i.

<sup>51</sup> Yūcuán na te cuanuhun i jíin de jíjnánhan de ñuu Nazaret, te ni jendije i nuū de. Te náná i, ni quendōo táca jnūhun yáha nuū jeē níjnūní ña.

<sup>52</sup> Te Jesús ni jehnu ga i, te ni cundíchí gá i, te cúsh ni Yaā Dios jíin i, te suni súcuan táca ñáyyu.

*Jnūhun Juan tēe scuándute  
(Mt. 3.1-12; Mr. 1.1-8; Jn. 1.19-28)*

### 3

<sup>1</sup> Te ni cuu xahūn cuiyā jeē ndácu Tiberio jniñu ní naciún. Te Poncio Pilato cúu de gobernador Judea, te Herodes cúu de gobernador Galilea, te ñani de Felipe cúu de gobernador Iturea jíin Traconite, te Lisantias cúu de gobernador Abilinia.

<sup>2</sup> Te sutū cujéhu ga cácuu Anás jíin Caifás. Te ni quee jnūhun Yaā Dios nuū Juan sēhe Zacarías, jeē íne de nuū ñúhun téhé.

<sup>3</sup> Te ni jica nuu de táca ñuu jeē iyó yajni yūte Jordán. Te cáhán de jíin ñáyyu jeē na nácani ni i jeē stóo i cuēchi i te cuandute i, návāha cone cáhnu ni Yaā Dios nuū cuéchi i.

<sup>4</sup> Te súcuan ni squícu jnūhun Juan jeē yosó nuū tútu ni tee Isaías, tēe ni nacani jnūhun Yaā Dios nde jenahán:

Coo ñn tēe cana jee nde nuū ñúhun téhé:

Sátūhva ró máá ró jijnánhan ró, chi quee maá Jítóho yō.

Te sáha ró jniñu ndaā, chi vēji ya.

<sup>5</sup> Te táca xéhvā na ndúndaā, te táca yucu jíin loma na ndúnduhvā, te na ndúyóhó ichi yácuá, te na ndúlñi ichi ndáyí.

Te ndíhi un cúu jeē ndúvāha ndundaā anuá ñayuu nuū yā.

<sup>6</sup> Te ndíhi i cuni i jeē jnáma Yaā Dios i.

Súcuan cahān Juan, achí tutu.

<sup>7</sup> Te ni quendacoo cuehē ñayuu, cuahān i nuū de jeē scuándute de i. Te ni cahān de nuū i:

Va sēhe coō cácuu ró, chi xeēn rō nájjnūhun coō. ¿A cájeni ni rō jeē cuu cunu ró cácu ró núu castigo xeēn jeē quíji?

8 Núu súcuan te sáha ró jniñu váha, te súcuan stéén rō jeē ní nacani ndije ni rō jeē stóo ró cuéchi ró. Te ma cáni ni rō cahān rō jeē cuu cācu ró síquī jeē cácuu ró yúcuñ Abraham. Chi cáhān rī jín ró jeē cuu sáha Yaā Dios jeē táca yúu yáha nduu sēhe Abraham jeē candíje váha, te núu cúní yā.

9 Te cácuu ró nájnūhun nundehé jeē tu jéhe ndehé váha. Te vijna je iyó túhva Yaā Dios jeē cuáha ya castigo xeēn, nájnūhun je iyó túhva ñn cāa jeē cahnde nde yoho yujnu. Núu súcuan te sáha ya jín ró nájnūhun jín táca yujnu jeē tu cúun ndehé váha, jeē tahndé te cayū nuū ñuhún. Achí de.

10 Te ñayuu un ní cacajñuhún i de:

¿Te ndese sáha ná núu súcuan? Achí i.

11 Te ni cahān de:

Róhó jéé cánevāha uū sahma, na cuáha ró ñn nuū jeē tu névāha. Te róhó jéé cánevāha jeē yéji, suni súcuan na sáha ró, áchí de jín i.

12 Te suni jecu tēe cástútú xūhun renta, ni quecoo de jeē cuándute de. Te ni cacajñuhún de Juan:

Maestro, te máá ná, ¿ndese sáha ná jínáhan ná?

13 Te ni cahān Juan jín de:

Ma scaá ró cācān rō xūhún, chi máá cúhva-ni jeē ní ndacu jniñu nuū rō, achí de.

14 Te suni ni cacajñuhún jecu soldado:

Te máá ná, ¿ndese sáha ná jínáhan ná? áchí de.

Te ni cahān Juan jín de:

Ma quénde rō ndajñiñu ni ñn jín jñuhun siúhú ni jín jñuhun stáú yáhu, te cusñ ni rō jín yáhu ró, áchí de.

15 Te táca ñayuu cándetu i jeē quíji Cristo, Yaā jeē tají Yaā Dios, te cájeni ni i jeē sanaa te suu cúu Juan.

16 Te ni cahān Juan jín i jínáhan i:

Ruhú chi jín ndute scuándute ri rohó. Te vēji ñn Yaā jeē nájnūhun scuándute ya rohó cúu jeē cuáha ya Espíritu Santo condee ñni anuá rō, te poder yā cúu nájnūhun ñuhún. Te cújéhu ndasí yá, chi tú na vé jéhu cuiñi cúu ri nuū yā, ni jeē cuajñiñu ri nuū yā vēsú ñn jniñu lúli gá nájnūhun jeē ndají rí vēsú correa ndijēn yā.

17 Te sáha ya nájnūhun sáha tēe scānda trigo, chi sásñn ya ñayuu váha jín ñayuu cunéé, nájnūhun cúndoo trigo jeē quénda sñn paja. Te nastútú yá trigo yā ndiví ñni yacā yā. Te paja chi jnaa yā nuū ñuhún jeē ma ndahvá cuiñi. Achí Juan.

18 Te súcuan te jín cuéhē gā jñuhun ni stihví ni de ñayuu un, ní nacani de jñuhun váha Yaā Dios nuū i.

19 Te suni ni cahān xeēn de nuū Herodes, tēe cúu gobernador, chi tēe un ní nacueca de Herodías, ñasihí ñani de Felipe. Te cuehē gā jniñu neé súcuan ni sáha Herodes.

20 Te sa víhyá gā ni sáha de jeē neé gá, chi ni chune de Juan vecāa.

### *Jeē ní jendute Jesús*

(Mt. 3.13-17; Mr. 1.9-11)

21 Te nde ná tu quiví Juan vecāa, ná ni ine de ni scuándute de táca ñayuu, te suni ni scuándute de Jesús. Te jícán tahu yā, te ni nune-ni andiví.

22 Te ni cuun Espíritu Santo ni quee xiní yā, te cáa nájnūhun ñn paloma. Te ichi ándiví ní cahān ñn jñuhun:

Máá ró cúu Sēhe ri jeē maní ndasí rí jín, te yōhoyo cúsiñ ni rí jín ró, achí.

*Lista ñayuu yucūn ní quiji Jesucristo*

*(Mt. 1.1-17)*

<sup>23</sup> Te ná ni quejéé Jesús steén yā jnūhun, te íyó yá nánjnūhun ocō uxī cuiyā. Te cájeni ni ñayuu jeē séhe José cúu ya. Te José ni cuu séhe Elí,

<sup>24</sup> te Elí ni cuu séhe Matat, te Matat ni cuu séhe Leví, te Leví ni cuu séhe Melquí, te Melquí ni cuu séhe Jana, te Jana ni cuu séhe José,

<sup>25</sup> te José ni cuu séhe Matatías, te Matatías ni cuu séhe Amós, te Amós ni cuu séhe Nahum, te Nahum ni cuu séhe Esli, te Esli ni cuu séhe Nagai,

<sup>26</sup> te Nagai ni cuu séhe Maat, te Maat ni cuu séhe Matatías, te Matatías ni cuu séhe Semei, te Semei ni cuu séhe José te José ni cuu séhe Judá,

<sup>27</sup> te Judá ni cuu séhe Joana, te Joana ni cuu séhe Resa, te Resa ni cuu séhe Zorobabel, te Zorobabel ni cuu séhe Salatiel, te Salatiel ni cuu séhe Neri,

<sup>28</sup> te Neri ni cuu séhe Melquí, te Melquí ni cuu séhe Adi, te Adi ni cuu séhe Cosam, te Cosam ni cuu séhe Elmodam, te Elmodam ni cuu séhe Er,

<sup>29</sup> te Er ni cuu séhe Josué, te Josué ni cuu séhe Eliezer, te Eliezer ni cuu séhe Jorim, te Jorim ni cuu séhe Matat,

<sup>30</sup> te Matat ni cuu séhe Leví, te Leví ni cuu séhe Simeón, te Simeón ni cuu séhe Judá, te Judá ni cuu séhe José, te José ni cuu séhe Jonán, te Jonán ni cuu séhe Eliaquim,

<sup>31</sup> te Eliaquim ni cuu séhe Melea, te Melea ni cuu séhe Mainán, te Mainán ni cuu séhe Matata, te Matata ni cuu séhe Natán,

<sup>32</sup> te Natán ni cuu séhe David, te David ni cuu séhe Isaí, te Isaí ni cuu séhe Obed, te Obed ni cuu séhe Booz, te Booz ni cuu séhe Salmón, te Salmón ni cuu séhe Naasón,

<sup>33</sup> te Naasón ni cuu séhe Aminadab, te Aminadab ni cuu séhe Aram, te Aram ni cuu séhe Esrom, te Esrom ni cuu séhe Fares, te Fares ni cuu séhe Judá,

<sup>34</sup> te Judá ni cuu séhe Jacob, te Jacob ni cuu séhe Isaac, te Isaac ni cuu séhe Abraham, te Abraham ni cuu séhe Taré, te Taré ni cuu séhe Nacor,

<sup>35</sup> te Nacor ni cuu séhe Serug, te Serug ni cuu séhe Ragau, te Ragau ni cuu séhe Peleg, te Peleg ni cuu séhe Heber, te Heber ni cuu séhe Sala,

<sup>36</sup> te Sala ni cuu séhe Cainán, te Cainán ni cuu séhe Arfaxad, te Arfaxad ni cuu séhe Sem, te Sem ni cuu séhe Noé, te Noé ni cuu séhe Lamec,

<sup>37</sup> te Lamec ni cuu séhe Matusalén, te Matusalén ni cuu séhe Enoc, te Enoc ni cuu séhe Jared, te Jared ni cuu séhe Mahalaleel, te Mahalaleel ni cuu séhe Cainán,

<sup>38</sup> te Cainán ni cuu séhe Enós, te Enós ni cuu séhe Set, te Set ni cuu séhe Adán, te Adán ni cuu séhe Yaā Dios, chí ni sáha ya de.

*Jeē ní jito ndee jexeén Jesús*

*(Mt. 4.1-11; Mr. 1.12-13)*

## 4

<sup>1</sup> Te Jesús ni cunuú Espíritu Santo ini yā, te ni quenda ya yūte Jordán cuahān yā. Te ni jinū yā nde nuū ñúhun téhé ní sáha Espíritu Santo.

<sup>2</sup> Te ni ine ya yūcuan úū xico quivī, te ni jito ndee jexeén yā, chí cúní jeē sáha ya cuēchi. Te táca quíví ún tu ní yéji cuiti yā, te ná ni yāha quivī ún, te jí yā sóco.

<sup>3</sup> Yūcuán na te ní cahān jexeén un jíin yá:

Núu máá ró cúu Séhe Yaā Dios, te cahān rō jeē yuū yáha na ndúu staā caji rō, achí.

<sup>4</sup> Te ni cahān Jesús jíin:

Tuú chí yósó núú tútu ií: Nasūu máni máá jíin stáá cátecu ñayuu, chí suni jíin táca jnūhun cáhán Yaā Dios, achí yá.

5 Yūcuán na te cuahān jexeén un jíin yá nde xiní ñin yucu súcún, te ñin núnúu-ni ni steén nuū yā tācá naciún ní cáhnu ñayiví.

6 Te ni cahān jíin yá:

Nuū maá ró cuāha ri jeē cujéhnu ró núū ndivii naciún yáha, chi yōhyo luu cáa. Chi maá rí jnái ndihi, te cuu cuāha ri nuū ndé ñin cúní rí.

7 Núu súcuan te núu cuiñi yítí ró chiñúhún ró ruhū, te cuāha ndihi ri nuū rō. Achí jexeén.

8 Te ni cahān Jesús jíin:

Satanás, cujiyo quihīn rō, chi yósó núū tútu jeē chiñúhún ñayuu maá Jítoho i Yaā Dios, te nuū maá-ni ya cuajníñu i. Achí yá.

9 Yūcuán na te cuahān jexeén un jíin yá nde ñuu Jerusalén. Te ni jeni ya xiní torre templo. Te ni cahān jíin yá:

Te núu Sēhe Yaā Dios cúu ró, te síngava ró maá ró nde nuū ñúhún, chi jnama ya rohó.

10 Chí yósó núū tútu:

Tejníñu ya ndajéhe yá quijicoo coto róhó.

11 Te cunundee yā rohó jíjnáhan ya, návāha ma cáchihi ró jéhē rō nuū yuú.

Achí tutu. Achí jexeén.

12 Te ni cahān Jesús:

Tuú chí suni yósó núū tútu jeē ma cóto ndee ñayuu Jítoho i Yaā Dios, núu jnama ya i chí tuú, áchí yá.

13 Te tuá ni níhín jexeén modo coto ndee Jesús quiví ún, te ni cujiyo cuahān jecu-ni tiempo.

*Jeē ní quejéé Jesús nácani ya jñūhun región Galilea*

*(Mt. 4.12-17; Mr. 1.14-15)*

14 Te ni cunuú fuerza Espíritu Santo ini Jesús, te cuanuhun yā Galilea. Te ní región yajni yūcuan ní jítē núu jñūhun ya.

15 Te ni steén yā jñūhun ini tācá vehe ñi sinagoga, te ndihi ñayuu ni caje-jnúhún i ya.

*Jeē cuánuhun yā ñuu Nazaret*

*(Mt. 13.53-58; Mr. 6.1-6)*

16 Te ni najínú yā ñuu Nazaret nuū ní jehnu ya. Te quiví ndétátú ní quiví ya ini vehe ñi sinagoga, nájñūhun sáha sáha ya. Te ni ndocuiñi yā jeē cahu ya tutu ñi.

17 Te ni cajēhe de tutu ni tee Isaías, tē ni nacani jñūhun Yaā Dios nde jenahán. Te ni nune ya tutu ún, te ni nanihīn yā nuū yosó jñūhun ni cahu ya:

18 Espíritu maá Jítoho yō Yaā Dios iyó yá jíin rí,

chi ní tejníñu ya ruhū jeē nácani ri jñūhun vāha nuū ñáyuu ndahú.

Te ni tají yá ruhū vēji ri jíin jñūhun jeē ndúvāha ní ñayuu cácuquíhá ni.

Te castūhun rí nuū ñáyuu cáyihí ndaha jexeén jeē coo libre i.

Te sáha ri jeē ndúndijin ini anuá ñayuu tu cájecūhun ní,

te jnama ri ñayuu jeē cándoho i sáha jnáhan i.

19 Te nacani ri jñūhun jeē ní quee tiempo jeē sáha Jítoho yō Yaā Dios jeē váha ñayuu.

Achí tutu ni cahu yá.

<sup>20</sup> Te ni nacasi yā tutu ún, te ni nacuāha ya nuū tēe jéjníñu ini sinagoga, te ni nucōo ya jeē steén yā jñūhun nuū ñáyuu cáhiin ini sinagoga. Te tācá i cájito vāha i nuū yā.

<sup>21</sup> Te ni quejéé yá cahán yā jíin i:

Vijna te ni squícu jñūhun cáhán tutu i yāha ní cajini sōho ró, áchí yá.

<sup>22</sup> Te ndivii i ni cacahān jeē vāha tēe cúu ya, te cánaa ni i jeē ní cajini i tāca jñūhun luu ni cahán yā. Te ni cacajñūhun jñáhan i:

¿A násūu séhe José cúu tēe yáha?

<sup>23</sup> Te ni cahán yā jíin i:

Jíní vāha ri jeē cájeni ni rō cahán rō jñūhun yátá yáha jíin rí: Tēe tájné, sátájné ró maá ró núu súcuan. Te jñūhun yáha cúni cahán jeē nájñūhun ni nasávāha ri cuehē ñayuu cácuñu ini ñuu Capernaum ni canihin rō jñūhun, suni súcuan na sáha ri ñuu yō yāhá návāha candíje ró cájeni ni rō. Achí yá jíin i.

<sup>24</sup> Te ni cahán gā yā:

Jendaá cahán rí jíin ró, ni ñin tēe nácani jñūhun Yaā Dios, tu cájetáhú ñayuu ñuu maá de nuū de.

<sup>25</sup> Te suni jendaá cahán rí jíin ró jeē ni íyo cuehē ñahan ní ndóo ndáhú ini nación yō Israel, tiempo ni cotecu Elías, tēe ni nacani jñūhun Yaā Dios. Te tiempo un tu ní cúun cuiñi saū uní cuiyā yosáva, te ni íyo ñin jnamā xeēn ní cáñu nación.

<sup>26</sup> Te tu ní tájji Yaā Dios Elías quihīn de nuū ni ñin ñahan viuda nación yō Israel, chí nuū máá ñin-ni ñahan viuda jeē ndeé ñuu Sarepta ndañú Sidón, ni jehēn de ni jito de jeē ní yeji ña.

<sup>27</sup> Te ini nación yō Israel suni ni íyo cuehē tēe ni candoho cuehyī stehyú, tiempo jeē ní cotecu Eliseo, tēe ni nacani jñūhun Yaā Dios. Te ni ñin de tu ní cándíje jeē ndúvāha de sáha Eliseo, chí sa suhva máñúhún-ni Naamán, tēe nación Siria ni nduvāha. Achí yá.

<sup>28</sup> Yūcuán na te tāca ñáyuu cáhiin ini sinagoga, yōhyo ni caquitiñi ni i jñūhun ní cahán yā.

<sup>29</sup> Te ni candocuñiñi i, te ni caquenehen i ya yatā ñúu ún, cuahān i jíin yá xiní yūcu íne ñuu ún, chí cácuni i chundahá i ya ñinga ya cava ún.

<sup>30</sup> Te tu ní cúu sáha i, chí ni yáha-ni ya mehñú i cuahān yā.

*Jeē ní quenehen ya tachī ini ñin tēe  
(Mr. 1.21-28)*

<sup>31</sup> Yūcuán na te cuahān Jesús ñuu Capernaum región Galilea. Te quivī ndétātu ní steén yā jñūhun nuū ñáyuu.

<sup>32</sup> Te ni canaa ni i cájini i jñūhun steén yā. Chí ni steén vāha ya nuū i, chí jíiní vāha máá yá.

<sup>33</sup> Te ini vehe sinagoga un íne ñin tēe jeē ñúhun tachī xeēn ini de. Te tēe un ní cana cóho de:

<sup>34</sup> Cujiyó ní. ¿Naun vēji ní núu na jíjñáhan ná, Jesús ñuu Nazaret? ¿A vēji ní jēe snáa ní sáña, chí naún? Je jíiní na ndé ñin cúu ní, chí Séhe iñ Yaā Dios cúu ní. Achí de.

<sup>35</sup> Te Jesús ni cahán xeēn yā nuū tachī ún:

Casi yuhu ró te quenda ró ini tēe yáha, áchí yá.

Te ni cotúu-ni tēe un núu tāca ñáyuu, ni sáha tachī ún. Te ni quenda ini de cuahān, te tú na vé ni sáha ga jíin de.

<sup>36</sup> Te ndihí ñayuu un ní cayūhú i, te ni cacahān i jíin jñáhan i:



¿Na jñuhun cúu yāha jēē ní cuu súcuan? Chi cújéhnú tēe yāha jēē ndácu nihin de jniñu nuū tachí, te quéndacoo-ni, áchí i.

<sup>37</sup> Te jñuhun ya ni jitē núu cuahān ní cáhnú región yūcuán.

*Jeē ní nasávāha ya naná chīsó Simón Pedro*

*(Mt. 8.14-15; Mr. 1.29-31)*

<sup>38</sup> Yūcuán na te ni quenda Jesús ini vehe ñi sinagoga, te cuahān yā te ni jinū yā vehe Simón. Te naná chīsó Simón, yáhi xeēn quiji ña, te ni cacahān ndahú de jín yá jehē ña.

<sup>39</sup> Te ni jita ndeyi ya nuū ña, te ni cahān yā jeē na ndíco quiji ún. Te ni nduvāha-ni ña. Te ni ndocuñiñi-ñi ña, te ni sáha ña jeē ní yeji yā jín de.

*Jeē ní nasávāha ya cuehē ñayuu*

*(Mt. 8.16-17; Mr. 1.32-34)*

<sup>40</sup> Te jeē ni quée niāndii, te tāca ñáyuu jeē iyó jnāhan i cácuñú ndinuū cuehyi, ni caquindeca i jnāhan i un núu yā. Te ni soó yá ndaha ya siquī ñin ñin i, te súcuan ni nasávāha ya i.

<sup>41</sup> Te suni cuehē ñayuu ni quendacoo tachí ini i, te cácana cóhó táchí ún:

Maá ní cúu Séhe Yāā Dios, achí.

Te ni cahān xeēn yā nuū, te tu ní jéhe ya jñuhun jeē cahán gā súcuan, chi cájini jeē maá yá cúu Cristo, Yāā ní tají Yāā Dios.

*Jeē ní nacani ya jñuhun región Galilea*

*(Mr. 1.35-39)*

<sup>42</sup> Te nuū ní cundijin, te ni quenda ya cuahān sún ya yatā ñúu nuū tú ñayuu. Te tāca ñáyuu cánanducú i ya, te ni jinūcoo i nuū íne ya. Te cástétu i ya jeē tú cujiyo ya nuū i.

<sup>43</sup> Te ni cahān yā jín i:

Suni cánuú jēē nacani ri jñuhun vāha nuū tāca gá ñuu siquī ndese ndácu Yāā Dios jniñu, chí jeē yúcuan ní tají yá ruhū vēji ri. Achí yá.

<sup>44</sup> Te ni jica cuu ya ní región Galilea, nácani ya jñuhun ini táca vehe ñi sinagoga.

*Jeē ní canihñ de cuehē chácá ni sáha ya*

*(Mt. 4.18-22; Mr. 1.16-20)*

## 5

<sup>1</sup> Te ñin quiví te íne Jesús yumar Genesaret. Te ni quecoo cuehē ñayuu, te ni chitú nihin i nuū yā, chí cácuni i cuni nahín i jñuhun Yāā Dios.

<sup>2</sup> Te ni jito ya jeē yúcu uū barco yajni yumar. Te tēe cájniñ chácá, je ni quendacoo de ini barco, te cánacate de ñunu de.

<sup>3</sup> Te ni quiví ya ini ñin barco jeē cúu barco Simón. Te ni cahān yā jín de jeē na scáca yátá de quihñ jecu gā nuū ndúte. Te ni cucóo ya, te nde ini barco un ní steén yā jñuhun nuū ñáyuu cuehē jeē yúcu i yundúte un.

<sup>4</sup> Te nuū ni jínu ni steén yā, te ni cahān yā jín Simón:

Scáca ró barco na quihñ yō nde nuū iyó cúnú ndute, te sínga ró ñunu ró jñi ró chácá, achí yá.

<sup>5</sup> Te ni cahān Simón:

Maestro, ní niñu ni casínga ná ñunu jeē jñi ná tí, te tu ní níhín cuiti ná ni ñin ti. Te jeē cahán maá ní súcuan, te na sínga tucu ná ñunu, achí de.

<sup>6</sup> Te ni casínga de, te ni quivícoo cuehē ndasí chácá, nde nducú táhndē ñunu de.

<sup>7</sup> Te ni cacaja ndahá de nuū jnāhan de cáhīn ini inga barco, na quíjicoo chindéé ñájnāhan jíin de. Te ni quecoo de, te ni cascútú ndī de tí ndindúú barco, te nde je yajni quēe barco.

<sup>8</sup> Te ni jito Simón Pedro jeē súcuan ni cuu. Te ni jecuiñī yití de nuū Jesús, te ni cahān de:

Cujiyo ní nuū ná, chi tēe íyó cuéchi cúu ná, áchí de.

<sup>9</sup> Chi máá de jíin táca tēe cáhīn jíin de, ni cayūhú de jeē ní canihīn de cuehē chācá un ní sáha ya.

<sup>10</sup> Te suni ni cayūhú Jacobo jíin Juan, ndindúú séhe Zebedeo, chi tēe chindéé ñájnāhan jíin Simón cácuu de. Te ni cahān Jesús jíin Simón:

Ma yūhu ró, chi nde vijna te sáha ri jeē nihīn rō cuehē ñayuu candíje ruhū, nájñuhun ni nihīn rō cuehē chācá. Achí yá.

<sup>11</sup> Yūcuán na te nuū ní jínūcoo de jíin barco nuū ñūhun íchi, te ni castóo de ndihi ndajñīñu de, te ni candiquīn de ya cuango de.

*Jeē ní nasávāha ya ñn tēe ndóho cuehyī stehyú*  
(Mt. 8.1-4; Mr. 1.40-45)

<sup>12</sup> Yūcuán na te íne Jesús ini ñn ñuu, te ni quee ñn tēe ndóho cuehyī stehyú. Te ni jito de nuū Jesús, te ni jecuiñī yití de ní jequīn de nuū de nde nuū ñūhun, te ni cahān ndahú de jíin yá:

Jíní na jēe cuu sáha ní jēe nduvāha ná, te núu cúní ní, áchí de.

<sup>13</sup> Yūcuán na te ní soó yá ndaha ya siquī de, te ni cahān yá:

Cúní rī. Te na ndúvāha ró, áchí yá.

Te ná ni cahān yá súcuan, te ni nduvāha-ni tēe ndóho cuehyī stehyú un.

<sup>14</sup> Te ni ndacu ya jniñu nuū de jeē ma cáchi cuiñi de nuū ní ñn. Te áchí yá:

Quisteén rō maá ró nuū sutú, te condahá ró jeē socó rō nuū Yaā Dios siquī jeē ndúndoo ró núu yá, nájñuhun ni ndacu Moisés jniñu jenahán. Te súcuan te cuni ñayuu jeē ní nduvāha ró. Achí yá.

<sup>15</sup> Te víhyá gā ní jitē núu jñuhun ya cuahān. Te ni cataca cuehē ñayuu jeē cúní nahín í jñuhun stéén yá, jíin jēe nasávāha ya í nuū táca cuehyī cándoho í.

<sup>16</sup> Te máá yá cuahān sīn ya nuū tú ñayuu, te ni jicān tahú yá.

*Jeē ní nasávāha ya ñn tēe ndóho cuehyī ní íjin*  
(Mt. 9.1-8; Mr. 2.1-12)

<sup>17</sup> Te ñn quivī te stéén yá jñuhun, te jecu tēe grupo fariseo jíin tēe cástéén tutu ley Yaā Dios, cáyūcú de yūcuán. Te tēe un ní quecoo de nuū yá jeē véjicoo de táca ndañū Galilea, jíin ndañū Judea, jíin ñuu Jerusalén. Te poder maá Yaā Dios iyó jíin yá jeē nasávāha ya ñayuu cácuñū.

<sup>18</sup> Yūcuán na te ni quecoo jecu tēe, cándiso de ñn tēe ndóho cuehyī ní íjin, catú de nuū ñn camilla. Te cánducú de squívī de tēe ún ini vehe, te caquin de nuū íne ya.

<sup>19</sup> Te tu ní cánihīn de modo quívicoo de jíin tēe un, chi cáyūcú chitú ñayuu. Te ni cacao de siquī véhe, te ni canune de teja. Te ni cascúun de tēe cúhú un jíin camilla de nde nuū íne Jesús mēñū ñayuu.

<sup>20</sup> Te ni jini Jesús jeē cácandíje de jeē cúu nasávāha ya tēe cúhú un. Te ni cahān yá jíin tēe cúhú un:

Róhó, je íne cáhnu ní rī nuū táca cuéchi ró, áchí yá.

<sup>21</sup> Yūcuán na te tēe cástéén tutu ley Yaā Dios jíin tēe grupo fariseo, ni quejé de cájeni ni de siquī yá: ¿Ndé ñn cúu tēe yáha jēe cahān de jñuhun ndevāha jeē quití ní Yaā Dios? Chi nasūu Yáā Dios cúu de jeē cóne cáhnu ní de nuū cuéchi.

22 Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha ri?

23 Jeē uū jnūhun yáha, ¿ndé ñin yí gá cáa? ¿A jéē cahán rī jíin téē cúhú: Je íne cáhnu ni rī nuū tāca cuēchi rō? ¿Chí yí gá jeē cahán rī: Ndocuñī te caca rō, chí je ni nduvāha rō, achi rī?

24 Te vijna te na stéén rī jeē maá rí, Yaā ní nduu tēe, ndíso jniñu ri ini ñayivi yáha jéē cóne cáhnu ni rī nuū cuēchi.

Yūcuán na te ni cahān yā jíin téē ni íjin ún:

Cáhán rī jíin rō, ndocuñī te naquihin rō camilla rō, te quinhun rō vehe rō, áchí yá jíin de.

25 Te ni ndocuñī-ni téē ún, jíto jíinú ñayuu. Te ni naquihin de camilla nuū ni cátu de, te cuanhun de vehe de. Te nácuatáhu de nuū Yaā Dios.

26 Te yōhyo ni canaa ni tāca ñayuu cájito i, te ni cacahān i jeē yōhyo vāha Yaā cúu Yaā Dios. Te suni yōhyo cáyūhú i, te cacahān i:

Vijna te ni cajito yó jniñu jéhnu téyí, áchí i.

### *Jeē ní cana ya Leví*

*(Mt. 9.9-13; Mr. 2.13-17)*

27 Yūcuán na te ni quenda ya cuahān yā, te ni jito ya nuū ñin téē stútú xúhun renta, naní de Leví, néne de nuū cutútú xúhun renta. Te ni cahān yā jíin de:

Condiquín ruhū na quíhín yō.

28 Te ni ndocuñī de, te ni stóo de ndihí ndajniñu de, te cuahān de jíin yá.

29 Yūcuán na te ni sáha Leví ñin vico cáhnu vehe de, jeē cúsi ni de jíin Jesús. Te cuehē téē cástútú xúhun renta jíin sava ga tēe, cáyucú de mesa cáyeji de staā jíin yá.

30 Te téē grupo fariseo jíin téē cástéén tutu ley Yaā Dios, ni quejé de cacahān de síquī téē cáscuáha jíin yá, te ni cacajñuhún de:

¿Najehē cáyeji rō cájihu rō jíin téē cástútú xúhun renta jíin téē cása ha cuēchi? áchí de.

31 Te ni cahān Jesús:

Ñayuu cáhīyo vāha, tu jíni ñuhún i téē tájna, chí ñayuu cácu hū cúu jeē jíni ñuhún.

32 Te ruhū nasūu jéē véji ri cana ri ñayuu tú cuēchi, jeē cúu i nájnūhun ñayuu cáhīyo vāha. Chí sa suhva véji ri cana ri ñayuu cáhīyo cuēchi, jeē na nácani ni i te stóo i cuēchi i. Achí yá.

### *Jeē ní cacajñuhún de ya síquī jeē condite ni*

*(Mt. 9.14-17; Mr. 2.18-22)*

33 Yūcuán na te ni cacahān de jíin yá:

Tēe cáscuáha jíin Juan, jíin téē cáscuáha jíin grupo fariseo, cuehē jínu cáhīyo ndite ni de te cájicān tahu de. Te téē cáscuáha jíin máá ní, ¿naun tu cása ha de súcuan? Chí cáyeji de cájihu de.

34 Te ni cahān yā jíin de:

¿A cuu condite ni de níni jéē iyó rí jíin de? ¿A cuu sáha rō jéē condite ni ñayuu cáhīn vico nánda ha, te núu níni néne téē nánda ha?

35 Te quee quivī jeē cújiyo téē ni nánda ha, te quivī ún chí condite ni i. Achí yá.

36 Te suni ni cahān yā uū jnūhun yátá síquī jeē tu quíjnahan jnūhun jeé jéē steén yā jíin táca jnūhun jenahán. Achí yá:

Ni ñin ñayuu tu jéhnde i ñin pedazo sahma jée i, te nachuhun i nuū ñin sahma túhú i. Chí núu súcuan te stívi i sahma jée i, te suni tu quíjnáhan jeē jeē un jíin jée tuhú.

<sup>37</sup> Te tú ni ñin chúhun vino jeé ini ñin túhú. Chí núu súcuan, te vino jeé un ndatá ñin, te naa vino jíin ñin.

<sup>38</sup> Chí cánuú jée cúhun vino jeé ini ñin jée, te súcuan te quéndō vāha ndindúú.

<sup>39</sup> Te ñayuu cájihu vino áva, tu cúní i coho i jeē jeé, chí jeē áva cúu jeē váha ga, achí i. Achí yá.

*Jeē ní cataxín de yoco trigo quiví ndétátú*  
(Mt. 12.1-8; Mr. 2.23-28)

## 6

<sup>1</sup> Te ñin quiví ndétátu ní yāha Jesús cuahān yā mēhñú nuū cáa trigo. Te tēe cáscuáha jíin yá ni cataxín de yoco trigo, te ni caquiin de ini ndaha de, te ni cayejí de.

<sup>2</sup> Te sava tēe grupo fariseo ni cacajñuhún de:

¿Najehē casáha ró jniñu jeē tu íyo váha sáha ró quiví ndétátú?

<sup>3</sup> Te ni cahān Jesús jíin de:

¿A tu ní cácahu cuítí rō tutu ndese ni sáha David, ñin quiví jeē ni jíi de sóco jíin tée cáhīn jíin de?

<sup>4</sup> Te ni quiví de ini vehe Yāā Dios, te ni quihin de pan íi jeē yosó ndijin nuū Yāā Dios. Te ni yejé de, te suni ni jēhe de ni cayejí tēe cáhīn jíin de. Te tú na ley jeē cáji ni ñin tēe, chí máa-ni sutú cuu caji. Te vésú súcuan te tú na cuēchi ní íyo siquí de. Achí yá.

<sup>5</sup> Te ní cahān gā yā jíin de:

Ruhū, Yāā ní nduu tēe, máá rí cúu jeē ndácu jniñu siquí ndese sáha ñayuu quiví ndétátú, achí yá.

*Jeē ní nduvāha tēe ni ichí ndaha*  
(Mt. 12.9-14; Mr. 3.1-6)

<sup>6</sup> Te inga quiví ndétátú, suni ni quiví ya ini vehe íi sinagoga, te ni steén yā jñuhun. Te yūcuan íne ñin tēe ni ichí ndaha váha de.

<sup>7</sup> Te tēe cástéén tutu ley jíin tée grupo fariseo, cájito yuhu de ya núu nasávāha ya tēe un quiví ndétátú, návāha nihīn de cuēchi siquí yā.

<sup>8</sup> Te máá yá je jíin yā ndese cájeni ní de. Te ni cahān yā jíin tée ni ichí ndaha ún:

Ndocuñí, te condichi rō mēhñu yāha, achí yá.

Te ni ndocuñí de, te ni jecondichi de mēhñú.

<sup>9</sup> Yūcuán na te ni cahān yā jíin de jíjnáhan de:

Na cájnūhun rí rohó ñin jñuhun: ¿Ndese cáhán ley siquí quiví ndétátú? ¿A jée sáha váha yó, chí sáha neé yó? ¿A jée nasávāha yó ñayuu je yajni cuu, chí sáha yó jée cúu í? Achí yá.

<sup>10</sup> Te ndéhé yá nuū de jeē cáyúcú de ní xiin ya. Te ni cahān yā jíin tée cúhú un:

Scaá ndaha ró.

Te ní scaá de, te ní nduvāha-ni ndaha de.

<sup>11</sup> Te yōhyo ni caquití ní tāca tée un, te ní quejé de cándajñuhún de siquí Jesús, ndese cahni de ya.

*Jeē ní nacāji ya uxí uū tēe apóstol*  
(Mt. 10.1-4; Mr. 3.13-19)

12 Te ni cuu jecu quivī, te ni quenda ya cuacacān tahú yā nde yucu. Te ní niñu ni jicān tahú yā nuū Yaā Dios.

13 Te nuū ní cundijin, te ni cana ya tāca tée cáscuáha jíin yá. Te ni nacāji ya uxī uū de, te ni cahān yā jeē cuu de apóstol, condiso jniñu de nacani de jñuhun ya.

14 Te yāha cúu síhvī de jíjnáhan de: Simón jeē ní nasnání yá de Pedro, jíin ñani de Andrés, te suni Jacobo jíin Juan, Felipe jíin Bartolomé,

15 Mateo, Tomás, Jacobo sēhe Alfeo, Simón tēe grupo cananista,

16 Judas ñani Jacobo, jíin Judas Iscariote, tēe jeē ní nastúu de ya.

### *Jeē ni stéén yā nuū ñáyuu cuehē*

*(Mt. 4.23-25)*

17 Te ni nanuu ya yucu jíin táca tée un jéē cascuáha jíin yá, te ni jecuiñi yā ñn nduhvā jíin de. Te cuehē ñayuu ní región Judea jíin ñuu Jerusalén, jíin ñáyuu yumar ñuu Tiro jíin ñuu Sidón, ni quecoo i jeē cúni nahín i jñuhun stéén yā, jíin jéē ndúvāha i cuehyī cándoho i.

18 Te ñayuu jeē ñuhun tachí ini i, suni ni canduvāha i ni sáha ya.

19 Te ndíviñi ñayuu cáculi i quehé i ya, chi súcuan ndúvāha i sáha ya jíin poder yā.

### *Jñuhun ñayuu yōhoyo ndetū jíin ñáyuu jeē xeēn ndoho*

*(Mt. 5.1-12)*

20 Te ni ndacoto ya nuū tée cáscuáha jíin yá un, te ni cahān yā: Yōhoyo ndetū rohó jéē cándoho ndáhú, chi quivī ró ñuu nuū ndácu Yaā Dios jniñu.

21 'Yōhoyo ndetū rohó jéē cájiñi sōco vijna, chi quiñi quivī jeē ndutú chíji ró.

'Yōhoyo ndetū rohó jéē cándahyū rō vijna, chi quiñi quivī jeē cuecú ró.

22 'Yōhoyo ndetū rō te núu cáquiñi ni ñayuu nuū rō jeē siquí ruhū, Yaā ní nduu tēe, te cáscuéhichí i rōhó, te cácahān neé i nuū rō, te cácahān i jeē ñáyuu casáha jniñu neé cácuu ró.

23 Te na cóo sñ ni rō quivī sáha i súcuan, te víhyá gā na cúsiñi ni rō, chi cáhnu téyí coo tahū rō nde andiví. Chi suni súcuan ni casáha uhū tāca jíi i jíin tēe ni canacani jñuhun Yaā Dios nde jengahán.

24 'Te nacā jeē xeēn ndoho rōhó ñáyuu cucá, chi vijna-ni cúu jeē cáhīyo sñ ni rō.

25 'Nacā jeē xeēn ndoho rōhó ñáyuu jeē víjna cáhīyo vetū chíji ró, chi quiñi quivī jeē cuu rō sōco.

'Nacā jeē xeēn ndoho rōhó ñáyuu jeē víjna cájecū rō, chi quiñi quivī jeē nduculhyá ni rō te ndahyū rō.

26 'Nacā jeē xeēn ndoho tāca ró núu cájejnúhún ñáyuu rohó, chi suni súcuan ni cajejnúhún jíi i tāca tēe ni canacani jñuhun stáhú ndé jengahán.

### *Jñuhun jeē cundáhú ni yō ñáyuu cájito uhū yohó*

*(Mt. 5.38-48; 7.12)*

27 'Te cáhán rī jíin rōhó jeē cájini sōho: Cundáhú ni rō ñayuu cájito uhū rohó. Te sáha vāha ró jíin ñáyuu cáquiñi ni nuū rō.

28 Te cacān rō jeē vāha coo ñayuu cácahān ndevāha síquí rō. Te cacān tahú rō jehē ñáyuu cácahān neé núu rō.

29 Te núu ndé tēe caní de ñn lado yiquí núu rō, te vāha ga suni cuāha ró ñnga lado caní de, vēsú jeē nácuāha ró jéē ndútahū de. Te núu ndé tēe cúni

de quende de ticāchi ró, suni cuāha ró jnūhun jeē na quíhín de jíin ndé camisa rō.

<sup>30</sup> Te na-ni ñayuu jicán nuū rō, te cuāha ró núu i. Te ñayuu quíhin ndajníñu rō, ma nāndacān rō.

<sup>31</sup> Te nájñūhun cáconi rō jeē sáha vāha ñayuu jíin ró, suni súcuan na sáha vāha ró jíin i.

<sup>32</sup> Chi núu íyó manī rō jíin máa-ni ñayuu jeē maní jíin ró, ¿te na vé jeē vāha ga sáha ró núu súcuan? Chi nde tēe casáha cuēchi, suni manī de jíin tēe manī jíin máa de.

<sup>33</sup> Te núu sáha vāha ró jíin máa-ni ñayuu jeē casáha vāha jíin ró, ¿te na vé jeē vāha ga sáha ró núu súcuan? Chi nde tēe casáha cuēchi, suni súcuan casáha de.

<sup>34</sup> Te núu cuāha núu ró núu maá-ni ñayuu jeē ñūhun ni rō nacuāha i nuū rō, ¿te na vé jeē vāha ga sáha ró núu súcuan? Chi nde tēe casáha cuēchi, suni jéhe núu de nuū táca gá tēe casáha cuēchi, návāha nanihín tucu de.

<sup>35</sup> Núu súcuan te cundáhú ni rō ñayuu cájito uhū rohó, te sáha vāha ró jíin i, te cuāha núu ró núu i. Te ma cuāha ró máa síquī jeē cani ni rō jeē suni nacuāha i nuū rō. Te súcuan te cáhnu coo tahū rō, te stéen rō jeē cácuu ró séhe Yaā cújēhu téyí. Chi máa yá vāha ni yā jíin ñayuu tu nácuatáhú núu yā jíin ñayuu casáha néé.

<sup>36</sup> Núu súcuan te cundáhú ni rō ñayuu, nájñūhun máa Tátá rō cundáhú ni yā i.

### *Ma cahán yō siquī cuēchi jnāhan yó*

*(Mt. 7.1-5)*

<sup>37</sup> Ma cahán rō siquī cuēchi ñayuu ndese sáha i, návāha suni ma cahán Yaā Dios cuēchi siquī rō jeē casáha ró súcuan. Ma cahán xeēn rō siquī i jeē tú vāha sáha i, návāha suni ma cahán Yaā Dios súcuan siquī rō. Cone cáhnu ni rō nuū i, te suni cone cáhnu ni yā nuū rō.

<sup>38</sup> Cuāha ró núu ñayuu, te suni súcuan cuāha Yaā Dios nuū rō. Chi vāha ndasí cuāha ya nuū rō, nájñūhun jeē chícuāha vāha ya, quisi ya, sánihín ya, te nde scáa ya cuāha ya nuū rō. Chi cūhva jeē cájēhe ró núu ñayuu, suni cūhva un cuāha ya nuū rō. Achí yá.

<sup>39</sup> Te ni cahán yā ñin jñūhun yátá jíin i:

Tēe cástéen jñūhun tú ndaā, cácuu de nájñūhun tēe cuáá. Te ñin tēe cuáá, ¿á cuu stéen de ichi nuū inga tēe cuáá? ¿A tú ñingava ndindúú de ini xehvā?

<sup>40</sup> ñin tēe scuáha, tu cújēhu de nuū maestro de. Te tēe scuáha ún, núu je ni cutūhva vāha de, te jinū de coo de nájñūhun maestro de.

<sup>41</sup> Te cuēchi jnāhan ró cúu nájñūhun jeē íne ñin yāca lúli tinūú i. ¿Te naun casáha ró cuenta jeē súcuan, te tu casáha ró cuenta cuēchi máa ró jeē cúu nájñūhun jeē íne ñin nduhu tinūu máa ró?

<sup>42</sup> ¿Te naun cácahán rō jíin jnāhan ró: Condetu, na táva rī yāca íne tinūu ró, te tu cánaçani ni rō jeē íne ñin nduhu tinūu máa ró? Tēe stáhú-ni cácuu ró núu súcuan. Xihna gá tinūu máa ró tava rō nduhu, te yūcuán na te cuu condēhe vāha ró jēé táva rō yāca tinūu jnāhan ró.

### *Jíin jniñu casáha ñayuu te náconi yō ndese ñayuu cácuu i*

*(Mt. 7.17-20; 12.34-35)*

<sup>43</sup> Tu íyó yujnu vāha jeē jéhe ndehē neé, te ni tu íyó yujnu neé jéé jéhe ndehē vāha.

<sup>44</sup> Chi jíin ndehē jeē jéhe ñin ñin yujnu, te jíní yō núu yujnu vāha cúu. Chi tu scóyo yó ndehē higo xiní ññu, ni tu scóyo yó ndehē uva xiní yucú zarza.

<sup>45</sup> Te suni súcuan tēe vāha, cāhán de jnūhun vāha, chi vāha ánuá de. Te tēe sáha néé cāhán de jnūhun néé, chi cánéé ánuá de. Chi modo ndese iyó ánuá ñayuu, máni jeē yúcuan cúu jeē cácahān i.

*Siquī uú vehe*  
(Mt. 7.24-27)

<sup>46</sup> ¿Najehē cácahān yíñúhún ró jíin rí: Jitoho ná, áchí ró, te tu cásquicu ró jniñu ndácu rí?

<sup>47</sup> Tāca ñáyuu vēji nuū rī te jíni sōho jnūhun cāhán rī te squícu, na stéén rī nuū rō ndese cúu i.

<sup>48</sup> Cúu i nájnūhun ñin tēe jeē ní jeni de vehe de, te ni jete cúnú de nde ni nihīn de toto, te ni jeni de siquī. Te nuū ní ndaa yūte, te ni chundahá vehe ún, te tu ní cánda cuiti sáha, chi siquī toto íin.

<sup>49</sup> Te tāca ñáyuu jíni sōho jnūhun cāhán rī, te tu squícu i, cúu i nájnūhun ñin tēe ní jeni de vehe de nuū ñūhun, te tu yítuu jehē. Te nuū ní ndaa yūte, te ni chundahá vehe ún, te ni cotúú-ni, te ni naa ñi-ni. Achí yá jíin i jíjnáhan i.

*Jeē ní nasávāha ya mozo capitán*  
(Mt. 8.5-13)

## 7

<sup>1</sup> Te nuū ní jínu ní cahān yā ní cajini nahín ñáyuu ún, te cuahān yā ñuu Capernaum.

<sup>2</sup> Te ñin tēe nación Roma jeē cúu capitán, iyó ñin mozo de jeē maní ndasí de jíin. Te mozo un cūhú i te je yajni cuu i.

<sup>3</sup> Te ní jíni capitán jnūhun Jesús. Te ní tají de jecu tēe jéhnú cándacu jniñu nuū ñáyuu hebreo, cuangoo de nuū yā jeē cahán ndahú de jíin yá jeē na quíji ya sávāha ya mozo de.

<sup>4</sup> Te ní jinūcoo tēe un nū Jesús, te ní cacahān ndahú ndasí de jíin yá: Chindéé ñáhán ní tēe cúu capitán, chí tēe vāha cúu de.

<sup>5</sup> Chi maní de jíin nación yō, te máá de ní ndacu jniñu ní cuvāha ñin vehe sinagoga cuu yó. Achí de.

<sup>6</sup> Yūcuán na te cuahān Jesús jíin de jíjnáhan de. Te nuū ní cuyajni ya vehe capitán, te ní tají de jecu amigo de cuajnahān yā. Te ní cacahān de jíin yá:

Achí capitán jeē tu cúní de sájneñu de níhín, chí tu cújéhnú de jeē quihín ní quívi ní vehe de.

<sup>7</sup> Jeē yúcuan tu ní sájéhnú de máá de jeē quíji de nuū ní, áchí de. Te máá jéé cahān-ni ní, te na ndúvāha-ni mozo de, áchí de.

<sup>8</sup> Chi máá de suni ndíso níñu de ní casáha tēe cácujeñu ga. Te cújéhnú de nuū táca soldado de, áchí de. Te núu cāhán de jíin ñin tēe jeē na quihín de, te cuahān de. Te núu cāhán de jíin inga tēe jeē na quíji de, te quíji de. Te núu ndácu de ñin jniñu nuū mozo de, te sáha i, áchí de. Achí tāca tēe un jíin yá.

<sup>9</sup> Te jeē ní jíni Jesús jnūhun yáha, te ní naa ní yā. Te ní ndió cóto ya ní cahān yā jíin ñáyuu cuehē cándiquín yatā yā:

Jendaá cahān rí jíin ró jeē ní nación yō Israel tu ní níhín rí ní ñin ñayuu candíje níhin súcuan, nájnūhun cándíje tēe ún, vēsú tēe nación tu jíni jnūhun Yā Dios cúu de. Achí yá.

<sup>10</sup> Te tēe ní tají capitán nuū yā, ní najinūcoo de vehe, te ní cajito de jeē jé ní nduvāha mozo un.

*Jeē ní nastécu yā sēhe yí ñahan viuda*

11 Yūcuán na te cuahān yā ñn ñuu naní Naín. Te tēe cáscuáha jíin yá, jíin ñáyuu cuehē, suni cuangoo i jíin yá.

12 Te ná ni cuyajni ya yuñúú ún, te yūcuan ní quendacoo ñayuu jeē quíchindūji i ñn tēe suchí jéé ni jihī. Te máñúhún-ni i nuū naná i, te ñahan viuda cúu ña. Te cuehē ñayuu ñuu un véjicoo jíin ña.

13 Te ná ni jito máá Jítoho yō nuū ña, te ni cundáhú ni yā ña, te ni cahān yā jíin ña:

Ma ndahyú ni, áchí yá.

14 Yūcuán na te ni jinū yā nde nuū ndíyí ún, te ni jniñi ya yejnū, te ni cajecuiñi tēe cándiso ún. Te ni cahān yā jíin súchi ní jihī:

Cáhán rī jíin ró, ndocuiñi, áchí yá.

15 Yūcuán na te ni nucōo súchi ní jihī ún, te ni quejéé i nácahān i. Te ni nacuāha ya i nuū naná i.

16 Te ndivii ñayuu ni cayūhú i jeē ní cajito i, te ni cacahān i jeē yóhoyo vāha Yaā cúu Yaā Dios. Te cácahān i:

Mēhñu yó ni quee ñn tēe cújéhnu nácani jnūhun Yaā Dios.

Te suni cácahān i:

Máá Yaā Dios ní quejéé yá chindéé ñáhán yá ñayuu yā. Achí i.

17 Te ni jitē núu jnūhun ya ní cáhnu región Judea jíin táca región yajni yūcuán.

### *Jeē ní tají Juan uū tēe nuū yā*

*(Mt. 11.2-19)*

18 Te íne Juan vecāa, te tēe cáscuáha jíin de ni castūhun núu de jeē súcuan ni cuu táca jniñu yáha.

19 Te ni cana Juan uū tēe ún, te ni tají de cuangoo nuū Jesús, návāha cajñūhún de ya núu máá yá cúu ndije Cristo jeē ní cachi Yaā Dios jeē tají yá, chí núu nasūu yá cúu te condetu de inga.

20 Te ni jinūcoo tēe un núu yā, te ni cacahān de:

Juan tēe scuándute ni tají de sãña véjicoo ná cajñūhun ná nihín núu máá ní cúu Cristo jeē achí tutu jeē quíji, chí condetu yó inga tēe quíji. Achí de.

21 Te máá hora un ní nasávāha ya cuehē ñayuu cácuñū, jíin ñáyuu cándoho cuehyi xeēn, jíin ñáyuu ñūhun tachí ini. Te suni cuehē ñayuu cuaá ní ndundijin tinūú i ní sáha ya.

22 Te ni cahān yā jíin de:

Cuángoo te castūhun ró nuū Juan táca jniñu ni cajito ró jíin jnūhun ni cajini ró. Te cachi ró nuū de jeē ñáyuu cuaá cánanune tinūú i, te ñayuu yacuá cánacaca i, te ñayuu ndóho cuehyi stehyú cánduvāha i, te ñayuu sohó cánanune sōho i, te ñayuu jihí nátecu i sáha ri. Te suni nácani ri jnūhun nuū ñáyuu ndahú jéé jnama Yaā Dios i.

23 Te yóhoyo ndetū tēe jeē ma nácani yátá ni de jeē ruhū cúu Cristo. Súcuan cachi ró nuū Juan. Achí yá jíin de.

24 Te ná cuanuhun ndíndúú tēe ún, te ni quejéé Jesús cahān yā jnūhun Juan jíin ñáyuu:

¿Na vé ni jécondēhe ró pijñáhan ró ndé nuū ñūhun téhé? ¿A ñn tēe jéni ñn jéni uū ni, nájnūhun ite jeē cánda sáha tachí?

25 Te núu tuú, ¿te na vé ni jécondēhe ró núu súcuan? ¿A ñn tēe cúni cújéhnu jeē ñūhun sahma lúu? Tuú chí cájini ró jeē tēe cáñuhun sahma lúu te cánducú táca jéé cúsiñ ni, máni ini vehe rey cáyúcú de.



26 ¿Te na vé ni jécondēhe ró núu súcuan? ¿A ñn tēe nácani jñūhun Yaā Dios? Cáhán rī jín ró jeē suu ni jécondēhe ró. Te cújéñhu ga Juan yáha vēsú tāca gá tēe ni canacani jñūhun Yaā Dios.

27 Chi jñūhun Juan cúu jeē ni cáhān Yaā Dios jeē yosó núu tútu iī: Tají rí tēe nacani jñūhun ri cosnūū de ichi núu Cristo, návāha coo tūhva ñayuu jeē jinú yá.

Achí Yaā Dios, achí tutu.

28 Te cáhán rī jín ró jeē ini ñayiví yáha cújéñhu ga Juan tēe scuándute vēsú tāca gá tēe jeē ni iyo ini ñayiví. Te vēsú súcuan te tāca tēe núu ga ini ñuu nuū ndácu Yaā Dios jniñu, cújéñhu ga de vēsú Juan. Achí yá.

29 Te tāca ñayuu jín tāca tēe cástútú xūhun renta, ni cajini i jñūhun cáhán yā, te ni cajetáhú i jeē Yaā ndaā cúu Yaā Dios, chi je ni cajendute i nuū Juan.

30 Te tēe grupo fariseo jín tēe cástéén tutu ley, ni casquéhichí de jñūhun jeē cuní Yaā Dios sáha ya jeē váha de, chí tu ní cájendute de nuū Juan.

31 Te ni cahān gā máá Jítóho yō:

Yáhá cachi rī ñn jñūhun yátá návāha na cúni rō ndese cúu ñayuu tiempo vijna.

32 Cúu i nájñūhun sūchi lúlí cáhīin nuū yáhu cácasquí i. Te cácana ndee i xini jñahan i: Ni cativí rī scuilí, te tu ní cájita jhé ró. Te ni cajita ri yaa jeē cuihyá jíta, te tu ní cándahyū ró, achí i. Te nájñūhun cándāa sūchi lúlí un jéé tu ní nújnahān ni i ni ñn, suní súcuan cándāa ró.

33 Chi ni quiji Juan tēe scuándute, te cuehē jínu ni iyo ndite ni de, tu ní yéji de staā ni tu ní jíhi de vino. Te tu ní cánujnahān ni rō, chí ni cacahān rō jeē ñūhun tachí ini de.

34 Yūcuán na te ni quee máá rí, Yaā ní nduu tēe, te yéji rī jíhi ri, te tu cánujnahān ni rō, te chí sóó jñūhun ró cácahān rō jeē máni máá jéé yéji rī jíhi ri vino. Te quíjnāhan ri jín tēe cástútú xūhun renta jín tāca gá tēe cásáha cuēchi, achí ró.

35 Te núu cúndichí ñn tēe jín jñūhun Yaā Dios, te jín jniñu sáha de te cájini tāca gá tēe ndichí jeē ndichí de. Achí yá.

### *Jeē íne Jesús vehe Simón tēe fariseo*

36 Te ñn tēe fariseo ni cana de Jesús jeē cáji yā staā jín de. Te ni jinū yā vehe de, te ni cucóo ya mesa jeē cáji yā staā.

37 Yūcuán na te ñn ñahan sáha cuēchi, ndéé ña ñuu yúcuan, te ni jini ña jeē ni jínū Jesús vehe tēe fariseo un, yéji yā staā. Te ni quee ña jín ñn frasco yuū luu jeē ñūhun chitú aceite perfume.

38 Te ín yítí ña nuū jehé yā, te ndáhyú ña. Te ni quejéé ña stáji ña jehé yā jín ndute tínúú ña, te ni nasíchí ña jín ixi xíní ña. Te ni techúhú ña jehé yā, te ni chuhun ña perfume un.

39 Te tēe fariseo un jeē ní cana de ya, ni jito de jeē súcuan ni sáha ña, te ni jeni ni de: Núu tēe nácani jñūhun Yaā Dios cúu tēe yáha, te cuni de ndese ñahan cúu ñahan yáha jeē quehé ña de, chí ñahan sáha cuēchi cúu ña, jeni ni de.

40 Yūcuán na te ní cahān Jesús jín de:

Simón, cúni rī cahān rī jín ró ñn jñūhun.

Te ní cahān máá de:

Cahān ní, Maestro.

41 Te ní cahān Jesús:

Ñn tēe jéhe núu xūhún, ni iyo uū tēe táu nuū de. ñn de ni cotaū uhūn ciento denario, te inga de ni cotaū uū xico uxí denario.

42 Te tú na vé cánevāha tēe un jēē náchunaa de. Te tēe jéhe núu xūhun ní ine cáhnu ni de nuū ndindúú tēe ún. Núu súcuan te cachi rō: Jeē ndindúú tēe ún, ¿ndé ñin de coo manī gā jín de? Achí yá.

43 Te ni cahān Simón:

Jéni ni na jēē tēe ni cotaū cuehē gā, achí de.

Te ni cahān yā jín de:

Ndaā cahán rō, achí yá.

44 Te jító ya nuū ñahan ún, te ni cahān gā yā jín Simón:

¿A jító ró na vé sáha ñahan yáha? Jeē ní quee rī vehe ró, te tu ní jéhe ró ndute jeē ndúndoo jehē rī nájñūhun íyó costumbre. Te ñahan yáha ní stáji ña jehē rī jín ndute tñnúú ña, te ni nasíchí ña jín ixi xíní ña.

45 Te tu ní téchūhu ró ruhū nájñūhun íyó costumbre. Te ñahan yáha, nde jeē ní quívi rī vehe ró, tu jécuiñi ña jeē téchūhú ña jehē rī.

46 Te tu ní chūhun ró aceite xiní rī nájñūhun íyó costumbre. Te ñahan yáha ní chuhun ña aceite perfume jehē rī.

47 Núu súcuan te cáhán rī jín ró jeē ní stéén ña jeē yóhoyo manī ña jín rí siquī jeē íne cáhnu ni rī nuū tāca cuéchi ña, vésú cuehē cúu. Te núu cone cáhnu ni rī nuū ñin ñayuu íyó jecu-ni cuēchi, te jecu-ni stéén i jeē maní i jín rí, achí yá.

48 Te ni cahān yā jín ña:

Je íne cáhnu ni rī nuū tāca cuéchi ró, achí yá.

49 Yūcuán na te ñayuu cáyeji staa jín yá, ni quejéé i cácahān maá i:

¿Nde ñin ga cúu tēe yáha jéē cahán jeē íne cáhnu ni nuū cuéchi? achí i.

50 Te Jesús ni cahān gā yā jín ñahan ún:

Ni candíje ró rúhū, te jeē yúcuan ní jnama ri rohó. Cuáhán te na ndúsñi ni rō. Achí yá.

*Jñūhun ñahan ní cajeñíñu nuū yā*

## 8

1 Yūcuán na te ni cuu jecu quiví, te ni jica cuu Jesús tācá ñuu náhnu jín ñuu lulí. Te nácani ya jñūhun váha te cástūhun yá ndese ndácu Yaa Dios jñiñu. Te ndihúxí uū tēe cácuu apóstol, cájica de jín yá.

2 Te suni íyó jecu ñahan cájica jín yá, jeē ní quenehen ya tachí ini sava ña, te ni nasávāha ya sava ña jeē cándoho cuehyí. Te ñin ña cúu María ñuu Magdala, te ini ñahan un ní quenehen ya uxá tachí.

3 Te inga ña cúu Juana, ñasihí Chuza, tēe ndíso jñiñu ini vehe Herodes. Te inga ña cúu Susana, jín cuehē gā ñahan jeē cáchindéé ñahán ña, jéhe ña tāca jéé jín ñihún yá jín de jínáhan de.

*Jñūhun yátá siquī tēe jéte trigo  
(Mt. 13.1-9; Mr. 4.1-9)*

4 Te cuehē ñayuu tācá ñuu yūcuan ní jinūcoo i nuū Jesús. Te ni cacutútú cuéhē ndasí ñayuu, te ni cahān yā ñin jñūhun yátá jín i:

5 ñin tēe cate trigo, ni quenda de jeē cáte de. Te ná ni quejéé de jéte de, te jecu trigo ni jitē yuhíchi. Te ni cajeñū ñayuu siquī, te ni cayeji saa.

6 Te jecu gā ni jitē nuū ñūhun yuū. Te ni cane, te ni ichí-ni, chí tú cuehē cajin.

7 Te jecu gā ni jitē nuū náne iñu. Te inuú-ni ni canecoo iñu jín, te ni jesi nuū.

8 Te jecu ni jitē nuū ñūhun váha. Te nuū ní jehnu, te ni jéhe cuehē nuní, chí jeē ñin ñin ni jéhe nde ciento. Achí yá.

Yūcuán na te ni cahān jee ya:

Tāca rōhó jéé jīni sōho, na chūsóhó ró, achí yá.

*Najehē cahān yā mání jnūhun yátá*

(Mt. 13.10-17; Mr. 10-12)

<sup>9</sup> Te tēe cáscuáha jíin yá ni cacajnúhūn de ya na vé cuní cahān jnūhun yátá yáha.

<sup>10</sup> Te ni cahān yā:

Róhó jíjnāhan ró, chí sáha Yaā Dios jeē cájecūhun ni rō jnūhun ni yisāhi yáha, ndese quívicoo ñayuu ndaha Yaā Dios jeē ndacu ya jniñu nuū i. Te mání jíin jnūhun yátá cáhān rī jíin sava ga i, návāha vēsú cájito i, te quéndōo i nájñūhun jeé tú na vé ni cájito i. Te vēsú cájini sōho i, te ma jécūhun ni i.

*Jeē ní castūhun cájī yá jnūhun yátá tée jéte trigo*

(Mt. 13.18-23; Mr. 4.13-20)

<sup>11</sup> Jnūhun yátá yáha cuní cahān: Trigo un cúu jnūhun Yaā Dios.

<sup>12</sup> Te trigo jeē ni jíitē yuhíchi cúu nájñūhun ñayuu cájini sōho jnūhun, te quíji-ni jexeén te quénde-ni jnūhun iní anuá i, návāha ma candíje i te ma jnáma rī i.

<sup>13</sup> Te trigo jeē ni jíitē nuū ñūhun yuū cúu nájñūhun ñayuu cájini jnūhun, te cájetáhú i te cácusñi ni i jíin. Te tu cúcutú jnūhun ún iní anuá i. Te jecu-ni quívī cáchandje i, te núu ni quejéé jnúndóho, te cájica yátá i.

<sup>14</sup> Te trigo jeē ni jíitē nuū náne iñu cúu nájñūhun ñayuu cájini jnūhun, te cuangoo i te cácuñeñu i jíin jniñu i jíin jéé cuní i cucúcá i te coo sñi ni i. Te tu íje i jíin jnúhun ya.

<sup>15</sup> Te trigo jeē ni jíitē nuū ñūhun váha cúu nájñūhun ñayuu cájini nahín jnúhun ya, te cájniñi vāha i, chí íyó váha íyó ndāā anuá i. Te cáhije i jíin jnúhun ya, chí cáchandje vāha i.

*Jnūhun yátá síquī lámpara*

(Mr. 4.21-25)

<sup>16</sup> Núu nástñin ñayuu ñin lámpara, te tu jési i ni ñin síquī, ni tu jéni i chíji jíto. Chí sa suhva jéni i nuū sucún, návāha cundijin nuū ñayuu quívicoo vehe.

<sup>17</sup> Te suni súcuan tu íyó ni ñin jnūhun sáhi jéé ma cuní ñayuu, chí ndíhi táca jnúhun cácahān i nane ndijin te cuní ñayuu.

<sup>18</sup> Núu súcuan te na cuní sōho vāha ró, chí ñayuu je jécūhun ni, stéén gā yā nuū i. Te ñayuu tu cándíje, máá jecu jeé jéni ni i jeé jíiní i, sa suhva naa. Achí yá.

*Náná yā jíin ñani yā*

(Mt. 12.46-50; Mr. 3.31-35)

<sup>19</sup> Yūcuán na te ni quee naná yā jíin táca ñani yā nuū íne ya. Te tu ní cúu quívicoo ña nuū yā síquī jeé chítú ñayuu.

<sup>20</sup> Te ñin ñayuu ni castūhun núu yā:

Náná ni jíin táca ñani ni cáhñin nuū quéhe, te cácuni cahān jíin ní, achí i.

<sup>21</sup> Te ni cahān maá yá:

Suni náná rī jíin ñani rī cácuu ñayuu cájini sōho jnūhun Yaā Dios te cásquícu i, achí yá jíin i.

*Jeē ní jecuñi tachī ñihin jíin mar ni sáha ya*

(Mt. 8.23-27; Mr. 4.35-41)

<sup>22</sup> Te ñin quívī ni quívī ya ñin barco jíin tēe cáscuáha jíin yá, te ni cahān yā jíin de:

Na yáha yó quíhñ yō inga lado mar.

Te ni cascáca de barco cuangoo de.

<sup>23</sup> Te níní cascáca de barco, te ni quixí yā. Te ni jequihí ñn tachí níhin nuū mar, te je yajni chitú ndute ini barco, te ndúcú quee barco.

<sup>24</sup> Te ni castónða de ya, te ni cacahān de:

Maestro, Maestro, vijna te quēe yó chíji ndute te naa yō, achí de.

Te ni ndocuñi-ni ya, te ni cahān yā nuū tachí níhin jíin núu mar. Te ni cajecuiñi-ni, te ni cuu nayúú í-ni.

<sup>25</sup> Te ni cahān yā jíin tée cáscuáha jíin yá:

¿Naun tu cácadíje ró?

Te máá de yōhyo ni cayūhú de, te cánaa ni de, te cácahān de jíin jnáhan de:

¿Ndé ñn ga cúu tée yáha jéē nde nuū tachí níhin jíin núu ndúte ndácu de jniñu te cájetáhú jéē cahán de? Achí de.

*Tēe Gadara jeē ndóho tachí  
(Mt. 8.28-34; Mr. 5.1-20)*

<sup>26</sup> Yūcuán na te ni cane ya jíin de región Galilea, te cuahān yā región Gadara jeē íne inga lado mar Galilea.

<sup>27</sup> Te nuū ní nanuu ya nuū ñúhun íchi, te ñn tée ñuu un ní quee de nuū yā. Te je ni cuu cuehē cuiyā ñúhun cuehē tachí ini de. Te tu ñúhun cuiiti de sahna, ni tu ndéé de vehe, chí sa suhva nuū cáyindúji ndíyi ndeé de.

<sup>28</sup> Te ná ni jito de nuū Jesús, te ni jecuiñi yití de nuū yā, te ni cana cóhó de:

¿Naun vēji ní núu ná, Jesús Sēhe Yaā cujéhu téyi? Cáhán ndahú ná jíin ní jeē ma stóho ní sáña, achí de.

<sup>29</sup> Súcuán ni cahān de, chí je ni ndacu ya jniñu nuū tachí un jéē na quéndacoo ini de. Te ni cuu cuehē jínu sáha xeēn tachí jíin de. Te cájihni ñayuu ndaha de jehé de jíin cadena, návaha tú na vé sáha de. Te ndihi-ni jéhnde de, te jínu de jéhén de nde nuū ñúhun téhé sáha tachí ún.

<sup>30</sup> Te Jesús ni cajñuhun yá de:

¿Na vé naní ró?

Te ni cahān de:

Legión naní ná.

Súcuán ni cahān de jeē naní de, chí ñúhun cuehē tachí ini de.

<sup>31</sup> Te ni cacahān ndahú táchí un jíin yá jeē ma tají yá quihín ini tūhnchi cúnú.

<sup>32</sup> Te yucu yúcuán cáhiin cuehē quini cájitu ti. Te tachí jeē cáñuhun ini tée un ní cacahān ndahú jíin yá jeē na cuáha ya jñuhun quivicoo ini quini ún. Te ni jēhe ya jñuhun.

<sup>33</sup> Te ni quendacoo tachí ún ini tée ún, te ni quivicoo ini quini. Te quini un ní cajinu ti ní ñngoo ti ñn yucáva, ni quivicoo ti nuū mar, te ni ndaquihí ti ndute, ni cajihí ti.

<sup>34</sup> Te tée cándito ti ni cajito de jeē súcuán ni cuu, te ni cayūhú de. Te ni cajinu de cuacastūhún de nuū ñayuu ñuu un jíin ñayuu tāca rancho.

<sup>35</sup> Te cuangoo ñayuu un cuácondéhé i na vé ni cuu. Te ni jinūcoo i nuū íne Jesús. Te ni cajito i nuū téé ní quendacoo tachí ini, néne de nuū jehé Jesús, te ñúhun de sahna, te je ni nducájí xini de. Te ni cayūhu ñáyuu ún.

<sup>36</sup> Te téé ní cajito ni canacani de jñuhun nuū ñáyuu, ndese ni nduvāha téé ni ñuhun tachí ini.

<sup>37</sup> Yūcuán na te tāca ñáyuu ní región Gadara, ni caquejéé i cácahān ndahú i jíin yá jeē na cújiyo ya quihín yā, chí yōhyo cáyūhú i. Te ni ndívi ya ini barco jeē quínuhun yá.

38 Te tēe jeē ní quendacoo tachī ini, ni cahān ndahú de jíin yá jeē na cuáha ya jnūhun quihīn de jíin yá. Te Jesús ni cahān yā jeē na quéndōo de, te áchí yá:

39 Cuánuhun vehe ró, te nacani ró jnūhun ndese yōhyo jéhnū jniñū ni sáha Yaā Dios jíin ró, achí yá jíin de.

Te cuahān de, te ni nacani de jnūhun nḥ́ ñuu ún, ndese yōhyo jéhnū jniñū ni sáha Jesús jíin de.

*Jnūhun sēhe síhí Jairo jíin ñahan ní quehé yusáhma ya*

*(Mt. 9.18-26; Mr. 5.21-43)*

40 Te nuū ní najinū Jesús inga lado mar, te ñayuu un ní cacusḥ́ ni i jeē ní najinū yā, chí ndihí i cándetu i ya.

41 Te ní quee ḥ́n tēe cújéhnū ini vehe īi sinagoga, naní de Jairo. Te ní jecuiñī yití de nuū jehé yā, te ní cahān ndahú de jíin yá jeē na quihīn yā jíin de vehe de.

42 Chí iyó ḥ́n sēhe síhí de jeē mañúhún-ni i nuū de, te iyó i nájnūhun uxí uū cuiyā. Te sūchí un je yajni cuu i. Te cuahān yā jíin de. Te cuehē ñayuu cándiquīn i ya, te ní chitú níhin i xiin ya cuango i.

43 Te mēhñū ñayuu un cuahān ḥ́n ñahan cúhú jeē ní cuu uxí uū cuiyā ndóho ña cuehyī niñī. Te ní jexin ña tāca jéé névāha ña jíin tēe tájná, te tu ní ndúvāha ña sáha ní ḥ́n de.

44 Te ní quee ña ichi yátá yā, te ní quehé ña yusáhma ya. Te ní jecuiñī-ni niñī ña.

45 Yūcuán na te ní cahān Jesús:

¿Ndé ḥ́n ní quehé sahma ri? achí yá.

Te ndivii i ní cacahān jeē tu ní quehé i. Te Pedro jíin tēe cáhīn jíin de, ní cacahān de:

Maestro, jito ní jéé ñayuu cuehē yāha ní chitú níhin i xiin ní, te cáquḥ́ i níhín, te cájnūhun ní ndé ḥ́n ní quehé sahma ní.

46 Te ní cahān Jesús:

Tuú chí ḥ́n ñayuu ní quehé sahma ri, chí ní jini rī jeē jíin fuerza rī ní nduvāha ḥ́n ñayuu, achí yá.

47 Te ní jini ñahan un jéé tu ní cúu coo yuhu jeē ní sáha ña. Te quísi i ña ní quee ña, te ní jecuiñī yití ña nuū jehé yā. Te jito jíinú tāca ñayuu, te ní cachi cají ña najehē ní quehé ña yusáhma ya, jíin jéé ní nduvāha-ni ña.

48 Te ní cahān yā jíin ña:

Séhē, ní candíje ró jéé cuu nasávāha ri rohó, te jeē yúcuán ní nduvāha ró. Cuahán te na ndúsḥ́ ní rō, achí yá.

49 Te ní ní cáhán gā yā súcuán, te ní quee ḥ́n tēe vēji vehe Jairo, tēe cújéhnū ini sinagoga, te ní cachi nuū de:

Je ní jíhí sēhe síhí ní. Te ma sájnéñū ga ní Maestro, achí de.

50 Te ní jini Jesús jnūhun yáha, te ní cahān yā jíin Jairo:

Ma yūhu ró, chí candíje-ni ró, te nastécu rī sēhe ró, achí yá.

51 Te ní jinū yā vehe, te tu ní jéhe ya jnūhun quiví ñayuu jíin yá, chí máa-ni Pedro jíin Juan jíin Jacobo jíin tátá naná sūchi síhí un.

52 Te cácuaihyá ní ndihí ñayuu cáyūcú ini vehe, te cándahyū i jehē sūchí un. Te ní cahān yā:

Ma ndahyú rō jíinánah ró. Tu ní jíhí i, chí quíxi-ni i, achí yá.

53 Te ní cajecú catá i jeē ní cahān yā, chí cájini i jeē ní jíhí sūchi síhí un.

54 Yūcuán na te ní jniḥ́ ya ndaha i, te ní cahān jee ya jíin i:

Sḥ́, ndocuiñī, achí yá.

<sup>55</sup> Te ni natecu i, te ni ndocuĩñi-ni i. Te ni ndacu ya jniñu jeē na cuáha ña jeē cáji i.

<sup>56</sup> Te tátá i náná i yōhyo ni canaa ni de cájito de. Te ni ndacu niñin ya jniñu nuū de jeē ma cáchi de nuū ni ñin jeē súcuan ni cuu.

*Jeē ní tají yá ndihúxí uū de cuanacani de jñuhun*  
(Mt. 10.5-15; Mr. 6.7-13)

## 9

<sup>1</sup> Te ni nastútú yá ndihúxí uū tēe cáscuáha jíin yá, te ni sáha ya jeē cóndiso jniñu de te coo poder de jeē quénehen de tachí ini ñayuu, jíin jeē nasávāha de ñayuu cácuñu.

<sup>2</sup> Te ni tají yá de quingoo de jeē nácani de jñuhun ndese ndácu Yaā Dios jniñu, jíin jeē nasávāha de ñayuu cácuñu.

<sup>3</sup> Te ni cahān yā jíin de:

Ma cóndiso ró jeē cuajniñu ró ichi, ni vara, ni ñunu, ni staā, ni xūhún. Te quihñin rō jíin ñin-ni camisa, te ma cóndiso ró inga.

<sup>4</sup> Te na-ni vehe núu ni quñivicoo ró, te yūcuán coyūcu ró nde quenda tucu ró quihñin rō inga ñuu.

<sup>5</sup> Te núu ñin ñuu tu cájetáhú i róhó, na quéndacoo ró yúcuan, te scóyo ró tícachā jehē rō, te súcuan stéén rō jeē iyó cuéchi i jeē tu ní cájetáhú i. Achí yá.

<sup>6</sup> Te ni quendacoo de cuahān de, ni cajica nuu de táca ñuu, ni canacani de jñuhun jnáma Yaā Dios ñayuu. Te táca lado ni canasávāha de ñayuu cácuñu.

*Jeē ni jñi Juan tēe scuándute*  
(Mt. 14.1-12; Mr. 6.14-29)

<sup>7</sup> Te Herodes, tēe cúu gobernador, ni jini jñuhun de táca jniñu sáha Jesús. Te ni cunéé ni de, chi cájeni ni sava ñayuu cácahān i jeē Juan ni natecu de.

<sup>8</sup> Te sava ga i cácahān jeē ní nane Elías, tēe ni nacani jñuhun Yaā Dios nde jenahán. Te sava ga i cácahān jeē inga tēe ni nacani jñuhun ya nde jenahán, ní natecu de.

<sup>9</sup> Te ni cahān Herodes:

Juan chi ni ndacu ri jniñu ni tahndē xinī. Núu súcuan ¿te ndé tēe cúu tēe yáha jeē jíni jñuhun ri jeē sáha de jniñu jéñu? Achí de.

Te ni nducú Herodes modo coto de nuū Jesús.

*Jeē ni scáji yá uhñun mil tēe*  
(Mt. 14.13-21; Mr. 6.30-44; Jn. 6.1-14)

<sup>10</sup> Te ni ndecoo tēe cácuu apóstol jeē ní tají yá ni canacani jñuhun. Te ni cacachi de nuū yá táca jniñu ni casáha de. Te ni jeca ya de cuahān sñin ya jíin de ñin lugar nuū tú ñayuu, yajni ñuu Betsaida.

<sup>11</sup> Te ni cajini ñayuu, te suni cuangoo i. Te ni jetáhú yá i, te ni nacani ya jñuhun ndese ndácu Yaā Dios jniñu, te ni nasávāha ya ñayuu cácuñu.

<sup>12</sup> Te nuū cuáhini, te ni quecoo ndihúxí uū tēe cáscuáha jíin yá, te ni cacahān de jíin yá:

Tají ní ñayuu cuehē yāhá na quingoo i táca ñuu jíin táca rancho yajni yāhá, te nducú i nuū ndóo i te cuaan i jeē cáji i, chi tú na vé iyó yáha, áchí de.

<sup>13</sup> Te ni cahān yā jíin de:

Cuāha máa ró jeē cáji i, áchí yá.

Te ni cacahān de:

Tú na vé cánevāha ná, chi uhñun-ni staā jíin úu-ni chácá. Te vēsú núu quicuaan ná stáa caji ndihñi ñayuu cuehē yáha, te ni ma cúu, áchí de.

14 Chi iyó nájñuhun uhūn mil tē. Te ni cahān yā jíin tēe cáscuáha ún:

Cahān jíin ñáyuu na cúcōo sñn cincuenta cincuenta i, áchí yá.

15 Te súcuan ní casáha de, te ni cacucōo ndihi ñayuu.

16 Te ni quihin ya ndihúhún staā jíin uū chācá un, te ni ndacoto ya ichi ándiví, te ní nacuatáhú yá. Te ni tahu cuéché yá staā ún, te ni jēhe ya nuū tēe cáscuáha jíin yá, te ni casaja de nuū ñáyuu cuehē.

17 Te ndiví i ni cayeji, te ni candutú chíji i. Te ni canastútú de pedazo staā jeē ní quendōo, te ni chitú úxí uū jíca.

*Jeē ní cahān Pedro jeē Jesús cúu Cristo*

*(Mt. 16.13-19; Mr. 8.27-29)*

18 Te iin quiví ní cusñn Jesús, jíicán tahu yā, te máa-ni tēe cáscuáha un cáhiin de jíin yá. Te ni cajñuhun yá de:

Ruhū, ¿ndé iin cúu ri cácahān ñayuu? achí yá.

19 Te ní cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jñuhun Yaā Dios nde jenahán. Te sava ga i cácahān jeē inga tēe ni nacani jñuhun ya ni natecu de.

20 Yūcuán na te ni cajñuhun yá de:

Te máá ró, ¿ndé iin cúu ri cácahān rō?

Te ní cahān Pedro:

Máá ní cúu Cristo, Yaā ní tají Yaā Dios, achí de.

*Jeē ní castúhún Jesús jeē cúu yā*

*(Mt. 16.20-28; Mr. 8.30-9.1)*

21 Yūcuán na te ni ndacu nihin ya jniñu nuū de jeē ma cáchi de jñuhun yáha núu ní iin ñayuu.

22 Te ní cahān yā:

Máá rí, Yaā ní nduu tēe, cánuú ndoho xeēn rí. Te tāca tēe jéhu jíin sūtú cácujuhnu jíin tēe cástéén tutu ley, squéhichí de ruhū. Te cahni de ruhū, te nuū uní quiví te natecu rí, achí yá.

23 Yūcuán na te ní cahān yā jíin ndihi de:

Na-ni ñayuu núu cúní i condiquín i ruhū, na cási i jeē cuní maá i, te na cóndiquín i ruhū tāca quiví, te cuāha i jñuhun ndoho i jñúndóho jeē siquí rí, vésú na cúu i.

24 Chi núu ndé ñáyuu cuní i cācu i nuū jñúndóho quiiji nuū i jeē siquí ruhū, núu súcuan te jnahnū ndetú i ní cání. Te núu ndé ñáyuu, vésú na cúu i jeē siquí ruhū, te cotecu i ní cání.

25 ¿Chi ndé cuajniñu vésú na cúndeyí ñayuu nihin i ní ñáyiví, te núu squiví i máá i nuū jnahnū ndetú i ní cání?

26 Chi núu na-ni ñayuu cúcanu i jeē siquí ruhū, Yaā ní nduu tēe, jíin siquí jñuhun cáhán rí, suni súcuan cucanu rí jeē siquí máá i, quiví ndíji rí. Te quiví ún chí yóhoyo luu cujéhu rí, nájñuhun cújéhu Tátá rí, te suni cácujuhnu ndajéhé ndoo ya sáha ya.

27 Te jendaá cahán rí jíin ró jeē sava tēe cáhiin yāhá, ma cúu de chi nde cuni de jeē ndácu Yaā Dios jniñu jíin poder yā. Achí yá.

*Jeē tucu ni nduu ya*

*(Mt. 17.1-8; Mr. 9.2-8)*

28 Yūcuán na te nájñuhun nuū uná quiví jeē ní cahān yā jñuhun yáha, te ni caa ya iin yucu, cuacacān tahu yā. Te Pedro jíin Jacobo jíin Juan cuango de jíin yá.

29 Te níní jícán tahú yā, te tucu ni nduu nuū yā, te sahma ya ni nducujín quíyi, te ndíndēé.

30 Yūcuán na te ni canecoo uū tēe, cándajñuhún de jíin yá. Te cúu de Moisés jíin Elías, tēe ni cahíyo jenahán.

31 Te luu ndíndēé de cáhīin de, te ni cacahān de jíin yá siquī jeē ní cuyajni cuu yā ñuu Jerusalén.

32 Te Pedro jíin tēe cáyūcu jíin de, yōhoyo cájī de māhná, te vēsú súcuan te tu ní cáquixī de. Te ni cajito de jeē lúu ndíndēe yá jíin ndíndúú tēe cáhīin jíin yá.

33 Te nuū ní cacujiyo tēe un núu yā, te ni cahān Pedro jíin yá:

Maestro, nacā jeē váha jeē cáhīin ná yáha. Te na sáha ná únī vehe ramada, ñin cuu máa ní, inga cuu Moisés, te inga cuu Elías, achí de.

Te tu sáha de cuenta na vé cúu jeē cahán de.

34 Te níní cáhán de súcuan, te ní quee vicó ñuhun ní jesi nuū de jíjnáhan de. Te ní cayūhú de jeē cáhīin de chíji vicó ún.

35 Te nuū vicó un ní cahān ñin jñuhun:

Yāha cúu Sēhe ri jeē maní ndasí rí jíin. Te na cúni nahín ró jñuhun cáhán yā, achí.

36 Te nuū ni jínu ni cahān jñuhun ún, te máa ñin na Jesús ñin ya nuū de. Te máa de tu ní cacahān cuiti de, te tāca quívī ún tu ní cácatchi de nuū ní ñin jeē súcuan ní cajito de.

*Jeē ní nasávāha ya ñin sūchi ññuhun tachī ini*

*(Mt. 17.14-21; Mr. 9.14-29)*

37 Te inga quívī un ní nanuu ya yucu jíin de. Te cuehē ñayuu ni jejnahan i ya.

38 Te mēhñu ñáyuu cuehē un ní cana jee ñin tēe:

Maestro, jícán tahú na núu ní jēe condēhe ní sēhe yíí ná, chí máñúhún i nuū ná.

39 Te máni jeē sáha xeēn tachī jíin i, te cána cóhó i sáha, te jéhni yíhí i, te jée tiñū yuhu i. Te yōhoyo stóho i, te yōhoyo uhū siaá i.

40 Te ni cahān ndahú ná jíin tēe cáscuáha jíin ní jeē na quénehen te tachī ún, te tu ní cúu sáha de, achí de.

41 Te ni cahān yā jíin de jíjnáhan de:

Ñayuu yōhoyo ñihni ní cácuu ró, chí tu cácandje ró jēe cuu nduvāha i. ¿Nasaa ga quívī condee rí jíin ró jeē cuándeyí ní rí jíin ró? Cuáquihin sēhe ró na quíji i, achí yá.

42 Te níní véji i nuū yā, te ni cotúú i ni sáha tachī, te ni jehni yíhí i. Te Jesús ni cahān xeēn yā nuū tachí un, te ni nasávāha ya sūchí un, te ni nacuāha ya i nuū tatá i.

43 Te ndivíi ñayuu nahán ní canaa ni i cájito i jeē yóhoyo jéhnu jñiñu sáha Yaa Dios.

*Jeē ní cáhān tucu ya jeē cúu yā*

*(Mt. 17.22-23; Mr. 9.30-32)*

Te níní cánaa ni i cájito i táca jñiñu ni sáha Jesús, te ni cahān yā jíin tēe cáscuáha jíin yá:

44 Chuhun váha ni rō jñuhun cáhán rī yáhá, te ma náa ni rō, chí ruhū, Yaa ní nduu tēe, nastúu i ruhū quívī ri ndaha tāca tēe xeēn, achí yá.

45 Te tu ní cájecūhun ni de jñuhun cáhán yā, chí tu ní cúu cuiti jecūhun ni de. Te ní cayūhú de cajñuhún de ya siquī jñuhun ni cahān yā.



*Ndé ñáyuu cúu jeē cújéhu ga*

*(Mt. 18.1-5; Mr. 9.33-37)*

<sup>46</sup> Yūcuán na te tēe cáscuáha jíin yá ni caquejeé de cácahān de siquī núu ndé ñin de cújéhu ga.

<sup>47</sup> Te Jesús ni jíini yā jeē súcuan cájeni ni de. Te ni jñi ya ndaha ñin sūchi lúli, te ni jeni ya i xiin ya.

<sup>48</sup> Te ni cahān yā jíin de:

Na-ni ñayuu núu jeē siquī ruhū jetáhú i sūchi lúli yáha, te ruhū jetáhú i. Te ñayuu jetáhú rúhū, suni jetáhú i Yaā ní taji rúhū vēji ri. Te ñayuu núu ga mēhñu ró, máa i cújéhu ga, achí yá.

*Ñayuu tu cáhán siquī yā, ñin i jíin yá*

*(Mr. 9.38-40)*

<sup>49</sup> Yūcuán na te ni cahān Juan:

Maestro, ni cajito ná ñin tēe jeē jíin síhví ní quénehen de tachí ini ñayuu. Te ni cajesi na jēe sáha de, chí tu jíca de jíin yó, achí de.

<sup>50</sup> Te ni cahān Jesús jíin de:

Ma cási rō jeē sáha de, chí tēe tu cáhán siquī yō, ñin de jíin yó, achí yá.

*Jeē ni cáhán yā nuū Jacobo jíin Juan*

<sup>51</sup> Te ni cuyajni quiví jeē quínuhun yā andiví, te ni tee téyí ni yā jeē quihín yā ñuu Jerusalén.

<sup>52</sup> Te ni taji yá sava tēe yósnúu de jíin jnúhun jeē jinú yā. Te cuango de ñin ñuu Samaria návāha nducú de nuū ndōo ya.

<sup>53</sup> Te ñayuu Samaria un tu ní cájēhe i vehe ndōo ya, chí ni cajini i jeē ndé Jerusalén quihín yā.

<sup>54</sup> Te Jacobo jíin Juan, tēe cáscuáha jíin yá, ni cajini de jeē súcuan cúu, te ni cacahān de jíin yá:

¿A cúní ni jēe ndácu yó jniñu quiji ñuhūn nde andiví, nájnūhun ni sáha Elías, návāha naa ñayuu yáha? Achí de.

<sup>55</sup> Yūcuán na te ni ndió cóto Jesús nuū de, te ni cahān yā nuū de:

Tu cájini rō na nuū vēji jnúhun cácahān rō.

<sup>56</sup> Chí ruhū, Yaā ní nduu tēe, tú vēji ri jeē snāá rī ñayuu, chí sa suhva jeē jnáma rī ñayuu, achí yá.

Yūcuán na te cuahān yā jíin de inga ñuu.

*Siquī ñáyuu jeē cáculi i condiquīn i ya*

*(Mt. 8.19-22)*

<sup>57</sup> Te níni jíca ya ichi jíin de, te ni cahān ñin tēe jíin yá:

Condiquīn na níhín quihín yō ndé-ni cúu-ni nuū quihín ni, achí de.

<sup>58</sup> Te ni cahān Jesús jíin de:

Tāca ñúcuui, íyó yáu cava cáñuhun tí. Te suni saa, iyó táca tí. Te ruhū, Yaā ní nduu tēe, tú nuū cusú rī, achí yá.

<sup>59</sup> Te ni cahān yā jíin inga de:

Condiquīn ruhū na quihín yō.

Te máa tēe un ní cahān de:

Condetu ní ndé na quíchindūji ná tátá na xíhna gā. Yūcuán na te condiquīn na níhín, achí de.

<sup>60</sup> Te ni cahān Jesús jíin de:

Stóo tāca ndíyí na chíndūji jnáhan ndíyí, chí ndíyí cácuu ñayuu tu cácandje. Te róhó, cuahān te nacani ró jnúhun ndese ndácu Yaā Dios jniñu, achí yá.

<sup>61</sup> Yūcuán na te suni ni cahān inga de:

Cúní na condiquīn na níhín, te cuāha ní jnūhun jeē xihna gā quicahān na jíin ñáyyu cáyūcú vehe ná, áchí de.

<sup>62</sup> Te ni cahān Jesús jíin de:

Núu na-ni tēe quéjéé de condiquīn de ruhū, te núu máni jeē nácani cuihyá ni de siquī tāca jéé ní stóo de, núu súcuan te cúu de nájñūhun ñin tēe jítu jíin yátá, te jícō coto de ichi vehe de. Te ma cuajñíñu de condiquīn de ruhū siquī jñíñu ndácu Yaā Dios, achí yá.

*Jeē ní tají yá unī xico uxī de*

## 10

<sup>1</sup> Te ná ni cuu tācá jniñu yáha, te máá Jítoho yō ni nacāji ya unī xico uxī gā de. Te ni tají yá ndihuū ndihuū de jeē cósñúú de nuū yā, quingoo de tācá ñuu jíin tāca lugar nuū jé yajni quihīn maá yá.

<sup>2</sup> Te ni cahān yā jíin de:

Ñayuu yáha cácuu i nájñūhun trigo jeē tahndé, te ndaā jeē cuehē cúu, te tēe cahnde chi jecu-ni de cúu. Núu súcuan te cacān tahuū rō nuū maá Jítoho rō Yaā Dios jeē na tají yá cuehē tēe na quíngoo de cahnde de trigo, cúu jeē nacani de jñūhun ya nuū ñáyyu.

<sup>3</sup> Te cuángoo jíjñáhan ró, te na cástūhun rí nuū rō jeē tají rí rohó quíngoo ró nájñūhun londe mēhñu yāhī.

<sup>4</sup> Te ma cóndiso ró ñunu, ni yijni xūhún, ni ndijēn. Te ichi ma cucuéé ró ndajñūhun ró jíin ni ñin.

<sup>5</sup> Te na-ni vehe núu ni quiví ró, te xihna gā cahān rō: Na quíji jñūhun ndeyí jñūhun sī ni nuū rohó, ñáyyu vehe yáha, achí rō.

<sup>6</sup> Te núu vehe yúcuan iyó ñáyyu vāha, te jñūhun ndeyí ní cahān rō jinū siquī i. Te núu tuú, te jñūhun ndeyí ní cahān rō ma jinú siquī i.

<sup>7</sup> Te suni vehe yúcuan coyūcu ró, te caji rō coho ró jéé cuāha ñayuu nuū rō. Chi siquī jniñu jeē nácani ró jñūhun nuū ñáyyu, te cánuú coto i rōhó. Ma quéndōo ró tijni vehe, chí ñin-ni vehe.

<sup>8</sup> Te na-ni ñuu núu ní quivícoo ró, te núu cuatáhú i rōhó, te caji rō tāca jéé cuāha i nuū rō.

<sup>9</sup> Te nasávāha ró ñáyyu cácuñu ñuu yūcuán. Te cachi rō nuū i: Je ni cuyajni Yaā Dios jeē ndacu ya jniñu nuū rō, achí rō.

<sup>10</sup> Te na-ni ñuu núu ní quivícoo ró, te núu tu ní cájetáhú i rōhó, te quendacoo ró ini calle yūcuán, te cahān rō:

<sup>11</sup> Nde ticachā ñuu rō yáha jéé ni jñí jehē rī, na náscóyo ri jeē cúu seña jeé iyó cuéchi ró jéé tu ní cájetáhú ró. Te na cónahán ró jeē Yaā Dios je ni cuyajni ya jeē ndacu ya jniñu nuū rō nuú.

<sup>12</sup> Te cáhán rī jíin ró jeē quiví juicio te xeēn gā coo castigo siquī ñuu casáha súcuan vēsú siquī ñuu Sodoma nuū ní casáha ndasí ñáyyu cuēchi.

*Jeē ní cuxeēn yā nuū sava ñuu nīhni ni  
(Mt. 11.20-24)*

<sup>13</sup> Nacā jeē xeēn ndoho ró, ñáyyu ñuu Corazín. Te nacā jeē xeēn ndoho ró, ñáyyu ñuu Betsaida. Chi núu ini ñuu Tiro jíin ñuu Sidón ní sáha ri jniñu jéhu jeé ní sáha ri ini ñuu maá ró, te yachí nacani ní ñáyyu ñuu un jéé stóo i cuéchi i núú. Te sáha i seña jeé steén jeé nácani ní i siquī cuéchi i, chí cuhun i sahma jnúú te chuhun i yaā xiní i núú.

<sup>14</sup> Núu súcuan te quiví coo juicio te xeēn gā coo castigo siquī rō jijnáhan ró vēsú jeē ni íyo siquī ñuu Tiro jín ñuu Sidón.

<sup>15</sup> Te róhó ñáyyu ñuu Capernaum, ¿á cájeni ni rō jeē cujéhu ró nájnūhun ñin jeē cáa cuahān ichi ándiví? Tuú chí sa nanuu ró ndé lugar nuū cáyūcu ánuá ndíyí. Achí yá.

<sup>16</sup> Te ni cahān gā yā jín tée jeē taji yá quingoo:

Ñayuu chusóhó jnúhun cahān rō, nuū maá rí chusóhó i. Te ñayuu squéhichí rohó, suni ruhū squéhichí i. Te ñayuu squéhichí ruhū, suni squéhichí i. Yaā ní taji ruhū vēji ri. Achí yá.

*Jeē ní ndecoo tēe ni taji yá*

<sup>17</sup> Te ni ndecoo unī xico uxī tēe un, cácusī ni de te cácahān de jín Jesús:

Nde tachí cájetáhú núu na jéē jín síhví ní, chí quéndacoo ini ñayuu, achí de.

<sup>18</sup> Te ni cahān yā jín de:

Súcuan cúu, chí ni jito ri jeē nájnūhun ñin taja ni ningava Satanás ichi ándiví, chí ni quende rī ndíhi poder un.

<sup>19</sup> Te vijna te je ni jēhe ri fuerza nuū rō jeē cueñū rō nájnūhun siquī táca cóo jín tísuhma, te cundeyí ró siquī táca fuerza maá jéē jito uhū yohó, te tú na vé sáha ga jín ró.

<sup>20</sup> Te ma cúsi ni rō maá-ni jeē cájetáhú táchí nuū rō, chí sa cusī gā ni rō jeē yosó síhví ró nde andiví. Achí yá.

*Jeē ní cusī ni Jesús*

(Mt. 11.25-27; 13.16-17)

<sup>21</sup> Te suni hora un ní cusī ni Jesús, ni sáha Espíritu Santo, te ni cahān yā:

Na cútahū na núu ni Tátá, jito ho andiví jín ñáyiví. Chí ni jesi ni táca jnúhun ndíchí ní, jeē ma cúni ñayuu ndichí jín ñayuu tūhva cuenta ñayiví yáha. Te ni steén ni núu ñayuu cácuo nájnūhun sūchi lúlí. Chí súcuan ni nujnahan ni ni Tátá, achí yá.

<sup>22</sup> Te ni cahān gā yā:

Ndivii ni jēhe Tátá rí nuū rí. Te tu cájini ñayuu ndé ñin cúu ruhū, Sēhe Yaā Dios, chí maá-ni Tátá rí cúu jeē jiní yā ruhū. Ni tu cájini ñayuu ndese Yaā cúu maá Tátá, chí maá-ni Sēhe cúu jeē jiní. Te íyo ñayuu jeē cuni maá Sēhe stéén yā nuū i ndese Yaā cúu Tátá yā, te maá i suni cuni i. Achí yá.

<sup>23</sup> Yūcuán na te jito ya nuū tée cácuáha ún, te ni cahān yā jín maá-ni de:

Yōhoy ndetū ñayuu cájito jniñu jéhu jeē cájito maá ró.

<sup>24</sup> Chí cáhān rí jín ró jeē cuehē tēe ni canacani jnúhun Yaā Dios, jín táca rey, ni cacuni de coto de jeē cájito maá ró, te tu ní cájito de. Te suni ni cacuni de cuni sōho de jeē cájini sōho maá ró, te tu ní cájini de. Achí yá.

*Jnúhun ñin tēe vāha ni nación Samaria*

<sup>25</sup> Yūcuán na te ñin tēe stéén tutu ley Yaā Dios, ni ndocuñí de ni jecahān de jín Jesús, chí cúni de coto ndee de ya. Te ni cajnúhún de:

Maestro, ¿na vé sáha ná te nihīn tahu na cotecu na ní cáni andiví? áchí de.

<sup>26</sup> Te ni cahān yā jín de:

¿Nde se yósó nuū tutu ley? ¿Nde se cáhān cáhu ró? Achí yá.

<sup>27</sup> Te maá tée un ní cahān de jeē cahān nuū tutu:

Coo maní ndasí ró jín maá Jito ho rō Yaā Dios, nde jnāá ndasí ró sáha ró ndíhi jeē cúsi ni yā, nde jín ini jín ánuá ró, jín ní fuerza ró, jín ní jéē njnúni ró. Te cundáhú ni rō jnáhan ró nájnūhun cundáhú ni rō maá ró, achí. Achí de.

<sup>28</sup> Te ni cahān yā jín de:

Vāha ni cahān rō. Te núu cuu sáha ró súcuan te nihīn tahú rō cotecu rō ní cáni, áchí yá.

<sup>29</sup> Te máá tée un cúní de jeē quéndōo ndaā de nuū yā jíin jnúhun ni cajnúhún de, te ni cahān de:

¿Te ndé ñáyyu cácuu jnáhan ná? áchí de.

<sup>30</sup> Te ni cahān Jesús:

Īn tée ni quenda de ñuu Jerusalén, ni cuun de cuahān de ñuu Jericó. Te ichi un ní canecoo ñacuĭhna núu de, te ni caquende ndihī ndajníñu de, te nde sahna ñúhun de. Te ni cacani ndevāha ún de jeē jé yajni cuu de núu. Te ni castóo ún de, te cuangoo.

<sup>31</sup> Te ni cuu jeē íchi un yáha ĩn sutū quihīn de, te ni jito de nuū tée ún, te ni síyo-ni de cuahān de.

<sup>32</sup> Te suni súcuan ĩn tée grupo levita jeē cájejníñu ini templo, vēji de ichi ún, te ni jito de nuū tée ún, te ni yāha jíca-ni de cuahān de.

<sup>33</sup> Te ĩn tée nación Samaria, suni vēji de ichi ún, te nuū ní jito de, te ni cundáhú ni de tée ún.

<sup>34</sup> Te ni quee de nde nuū catú tée ún, te ni chuhun de aceite jíin vino nuū ni túji tée ún, te ni jihni de sahna nuū. Te ni soó de tée un síquĭ quiti de, te cuahān de jíin tée un ndé ĩn mesón, te ni condito de.

<sup>35</sup> Te inga quivĭ ún, hora jeē quihīn de, te ni tava de uū xūhun cáa, ni jēhe de nuū tée chíí mesón. Te ni cahān de: Coto ní tée yáha, te núu caxĭn gā ni xūhun ní jíin de, te nuū nándicó ná te nachunaa ná núu ní, áchí de.

<sup>36</sup> Núu súcuan ¿te ndese jéni ni rō? Jeē ndinúni tée ún, ¿ndé ĩn de ni chihí cuenta jeē jnáhan de cúu tée ni canecoo ñacuĭhna núu? Achí yá jíin tée stéén tut ley.

<sup>37</sup> Te ni cahān de:

Tēe jeē ní cundáhú ni tée ni tujĭ, vēsú tée ñuu jíca cúu de.

Yūcuán na te ni cahān Jesús jíin de:

Cuáhán núu súcuan, te suni súcuan cundáhú ni rō tāca ñáyyu, achí yá.

### *Jeē ni íne ya vehe Marta jíin María*

<sup>38</sup> Yūcuán na te ni quihīn tucu ya ichi cuahān yā, te ni jinū yā ĩn ñuu lulí. Te ĩn ñahan nání Marta, ni cana ña ya ni jehēn yā vehe ña.

<sup>39</sup> Te Marta, íyó ĩn cuhū ña nání María. Te María ni cucōo ña nuū jehé Jesús, jíni nahín ña jnúhun cáhán yā.

<sup>40</sup> Te Marta chí cúnée máá ña jíin cuéhē jniñu sáha ña. Te ni quee ña nuū yā, te ni cahān ña:

¿A tu sáha ní cuenta jeē cuhū na ní stóo máñúhún ña sãña núu jniñu? Te cahān ní jíin ña na chindéé ñáhán ña sãñá, áchí ña.

<sup>41</sup> Te ni cahān Jesús jíin ña:

Marta, yōhyo ndihví ni rō jíin cuéhē jniñu, te yōhyo stóho ró máá ró jíin.

<sup>42</sup> Te íyó ĩn-ni jniñu cánuú. Te María chí ni nacāji ña jniñu cánuú, suu jeē ndihví ni ña síquĭ jnúhun Yā Dios, te ma quénehen yó ña nuū ún. Achí yá.

### *Jeē ni stéén yā ndese cacān tahú yō*

(Mt. 6.9-15; 7.7-11)

## 11

<sup>1</sup> Te ĩn quivĭ íne Jesús ĩn lugar jíicán tahú yā. Te nuū ní ndihī ni jíicán tahú yā, te ĩn tée scuáha jíin yá, ni cahān de:

Stéén ni núu ná ndese cacān tahu na jijnáhan ná, nájñuhun ni steén Juan nuū téé ni cascuáha jín de, áchí de.

<sup>2</sup> Te ni cahān yā jín de:

Jeē cacān tahu rō, te suhva cahān rō:

Tátá maá ná jijnáhan ná jée ndeé ní andiví,

níní na cóo yíñuhún ná nuū ní, chi Yaā íi cúu ní.

Te ñuhun ni na jée yachí quiji quiví ndacu ní jniñu ní ñáyiví yáha.

Te na cóo táca jniñu nújnahan ni ní,

nájñuhun iyó ini andiví, súcuan na cóo ini ñayiví.

<sup>3</sup> Staā jeē cátecu na táca quíví, cuāha ní núu ná vijna.

<sup>4</sup> Te cone cáhnu ni ní núu táca cuéchi cásáha ná núu ní,

nájñuhun cáhine cáhnu ni na núu ñáyuu casáha cuéchi nuū ná.

Te ma cuáha ní jñuhun jeē coto ndee jexeén sãña,

chi sa suhva jnama ní sãña nuū táca jée neé.

Achí rō jijnáhan rō. Achí yá.

<sup>5</sup> Te ni cahān gā yā:

Núu ndé ñn róhó iyó ñn amigo rō, te núu quihín rō vehe de sava ñuu te cahān rō jín de: Amigo, cuāha núu uní staā nuū rí.

<sup>6</sup> Chi ñn amigo rí jeē jica de viaje, ni quee de vehe ri, te tú na vé névaha ri jeē cuáha ri caji de. Achí rō.

<sup>7</sup> Te núu cahān tēe íne ini vehe: Ma stáhān rō ruhū, chi ndíhyú yehyí rí, te je cáquixí sēhe rí jín rí, te ma cúu ndonda ri jeē cuáha ri nuū rō, achí de.

<sup>8</sup> Te cáhán rí jín ró, vésú ma ndóna de cuāha de nuū rō siquí jeē cúu de amigo rō, te jeē yóhoyo stáhān rō de, jeē yúcuan ndonda de cuāha de ndihí jeē jini ñuhún rō.

<sup>9</sup> Núu súcuan te cáhán rí jín ró jijnáhan rō jeē suni súcuan cacān tahu rō nuū Yaā Dios, te cuāha ya nuū rō. Te nducú ró táca jée váha iyó núu yā, te nihín ró sáha ya. Te cacān tahu rō nde nihín rō, nájñuhun sáha ñayuu cahán yehyí ndé nune quíví í.

<sup>10</sup> Chi táca ñáyuu jicán, cuāha ya nuū í. Te ñayuu nducú, suni nihín í. Te ñayuu cahán, nune ya ichi nihín í jeē cuní í.

<sup>11</sup> ¿Te ndé ñn ró cúu tátá, te núu sēhe ró jicán í staā nuū rō, te á cuáha ró ñn yuu nuū í? Te núu jicán í chácá, ¿te á cuáha ró ñn coo nuū í?

<sup>12</sup> Chí núu jicán í ñn ndiví, ¿te á cuáha ró ñn tisuhma nuū í? Tú cuiti súcuan.

<sup>13</sup> Núu súcuan te máá ró jijnáhan ró, vésú ñáyuu iyó cuéchi cácuu ró, te cájini rō cuáha ró jée váha nuū sēhe ró. Te nagā ni cuu máá Tátá rō andiví jée ma cuáha ya Espíritu Santo nuū ñáyuu jicán nuū yā. Achí yá.

*Jeē ní cacahān de jeē jejniñu ya fuerza Satanás*  
(Mt. 12.22-30; Mr. 3.19-27)

<sup>14</sup> Te quénehen ya ñn tachí ini ñn tēe, jeē ní cuñhín de ní sáha. Te nuū ní quenda tachí, te ni nacahān tēe ní cuñhín un. Te ni canaa ni ñayuu cájito í.

<sup>15</sup> Te sava ñayuu ún chi ní cacahān í:

Jín fuerza Satanás jeē cujéhnu nuū tachí, quénehen tēe yáha táca táchí ini ñayuu, achí í.

<sup>16</sup> Te sava ga í cuní í coto ndee í ya, te ni cajicán í jeē sáha ya jeē coo ñn seña ichi ándiví.

<sup>17</sup> Te máá yá jini yā jeē súcuan cájeni ni í, te ni cahān yā:

Tācá nación jeē sas̄in máá te cuajnáhan máá, núu súcuan te snáa jeē iyó váha máá. Te núu ñayuu ñin vehe sás̄in máá te cuajnáhan máá, núu súcuan te ma cúu ga coyūcu cáhnu.

<sup>18</sup> Te suni súcuan Satanás, núu sás̄in máá jíin jnáhan tachī, ¿te ndese cuiñi ñihin jeē ndácu jniñu núu súcuan? Chi cácahan rō jeē jíin fuerza Satanás quēnehen ri tachī ini ñayuu.

<sup>19</sup> Te núu súcuan cúu núu, te ñayuu cascuáha jíin máá ró jijnáhan ró, ¿na jíin fuerza cáquenehen máá i tachī, cájeni ni rō? Núu súcuan te máá i jijnáhan i cachi jeē ní castívi ndasí ró ni cacahān rō jeē cáquenehen ri tachī jíin fuerza Satanás.

<sup>20</sup> Te tuú chi sa suhva jíin fuerza Yaā Dios cúu jeē quēnehen ri tachī. Núu súcuan te je ndéé Yaā Dios mēhñu ró jéē ndácu ya jniñu.

<sup>21</sup> Te núu ñin tēe ndacuī, ndíto de vehe de jíin nújí de, núu súcuan te tú ni ñin ndajniñu de ndoñuhún.

<sup>22</sup> Te núu quiji inga tēe ndacuī gā, te cundeyí jíin tēe ún, núu súcuan te quende nují de jeē ndíto de vehe de, te sáha de ndese cúní maá de jíin ndajniñu jeē quēnde de. Te nájnūhun tēe ndacuī gā ún, súcuan cúu máá rí nuū Satanás.

<sup>23</sup> Te ñayuu tu iyó mání jíin rí, núu súcuan te jito uhū i ruhū. Te ñayuu tu nástútú jíin rí, núu súcuan te sa jéte núu i ñayuu vējicoo nuū rí.

*Tachī jeē nastútú jnáhan ndávi ini ñayuu*

*(Mt. 12.43-45)*

<sup>24</sup> Núu ni quenda ñin tachī ini ñin tēe tu cándíje, te jíca cuu nuū ñūhun téhé, ndúcú núu ndétátú, te tu níhin, yūcuán na te jéni ni maá: Na quínuhun rí vehe nuū ní quenda rí.

<sup>25</sup> Te núu ni ndee tucu, te jito jeē tēe tu cándíje un cúu de nájnūhun ñin vehe jeē ní ndundoo.

<sup>26</sup> Yūcuán na te jéquihin uxā gā tachī xeén gā vēsú maá. Te quívicoo ini tēe un jéē cóyūcu yūcuán. Núu súcuan te xeén gā ndoho tēe un jéē sándihí vēsú jee xihna ñūhún. Achí yá.

*Yōhyo ndetū ñayuu cájini nahín jnúhun ya*

<sup>27</sup> Te níni cáhán yā jnúhun yáha, te ñin ñahan íne mēhñu ñáyuu cuehē un, ní cahān jee ña jíin yá:

Yōhyo ndetū ñahan ní scácu níhin te ní scáxin ña níhin, áchí ña.

<sup>28</sup> Te ní cahān yā:

Sa suhva yōhyo ga ndetū ñayuu cájini nahín jnúhun Yaā Dios te cásquicu i, áchí yá.

*Jeē ní cajicān ñayuu tu cácañdije ñin jniñu jéhnu*

*(Mt. 12.38-42; Mr. 8.12)*

<sup>29</sup> Te ní cataca cuehē gā ñayuu nuū Jesús, te ni quejéé yá cahán yā:

Ñayuu iyó vijna máni casáha néé i. Te cájicān i ñin jniñu jéhnu jeē steén núu Yaā ní tají Yaā Dios cúu rí. Te tú na inga jniñu jéhnu steén rí nuū i, chi máa-ni jniñu jéhnu nájnūhun ní cuu jíin Jonás, tēe ní nacani jnúhun Yaā Dios nde jenahán.

<sup>30</sup> Chi nájnūhun ní cajini ñayuu ñuu Nínive jeē ní cuu ñin jniñu jéhnu jíin Jonás, suni súcuan cuni ñayuu tiempo yáha jeē coo ñin jniñu jéhnu jíin rúhū, Yaā ní nduu tēe, jeē quijnáhan jíin modo ní ndoho Jonás.

<sup>31</sup> Te reina jeē ní cujéhnu nación ichi sur, natecu ña jíin ñáyuu tiempo yáha, quiví juicio jeē sándaā yā cuēchi, te cahān ña cuēchi siquí i. Chi nde jíca téyí

ni quiji ña ni jini nahín ña jnūhun ndíchí ní cahān rey Salomón. Te vijna chi cújéhu ga ruhū, Yaā íne yāhá vésú Salomón, te tu cá candíje ró rúhū.

<sup>32</sup> Te táca ñáyuu ñuu Nínive nuū ní nacani Jonás jnūhun, natecu i jíin ñáyuu tiempo yáha, quiví juicio jeē sándaā yā cuēchi, te cahān i cuēchi siquī ñáyuu yáha. Chi máá i ni canacani ni i ni castóo i cuēchi i quiví ní nacani Jonás jnūhun nuū i. Te vijna chi cújéhu ga ruhū, Yaā íne yāhá vésú Jonás, te tu cá candíje ró rúhū.

*Jnūhun yátá siquī lámpara*  
(Mt. 5.15; 6.22-23)

<sup>33</sup> 'Núu nástáin ñayuu ñin lámpara, tu chísāhí i, ni tu chúne i chíji ñin cajón. Chi sa suhva jéni i nuū sucún, návāha cundijin nuū ñáyuu quívicoo vehe.

<sup>34</sup> Te tinūu ró cúu nájñūhun lámpara nuū yiqui cúñu rō. Núu súcuan te núu tinūu ró íyó ndijin, te ní-ni yiqui cúñu rō cúndijin. Te núu tinūu ró tu íyó ndijin, te ní-ni yiqui cúñu rō íyó nee.

<sup>35</sup> Te suni súcuan cúu ánuá rō, te coto ró jéē ma cáni néé ni rō, návāha tú coo nee ini anuá rō.

<sup>36</sup> Chi núu máni jniñu váha cásáha ró, te tú na jniñu néé cásáha ró, núu súcuan te luz yā cúndijin váha ini anuá rō, nájñūhun ñin lámpara jeē sáha jeē cúndijin váha. Achí yá.

*Jeē ni cáhān yā jeē íyó cuēchi de jíjnāhan de*  
(Mt. 23.1-36; Mr. 12.38-40; Lc. 20.45-47)

<sup>37</sup> Te nuū ní cuu ni cahān yā, te ñin tēe grupo fariseo ni cana de ya jeē caji yā staā vehe de. Te ni quiví ya, te ni cucōo ya mesa jeē cáji yā staā.

<sup>38</sup> Te tēe fariseo un nāā ni de jito de jeē tu squícu ya costumbre jeē nandahá yá te caji yā staā.

<sup>39</sup> Te ni cahān máá Jítoho yō jíin de:

Róhó tēe fariseo jíjnāhan ró, chi nájñūhun jeē cánacate ró yátā vaso jíin yátā cohó cúu jeē nandahá ró. Te ichi íni rō chi ñūhun máni máá jnūhun cuíhná jíin jnūhun néé.

<sup>40</sup> Tēe cánéé cácuu ró. ¿A tu cájini rō jeē Yaā ni sáha yiqui cúñu rō, suni ni sáha ya anuá rō?

<sup>41</sup> Te jeē cájēhe ró caridad nuū ñáyuu ndahú, na sáha ró siquī jeē cundahú ndije ni rō i. Te súcuan te coo ndaā anuá rō.

<sup>42</sup> 'Nacā xeēn ndoho róhó tēe fariseo, chi cásquícu ró táca jniñu lúli, te tu cásquícu ró jniñu cánuú. Chi cásáha ró úxí úxí nuhní tamínu jíin ruda jíin táca yucū, te cásocō rō ñin ñin siquī táca úxí un núu Yaā Dios. Te tu cásáha cuítí rō jniñu ndaā, ni tu cáhíyo maní rō jíin Yaā Dios. Táca jéē yáha cánuú sáha ró núu, te suni ma stóo ró jéē socó rō táca yucū ún.

<sup>43</sup> 'Nacā xeēn ndoho róhó tēe fariseo, chi máni cánujnahan ni rō cucōo ró núu silla yíñúhún gá ini vehe íi sinagoga. Te cánujnahan ni rō jeē cahán yíñúhún ñáyuu jíin ró nuū calle.

<sup>44</sup> 'Te nacā xeēn ndoho róhó tēe cástéén tutu ley Yaā Dios, jíin róhó tēe fariseo, chi tēe stáhú-ni cácuu ró. Chi cándāa ró nájñūhun yaū ndíyi jeē tú ndijin, chi cásnāā rō anuá ñayuu, te tu jíin i jeē súcuan cásáha ró jíin i. Achí yá jíin de.

<sup>45</sup> Yūcuán na te ni cahān ñin tēe stéén tutu ley:

Maestro, jeē ni cáhān ni táca jnūhun yáha, suni nde siquī máá ná jíjnāhan ná ní cahān ní, áchí de jíin yá.

46 Te ni cahān yā:

Suni nacā xeēn ndoho rōhó tée cástéén tutu ley. Chi suni cástéén rō tāca ley ni catava maá ró jeē yí sáha, te tu cácondeyí ñayuu squícu i. Te maá ró, chi ni ñin xinī ndáha ró tu cáscánda ró jéē squícu ró.

47 Nacā xeēn ndoho ró jijnáhan ró. Chi casáha ró vehe siquī nuū yándūji ndiyi jíí rō, tēe ni canacani jnūhun Yaā Dios nde jengahán. Te suni tāca jíí rō ni cajehni de tēe ún.

48 Te jeē casáha ró súcuan cúu jeē cáquijnáhan ró jíín de siquī jniñu ní casáha de. Chi maá de ni cajehni tēe ún, te maá ró casáha ró vehe ndiyi ún.

49 Jeē yúcuan nde jengahán ní cahān Yaā Dios ñin jnūhun ndíchi: Tají rí tāca tēe nacani jnūhun ri jíín tāca tēe apóstol quingoo de nuū i. Te sava de cahni i, te sava ga de coto xeēn i, áhí Yaā Dios.

50 Te súcuan te siquī ñayuu tiempo yáha na cóndee cuéchi jeē ní cajehni jíí i tēe ni canacani jnūhun Yaā Dios, nde quiví ní jécōo ñayiví te nde vijna,

51 nde Abel xihna gā te nde Zacarías, tēe ni cajehni de ini templo sava mēhñu cuarto ñi jíín altar. Núu súcuan te cáhán rī jíín ró jeē siquī ñayuu tiempo yáha condee tāca cuéchi ún.

52 Nacā xeēn ndoho rōhó jéē cástéén tutu ley, chi cájesi rō ichi jeē jécūhun ni ñayuu jnūhun ya. Chi ní maá ró tu cácuni rō jecūhun ni rō, ni tu cájēhe ró jnūhun jeē jecūhun ni ñayuu cácuni. Achí yá.

53 Te jeē ní cáhān yā jnūhun yáha, te tēe cástéén tutu ley Yaā Dios jíín tēe fariseo, yōhoyo ni caquití ni de nuū yā. Te ni caquejéé de cástíchi de ya siquī cuehē gā jnūhun.

54 Chi yuhu-ni cánducú de núu sanaa te stívi yá jnūhun cahān yā, návaha nihni de cuéchi siquī yā.

*Siquī jnūhun stáhú cácahān tēe fariseo*

## 12

1 Te níni súcuan cúu, te ni cacutútú cuéhē mil ñayuu, chi nde cájeñū i siquī jehé jnáhan i. Te xihna gā ni quejéé yá cáhán yā jíín tēe cáscuáha jíín yá:

Coto má candíje ró levadura tēe grupo fariseo, chi suu cúu jnūhun stáhú cácahān de. Chi jíte núu nuū ñayuu, nájñūhun ndécava levadura nuū ñújen pan.

2 Chi jnūhun stáhú un má quéndōo sáhi cuiti, chi ndihí natūu ndijin, te cuni ñayuu.

3 Núu súcuan te suni maá ró, tāca jnūhun ni cacahān rō jeē tu ní jíni ñayuu, ñin quiví te cuni váha i. Te tāca jnūhun ni cacahān sáhi ró jeē ndihyú yehyí, ñin quiví te cahān jee ñayuu yatā tācá vehe.

*Jeē ní cachi yā ndé ñin cúu jeē yūhu yó*

*(Mt. 10.28-31)*

4 Cáhán rī jíín ró jijnáhan ró, amigo: Ma yūhu ró coto ró ñayuu cahni yiquí cúñu rō, chi núu ni cajehni i rōhó, te tuá na vé cúu sáha ga i.

5 Te na cáchi rī nuū rō ndé ñin yūhu ró coto ró: Jeē yūhu ró coto ró cúu Yaā Dios jeē núu sáha ya jeē cúu rō, te íyó poder yā chune ya rohó infierno. Suu maá yá cúu jeē yūhu ró jeē ma stívi ró nuū yā.

6 Te tācá saa chi tú yahu ndéé tī, chi nde uhūn tī jeē uú centavo lulí. Te ni ñin tī tu náā ní Yaā Dios jeē tu ndító ya.

7 Te nagā ni cuu rōhó jijnáhan ró, chi nde ndihí ixi xíní rō je ni cahu ya. Núu súcuan te ma yūhu ró jijnáhan ró, chi cánuu ndasí gá rō nuū yā vésú cuehē tācá saa.



*Ñayuu jejnúhún Jesucristo nuū inga ñayuu  
(Mt. 10.32-33; 12.32; 10.19-20)*

<sup>8</sup> Te cáhán rī jín ró, táca ñayuu jeē cuajnúhún rúhū nuū inga ñayuu, suni súcuan ruhū, Yaā ní nduu tēe, cuajnúhún rī i nuū táca ndajéhé Yaā Dios.

<sup>9</sup> Te táca ñayuu jeē ma cuajnúhún rúhū nuū inga ñayuu, suni súcuan ma cuajnúhún rī i nuū táca ndajéhé Yaā Dios.

<sup>10</sup> Te núu ndé ñayuu cahān i siquī ruhū, Yaā ní nduu tēe, cone cáhnu ni Yaā Dios nuū i. Te núu ndé ñayuu cahān ndevāha i siquī Espíritu Santo, ma cóne cáhnu ni Yaā Dios nuū i.

<sup>11</sup> Te núu cuandeca i róhó táca vehe i sinagoga nuū tée cásandaā cuēchi, jín nuū tée cácuu tohō, te ma nácani ndasí ni rō ndese stió cuiñí rō jñuhun nuū de.

<sup>12</sup> Chi máá hora un te Espíritu Santo steén yā nuū rō ndese cahān rō. Achí yá.

*Siquī jeē ma ténuū yō ndajniñu cúca*

<sup>13</sup> Yūcuán na te ñn tēe íne nuū ñayuu cuehē un ní cahān de jín Jesús: Maestro, cahān ni jín ñani na jēe na táhú sáva de tahū na jín de, áchí de.

<sup>14</sup> Te ni cahān yā jín de:

¿Ndé ñn ni jeni ruhū jeē ndacu ri jniñu tahū sáva tahū rō? Achí yá.

<sup>15</sup> Te ni cahān gā yā:

Condito ró máá ró jijnáhan ró jēe ma ndiyo ni rō xūhun jín táca gá. Chi vēsú cuehē ndasí ndajniñu névāha ñn tēe, te nasūu jēe yūcuán sáha jeē quéndōo ndetū de, áchí yá.

<sup>16</sup> Yūcuán na te ni cahān yā ñn jñuhun yátá jín i:

Ni iyo ñn tēe cúca jeē névāha ñuhun jeē cúu vāha ndasí itu.

<sup>17</sup> Te tēe cúca un ní nacani ni de: ¿Ndese sáha ri? Chi tuá ndé cuhun niñi ri. Achí de.

<sup>18</sup> Te ni jeni ni de: Suhva na sáha ri. Na cánu rī táca yácā rī, te nasáha ri jeē náhnu ga. Te yūcuán chuvāha ndihi ri niñi ri jín táca ndajniñu ri.

<sup>19</sup> Yūcuán na te cahān rī jín ánuá rī: Vjna te cuehē teyí névāha yó jēe canda cuehē cuiyā. Na ndétātu yó te caji yō coho yó, te na cúsñ ni yō, ni jeni ni de.

<sup>20</sup> Te ni cahān Yaā Dios jín de: Tēe cánéé cúu ró. Chi jecuáá vjna cuu rō, te táca jēe ní chuvāha ró, ¿ndé tée cuu? Achí Yaā Dios jín de.

<sup>21</sup> Te súcuan ndoho táca tée jeē sacúca de máá de, te tu ndúcú de jeē quéndōo ndetū de sáha Yaā Dios. Achí yá.

*Yaā Dios ndíto ya yohó  
(Mt. 6.25-34)*

<sup>22</sup> Te ni cahān yā jín tée cáscuáha jín yá:

Núu súcuan te cáhán rī jín ró: Ma nácani ndasí ni rō siquī jeē cótecu rō, núu ndese caji rō, ni siquī sahna, núu ndese cuhun ró.

<sup>23</sup> Chi Yaā Dios ní sáha ya jeē técu rō jín yiqui cúñu rō, te nagā ni cuu jeē ma cuáha ya jeē caji rō jín jēe cúhun ró.

<sup>24</sup> Condēhe ró ndese cátecu quití cácuu nájñuhun cálu, chi tu cátaji ti, ni tu cánastútú tí jeē chūvāha tí, ni tú yacā tí. Te vēsú súcuan te máá Yaā Dios scáji yā tí. Te cánuú ndasí gá rō jijnáhan ró vēsú táca quití ún.

<sup>25</sup> ¿Te ndé ñn ró, á cuu scuēhnu ró máá ró sava metro gā, vēsú na nácani ndasí ni rō?

<sup>26</sup> Te núu ma cúu sáha ró vēsú ñn jniñu lúlí súcuan, ¿te najehē cánacani ndasí ni rō siquī jeē caji rō jín jēe cuhun ró?

<sup>27</sup> 'Condēhe jijnáhan ró ndese jée ita tāca yúcu. Chi tu sájniñu, ni tu táu. Te cáhán rī jijn ró jeē ni rey Salomón, quivī ní ñũhun de sahma váha ndasí, tu ní ñũhun de sahma lúu súcuan nájnũhun ita ún.

<sup>28</sup> Te núu súcuan jéhe Yaā Dios sahma lúu ita un jéē jée vjna te sajnē cayū nuū ñuhún, te nagā ni cuu rōhó jijnáhan ró jéē ma sāha ya jeē nihín rō sahma. ¿Te naun tu cácandije nihin ró jéē ndító ya rohó?

<sup>29</sup> Núu súcuan te ma nácani cuihyá ní rō ndese caji rō ndese coho ró.

<sup>30</sup> Chi tāca ñáyuu ñayivī jéē tu cácandije cúu jeē máni siquī jeē yáha cándihvī ni i. Te máá ró jijnáhan ró, chi íyó Tátá rō andivī, te jíní yā jeē cájini ñũhún ró tāca jéē yáha.

<sup>31</sup> Te sa suhva cánuú gá jeē cóndihvī ni rō siquī jniñu jeē ndácu Yaā Dios nuū rō. Yūcuán na te sāha ya jeē nihín rō tāca jéē yáha.

### *Ndese coo cúcá yó nde andivī*

*(Mt. 6.19-21)*

<sup>32</sup> Ma yũhu ró jijnáhan ró chi cácuu ró nájnũhun lanchi rī. Chi vésú jecu-ni cácuu ró, te máá Tátá rō cúsi ni yā jeē quivīcoo ró ñuu nuū ndácu ya jniñu.

<sup>33</sup> Xico ró jeē cánevāha ró, te cuāha ró xũhun un núu ñáyuu ndahú. Te súcuan caya rō tahū rō nde andivī núu ma cútúhú, nájnũhun jeē chuvéha ró xũhun ini yjini. Chi nde andivī te ma náá jeē váha coneváha ró. Chi yūcuan má quivī ñacuñhá, ni ma cúu stívī tiquixin.

<sup>34</sup> Chi nde nuū nihín rō tahū váha ró, yūcuan cúu nuū cóndihvī ni rō siquī.

### *Jeē na cóo tũhva yó jéē ndéē yā*

<sup>35</sup> 'Coo tũhva ró jijnáhan ró jéē ndéē Jitoho rō, te coo ró nájnũhun mozo jeē nastin i lámpara i.

<sup>36</sup> Chi íyó tũhva i te cándetu i jeē ndéē patrón i jeē cuahán de vico nándaha. Chi núu ni ndee de te cahán de, te nune-ni i yéhyí jijnáhan i.

<sup>37</sup> Te yōhyo ndetū mozo un núu ni ndee patrón i, te cuni de jeē cándito i. Jendaá cahán rī jijn ró jeē máá patrón sátũhva de máá de, te scúcoo de i mesa te cani de cohō i.

<sup>38</sup> Te vésú cucuéé de ndee de nde sava ñuú, chí jéē néé gā, te núu cuni de jeē súcuan cándito mozo de, te yōhyo ndetū i jijnáhan i núu súcuan.

<sup>39</sup> Te na jécũhun ni rō jeē cahán jnũhun yátá yáha: Tēe chíí vehe, núu ni jini de na hora quiji ñacuñhá, te condito de, te ma cuáha de jnũhun jeē sacuíñhá vehe de núú.

<sup>40</sup> Te suni súcuan coo tũhva ró jijnáhan ró, chi núu tuú, te máá hora jeē tú na vé cájeni ni rō, te ndee ruhū, Yaā ní nduu tēe. Achí yá jijn de.

### *Jnũhun mozo vāha jijn mozo tu squícu*

*(Mt. 24.45-51)*

<sup>41</sup> Yūcuán na te Pedro ni cajnũhún de ya:

¿A jijn máá-ni ná jijnáhan ná cáhán ni jnũhun yátá yáha, chí suni cáhán ni jijn ndihī ga ñayuu? achí de.

<sup>42</sup> Te ni cahán máá Jitoho yō:

Cáhán rī jijn ndé-ni ñayuu cúu nájnũhun mozo jeē ndito xinī te squícu vāha. Te máá patrón sāha de jeē condiso jniñu i coto i ñayuu vehe de, návāha scáji i máá hora.

<sup>43</sup> Te yōhyo ndetū mozo un jéē núu ni ndee patrón, te cuni de jeē súcuan squícu vāha i.

<sup>44</sup> Jendaá cahán rī jijn ró jeē cani de mozo un jéē cóto i ndihī ndajniñu de.

45 Te núu jéni ni i jeē ma ndíji yachī patrón i, te quejéé i cani i tēe jíin ñahan cácuu jñahan mozo i, te caji i coho i te najíni i,

46 núu súcuan te ndee-ni patrón quiví jeē tu ndétu i jíin hora jeē tú na vé jéni ni i. Te stóho xeēn de i, te squíví de i ndoho i jíin ñayuu tu cásquícu.

47 Te mozo jeē jini i ndese nújnahan ni patrón i, te núu tu sátūhva i ni tu squícu i jeē cuní de, ndoho xeēn i jíin yujnu xíi.

48 Te mozo jeē tu jini i ndese nújnahan ni patrón i, te núu sáha i jniñu jeē cani de i, núu súcuan te cūhva-ni cani de i. Chi ñayuu jeē steén cuehē yā nuū i, suni cuehē nandacān yā nuū i. Te ñayuu jeē cuehē gā jniñu téjniñu ya i, suni cuehē gā nandacān yā nuū i.

### *Jeē siquí Jesús te cusín ini ñayuu*

*(Mt. 10.34-36)*

49 Ni quee rī jeē nájñuhun jeē scuiquín rī ñuhūn ini ñayiví, te suu cúu jeē cusín ini ñayuu jeē siquí ruhū. Te cuní rī jeē yachī coo súcuan, návaha quivícoo ñayuu ndaha Yāā Dios.

50 Te íyó ñn jñūdóho cánuú ndoho ri, te cúcuíhyá ndasí ni rī chi nde jīnu ndoho rī, te ndusí ni rī.

51 ¿A cájeni ni rō jeē véji ri jeē cóyūcu mání ñayuu ñayiví? Cáhán rī jíin ró jeē tuú, chi sa suhva jeē cusín ini ñayuu jeē siquí ruhū.

52 Chi nde vijna te quejéé jéé uhūn ñayuu ñn vehe, sásín máá jíjnahan, uní siquí uú, te uú siquí uní.

53 Chi tátá cusín ini jíin séhe yí, te séhe yí jíin tátá, te náná jíin séhe síhí, te séhe síhí jíin náná, te náná chíso jíin séhe jēnú, te séhe jēnu jíin náná chíso. Achí yá.

### *Jeē ni cáhān yā siquí seña andiví*

*(Mt. 16.1-4; Mr. 8.11-13)*

54 Te suni ni cahān yā jíin ñayuu cuehē ún:

Núu cájito ró jeē náne vicó ichi núu cáne niāndii, te cácahān rō jeē cuun saū, te súcuan cúu.

55 Te núu quee tachí vēji ichi sur te cácahān rō jeē nandii, te súcuan cúu.

56 Tēe stáhú-ni cácuu ró. Chi cájecūhun ni rō ndese steén seña andiví jíin ini ñayiví, ¿te naun tu cájecūhun ni rō ndé ñn cúu ruhū jeē sáha ri táca jniñu jénu tiempo yáha?

### *Jeē cóndihvī ni yō jeē ma cóndee cuēchi siquí yō*

*(Mt. 5.25-26)*

57 ¿Te najehē tu cánacani ni maá ró ndé ñn cúu jniñu ndaā sáha ró?

58 Te núu ñn ñayuu quihīn i jíin ró nuū tohó jeē cacán i cuēchi siquí rō, núu súcuan te níni cuáhān rō jíin i ichi te condihvī ni rō sándaā rō jíin i. Chi núu tuú, te squíví i róhó núu juez, te juez síaha de róhó núu policía, te policía chune de róhó vecāa.

59 Te jendaá cahán rī jíin ró jeē ma quénda cuiti rō yūcuán chi nde chunaa rō ndihí cuiti xūhun cájicān de. Te suni súcuan condihvī ni rō cahān ndahú ró jíin Yāā Dios, návaha ma ndácunehen ya cuēchi siquí rō. Achí yá jíin de.

### *Jeē cánuú nacani ni yō jeē stóo yó cuēchi yó*

## 13

<sup>1</sup> Te ñn quivĩ yúcuan ní quecoo jecu tēe, ni canacani de jñūhun nuū yā ndese ni candoho jecu tēe Galilea. Chi ná cájehni de quitĩ jeē socó de, te ni quecoo mozo Pilato ni cajehni tēe ún.

<sup>2</sup> Te ni cahān Jesús:

Tēe Galilea un, ¿á cájeni ni rō jeē súcuan ni candoho de siquĩ jeē xeēn gā ni ñyo cuēchi de vēsú tāca gá ñayuu Galilea?

<sup>3</sup> Cáhán rī jīn rō jeē tuú. Te rōhó jijnáhan rō suni jnahnū ndetū rō núu tú nacani ni rō jeē stóo rō cuēchi rō.

<sup>4</sup> Te xahūn unī tēe jeē ní cotúú torre Siloé siquĩ de, te ni cajihī de, ¿á cájeni ni rō jeē ní casáha de cuēchi xeēn gā vēsú tāca gá ñayuu ñuu Jerusalén?

<sup>5</sup> Cáhán rī jīn rō jeē tuú. Te máá rō jijnáhan rō, suni jnahnū ndetū rō núu tú nacani ni rō jeē stóo rō cuēchi rō.

### *Jñūhun yátá núndēhe higo*

<sup>6</sup> Yūcuán na te ni cahān yā jñūhun yátá yáha jēe steén yā ndese cácuu ñayuu tu squícu jñūhun Yāā Dios:

Cácuu i nájñūhun ñn nundēhe higo jeē ñn nuū ññūhun ñn tēe. Te ni jecondēhe de núu ñn ndehē xinī, te tú na vé ñn.

<sup>7</sup> Te ni cahān de jīn mozo sájñiñu nuū ññūhun de: Vijna te je iyó unī cuiyā jeē quíji ri nducú rí ndehē xinī yújnu higo yáha, te tú na vé cúun xinī. Núu súcuan te cahnde rō, chi máá jēe sájñeñu nuū ññūhun, áchí de.

<sup>8</sup> Te ni cahān mozo un jīn de: Stóo ní na cuíñi ñn na cuiyā, te na nástáyā ná jéhē te chuhun ná jéhen.

<sup>9</sup> Te na cóndēhe yó núu tú cuun ndehē inga cuiyā. Te núu tuú, te tahndē, achí mozo. Achí yá.

### *Jeē ní nasávāha ya ñn ñahan quivĩ ndétátú*

<sup>10</sup> Te ñn quivĩ ndétátú te stéén Jesús jñūhun ini vehe ñi sinagoga.

<sup>11</sup> Te iyó ñn ñahan jeē ní cuu xahūn unī cuiyā huhú ña. Chi ñn tachī ni sáha jeē jíca tñhí ña, te tuá cúu cuiñi caca jnuu ña.

<sup>12</sup> Te ni jito Jesús nuū ña, te ni cana ya ña, te ni cahān yā jīn ña:

Vijna te nduvāha ní jēe huhú ñi.

<sup>13</sup> Te ni soó yá ndaha ya siquĩ ña, te ni nucuiñi jnuu-ni ña, te ni nacuatáhu ña nuū Yāā Dios.

<sup>14</sup> Te tēe cújéñu ini vehe ñi sinagoga, ni quitĩ ni de nuū Jesús jeē ní nasávāha ya ñahan un quivĩ ndétátú. Te ni cahān de jīn ñayuu:

Ññu quivĩ iyó jēe sájñiñu yó, te tāca quivĩ ún quijicoo rō nduvāha rō. Te quivĩ ndétátú chí ma cúu, áchí de.

<sup>15</sup> Yūcuán na te ni cahān maá Jítoho yō jīn de:

Tēe stáhú-ni cácuu rō. Quivĩ ndétātu ¿á tu cándají rō stiquĩ rō burro rō jēe quíscóho rō tí ndute?

<sup>16</sup> Te ñahan yáha jēe cúu ña ñn sēhe yucūn Abraham, chi nájñūhun ni conuhñi ña xahūn unī cuiyā ni sáha Satanás. ¿Te á tu iyó váha jeē nájñūhun nandají rí ña nuū cuehyĩ ndóho ña quivĩ ndétátú? Achí yá.

<sup>17</sup> Te jeē ni cahān yā súcuan, te tāca tēe cájito uhū de ya, ni cacucanu de. Te ndihi ñayuu ún chi ni cacusñi ni i jíto i tēcá jñiñu jéñu sáha ya.

### *Jñūhun yátá siquĩ ndiquin mostaza (Mt. 13.31-32; Mr. 4.30-32)*

<sup>18</sup> Te ni cahān yā:

Na cáhán rī ñn jñūhun yátá návāha cuni rō ndese ndúcuehē ñayuu ndácu Yaā Dios jniñu nuū.

<sup>19</sup> Ndúcuehē i nájñūhun jéhnū ñn ndiquin mostaza jeē jéquin ñn tēe nuū ñūhun de, te ndúu nájñūhun ñn yujnu. Te cúu cáhnu, te tacá saa chí cásáha tí tacá tí chíji ndaha ún. Achí yá.

*Jñūhun yátá síquē levadura  
(Mt. 13.33)*

<sup>20</sup> Te ni cahān tucu ya:

Súcuan cúu jeē ndúcuehē ñayuu jeē ndácu Yaā Dios jniñu nuū:

<sup>21</sup> Cúu nájñūhun levadura jeē ní quihñ ñn ñahan, te ni saca ña jíin únī kilo harina, te ni ndaa ndihi ñujen ni sáha. Achí yá.

*Síquē jeē quivī yó yéhyí túū  
(Mt. 7.13-14, 21-23)*

<sup>22</sup> Te jica Jesús jeē cuahán yā ichi ñūū Jerusalén, te yáha ya tacá ñuu náhnu jíin ñuu lulí, te steén yā jñūhun.

<sup>23</sup> Te ñn ñayuu ni cajñūhún i ya:

¿A jecu-ni ñayuu jnama Yaā Dios, chí naún? Achí i.

Te ni cahān yā jíin i:

<sup>24</sup> Condiñvī ni rō quivīcoo ró ndaha Yaā Dios. Chí cúu nájñūhun ñn yéhyí túū. Te cáhán rī jíin ró jeē ñn quivī te cuehē ñayuu nducú i quivīcoo i, te ma cúu ga.

<sup>25</sup> Te quivī ún te sáha rī nájñūhun ñn tēe chíí vehe jeē ndocuññ de te nacasi de yéhyí. Te ichi yátá véhe cuiñi ró jíjnáhan ró, te scáján ró yehyí, te cahān rō: Nune ní yéhyí na quivīcoo ná. Te cahān de jíin ró: ¿Ndé nuū véjicoo ró? Chí tu jíin rī rohó, achi de.

<sup>26</sup> Yūcuán na te quejéé ró cahān rō jíin de: Ni cayeji ná ni cajihí ná jíin ní, te ini calle ñuu na ní steén ni jñūhun, achi rō.

<sup>27</sup> Te cahān maá de: Cáhán rī jíin ró jeē tu jíin rī rohó ndé chí véjicoo ró. Cujiyó quingoo ró, chí ñayuu casáha jniñu néé cácuu ró. Achi de.

<sup>28</sup> Te quivīcoo ró núu ndahyú rō, te nacayñí yuhu ró jéé ndoho xeén rō. Te coto ró núu Abraham jíin Isaac jíin Jacob jíin ndihí tēe ni canacani jñūhun Yaā Dios, cáyúcú de ñuu nuū ndácu ya jniñu. Te rōhó, vēsú cácuu ró yúcūn de, te quivīcoo ró núu ndoho ró.

<sup>29</sup> Te cuehē ñayuu, vēsú tu cácuu i yucūn de, te quijicoo i ichi núu cáne niāndii jíin ichi núu queé niāndii, ichi norte jíin ichi sur. Te cucōo i mesa caji i staā ñuu nuū ndácu Yaā Dios jniñu.

<sup>30</sup> Te sava ñayuu jeē vijna cácuu i sandihí, ichi yúcuan nduu i nuū. Te sava ñayuu jeē vijna cácuu i nuū, ichi yúcuan nduu i sandihí. Achí yá.

*Jeē ní cucuíhyá ni yā síquē ñáyuu ñuu Jerusalén  
(Mt. 23.37-39)*

<sup>31</sup> Te máá quivī un ní quecoo jecu tēe fariseo, te ni cacahān de jíin yá: Cujiyó ní quihñ ní inga lado, chí cúní Herodes cahni de níhín, áchí de.

<sup>32</sup> Te ni cahān yā:

Cuángoo te castūhun ró nuū tēe mañoso un jéé ná tu jinū quivī cuu rī, chí vijna jíin sájnē queheneh rī tachí ini ñayuu, te nasávāha rī ñayuu cácuñū. Te isá te jínu jniñu sáha rī, achi rō.

<sup>33</sup> Chí cánuú jéé cáca rī quihñ rī vijna jíin sájnē jíin isá, te jinū rī Jerusalén. Chí tēe cánacani jñūhun Yaā Dios, tu cájihí de inga lado, chí máá-ni ini ñuu Jerusalén cájehni i de. Achí yá.

<sup>34</sup> Róhó ñuu Jerusalén, jéhni rō tēe cánacani jnūhun Yaā Dios, te jéhe ró yúú xiní tēe tájí Yaā Dios vējicoo nuū rō. Te cuehē jínu ni cuni rī nastútú rí sēhe ró, nájñūhun ndují jēe nastútú tí sēhe ti chíji ndijēn tī, te tu ní cúní rō.

<sup>35</sup> Núu súcuan te vijna te stóo uun na ri rohó jíin sēhe ró. Te cáhán rī jíin ró jēe ndé vijna te ma cóto cuiṭi gā rō nuū rī, chí nde quiṭi quiṭi jēe cáhán sēhe ró: Yōhoyo vāha Yaā cúu Yaā véndijí jíin jñiñu máá Jítóho yō Yaā Dios, achi i. Achí yá.

*Jeē ní nasávāha ya ñn tēe cúhú cuehyī cuiñi*

## 14

<sup>1</sup> Te ñn quiṭi ndétātu ní jehēn yā vehe ñn tēe fariseo kujéhnu, ni jecaji yā staā jíin de. Te táca gá tēe fariseo cájito yuhu de ya núu stívi yá.

<sup>2</sup> Te yūcuan ñe ñn tēe cúhú de cuehyī cuiñi, índichi de nuū yá.

<sup>3</sup> Te ni cajñūhun yá tēe cástéén tutu ley Yaā Dios jíin táca tēe fariseo:

¿A íyó ley jeē nasávāha rí ñayuu cácuḥū quiṭi ndétātu, chí tuú? áchí yá.

<sup>4</sup> Te máá de tu ní cácahān cuiṭi de. Te ni jñi ya tēe cúhú un, te ni nasávāha ya de, te ni cahān yá jeē na nūhun de vehe de.

<sup>5</sup> Te ni cahān yá jíin de jíjñáhan de:

¿Nde ñn róhó núu burro ró chí stíqui rō ñingava ti ini pozo, te á tu yachí natava rō tī vēsú quiṭi ndétātu cúu, chí naún? Achí yá.

<sup>6</sup> Te tu ní cúu stío cuiñi de ni ñn jñūhun nuū yá jeē súcuan ni cahān yá.

*Jñūhun síqui ñayuu jéngoo vico*

<sup>7</sup> Te ni jito Jesús jeē tēe ni cataca ún, cánacāji de silla yñiñhún gá nuū mesa cucōo de. Te ni cahān yá jñūhun yáha jíin de:

<sup>8</sup> Núu ñn tēe cana de jeē quihín rō ñn vico nándāha, te ma cucōo ró lugar nuū yñiñhún gá. Chí núu súcuan te sanaa te je ni cana de ñn tēe cújéhnu ga vēsú rohó.

<sup>9</sup> Te quee tēe ni cana róhó, te cahān de jíin ró: Ndonga, te na cucōo tēe yáha jíñā. Yūcuán na te cucanu rō jeē quihín rō cucōo ró ndé sandihí na.

<sup>10</sup> Chí sa suhva núu ni cana ñn tēe róhó, te cucōo ró ndé lugar sandihí na. Te núu quee tēe ni cana róhó, te cahān de jíin ró: Amigo, nehen cucōo ró ñn lugar nuū yñiñhún gá, achi de. Yūcuán na te ñayuu cáyūcu mesa jíin ró coto i jeē sajhénu de róhó.

<sup>11</sup> Súcuan ni cahān rī jñūhun yáha návāha cuni rō jeē táca ñayuu jeē sajhénu i máá i, nuu i sáha Yaā Dios. Te ñayuu jeē snúu i máá i, ndujéhnu i sáha ya. Achí yá.

<sup>12</sup> Te suni ni cahān yá jíin tēe ni cana ya yéji yá staā:

Núu sáha ró ñn vico cúsamá chí jēe cúxini, te ma cána ró ñayuu cácuu amigo rō, jíin ñani rō, jíin jñáhan ró, jíin ñayuu cucá. Chí núu súcuan te suni máá i nacana i róhó, te súcuan nanihín rō jeē ni jéhe ró.

<sup>13</sup> Chí sa suhva núu sáha ró vico, te cana ró ñayuu ndahú, ñayuu cuhndú, ñayuu chacuá, jíin ñayuu cuaá.

<sup>14</sup> Te súcuan te quendōo ndetū rō, chí ma cúu nacuāha i nuū rō. Te nihín rō tahū rō quiṭi nátecu ñayuu ndaá, achi yá.

*Jñūhun yátá síqui vico cúxini*

<sup>15</sup> Te ñn tēe yéji staā jíin yá, ni jini de jñūhun yáha, te ni cahān de jíin yá:

Yōhoyo ndetū ñayuu jeē cáji staā nde ñuu nuū ndácu Yaā Dios jñiñu, áchí de.

16 Yūcuán na te ni cahān Jesús iin jnūhun yátá jéē steén yā jeē cána Yaā Dios ñayuu quívicoo i ñuu nuū ndácu ya jniñu:

Īn tēe ni sáha de iin vico cáhnu cuxíni, te ni tají de mozo ni cana cuehē ñayuu.

17 Te máá quíví cuxíni, te ni tají de mozo de cuacana ñayuu jeē quíjicoo caji staā: Nehen ní jijnáhan ní, chi je íyó túhva ndihi, áchí mozo.

18 Te ndihi i ni cacahān i jeē na cóne cáhnu ni de chi ma quíngoo i. Īn tēe ni cahān de: Sáá ní jeen rí iin ñuhun te cánuú quícondēhe rí, te na cóne cáhnu ni de chi ma jeé rí. Achí de.

19 Te inga de ni cahān: Ni jeen ri uhūn yunta siquī, te quihīn rī coto ndee rī tī, te na cóne cáhnu ni de nuū rī chi ma jeé rí, achí de.

20 Te inga de ni cahān de: Sáá ní quijnáhan rí, te jeē yúcuan ma cúu jeé rí, achí de.

21 Te cuanuhun mozo un, te ni castühún de nuū patrón de ndese ni cacahān ñayuu. Yūcuán na te ni quitī ni patrón, te ni cahān de jín mozo de: Yachí quihīn rō táca calle náhnu jín calle lulí, te cana ró ñáyuu ndahú, ñayuu cuhndú, ñayuu chacuá, jín ñáyuu cuaá, na quíjicoo i vico, áchí de.

22 Te ni jehēn mozo, te ni ndee de, te ni cahān de jín patrón de: Je ni sáha ná jéē ni cahān ní, te cúmanī gā ñayuu te chitú vehe ní, áchí de.

23 Te ni cahān tucu patrón: Quihīn tucu ró táca calle jín ichi, te cana fuerza rō ñayuu na quíjicoo i, návāha chitú vehe rí.

24 Chí cáhán rī jín ró jeē ní iin tēe ni cana rí xīhna ñúhún, ma cuáha cuiti rī jnūhun jeē cuxíni de vehe rí, achí de. Achí yá.

### *Jnūhun jeē cánuú nacani vāha ni yō te condiquīn yō Cristo*

25 Te cuehē ndasí ñáyuu cándiquīn i Jesús cuango i jín yá, te ni ndió cóto ya nuū i, te ni cahān yā jín i:

26 Núu na-ni ñayuu cuní condiquīn ruhū, te núu manī gā i jín tátá i, náná i, ñasihí i, sēhe i, ñani i, cuáha i, vēsú jín ruhū, ma cúu cuu i ñayuu scuáha jín rí. Te núu ndihví gā ni i siquī jeē cóo vāha máá i vēsú jeē cóndiquīn i ruhū, te suni ma cúu tucu.

27 Te na-ni ñayuu núu tu jéhe i jnūhun ndoho i jnūndóho vēsú nde cuu i jeē siquī jeē cóndiquīn i ruhū, te ma cúu cuu i ñayuu scuáha jín rí.

28 Chí núu ndé iin ró cuní rō sáha ró iin vehe cáhnu, ¿á tu cánuú jéē xīhna gā cucōo ró te tava rō cuenta núu canda xūhun jéē sínu ró?

29 Chí núu tuú, te núu je ni jequin rō cimiento, te tu cánda xūhun ró sínu ró, yūcuán na te táca ñáyuu sácatā i coto i róhó.

30 Te cahān i: Tēe yáha ní quejéé de sáha de vehe, te tu ní cánda de sínu de, achí i.

31 Te suni súcuan núu iin rey quihīn de cuajnáhan de jín inga rey jeē véji siquī de, ¿á tu cánuú jéē xīhna gā cucōo de te nacani ni de núu canda uxī mil soldado jeē cuajnáhan de jín inga rey jeē véji siquī de jín ócō mil soldado?

32 Chí núu tú canda de, te níní jíca gá véji inga rey, te tají de tēe cándiso jniñu, cajnūhún de na vé cuní inga rey jeē cuáha de nuū, te jecuiñi-ni.

33 Te máá ró jijnáhan ró, suni súcuan cánuú jéē xīhna gā nacani ni rō cahnde ni rō stóo ró ndihi jeē névāha ró, chi núu tuú te ma cúu cuu ró ñáyuu scuáha jín rí.

*Jnūhun yátá siquī ñiñi  
(Mt. 5.13; Mr. 9.50)*

<sup>34</sup> Te ñayuu cácañdije cácuu i nájnūhun ñiñ. Vāha iyó ñiñ, te núu ñiñ ún na náa jeē uhvuá, ¿te ndese nduu uhvuá tucu?

<sup>35</sup> Tuá cuajñiñu cuiti, ni jeē chūhun ñayuu nuū itu, ni jeē ndúu jēhen, chi máa cate iñ-ni i. Tāca rōhó jēē jíni sōho, na chūsóhó ró. Achí yá.

*Jñūhun yátá síquī lanchi ní sana*  
(Mt. 18.10-14)

## 15

<sup>1</sup> Te tāca tēe cástútú xūhun renta jíin táca gá tēe cásáha cuēchi, ni quecoo de nuū Jesús jeē cuni sōho de jñūhun cáhān yā.

<sup>2</sup> Te tāca tēe grupo fariseo jíin tēe cástéén tutu ley Yaā Dios, ni cacahān de síquī yā:

Tēe yāha jétáhú de tāca tēe cásáha cuēchi te yéji de jíin, áchí de.

<sup>3</sup> Te ni cahān yā jñūhun yátá yāha jíin de:

<sup>4</sup> ¿Ndé ñn ró núu névāha ró ñn ciento lanchi, te núu scuíta ró ñn ti, te á tu stóo ró cúñ xico xahūn cuñ gā ti yucu, te quinanducú ró quiti ní sana ún ndé nanihīn rō tī?

<sup>5</sup> Te núu ni nanihīn rō tī, te coso sūcun rō tī, te cusīñ ni rō.

<sup>6</sup> Te núu ni ndee rō vehe ró, te nastútú ró táca amigo rō jíin ñáyuu yúcu yajni jíin ró, te cahān rō jíin i: Na cúsīñ ni yō, chi ni nanihīn rī lanchi ri jeē ní sana. Achí rō.

<sup>7</sup> Te cáhān rī jíin ró jeē suni sūcuan cúu nde andiví. Chi cúsīñ gā ni yā jíin ñn ñayuu iyó cuēchi núu nacani ni i jeē stóo i cuēchi i, vēsú jíin cúñ xico xahūn cuñ ñayuu iyó ndāā jeē tuá jíni ñūhún nacani ni i.

*Jñūhun yátá síquī ñahan ní scuíta xūhún*

<sup>8</sup> Te núu ñn ñahan névāha ña uxí peso cāa, te núu scuíta ña ñn, ¿á tu nastīñ ña lámpara te nastāa ña vehe, te nanducú yúcun ña nde nanihīn ña?

<sup>9</sup> Te núu ni nanihīn ña, te nastútú ña táca amiga ña jíin ñáyuu yúcu yajni jíin ña, te cahān ña jíin i: Na cúsīñ ni yō, chi ni nanihīn rī xūhun jēē ni scuíta rī. Achí ña.

<sup>10</sup> Te cáhān rī jíin ró jeē suni sūcuan cúsīñ ni táca ndajéhé Yaā Dios síquī ñn ñayuu iyó cuēchi núu nacani ni i jeē stóo i cuēchi i. Achí yá.

*Jñūhun yátá síquī sūchi ní jēhēn jecó*

<sup>11</sup> Te ni cahān gā yā:

ñn tēe ni iyo uū sēhe yí de.

<sup>12</sup> Te tēe suchí gá ni cahān i jíin tátá i: Tátā, tahu sáva ní ndajniñu ní, te cuāha ní sava cuu tahū ná, áchí i. Te ni tahu sáva de tahu ndindúú i.

<sup>13</sup> Te ni cuu jecu-ni quiví, te tēe suchí gá un ní stutú ndiñi i ndajniñu i. Te ni quenda i cuahān i ñn ñuu jicá. Te yūcuan ní snāā i tahū i, chi ni jexīn cáhā i.

<sup>14</sup> Te ná ni ndiñi ni jexīn i, te ni quee ñn jnamā xeē ini ñuu ún, te ni quejéé cúmanī jeē caji i.

<sup>15</sup> Yūcuán na te cuanducú jniñu i nuū ñn tēe ñuu ún. Te ni tají de i cuahān i rancho de jeē cóto i quini de.

<sup>16</sup> Te cúní i caji i vēsú soō ndúchi jeē cáyeji quini ún, návāha ndutú chíji i. Te ni ñn ñayuu tú na vé jéhe nuū i.

<sup>17</sup> Yūcuán na te ni quejéé i nácani ni i: Tāca mozo casājniñu vehe tátá rī, iyó cuéhē staā cáyeji i. Te ruhū chí jí rī sōco yāhā.

<sup>18</sup> Na quínuhun rī nuū tátá rī, te cahān rī jíin de: Tátā, ni sáha ná cuēchi nuū Yaā Dios jíin núu maá ní.



19 Vijna te nasūu gá tēe vāha cúu ná jēē cónaní ná sēhe ní. Te cuāha ní jnúhun cuu ná nájñuhun ìin mozo ní, achi rī.

20 Yūcuán na te ni naquihin i ichi cuanuhun i vehe tátá i.

Te níní jícá gá vēji i, te ni jito tátá i nuū i, te ni cundáhú ni de i. Te jínu de cuajnahán de i, te ni nundee de sucūn i, te ni techúhú de i.

21 Yūcuán na te ni cahān i jíin de: Tátá, ni sáha ná cuéchi nuū Yāā Dios jíin núu maá ní. Vijna te nasūu gá tēe vāha cúu ná jēē cónaní ná sēhe ní. Achi i.

22 Te maá tátá i chi sa ni cahān de jíin táca mozo de: Cuáquihin sahma vāha ga te chuhun ró i. Te chuhun ró ìin xehyu ndaha i, te chihi ró ndíjēn jehē i.

23 Te quiquihin ró becerro xéhen, te cahni rō tī na cáji yō, chi sáha yó vico.

24 Chi sēhe yíí rí yáha, nájñuhun je ni jihí i, te ni natecu i. Chi tu ní jíin rī ndé chi ní jéhēn i, te ni ndee i, áchí de. Te ni caquejéé de cásáha de vico.

25 Te sūchi jévāha, ìne i nde rancho, te vēndiji i, te ni cuyajni i yatā véhe. Te ni jini i jeē cúu yaa te cájita jéhé ñáyyu.

26 Te ni cana i ìin mozo, te ni cajñuhún i na vé cúu jeē cúu.

27 Te ni cachi mozo un núu i: Ni ndee ñani rō, te tátá rō ni jehni de becerro xéhen, chi ni ndee vāha i nuū de, áchí mozo.

28 Yūcuán na te ni quitī ni sūchi jévāha, te tu ní cúní i ndívi i. Te ni quenda tátá i, te ni cahān ndahú de jíin i jeē na ndívi i.

29 Te ni cahān i jíin tátá i: Níní sáha ná jniñu ndácu ní, te tu cúnihni cuiṭi ni na núu ní. Te tu jéhe ní vēsū ìin lítú núu ná, jeē sáha ná vico caji na jíin táca amigo na.

30 Te ni ndee sēhe ní yáha jeē ní jéxīn cāhá i xūhun ní jíin táca ñahan. Te ni jehni ní becerro xéhen caji i, áchí i jíin tátá i.

31 Yūcuán na te ni cahān de jíin i: Séhē, rōhó chi níní ndéé ró jíin rí, te ndíhi jeē névāha ri chi suni cuenta maá ró cúu.

32 Te vijna chi iyó vāha jeē sáha yó vico te cusī ni yō. Chi ñani rō yāhá, nájñuhun ni jihí i, te ni natecu i. Chi tu ní jíin yō ndé chi ní jéhēn i, te ni ndee i, áchí de. Achi yá.

*Jñuhun yatá síquī mozo jeē ni stáhú de patrón de*

## 16

1 Te suni ni cahān Jesús jíin tēe cácuáha jíin yá:

Ìin tēe cucá ní Iyo ìin mozo de jeē ndíso jniñu nuū táca gá mozo. Te ni cacahān jíin patrón un jēē mozo un snáá cāhá ndajniñu de.

2 Te ni cana de mozo un, te ni cahān de jíin: ¿Na jñuhun cúu yāha jēē nihín rī síquī rō? Nacuāha cuenta jniñu ndíso ró, chi ma cóndiso jniñu ga rō nuū mozo rī. Achi de.

3 Yūcuán na te jéni ni maá de: ¿Ndese sáha ri vijna? Chi patrón rī quenehen de jniñu rī. Te tú ndacuī rī jeē cáte rī ñuhun, te jeē cacán rī caridad chi cúcanu rī.

4 Núu súcuan te jíin rī ìin jeē sáha ri, návāha ñayuu cájeen nuū patrón rī, cuāha i vehe condee rī núu na quée quiṭi jeē quenehen de jniñu rī.

5 Te ni cana de ná ìin ná ìin tēe jeē cátaū nuū patrón de. Te ni cajñuhún de ìin: ¿Nasaa táú rō nuū patrón rī?

6 Te ni cahān tēe ún: Ìin ciento barril aceite, áchí de. Te ni cahān mozo un: Yāhá na cuāha ri lista rō, te cucōo yachī rō, te na sáha ró ìnga lista jeē uú xico uxī na, áchí de.

<sup>7</sup> Yūcuán na te ni cajnūhún de inga tēe: Te rōhó, ¿nasaa táu rō? Te tēe un ní cahān de: Ìin ciento cajón trigo, achí de. Te ni cahān de jíin tēe ún: Yāhá na cuáha ri lista rō, te na sāha ró inga lista jeē cuún xico na, achí de.

<sup>8</sup> Yūcuán na te patrón ni cahān de: Nacā jeē ndichí ní sāha tēe cúnéé un, achí de. Te cāhán rī jíin ró jeē ñáyuu ñayīvi yáha, ndichí gá casáha i jeē quendōo vāha i nuū jnāhan i, vēsú ñayuu cácadíje nuū Yāā Dios.

<sup>9</sup> Nūu súcuan te cāhán rī jíin ró jeē ndichí gá na sāha ró vēsú jeē ni sāha mozo ndichí un. Chi ini ñayīvi yáha nuū yíhi cuēchi, na sāha ró jniñu vāha jíin xūhun ró, cuáha ró núu ñáyuu ndahú, návāha vēsú núu ni ndihi xūhun ró ñayīvi yáha, te quivícoo ró andiví núu coo vehe ró ní cáni.

<sup>10</sup> Tēe jeē squícu vāha jíin ìin jniñu lúli-ni, suni squícu vāha de jíin jniñu cáhnu. Te tēe jeē stahú jíin ìin jniñu lúli-ni, suni stahú de jíin jniñu cáhnu.

<sup>11</sup> Nūu súcuan te núu tu squícu vāha ró jíin xūhun jeē iyó ñayīvi yáha nuū yíhi cuēchi, te ma cuáha ya jeē vāha cuu ró ní cáni andiví.

<sup>12</sup> Te núu tu squícu vāha ró jíin ndajniñu jeē ni jéhe núu ya nuū rō ñayīvi yáha, te ma cuáha ya tahū cuu ró ní cáni.

<sup>13</sup> Ní ìin mozo ma cúu cuajniñu de nuū uū patrón. Chi quitī ni de nuū ìin te coo manī de jíin inga, chí squícu vāha de nuū ìin te sájéé ni de nuū inga. Te suni súcuan ma cúu cuajniñu ró núu Yāā Dios te núu máni siquī xūhun ndíhví ní rō, achí yá.

<sup>14</sup> Te tēe fariseo ni casacatā de nuū yā jeē ní cajini de tāca jnūhun cāhán yā, chí tēe cútóo xūhun cácuu de.

<sup>15</sup> Te ni cahān yā jíin de:

Máá ró casáha ró jéé tēe ndaā cácuu ró núu ñáyuu. Te Yāā Dios chí jíní yā ndese cáa ini anuá rō. Chi jniñu cájeni ni ñayuu jeē jniñu jéhu cúu, te nuū Yāā Dios chí jniñu néu cúu.

### *Siquī ley Yāā Dios jíin siquī jeē ndácu ya jniñu*

<sup>16</sup> Nde ná tu quiji Juan tēe scuándute, te ni Iyo ley jeē ni jéhe Yāā Dios nuū Moisés, te suni ní castéén tāca tēe cánacani jnūhun ya. Yūcuán na te ná ni quiji Juan, te ni quejéé jítē núu jnūhun vāha ndese ndácu Yāā Dios jniñu. Te tāca ñáyuu nducú ndéyí i quivícoo i ndaha ya.

<sup>17</sup> Te yí gá cúu jeē náā ìin letra nuū tútu ley yā vēsú jeē náā andiví jíin ñayīvi, chí squícu ndihi jnūhun cāhán.

### *Siquī jeē ma stóo jnāhan tēe jíin ñahan*

*(Mt. 19.1-12; Mr. 10.1-12)*

<sup>18</sup> Nūu ìin tēe stóo de ñasihí de te quijnāhan de jíin inga ñahan, núu súcuan te cásiquí ndéē de ña. Te núu ìin tēe condeca de ñahan ní ndusín, suni cásiquí ndéē de ña, achí yá.

### *Jnūhun tēe cúcá jíin Lázaro*

<sup>19</sup> Te ni cahān gā yā:

Ní Iyo ìin tēe cúcá, ní ñuhun de sahma lúu vāha ndasí. Te ndiquiví ni Iyo vāha ndasí jéé ní yeji de.

<sup>20</sup> Te suni ní Iyo ìin tēe ndáhú, nání de Lázaro, néne de yéhyí tēe cúcá un, te ní cáhnu de ìin ndíhyi.

<sup>21</sup> Te máni cúní de jeē ndutú chíji de jíin stāā cuēchi jeē stívi tēe cúcá un. Te quécóo ina te cānyuu tí nuū ndíhyi de.

<sup>22</sup> Te ni jihí tēe ndáhú un, te tācá ndajéhé Yāā Dios cuangoo ya jíin ánuá de nde andiví nuū néne Abraham. Te suni ní jihí tēe cúcá un, te ní quindūji de.

23 Te tēe cúcá un xeēn ndóho de íne de lugar nuū cáyūcu ndīyí tu ní cándíje. Te ni ndacoto de, te nde jicá ní jito de nuū Abraham, te néne Lázaro jíin de.

24 Yūcuán na te ni cana cóhó de: Tátā Abraham, cundáhú ni ní sáña, te tají ní Lázaro, na quíchundaji de xiní ndáha de nuū ndúte, te quiji de stáji de yáá ná. Chi xeēn ndóho ná nuū yáñuhūn yāhá. Achí de.

25 Te ni cahān Abraham jíin de: Séhē, nucūhun ni rō jeē ni níhīn rō ndihí jeē váha ná ni cotecu rō, te Lázaro chí sa suhva jnūndóho ni níhīn de. Te vijna je ni ndusī ni de yāhá, te róhó chí ndóho ró jíinā.

26 Te suni iyó ĩn jeē cunú téyí, íne mēhñu yó jijnáhan yó. Te ñayuu cáhīn yāhá, vēsú cácu ni i yāha i jeē i nuū rō, te ma cúu. Te ni ma cúu yāha máá ró quijicoo ró yāha. Achí Abraham.

27 Yūcuán na te ni cahān tēe cúcá: Núu sūcuan te cáhán ndahú ná jíin ní, Tátā Abraham, tají ní Lázaro na quíhīn de vehe tátá na.

28 Chi iyó úhūn gā ñani ná, te na quícachi de nuū i jeē na nácani ni i te stóo i cuēchi i, návāha ma quívicoo i nuū ndóho ná yāha, achí de.

29 Te ni cahān Abraham jíin de: Je cánevāha i tutu jeē ní tee Moisés jíin táca tēe ni canacani jnūhun Yaā Dios. Suu yūcuán na chúhun ni i, achí Abraham.

30 Te ni cahān tucu tēe cúcá: Vēsú sūcuan, Tátā Abraham, te núu ĩn ñayuu ni jihí quihīn nuū i, yūcuán na te nacani ni i jeē stóo i cuēchi i, achí de.

31 Te ni cahān Abraham jíin de: Núu tu chúhun ni i jnūhun ni nacani Moisés jíin táca tēe ni canacani jnūhun Yaā Dios, suni ma candíje cuiti i núu natecu ĩn ndīyí quihīn nuū i, achí de.

*Xeēn coo siquī ñáyuu squívi jnáhan nuū cuéchi  
(Mt. 18.6-7, 21-22; Mr. 9.42)*

## 17

1 Te ni cahān Jesús jíin tēe cáscuáha jíin yá:

Máni iyó jēe nducú squívi ñayuu nuū cuéchi. Te nacā xeēn ndoho ñayuu jeē squívi jnáhan nuū cuéchi.

2 Vāha ga núu ni conuhnī ĩn yōso cáhnu sucūn i te quēe i chíji ndute mar, vēsú jeē squívi i ĩn sūchi lúli yāha núu cuéchi.

3 Coto ma sáha ró sūcuan jíjnáhan ró.

Te núu jnáhan ró sáha de cuéchi siquī rō, te cahān rō nuū de. Te núu nacani ni de, te cone cáhnu ni rō nuū de.

4 Te núu uxā jínu jeē ĩn quivī sáha de cuéchi siquī rō, te núu uxā jínu nácani ni de te cahān de jíin ró jeē cone cáhnu ni rō chí ma sáha ga de, te cánú cone cáhnu ni rō nuū de. Achí yá.

*Jeē yóhoyo cújéhnu jnūhun cándíje*

5 Te tēe cácuu apóstol ni cacahān de jíin Jítoho yō:

Sáha ní jēe níhīn ga candíje ná jēe sáha Yaā Dios jeē cájicān na núu yā, achí de.

6 Te ni cahān máá Jítoho yō jíin de:

Núu cáandíje ró vēsú ĩn tíhli-ni, nájnūhun ĩn ndiquin mostaza jeē tíhli-ni cáa, te cuu cahān rō jeē nuyūhndu yāha na quénda te nucondichi nde nuū mar, te coo nájnūhun cahān rō.

*Jeē cánúu squícu vāha yó núu yā*

7 Ndé ĩn ró iyó mozo rō jeē jítu de chí ndíto de quití ndéca ró, te núu ni najinū de vehe ró, te tu cáhán rō jíin de jeē cúcōo de caji de staā.

<sup>8</sup> Chi sa suhva cáhán rō: Sáha ró ndeyu cuxíni ri, te cani ró cóhō rī. Te núu ni cuu ni yeji rī ni jhi ri, yūcuán na te caji maá ró coho ró, cácahān rō.

<sup>9</sup> Te cácahān rō jeē tu cánuú nacuatáhú ró nuū mozo núu ni sáha de jniñu ní ndacu ró, chi jeē cánuú sáha de cúu.

<sup>10</sup> Te suni súcuan máá ró jijnáhan ró, cácuu ró mozo Yaā Dios. Te núu ni casquicu ró táca jniñu ní ndacu ya nuū rō, te cahān rō: Tu cánuú nacuatáhú yá nuū rī, chi ní sáha rī máá-ni jeē cánuú sáha rī, achi rō. Achi yá.

*Jeē ní nasávāha ya uxī tēe ndóho cuehyī stehyú*

<sup>11</sup> Te jíca Jesús ichi cuahān yā ñuu Jerusalén, te ni yāha ya cuahān yā mēhñú región Samaria jíin Galilea.

<sup>12</sup> Te ni jinū yā ñn ñuu, te uxī tēe ndóho cuehyī stehyú ni quendacoo de vejnahan de ya, te jíca ní cajecuiñī de.

<sup>13</sup> Te ni cacana jee de:

Jesús, Maestro, cundáhú ni ni sáña, áchí de jíjnáhan de.

<sup>14</sup> Te ni jito Jesús nuū de, te ni cahān yā jíin de:

Cuángoo te stéen rō maá ró nuū táca sūtū jeē ní canduvāha ró, áchí yá.

Te níni cuángoo de te ni canduvāha-ni de.

<sup>15</sup> Yūcuán na te ñn-ni de ni nandió cóo de nuū Jesús, te cáhán jee de, nácuatáhú de nuū Yaā Dios jeē ní nduvāha de.

<sup>16</sup> Te ni jecuiñī yítí de nuū yā, te ni jequín de nuū de nde nuū ñúhun, te ni nacuatáhú de nuū yā. Te tēe Samaria cúu de.

<sup>17</sup> Te ni cahān Jesús:

¿A násūú ndihúxí de ni canduvāha? Te ñn gā de, ¿naun tu ní cánandicó de nacuatáhú de?

<sup>18</sup> ¿A máñúhún-ni tēe ñuu jíca yáha cúu jeē ní nandicó de nácuatáhú de nuū Yaā Dios?

<sup>19</sup> Te ni cahān yā jíin tēe ún:

Ndocuiñī quinhun rō. Chi ni candíje ró jéē cuu nasávāha ri rohó, te jeē yúcuan ní nduvāha ró, áchí yá.

*Ndese coo quivī jeē ndíji ya ndacu ya jniñu  
(Mt. 24.23-28, 36-41)*

<sup>20</sup> Te tēe fariseo ni cacajnūhún de Jesús ndé quivī quejéé jéē ndácu Yaā Dios jniñu ini ñayiví. Te ni cahān yā jíin de:

Ma quéē ndijin jeē ndácu Yaā Dios jniñu.

<sup>21</sup> Ni ma cúu cahān ñayuu: Yāha íne ya ndácu ya jniñu, chí: Yūcuán íne ya, achi i. Chi je ndácu Yaā Dios jniñu mēhñu ró jijnáhan ró. Achi yá.

<sup>22</sup> Yūcuán na te ni cahān yā jíin tēe cáscuáha jíin yá:

Quee tiempo jeē yóhyo cúu ni rō coto ró jéē ndíji ruhū, Yaā ní nduu tēe, te ma cóto ró jíjnáhan ró.

<sup>23</sup> Te cahān ñayuu jíin ró: Yāha íne ya, chí: Yūcuán íne ya, achi i. Te ma quíngoo ró condēhe ró, ni ma cóndiquín rō í.

<sup>24</sup> Chi nájnūhun sáha taja jeē ndíndēé ñn lado andiví te cúndijin nde inga lado, suni súcuan cuu quivī ndíji ruhū, Yaā ní nduu tēe, chi ndíhi ñayuu coto.

<sup>25</sup> Te jíni ñúhún jéé xíhna gā ndoho xeēn rī, te ñayuu iyó víjna, squéhichí i ruhū.

<sup>26</sup> Chi nájnūhun ni cuu quivī ni íyo Noé, suni súcuan cuu quivī ndíji ruhū, Yaā ní nduu tēe.

27 Chi quivī un ní cayeji i, ni cajihi i, ni canandāha i, ni cajēhe i sēhe sáhí i jeē nándāha, nde ni jinū quivī jeē ní quivī Noé ini barco cáhnu jeē naní arca. Te ní cuun saū xeén, te ní ndaa ndute ni cajihi ndihi i.

28 Te suni súcuan ni cuu quivī ní Iyo Lot. Ni cayeji i, ni cajihi i, ni cajeen i, ni caxícó i, ni cataji i itu, ni cajeni i vehe.

29 Te quivī jeē ní quenda Lot ini ñuu Sodoma cuahān de, te ní cuun ñuhūn jín azufre ichi ándiví, te ní snáa ndihi ñayuu.

30 Te suni súcuan coo quivī jeē ndíji ruhū, Yaā ní nduu tēe.

31 Te quivī ún te ñayuu cáhīn yatā véhe, te ndajníñu i ñúhun ini vehe, cáhān rī jín i jeē ma ndívi i naquihin i, chí cánú cunu yachī i jeē cácu i. Te suni súcuan ñayuu casájniñu nuū itu, ma quínuhun i vehe i jeē quíhin i ndajníñu i.

32 Te nucūhun ní rō ndese ni ndoho ñasihí Lot jeē ní jíhī ña.

33 Te núu ndé ñáyuu cuní i cácu i nuū jnúndóho quiji nuū i jeē siquí ruhū, núu súcuan te jnahnú ndetú i ní cáni. Te núu ndé ñáyuu, vésú na cúu i jeē siquí ruhū, te cotecu i ní cáni.

34 Te cáhān rī jín ró jeē quivī ndíji rī te quíxí uū tēe in jito jecuáa, te in de naquihin rī, te inga de ndōo, chí tu ní cándíje de.

35 Te coo uū ñahan jeē ndíco cáhnu, te in ña naquihin rī, te inga ña ndōo.

36 Te uū tēe sájniñu de nuū itu, te in de naquihin rī, te inga de ndōo. Achí yá.

37 Te jeē ní cajini de jnúhun yáha, te ni cacajnúhún de ya:

¿Ndé mí coo súcuan nájnūhun ni cahān ní? Achí de.

Te ni cahān yā jín de:

Nájñūhun jeē cutútú téji ndé-ni cúu nuū catú quiti ní jíhī, suni súcuan coo tāca jéé ni cáhān rī ndé-ni cúu-ni nuū cáhīyo ñayuu.

*Jnúhun yátá siquí juez jín ñahan viuda*

## 18

1 Te ni cahān yā in jnúhun yátá jín de jeē cánúu jeē niní cácan tahu de, te ma ndínuu ni de jín.

2 Te ni cahān yā:

Ni Iyo in juez ini in ñuu. Te ni tu ndíso Iyo de nuū Yaā Dios, ni tu yúhú de nuū ní in ñayuu.

3 Te suni ñuu un Iyó in ñahan ní ndóo ndáhú. Te ñahan un jéhén-ni jéhén-ni ña nuū de, jícán ña jeē na sándaā de siquí in ñayuu jeē jito uhū i ña.

4 Te cuehē quivī tu ní cuní de sándaā de, te yúcuán na te ni jeni ni de: Vésú tu ndíso Iyo rī nuū Yaā Dios, ni tu yúhú rī nuū ní in ñayuu,

5 te ñahan viuda yáha, yóhoyo stáhān ña ruhū, te jeē yúcuan na sándaā rī siquí ñáyuu jeē jito uhū i ña. Chí núu tuú, te quejéé rī jnaníní ni rī jeé quíji quíji ña. Achí de. Achí máá Jítoho yō.

6 Te ni cahān gā yā:

Súcuan cúu jeē ní cáhān juez, tēe tú ndaā.

7 Te Yaā Dios, nastū súcuan cúu ya, chí sándaā yā siquí jníñu ñayuu ní nacāji ya jeē nduú ñuu cácahān ndahú i jín yá. Chí jnama ya i nuū tāca jéé cájito uhū i. ¿Te á cuéé jnama ya i?

8 Cáhān rī jín ró jeē yachī. Te quivī ndíji ruhū, Yaā ní nduu tēe, ¿á níhīn gā rī ñayuu cácañíje níhīn ini ñayiví? Achí yá.

*Jnúhun yátá siquí tēe fariseo jín tēe stútú xúhun renta*

<sup>9</sup> Te suni ni cahān yā jnūhun yátá yáha jíin jecu ñayuu jeē cájeni ni i jeē ñayuu ndaā cácuu i, te cájeni ni i jeē sava ga ñayuu tu cáhīyo ndaā:

<sup>10</sup> ĩn tēe fariseo cuahān de templo jeē cacān tahú de. Te ĩn tēe stútú xūhun rentā suni cuacacān tahú de templo.

<sup>11</sup> Te tēe fariseo, índichi de, te súcuan ni jicān tahú de: Tátā Yaā Dios, na cútahú na núu ní, chí tu cúu ná nájñūhun cándāa sava ga tēe, tēe cuihná, tēe néé, tēe cásiquí ndéē jnāhan cácuu de. Ní tu cúu ná nájñūhun cáa tēe yúcuan jéē stutú xūhun rentā jeē scáa ga de jícān de nuū ñayuu.

<sup>12</sup> Te uū jínu jeē semana iyó ndíte ni na núu ní, te jéhe ná nuū ní ĩn ĩn siquī tāca úxī ndajniñu níhín na, áchí de.

<sup>13</sup> Te tēe stútú xūhun rentā, ni jecuiñi jicá de nuū templo, ni tu ní chūndeyí ni de jeē ndonehen de nuū de, chí sa suhva ni caní de yīqui jícā de jeē cucuíhyá ni de. Te ni cahān de: Tátā Yaā Dios, cundáhú ni ní sáña, chí tēe iyó cuéchi cúu ná, áchí de.

<sup>14</sup> Te cáhán rī jíin ró jeē tēe stútú xūhun rentā, ni jetáhú Yaā Dios de, te cuanuhun de vehe de. Te tēe fariseo chí tu ní jétáhú yá de. Chí ñayuu jeē sajhénu i máá i, sa ndululí i. Te ñayuu jeē sálulí i máá i, sa ndujénu i. Achí yá.

*Jeē ni jícān tahú Jesús jehē sūchi lúlí  
(Mt. 19.13-15; Mr. 10.13-16)*

<sup>15</sup> Te ni quecoo ñayuu jíin sūchi lúlí núu Jesús, jeē na sóo yá ndaha ya xini i. Te tēe cáscuáha un ní cajini de jeē súcuan cúu, te ni cacahān de nuū ñayuu vējicoo jíin i.

<sup>16</sup> Te máá Jesús ni cana ya de, te ni cahān yā:

Cuāha jnūhun na quíjicoo sūchi lúlí jíñā nuū rī, te ma cási rō jeē quíjicoo i. Chí ñayuu jeē ndió cóo ni i caní ni i nájñūhun sūchi yáha, suu i quívi ndaha Yaā Dios jeē ndacu ya jniñu nuū i.

<sup>17</sup> Te jendaá cahán rī jíin ró, núu ĩn ñayuu tú cuatáhú i jeē ndácu Yaā Dios jniñu nuū i, nájñūhun jétáhú ĩn sūchi lúlí, ma quívi cuiti i ndaha ya, achí yá.

*Jnūhun tēe cúcá  
(Mt. 19.16-30; Mr. 10.17-31)*

<sup>18</sup> Te ĩn tēe cújénu ni cajñuhún de ya:

Tēe vāha cúu ní Maestro. ¿Te na jniñu vāha sáha ná te nihín tahú na cotecu na ní cáni andiví? Achí de.

<sup>19</sup> Te ni cahān Jesús jíin de:

¿Naun cáhán rō jeē tēe vāha cúu rí? Tú ni ĩn tēe vāha iyó, chí máá ĩn-ni Yaā Dios.

<sup>20</sup> Je jíni rō tācá jniñu ní ndacu Yaā Dios: Ma cosíquí ndéē jnāhan ró. Ma cáhni rō ndīyi. Ma sacuíhná ró. Ma sajnúhún ró. Cuatáhú ró nuū tatá rō nuū naná rō. Achí yá.

<sup>21</sup> Te ni cahān maá de:

Tācá jniñu yáha je ni squícu ná ndé ná lulí ná, achí de.

<sup>22</sup> Te Jesús ni jíni ya jnūhun yáha, te ni cahān yā jíin de:

Ĩn na jniñu cúmaní sáha ró núu súcuan. Xicó ndihi jeē névāha ró, te cuāha ró núu ñayuu ndahú. Te nde andiví cuāha ya jeē vāha ndasí núu rō. Yūcuán na te quiji ró condiquin rō ruhú, achí yá.

<sup>23</sup> Te ná ni jíni sóho de jnūhun yáha, te yōho ni cucuíhyá ni de, chí cúcá ndasí de.

<sup>24</sup> Te jíto Jesús jeē súcuan cúcuíhyá ni de, te ni cahān yā:

Tēe cúca chi yōhyo yí quívicoo de ndaha Yaā Dios jeē ndacu ya jniñu nuū de.

<sup>25</sup> Yachī gā yāha ñn camello yaū yutícuí vēsú jeē quívi ñn ñayuu cucá ndaha Yaā Dios jeē ndacu ya jniñu nuū i, áchí yá.

<sup>26</sup> Te tēe ní cajini jñūhun yáha, ní cacahān de:

¿Ndé ñayuu cúu jeē cácu núu súcuan? Achí de.

<sup>27</sup> Te ni cahān yā jíin de:

Ñayuu chi ma cúu squívi i máá i ndaha Yaā Dios, te máá yá chi cuu sáha ya, achí yá.

<sup>28</sup> Yūcuán na te ni cahān Pedro:

Saña jíjnāhan ná ní castóo ná ndihi jeē cánevāha ná, te cándiquñ na níhín, achí de.

<sup>29</sup> Te máá yá ni cahān yā jíin de:

Jendaá cahān rī jíin ró jíjnāhan ró, núu na-ni ñayuu stóo i vehe, chí tátá, chí ñani, chí ñasihí, chí séhe, jeē síquí jeē scáca i jñūhun jeē ndácu Yaā Dios jniñu nuū ñayuu,

<sup>30</sup> núu súcuan te nanihīn cuehē gā i ini ñayívi yáha, te tiempo quiji te cotecu i ní cáni, achí yá.

*Jeē ni cahān tucu ya jeē cúu yā*

*(Mt. 20.17-19; Mr. 10.32-34)*

<sup>31</sup> Te ni cana sīn ya ndihúxí uū tēe cáscuáha jíin yá, te ni cahān yā jíin de:

Vijna je cuángoo yó ñuu Jerusalén. Te yūcuán squícu ndihi jñūhun ndese ndoho ruhū, Yaā ní nduu tēe, nájnūhun ní catee tēe ni canacani jñūhun Yaā Dios nde jenahān.

<sup>32</sup> Chí ñayuu nastúu i ruhū nuū tēe nación Roma jeē cáyūcú Jerusalén cándacu jniñu. Te tēe un sácatá de nuū rī, te cahān neé de nuū rī, te tesihí de nuū rī.

<sup>33</sup> Te cani de ruhū, te sáá te cahni de ruhū. Te nuū uní quívi te natecu rī. Achí yá.

<sup>34</sup> Te máá de tu ní cájēcūhun cuíti ni de tāca jñūhun yáha. Chí jñūhun yí cúu, te tu ní cúu jēcūhun ni de jeē cahān yā.

*Jeē ní nasávāha ya ñn tēe cuáá ñuu Jericó*

*(Mt. 20.29-34; Mr. 10.46-52)*

<sup>35</sup> Te ni cuyajni ya cuahān yā ñuu Jericó. Te ñn tēe cuáá néne de yuhíchi, jíicán de caridad.

<sup>36</sup> Te ni jini sōho de jeē yáha cuehē ñayuu cuangoo i, te ni cajñūhún de naun cuángoo i.

<sup>37</sup> Te ni cacahān i jíin de jeē Jesús, tēe ñuu Nazaret, yáha ya cuahān yā.

<sup>38</sup> Yūcuán na te ni cana jee de:

Jesús Séhe yucūn David, cundáhú ni ni saña, achí de.

<sup>39</sup> Te ñayuu cuangoo ichi núu yā, ni cacahān i nuū de jeē na cási de yuhu de. Te máá de víhyá gā ni cana jee de:

Máá ní jeē cúu ní Séhe yucūn David, cundáhú ni ni saña víi, achí de.

<sup>40</sup> Yūcuán na te ni jecuíñ Jesús, te ni cahān yā jeē na quíndeca i de. Te nuū ní cuyajni de nuū yā, te ni cajñūhun yá de:

<sup>41</sup> ¿Na vé cuní rō jeē sáha ri jíin ró? achí yá.

Te ni cahān de:

Jeē na ndúndijin tinūu ná cuní na, achí de.

<sup>42</sup> Te ni cahān Jesús jíin de:

Ndundijin tinūu ró núu súcuan. Ni candíje ró jeē cuu nasávāha ri rohó, te jeē yúcuan ní nduvāha ró, áchí yá.

<sup>43</sup> Te ni ndundijin-ni tinūū de, te ni ndiquin de ya, te nácuatáhú de nuū Yaā Dios. Te ndihi ñayuu jeē ní cajito i, suni ní cacahān i jeē yóhyo vāha Yaā cúu Yaā Dios.

### *Jnūhun Zaqueo*

## 19

<sup>1</sup> Te ni quīvi Jesús ini ñuu Jericó, te ní yāha-ni ya cuahān yā.

<sup>2</sup> Te yūcuan íyó ñin tēe cúcá nání de Zaqueo, te cújéhnú de nuū tēe cástútú xūhun renta.

<sup>3</sup> Te cúní de coto de návāha cuni de ndé ñin cúu Jesús. Te tu ní cúu, chi cuehē ñayuu cuangoó i jíin yá, te ndiqui-ni cáa de.

<sup>4</sup> Te jínu de ni cosnūū de. Te ní caa de xinī ñin nuyūhndú návāha coto de nuū yā, chi yūcuan yāha ya quihín yā.

<sup>5</sup> Te ní jinū yā yūcuán, te ní ndacoto ndaa ya nuū de. Te ní cahān yā:

Zaqueo, yachī nuu ró, chí jíni ñúhún jéē ndóo ri vehe ró vijna, áchí yá.

<sup>6</sup> Yūcuán na te ní cusī ní de, te yachī ní nanuu de, te ní jeca de ya cuahān de jíin yá vehe de.

<sup>7</sup> Te ní cajito ñayuu jeē súcuan ní cuu, te ní cacahān i síquī yā jeē cuahán yā ndōo ya vehe ñin tēe sáha cuēchi.

<sup>8</sup> Yūcuán na te ní ndocuīñi Zaqueo, te ní cahān de jíin máá Jítoho yó:

Vijna te sava ndihi ndajniñú ná chí cuāha ná núu ñayuu ndahú. Te núu ní scáa ga na ní jicān na xūhun nuū ñáyuu, te nacuāha ná úní gā síquī naquihín i, áchí de.

<sup>9</sup> Te ní cahān Jesús:

Vijna te vehe yāha je ní cācu ñin tēe jeē ma jnahnú ndetū de, chí ní candíje de nájñūhun ní candíje jíí de Abraham.

<sup>10</sup> Chí ruhū, Yaā ní nduu tēe, ní quiji ri nducú rí ñayuu jeē jnahnú ndetū, te jnama ri i, áchí yá.

### *Jnūhun yátá síquī uxī mozo jíin xūhun*

<sup>11</sup> Te nuū ñayuu ní cajini táca jnúhun yāha, ní cahān gā Jesús ñin jnūhun yátá jéē steén yā ndese coo quivī ndíji ya. Chí je ní cuyajni ya ñuu Jerusalén, te cájeni ní i jeē víjna ñúhún quejéé jéē ndácu ya jniñu sáha Yaā Dios.

<sup>12</sup> Te ní cahān yā:

Ñin tēe cújéhnú cuahān jíicá de inga nación, návāha nihín jniñu de cuu de rey, te ndiji de ndacu de jniñu.

<sup>13</sup> Te nde ná tu quihín de, te ní cana de uxī mozo de, te nuū ñin ñin i ní jēhe de ñin xūhun jéē ndeé yahu ndasí. Te ní cahān de jíin i: Sájniñu ró jéē na ndúcuehe xūhun yāha jíjnáhan ró níni jéē quihín rī te ndee rī, áchí de.

<sup>14</sup> Te ñayuu nación de cáquitī ní i nuū de, te ní catajī i jecu tēe cándiso jniñu cuangoó yatā de jeē cahān: Tu cánujnahan ní ñayuu nación na jéē cuāha ní jniñu nuū tēe yāha jéē cuu de rey nuū i, áchí.

<sup>15</sup> Te vēsú súcuan te ní nihín jniñu de cuu de rey, te vendiji de nación de. Te nuū ní ndee de, te ní ndacu de jniñu jeē na quíjicoo mozo jeē ní jēhe de xūhun núu, návāha na cúní de nasaa ní canihín ñin ñin i síquī.

<sup>16</sup> Te ní quee ñin mozo un núu de, te ní cahān i: ñin xūhun jéē ní jēhe ní núu ná, ní nduu uxī, áchí i.



17 Te ni cahān maá rey: Vāha mozo cúu ró, te vāha ni sāha ró. Chi ni squícu vāha ró jíin ĩn jniñu lúli-ni, te vijna te sāha ri jeē cujéhnú ró ndacu ró jniñu nuū uxí ĩnuu jnā ri, achí de.

18 Te ni quee inga mozo, te ni cahān i: ĩn xūhun jeē ni jéhe ní nuū ná, ni nduu uhūn, achí i.

19 Te suni ni cahān de jíin mozo un: Róhó, cujéhnú ró ndacu ró jniñu nuū uhūn ĩnuu jnā ri, achí de.

20 Te ni quee inga mozo, ni cahān i: Yāha nácuāha ná xūhun ní, chi ni chuvāha ná ĩni ĩn pañuelo.

21 Chi ni yūhu ná nihín, chi tēe xeēn cúu ní. Chi cuehē gā nándacān ní vēsú jeē ni jéhe ní, te cuehē gā cuní ni vēsú jeē cúu sāha mozo ni, achí de.

22 Yūcuán na te ni cahān rey: Mozo neé cúu ró núu súcuan, te jíin jnūhun ni cahān rō te sándaā rī jeē iyó cuéchi ró jeē tu ní sájniñu ró jíin xūhun rí. Chi jéni ni rō jeē tēe xeēn cúu ri, te cuehē gā nándacān rī vēsú jeē ni jéhe ri, te cuehē gā cuní rī vēsú jeē cúu sāha mozo rī.

23 Núu súcuan ¿te naun tu ní chúne ró xūhun rí vēsú nuū banco? Te jeē ní ndee rī te naquihin ri xūhun rí nde jíin séhe xūhun núú. Achí de.

24 Te ni cahān de jíin ñayuu cáhĩin yūcuán: Quende xūhun jíinā nuū i, te cuāha ró núu mozo jeē névāha uxí, achí de.

25 Te ñayuu un ni cacahān i jíin de: Te ndese, chi je névāha de uxí, achí i.

26 Te ni cahān tucu rey: Cáhán rī jíin ró jeē ñayuu je névāha, sa quiiji ga nuū i, te conevāha cuehē i. Te ñayuu jeē tu névāha, sa cujiyo-ni vēsú jecu jeē névāha i.

27 Te tēe jeē cájito uhū ruhū, jeē tu ní cánujnahan ni de jeē cuu ri rey nuū de, cuáquihin de na quíjicoo de yāhá. Te cahni rō de coto ri, achí de. Achí Jesús.

*Jeē ni quívi Jesús ĩnuu Jerusalén  
(Mt. 21.1-11; Mr. 11.1-11; Jn. 12.12-19)*

28 Te nuū ní ndĩhi ni cahān yā jnūhun yāha, te ni jica ga yā cuahān yā ĩnuu Jerusalén.

29 Te nuū ní cuyajni ya ĩnuu Betfagé jíin ĩnuu Betania, yajni nuū íne yucu nání yucu Olivos, te ni tají yá uū tēe cáscuāha jíin yá jeē quíngoo de.

30 Te achí yá jíin de:

Cuáhán ĩnuu lúli íne ichi núú. Te núu ni quívi ró, te nihín rō ĩn burro núhni tī, jeē ní ĩn tēe ná tu coso de tī. Te ndají ró tī quiiji ró jíin tī.

31 Te núu ndé ĩn cajnūhĩn naun cándají ró tī, te cahān rō jíin: Máá Jítoho yō jini ĩnúhún yá tī, achí ró. Achí yá.

32 Te cuangoog tēe ni tají yá, te ni canihĩn de tī nájnūhun ni cahān yā jíin de.

33 Te jeē cándají de tī, te ni cacahān jitoho tī jíin de:

¿Naun cándají ró burro ri? achí.

34 Te ni cacahān de:

Máá Jítoho yō jini ĩnúhún yá tī.

35 Te ni ndecoo de jíin tī nuū Jesús. Te ni casoó de sahma de siquī tī, te ni casáha de jeē ní jecosó yā siquī tī.

36 Te ná-ni cuahān yā, sáá cáscáá ñayuu sahma i ĩni ichi.

37 Te nuū ní cuyajni ya nuū cúun ichi yucu Olivos, te ndĩhi ñayuu cácdandje jeē cándiquĩn i ya, ni caquejéé i cácusĩ ni i, te cácana jee i jeē yóhoyo vāha Yāá cúu Yāá Dios siquī táca jniñu jéhnú ni sāha ya ni cajito i.

38 Te achí i:

Yōhoyo vāha Yaā cúu Rey jeē véji jíin jniñu máá Jítóho yō Yaā Dios. Te sáha ya jeē cóo manī yō jíin Yaā Dios andiví. Te yōhoyo cújéhnú Yaā Dios, achí i jíináhan i.

<sup>39</sup> Yūcuán na te jecu tēe fariseo cáhlin mēhñu ñáyuu cuehē ún, ní cacahān de jíin yá:

Maestro, cahān ni núu ñáyuu cándiquin nihín jéē na cási i yuhu i, áchí de.

<sup>40</sup> Te ni cahān Jesús:

Cáhán rī jíin ró jeē núu ñáyuu yáha na cási i yuhu i, te tāca yúu chi cana jee, áchí yá.

<sup>41</sup> Te nuū ní cuyajni ya Jerusalén, te ni jito ya ñuu ún, te ni ndahyū yá siquī.

<sup>42</sup> Te ni cahān yā:

Róhó ñáyuu Jerusalén, yōhoyo ni cuu ni rī jeē na jécūhun ni rō jeē cuu ndumanī rō jíin Yaā Dios sáha ri. Te siquī jeē tu cácadíje ró, te vijna chi ma cúu ga jecūhun ni rō.

<sup>43</sup> Chi quee quiví jeē coo jnūndóho, te ñáyuu cájito uhū rohó, cuicó ndúu i ñuu rō, te casi cutú i jíin yúu, te tāca lado ndonda i siquī rō.

<sup>44</sup> Te ndihí vehe scótúú i, te cahni i róhó jíináhan ró. Te ma stóo i ni ñin vehe jeē cóso jnáhan ga yuū. Chi ni quiji ri nde nuū Yaā Dios jeē jnáma ri rohó, te tu ní cácadíje ró. Achí yá.

### *Jeē ní quenehen ya ñáyuu ini templo*

*(Mt. 21.12-17; Mr. 11.15-19; Jn. 2.13-22)*

<sup>45</sup> Te ni quiví ya ini templo cáhnu, te ni quejéé yá quenehen ya tāca ñáyuu cájeen quiti te cánaxico núu ñáyuu jeē socó i.

<sup>46</sup> Te ni cahān yā jíin i:

Yósó núu tútu ií jeē cahān Yaā Dios: Vehe ri chi vehe nuū cájicān tahú cúu, áchí Yaā Dios. Te máá ró jíináhan ró, chi nájnūhun yaū cava ñacuñna ní canasáha ró, áchí yá.

<sup>47</sup> Te ndiquiví ni steén yā jnūhun ini templo. Te sutū cácujeñnu jíin tée cástéén tutu ley Yaā Dios jíin tée cácujeñnu nuū ñáyuu ñuu ún, cánducú de modo ndese cahni de ya.

<sup>48</sup> Te tu cánihin de modo sáha de, chi ndivii ñáyuu yōhoyo cájetáhú i cájini nahín i jnūhun cáhán yā.

### *Siquī jeē ndiso jniñu Jesús*

*(Mt. 21.23-27; Mr. 11.27-33)*

## 20

<sup>1</sup> Te ñin quiví steén yā jnūhun nuū ñáyuu ini templo, te nácani ya jnūhun jeē jnáma Yaā Dios ñáyuu. Te ni quecoo sutū cácujeñnu jíin tée cástéén tutu ley Yaā Dios jíin táca tée jéhnú cándacu jniñu.

<sup>2</sup> Te ni cacahān de:

Castūhún, ¿ndé ní nihín jniñu ró jéē sáha ró jniñu yáha? ¿Te ndé ñin ni tee jniñu siquī rō jeē sáha ró súcuan? Achí de.

<sup>3</sup> Te ni cahān Jesús jíin de:

Suni ruhū cajnūhun rí rohó ñin jnūhun jíináhan ró. Castūhun núu rī:

<sup>4</sup> ¿Nde ñin ni tee jniñu siquī Juan jeē ni scuándute de? ¿A Yaā Dios chí táca tée? Achí yá.

<sup>5</sup> Yūcuán na te ni candajnūhun máá de:

¿Ndese cahān yō? Núu cahān yō jeē Yaā Dios ni tee ya jniñu un síquī Juan, te cahān de jíin yó: ¿Najehē tu ní cácanđije ró de núu súcuan?

<sup>6</sup> Te núu cahān yō jeē ñáyuu ni catee jniñu un síquī de, te ndiviī ñáyuu cahni i yóhó jíin yúu, chí cácanđije i jeē téē ni nacani jñuhun Yaā Dios ni cuu ndije Juan, achí de cácahān maá de.

<sup>7</sup> Te ni cacahān de jeē tu cájini de ndé ñin ni tee jniñu síquī Juan jeē ni scuándute de.

<sup>8</sup> Yūcuán na te ni cahān Jesús:

Ni ruhū, suni ma cáchi rī nuū rō ndé ñin ni tee jniñu síquī rī sáha ri jniñu yáha, achí yá.

*Jñuhun yátá síquī tēe néé cásájniñu nuū uva  
(Mt. 21.33-44; Mr. 12.1-11)*

<sup>9</sup> Te ni quejéé Jesús cahān yā jñuhun yátá yáha jíin ñáyuu ún:

Ñin tēe ni nachuhun de cuehē uva nuū ñúhun de. Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi jeē cuahān nahān de inga ñuu.

<sup>10</sup> Te maá tiempo ndutútú uva, te ni tají de ñin mozo cuahān nuū tēe cásájniñu ún, návāha naquihin de sava ndehē uva un. Te tēe un ní cacani de mozo, te ni canatajé de i cuanuhun i súcuan-ni.

<sup>11</sup> Te tēe chíí uva ni tají tucu de inga mozo cuahān. Te tēe cásájniñu ún, suni ni cacahān ndevāha de nuū i, te ni cacani de i, te ni canatajé de i cuanuhun i súcuan-ni.

<sup>12</sup> Te tēe chíí uva ni tají tucu de inga mozo cuahān. Te tēe cásájniñu ún, suni ni castújí de mozo un, te ni cascúnu de i.

<sup>13</sup> Yūcuán na te ni cahān tēe chíí uva: ¿Ndese sáha ri? Na tájí rí sēhe ri jeē maní rī jíin, chí sanaa te núu ni cajito de i te coo yíñuhún de nuū i. Achí de.

<sup>14</sup> Te tēe cásájniñu ún, ná ni cajito de jeē véji i, te ni cacahān de: Tēe chíí táhū cúu jeē véji ún. Na cáhni yō de, te ndōo tahū de cuu maá yó, achí.

<sup>15</sup> Te ni caquenehen de i inga lado, te ni cajehni de i, achí yá.

Te ni cajñuhun yá de:

Núu súcuan ¿te ndese sáha tēe chíí uva jíin tēe cásájniñu ún?

<sup>16</sup> Ndiji de te cahni de tēe un jñnáhan, te cuāha de ñuhun cáá uva un núu inga sava tēe sájniñu nuū, achí yá.

Te jeē ní cajini ñáyuu jñuhun yáha, te ni cacahān i:

Aí, núu ma cóo cuiñi súcuan víi, achí i.

<sup>17</sup> Te ndéhé yá nuū i jñnáhan i, te ni cahān yā:

Núu súcuan ¿te á cájecūhun ni rō jñuhun yáha jéé yosó núu tútu ñi jeē cúu ri nájñuhun ñin yuū? Chí achí tutu:

Yuū jeē ní casquéhichí tēe cájeni vehe,

yuū yáha nduu jeē quítuu vehe.

Achí.

<sup>18</sup> Te ñáyuu tu cácanđije, ndoho i nájñuhun ndóho ñáyuu jeē cotúú síquī yuū te jnáhnú i. Te quiví sándaā Yaā Dios cuéchi, te ñáyuu tu cácanđije, ndoho i nájñuhun ndóho ñáyuu jeē nínga yuū síquī i te cundiñi i sáha. Achí yá.

*Síquī xúhun renta  
(Mt. 21.45-46; 22.15-22; Mr. 12.12-17)*

<sup>19</sup> Yūcuán na te sutú cácujuhnu jíin tēe cástéén tutu ley Yaā Dios, ni cacuni de jñi de ya maá hora un. Chí ni cajecūhun ni de jeē síquī maá de cúu jñuhun

yátá ní cahān yā siquī tée cásajniñu nuū uva jíin tée cájeni vehe. Te tu ní cúu, chí cáyühú de jeē quitī ni ñayuu.

<sup>20</sup> Yūcuán na te ni catají de jecu tēe cuacoto yuhu de ya, te tēe un cásáha-ni de jeē tēe ndaā cácuu de. Te cánducú de sáha de jeē cahán yā ñn jñuhun jeē ñihín de cuēchi siquī yā, te quindecá de ya nuū tēe cúu gobernador.

<sup>21</sup> Te ni cacahān de:

Maestro, cájini na jēe cahán vāha ní, te stéén ndaā ní. Te tu sáha ní cuenta ndese cúu ñn ñn ñayuu, chí ñnuú-ni sáha ní jíin i. Te stéén ndaā ní ndese squícu ñayuu nuū Yāā Dios.

<sup>22</sup> Núu súcuan te cachi ní: ¿A íyó váha jeē chúnaa yō renta nuū rey nación Roma jeē jñi nación yō, chí tuú? áchí de.

<sup>23</sup> Te ni jini yā jeē cáconi de stáhú de ya, te ni cahán yā jíin de:

¿Najehē cájito ndee rō ruhū?

<sup>24</sup> Stéén ñn xühún na cóto ri. ¿Ndé ñn nuū cúu jeē ndeé nuū xühun yáha, te ndé síhví cúu jeē ndeé yāhá? áchí yá.

Te ni cacahān de jíin yá:

Nuū jíin síhví rey un cúu, áchí de.

<sup>25</sup> Yūcuán na te ni cahán yā jíin de:

Núu súcuan te nacuaña ró núu rey un jēe yáhi cuenta nuū de, te nacuaña ró núu Yāā Dios tāca jēe yáhi cuenta nuū maá yá, áchí yá.

<sup>26</sup> Te tāca tēe ún tu ní cúu ñihín de cuēchi siquī yā jíin ni ñn jñuhun cáhán yā, cájito jíinú ñayuu. Chí sa ni canaa ni de jeē ndichí ní stió cuñí yā jñuhun nuū de, te tuá na vé ni cácahān de.

*Jeē ní cacajñuhún de siquī jeē nátecu ndāyi*  
(Mt. 22.23-33; Mr. 12.18-27)

<sup>27</sup> Yūcuán na te jecu tēe grupo saduceo ni quecoo de nuū yā. Te tēe un cácahān jeē tu nátecu cuiti ndāyi. Te ni cacahān de jíin yá:

<sup>28</sup> Maestro, Moisés ni tee de nuū tútu jeē cánevāha yó: Núu ñn tēe cuu de, te ndōo ñasihí de, te núu tu ní íyo sēhe de jíin ña, núu súcuan te cánuú jeē ñani de naquihín ñasihí de, te sēhe de jeē cácu jíin ña nucuñí i nuū ndāyi ñani de, áchí tútu.

<sup>29</sup> Núu súcuan te ni íyo uxā ñani. Te tēe núu ní quiqnáhan de jíin ñahan. Te ni jihí de, te tú sēhe de ní íyo.

<sup>30</sup> Te tēe uñ ni naquihín de ña, te suni ni jihí de, te tú na sēhe de ní íyo.

<sup>31</sup> Te tēe uní ni naquihín de ña. Te suni súcuan ndihúxá de ni condeca de ña, te ni cajihí ndihí de, te ni ñn de tú sēhe de ní íyo.

<sup>32</sup> Te jeē sándihí te suni ni jihí ñahan ún.

<sup>33</sup> Núu súcuan te núu na nátecu de jíináhan de quiñvī nátecu ndāyi, ¿te ndé ñn de cuu ña ñasihí de? Chí ndihúxá de ni condeca de ña. Achí de jíináhan de.

<sup>34</sup> Yūcuán na te ni cahán yā jíin de:

Ñayivi yáha chí cáquiñáhan tēe jíin ñahan.

<sup>35</sup> Te ñayuu vāha jeē natecu i quiñvicoo i andiví, ma quiqnáhan ga i yūcuán, chí tuá na jñuhun quiqnáhan tēe jíin ñahan coo.

<sup>36</sup> Ni ma cúu cuiti gā i, chí coo i nájnūhun ndajéhé Yāā Dios. Te sēhe Yāā Dios cuu i, chí je ni canatecu i.

<sup>37</sup> Te suni maá Moisés cáhán de jeē nátecu ndāyi, chí ni tee de nuū tútu ndese ni cahán yā jíin de mēhñu yúcū jeē cayú yáñuhūn. Chí ni cahán de jeē cúu ya Yāā Dios Abraham jíin Isaac jíin Jacob.

<sup>38</sup> Te jeē ni cāhān de súcuan cúu jeē ní cachi de jeē cátecu tāca ndíyí. Chi vēsú je ni cajihí i, te cátecu i nuū iyó máá yá, chí cúu ya Yaā sáha jeē técu ñayuu ní cāni. Achí yá jíin de.

<sup>39</sup> Te jecu tēe cástéén tutu ley Yaā Dios ni cacahān de:

Vāha ni cahān ní Maestro.

<sup>40</sup> Te tuá ni cáchundeyí ní de cajnūhún de ya.

*Siquí jeē cúu Cristo sēhe yucūn David*

*(Mt. 22.41-46; Mr. 12.35-37)*

<sup>41</sup> Te ni cahān yā jíin de jíjnāhan de:

¿Ndese cúu jeē cácahān ñayuu jeē Cristo cúu sēhe yucūn David?

<sup>42</sup> Chi máá David suhva ni cahān de jnūhun ya nuū tútu Salmo:

Máá Jítóho yō Yaā Dios suhva ni cahān yā jíin Jítóho rī, Yaā quiji:

Cucōo ró lado váha rī nuū cujéhu ró,

<sup>43</sup> te na sáha rī jeē quende rō poder tāca jéē cájito uhū rohó.

Achí Yaā Dios. Achí David.

<sup>44</sup> Te núu sēhe yucūn David cúu Cristo, ¿te ndese cúu jeē ni cāhān de jeē Jítóho de cúu ya? áchí yá.

*Jeē ni cāhān yā jeē iyó cuēchi de jíjnāhan de*

*(Mt. 23.1-36; Mr. 12.38-40; Lc. 11.37-54)*

<sup>45</sup> Te ni cahān yā jíin tēe cáscuáha jíin yá, te suni ni cajini sōho ndíhi ñayuu:

<sup>46</sup> Coto má cándíje ró táca tēe cástéén tutu ley. Chi cácusī ní de cáñuhun de sahma cāni jeē steén jeē cujéhu de, cájica cuu de jíin. Te cánujnahan ni de jeē cahán yíñúhún ñayuu jíin de nuū yáhu. Te cánujnahan ni de cucōo de nuū silla yíñúhún gá ini vehe íi sinagoga, jíin silla yíñúhún gá nuū víco cáyeji ñayuu.

<sup>47</sup> Te cáquende de vehe ñahan ní caquendōo ndáhú. Te nahán cájicān tahú de návāha caní ni ñayuu jeē tú na cuēchi de. Tēe yáha jíjnāhan de chí xeēn gā ndoho de castigo. Achí yá.

*Jeē ni sócō ñahan viuda xūhún*

*(Mr. 12.41-44)*

## 21

<sup>1</sup> Te ná ni iyo ya ini templo, te jito ya nuū ñayuu cucá jéē cáchuhun i cuehē xūhún ini tāca yéjnū nuū cásocō i.

<sup>2</sup> Te suni ní jito ya nuū ñn ñahan viuda jeē ndóho ndáhú, te ni chuhun ña uū centavo lulí ini yejnū ún.

<sup>3</sup> Te ni cahān yā:

Jendaá cahán rī jíin ró jeē cuehē gā cúu jeē ni sócō ñahan viuda ndahú yáha, vēsú jeē ní casocō táca gá ñayuu.

<sup>4</sup> Chi táca i ní casocō i jeē ní ndóo siquí xūhun cuéhē i. Te ñahan yáha, vēsú ndahú ndóho ña, te ni chuhun ndíhi ña jeē cótecu ña. Achí yá jíin de.

*Jeē ní cachi yā jeē nāa templo*

*(Mt. 24.1-2; Mr. 13.1-2)*

<sup>5</sup> Te sava de ní cacahān de jeē luu cáa templo cáhnu, chí ni cuvāha jíin táca yúu luu jíin táca jéē ní casocō ñayuu. Yūcuán na te ni cahān yā:

<sup>6</sup> Ndíhi jeē cájito ró yáha, quee quiví jeē ma cóso jnāhan ga ní ñn yuū, chí ndíhi jnanū, achí yá.

*Na seña coo nuū cuácuyajni ndíhi ñayiví*

*(Mt. 24.3-28; Mr. 13.3-23)*

<sup>7</sup> Te ni cacajñuhún de ya:

Maestro, ¿ndé quiví coo tāca jéē ní cachi ní jéē coo? ¿Te na seña coo nuū cuácuyajni squícu tāca jéē ni cáhān ní? áchí de.

<sup>8</sup> Te ni cahān yā:

Coto ró jéē ma stahú i róhó. Chi quijicoo cuehē tēe jeē stahú jíin síhví rí, te cahān de: Máá rí cúu Cristo. Te suni cahān de: Je ni quee quiví ndihí ñayiví, achí de. Te ma cóndiquín rō de.

<sup>9</sup> Te núu nihin rō jñuhun jeē tāca lado iyó guerra te cándonda ñayuu siquí tohō, te ma yūhu ró, chí cánuú jéē xíhna gā coo súcuan, te ni ma jinú yachí quiví ndihí ñayiví. Achí yá.

<sup>10</sup> Te ni cahān gā yā:

Ndonda nación siquí inga nación, te ndonda ñuu siquí inga ñuu jeē cuañahan.

<sup>11</sup> Te cháha chúcuan jñāa téyí, te coo jnamā jíin cuéhyi xeēn. Te coo seña jéhnuchi ándiví jéē yūhú ndasí ñayuu coto í.

<sup>12</sup> Te nde ná tu coo tācá jñiñu yáha, te coto xeēn i róhó, te jñi i róhó. Te quindecia i sava ró tāca vehe íi sinagoga jeē cahán i cuéchi siquí rō. Te chune i sava ró vecāa. Te quindecia i sava ró núu tāca rey jíin núu tācá gobernador, te cahān i cuéchi siquí rō jeē siquí jeē cácan dije ró rúhū.

<sup>13</sup> Te jeē súcuan coo, te cuitē núu ga jñuhun rí, chí nacani ndaā rō nuū de jíjñahan de.

<sup>14</sup> Núu súcuan te cundaā ni rō jeē ma nácani ni rō xíhna gā ndese stío cuiñí rō nuū de te cācu rō.

<sup>15</sup> Chí ruhū cuāha ri jñuhun ndíchí cahān rō, návāha ñayuu jeē cájito uhú rohó, ma cúndeyí i jíin ró ni ma cúu cahān i siquí rō.

<sup>16</sup> Te nde tatá rō, naná rō, ñani rō, jñahan ró, jíin amigo rō, nastúu i róhó núu ñayuu xeēn. Te cahni i sava ró.

<sup>17</sup> Te tāca ñayuu chí quití ni i nuū rō jeē siquí ruhū.

<sup>18</sup> Te ni ñi xini rō jíjñahan ró ma náa, chí coto ya rohó.

<sup>19</sup> Te núu cuiñi nihin ró jíin jñuhun rí, te cotecu rō ní cáni.

<sup>20</sup> Te núu ni cajito ró jéē ní cajicó ndúu soldado ñuu Jerusalén, te na jécuhun ni rō jeē jé yajni naa ñuu ún.

<sup>21</sup> Yūcuán na te ñayuu cáyūcú región Judea, na cunu i caa i yucu quingoo i. Te ñayuu cáyūcú Jerusalén, na quéndacoo i quingoo i. Te ñayuu cáhīn nde rancho, ma nándicó i ñuu ún.

<sup>22</sup> Chí tāca quiví un cuāha Yaā Dios castigo nuū ñayuu jeē siquí cuéchi i, návāha squícu tāca jñuhun jeē yosó núu tútu.

<sup>23</sup> Te quiví ún nacā jeē ndahú ñahan cáñuhun sēhe jíin ñahan cándeca yiquín, chí ma cúnihin ña cunu yachí ña. Chí yōhyo xeēn coo jñūndóho ini ñayiví, te quiji castigo xeēn siquí ñayuu yáha.

<sup>24</sup> Te sava i cuu nuū guerra, te sava i quingoo preso nde tācá inga nación. Te ñayuu tāca gá nación ndacu nihin i jñiñu nuū ñayuu ñuu Jerusalén, nde jinu tiempo jeē jéhe Yaā Dios jñuhun ndacu i jñiñu.

*Ndese coo quiví ndiji Yaā ní nduu tēe*

*(Mt. 24.29-35, 42-44; Mr. 13.24-37)*

<sup>25</sup> Yūcuán na te coo seña nuū níandii jíin núu yóó jíin núu quími. Te ini ñayiví te quiji jñūndóho xeēn siquí ñayuu tācá nación. Te cunéé ni i, te yūhú i jeē nihin xeēn mar te ndóna xeēn ndute mar vēji nuū ñuhun.

26 Te cuu sōo sava ñayuu jeē cáyūhú i cándetu i tāca jnúndóho quiji siquĩ ñayiví. Te tāca jéē ín andiví chi quisi i.

27 Yūcuán na te coto ñayuu nuū maá rí, Yaá ní nduu tēe, ndiji ri jíin vícō, te condiso ri cuehē poder, te yōhyo luu cuyéhnu ri.

28 Te núu ni quejéé táca jniñu yáha, te ndeyí coo ni rō, te cocunuū rō andiví, chi je yajni jnama ya rohó. Achí yá jíin de jíjnáhan de.

29 Te suni ni cáhān yā jnūhun yátá yáha:

Condēhe jíjnáhan ró ndese sáha nundēhe higo jíin táca gá yujnu.

30 Núu cájito ró jéē ní quejéé náne numa yújnu ún, te cájini rō jeē jé yajni coo tiempo jihní.

31 Te suni súcuan núu ni cajito ró jéē ní quejéé cúu tācá jniñu jeē ni cáhān rí, yūcuán na te na jécūhun ni rō jeē ní cuyajni quiví ndacu Yaá Dios jniñu ini ñayiví.

32 Jendaá cahán rí jíin ró jeē ma cúu ndihi ñayuu tiempo un, chi nde squícu ndihi jniñu ún.

33 Andiví jíin ñayiví chi naa, te tāca jnūhun cáhān rí chi ma náá, chi ndihi squícu.

34 Te coto ma stívi ró maá ró jijnáhan ró jéē sáha ró táca cuéchi, jíin jéē najíni ró, jíin jéē cunjéñu ró jíin táca ndajniñu cotec rō, návaha tú sanaa ni rō te quee quiví un síquĩ rō.

35 Chi nájnūhun jeē núu ñn trampa, súcuan quee jnúndóho siquĩ ñayuu cáyūcu ní cáhnu ñayiví.

36 Núu súcuan te ndito coo ni rō, te níni cácan tahu rō, návaha cuu cācu ró núu tāca jnúndóho jeē quiji ún, te cuu cuiñi ró núu ruhū, Yaá ní nduu tēe. Achí yá.

37 Te ndiquiví steén yā jnūhun ini templo, te ndijnahan jecuáá jéndōo ya nde yucu jeē naní Olivos.

38 Te tāca jénéhen quécōo ñayuu nuū yā ini templo jeē cúni sōho i jnūhun steén yā.

*Jeē ní casquijnáhan de jnūhun jni de Jesús*

*(Mt. 26.1-5, 14-16; Mr. 14.1-2, 10-11; Jn. 11.45-53)*

## 22

1 Yūcuán na te ni cuyajni vico pascua jeē cáyeji ñayuu hebreo pan jeē tú na levadura yñi.

2 Te sutú cácujeñnu jíin tée cástéén tutu ley, ni canducú yuhu de modo cahni de Jesús, chi cáyūhú de jeē quití ni ñayuu.

3 Te ni quiví Satanás ini anuá Judas jeē nastúu de ya. Te suni nání de Iscariote, te cúu de ñn jnáhan jeē ndihúxí uū tēe apóstol.

4 Te ni jehēn de ni candajnūhún de jíin táca sūtú cácujeñnu jíin tée cándiso jniñu ini templo, núu ndese nastúu de ya nuū tée un jíjnáhan.

5 Te tēe un ní cacusiñi de, te ni cajejnūhun de jeē cuáha de xūhun núu Judas.

6 Te ni jetáhú Judas, te ni nducú de modo ndese nastúu yuhu de ya hora jeē tú na ñayuu iyó.

*Jeē ní jequín yā Cena yā*

*(Mt. 26.17-29; Mr. 14.12-25; Jn. 13.21-30; 1 Co. 11.23-26)*

7 Te ni quee maá quiví víco jeē cáyeji ñayuu pan jeē tú na levadura yñi, te suni quiví un cájehni i londe nájnūhun ni ndacu Yaá Dios jniñu jeē sáha i vico pascua un.

8 Te Jesús ni tají yá Pedro jíin Juan quingoo de, te áchí yá jíin de:  
Cuángoo te sátũhva ró jéē cuxíni yó vico pascua, achí yá.

9 Te ni cacajñũhún de ya:

¿Ndé nuũ cuní ni jéē quísátũhva ná? áchí de.

10 Te ni cahān yā jíin de:

Cuángoo ñuu yũcuán, te núu ni quẽvicoo ró te najnáhan ró jíin ñin tēe ndíso quiyi ndute. Te condiquĩn rō de quihĩn rō jíin de nde vehe nuũ ndĩvi de.

11 Te cahān rō jíin tēe chíi vehe ún: Achí máa Maestro: ¿Ndé ñin cúu cuarto vehe ní cuāha núu ní núu cuxíni ya vico pascua jíin tēe cáscuáha jíin yá, achi rō.

12 Yũcuán na te stéén de ñin cuarto cáhnu nde xinĩ véhe jeē je íyó túhva, te yũcuan sátũhva ró jéē cuxíni yó, áchí yá.

13 Te cuangoo de, te ni canihĩn de nájñũhun ni cahān yā. Te ni casátũhva de jeē cuxíni ya vico pascua.

14 Yũcuán na te ni jinũ hora jeē cuxíni, te ni quee Jesús, te ni cucōo ya mesa jíin tēe cácuu apóstol.

15 Te ni cahān yā jíin de:

Yōhoyo ni cuu ni rĩ cuxíni ri jíin ró jijnáhan ró vico pascua yáha, vijna nde ná tu cuu rĩ.

16 Chí cáhán ri jíin ró jeē ma cáji cuiti gā rĩ vico pascua, chi nde quiji quivĩ ndacu Yaā Dios jniñũ ní ñayĩví, te sáa te caji tucu ri, achí yá.

17 Te ni quihin ya ñin copa ndũxi uva, te ni nacuatáhú yá, te ni cahān yā:

Quihin copa yáha, te coho ró jíin jnáhan ró.

18 Chí cáhán ri jíin ró jeē ndé vijna te ma cóho ga rĩ ndũxi uva, chi nde quiji quivĩ ndacu Yaā Dios jniñũ ní ñayĩví, te sáa te coho tucu ri. Achí yá.

19 Te ni quihin ya pan, te ni nacuatáhú yá, te ni tahú cuéchi yá, te ni jēhe ya nuũ de jíináhan de. Te ni cahān yā:

Yáha cúu yiqui cúũu rĩ jeē socō rĩ jeē chunaa rĩ cuéchi ró jíináhan ró. Te níni caji rō súcuan jeē cáñuhun ni rō ruhũ jeē ni jíihĩ rĩ jehē rō. Achí yá.

20 Te suni súcuan ni sáha ya jíin copa ndũxi uva, ná ni cuu ni cuxíni ya. Te ni cahān yā jíin de:

Yáha cúu niñĩ rĩ jeē cuáha ri jeē cúu contrato jeē, te cati jeē ndundoo cuéchi ró jíináhan ró.

21 Te vijna chí tēe nastúu ruhũ, néne de jíin rí nuũ mesa yáha.

22 Chí ruhũ, Yaā ní nduu tēe, jendaá cúu jeē quihĩn rĩ cuu rĩ nájñũhun je ni sándaā Yaā Dios jeē súcuan coo. Te nacā xeēn ndoho tēe jeē nastúu ruhũ, achí yá.

23 Yũcuán na te ni caquejéé de cácajnũhun jnáhan de ndé ñin de cúu jeē nastúu de ya.

### *Jeē ní cacahān de siquĩ ndé ñin de cújéhnu ga*

24 Yũcuán na te yōhoyo ni cacahān de siquĩ ndé ñin de cújéhnu ga nuũ jnáhan de.

25 Te ni cahān Jesús jíin de:

Rey táca nación chí cándacu ñihin de jniñũ nuũ ñayuu cájni de, te cácahān i jeē tēe cásaáha váha cúu jeē cácujeñnu nuũ i.

26 Te róhó jíináhan ró, ma cóo ró súcuan. Chí núu ndé ñin ró cújéhnu ga, te sa nasáha lulí ró maá ró. Te núu ndé ñin ró ndácu jniñũ, te sa nasáha ró máá ró tēe jéjníñũ nuũ jnáhan.



27 ¿Te ndé ñn cúu jeē cujéhu ga, á téé yéji nuū mesa, chí téé jéni cohō? ¿A násūu téé jeē yéji nuū mesa cúu jeē cujéhu ga? Te ruhū nasūu súcuan cúu rí, chí ní nasáha rí maá rí nájñuhun tēe jéjníñu nuū rō, chí vēji rí sáha rí jeē niñín tahu rō.

28 Te maá rō cácuu tēe jeē niní cáññin jín rí táca quíñvī jeē ndóho rí jññndóho.

29 Núu súcuan te nájñuhun ní sáha Tátá rí jeē ndácu rí jñññu, suni súcuan sáha rí jeē ndacu rō jñññu jínñáhan rō.

30 Te caji rō coho rō jín rí ini ñuu nuū ndacu rí jñññu. Te cucōo rō ñn ñn mesa jeē sándaá rō jñññu ndihúxí uū yucūn Israel. Achí yá.

*Jeē ní cachi yā jeē yūhu Pedro cahān de jeē jini de ya  
(Mt. 26.31-35; Mr. 14.27-31; Jn. 13.36-38)*

31 Te suni ní cahān maá Jítoho yō jín Simón Pedro:

Simón, cuni sōho rō, chí ní jicān Satanás rohó jínñáhan rō jéē coto ndee rohó nájñuhun jeē síjin trigo, te stúu ndé ñn rō cácuu nájñuhun paja jeē nayūhu rō, te ndé ñn rō cácuu nájñuhun trigo jeē candíje niñin rō.

32 Te ní jicān tahu rí jehē rō návāha ma náyūhu rō jeē ma cándíje ga rō. Te jeē nácandíje tucu rō, te sáha rō jéē íje táca jñáhan rō jín jñuhun rí. Achí yá.

33 Te ní cahān de jín yá:

Je íyó túhva ná quññin na jín ní vecāa te vēsú na cuu na jín ní, achí de.

34 Te ní cahān yā:

Pedro, cáhán rí jín rō jeē nde ná tu cana líhli vijna, te yūhu rō jeē jñññ ñayuu rohó, te uní jínu cahān rō jeē tu jíní rō ruhū, achí yá.

*Jeē ní cuyajni coto ya jññndóho*

35 Yūcuán na te ní cajñuhun yá de jínñáhan de:

Ná ní tají rí rohó ní jengoo rō jéē tu ní cōndiso rō ñunu ní yijni xūhún ní ndijēn, ¿te á ní íyo ñn jeē ní cumaní nuū rō? Achí yá.

Te ní cacahān de:

Tú ní ñn ní cúmaní.

36 Te ní cahān yā:

Nde vijna sa cáhán rí jeē cōndiso rō ñunu rō, te suni yijni xūhún. Te tēe jeē tu névāha espada jeē coto de maá de, na xíco de ticáchí de te na cuáan de.

37 Chí cáhán rí jín rō jeē quee quíñvī ndoho yó jññndóho, chí cánuú squícu jñuhun yáha jéē cahán nuū tútu siquí rí: Sáha ñayuu jín yá nájñuhun cása ha i jín téé sáha cuēchi xeēn, áchí tutu. Chí táca jñuhun un jéē yosó cáhán siquí rí, chí squícu nahín, áchí yá.

38 Yūcuán na te ní cacahān de:

Yáha íyó úu espada, achí de.

Te ní cahān yā jín de:

Jín jéē yáha-ni, áchí yá.

*Jeē ní jicān tahu yā nuū huerto Getsemani  
(Mt. 26.36-46; Mr. 14.32-42)*

39 Te ní quenda ya cuahān yā yucu Olivos nájñuhun sáha sáha ya. Te tēe cáscuáha jín yá ní candiquín de ya cuango de jín yá.

40 Te nuū ní jínū yā yūcuán, te ní cahān yā jín de:

Cacān tahu rō jijnáhan rō jéē chindéé ñáhán yá rohó jéē ma sáha rō cuéchi núu coto ndee jeneé rohó, achí yá.

41 Te ní jica ya jecu, cūhva jeē jicá jínú yūu jeē squíñ. Te ní jecuiñí yití yá, te suhva ní jicān tahu yā:

42 Tātā, núu cúní ni te tejiyo ní jnündóho yáha jéé ma quijí siquī ná. Te nasūu jéé cuní maá ná, chi jeé cuní maá ní na cóo, áchí yá.

43 Te ni cane iin ndajéhé andiví núu yā, te ni jēhe fuerza nuū yā.

44 Te cúcuíhyá ndasí ní yā jeé quijí jnündóho siquī yā, te ni nducú ndéyí gá yā ni jicān tahú yā. Te ni cane jnañū yā, te too nuū ñúhun nájñūhun yúyú náhnu ñíñi.

45 Te ná ni ndocuiñí yā jeé ni jícān tahú yā, te ni ndee yā nuū téé cáscuáha jíin yá. Te ni jito ya jeé cáquixí de, chi tuá cáhiyo ndeyí ni de cacān tahú de jeé cácuíhyá ndasí ní de.

46 Te ni cahān yā jíin de:

¿Naun cáquixí rō? Ndonga te cacān tahú rō jeé chindéé ñáhán yá rohó jéé ma sáha ró cuéchi jeé cóto ndee jeneé rōhó. Achí yá.

### *Jeé ní cajñi de Jesús*

(Mt. 26.47-56; Mr. 14.43-50; Jn. 18.2-11)

47 Te sá cáhán gā yā súcuan, te ni quecoo cuehē ñayuu. Te tēe nání Judas, iin jnāhan jeé uxí uū tēe scuáha jíin yá, yósnúu de nuū ñayuu un véji de. Te ni quee de nde nuū Jesús, te ni techúhú de ya, te súcuan ni nastúu de ya.

48 Te ni cahān Jesús jíin de:

Judas, ¿á jíin jéé téchūhu ró ruhū cúu jeé nastúu ró ruhū, Yaā ní nduu tēe? Achí yá.

49 Te tēe cáhíin jíin yá, ni cajito de jeé ní quejéé cúu, te ni cacajñūhún de ya: ¿A ndonga ná jíjnāhan ná siquī de jíin espada? áchí de.

50 Te iin de ni stují de mozo sutū cujéhnu ga, chi ni jehnde de sōho lado váha.

51 Te ni cahān Jesús:

Siáá, na jécuiñí, achí yá.

Te ni tee ya ndaha ya sōho mozo un, te ni nasávāha ya de.

52 Te ni cahān yā jíin sutū cácujeñnu jíin téé cándiso jniñu ini templo jíin táca téé jéhnu jeé ní quecoo de jeé jñi de ya:

¿Te va tēe cuihná cúu ri jeé véjicoo ró jíin espada jíin yujnu jeé jñi ró ruhū jeé súcuan?

53 Táca quiñí ni ine ri jíin ró jíjnāhan ró ini templo cáhnu, te tu ní cajñi ró ruhū. Te vijna te ni quee hora jeé jñi ró ruhū jíin jéé sáha ró táca jniñu jeé ndácu jeneé jéé ndeé núu néé. Achí yá.

### *Jeé ní cachi Pedro jeé tu jíni de ya*

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

54 Te ni cajñi de ya cuango de jíin yá vehe sutū cujéhnu ga. Te Pedro chi jicá-ni ndíquín de ya.

55 Te táca policía ni cascáyú de ñuhūn ini patio, te ni condúu de yuñúhún un cáyucú de. Te suni ni cucōo Pedro jíin de.

56 Te iin ñahan jéjñiñu ini vehe un, ní jito ña nuū de jeé néne de yuñúhún. Te ni jito váha ña nuū de, te ni cahān ña:

Tēe yáha suni ni jica de jíin téé ún, áchí ña.

57 Te máá de tu ní cáchi de, chi ni cahān de:

Tu jíni rí tēe ún, áchí de.

58 Te ni cunúu jecu gā, te ni jito tucu inga ñayuu nuū Pedro, te ni cahān:

Róhó, suni jnāhan táca téé un cúu ró, áchí.

Te ni cahān Pedro:

Nasūu cúu ri, hombre, achí de.

59 Te ni cuu nájñūhun iin hora gā, te ni cahān ñihin inga de:

Jendaá ndije jeē tée yáha ní jica de jíin tée ún, chi suni tēe región Galilea cúu de, áchí de.

<sup>60</sup> Te ní cahān Pedro:

Hombre, tu jíiní rī na jnūhun cáhān rō.

Te sá súcuan cáhān gā de, te ní cana-ní líhli.

<sup>61</sup> Yūcuán na te ní ndió cóto máá Jítóho yō, te ní jito ya nuū Pedro. Te ní nucūhun ní de jnūhun ní cahān yā jíin de: Nde ná tu cana líhli, te yūhu ró te cahān rō unī jinu jeē tu jíiní rō ruhū.

<sup>62</sup> Te ní quenda de cuahān de, te yōhyo ní ndahyū de jeē ní cachi de jeē tu jíiní de ya.

*Jeē ní casácatā de nuū yā*

*(Mt. 26.67-68; Mr. 14.65)*

<sup>63</sup> Te táca tēe cándito Jesús, ní casácatā de nuū yā, te ní cacani de ya.

<sup>64</sup> Te ní cajesi de sahma nuū yā, te ní cacani de nuū yā, te ní cacahān de: Cachi ndé ĩn cúu jeē ní caní rōhó, áchí de.

<sup>65</sup> Te cuehē gā jnūhun súcuan ní cacahān neé de jíin yá.

*Jeē ní indichi Jesús nuū junta tēe cácujeñhu ga*

*(Mt. 26.59-66; Mr. 14.55-64; Jn. 18.19-24)*

<sup>66</sup> Te jeē ní cundijin, te ní candutútú táca tēe jéñnu cándacu jniñu nuū ñayuu hebreo, jíin sūtú cácujeñhu, jíin tēe cástéén tutu ley Yaā Dios. Te cuango de jíin yá nuū junta tēe cácujeñhu ga, te yūcuan ní cacajñuhún de ya:

<sup>67</sup> Cachi, ¿á máá ró cúu Cristo jeē ní tají Yaā Dios? Achí de.

Te ní cahān yā jíin de:

Vēsú na cáhān rī jeē suu rí cúu, te ní ma candije cuiti rō.

<sup>68</sup> Te suni núu cajñuhún máá rí rohó jíjnāhan ró, te suni ma stió cuñí rō nuū rī, ní ma siaá rō ruhū.

<sup>69</sup> Te ruhū, Yaā ní nduu tēe, táca quívi jeē quíji conene rí lado váha máá Yaā iyó poder, achí yá.

<sup>70</sup> Yūcuán na te ndiñi de ní cacajñuhún de ya:

¿A máá ró cúu Sēhe Yaā Dios núu súcuan?

Te ní cahān yā jíin de:

Suu rí cúu, nájñuhún cácahān rō, achí yá.

<sup>71</sup> Yūcuán na te ní cacahān de:

¿Na testigo gā jíni ñuhún yó núu súcuan? Chi ní cajini sōho yó jíin yuhu máá de jeē cahān ndevāha de jeē cúu de Sēhe Yaā Dios. Achí de jíjnāhan de.

*Jeē ní indichi Jesús nuū Pilato*

*(Mt. 27.1-2, 11-14; Mr. 15.1-5; Jn. 18.28-38)*

## 23

<sup>1</sup> Yūcuán na te ní candocuñí ndiñi de, te cuango de jíin yá nuū Pilato.

<sup>2</sup> Te yūcuan ní caquejéé de cácahān de cuēchi siquī yá:

Ní canihñ na tēe yáha jēe stóna de ñayuu siquī tohō. Te cáhān de jeē tú váha jeē cuāha ná xūhun renta nuū rey nación Roma jeē ndácu jniñu nuū nación na. Te suni cáhān de jeē maá de cúu Cristo, Rey jeē ní tají Yaā Dios. Achí de jíjnāhan de.

<sup>3</sup> Yūcuán na te Pilato ní cajñuhún de ya:

¿A máá ró cúu Rey ñayuu hebreo?

Te ní cahān yā:

Suu rí cúu, nájñuhún cáhān rō, achí yá.

4 Te ni cahān Pilato jín sūtū cácujuhnu jín ñayuu cuehē ún:

Tú ni ñn jnūhun stívi cáhán tēe yáha jēē nihín rī cuēchi siquī de, áchí de.

5 Te máá de víhyá gā ni cacahān de:

Tēe yáha stóna ndasí de ñayuu siquī tohō jín jnūhun stéén de ní Judea. Chi ni quejéé de stéén de nde Galilea, te vijna te nde yáha, áchí de.

### *Jeē ní indichi Jesús nuū Herodes*

6 Te nuū ní jini sóho Pilato jeē Galilea cácahān, te ni cajnūhún de ñayuu núu tēe región Galilea cúu ya.

7 Te nuū ní cacahān ñayuu jeē cúu ya tēe Galilea, te ni ndacu de jniñu jeē na quíngoo de jín yá nuū Herodes, tēe cúu gobernador Galilea. Chi quiví ún suni íne Herodes ñuu Jerusalén.

8 Te nuū ní jito de nuū Jesús, te yōhoyo ni cusī ni de, chi je ni cuu cuehē tiempo jeē cuní de coto de nuū yā. Chi ni nihín de jnūhun ya, te ñūhun ni de jeē sáha ya ñn jniñu jéhu coto de.

9 Te ni cajnūhún de ya cuehē jnūhun, te tu ní stío cuñí yā ni ñn jnūhun nuū de.

10 Te suni cáhīn táca sūtū cácujuhnu jín tēe cástéén tutu ley, te ñhīn ni cacahān de cuēchi siquī yā.

11 Yūcuán na te Herodes jín táca soldado de ni cacahān neé de jín yá, te ni casacatā de nuū yā, chi ni cachuhun de ya sahma váha luu jeē cúu sahma rey. Te Herodes ni ndacu de jniñu jeē na quíndeca de ya nuū Pilato.

12 Te máá quiví un ní candumanī jnáhan Pilato jín Herodes, chi ichi yátá ni caquiti jnáhan ni de.

### *Jeē ní cundaā jeē cúu yā*

*(Mt. 27.15-26; Mr. 15.6-15; Jn. 18.39-19.16)*

13 Yūcuán na te ni cana Pilato táca sūtū cácujuhnu jín táca tēe cándiso jniñu jín táca gá ñayuu, ni candutútú.

14 Te ni cahān de:

Ni caquindeca ró tēe yáha núu rī, jeē cácahān rō jeē stóna de ñayuu siquī tohō. Te je ni stichí rī de, ni cajito jínúu rō. Te tu ní nihín rī ni ñn cuēchi siquī de nájnūhun jeē cácahān rō.

15 Te ni Herodes, tu ní nihín de, chi ni natají tucu de tēe yáha núu rī. Te tú cuiti ni ñn cuēchi ní sáha de jeē cúu de.

16 Núu súcuan te na cuáha ri castigo de, te siáá rī de quihīn de, áchí Pilato.

17 Te iyó costumbre jeē táca vico pascua siaá Pilato ñn preso jeē cuní ñayuu.

18 Te ñayuu cuehē ún, inuú-ni ni cacana jee i:

Na cúu tēe jíñá, te siáá ní Barrabás, áchí i.

19 Te Barrabás íne de vecāa siquī jeē ni stóna de ñayuu siquī tohō ini ñuu ún, te ni jehni de ndīyí.

20 Te Pilato cuní de siáá de Jesús, te ni cahān tucu de jín ñayuu.

21 Te máá i víhyá gā ni cacana jee i:

Cata caa ní de jicā cruz, na cúu de, áchí i.

22 Te ni cahān tucu de jín i vuelta uní:

¿Na cuēchi ni sáha de núu súcuan? Tu ní nihín cuiti rī ni ñn cuēchi siquī de jeē cúu de. Núu súcuan te na cuáha ri castigo de, te siáá rī de quihīn de, áchí Pilato.

<sup>23</sup> Te víhyá gā ni cacana jee ñayuu un, ní cacahān nīhin i jeē na cúu yā jicā cruz. Te máá i jíin táca sūtū cácujeñnu, ni cacana jee ndasí i. Te ni cacundeyí i ni cascáhān i Pilato jeē na cúu yā.

<sup>24</sup> Yūcuán na te ni ndacu Pilato jniñu jeē na cóo nájnūhun cáconi i.

<sup>25</sup> Te ni siaá de tēe jeē ní cajicān i, tēe jeē íne vecāa jeē ni stóna de ñayuu siquī tohó te ni jehni de ndiyi. Te ni jēhe de jnūhun jeē na cúu Jesús nájnūhun cáconi i.

*Jeē ní cacata caa de ya jicā cruz  
(Mt. 27.32-44; Mr. 15.21-32; Jn. 19.17-27)*

<sup>26</sup> Te cuangoo táca soldado jíin yá jeē cahni de ya jicā cruz. Te ni canihīn de ñin tēe ñuu Cirene, nání de Simón, vendiji de jeē ni jéhēn de rancho. Te ni catejniñu de tēe un jéē cóndiso de cruz yā quihīn de yatā yā.

<sup>27</sup> Te cuehē ndasí ñayuu ndíquín i yatā yā cuangoo i. Te suni cuehē ñahan cuangoo ña, te cándahyū cohó ña jeē cácuulhyá ni ña jehē yā.

<sup>28</sup> Te ni ndió cóto Jesús nuū ña, te ni cahān yā:

Róhó ñahan Jerusalén jijnáhan ró, ma ndahyú rō jehē rī, chi sa suhva ndahyū rō jehē máá ró jíin jéhē sēhe ró jijnáhan i.

<sup>29</sup> Chi quee quivī jeē coo jnūndóho xeēn siquī rō, te cahān rō: Yōhyo ndetū táca ñahan númá, jíin jéē tu ní scácu sēhe, jíin jéē tu ní cóndeca yiquín, chi tú sēhe ña jeē jnahuhū ni ña jeē ndóho i, achi rō jijnáhan ró.

<sup>30</sup> Quivī ún te quejéé ñayuu cahān i jíin táca yucu: Cotú siquī rī jijnáhan ri návaha cuu rī. Te suni jíin táca loma: Casi siquī rī jijnáhan ri, achi i.

<sup>31</sup> Chi núu casáha xeēn i jíin rúhū jeē tú na cuēchi ri, te nagā ni cuu jeē ma cóo xeēn siquī ndihi ñayuu chi íyó cuēchi i. Achí yá.

<sup>32</sup> Te suni cuangoo de jíin úu tēe ni casáha cuēchi xeēn, jeē suni cuu de jíin yá.

<sup>33</sup> Te ni jinūcoo de lugar nuū naní Yiquí Xíní, te yūcuan ní cacata caa de ya jicā cruz. Te suni ni cacata caa de ndindúú tēe ni casáha cuēchi xeēn un núu uū gā cruz, ñin de lado váha ya, te inga de lado jecó yá.

<sup>34</sup> Te níni jéē súcuan cúu, te ni cahān Jesús:

Tátā, cone cáhnu ni ni núu de jijnáhan de, chi tu cájini de na vé casáha de, áchí yá.

Te soldado un ní casáha de sorteo jeē siquí ndese nihīn ñin ñin de sahma ya.

<sup>35</sup> Te cáhīn ñayuu yūcuan, cájito i nuū yā. Te suni nde tēe cándiso jniñu, cácahān catá de cájito de ya:

Núu inga ñayuu ni jnama de, te na jnáma de máá de vijna, te núu ndaā jeē Cristo jeē ní nacāji Yaā Dios cúu de, áchí.

<sup>36</sup> Te táca soldado suni ni casácatá de nuū yā, chi ni quecoo de nde nuū yā, te ni cajēhe de vinagre iyá coho ya.

<sup>37</sup> Te cácahān de jíin yá:

Núu máá ró cúu Rey ñayuu hebreo, te na jnáma ró máá ró, achí de.

<sup>38</sup> Te suni ni Iyo jnūhun jeē ndeé xiní cruz yā jeē cahán na siquī ni jíihí yā, te suhva yósó jíin yuhu griego jíin latín jíin hebreo: Yāha cúu Rey ñayuu hebreo, achí.

<sup>39</sup> Te ñin jeē ndindúú tēe ni casáha cuēchi xeēn, jeē cándita caa, ni cahān neé de nuū yā:

Núu máá ró cúu Cristo, te na jnáma ró máá ró te suni jnama ró ndindúú rí, achí de.

<sup>40</sup> Te inga de ni cahān de nuū jnáhan de:

¿A tu yúh ró Yaā Dios naún? Chi inuú cándoho yó jíin Yaā yáha.

<sup>41</sup> Te máá yó chi vetū-ni cándoho yó, chi yāha cánihīn yō castigo siquī jniñu néé ní casáha yó. Te Yaā yáha chi tú ni ñin cuēchi ní sáha ya, achí de.

<sup>42</sup> Te ni cahān de jíin yá:

Jesús, nucūhun ní ni sáña jéē quejéé ní ndacu ní jniñu, áchí de.

<sup>43</sup> Yūcuán na te ni cahān Jesús jíin de:

Jendaá cahān rī jíin ró jeē vjna te condee rō jíin rí nuū jardín andiví, áchí yá.

### *Jeē ní jihī Jesús*

(Mt. 27.45-56; Mr. 15.33-41; Jn. 19.28-30)

<sup>44</sup> Te nuū ní cuu nájnūhun cahuxī uū, te ni cunee ní cáhnu nde cahunī.

<sup>45</sup> Te ni cujnúú niāndii. Te sahma ndíta caa jeē ndihyú cuarto ñi ini templo cáhnu, ni ndatā-ni sava sava.

<sup>46</sup> Yūcuán na te ni cana jee Jesús:

Tátā, naquihīn ní ánuá na, áchí yá.

Te súcuan ni cahān yā, te ni jihī-ni ya.

<sup>47</sup> Te tēe nación Roma jeē cúu capitán ni jito de jeē súcuan ni cuu, te ni cahān de jeē yóhyo cújéhnu Yaā Dios, te áchí de:

Jendaá ndije jeē tēe tú na cuēchi cúu tēe yáha, áchí de.

<sup>48</sup> Te ndivii ñayuu cáhiin yūcuan ní cajito i tāca jéē ní cuu, te cácani i yīqui jicā i jeē cájnahunū ní i, te ni nandió cóo i cuanungoo i.

<sup>49</sup> Te tāca ñáyuu cájini jnāhan jíin yá, jíin tāca ñahan Galilea jeē ní cajica ña jíin yá, cáhiin jicā ña cájito ña tāca jéē ní cuu.

### *Jeē ní quindūji Jesús*

(Mt. 27.57-61; Mr. 15.42-47; Jn. 19.38-42)

<sup>50</sup> Te ni ñyo ñin tēe vāha tēe ndaā, nání de José. Te tēe ñuu Arimatea ndañúū Judea cúu de. Te cúu de jnāhan tāca tēe hebreo cácujeñnu ga jeē casáha junta.

<sup>51</sup> Te ñúhun ni de jeē quiji quivī jeē ndacu Yaā Dios jniñu, te suni tu ní nujnahan ni de jeē ní casándaā junta un jéē cúu Jesús.

<sup>52</sup> Te tēe un ní jehēn de nuū Pilato, ni jicān de yīqui cúñu Jesús.

<sup>53</sup> Te ni snúu de ya jicā cruz, te ni chusúcún de ya ñin sahma cuitá. Te ni chindūji de ya ini ñin yaū jeē ní caan jicā ñin cava, nuū ná tu quindūji ndīyi.

<sup>54</sup> Te quivī un cúu quivī casátūhva ñayuu, chi jehíni un quejéé quivī ndétātú.

<sup>55</sup> Te ñahan ní quijicoo jíin yá nde Galilea, ni jengoo ña jíin José, te ni cajito vāha ña yaū ún, jíin ndese ni cachindūji de ya.

<sup>56</sup> Te cuanungoo ña vehe ña, te ni casátūhva ña tācá perfume jíin aceite yucū jeén asñ. Te ni candetātú ña quivī ndétātú, nájnūhun ndácu ley Yaā Dios jniñu.

### *Jeē ní natecu Jesús*

(Mt. 28.1-10; Mr. 16.1-8; Jn. 20.1-10)

## 24

<sup>1</sup> Te jenéhen ndasí quivī domingo, te ni jinūcoo tucu ñahan un núu ní yindūji Jesús, te cándahā ña tācá perfume jíin aceite ni casátūhva ña. Te suni cuangoo sava ga ñahan jíin ña.

<sup>2</sup> Te nuū ní jinūcoo ña, te ni cajito ña jeē ní cujiyo yuū ndihyú yuyáú ndīyi.

<sup>3</sup> Te ni quivicoo ña yaū ún, te tuá yīqui cúñu Jitoho yō Jesús ní cájito ña.

<sup>4</sup> Te ni cacunéé ni ña cájito ña jeē tuá ndīyi. Sáa te ni cajito ña uū ndajéhe Yaā Dios jeē cáa nájnūhun tēe, cáhiin ya xiin ña, te cáñūhun ya sahma ndíndéé.

5 Te yōhoyo ni cayūhú ña, te ni cajexin ña nuū ña nde nuū ñúhun. Te ni cacahān ndajéhé un jíin ña:

¿Naun sa nuū cáyindūji ndīyi cánanducú ró Yaā técu?

6 Tuá yā yāhá, chí je ni natecu yā. Te nucūhun ni rō ndese ni cahān yā jíin ró ná íne ga yā región Galilea.

7 Chí ni cachi ya jeē maá yá, Yaā ní nduu tēe, cánuú natūu ya nuū tāca tée cáhīyo cuēchi, jeē jni de ya cahni de ya jicā cruz, te nuū uní quivī te natecu yā. Achí ndajéhé un.

8 Yūcuán na te ni canucūhun ni ña tāca jnúhun ni cahān Jesús.

9 Te ni quendacoo ña nuū ní yindūji ya, te cuanungoo ña. Te ni canacani ña tāca jnúhun yáha núu ndihúxí ñn apóstol jíin núu tāca gá de.

10 Te ñahan ní canacani jnúhun yáha núu tée cácuu apóstol, cúu ña María ñuu Magdala, jíin Juana, jíin María naná Jacobo, jíin sava ga ña.

11 Te tācá apóstol chí cájeni ni de jeē jnúhun cánéé cáñúú cácahān ña, te tu ní cácadje de.

12 Te vēsú súcuan, te Pedro ni quenda de, te jínu de cuacondéhé de nuū ní yindūji ya. Te ní jito nihni de ini yaū, te ní jito de jeē sahma cuitá un cáyūcu máá na. Te cuanuhun de vehe de, te nahān náa ní de jeē ní jito de jeē tuá yā.

### *Jeē ní ndajnúhun yá jíin úu de ichi cuáhán Emaús*

*(Mr. 16.12-13)*

13 Te suu quivī un cuángoo uū jnáhan de ñn ñuu naní Emaús, jeē jicá najnúhun uxí ñn kilómetro jíin ñuu Jerusalén.

14 Te cándajnúhún de siquī tācá jniñu jeē ní cuu ún.

15 Te níni cándajnúhún de te cácajnúhun jnáhan de, te máá Jesús ni cuyajni ya yatá de, te jíca ya cuahān yā jíin de.

16 Te ní sáha jíin de jeē tu ní cánacuni de ya, vēsú cájito de nuū yā.

17 Te ní cajnúhun yá de:

¿Na jnúhun cándajnúhun ró cájica ró? ¿Te najehē cácuuñhá ní rō? Achí yá.

18 Te ñn de jeē naní Cleofas ni cahān de jíin yá:

Ndihí cuiti ñayuu cájini i tācá jniñu ní cuu ini ñuu Jerusalén tāca quivī yáha. ¿Te á máñúhún-ni níhín cúu jeē ní quee ní ñuu un jéē tu jíni ní na vé ní cuu? Achí de.

19 Te ní cajnúhun yá de:

¿Te na vé ní cuu? Achí yá.

Te ni cacahān de jíin yá:

Jeē ní ndoho Jesús ñuu Nazaret, Yaā ní nacani jnúhun Yaā Dios. Te jíin poder Yaā Dios ní sáha ya tācá jniñu jéhu te ni nacani ya jnúhun, jíto jínuú Yaā Dios jíin tāca ñáyuu.

20 Te sutú cácujeñhu jíin tée cándiso jniñu nuū ná, ni canastúu de ya nuū tāca tée Roma, te tēe un ní casándaā de jeē cúu yā jicā cruz.

21 Te máá ná ní cañúhun ní na jéē maá yá jnama ya nación na Israel nuū ñáyuu Roma nuú. Te siquī tācá jniñu yáha, te ní cane inga jnúhun. Chí vijna je íyó úní quivī jeē ní cuu ún.

22 Te sava ñahan cájini jnáhan ná jíin, ni canacani ña ñn jnúhun jeē yóhoyo cánaa ní na sáha, chí cácahān ña jeē ní natecu yā. Chí jenéhen ndasí ní jengoo ña yaū ndīyi ún.

23 Te tuá ni cájito ña yiqui cúñu yā. Te ni ndecoo ña nuū na jijnáhan ná, te cacahān ña jeē ní cajito ña jeē ní canecoo ndajéhé Yaā Dios nuū ña, te ni cacahān jeē ní natecu Jesús.

24 Te ni jengoo sava jnáhan ná ndé yaū ndīyī ún, te ni cajito de jeē súcuan iyó, nájñuhun ni cacahān ñahan ún, te tu ní cájito cuiṭi de nuū yā.

25 Yūcuán na te ni cahān maá yá jín de:

Tēe tu cájēcūhun cuiṭi ni cácuu ró. Yōhyo uhū cá candije ró táca jñuhun Cristo ni cacahān tēe ni canacani jñuhun Yaā Dios nde jenahán.

26 ¿Te á tu súcuan ní jini ññuhún ndoho Cristo táca jñúndóho yáha, te sáá te quínuhun yā nuū lúu cujéñu ya? Achí yá.

27 Te ni nacani cájī yá táca jñuhun jeē yosó nuū tútu iī jeē cahán siquī maá yá. Te ni quejéé yá jín jñuhun ni tee Moisés, te ni cahān gā yā táca jñuhun jeē ní catee tēe ni canacani jñuhun ya nde jenahán.

28 Te nuū ní jínúcoo de ñuu nuū cuángoo de ún, te Jesús ni sáha ya jeē cáca ga yā quihīn yā.

29 Te maá de ni castéu de ya, ni cacahān de jín yá:

Ndōo ní vehe ná, chí je ni iní te je yajni cuaa, áchí de.

Yūcuán na te ni quīvī ya jeē quéndōo ya jín de.

30 Te nuū ní cucōo ya mesa jeē cájī yá jín de jijnáhan de, te ni quihīn ya staā, te ni jicān tahu yā, te ni tahu cuéché yá, te ni jēhe ya nuū de.

31 Te jeē sáha ya súcuan, te nájñuhun ni cananune tinūú de, te ni canacuni de ya. Te ni ndoñuhún-ni ya nuū de cuahān yā.

32 Te ni cacahān maá de:

Jendaá jeē yōhyo ni cacusiñi ni yō ná ni nacani ya jñuhun nuū yō ichi ún te ni castūhun cájī yá jñuhun cáhan tutu iī. Achí de.

33 Yūcuán na te yachī ni canaquihīn de ichi, ni canandicó de cuanungoo de ñuu Jerusalén. Te ni canajnáhan de jín ndihúxī ñn ga apóstol, cáyūcu tútu de jín sava ga jnáhan de.

34 Te ni cacahān tēe cáyūcu tútu ún:

Jendaá ndije jeē ní natecu maá Jítóho yō, te ni nane ndijin yā nuū Simón, achí de jijnáhan de.

35 Yūcuán na te ndindúú tēe un ní canacani de jñuhun ndese ni najnáhan ya jín de ichi, jín ndese ni canacuni de ya ná ni tahu cuéché yá staā.

*Jeē ní nane ya nuū tēe cáscuáha jín yá  
(Mt. 28.16-20; Mr. 16.14-18; Jn. 20.19-23)*

36 Te sá cacahān gā de táca jñuhun yáha, te ni jecuiñi-ni Jesús mēhñú de jijnáhan de. Te ni cahān yā jín de:

Ndeyí sñi coo ni rō jijnáhan ró, áchí yá.

37 Te ni candacoto Iyo de, ni cayūhú ndasí de, chí ni cajeni ni de jeē ñn ánuá cúu ya.

38 Te ni cahān yā jín de:

¿Naun cáyūhu ró, te naun cájēni siquī ní rō súcuan?

39 Condéhé ndaha ri jín jéhē rī, te cuni rō jeē maá rí cúu. Jñi ruhū te cuni rō, chí ñn ánuá tu névāha cúñu ni yiqui nájñuhun cájito ró jēé névāha maá rí, achí yá.

40 Te jeē ní cáhān yā súcuan, te ni steén yā ndaha ya jéhē yā nuū ni yñi ndūyu cāa.

41 Te yōhyo ni cacusiñi ni de, te cánaa ni de. Te vēsú súcuan te ná tu candije vāha vāha de jeē maá yá cúu. Te ni cahān yā jín de:



¿A cánevāha ró jecu jeē cáji rī yāhá? áchí yá.

<sup>42</sup> Yūcuán na te ni cajēhe de ñin pedazo chācá ní tau nuū yā, jín ñin pedazo ñahmā ndūxi yocō.

<sup>43</sup> Te ni quihin ya, te ni yeji yā nuū de jínáhan de.

<sup>44</sup> Te ni cahān yā jín de:

Tāca jēē ní cuu jín rí cúu jeē ni cahān rī ná ni ine ri jín ró jínáhan ró ndé saá, jeē cánuú squícu tāca jnūhun ri jeē yosó núu tútu ley Moisés, jín núu tācá tutu tēe ni canacani jnūhun Yaā Dios, jín núu tútu salmo, achí yá.

<sup>45</sup> Te ni nune ya jeē níjnūni de, návāha cuu jecūhun ni de tāca jēē cahān tutu ii.

<sup>46</sup> Te ni cahān yā:

Súcuān cahān nuū tútu jeē ruhū Cristo, cánuú cuu rī, te nuū uní quiví natecu rī.

<sup>47</sup> Te cuitē núu jnūhun ri jeē cánuú nacani ni ñayuu jeē stóo i cuēchi i, te cone cáhnu ni Yaā Dios nuū i. Te ñuu Jerusalén quejéé cuitē núu jnūhun yáha, te quihñ nuū ñáyuu tācá nación.

<sup>48</sup> Te máá ró cácuu tēe nacani jnūhun tācá jniñu ní cajito ró.

<sup>49</sup> Te tají rí Espíritu Santo quiji ya nuū ró jijnáhan ró, nájjnūhun ni jejnūhun Tátá rī. Te na quéndōo ró ñuu Jerusalén condetu ró ndé nihñ ró poder Espíritu Santo jeē quiji nde andiví. Achí yá.

*Jeē ní ndaa ya cuanuhun yā andiví*

*(Mr. 16.19-20)*

<sup>50</sup> Yūcuán na te ni quenda ya ñuu Jerusalén, cuahān yā nde ñuu Betania jín de jínáhan de. Te ni ndonehen ya ndindúú ndaha ya, te ni jicān tahú yā jehē de.

<sup>51</sup> Te níni jicān tahú yā jehē de, te ni cujiyo-ni ya nuū de, ni ndaa ya cuanuhun yā andiví.

<sup>52</sup> Te máá de ni cachiñúhún de ya. Te sáá te cuanungoo de ñuu Jerusalén, te yōhyo cácusñ ni de.

<sup>53</sup> Te níni cáhiin de ini templo cáhnu, cánacuatahú de nuū Yaā Dios. Te ni cuu. Amén.

## JNUHUN VAHA NI TEE SAN JUAN

### *Yaā naní Jnúhun Yaā Dios ni nduu ya tēē*

<sup>1</sup> Nde xīhna űúhún ná ni jecōo ndihí jeē iyó, te je iyó Yaā naní Jnúhun Yaā Dios, chí stéén yā ndihí jnúhun ndese Yaā cúu Yaā Dios. Te Yaā naní Jnúhun un ndeé yá jíin Yaā Dios, te Yaā Dios cúu ya.

<sup>2</sup> Máá yá ndeé yá nde jeē xīhna űúhún jíin Yaā Dios.

<sup>3</sup> Te ní sáha Yaā Dios jeē jíin máá yá ní jecōo ndihí tāca jéē iyó. Te ma jécōo ní ñin jeē iyó núu tu ní sáha máá yá.

<sup>4</sup> Máá yá sáha jeē técu ndihí-ni, te máá yá cúu luz jeē steén ini anuá ñayuu, cúu jeē sáha ya jeē jécúhun ní i síquī Yaā Dios.

<sup>5</sup> Te Yaā cúu luz ún ndíndēe núú ñáyuu tu cájica ndaā, jeē nájnūhun cáhīyo i nuū néē. Te ñayuu cáhīyo nuū néē tu cúu ndahva i luz yā.

<sup>6</sup> Te ní iyo ñin tēe jeē ní tají Yaā Dios, naní de Juan.

<sup>7</sup> Tēe un ní quiji de jeē nácani cájí de jnúhun máá Yaā cúu luz, návāha candíje tāca ñáyuu jeē jíin jnúhun cáhán de.

<sup>8</sup> Nasūu máá Juan cúu luz ún, chí cúu de ñin jeē ní nacani cájí jnúhun máá luz un.

<sup>9</sup> Te máá Yaā cúu luz ndije jeē steén ini anuá tāca ñáyuu, nde saá ní quiji ya ini ñayíví.

<sup>10</sup> Te Yaā cúu Jnúhun Yaā Dios ní condee yā ini ñayíví, te vésú jeē jíin máá yá ní sáha Yaā Dios ñayíví, te ñayuu ñayíví tu ní cácuni i cuatáhú i jeē máá yá cúu.

<sup>11</sup> Ni quiji ya nuū ñáyuu máá yá nacióon hebreo, te ñayuu ún tu ní cájetáhú i ya.

<sup>12</sup> Te vésú súcuan te sava ñayuu chí ni cajetáhú i ya, te ni cacandíje i jeē sáha ya jehē i. Te nuū máá i ní jēhe ya jnúhun jeē ndúu i sēhe Yaā Dios.

<sup>13</sup> Te jeē ndúu i sēhe Yaā Dios, nasūu jíin modo jeē cácacu ñayuu ini ñayíví, ní nasūu síquī jeē cácuni tēe, chí máá Yaā Dios sáha ya jeē ndúu i sēhe ya.

<sup>14</sup> Te máá Yaā cúu Jnúhun Yaā Dios ní nduu ya tēe, te ní condee yā jíin yó. Te ní cajito yó jéē yóhoyo luu cújéhnu ya, chí máñúhún-ni ya cúu Sēhe Tátá yā, Yaā cújéhnu súcuan. Te máni máá jéē sáha ya jeē váha yóhó, te máni máá jnúhun ndaā cahán yā.

<sup>15</sup> Te Juan ní nacani de jnúhun ya, te ní cahán de:

Yaā váha cúu jeē ní cáhán rí náa áchí rí jeē Yaā quiji chí cújéhnu ga yā vésú ruhū, chí je iyó yá nde ná tu cacu rí, achí de.

<sup>16</sup> Te ndihí yó ní canihīn yō cuehē ndasí jeē váha iyó núu yā, chí máni jeē váha sáha sáha ya jíin yó.

<sup>17</sup> Moisés ní steén de ley Yaā Dios nuū ñáyuu jenahán, te Jesucristo chí sáha ya jeē váha yóhó te steén yā tāca jnúhun ndaā Yaā Dios nuū yō.

<sup>18</sup> Tú ní ñin ñayuu ní jíto cuiñi nuū Yaā Dios. Te máñúhún-ni Sēhe ya jeē ndeé yá jíin Tátá yā, suu ya ní steén nuū yō ndese Yaā cúu Yaā Dios.

### *Jnúhun Jesús jeē ní cáhán Juan tēe scuándute*

*(Mt. 3.11-12; Mr. 1.7-8; Lc. 3.15-17)*

<sup>19</sup> Te ñayuu hebreo ñuu Jerusalén, ní catají i jecu sutú jíin tēe grupo levita jeē cájejniñu ini templo, ní jengoo de nuū Juan, návāha cajnúhún de ndé ñin cúu Juan te na jniñu ndiso de.

20 Te Juan cájí ní cachi de:

Nasūu rúhū cúu Cristo, achí de.

21 Te ni cacajñuhún tucu de:

Núu súcuan ¿te ndé ñin cúu ró? ¿A cúu ró Elías, tēe ni nacani jñuhun Yaā Dios nde jenahán, chí naún?

Te ni cahān Juan:

Nasūú de cúu ri.

Te ni cacajñuhún tucu de:

Núu súcuan ¿te á cúu ró tēe nacani jñuhun Yaā Dios jeē achí tutu ñi jeē quíji?

Tuú, achí tucu Juan.

22 Te ni cacahān tucu jíin de:

¿Te ndé ñin cúu ró núu súcuan? Cachi nuū rī jijnáhan ri, chí jíni ñuhún castūhun rí nuū táca tée ni catajǎ rúhū vējicoo rí. Cachi na jniñu ndíso ró ví.

23 Te ni cahān Juan:

Máá rí cúu tēe jeē ni cáhān Isaías, tēe ni nacani jñuhun Yaā Dios nde jenahán, jeē quíji ri cana jee ri nde nuū ñuhun téhé. Te cáhān rī jíin ñáyuu jeē na sātūhva í máá í, chí quíji máá Jítóho yō. Achí Juan.

24 Te tēe grupo fariseo cácuu jeē ní catajǎ tēe ni quijicoo ún.

25 Te ni cacajñuhún de Juan:

Núu súcuan ¿te naun scuándute ró te núu nasūu Cristo ni Elías ni máá tēe quíji nacani jñuhun Yaā Dios cúu ró?

26 Te ni cahān Juan:

Ruhū chí jíin ndute scuándute ri. Te mēhñu ró jijnáhan ró íne ñin Yaā jeē tu cájini rō.

27 Te Yaā un cúu jeē ni cáhān rī jeē quíji ya te cújéhnu ga yā vēsú ruhū. Chí tú na vé jéhnu cuítí cúu ri nuū yā, ni jeē cuajñíñu ri nuū yā vēsú ñin jniñu lúlí gá nájñuhun jeē ndajǎ rí correa ndijēn yā. Achí de.

28 Súcuan ni cuu jeē ní candajñuhún de jíin Juan nde Betábara jeē íne ichi núu cáne niāndii yūte Jordán, nuū scuándute Juan.

### *Siquē jeē cúu ya Londe Yaā Dios*

29 Te inga quiví un ní jito Juan nuū Jesús jeē véji ya nuū de. Te ni cahān de jíin ñáyuu:

Condēhe jijnáhan ró, chí yāha véji Yaā cúu Londe jeē ní tajǎ Yaā Dios, te cuu yā jeē sándoo ya cuēchi ñáyuu ñayiví.

30 Yaā yáha cúu jeē ni cáhān rī jeē quíji ñin Yaā cújéhnu ndasí, chí je íyó yá nde ná tu cacu rí.

31 Te nde saá te tu ní jíni rī jeē yāha cúu Yaā ní tajǎ Yaā Dios. Te ni quíji ri jeē scuándute rí ñáyuu ñuu yō Israel jíin ndute, návaha stéén rí nuū í jeē suu ya cúu, achí Juan.

32 Te suni ni cahān gā de jñuhun ya:

Ni jito ri Espíritu Santo, ni cuun ya ichi ándiví, cáa ya nájñuhun paloma, te ni quee ya xiní Jesús.

33 Te nde saá te ná tu cuni rī jeē Jesús cúu. Te máá Yaā Dios jeē ní tajǎ yá ruhū jeē scuándute rí jíin ndute, ni cahān yā jíin rí: Núu ni jito ró jēe cúun Espíritu Santo te quendoo xiní ñin tēe, yúcuan cúu Yaā jeē cuáha Espíritu Santo condee ini anuá ñáyuu, achí Yaā Dios.

34 Te je ni jito ri ún, te nácani cájí rí jñuhun jeē maá yá cúu Sēhe Yaā Dios. Achí Juan.

*Uū tēe jeē ní cana ya xīhna gā*

35 Te inga quivī ún te Juan íne tucu de yūcuan jíin úu tēe cájica jíin de.

36 Te ni jito de nuū Jesús jeē jíca ya yūcuán. Te ni cahān de:

Condēhe jíjnāhan ró, chí yūcuan cúu Yaā cúu Londe jeē ní tají Yaā Dios.

37 Te ndíndúú tēe cájica jíin Juan ni cajini sōho de jnūhun yáha, te ni candiquīn de Jesús.

38 Te ni ndió cóto Jesús, te ni jito ya jeē cándiquīn de yatā yā. Te ni cahān yā jíin de:

¿Na vé cánanducú ró?

Te ni cacahān de jíin yá:

Maestro, ¿ndé nuū ndeé ní?

39 Te ni cahān yā jíin de:

Quíngoo yó te cuni rō.

Te ni jengoo de, te ni cajito de nuū ndeé yá. Te ni caquendōo de jíin yá quivī ún, chí nájñūhun cacuūn jehíni cúu.

40 Te Andrés, ñani Simón Pedro, cúu ñin jeē ndíndúú tēe un jēe ní cajini sōho jnūhun ni cahān Juan, te ni candiquīn Jesús.

41 Te Andrés, yachí ni jenanducú de ñani de Simón, te ni cahān de jíin:

Ni caquijnāhan ri jíin Mesías, achí de. Te jnūhun un cúni cahān Cristo, Yaā ní tají Yaā Dios.

42 Yūcuán na te cuanuhun de nuū Jesús jíin Simón. Te nuū ní jito Jesús nuū Simón, te ni cahān yā:

Máá ró cúu Simón sēhe Jonás. Te nde vijna te conaní ró Cefas, achí yá. Te jnūhun un cúni cahān Pedro, jeē cuni cahān yuū.

*Jeē ní cana ya Felipe jíin Natanael*

43 Te inga quivī un cúni Jesús quihīn yā región Galilea. Te ni nihīn jnāhan ya jíin Felipe, te ni cahān yā jíin de:

Condiquīn ruhū na quihín yō.

44 Te Felipe cúu tēe ñuu Betsaida, jeē cúu ñuu Andrés jíin Pedro.

45 Te ni jenanducú de Natanael, te ni cahān de jíin:

Ni canihīn jnāhan ri jíin Yaā jeē yosó jnūhun ya nuū tútu ley jeē ní tee Moisés, jíin núu tútu ni catee tēe ni canacani jnūhun Yaā Dios nde jenahán. Te Jesús sēhe José ñuu Nazaret cúu ya. Achí de.

46 Te ni cahān Natanael jíin de:

¿Te ndese cúu cujéhu ñin tēe jeē ní cacu ñuu ndahú Nazaret?

Te ni cahān Felipe:

Quihín yō de cuni rō, achí de.

47 Te ni jito Jesús jeē véji Natanael, te ni cahān yā:

Yāha véji ñin tēe ndaā jeē cúu ndije yucūn Israel, chí tu stáhú cuiti de, achí yá.

48 Te ni cahān Natanael jíin yá:

¿Ndese jíni ní sáña?

Te ni cahān Jesús:

Je ni jito ri rohó ndé ná tu cana Felipe xinī rō, ná íne ró jéhē nundéhe higo, achí yá.

49 Yūcuán na te ni cahān Natanael jíin yá:

Maestro, máá ní cúu Sēhe Yaā Dios, máá ní cúu Rey ñuu yō Israel, achí de.

50 Te ni cahān Jesús:

¿A máá jéē ni cáhān rī jeē ní jito ri rohó ná íne ró jéhē nundéhe higo, te jeē yúcuan cándíje ró rúhū naún? Tuú chí coo jniñu jéhnū ga coto ró vésú jeē yáha, áchí yá jíin de.

<sup>51</sup> Te ni cahān gā yā:

Jendaá cahān rī jíin ró jijnáhan ró jéē nde vijna te coto ró jéē núne andiví, te táca ndajéhé Yaa Dios cándaa cánuu nuū ruhū, Yaa ní nduu tēe, áchí yá.

*Jeē ni jéhēn yā ñn vico nándāha ñuu Caná*

## 2

<sup>1</sup> Te ni yāha unī quivī, te ni Iyo ñn vico nándāha ñuu Caná ndañū Galilea. Te yūcuan íne náná Jesús.

<sup>2</sup> Te suni ni cacana i Jesús jíin tēe cáscuáha jíin yá, ni jehēn yā vico un jíin de.

<sup>3</sup> Te ni ndoco vino. Te náná Jesús ni cahān ña jíin yá:

Ni ndoco vino i, áchí ña.

<sup>4</sup> Te ni cahān Jesús jíin ña:

¿Naun cáhān ni súcuan jíin ná nánā? Chí ná tu quee quivī jeē sáha ná jniñu jéhnū, áchí yá.

<sup>5</sup> Te náná yā chí ni cahān ña jíin ñáyuu cájeni cohō:

Sáha ró jijnáhan ró táca jéē cahān yā jíin ró. Achí ña.

<sup>6</sup> Te yūcuan íyó íñu tenéjā yuū jeē ñúhun ndute cájichi ñayuu hebreo jeē ndúndoo i nuū Yaa Dios. Te ñn ñn tenéjā un cánda cuhun cuñ xico chí ciento litro ndute.

<sup>7</sup> Te ni cahān Jesús jíin ñáyuu cájeni cohō:

Scútú ndñ rō táca tenéjā yáha.

Te ni cascútú ndñ i.

<sup>8</sup> Te ni cahān yā jíin i:

Vijna te quēen ró jecu te quindeca ró coto ndee tēe ndíto vico, áchí yá.

Te ni cajendeca i nuū de.

<sup>9</sup> Te ni séyühú de ndute jeē ní nduu vino, te tu jíin de ndé ní canihñ i. Chí máni mozo un cúu jeē cájini, chí máá i ni caquēen ndute ún. Yūcuán na te tēe ndíto vico ni cana de tēe nándāha.

<sup>10</sup> Te ni cahān de jíin:

Tāca ñáyuu chí xīhna gā vino váha cájēhe i, te núu je ni cajihñ vāha ñayuu cáhñ vico, yūcuán na te jéhe de vino ndahú na. Te máá ró tucu ni sáha ró, chí nde jeē sándihí te jéhe ró vino jeē yóhoyo vāha ga jíhi, áchí de.

<sup>11</sup> Jniñu yáha jéē ni sáha Jesús ini ñuu Caná ndañū Galilea cúu jniñu jéhnū xīhna ñúhún jéē ni sáha ya jeē steén yā poder yā. Te súcuan ni steén yā jeē yóhoyo cújéhnū ya. Te tēe cáscuáha jíin yá ni cacandíje de ya.

<sup>12</sup> Te ná ni yāha jniñu yáha, te cuahān yā ñuu Capernaum jíin náná yā jíin táca ñani yā jíin tēe cáscuáha jíin yá. Te ni coyūcu yá yūcuán jecu quivī.

*Jeē ní quenehen ya ñayuu ini templo*

*(Mt. 21.12-13; Mr. 11.15-18; Lc. 19.45-46)*

<sup>13</sup> Te jeē cuácuyajni vico pascua casáha jnāhan ñuu yā hebreo, te cuahān yā ñuu Jerusalén.

<sup>14</sup> Te ini templo cáhnu ni jito ya ñayuu cáxicó stiquī jíin lanchi jíin paloma, jíin ñáyuu castáyí xūhun, cáyúcú i nuū mesa i.

<sup>15</sup> Te jeē súcuan ni jito ya, te ni sáha ya ñn cuarta ññi. Te ni scúnu ya táca i ini templo, nde jíin lanchi jíin stiquī i. Te ni jete yā xūhun ñáyuu castáyí. Te ni scotúú yá táca mesa i.

<sup>16</sup> Te ni cahān yā jīn ñáyyu cáxīcō paloma:

Tava tācá quiti yáha. Te ma sáha ró yáhu ini vehe Tátá rī. Achí yá.

<sup>17</sup> Yūcuán na te tēe cáscuáha jīn yá, ni canucūhun ni de jnūhun yósó núū tútu i: Je yajni cuu na jēe yóhoyo ndáhvī ni na síquī vehe ní, áchí yá jīn Tátá yā, achí tutu.

<sup>18</sup> Te tēe ñuu yā hebreo ni cacajñūhún de ya:

¿Na jniñu jéhnū sáha ró jēe steén rō poder rō, te cucáhnū ni rī jeē ndíso jniñu ró sáha ró súcuan? áchí de jīn yá.

<sup>19</sup> Te ni cahān yatá Jesús:

Canu rō templo yáha, te nuū uní quivī te nucondichi sáha ri, achí yá.

<sup>20</sup> Yūcuán na te ni cacahān tēe hebreo un:

Uū xico iñū cuiyā te ni jīnu ni cuvāha templo yáha. Te róhó, ¿á núū uní-ni quivī te nucondichi sáha ró naún? Achí de.

<sup>21</sup> Te templo jeē cahán Jesús cúu máá yiqui cúñu yā, chi cahni ñayuu yā te natecu yā nuū uní quivī.

<sup>22</sup> Jeē yúcuan cúu jeē ná ni natecu yā jeē ni jíhī yā, te tēe cáscuáha jīn yá ni canucūhun ni de jeē ni cahān yā jnūhun yáha. Te ni cacandíje de jnūhun jee yósó núū tútu i, jīn jnūhun yáha jēe ni cahān Jesús.

*Jeē jini Jesús ndese cáa ini anuá ñayuu*

<sup>23</sup> Te ná íne Jesús ñuu Jerusalén máá víco pascua, te cuehē ñayuu ni cacandíje i jeē cúu ya Cristo, chi ni cajito i tācá jniñu jéhnū sáha ya jeē steén yā poder yā.

<sup>24</sup> Te máá Jesús chi tu ní jétáhú yá i, chi je jíní yā ndese cáa ini anuá i jijnáhan i.

<sup>25</sup> Te tu jíní ñúhún yá jeē cáchi ni ñn ñayuu nuū yā ndese íyó táca ñáyyu, chi máá yá je jíní yā ndese cáa ini anuá i.

*Jeē ní candajñūhún Jesús jīn Nicodemo*

### 3

<sup>1</sup> Te ni íyo ñn tēe grupo fariseo, naní de Nicodemo, te cújéhnū de nuū ñáyyu ñuu de hebreo.

<sup>2</sup> Tēe yáha ní quiji de nuū Jesús ñn jecuáa, te ni cahān de jīn yá:

Maestro, je cájini na jēe maá Yaā Dios ni tají yá nihín jēe steén ni jnūhun ya nuū na jijnáhan ná. Chi núu tu íyó Yaā Dios jīn ní, te ma cúu sáha ní ni ñn jniñu jéhnū nájñūhun sáha máá ní jeē steén ni poder ní, áchí de.

<sup>3</sup> Te ni cahān Jesús:

Jendaá cahán rī jīn ró jeē núu tu nacacu jeé ñn ñayuu, te ma cúu quivī i ndaha Yaā Dios jeē ndacu ya jniñu nuū i, áchí yá jīn de.

<sup>4</sup> Te ni cahān Nicodemo jīn yá:

¿Te ndese cuu nacacu ñn tēe te núu je ni jehnu de? ¿A cuu nucūhun tucu de chíji náná de te nacacu tucu de? áchí de.

<sup>5</sup> Te ni cahān Jesús:

Jendaá cahán rī jīn ró jeē núu tú nacacu ñn ñayuu, te ma cúu quivī i ndaha Yaā Dios jeē ndacu ya jniñu nuū i. Te jeē nácacu i cúu jeē ndúndoo cuēchi i nájñūhun jīn ndute, te condee Espíritu Santo ini anuá i.

<sup>6</sup> Jeē cácu sáha ñayuu, chí sēhe ñayuu cúu. Te jeē cácu sáha Espíritu yā, chí sēhe ya cúu.

<sup>7</sup> Ma náa ni rō cani ni rō ndese cúu jnūhun ni cahān rī jīn ró jeē cánuú jēe nacacu jeé rō jijnáhan ró.

<sup>8</sup> Te tachī chi quée cuahān ndé-ni cúu nuū cuní maá, te jíni sōho ró jéē cáyu, te tu jíni ró ndé nuū véji ni ndé nuū quihín. Te suni súcuan cúu tāca ñáyuu jeē nácacu sáha Espíritu, chí tu jíni ró ndese sáha ya jniñu ún, áchi yá.

<sup>9</sup> Te ni cahān tucu Nicodemo:

¿Ndese ga cúu núu súcuan?

<sup>10</sup> Te ni cahān Jesús:

Máá ró cúu ñn maestro jeē cujéhu nuū ñáyuu ñuu yō Israel, te zá tu jécūhun ni ró jnūhun yáha naún?

<sup>11</sup> Jendaá cahán rī jíin ró jeē jnūhun cájecūhun ni rī cúu jeē cácahān rī jíin ró. Te cánacani cáji rí jnūhun jniñu ní cajito ri. Te tu cácañje ró jnūhun cácahān rī.

<sup>12</sup> Chi ni cahān rī jnūhun ndese sáha Yaā Dios ini ñayívi, te tu cácañje ró. Núu súcuan ¿te ndese candíje ró núu cahān rī jnūhun táca ndese sáha ya nde andívi?

<sup>13</sup> Chi ni ñn tu ní cáa andívi jeē cúni ndese íyó yúcuan, chí máñúhún-ni ruhū, Yaā ní nduu tēe. Chí andívi ndéé rí, te ni cuun ri véji ri.

<sup>14</sup> Te nájnūhun ni cata caa Moisés ñn coō cáa nuū ñn yujnu, ná ni cajica ñáyuu nuū ñūhun téhé, suni súcuan máá rí, Yaā ní nduu tēe, cánuú jéē cóndita caa ri jíca cruz.

<sup>15</sup> Te súcuan cánuú návāha tāca ñáyuu jeē candíje i jeē jnáma ri i, ma jnahnú ndetū i, chí sa suhva cotecu i ñí cáni andívi.

### *Yōhyo ni cundáhu ni yā ñáyuu ñayívi*

<sup>16</sup> Chi Yaā Dios yōhyo ni cundáhu ni yā ñáyuu ñayívi. Jeē yúcuan ní tají yá Séhe ya ni quiji, vésú mañúhún-ni ya iyó, návāha táca ñáyuu jeē candíje i jeē jnáma ya i, ma jnahnú ndetū, chí sa suhva cotecu i ñí cáni andívi.

<sup>17</sup> Chi tu ní táji Yaā Dios Séhe ya ini ñayívi jéē snahnú ndetū yā ñáyuu, chí sa suhva jeē jnáma ya ñáyuu.

<sup>18</sup> Ñáyuu jeē candíje i jeē jnáma ya i, ma jnahnú ndetū i. Te ñáyuu tu cándíje, je ni jnahnú ndetū i, chí tu ní cándíje i máá Séhe Yaā Dios, te máá ñn-ni ya iyó.

<sup>19</sup> Máá Yaā jeē stíndéé ini anuá ñáyuu, je ni quée ya ini ñayívi. Te cánujnahan gā ni ñáyuu caca i nájnūhun nuū néé vésú nuū luz yā, chí jniñu cásáha i cúu jniñu néé. Jeē yúcuan cúu jeē jnahnú ndetū ñáyuu tu cácañje ún.

<sup>20</sup> Chi táca ñáyuu casáha jniñu néé, tu nújnahan cuiti ni i luz yā. Te tu jéhe i jnūhun jeē stíndéé yá ini anuá i, chí tu cúni i jeē natūu jniñu néé cásáha i.

<sup>21</sup> Te ñáyuu jeē cájica jíin jniñu ndaá, jéhe i jnūhun jeē stíndéé yá ini anuá i, návāha natūu ndijin jeē táca jniñu cásáha i cúu jniñu cúni Yaā Dios. Achí yá jíin de.

### *Jeē ni cáhān tucu Juan jnūhun Jesús*

<sup>22</sup> Yūcuán na te Jesús jíin tée cáscuáha jíin yá, cuahān yā región Judea. Te ni condee yā yūcuán jecu tiempo jíin de, te cáscuándute de ñáyuu.

<sup>23</sup> Te suni scuándute Juan, íne de lugar jeē naní Enón yajni ñuu Salim, chí yūcuan íyó cuéhē ndute. Te ni quijicoo ñáyuu nuū de, te ni scuándute de i.

<sup>24</sup> Súcuan ni sáha Juan nde ná tu quívi de vecāa.

<sup>25</sup> Yūcuán na te sava tēe cáscuáha jíin Juan yōhyo ni cacahān de jíin sava jnāhan de hebreo siquī núu ndé ñn cúu modo vāha ga jeē cúchi ñáyuu ndundoo i nuū Yaā Dios.

<sup>26</sup> Te ni quecoo de nuū Juan, te ni cacahān de:

Maestro, tēe ní ine jín ní yūte Jordán ichi núū cáne niāndii, jeē ní nacani ní jnūhun de nuū ná, vijna te scuándute máá de, te ndivii ñayuu cuangoo i nuū de.

<sup>27</sup> Te ni cahān Juan:

Ni ñn tēe ma cúu sáha de jniñu Yaā Dios te núu ma tejniñu ya de.

<sup>28</sup> Máá ró jijnáhan ró chi ni cajini sōho ró jēe ni cáhān cají rí jeē násūu máá rí cúu Cristo, chí cúu rí ñn jeē ní tají Yaā Dios jeē cósnūū nacani jnūhun jeē quíji ya.

<sup>29</sup> Te núu cásáha vico quíjnáhan, te máá yíi cúu jeē ndéca ñasihí. Te amigo yíi un íne jín de, te jini sōho jnūhun cáhān de. Te yōhyo cúsiñ ní jini sōho jnūhun cáhān yíi ún. Te suni súcuan ruhū, chí cúu rí nájñūhun amigo yíi, chí ní quee máá Cristo, te yōhyo cúsiñ ní rí jini sōho rí jnūhun cáhān yā.

<sup>30</sup> Te jini ñúhún jēe ndujéhu ga máá yá te ndululí gá máá rí, achí Juan.

### *Jeē ní quiji ya nde nuū sucún*

<sup>31</sup> Te Yaā jeē véji nde andiví, cújéhu ya nuū ndihi. Chi táca jēe ní cacu ini ñayiví yáha, sēhe ñayiví cúu, te máni jnūhun ñayiví cáhān. Te Yaā jeē véji ichi andiví, chí cújéhu ya nuū ndihi ñayuu.

<sup>32</sup> Te nácani ya jnūhun jeē ní jito ya jín jēe ní jini sōho ya. Te ñayuu chí tu cácadíje i jnūhun cáhān yā.

<sup>33</sup> Te núu ñn ñayuu candíje i jnūhun cáhān yā, suu cúu jeē jejnúhún i jeē Yaā ndaā cúu Yaā Dios.

<sup>34</sup> Chí Yaā ní tají Yaā Dios véji, máni máá jnūhun Yaā Dios cahān yā. Chí Yaā Dios tu yícuāha jéhe ya Espíritu yā nuū Yaā ní tají yá.

<sup>35</sup> Máá yá jeē cúu ya Tatá, yōhyo maní yā jín Séhe ya, te ndivii ni jéhe ya ndaha Séhe ya jeē ndacu ya jniñu nuū.

<sup>36</sup> Ñayuu jeē candíje máá Séhe ya jeē jnáma ya i, cotecu i ní cáni andiví. Te ñayuu tu cúní candíje Séhe ya, ma cótecu i ní cáni andiví, chí sa suhva cuāha Yaā Dios castigo jeē ndoho i ní cáni.

### *Jeē ní cáhān Jesús jín ñahan ñúu Samaria*

## 4

<sup>1</sup> Te tēe grupo fariseo, ni canihñ de jnūhun jeē iyó cuéhē gā tēe cáscuáha jín Jesús vēsú jín Juan, jín jēe cuehē gā ñayuu scuándute ya vēsú Juan.

<sup>2</sup> Te nasūu jēe scuándute máá yá, chí tēe cáscuáha jín yá cúu jeē cascuándute.

<sup>3</sup> Te ná ni jini Jesús jeē súcuan ni canihñ de jnūhun, te ni quenda ya región Judea, te cuanuhun yā región Galilea.

<sup>4</sup> Te ichi jeē nuhún yā chí yáha región Samaria.

<sup>5</sup> Te ni jinū yā ñn ñuu región Samaria jeē naní Sicar, yajni ñuhun jeē ní jéhe Jacob nuū séhe de José nde jenahán.

<sup>6</sup> Te yūcuan íne pozo jeē naní pozo Jacob. Te ni cucōo Jesús xiin pozo un, chí ni cuíta yá jeē cuahán yā ichi. Te nájñūhun cahuxí uū cúu.

<sup>7</sup> Te ní quee ñn ñahan Samaria, véji ña vequihin ña ndute. Te ni cahān Jesús jín ña:

Cuāha ní ndute coho ná, áchí yá.

<sup>8</sup> Te tēe cáscuáha jín yá, chí je cuangoo de nde ñuu, cuacuaan de jeē cáji de jín yá.

<sup>9</sup> Te ñahan Samaria un ní cahān ña jín yá:



¿Ndese cúu jeē jicán ni ndute nuū ná coho ní? Chi tēe hebreo cúu ní, te ñahan Samaria cúu ná, áchí ña.

Súcuan ni cahān ña, chí ñayuu hebreo tu cácahān i jín ñáyuu Samaria.

10 Te ni cahān Jesús:

Núu jeē jíní ni ndese cúní Yaā Dios sáha ya jeē váha níhín, jín ndé ñn cúu sãña jeē jicán na ndute nuū ní, yūcuán na te máá ní cacān ni núu ná, te cuāha ná ndute jeē cótecu ni ní cáni sáha, áchí yá.

11 Te ni cahān ña jín yá:

Tátā, yōhoyo cúnú pozo yáha, te tú na vé ndahá ní jéé táva ní ndute. Núu súcuan ¿te ndé nuū níhín ni ndute jeē cótecu na sáha?

12 ¿Te á cújénu ga máá ní vēsú jíi yō Jacob, chí naún? Chi máá de ni stóo de pozo yáha nuū yō. Te yáha ní cajihí máá de ndute, jín táca séhe de, jín quiiti ndéca de. Achí ña.

13 Te ni cahān Jesús:

Tāca ñáyuu jeē jíhi ndute yáha, chí jichí tucu i.

14 Te ñayuu coho ndute jeē cuāha na núu i, chí ma jichí cuiṭi gā i. Chi ndute jeē cuāha ná un, cane ini i nájnūhun ndute jeē cáne ñuhún, te sáha jeē cotecu i ní cáni, áchí yá jín ña.

15 Te máá ña tu ní jécūhun ni ña, te ni cahān ña jín yá:

Tátā, cuāha ní ndute ún coho ná, návaha ma jichí cuiṭi gā ná, ni tuá jíní ñūhun quiquihín ná ndute pozo yáha, áchí ña.

16 Te ni cahān Jesús jín ña:

Cuácana ní yñ ní te quiji ní jín de, áchí yá.

17 Te ni cahān ña:

Tú yñ ná íyó.

Te ni cahān Jesús:

Ndaā cahán ni jéé tú yñ ní íyó.

18 Chi je ni cuu uhūn yñ ní, te tēe ndéca ní vijna chí nasūú yñ ní cúu de. Yāha cúu jeē ni cáhān ndaā ní, áchí yá.

19 Te jeē súcuan ni cahān yā, te ni cahān ña:

Tátā, ñn tēe nácani jñūhun Yaā Dios cúu ní, jéni ni ná.

20 Tāca jíi na ñáyuu Samaria, yucu yáha ní cachiñūhún i Yaā Dios. Te máá ní ñayuu hebreo, cácahān ni jéé ñuu Jerusalén cúu nuū cánuú chiñūhún yó yā, achí ña.

21 Te ni cahān Jesús jín ña:

Nánā, candije ní jñūhun cáhān na, chí quee quiṽi jeē ni nasūú yucu yáha ni nasūú ñuu Jerusalén cúu nuū chiñūhún ní máá Yaā cúu Tátá, chí ndihí-ni lugar te cuu chiñūhún ní yá.

22 Máá ní ñáyuu Samaria tu cájini ni ndé ñn cúu jeē cáchiñūhún ní. Te máá ná jijnáhan ná chí cájini na ndé ñn cúu jeē cáchiñūhún ná. Chi nde nuū máá ná jijnáhan ná ñáyuu hebreo cúu nuū véji Yaā jnama ñayuu.

23 Te je ni quee quiṽi jeē ñáyuu cáchiñūhún ndáá, vijna te chiñūhún ndije i Yaā cúu Tátá nde jín ini jín ánuá i. Chi máá Tátá cúni yā jeē súcuan chiñūhún ñáyuu yā.

24 Yaā Dios cúu Espíritu, te ñayuu jeē cuní i chiñūhún i ya, cánuú jéé chiñūhún ndije i ya jín ini jín ánuá i, áchí yá.

25 Te ni cahān ñahan ún:

Jíní na jéé quiṽi Mesías jeē cúu Cristo, Yaā jeē tají Yaā Dios. Te núu ni quee máá yá, te stéén cají yá táca jñūhun nuū yō.

26 Te ni cahān Jesús:

Máá ná jeē cahán jíin ní, suu ná cúu Yaā ún.

27 Te sá cáhán gā yā súcuan, te ni ndecoo-ni tēe cáscuáha jíin yá. Te ni canaa ni de cájito de jeē ndájnūhun yá jíin ñahan yúcuan. Te ni iin de tu ní cájnūhún de ya núu na vé cájnūhun yá ña chí na vé ndájnūhun yá jíin ña.

28 Yūcuán na te ñahan un ní stóo ña qūȳi ña, te cuahān ña nde ñuu. Te ni cahān ña jíin ñáyuu ún:

29 Nehen na quíngoo yó te coto ró iin tēe jeē ní cachi ndihi tāca jēe ní sáha ri. Sanaa te máá yá cúu Cristo, jeē cándetu yó quiji, áchí ña.

30 Yūcuán na te ni quendacoo i ñuu ún, te cuangoo i nuū íne Jesús.

31 Te nde ná tu jinūcoo i, te tēe cáscuáha jíin yá ni cacahān ndahú de jíin yá: Maestro, caji ni stáa víi, achí de.

32 Te ni cahān yā jíin de:

Iyó stáa caji rī jeē tu cájini rō ndese cúu.

33 Yūcuán na te tēe cáscuáha jíin yá, ni cacajnūhun jñahan de:

¿A ní quindeca ñn ñayuu jeē ní yeji yā, chí naún? áchí de.

34 Te ni cahān Jesús:

Jeē ní cachi rī jeē iyó jēe cáji rī cúu jeē cúsiñ ní rī sáha ri jniñu cúní Yaā ní tají ruhū vēji ri, jíin jēe sinu ri jniñu ún.

35 Te cácahān rō jeē cúmanī cuñn gā yoó te tahndē trigo. Te ruhū chi cáhán rī jíin ró: Condēhe jíjnáhan ró, chí ñayuu cuehē cácuu i nájnūhun trigo jeē jé ni cuaan jeē tahndé, chí je cáhīyo tūhva i candíje i ruhū.

36 Te tēe scándíje ñayuu cácuu de nájnūhun tēe cájehnde trigo, te nihin de yāhu de. Te jeē cánastútú de ñayuu cúu jeē cótecu i ñí cáni andiví. Te tēe cáscuíté núu jnūhun ri, inuū-ni cusī ní de jíin tēe cástéén gā jnūhun ri.

37 Chí ndaa cúu jnūhun jeē cahán: ñn tēe jéte, te inga tēe nástútú, áchí.

38 Te suu cúu jeē ní tají rí rohó jíjnáhan ró jēe scándíje ró ñayuu jeē jé ni canihin jnūhun ya ni casáha inga tēe. Chí inga tēe je ni canacani de jnūhun nuū ñáyuu, te máá ró chí nájnūhun cánastútú ró i cúu jeē scándíje ró i.

39 Te cuehē ñayuu Samaria jeē cáyucú ñuu ún, ni cacandíje i Jesús jeē ní jini sōho i jnūhun ni cahān ñahan ún. Chí ni cahān ña: Ni cachi ya ndihi tāca jēe ní sáha ri.

40 Te jeē yúcuan cúu jeē ñayuu Samaria un ní jinūcoo i nuū yā, te ni cacahān ndahú i jíin yá jeē na quéndōo ya ñuu i. Te ni ndōo ya yúcuan úu quiví.

41 Te cuehē gā i ni cacandíje i ya jíin jnūhun cáhán maá yá.

42 Te ni cacahān i jíin ñahan ún:

Tuá niní jēe cahán maá ró te candíje ri yā, chí je ni cajini sōho ri jnūhun cáhán maá yá. Te cájini yō jeē maá yá cúu ndije Cristo, Yaā jnama ñayuu ñayiví. Achí i.

*Jeē ní nasávaha ya sēhe tēe ndíso jniñu nuū rey*

43 Te nuū ní yáha uū quiví ún, te Jesús ní quenda ya Samaria, te ni quihin tucu ya ichi cuanuhun yā región Galilea.

44 Chí je ni cahān maá yá jeē tēe canacani jnūhun Yaā Dios, tu cáhīyo yíñuhún ñáyuu ñuu de jíin de, te suni súcuan ní cuu jíin maá yá.

45 Te ná ní najinū yā Galilea, te ñayuu un ní cajetáhú i ya, chí suni máá i ni jengoo i vico pascua ñuu Jerusalén, te ni cajito i tācá jniñu ní sáha ya quiví ní iyo vico ún.

46 Yūcuán na te ni jehēn tucu ya ñuu Caná ndañū Galilea, nuū ni sáha ya jeē ndúte ni nduu vino. Te ini ñuu Capernaum ni iyo ñn tēe cújēhnu jeē ndiso jniñu nuū rey. Te cūhú sēhe de.

47 Tēe un ní jini jñuhun de jeē ní najinū Jesús región Galilea jeē ni jēhēn yā región Judea. Te ni jecondéhé de ya, te ni cahān ndahú de jíin yá jeē na quihín yá jíin de vehe de, te nasávaha ya sēhe de, chi je yajni cuu í.

48 Te ni cahān Jesús jíin de:

Núu tú coto ró jniñu jēhnu jeē nāa ni rō sáha, te ma candíje cuiti rō jijnáhan ró, áchí yá.

49 Te tēe ndiso jniñu nuū rey, ni cahān de:

Cava vāha ni ní na quihín yō, chi núu cucuée ní te cuu sēhe ná, áchí de.

50 Yūcuán na te ni cahān Jesús:

Cuánuhun vehe ró, chi cotecu sēhe ró.

Te tēe un ní candíje de jñuhun ni cahān Jesús, te cuanuhun-ni de.

51 Te níni jíca de cuanuhun de vehe de, te ni quijicoo mozo de ni caquijnahān í de, te ni cacahān í:

Je ni nduvāha sēhe ní, áchí í.

52 Te ni cajñuhún de na hora ni quejéé ndúvaha í. Te ni cacahān í jíin de:

Cahññ jeē ícu ni quenda quíji í.

53 Yūcuán na te máa tátá í ni sáha de cuenta jeē hora un cúu jeē ni cáhān Jesús jíin de jeē cótecu sēhe de. Te ni candíje de jíin ní vehe de jeē cúu ya Yaa ní taji Yaa Dios.

54 Yāha cúu vuelta uū jeē ni sáha Jesús jniñu jēhnu jeē ni stéén yā poder yā región Galilea, jeē ní najinū yā jeē ni jēhēn yā región Judea.

*Jeē ní nasávaha ya ñn tēe cátú yuhu pila Betesda*

## 5

1 Yūcuán na te cuahān tucu Jesús ñuu Jerusalén, chi íyó tucu vico cásaha jnāhan ñuu yā hebreo.

2 Te Jerusalén iyó ñn pila ndute yajni yéhyí jēe naní yéhyí lanchi. Te yuhu hebreo naní Betesda. Te nuū íne pila un íyó úhūn corredor.

3 Te ini tēcá corredor un cācāa cuehē ñayuu cácuñū, jeē cuaá, jeē chacuá, jeē ni íjin. Te cāndetu í jeē canda ndute ún.

4 Chi íyó quívi jeē cúun ñn ndajéhé yā ini pila un, te scānda ya ndute. Te ñayuu quívi xīhna gā ini pila un ná scānda ya ndute, te ndúvaha í na-ni cuehyí ndóho í.

5 Te yūcuan íyó ñn tēe jeē ní cuu ocō xahūn unī cuiyā cuhú de.

6 Te ni jito Jesús jeē catú de, te ni jini yā jeē ní cuu cuehē cuiyā cuhú de. Te ni cahān yā jíin de:

¿A cúní rō nduvāha ró? áchí yá.

7 Te ni cahān tēe cūhú un jíin yá:

Tu nihín na ni ñn tēe squívi sãñá ini pila hora jeē cānda ndute. Chi tēcá jínu jeē cuní na quívi ná, te quívi-ni inga ñayuu xīhna gā. Achí de.

8 Te ni cahān Jesús:

Ndocuiñi te naquihin ró camilla rō te caca ró, áchí yá.

9 Te tēe un ní nduvāha-ni de. Te ni naquihin de camilla de, te ni quejéé de jíca de. Te quívi ndétātu cúu quívi ún.

10 Yūcuán na te jnāhan de tēe hebreo un ní cacahān jíin de:

Quívi ndétātu cúu vijna. Te áchí ley jeē ma cúu condiso ró camilla rō.

11 Te ni cahān tēe ni nduvāha ún:

Tēe ni nasávāha ruhū, ni cahān de jíin rí jeē náquihin ri camilla rī te caca ri, achí de.

12 Yūcuán na te ni cacajñuhún un de:

¿Ndé tēe ni cahān jíin ró jeē náquihin ró camilla rō te caca ró?

13 Te tēe ni nduvāha ún, tu jíin de ndé ñin cúu jeē ní nasávāha de. Chi cáhīn cuehē ñayuu yūcuán, te Jesús je cuahān yā.

14 Te cúcuéé gá te ni najnáhan Jesús jíin de ini templo cáhnu. Te ni cahān yā:

Vijna chí je ni nduvāha ró. Ma sáha ga rō cuēchi, chí núu tuú, te quiji ñin jñundóho xeēn gā siquī rō, achí yá.

15 Yūcuán na te cuahān tēe ún, te ni castühún de nuū jnáhan de hebreo un jéē Jesús cúu jeē ní nasávāha ya de.

16 Te siquī jeē ní sáha Jesús jniñu yáha quivī ndétátú, jeē yúcuan cúu jeē tēe hebreo un cájito xeēn de ya, te cácuni de cahni de ya.

17 Te ni cahān Jesús jíin de:

Máá Tátá rí chí ní cáni te nde vijna sáha ya jniñu váha, te suni súcuan ruhū sáha ri jniñu váha.

18 Te siquī jeē ní cáhān yā súcuan, te tēe hebreo un víhyá gā cácuni de cahni de ya. Chí nasūu máá ñin-ni jeē tu squícu ya jeē cahán ley siquī quivī ndétátú, chí suni jeē ní cáhān yā jeē Tátá yá cúu Yaa Dios, te súcuan sáha inuú yá máá yá jíin Yaa Dios.

### *Siquī jeē ndíso jniñu Sēhe Yaa Dios*

19 Te ni cahān Jesús:

Jendaá cahán rí jíin ró jijnáhan ró: Ruhū jeē cúu Sēhe Yaa Dios, tú na vé cúu sáha ri jeē máá rí, chí máni sáha ri jeē jíto rí sáha Tátá rí. Chí táca jéé sáha Tátá rí, suni sáha ruhū jeē cúu ri Sēhe ya.

20 Chí máá Tátá rí, maní yā jíin ruhū jeē cúu ri Sēhe ya, te stéén yā nuū rí ndihí jeē sáha ya. Te jéhu ga jniñu stéén yā vésu jeē ní cuu vijna, jeē naa ni rō coto ró jijnáhan ró.

21 Te nájnūhun jeē nastécu máá Tátá rí ndīyí te cotecu tucu i, suni súcuan ruhū jeē cúu ri Sēhe ya, nástécu rí ndé-ni cúu jeē cuní máá rí.

22 Te máá Tátá rí, tu sándaā yā siquī ni ñin ñayuu, chí ní jēhe ya jñūhun jeē sándaā máá rí siquī táca ñayuu, chí Sēhe ya cúu rí.

23 Te súcuan te coo yíñúhún ndihí ñayuu nuū rí, nájnūhun yíñúhún i nuū Tatá rí. Te ñayuu tu iyó yíñúhún núu rí, núu súcuan te suni tu yíñúhún i nuū máá Tátá rí jeē ní tají yá ruhū vėji rí.

24 Jendaá cahán rí jíin ró: Núu ñin ñayuu chuhun ni i jñūhun cáhān rí, te candíje i jeē Yaa ndaā cúu Yaa ní tají rúhū vėji rí, ñayuu ún cotecu i ní cáni andiví, te ma jnahnú ndetū i. Chí ma cúu ga i nájnūhun ndīyí, chí sa suhva cotecu i ní cáni.

25 Jendaá cahán rí jíin ró jeē quiji quiví, te vijna je ni quejéé, jeē táca ñayuu cácu nájnūhun ndīyí, cuní nahín i jñūhun cáhān ruhū, Sēhe Yaa Dios. Te ñayuu cuatáhu, chí cotecu i ní cáni.

26 Chí nájnūhun iyó poder máá Tátá rí jeē sáha ya jeē técu ndihí-ni, suni súcuan ní jēhe ya poder nuū ruhū jeē sáha ri jeē cotecu ndihí-ni.

27 Te suni ní sáha ya jeē ndíso jniñu ri sándaā rí siquī ñayuu, chí cúu ri Yaa ní nduu tēe.

28 Ma náā ni rō caní ni rō siquī jñūhun cáhān rí. Chí quee quiví jeē táca ndīyí cuní sōho i jñūhun cahān rí,

29 te quendacoo i nuū yíndūji i. Te ndīyī jeē ní casáha jniñu váha, natecu i jeē cótecu i ní cáni. Te ndīyī jeē ní casáha jniñu neé, natecu i te quivícoo i nuū jnahnú ndetū i.

*Ndé vé cúu jeē steén jeē ní tají Yaā Dios yā*

30 Tú na vé cúu sáha ri jeē maá rī. Chi nájñuhun ndácu Yaā Dios jniñu nuū rī, súcuan sándaā rī jniñu. Te ndaā sándaā rī, chi tu sáha ri jeē cuni maá rī, chi sáha ri jeē cuni maá Tátá rī, Yaā ní tají ruhū vēji rī.

31 Núu ruhū cahān rī jeē cúu ri Sēhe Yaā Dios, te cachi ñayuu jeē tu jéjñiñu jñuhun cáhān rī.

32 Te íyó inga jeē cahán jeē cúu ri Sēhe ya. Te jíni rī jeē jñuhun un jéé cahán yā, chi níhín jniñu.

33 Máá ró ni catajī ró tēe ni cacajñuhún de Juan. Te Juan chi ndaā ni cahān de jñuhun rī.

34 Te vēsú súcuan te nasūu ruhū cúu jeē jíni ñuhún jeē steén ñin tēe jeē Sēhe Yaā Dios cúu rī. Chi máá ró cúu jeē jíni ñuhún návāha candíje ró te cácu ró jíjnāhan ró. Jeē yúcuan ní cahān rī jeē iyó ndáā jñuhun ri jeē ní nacani Juan.

35 Máá Juan ni cuu de nájñuhun ñin lámpara jeē cayú te cúndijin, cúu jeē ní nacani de jñuhun rī. Te máá ró, jecu-ni quiví ní canujnahan ni ró jeē ni steén de nuū rō.

36 Te íyó jéé steén cají gá jeē kujéhnu ri vēsú jeē ní cáhān Juan. Suu jniñu sáha ri, jniñu jeē ní tejñiñu Tátá rī ruhū jeē sáha rī, jniñu un steén ndije jeē maá yá ní tají ruhū vēji rī.

37 Te Tátá rī jeē ní tají yá ruhū vēji rī, suni máá yá cahán nuū tútu ñi jeē kujéhnu rī, vēsú tu ní cájini sōho cuiti rō jeē cahán yā, ni tu ní cájito ró yá.

38 Te tu ní cáchuhun ni rō jñuhun un jéé ni cáhān Tátá rī, chi tu cácandíje ró ruhū, Yaā ní tají yá vēji.

39 Cánanducú vii rō táca jñuhun cáhān tutu ñi, chi cájeni ni rō jeē yúcuan níhín rō jñuhun jeē cótecu rō ní cáni sáha. Te jñuhun siquī maá rī cúu jeē cahán tutu ún.

40 Te vēsú súcuan te tu cácuni rō cuatáhú ró ruhū quivícoo ró ndaha ri návāha cotecu rō ní cáni.

41 Tu chíhi rī cuenta jñuhun jeē cácahān ñayuu jeē kujéhnu rī.

42 Chi je jíni rī ndese cándaā ánuá rō jeē tu cáhiyo maní rō jíin Yaā Dios.

43 Ruhū vēji rī jíin jniñu cúní Tátá rī, te tu cájetáhú ró ruhū. Te núu inga tēe quee de jíin jniñu cúní maá de, sa tēe un yáchí cuatáhú ró de.

44 ¿Nde se cuu candíje ró jíjnāhan ró? Chi máni cácuni rō jeē kujéhnu ró sáha jñāhan ró, te tu cánducú ró jeē kujéhnu ró sáha Yaā Dios, jeē maá ñin-ni ya iyó.

45 Ma cáni ni rō jeē cáquin rī cuēchi siquī rō nuū Tátá rī. Chi íyó ñin jeē cáquin cuēchi siquī rō, suu Moisés, tēe jeē cáñuhun ni rō jeē quendōo ndaā rō jíin ley jeē ní tee de.

46 Chi núu ní cácandíje ró jéé ní tee Moisés, te suni candíje ró ruhū nuú, chi jñuhun máá rī ní tee de.

47 Te núu tu cácandíje ró jñuhun ri jeē ní tee de, ¿te ndese candíje ró jñuhun cáhān maá rī núu súcuan? Achí yá jíin de.

*Jeē ni scáji yā uhūn mil tēe*

(Mt. 14.13-21; Mr. 6.30-44; Lc. 9.10-17)

## 6

<sup>1</sup> Yūcuán na te cuahān Jesús inga lado mar Galilea, jeē cúu mar Tiberias.

<sup>2</sup> Te yōhyo cuehē ñayuu ni candiquin i ya, chi ni cajito i tãcá jniñu jéhu jeē steén yā poder yā jeē ní nasávaha ya ñayuu cácuñu.

<sup>3</sup> Te ni caa ya in yucu, te ni cucōo ya yūcuan jín tée cáscuáha jín yá.

<sup>4</sup> Te je ni cuyajni vico pascua jeē cānucūhun ni jnāhan ñuu yā hebreo jeē ní cacācu i nuū ñáyuu naciōn Egipto.

<sup>5</sup> Te ni ndacoto ya, te ni jito ya jeē véjicoo cuehē ndasí ñáyuu. Te ni cahān yā jín Felipe:

¿Ndé nuū cuaan yó jéē caji ñayuu yáha jijnāhan i?

<sup>6</sup> Te súcuan ni cahān yā jeē jito ndee yā de núu ndese cahān de. Chi je jíní maá yá ndese sáha ya.

<sup>7</sup> Te ni cahān Felipe jín yá:

Te ni ma cánda uñ ciento denario staā, ni vēsú jeē caji i jecu jecu jijnāhan i, áchí de.

<sup>8</sup> Yūcuán na te ni cahān Andrés, ñani Simón Pedro, inga tēe scuáha jín yá un:

<sup>9</sup> Yáha íne in sūchi yí jéē ndíso i uhūn staā cebada jín uñ chācá. ¿Te ndé canda cuiti ún, chi ñayuu cuehē ndasí cúu?

<sup>10</sup> Yūcuán na te ni cahān Jesús:

Cahān jín ñáyuu na cucōo i, áchí yá.

Te yūcuan cáa cuehē ite, te ni cacucōo i, te nájñūhun uhūn mil tēe cúu.

<sup>11</sup> Te ni quihin Jesús staā ún, te ni nacuatáhú yá nuū Yaā Dios. Te ni jēhe ya nuū tēe cáscuáha jín yá, te máá de ni casaja de nuū ñáyuu ní cacucōo ún. Te suni súcuan ni sáha ya jín cháca, te ni cayeji i nasaa cácuni maá i.

<sup>12</sup> Te nuū ní candutú chíji i, te ni cahān yā jín tēe cáscuáha ún:

Nastútú ró tãcá pedazo jeē ni ndóo, návaha tu stívi cuiti yō.

<sup>13</sup> Te ni canastútú de, te ni chitú úxí uñ jica pedazo jeē ni ndóo siquī ndihúñ staā cebada un jeē tuá ni ndíhi caji ñayuu.

<sup>14</sup> Te ñayuu un ní cajito i jniñu jéhu ni sáha Jesús jeē ni steén yā poder yā. Te ni cacahān i:

Jendaá ndije jeē tēe yáha cúu jeē cahān tutu jeē quíji ini ñayívi jéē nácani jñūhun Yaā Dios. Achí i.

<sup>15</sup> Te ni jini Jesús jeē cácuni i sáfuerza i ya jeē cuu ya rey i núu. Te ni cujiyo tucu máá in-ni ya, ni caa ya cuahān yā nuū sucún gá yucu.

### *Jeē ní jica jéhe yá nuū mar*

*(Mt. 14.22-27; Mr. 6.45-52)*

<sup>16</sup> Te nuū cuácuaa, te tēe cáscuáha jín yá ni nanuu de cuango de nde mar.

<sup>17</sup> Te ni ndívicoo de ini barco, te ni cascáca de jeē quíngoo de nde inga lado mar nde ñuu Capernaum. Te je ni cunee, te ná tu ndee Jesús nuū de.

<sup>18</sup> Yūcuán na te ni jequihí in tachí ñihin, te sáha jeē ndóna ndute mar un.

<sup>19</sup> Te jeē ní cuu nájñūhun uhūn chí íñu kilómetro cájica de jín barco, te ni cajito de jeē jica Jesús nuū mar, te ni cuyajni ya vēji ya nuū barco. Te ni cayūhú de.

<sup>20</sup> Te máá yá ni cahān yā jín de:

Máá rí cúu. Ma yūhu ró jijnāhan ró.

<sup>21</sup> Te ni cacusñ ni de jeē na quívi ya ini barco. Te ni sáha ya jeē yachí-ni ni jinūcōo-ni de ñūhun íchi núu cuángoo de ún.

### *Jeē cānanducú ñayuu Jesús*

22 Te inga quiví ún, te ñayuu jeē ní caquendōo inga lado mar, ni cajini i jeē tée cáscuáha jíin yá cuangoo de jíin máñúhún-ni barco ni íne yūcuán, jíin jéé tu ní quiví Jesús quihín yá jíin de jíináhan de.

23 Te sava ga barco jeē véjicoo ichi ñūū Tiberias, ni quecoo yajni lugar nuū ni cayeji i staā jeē ní nacuatáhú máá Jítoho yō jehē.

24 Te jeē ní cajito ñayuu un jéé tuá Jesús íne ya yūcuán, ni tée cáscuáha jíin yá, te ni quivícoo i táca barco un, te cuangoo i ñuu Capernaum cuananducú i ya.

*Jesús cúu staā jeē cótecu yō ñí cáni*

25 Te nuū ní jíinūcoo i nde inga lado mar, te ni nanihín jnáhan i jíin Jesús. Te ni cacajñuhún i ya:

Maestro, ¿na hora ni quee ni yáha?

26 Te ni cahán Jesús:

Jendaá cahán rí jíin ró jeē cánanducú ró ruhū síquī jeē ní cayeji ró nde ni candutú chíji ró, te nasūu síquī jeē ní cajito ró táca jniñu jéhnu jeē steén rí poder rí.

27 Ma cóndihvī ni ró maá síquī jeē caji ró jeē yachī nataxín, chi sa suhva condihvī ni ró síquī jeē nihín ró jeē cótecu ró ñí cáni sáha. Te máá rí, Yaā ni nduu tēe, cuáha rí nájnūhun staā jeē cótecu ró ñí cáni sáha. Chi Tátá rí Yaā Dios ni jeni ya ruhū jeē sáha rí súcuan. Achí yá jíin i.

28 Yūcuán na te ni cacajñuhún i ya:

¿Nde se sáha ná náváha squícu ná jniñu cúní Yaā Dios?

29 Te ni cahán Jesús:

Jniñu jeē cuní Yaā Dios cúu jeē candíje ró rúhū, Yaā ní tají yá vēji.

30 Yūcuán na te ni cacahán i:

Núu súcuan ¿te na jniñu jéhnu sáha ní coto ná jíináhan ná te candíje ná jéé ní tají yá nihín? ¿Na jniñu cúu jeē sáha ní?

31 Chi táca jíi yō jenahán ni cayeji de maná jeē ní cuun ichi ándiví ndé nuū ñúhun téhé, nájnūhun yósó nuū tútu: Yaā Dios ni jéhe ya staā ni cuun ichi ándiví, ni cayeji i, áchí tutu. Achí i jíin yá.

32 Te ni cahán Jesús:

Jendaá cahán rí jíin ró: Nasūu Moisés ni jéhe staā un núu de jíináhan de jeē ní cuun ichi ándiví, chi máá Tátá rí ni jéhe. Te máá yá jéhe staā ándiví jéé cótecu ró ñí cáni sáha.

33 Chi staā jéhe Yaā Dios cúu máá Yaā ní quiiji ichi ándiví, te sáha ya jeē ñayuu ñayiví cotecu i ñí cáni ándiví. Achí yá.

34 Te ni cacahán i jíin yá:

Níní cuáha ni stáā ún caji na núu súcuan.

35 Te ni cahán Jesús:

Máá rí cúu máá stáā jeē cótecu ró ñí cáni sáha. Ndé vé quiví ndaha ri, ma cúu cuiṭi gā sōco. Te ndé vé candíje ruhū, ma jichí cuiṭi gā.

36 Te nájnūhun je ni cahán rí jíin ró, tu cáandíje ró rúhū, vésú ni cajito ró núu rí.

37 Táca ñáyuu jeē sáha Tátá rí jeē candíje i ruhū, máá i quivícoo ndaha ri. Te jétáhú rí táca jéé cuní quiví ndaha ri, chi ma squéhichī cuiṭi rí quihín.

38 Chi ni quiiji rí ichi ándiví náváha sáha rí jniñu jeē cuní Yaā ní tají rúhū, te nasūu jéé sáha rí jeē cuní máá rí.

39 Te jniñu jeē cuní Tátá rí, Yaā ní tají rúhū, cúu jeē ma scuíta ri ni ñn ñayuu ni jéhe ya nuū rí, chi condito rí i te nastécu rí i quiví jíinu ñayiví.

40 Te Yaā ní tají rúhū, cuní yā jeē tāca ñayuu jeē nihín i jnūhun ruhū, Sēhe Yaā Dios, te candíje i ruhū, cotecu i ñí cáni andiví. Chi nastécu rí i quiví jínu ñayiví. Achí yá.

41 Yūcuán na te ni caquejéé jnāhan ñuu yā hebreo cácahān de siquī yā, chi na cahān yā jeē maá yá cúu staā ní quiji ichi ándiví.

42 Te ni cacahān de:

¿A násūu téé yāha cúu Jesús, sēhe José? Te cájini yō tatá de náná de. ¿Te ndese cúu jeē cahán de jeē ni quiji de ichi ándiví núu súcuan?

43 Te ni cahān Jesús jíin de:

Ma cahán rō siquī rí jijnāhan rō.

44 Ni ñin ñayuu ma cúu quiví i ndaha ri núu ma sáha Tátá rí jeē cúu ni i quiví i, chi máá yá ni tají rúhū vēji rí. Te nastécu rí i quiví jínu ñayiví.

45 Te suhva yósó núu tútu ni cateē téē ni canacani jnūhun Yaā Dios: Tācá i chi steén Yaā Dios nuū i, áchí. Núu súcuan te tāca ñayuu jíni sōho jnūhun cáhān Tátá rí, te jétáhú i jeē steén yā nuū i, ñayuu ún chi quívicoo i ndaha ri.

46 Te tu ní jíto ni ñin ñayuu nuū maá Tátá rí. Chi máñúhún-ni ruhū ni jito ri nuū yā, chi nde nuū maá yá vēji rí.

47 Jendaá cahán rí jíin rō jijnāhan rō jéē ñayuu jeē candíje i jeē jnáma ri i, máá i cotecu i ñí cáni.

48 Máá rí cúu staā jeē cótecu rō ñí cáni sáha.

49 Tāca jíí rō jenahán, ni cayeji de staā maná jeē ní cuun ichi ándiví ndé nuū ñūhun téhé, te tu ní sáha jeē cótecu de ñí cáni andiví.

50 Te staā jeē cahán rí jeē vēji ichi ándiví, chi na-ni ñayuu caji, te cotecu i ñí cáni andiví.

51 Te suu máá rí cúu staā un jéē ní quiji ichi ándiví jéē sáha jeē cótecu rō ñí cáni. Te ñayuu jeē cáji staā yāha, cotecu i ñí cáni andiví. Te staā jeē cuāha ri un cúu yiqui cúñu rí, te cuāha ri návāha ñayuu ñayiví cotecu i ñí cáni andiví. Achí yá.

52 Yūcuán na te jnāhan ñuu yā hebreo ni cacahān de jíin táca jnāhan de:

¿Ndese cuu cuāha téē yāha yiqui cúñu de caji yō? achí de.

53 Te ni cahān Jesús jíin de:

Jendaá cahán rí jíin rō: Núu tú candíje rō jéē yiqui cúñu ruhū, Yaā ní nduu téē, cúu nájñūhun staā, te niñí rí cúu nájñūhun ndute, núu súcuan te ma cótecu rō ñí cáni andiví.

54 Chi ñayuu cácaandíje jeē yiqui cúñu rí cúu nájñūhun staā te niñí rí cúu nájñūhun ndute, máá i cotecu i ñí cáni. Te nastécu rí i quiví jínu ñayiví.

55 Chi yiqui cúñu rí jíin niñí rí cúu ndije jeē sáha jeē cótecu i ñí cáni.

56 Te ñayuu cácaandíje jeē yiqui cúñu rí jíin niñí rí cúu nájñūhun staā jíin ndute jeē cótecu i ñí cáni sáha, máá i níni ndúu i jíin rí, te ndúu rí jíin i.

57 Máá Tátá rí, Yaā técu, ni tají yá ruhū vēji ri, te técu rí sáha máá yá. Te suni súcuan, ñayuu cácaandíje jeē cúu ri nájñūhun staā i ndute i, suni súcuan cotecu i ñí cáni sáha ri.

58 Máá rí cúu staā ní quiji ichi ándiví. Te staā jeē cahán rí tu cúu nájñūhun staā maná jeē ní cayeji táca jíí rō jenahán, chi tu ní sáha jeē cótecu de ñí cáni. Te staā jeē cahán rí, chi ñayuu caji, cotecu i ñí cáni sáha, áchí yá.

59 Tāca jnūhun yāha ní steén Jesús nuū ñayuu ní candutútú ini vehe ñi sinagoga ñuu Capernaum.

*Jnūhun cotecu yō ñí cáni*



60 Te cuehē ñayuu cascuáha jíin yá, ni cajini sōho i jnūhun yáha jéē ni stéén yā. Te ni cacahān maá i:

Yōhoyo yíi jnūhun cáhán yā yāhá. ¿Nde se cuu cuatáhú yó?

61 Te ni jini Jesús jeē cacahān i jeē yíi cúu jnūhun yāhá, te ni cahān yā jíin i:

¿A yíi sáha jnūhun yáha jíin ró jijnáhan ró?

62 ¿Te ndese sáha ró núu coto ró jéē ruhū, Yaā ní nduu tēe, ndaa ri nuhun rī nuū ní cóndee rī xīhna ñūhún?

63 Máa ánuá ñayuu cúu jeē sáha jeē técu i. Chi yiqui cúñu i tu jéjníñu cuiti súcuan. Te táca jnūhun ni cahān rī jíin ró cúu jeē quéndōo vāha ánuá rō, te cotecu rō níi cáni sáha.

64 Te sava ró chi tu cá candíje ró. Achí yá.

Chi nde xīhna ñūhún je jíni Jesús ndé-ni cúu ñayuu jeē ma cándíje, jíin ndé ñin de cúu jeē nastúu de ya.

65 Te ni cahān gā yā:

Jeē yúcuan ní cahān rī jíin ró jeē ma cúu quívi ni ñin ñayuu ndaha ri, te núu tu sáha Tátá rī jeē cúu ni i quívi i, achí yá.

66 Te nde quívi ún te cuehē ñayuu cascuáha jíin yá, ni castóo i ya, te tuá ni cájica i jíin yá.

67 Yūcuán na te ni cahān yā jíin máa ndihúxí uū tēe cáscuáha jíin yá:

¿A suni cáculni máa ró quingoo ró, chí naún?

68 Te ni cahān Simón Pedro:

¿Ndé núu gā quingoo ná? Chi máa ní cúu jeē nácani jnūhun jeē cótecu na níi cáni sáha.

69 Te ni cacandíje ná te cájini na jéē maá ní cúu Cristo, Sēhe Yaā Dios, Yaā técu, achí de.

70 Te ni cahān Jesús:

Te vésu ni nacáji ri ndihúxí uū rō, te íyó ñin ró jeē ní quívi jexeén ini. Achí yá.

71 Te súcuan ni cahān yā siquī Judas Iscariote, sēhe Simón. Chi máa de nastúu de ya, vésu ñin jnáhan jeē uxí uū tēe cáscuáha jíin yá cúu de.

*Jeē tu ní cá candíje ñani Jesús*

## 7

1 Yūcuán na te jíca cuu Jesús región Galilea. Chi tu cúní yā caca cuu ya región Judea, chí jnáhan ñuu yā hebreo jeē cáyūcu yúcuan, cáculni de cahni de ya.

2 Te cuacuyajni vico jeē casáha ñayuu yā hebreo vehe ramadá, cáyūcú i chíji.

3 Te ñani yā ni cacahān de jíin yá:

¿Naun máa yáha-ni íne ró? ¿Naun tú quihín rō región Judea, návāha tēe yūcuán jéē cá candíje de rōhó, suni coto de jniñu jéñnu sáha ró.

4 Chi núu cúní ñin tēe jeē cuité núu jnūhun de, te tu sáha yuhu de jniñu. Te núu sáha nde ró táca jniñu jéñnu, vāha ga na sáha ró jéē cúní ndíviñi ñayuu.

5 Súcuan ni cacahān ñani yā jíin yá, chí ni máa de tu cá candíje de ya.

6 Yūcuán na te ni cahān Jesús:

Ná tu queue máa quívi jeē quihín rī. Te máa ró jijnáhan ró chi na-ni quívi-ni te cuu quingoo ró.

7 Chi ma quítí ni ñayuu ñayívi núu rō, te máa rí chí quítí ni i jito i ruhū, chí cáhán rī jeē jíni rī jeē máni jniñu néé casáha i.

8 Cuángoo máa ró vico ún. Te máa rí chí ma quihín rī vijna, chí ná tu queue máa quívi cánuú quihín rī. Achí yá.

<sup>9</sup> Súcuan ni cahān yā jnūhun yáha jíin de, te ni quendōo ya Galilea.

*Jeē ni jéhēn Jesús vico vehe ramáda*

<sup>10</sup> Te nuū ni yáha ñani yā cuangoo de vico ún, te sáa te suni cuahān maá yá. Te tú cuahān ndijin yā, chí tu ní stéen yā maá yá.

<sup>11</sup> Te jnāhan ñuu yā hebreo cánanducú i ya nuū víco ún, te cácahān i:

¿Ndé nuū íne tēe ún? áchí i.

<sup>12</sup> Te yōhyo ni cacahān ñayuu jeē siquí yā, chi sava i cácahān: Tēe vāha cúu de. Te sava ga i cácahān: Tuú chí stáhu de ñayuu.

<sup>13</sup> Te yuhu-ni ni cacahān i jnūhun ya, chí cáyūhú i jeē quití ni jnāhan i tēe hebreo.

<sup>14</sup> Te jeē ní cuu sava vico, te ni quee Jesús, ni quiví ya templo cáhnu, te ni quejéé yá stéen yā jnūhun.

<sup>15</sup> Te ní canaa ni jnāhan ñuu yā hebreo cájini sōho i, te ni cacahān i:

¿Ndese jíni tēe yáha cuéhē jnūhun ndíchí, chí tu ní jíca de escuela? áchí i.

<sup>16</sup> Yūcuán na te ni cahān Jesús:

Jnūhun stéen rī chí nasūu jnúhun máá rí cúu, chí jnūhun jeē ni jéhe máá Yaā ní tají rúhū cúu.

<sup>17</sup> Núu ñin ñayuu cuní i sáha i jniñu cuní Yaā Dios, ñayuu ún chí jecūhun ni i núu nde nuū Yaā Dios vēji jnūhun stéen rī, chí jnúhun jeē jéni ni maá-ni ri cúu.

<sup>18</sup> Tēe cáhān jnūhun jéni ni maá de, tēe un ndúcú de jeē na sájéhnu ñayuu de. Te núu ñin tēe ndúcú de jeē sajéhnu de Yaā ní tají de, tēe un cúu tēe ndaā, te tú na jnūhun stáhu íyó jíin de.

<sup>19</sup> ¿A násūu jéē ni jéhe Moisés ley yā nuū rō jeē squícu ró? Te ni ñin ró tu cásquícu. Chí sa jeē cácuni rō cahni rō ruhū, ¿te najehē cúu? áchí yá.

<sup>20</sup> Te ni cacahān ñayuu cuehē ún:

Tachí ndóho ró. ¿Ndé ñin cuní cahni rohó?

<sup>21</sup> Te ni cahān Jesús:

Ni nasávāha rī ñin tēe quiví ndétátú, te ndivii rō ni canaa ni rō ni cajito ró jeé quiví ndétátú ni sáha rī jniñu ún.

<sup>22</sup> Te Moisés ni jéhe de ley jeē cúu circuncidar nuū rō. Te cásáha ró circuncidar sūchi yíí núu uná quiví jeē ní cacu i, vēsú quiví ndétātu cúu. (Te nasūu máá Moisés ní jéquin ley un, chí je ni íyo nuū táca jíí de.)

<sup>23</sup> Núu súcuan te núu cásáha ró circuncidar vēsú quiví ndétātu cúu, návāha squícu ró ley Moisés, ¿te najehē cáquití ni rō jeē ní nasávāha ndíhi ri ñin tēe quiví ndétátú?

<sup>24</sup> Ma yachí cani ni rō jeē cuéchi cúu jeē sáha ri. Chí sa cani vāha ni rō siquí táca jniñu vāha. áchí yá.

*Jeē ní cachi Jesús ndé nuū véji ya*

<sup>25</sup> Yūcuán na te sava ñayuu ñuu Jerusalén ni cacajnūhun jnāhan i:

¿A násūu tēe yáha cúu jeē cánanducú tēe cácujeñnu jeē cáhni de, chí naún?

<sup>26</sup> Te yāha cáhān ndijin de nuū chitú, te tú na jnūhun cácahān jíin de. ¿A sanaa te ni cacundaā ni tēe cácujeñnu jeē tēe yáha cúu Cristo jeē achí tutu jeē quíji, chí naún?

<sup>27</sup> Te tuú chí je cájini yō nuū véji tēe yáha. Te jeē quíji Cristo, chí ni ñin yó má cuní ndé chí quíji ya. áchí i.

<sup>28</sup> Yūcuán na te ni cahān jee Jesús jeē stéen yā jnūhun ini templo:

Cájini rō ruhū, te cájini rō ndé ñuu vēji ri. Te vēsú súcuan te máá Yaā ndaa cúu jeē ní tají rúhū vēji ri, te tú vēji ri jeē cuní maá rí. Te tu cájini rō ndese Yaā cúu ya.

<sup>29</sup> Te máá rí chí jíni rī yā, chí nde nuū maá yá vēji ri, te máá yá ní tají rúhū, achí yá.

<sup>30</sup> Yūcuán na te ní canducú de jnii de ya. Te ní ñin de tu ní cúu jnii de ya, chí ná tu quee maá quiví jeē jnii de ya.

<sup>31</sup> Te cuehē ñayuu chí ní cacandíje i ya, te ní cacahān i:

¿A násuu tēe yáha cúu Cristo, Yaā ndétu yó jēē quiji? Chí cuehē ndasí jniñu jéhnú sáha ya jeē steén yā poder yā. Achí i.

### *Jeē ní catají de policía jeē jnii de Jesús*

<sup>32</sup> Te ní cajini tēe fariseo jeē súcuan cácahān ñayuu jnūhun ya. Te máá de jíin sūtú cácujeñnu, ní catají de policía cándito templo jeē jnii de ya.

<sup>33</sup> Te ní cahān Jesús:

Jecu na quiví condee rī jíin ró jijnáhan ró. Yūcuán na te nuhun rī nuū Yaā ní tají rúhū vēji ri.

<sup>34</sup> Te nanducú ró ruhū, te ma nánihīn rō ruhū. Chí ma cúu jinūcoo ró núu cóndee rī. Achí yá.

<sup>35</sup> Yūcuán na te máá tēe un ní cacajñūhun jnáhan de:

¿Te ndé nuū quihín tēe yáha jeē ma nánihīn yō de? ¿A quihīn de nuū jnáhan yó hebreo jeē ní cajitē núu cáyūcu ndé nación Grecia? ¿Te á steén de jnūhun nuū ñayuu Grecia, chí naún?

<sup>36</sup> ¿Te na jnūhun cúu jeē ní cahān de jíin yó jeē nanducú yó de te ma nánihīn yō de, chí ma cúu jinūcoo yó núu cóndee de? Achí tēe un jijnáhan de.

### *Siquí ndute jeē cótecu yō ní cáni sáha*

<sup>37</sup> Te quiví sándihí vico ún te cúu vico cáhnu ga. Te quiví un ní ndocuiñi Jesús, te ní cahān jee ya:

Núu ndé ñayuu jnáa ndasí i táca jéē yáha jeē sáha ri jehē i, nájñūhun jeē jichí i ndute, núu súcuan te na quiví i ndaha ri te coho i ndute, cúu jeē nihín i jeē váha ún.

<sup>38</sup> Te ñayuu jeē candíje jeē jnáma ri i, chí ini anuá i condee Espíritu Santo, te cuu ya nájñūhun yūte cáne ñuhún jeē sáha ya jeē cótecu i ní cáni, nájñūhun cáhán tutu i. Achí yá.

<sup>39</sup> Te súcuan ní cahān yā jeē ñayuu candíje jeē jnáma ya i, nihīn i Espíritu Santo. Chí ná tu quee Espíritu ún, chí ná tu ndaa Jesús quinhun yā nuū ndujéhnú ya.

### *Jeē ní cacusān ñayuu siquí yā*

<sup>40</sup> Te sava ñayuu cuehē ún, ná ní cajini sōho i jnūhun yáha, te ní cacahān i: Jendaá jeē tēe yáha cúu jeē achí tutu jeē quiji de nacani de jnūhun Yaā Dios, achí i.

<sup>41</sup> Te sava ga i ní cacahān:

Tēe yáha cúu Cristo, Yaā ní tají Yaā Dios.

Te sava ga i chí ní cacahān i:

Tuú chí nasū Galilea quiji Cristo.

<sup>42</sup> Chí cáhán tutu i jeē ndé yucūn rey David cacu Cristo, te cacu ya ñuu Belén, ñuu nuū ní cacu máa David. Achí i.

<sup>43</sup> Te súcuan te ní cacusān ñayuu jeē siquí yā.

<sup>44</sup> Te sava i cácuni i jnii i ya, te ní ñin i tu ní jnii i ya.

*Jeē tu ní cácanđije tēe cácujeñhu*

<sup>45</sup> Yūcuán na te policía cándito templo tu ní cájni de Jesús, te cuanungoo de nuū tāca tēe fariseo jiín nuū sutú cácujeñhu. Te tēe ún ni cacajnūhún de policía:

¿Najehē tu ní quécoo ró jiín de? áchí.

<sup>46</sup> Te ni cacahān policía un:

Tú cuiti ni iin tēe cáhán vāha ndasí nájñūhun cáhán tēe yūcuan, áchí.

<sup>47</sup> Te ni cacahān tēe fariseo:

¿Te á suni nde máá ró jijnáhan ró ní stáhú de naún?

<sup>48</sup> Ni iin jnáhan ruhū tēe cácujeñhu jiín tēe fariseo, tu cácanđije ri jñūhun cáhán tēe ún, ¿te naun cácanđije máá ró?

<sup>49</sup> Te ñayuu cuehē yāhá jeē tu cájecūhun ni i ley Moisés, chi jnahnū ndetū i jeē cácanđije i tēe ún, áchí de jijnáhan de.

<sup>50</sup> Te ni cahān Nicodemo, tēe ni jéhēn nuū yā iin jecuáa, te suni iin tēe fariseo cúu de:

<sup>51</sup> Cáhán ley yō jeē ma cúu tee yó cuēchi siquī iin tēe, te núu tú xīhna gā cuni sōho yó ndese cáhán de, návāha cucáñhu ni yō na cuēchi ni sáha de. Achí de.

<sup>52</sup> Te ni cacahān jiín de:

Te rōhó, ¿á suni nde Galilea vēji ró jeē cahán rō jehē tēe ún? Nanducú váha ró nuū tútu i te cuni ró jeē ndé Galilea tu quénda cuiti ni iin tēe nácani jñūhun Yaā Dios. Achí jiín de.

<sup>53</sup> Te cuanungoo de ná vehe ná vehe de.

*Jñūhun ñahan ní casiquí ndéē jnáhan***8**

<sup>1</sup> Te ni caa Jesús cuahān yā yucu Olivos.

<sup>2</sup> Te jeē cuácundijin inga quivī, te ni ndee tucu ya templo. Te ndihi ñayuu ni quecoo i nuū yā. Te ni cucōo ya, te ni steén yā jñūhun nuū i.

<sup>3</sup> Yūcuán na te tēe cástéén tutu ley Yaā Dios jiín tēe grupo fariseo, ni quecoo de jiín iin ñahan jeē ní canihñ de ña jeē casiquí ndéē ña. Te ni cajeni de ña mēñú.

<sup>4</sup> Te ni cacahān de jiín yá:

Maestro, ni canihñ ná ñahan yáha jeē casiquí ndéē ña.

<sup>5</sup> Te ley Moisés ndácu jniñu nuū yō jeē cuáha yó yūu xinī ñahan cásáha súcuan návāha cuu ña. Te máá ní, ¿ndese cáhán ni?

<sup>6</sup> Te súcuan ni cacahān de jeē cájito ndee de ya núu cuatáhú yá jeē cahán ley un, chi núu tuú te caquin de cuēchi siquī yā. Te Jesús ni jīta ndeyi ya, te ni tee ya nuū ñūhun jiín xinī ndáha ya.

<sup>7</sup> Te jeē cácajnūhun cácajnūhún de ya, te ni ndonehen ya maá yá, te ni cahān yā jiín de:

Núu ndé iin máá ró tú na cuēchi ró, te xīhna gā máá ró cuāha yuū xinī ña núu súcuan, áchí yá.

<sup>8</sup> Te ni jīta ndeyi tucu ya, te ni tee tucu ya nuū ñūhun.

<sup>9</sup> Te nuū ní cajini de jeē súcuan ni cahān yā, te ni cajecūhun ni de jeē suni cáhīyo cuēchi de. Te ná iin ná iin de ni quendacoo de cuahān de, xīhna gā tēe jéñhu ga te nde nuū ní ndihi na. Te ni ndōo máá iin na Jesús jiín ñahan índichi mēñú un.

<sup>10</sup> Te ni ndonehen tucu ya maá yá, te tuá ni iin tēe un ní jito ya, chi máá na ñahan ún. Te ni cahān yā jiín ña:

¿Ndé chi cuángoo tēe cájequin cuēchi siquī rō? ¿A tú ni ìn de ní ndóna cahān gā cuēchi siquī rō?

<sup>11</sup> Te ni cahān ña:

Tú ni ìn de, áchí ña.

Yūcuán na te ni cahān Jesús jín ña:

Ni ruhū, ma cahān rī cuēchi siquī rō. Cuáhán te ma sáha ga rō cuēchi, áchí yá.

*Jesús cúu máa luz jeē steén ini anuá ñayuu*

<sup>12</sup> Te inga jínu ni cahān Jesús jín ñáyuu:

Máa rī cúu nájñuhun luz jeē steén ini anuá ñayuu ñayiví, jeē sáha jeē jécūhun ni i siquī Yaā Dios. Ñayuu candíje ruhū chi ma cáca i nájñuhun nuū nēé, chi sa suhva conevāha i luz ini anuá i jeē sáha jeē cótecu i ní cáni.

<sup>13</sup> Yūcuán na te ni cacahān tēe fariseo jín yá:

Róhó chi cáhán rō jñuhun jehē maá ró, te tu jéjññu jñuhun cáhán rō.

<sup>14</sup> Te ni cahān Jesús jín de jíjñáhan de:

Vēsú cáhán rī jehē maá rí, te iyó ndáa jñuhun cáhán rī. Chi jíní rī ndé nuū véji rī jín ndé nuū quihín rī. Te róhó tu cájini rō ndé nuū véji rī ni ndé nuū quihín rī.

<sup>15</sup> Máa ró chi cuenta ñayuu ñayiví casándaā rō siquī jñuhun cáhán rī. Te ruhū chi tu sándaā mañúhún rí siquī ni ìn ñayuu.

<sup>16</sup> Te núu sándaā rī siquī i, te ndaā sáha rī, chi tu sáha mañúhún rí, chi sándaā rī nde jín máa Tátá rī, Yaā ní tají rúhū véji rī.

<sup>17</sup> Te yósó núu tútu ley cánevāha ró jéé núu inuú cácahān uū testigo, te jíní ñúhún cuatáhú ró jeē cacahān, chí iyó ndáa jñuhun ún.

<sup>18</sup> Núu súcuan te ruhū cúu ìn jeē cahān ndaā rī jehē rī. Te inga jeē cahān ndaā jehē rī cúu máa Tátá rī, Yaā ní tají rúhū. Achí yá.

<sup>19</sup> Te ni cacahān de jín yá:

¿Ndé nuū ndeé Tátá rō?

Te ni cahān Jesús:

Tu cájini rō ruhū ni Tátá rī. Te núu jeē cájini rō ruhū, suni cuni rō Tatá rī nuú.

<sup>20</sup> Tāca jñuhun yáha ní cahān Jesús jeē steén yā ini templo nuū cáyūcu yéjñu jeē cásocō i xuhún. Te tú ni ìn de ní jñá de ya, chí ná tu quee maá quiví jeē jñá de ya.

*Jeē ni cáhán yā jeē ma cúu jinūcoo de nuū cóndee yā*

<sup>21</sup> Te ni cahān tucu Jesús jín de:

Ruhū chí quihín rī, te nanducú ró rúhū, te ma nánihín rō ruhū, chí quendōo cuēchi ró siquī rō quiví cúu rō. Te jeē yúcuán má cúu jinūcoo ró núu quihín rī, achí yá.

<sup>22</sup> Yūcuán na te tēe hebreo un ní cacahān maá de:

¿A cahni tēe yáha maá de, te jeē yúcuán cáhán de jeē ma cúu jinūcoo yó núu quihín de, chí naún? Achí de.

<sup>23</sup> Te ni cahān yā:

Máa ró jíjñáhan ró chí ñayiví yáha véjicoo ró, te ruhū chí nde andiví véji rī. Máa ró cácuo ñayuu ñayiví yáha, te ruhū chí nasūu tēe ñayiví yáha cúu rī.

<sup>24</sup> Jeē yúcuán ní cahān rī jeē quendōo cuēchi ró siquī rō quiví cúu rō. Chi núu ma candíje ró jéé maá rí cúu Cristo, te quendōo nahín cuēchi ró siquī rō quiví cúu rō. Achí yá.

25 Te ni cacajñuhún de ya:

Núu súcuan ¿te ndé ñin cúu ró?

Te ni cahán yā:

Je ni cachi ri nuū rō nde xīhna ñuhún ndé ñin cúu ri.

26 Te iyó cuéhē gā jñuhun cuu cahán rī jín ró te sándaā rī siquī rō. Te ma cahán rī, chí ini ñayivi yáha cáhán rī maá-ni jñuhun jeē ní jini rī ni cahán Yaā ní taji rúhū vēji rī. Te máni jñuhun ndaā cahán yā. Achí yá.

27 Te tu ní cájecūhun ni de jeē cahán yā jñuhun Tátá yā andivi jín de.

28 Jeē yúcuan ní cahán gā yā:

Nde na yáha jeē cáta caa ró rúhū, Yaā ní nduu tēe, jicā cruz, yūcuán na te cuni rō ndé ñin cúu ri. Te cuni rō jeē tú na vé sáha ri jeē maá rí, chí cáhán rī maá-ni jñuhun ni steén Tatá rī nuū rī.

29 Chí maá Tátá rī, Yaā ní taji rúhū, ndéé yá jín rí. Te tu stóo máñuhún yá ruhū, chí níni sáha ri jniñu jeē nújnahan ni maá yá. Achí yá.

30 Te jeē ni cáhán yā jñuhun yáha, te cuéhē ñayuu ni cacandije i ya.

*Siquī ndé-ni cúu sēhe Yaā Dios jín sēhe jexeén*

31 Yūcuán na te ni cahán Jesús jín jnáhan ñuu yā hebreo jeē ní cacandije i ya:

Te núu cuiñi ñihin ró jín jñuhun stéén rī nuū rō, te cuu ndije ró ñayuu scuáha jín rí.

32 Te jecūhun ni rō jñuhun ndaā, te jñuhun ndaā un sáha jeē nduu libre rō nuū jeē yáhi ró ndaha.

33 Te ni cacahán i jín yá:

Sēhe yucūn Abraham cácuu ri, te tu cáyihí cuiñi rī ndaha ni ñin. ¿Te ndese cúu jeē cahán rō jeē nduu libre rī núu súcuan?

34 Te ni cahán Jesús:

Jendaá cahán rī jín ró jeē tāca ñayuu casáha cuéchi, tu iyó libre i, chí yáhi i chíji cuéchi jeē jejniñu cáhá i nuū.

35 Te ñayuu jejniñu cáhá, chí tu cúu i ñin jnáhan ñayuu vehe nuū jejniñu i. Te ñin sēhe chí sa suhva cúu ndije i jnáhan ñayuu vehe ún.

36 Núu súcuan te maá rí jeē cúu Sēhe Yaā Dios, núu sáha ri jeē tuá cuajniñu cáhá ró nuū cuéchi, núu súcuan te nduu libre ndije ró jijnáhan ró, te cuu ró sēhe ya.

37 Te jini rī jeē sēhe yucūn Abraham cácuu ró, te vēsú súcuan te cácuni rō cahni rō ruhū, chí tu cájetáhu ró jñuhun cáhán rī.

38 Ruhū chí cáhán rī jñuhun jeē ni stéén Tatá rī nuū rī. Te maá ró chí casáha ró jniñu jeē ni cáhán tatá maá ró jijnáhan ró. Achí yá.

39 Te ni cacahán i:

Sēhe yucūn Abraham cácuu ri.

Te ni cahán Jesús:

Núu jeē candije ró nájnuhun ni candije Abraham návaha cuu ndije ró yucūn de, yūcuán na te jniñu váha ni sáha de suni sáha maá ró nuū.

40 Te vijna chí cácuni rō cahni rō ruhū, vēsú ni cahán rī jín ró tāca jñuhun ndaā ni steén Tatá rī nuū rī. Te Abraham chí tu ní sáha cuiñi de súcuan.

41 Máá ró chí inuú casáha ró jín tátá maá ró. Achí yá jín i.

Yūcuán na te ni cacahán i:

Máá rí chí tu cácuu ri sēhe ndáhú jēé tu tátá. Chí iyó ñin-ni tátá rī, te Yaā Dios cúu ya.

42 Te ni cahán Jesús:

Núu Yaā Dios cúu ndije tátá rō, te coo manī rō jīn rí nuú. Chi nde nuū Yaā Dios ni quenda ri vēji rī. Te tú vēji ri jeē cuní maá rí, chí maá yá ni tají rúhū.

43 ¿Te najehē tu cájecūhun ni rō jnūhun cáhán rī núu súcuan? Suu siquī jeē tu cácuni rō chusóhó ró jnūhun nácani rī.

44 Máá ró jijnáhan ró chí tátá rō cúu jexeén. Te cácuni rō sáha ró maá jéē cuní tátá rō ún. Máá jéxeén ni jehni ndīyī nde jeē xīhna ñúhún. Te tu ní ín cuiti jīn jnūhun ndaā, te tú cuiti na jnūhun ndaā cahán. Te jeē cahán jexeén jnūhun stáhú cúu jeē súcuan cáa maá. Chí maá un cúu jeē ndíso jnūhun stáhú, te maá un cúu jeē ní squéjéé ndihi jnūhun stáhú.

45 Te ruhū chí cahán rī jnūhun ndaā, te jeē yúcuan cúu jeē tu cácandíje ró rúhū.

46 Te ni ñin ró ma nihín rō cuēchi siquī rī, chí tú cuiti na cuēchi rī. Te máni jnūhun ndaā cahán rī, ¿te naun tu cácandíje ró rúhū?

47 Ñayuu cácuu sēhe Yaā Dios, chí cáchusóhó i jnūhun Yaā Dios. Te nasūu sēhe Yaā Dios cácuu ró, te jeē yúcuan tu cácuni rō chusóhó ró. Achí yá jīn de.

### *Iyó Jesús nde ná tu coo Abraham*

48 Yūcuán na te ni cacahán jnáhan ñuu yā hebreo un:

Ndaā cacahán rī jeē canéé ró nájjnūhun ñayuu Samaria, te ñúhun tachī ini rō.

49 Te ni cahán Jesús:

Tu ñúhun tachī ini rī, chí yñíhún rí jīn Tátá rī. Te maá ró jijnáhan ró chí tu cáhīyo yñíhún ró jīn rī.

50 Máá rí tu ndúcú rí jeē cujéhnū rī. Iyó ñin jeē cujéhnū rī, te maá yá sándaā siquī jnūhun cacahán rō.

51 Jendaá cahán rī jīn ró, núu ndé ñáyuu squícu jnūhun cáhán rī, ma cúu cuiti i. Achí yá.

52 Te tēe hebreo un tu ní cájecūhun ni de, te ni cacahán de:

Vijna te ni cacucáhnū ni rī jeē ñúhun ndije tachī ini rō. Chí Abraham jīn táca tée ni canacani jnūhun Yaā Dios nde jenahán, ni cajihī de. Te róhó cahán rō, núu ndé vé squícu jnūhun cáhán rō, te ma cúu cuiti i, achí ró.

53 ¿Te chí jéhnū ga ró vēsú jíj yō Abraham naún? Chí ní jihī de, te suni ni cajihī táca tée ni canacani jnūhun ya. ¿Te ndé ñin ga sáha ró maá ró núu súcuan? Achí de.

54 Te ni cahán Jesús:

Núu ruhū sajhéhnū rī maá rí, te tu níhín jníñu. Máá Tátá rī cúu jeē sajhéhnū ruhū. Te cacahán rō jeē maá yá cúu Yaā Dios maá ró.

55 Te vēsú súcuan te tu cájini rō ndese Yaā cúu ya. Te ruhū chí jíní rī yā. Te núu cahán rī jeē tu jíní rī yā, te cuu rī tēe stáhú nájjnūhun maá ró jijnáhan ró. Te tuú chí jíní ndije rī yā, te squícu rī jnūhun cáhán yā.

56 Te jíj rō Abraham ni cusī ni de jeē coto de quivī queē rī. Te je ni jito de, te ni jito rī jeē ní cusī ndasí ni de. Achí yá.

57 Yūcuán na te ni cacahán tēe hebreo un jīn yá:

Ni ná tu coo ró uū xico uxī cuiyā, ¿te ndese cúu jeē cahán rō jeē ní jito ró núu Abraham? achí de.

58 Te ni cahán Jesús:

Jendaá cahán rī jīn ró jeē nde ná tu cacu Abraham te je iyó rí, achí yá.

59 Yūcuán na te ni caquihín de yuū jeē cuáha de xinī yā. Te Jesús chí ni quenda sáhi yá ni yáha ya mēhñū de, ní quenda ya ini templo cuahán yā.

*Jeē ní nasávaha ya ñin tēe ni cacu cuáá*

## 9

1 Te jeē jíca Jesús cuahān yā, te ni jito ya nuū ñin tēe ni cacu cuáa.

2 Te tēe cáscuáha jíin yá ni cacajnūhún de ya:

Maestro, ¿naun ni cacu cuáa tēe yáha? ¿A cuéchi tátá de náná de cúu, chí cuéchi máa de cúu, chí naún?

3 Te ni cahān Jesús:

Nasūu cuéchi máa de, ni nasūu cuéchi tátá de náná de cúu jeē ní cacu de súcuan, chí sa suhva návāha cuni ñayuu jniñu jéhnu sáha Yaā Dios jíin de.

4 Níní jéē cúu nájñuhun nduú ini ñayiví, te cánuú sáha ri jniñu Yaā ní tají rúhū. Chí quee tiempo jeē coo nájñuhun jecuáa, jeē tuá cuu sájñiñu ni ñin.

5 Níní jéē iyó rí ini ñayiví te cúu ri luz jeē cúndijin ini anuá ñayuu ñayiví, návāha jecūhun ni i siquī Yaā Dios. Achí yá.

6 Te ná ni cahān yā súcuan, te ni tesihí yá nuū ñúhun, te ni sáha ya ndehyū jíin tésihí yá un, te ni tee ya siquī tñūu tēe cuáa un.

7 Te ni cahān yā jíin de:

Cuáhán núu pila Siloé te nacate ró tñūu ró, achí yá. Te jñuhun Siloé cuni cahān, ndute ní cascáca de ni quee.

Yūcuán na te cuahān de, te ni nacate de tñūú de, te ni ndundijin-ni, te ni nandicó de vēji de.

8 Yūcuán na te ñayuu yúcu yajni jíin de, jíin ñayuu jeē ní cajito jeē cúu de tēe cuáa, ni cacajnūhun jnáhan i:

¿A násūu tēe yáha cúu jeē ndeé-ni yáhá te jíicán caridad?

9 Te sava i ni cacahān:

Suu de cúu.

Te sava ga i ni cacahān:

Nasūú de cúu, te súcuan cúní coto de.

Te máa de chí ni cahān de:

Suu ri cúu.

10 Yūcuán na te ni cacajnūhún i de:

¿Te ndese cúu jeē ní nanune tñūu ró núu súcuan?

11 Te ni cahān de:

Tēe nání Jesús ni sáha de ndehyū, te ni tee de tñūu rí, te ni cahān de jíin rí: Cuáhán núu pila Siloé te nacate ró tñūu ró. Te ni jehēn rī, te ni nacate rī, te ni nanune-ni tñūu rí, achí de.

12 Yūcuán na te ni cacajnūhún i de:

¿Ndeé nuū íne tēe ún? áchí i.

Tu jíin rī, achí de.

*Jeē ní castíchí tēe fariseo tēe ni cacu cuáa*

13 Yūcuán na te ni cajendeca i tēe ni Iyo cuáa un núu tēe grupo fariseo.

14 Te quiiví ndétātu cúu jeē ní sáha Jesús ndehyū jeē ní nanune ya tñūú de.

15 Te tēe fariseo un ní cacajnūhún tucu de tēe ún ndese ni nanune tñūú de. Te ni cahān de:

Ni tee de ndehyū siquī tñūu ná, te ni nacate ná, te ni ndundijin-ni tñūu ná, achí de.

16 Yūcuán na te ni cacahān sava tēe fariseo:

Tēe ún chí nasūu ndé nuū Yaā Dios vēji de, chí tu nées i de quiiví ndétátú.

Te sava ga de chí ni cacahān:

¿Ndesé cuu sáha tēe un táca jniñu jéhnu yáha te núu tēe iyó cuéchi cúu de?

Te ni cacusñn de siquī yā.

17 Te ni cacajnūhún tucu de tēe ni Iyo cuáa un:



Róhó, ¿ndese cáhán rō siquī téé ni nanune tinūu ró núu súcuan?

Te máá de ni cahān de:

Īn tēe nácani jnūhun Yaā Dios cúu de, áhí de.

<sup>18</sup> Te tēe hebreo un chí tu ní cá candíje de jeē ni íyo cuáá téé ún te ni ndundijin tinūu de. Te ni cacana xinī tatá de náná de.

<sup>19</sup> Te ni cacajnūhún de:

¿A yáha cúu sēhe ro jēe ní cacu cuáá cácahān rō? Núu súcuan ¿te ndese ni ndundijin tinūu de vijna? áhí.

<sup>20</sup> Te ni cacahān tatá de náná de:

Suu sēhe ri cúu tēe yáha jēe ní cacu cuáá.

<sup>21</sup> Te tu cájini rī ndese ni ndundijin tinūu de vijna, ni tu cájini rī ndé téé ni nanune tinūu de. Cajnūhun ró máá de, chí je jéhu de, te na cáchi máá de.

<sup>22</sup> Súcuan ni cacahān tatá de náná de, chí cáyūhú de cájito de jnáhan de tēe hebreo. Chí je ni casándaā tēe un jēe núu ndé ñayuu cachi i jeē Jesús cúu Cristo, Yaā ní tají Yaā Dios, te quenehen de i jeē ma cúu ga quiví i ini vehe ĩ sinagoga.

<sup>23</sup> Jeē yúcuan ní cacahān tatá de náná de: Cajnūhun ró máá de, chí je jéhu de.

<sup>24</sup> Yūcuán na te tēe hebreo un ní cacana tucu de tēe ni íyo cuáá un. Te ni cacahān de jíin:

Cachí cají ró nuū rī, jíto jíinū Yaā Dios. Chí cájini rī jeē téé íyo cuéchi cúu tēe ni nanune tinūu ró.

<sup>25</sup> Yūcuán na te ni cahān de:

Tu jíiní na núu íyo cuéchi de, chí naún. Te íyo ĩn jeē jíiní ná, cúu jeē tēe cuáá ní cuu ná, te vijna chí ni ndundijin tinūu ná. Achí de.

<sup>26</sup> Te ni cacajnūhún tucu de:

¿Ndesse ní sáha de jíin ró? ¿Ndesse ni nanune de tinūu ró núu súcuan?

<sup>27</sup> Te ni cahān de:

Je ní cuu ni castūhun ná nuū ní, te tu ní cá cuni ní cuatáhú ní. ¿Te najehé cá cuni ni jēe cáchi tucu ná nuū ní? ¿Te chí suni cá cuni ni jíináhan ní candíje ní yá naún?

<sup>28</sup> Yūcuán na te ni cacahān neé jíin de, te áhí:

Máá ró chí cándíje ró téé ún, te máá rí chí cá candíje ri Moisés.

<sup>29</sup> Te cájini rī jeē ni cáhān Yaā Dios jíin Moisés. Te tēe yúcuan, ni tu cájini rī ndé nuū véji de.

<sup>30</sup> Te ni cahān tēe ni íyo cuáá:

Náá ni na jēe cácahān ni jēe tu cájini ní jeē véji de nuū Yaā Dios, vēsú ni nanune de tinūu ná.

<sup>31</sup> Te cájini yō jeē Yaā Dios tu jíiní nahín yá jeē cájicān ñayuu íyo cuéchi. Chí jíiní nahín yá nuū máá-ni ñayuu jeē cáchiñūhún i ya te casáha i jeē cuní yā.

<sup>32</sup> Te ní véji yó te tu ní jíiní sōho cuiti yō jeē ĩn tēe nanune de tinūu inga tēe ni cacu cuáá.

<sup>33</sup> Te núu nasūu ndé nuū Yaā Dios véji tēe ún, te ma cúu cuiti sáha de ĩn jniñu súcuan. Achí de.

<sup>34</sup> Te ni cacahān tēe hebreo un:

Róhó chí íyo ndasí cuéchi ró ndé quiví ní cacu ró, ¿te á máá ró steén nuū rī naún? áhí.

Te ni caquenehen tēe un yátá vehe ĩ sinagoga.

*Siquī ñayuu cáhīyo cuáá ánuá*

<sup>35</sup> Te ni jíiní jnūhun Jesús jeē ní caquenehen de tēe ún. Te ni nihín jnáhan ya jíin de, te ni cahān yá jíin de:

¿A cándíje ró Séhe Yaā Dios?

<sup>36</sup> Te ni cahān de:

¿Ndé ñn cúu ya návāha candíje ná yá?

<sup>37</sup> Te ni cahān Jesús:

Je ni jito ró núu yā, te suu cúu ruhū jeē cahān jiín ró, achí yá.

<sup>38</sup> Yūcuán na te ni jecuiñi yití de nuū yā, te ni cahān de:

Cándíje ná jeē nihín cúu Jítoho ná.

<sup>39</sup> Te ni cahān Jesús:

Vēji ri ini ñayivi yáha jeē sándaā rī siquī ñáyuu. Chi ñayuu jeē nájñūhun cácuáá ánuá, ndundijin ini anuá i jeē jécūhun ni i siquī rī. Te ñayuu jeē jéni ni i jeē cájecūhun ni i, nájñūhun nducuáá ánuá i. Achí yá.

<sup>40</sup> Te sava tēe fariseo jeē cáhiin jiín yá, ná ni cajini de jñūhun yáha, te ni cacahān de jiín yá:

¿Te chí jéni ni rō jeē suni tēe tu cájecūhun ni cácuu máá rí naún?

<sup>41</sup> Te ni cahān Jesús:

Núu jeē cácuu ró tēe tu jécūhun ni nuú, te ma cóo cuēchi ró. Te siquī jeē ní cacahān rō jeē cájecūhun ni rō, te tu cájetáhú ró, jeē yúcuan condee cuēchi siquī rō.

### *Jñūhun yátá siquī lanchi*

## 10

<sup>1</sup> Jendaá cahān rī jiín ró, núu yíhi lanchi ini corral cánevāha cáhnu ñayuu, te núu ndé tēe tu quívi de ichi yéhyí corral un, chi sa suhva inga lado cáa de quívi de, tēe un cúu ñacuñná, chi vēji jeē sacuíhná.

<sup>2</sup> Te tēe quívi ichi yéhyí, chi tēe un cúu pastor ndíto lanchi.

<sup>3</sup> Te tēe ndíto yéhyí, núne de te quívi tēe ún. Te lanchi de cánacuni tī tachī de. Te cána de síhvi lanchi máá de, te táva de tī.

<sup>4</sup> Te núu ni tava de ndíhi lanchi máá de, te yósnúu de nuū tī cuahān de. Te lanchi un cándiquín tī de, chi nácuni tī tachī de.

<sup>5</sup> Te ma cóndiquín tī yatā inga tēe, chi sa suhva cunu tī coto tī de, chi nácuni tī jeē nasūu jítoho tī cúu.

<sup>6</sup> Jñūhun yátá yáha ní cahān Jesús jiín ñáyuu, te tu ní cájecūhun ni i na jñūhun cúu jeē ni cáhān yā.

### *Jesús cúu máá pastor vāha*

<sup>7</sup> Yūcuán na te ni cahān gā Jesús jiín i:

Jendaá cahān rī jiín ró: Máá rí cúu nájñūhun yéhyí corral nuū quívicoo ñayuu cácuu nájñūhun lanchi ri.

<sup>8</sup> Tāca tēe jeē tu ní tájí Yaā Dios, jeē ní quijicoo de nde ná tu quee rī, cácuu de nájñūhun ñacuñná, chi tu ní cástéén de jñūhun ndaā. Te ñayuu cácuu nájñūhun lanchi ri, tu ní cájetáhú i de.

<sup>9</sup> Máá rí cúu nájñūhun yéhyí. Te ñayuu jeē jiín máá rí quívicoo, jnama ri i. Te cuu i nájñūhun lanchi jeē ndívicoo tī nuū yíhi vāha tī, te quéndacoo tī nuū cáji vāha tī.

<sup>10</sup> Tēe cuñná chi máni vēji de jeē sacuíhná de lanchi, te cahni de, te snáā de. Te ruhū chi vēji ri návāha cotecu ñayuu cácuu lanchi ri, te nde yōhyo vāha ndetū coo i.

<sup>11</sup> Máá rí cúu máá pastor vāha. Te pastor vāha chi ndíto vāha de lanchi de, vēsú nde cuu de jeē siquī tī.

12 Te ñin tēe yíyāhu, nasūu pastor tī cúu de, chi nasūu lanchi máa de cúu ti. Te núu jito de jeē véji yihī, te stóo de lanchi, te jínu de cuahān de. Te yihī chí jñí ti lanchi, te sáha ti jeē jité núu lanchi.

13 Te tēe yíyāhu ún chi jínu de cuahān de siquī jeē lanchi tátú cúu jeē ndito de, te jeē yúcuu tu cúndáhú ni de ti.

14 'Máa rí cúu máa pastor vāha. Te jíní rī tāca ñayuu cácuu nájñuhun lanchi rí, te máa i cájini i ruhū.

15 Te yāha cúu nájñuhun jeē Tatá rī jíní yā ruhū, te máa rí jíní rī Tatá rī. Te cuu rī jeē siquī ñayuu cácuu lanchi rí.

16 Te suni íyó gá ñayuu jeē cácuu lanchi rí, te sñn sñn ñayuu cácuu i. Te cánuú jée suni condeca rí ñayuu ún. Te cuatáhú i jñuhun cáhān rī. Te coyūcu cáhnu-ni ndihī ñayuu candíje, te coo ñn-ni pastor i.

17 'Te Tatá rī manī ndasí yá jíin rí siquī jeē jéhe rí máa rí jeē cúu rī jehē ñayuu, te natecu tucu rí.

18 Ni ñin ma cúu cahni ruhū, chi máa rí cúu jeē jéhe jñuhun cuu rī. Jeē cachí máa rí te cuu rī, te jeē cachí máa rí te natecu rī, chí súcuu íyó poder rī. Súcuu ni cáhān Tatá rí jeē sáha rí. Achí yá.

19 Te jeē ní cajini jnáhan ñuu yā hebreo jñuhun yáha, te ni cacusñn tucu i.

20 Te cuehē i ni cacahān:

¿Naun cáchusóhó ró jeē cáhān de? Chí ñúhun tachī ini de, te ni tñvī xíní de.

21 Te sava ga i ni cacahān:

Tu súcuu cáhān tēe ñúhun tachī ini, nájñuhun cáhān tēe yáha. Te tēe ñúhun tachī ini, ¿á cuu nanune de tinūu tēe cuáá naún? Achí.

### *Jeē ní casquéhichí i Jesús*

22 Te tiempo míjin cúu, te ñuu Jerusalén cánasáha ñayuu vico jeē cánucūhun ni i quivī ní cuhií templo cáhnu.

23 Te jíca cuu Jesús ini templo, ini corredor jeē naní Salomón.

24 Te jnáhan ñuu yā hebreo ni cacutútú i nuū yā, te ni cacahān i:

¿Nasaa ga quivī sáha ró jée ma cucáhnu ni rí? Cachi cají núu rí jijnáhan rí núu máa ró cúu Cristo.

25 Te ni cáhān Jesús:

Je ni castūhun rí nuū rō, te tu ní cácandíje ró. Tācá jñiñu jeē ní tejñiñu Tatá rí ruhū sáha rí, yūcuu stéén cají jée máa yá ni tají ruhū.

26 Te tu cácandíje ró, chí nasūu lanchi rí cácuu ró, nájñuhun je ni cáhān rí jíin rō.

27 Ñayuu cácuu lanchi rí, chí nácuni i jeē máa rí cúu jeē cáhān jíin i. Te jíní rí i, te cándiquīn i ruhū.

28 Te cotecu i ñí cáni sáha rí, te ma jnahnú ndetū cuiti i. Te ni ñin ma cúu quende i ndaha rí.

29 Máa Tatá rí ni squiví ya i ndaha rí. Te cújéhnu ga máa yá vēsú tāca gá. Te ni ñin ma cúu quende i ndaha ya.

30 Máa rí jíin Tatá rí, chí ñn-ni cúu rí, achí yá.

31 Yūcuán na te jnáhan ñuu yā hebreo ni caquihin tucu de yuū jeē cuáha de xini yá.

32 Te ni cáhān yá jíin de:

Ni steén rí cuehē jñiñu váha nuū rō jeē ni sáha rí jíin poder Tatá rí. ¿Te á siquī jeē ni sáha rí jñiñu váha cúu jeē cuáha ró yúu xini rí núu súcuu? Achí yá.

33 Te ni cacahān de jíin yá:

Nasūu siquī jeē ni sāha ró jniñu váha cúu jeē cuáha ri yuū xinī rō, chí siquī jeē cahán ndevāha ró jēe achí ró jeē inuū cúu ró jíin Yaā Dios. Chí tēe-ni cúu ró, te sāha ró jēe inuū cúu ró jíin Yaā Dios. Achí de jíin yá.

<sup>34</sup> Te ni cahán Jesús:

Yósó núu tútu ley cánevāha ró jēe ni cáhān Yaā Dios: Nájñuhun yaā cácuu ró, achí Yaā Dios, achí tutu.

<sup>35</sup> Chí ñayuu jeē ní cajetáhú jñuhun ya, ni cahán yā jeē cácuu i nájñuhun yaā. Te cájini yō jeē ma cúu cahán yō jeē tú ndaā jñuhun cáhán tutu i.

<sup>36</sup> Núu súcuan ¿te naun cácahān rō jeē jñuhun ndevāha cúu jeē ni cáhān rī jeē Séhe Yaā Dios cúu rí? Chí máa Yaā Dios ni jeni ya ruhū siquī jniñu i, te ni taji yá ruhū vēji ri ini ñayīví.

<sup>37</sup> Núu tu sāha ri jniñu sāha Tátá rī, núu súcuan te ma candíje ró rúhū.

<sup>38</sup> Te núu sāha ri, te vēsú tu cácaandíje ró rúhū, te na cándíje ró siquī jniñu sāha ri ún. Te súcuan te cucáhnu ni rō jeē ñn-ni cúu Tátá rī jíin rí, te ñn-ni cúu ri jíin Tátá rī. Achí yá.

<sup>39</sup> Yūcuán na te cánducú tucu de jñi de ya. Te ni ndoñuhún-ni ya cuahān yā.

<sup>40</sup> Te cuanhun yā yūte Jordán ichi núu cáne niāndii, nuū ni íne Juan ni scuándute de. Te ni condee yā yūcuán.

<sup>41</sup> Te ni quiijoo cuehē ñayuu nuū yā, te ni cacahān i jíin táca jnáhan i:

Ndaā chí vēsú tu ní sāha Juan ni ñn jniñu jéhnu, te ni cundaā ndihi jñuhun ni cahān de siquī ndese sāha tēe yáha. Achí i.

<sup>42</sup> Te cuehē ñayuu jeē ni jéngoo nuū yā yūcuán, ni cacandíje i ya.

*Jeē ni jíihī Lázaro*

## 11

<sup>1</sup> Te ni Iyo ñn tēe cúhú, nání de Lázaro. Te máa de jíin cuáha de María jíin Marta, cácuu de ñayuu ñuu Betania.

<sup>2</sup> Te María un jēe cúu cuāha Lázaro, suu ña cúu jeē ní chihi aceite perfume jehē Jitoho yō, te ní nasíchí ña jíin ixí xíní ña.

<sup>3</sup> Te ndíndúú cuáha de un ní catajái ña jñuhun cuahān nuū Jesús:

Tēe jeē maní ni jíin, cúhú de, achí ña, achí mozo.

<sup>4</sup> Te ná ni jini Jesús jñuhun, te ni cahán yā:

Cuehyí yáha chí nasūu cuehyí jeē ví cuu de cúu. Chí sa suhva sāha Yaā Dios jeē cuní ñayuu ndese cújéhnu ya. Chí ruhū, Séhe Yaā Dios, jíin cuehyí yáha te stéén rī jeē suni cújéhnu máa rí. Achí yá.

<sup>5</sup> Te maní Jesús jíin Marta jíin cúhú ña jíin Lázaro.

<sup>6</sup> Te vēsú súcuan te nuū ni níhñ yā jñuhun jeē cúhú de, te ni quendōo ya uū gā quiví nuū ndeé yá un.

<sup>7</sup> Yūcuán na te ni cahán yā jíin tēe cáscuáha jíin yá:

Na quíhín tucu yó región Judea.

<sup>8</sup> Te tēe cáscuáha un ní cacahān de jíin yá:

Maestro, ná tu cuu quiví jeē ní canducú jnáhan yó hebreo cuāha de yuū xiní ní. ¿Te cúní ni quíhín tucu ní yúcuan naún? Achí de.

<sup>9</sup> Te ni cahán Jesús:

Ma cúu cahni ñayuu ruhū núu ná tu quee máa quiví cuu rī. Chí jeē iyó rí ñayiví yáha cúu nájñuhun jeē iyó úxí uū hora ñn nduú. Te jeē sāha ri jeē cuní Yaā Dios, cúu ri nájñuhun tēe jeē jíca nduú, te tu cáchihi de jehē de, chí cúndijin nuū de ñayiví yáha.

10 Te tēe jeē tu sáha jeē cuní Yaā Dios, chí nájñūhun jíca de jecuáā, te nájñūhun cáchihi de jehē de, chí tu cúndijin ini anuá de. Achí yá.

11 Yūcuán na te ni cahān tucu ya:

Amigo yō Lázaro quixí de, te quihīn rī sáha ri jeē náta hū ni de. Achí yá.

12 Yūcuán na te tēe cáscuáha un ní cacahān de:

Núu quixí de te jíní yō jeē nduvāha de.

13 Te Jesús chí súcuan ni cahān yā jeē jé ni jihī de. Te cájeni ni tēe cáscuáha jeē quixí ndije de.

14 Yūcuán na te ni cahān cají yá:

Je ni jihī Lázaro.

15 Te cúsiī ni rī jeē tu ní cóyūcu yó yūcuán, návāha vāha ga candíje ró jéē coto ró jñiñu jéhu sáha ri. Núu súcuan te na quíngoo yó núu ndíyí ún. Achí yá.

16 Yūcuán na te Tomás, tēe cúu cuatí, ni cahān de jíin jnāhan de jeē cascuáha jíin yá:

Suni na quíngoo yó návāha cuu yō jíin yá, achí de.

*Jesús cúu jeē sáha jeē nátecu te cotecu ní cáni*

17 Te nuū ní quee Jesús, te jíní yā jeē ní cuu cuūn quivī yíndūji Lázaro.

18 Te yajni-ni íne ñuu Betania jíin ñuu Jerusalén, nájñūhun uū kilómetro yosáva.

19 Te Marta jíin María, ni quecoo cuehē jnāhan ña hebreo jeē cahán i jñūhun ndeyí ni jíin ña jeē siquí jeē ni jihī cuāha ña.

20 Te nuū ní jini Marta jeē véji Jesús, te ni quenda ña cuajnahān ña ya. Te María chí ni ndōo ña vehe.

21 Te ni cahān Marta jíin Jesús:

Núu ní íyo ní yāha, te ma cúu cuāha ná núu.

22 Te vēsú súcuan te jíní na jéē tāca jéē cacán ni núu Yaā Dios, te sáha ya, achí ña.

23 Te ni cahān Jesús jíin ña:

Natecu cuāha ró.

24 Te ni cahān Marta:

Jíní na jéē nátecu de quivī nátecu tāca ndíyí nde quivī jínu ñayiví.

25 Te ni cahān Jesús:

Máá rí cúu Yaā sáha jeē nátecu jíin jéē cótecu ní cáni. Ñayuu candíje jeē jnáma ri i, vēsú na cúu i, te natecu i.

26 Te ñayuu cátecu te candíje i ruhū, cotecu i ní cáni andiví. ¿A candíje ró jñūhun yáha? Achí yá.

27 Te ni cahān ña:

Cándíje ná jéē maá ní cúu Cristo, Sēhe Yaā Dios, jeē achí tutu jeē quíji ini ñayiví, achí ña.

*Jeē ni ndáhyū Jesús nuū yíndūji Lázaro*

28 Te ná ni cahān ña súcuan, te cuahān-ni ña, cuacana yuhu ña cuhū ña María:

Máá Maestro ni quee yā, te cána ya rohó, achí ña.

29 Te jeē ní jini María jñūhun yáha, te yachī ni ndocuiñī ña, cuahān ña nuū yā.

30 Te ná tu quiví Jesús ñuu, chí ni ndōo-ni ya nuū ni jéjnahan Marta yā.

31 Te ñayuu hebreo un jéē cáyucú ini vehe jíin María, jeē cácahān i jñūhun ndeyí ni jíin ña, ni cajito i jeē yachí ni ndocuiñī ña cuahān ña. Te ni candiquīn i ña cuango i, chí cájeni ni i jeē cuándahyū ña nde nuū yíndūji ndíyí.

<sup>32</sup> Yūcuán na te ni jinū María nuū íne Jesús, te ni jecuiñī yití ña nuū jehé yā, te ni cahān ña:

Núu ní íyo ní yáha, te ma cúu cuāha ná núu, áchí ña.

<sup>33</sup> Te ni jito Jesús jeē ndahyú ña jíin jéē cándahyū ñayuu vējicoo jíin ña. Te yōhyo ni nducuhýa ní yā, te ni jnahuhū ni yā jeē cundáhú ni yā i.

<sup>34</sup> Te ni cajnūhun yá ña:

¿Ndé mí ní cachindūji ró de?

Te ni cacahān ña jíin yá:

Quihín yō te cuni ní, áchí ña.

<sup>35</sup> Te ni ndahyū Jesús.

<sup>36</sup> Yūcuán na te ni cacahān ñayuu hebreo un:

Condēhe náa yōhyo manī de jíin ndíyī ún.

<sup>37</sup> Te sava i chí ni cacahān i:

Tēe yáha jéē ní nanune de tinūu tēe cuáá, ¿á tu ní cúu sáha de jeē ma cúu Lázaro nuú? áchí i.

### *Jeē ní natecu Lázaro*

<sup>38</sup> Te yōhyo ni jnahuhū ni tucu Jesús, te ni quee yā nde nuū yíndūji ndíyī. Te ñin yaū cava cúu, te yuyáú un ndíhyú ñin yuū.

<sup>39</sup> Te ni cahān yā:

Tejiyo yuū un jíjnáhan ró, áchí yá.

Te Marta, cuāha ndíyī un, ní cahān ña:

Je jéén xicō de, chí je ni cuu cuūn quivī yíndūji de.

<sup>40</sup> Te ni cahān Jesús jíin ña:

¿A násūū je ni cahān rī jíin ró jeē núu candíje ró te coto ró jéē yóhyo cújéhnu Yaā Dios jíin poder yā? áchí yá.

<sup>41</sup> Yūcuán na te ni catejiyo i yuū jeē ndési yuyáú ndíyī ún. Te ni ndacoto-ni Jesús ichi ándiví, te ni cahān yā:

Tátā, na cútahū na núu ni jéē sáha ní jéē jicán na.

<sup>42</sup> Te jíiní na jéē niní sáha ní jéē jicán na. Te jeē váha ñayuu cáhīin yáha cúu jeē súcuan cáhān na, návāha na cándíje i jeē maá ní ni tají sáña.

<sup>43</sup> Te ná ni cahān yā súcuan, te ni cahān jee ya:

Lázaro, quenda quiiji ró, áchí yá.

<sup>44</sup> Te ni quenda-ni tēe ni jihí ún, te ñúsúcún ndaha de síhin de jíin tira sahma. Te nuū de ñúsúcún ñin sahma. Te ni cahān Jesús jíin i:

Nandají ró sahma ñúsúcún de, návāha cuu caca de, áchí yá. Te ni canandají i.

### *Jeē ní casquíjnáhan de jnūhun jeē cáhni de Jesús*

*(Mt. 26.1-5; Mr. 14.1-2; Lc. 22.1-2)*

<sup>45</sup> Yūcuán na te cuehē ñayuu hebreo jeē ní quijicoo nuū María, ni cacandíje i Jesús, chí ni cajito i jniñu ni sáha ya.

<sup>46</sup> Te sava i chí cuango i nuū tēe grupo fariseo, te ni cacastūhún i ndese ni sáha Jesús.

<sup>47</sup> Yūcuán na te tēe fariseo un jíin sūtū cácujeñnu ni candutútú de junta jíin táca gá tēe cácujeñnu. Te ni cacahān de:

¿Ndese sáha yó? Chí tēe ún yōhyo cuehē jniñu jéñnu sáha de.

<sup>48</sup> Te núu condéhé-ni yó, te ndivii ñayuu candíje i de. Te quijicoo táca tēe nación Roma jeē cácujeñnu, te canu de templo cáhnu yó, te scuíté núu de ñayuu nación yō, achí de jíjnáhan de.

49 Te ñin jnáhan de jeē naní Caifás, jeē cúu máa sūtū cujéhnū ga cuiyā ún, ni cahān de:

Róhó chí tu cájini cuiti rō,

50 ni tu cájecūhun ni rō jeē váha ga jeē cúū ñin tēe jehē ñáyyuu naciōn yō vēsú jeē nāa ndivii i, áchí de.

51 Te tu ní cáhán de jñūhun yáha jéē jéni ni maá de. Chí siquī jeē cúu de sutū cujéhnū ga cuiyā ún, te ní sáha Yaā Dios jíin de jeē ní nacani de jñūhun jeē cúū Jesús jehē ñáyyuu naciōn hebreo.

52 Te nasūu máa ñin-ni jehē naciōn hebreo, chí suni jehē ndivii ñayuu cácuu sēhe Yaā Dios jeē ní cajitē núu táca naciōn, návāha ñin na cuu i jñnáhan i.

53 Yūcuán na te nde quivī ún te táca tēe hebreo cácujehnū un, ní casquijnáhan de jñūhun jeē cáhni de Jesús.

54 Jeē yūcuan tuá ní jíca ndijin yā nuū jnáhan ñuu yā hebreo un, chí ni quenda ya región Judea, te cuahān yā ñin ñuu naní Efraín, nuū iyó yajni ñūhun téhé. Te ni condee yā yūcuan jíin tēe cáscuáha jíin yá.

55 Te ni cuyajni vico pascua jeē cánasáha ñayuu hebreo. Te cuehē ñayuu táca ñuu yūcuán cuángoo i ñuu Jerusalén, návāha squícu i jeē cahán ley jeē cúchi i ndundoo i nuū Yaā Dios, te sáa te quejéé vico pascua.

56 Te cánanducú i Jesús, te cácajnūhun jnáhan i ini templo:

¿Nde se cájeni ni rō? ¿A quiji de vico, chí tuú? Achí i.

57 Te sutū cácujehnū jíin tēe fariseo ni candacu de jniñu jeē núu ndé ñin ñayuu jiní ndé nuū íne ya, te na cástūhún i, návāha jñii de ya.

*Jeē ní chuhun María perfume jehē Jesús  
(Mt. 26.6-13; Mr. 14.3-9)*

## 12

1 Te cúmanī iñū gā quivī te coo vico pascua. Te ni jehēn tucu Jesús ñuu Betania nuū ndeé Lázaro, tēe ni jihī te ní nastécu yā de.

2 Te ní casáha i ñin vico xíni jeē yifñúhún i jíin yá. Te Marta ni jeni ña cohō. Te Lázaro yéji de staā jíin yá nuū mesa jíin táca gá ñayuu.

3 Yūcuán na te María ni quee ña jíin nájñūhun sava litro aceite perfume jeē máni ita nardo cúu, te yōhoyo yahu ndeé. Te ni chuhun ña jehē Jesús, te ní nasíchí ña jíin ixí ña. Te ní ini vehe un ní chitú xícō perfume un.

4 Yūcuán na te ní cahān Judas Iscariote sēhe Simón, ñin tēe scuáha jíin yá un, te suu de cúu jeē nastúu de ya:

5 ¿Najehē tu ní cúyāhu perfume yáha jéē uní ciento denario, te cuáha yó núū ñáyyuu ndahú núū. Achí de.

6 Súcuan ni cahān de, nasūu jéē cundáhú ndije ni de ñayuu ndahú, chí sa suhva jeē cúu de tēe cuíhná. Chí máa de ndíso yijni xūhún, te quíhin cuíhná de jeē cájequin táca tēe ún.

7 Yūcuán na te ní cahān Jesús:

Ma stáhān rō ña. Chí jeē ní sáha ña yáhá cúu jeē ní sátūhva ña ruhū nde quivī jeē quíndūji rí.

8 Chí níni cáyūcu ñáyyuu ndahú jíin ró, te ruhū chí tuá condee rī jíin ró. Achí yá.

*Jeē ní casquijnáhan de jñūhun jeē cahni de Lázaro*

<sup>9</sup> Te cuehē ñayuu hebreo ni cajini jñūhun i jeē néne ya ñuu Betania. Te ni jinūcoo i, te nasūu máá ñn jeē cuní i coto i nuū Jesús, chi suni jeē cuní i coto i nuū Lázaro, tēe jeē ní nastécu yā.

<sup>10</sup> Yūcuán na te sutū cácujeñhu ni casquínáhan de jñūhun jeē suni cahni de Lázaro.

<sup>11</sup> Chi jeē siquí Lázaro te ni cujiyo cuehē jnánhan ñuu de hebreo nuū de, te cácandíje i Jesús.

*Jeē ní quívi Jesús Jerusalén*  
(Mt. 21.1-11; Mr. 11.1-11; Lc. 19.28-40)

<sup>12</sup> Te inga quiví ún, te ñayuu cuehē jeē ní quecoo vico pascua un, ní cajini jñūhun i jeē véji Jesús ñuu Jerusalén.

<sup>13</sup> Te ni cajehnde i ndaha ñúú, te ni quendacoo i cuajnahan i ya. Te cácana jee i:

Yōhyo cújéñhu Yaā Dios. Yōhyo vāha Yaā cúu Yaā jeē véji jíin jñiñu máá Jítoho yō Yaā Dios. Yōhyo vāha Yaā cúu Rey nación yō Israel. Achí i.

<sup>14</sup> Te ni nihin Jesús ñn burro, te ni jecosō yā tí, nájñūhun cáhán tutu i:

<sup>15</sup> Ñayuu ñuu Jerusalén jeē naní ñuu Sion, ma yūhu ró jijnáhan ró.

Yāhá condēhe ró jeē véji Rey rō,

te yósó yá ñn burro.

Achí tutu.

<sup>16</sup> Te quiví ún te tēe cáscuáha jíin yá, tu ní cájecūhun ni de jeē súcuan squícu tāca jée yosó núu tútu i. Te nde ná ni ndujéñhu Jesús jeē cuánuhun yā andiví, te sáá te ni canucūhun ni de tāca jñūhun yósó síquí yā, jíin jēe ní casáha de súcuan jíin yá.

<sup>17</sup> Te ñayuu ní cahīin jíin yá ná ni cana ya xiní Lázaro nuū ní yindūji de, te ni nastécu yā de, ni canacani i jñūhun ndese ni sáha ya.

<sup>18</sup> Jeē yúcuani ní quendacoo ñayuu cuehē un, ní jejnahan i ya, chi ni cajini jñūhun i jeē ní sáha ya jñiñu jéñhu un jēe ní steen yā poder yā.

<sup>19</sup> Yūcuán na te ni cacahān máá tēe fariseo:

Vijna te je ni cajito yó jēe ma cúu cuiṭi gā casi yō. Chi jito yó jēe ndivii cuiṭi ñayuu cuangoō i jíin de. Achí de jijnáhan de.

*Ñayuu nación Grecia nánducú i Jesús*

<sup>20</sup> Te sava ñayuu nación Grecia, suni ni quijicoo i ñuu Jerusalén vico pascua un jēe chiñúhún i Yaā Dios.

<sup>21</sup> Te ni quecoo i nuū Felipe, tēe ñuu Betsaida ndañúu Galilea. Te ni cacahān i jíin de:

Tátā, cácuani ná cahān na jíin Jesús, achí i.

<sup>22</sup> Te ni jehēn Felipe, ni castūhún de nuū Andrés. Te ndindúú de cuacastūhún de nuū Jesús.

<sup>23</sup> Te ni cahān Jesús jíin de:

Je ni quee quiví jeē ndujéñhu Yaā ní nduu tēe.

<sup>24</sup> Te jendaá cahán rī jíin ró, ñn nunī trigo núu tú ningava nuū ñūhun te quindūji, núu súcuan te quendōo máá ñn-ní. Te núu quindūji, te nacayā cuehē ndasí. Te suni súcuan cánuú cuu rī quindūji ri, návāha coo cuehē ñayuu jeē ndúu i sēhe Yaā Dios.

<sup>25</sup> Te na-ni ñayuu núu tu jéhe i jñūhun ndoho i jeē siquí ruhū, te jnahnū ndetū i. Te ñayuu jeē jéhe i jñūhun ndoho i jeē siquí ruhū ini ñayiví yáha, cotecu i ní cáni andiví.



<sup>26</sup> Núu ndé ñáyuu cuní i cuajniñu i nuū rī, na cóndiquīn i ruhū. Te nuū cóndee rī, suni yūcuán condee ñayuu jejniñu nuū rī. Te ñayuu jejniñu nuū rī, chí sáha Tátá rī jeē cujéhnū i.

### *Jeē ni cáhān Jesús jeē cuu yā*

<sup>27</sup> Te vijna te cúculhyá ndasí ni rī sáha jnūndóho quiji siquī rī. ¿Te ndese cahān rī? ¿A cáhān rī jíin Tátá rī: Jnama ní sáña núu jnūndóho jeē quíji siquī ná, achí rī? Ma cúu, chí jeē siquí yúcuan cúu jeē véji rī.

<sup>28</sup> Tátá, stéén ni jeē cujéhnū ndasí ní jíin poder ni, áchí yá.

Yūcuán na te ichi ándiví ní cahān ĩn jnūhun:

Je ni steén rī jeē cujéhnū rī, te sáha tucu ri inga jínu, áchí yá.

<sup>29</sup> Te ni cajini ñayuu cáhān yūcuán, te ni cacahān i jeē taja cáhān. Te sava ga i ni cacahān:

ĩn ndajéhé Yaā Dios ni cahān jíin yá.

<sup>30</sup> Te ni cahān Jesús jíin i:

Tu ní cáhān jnūhun yáha jeē siquí ruhū, chí sa suhva návāha cuni rō siquī jnūhun jeē ni cáhān yā jíin rī.

<sup>31</sup> Vijna cúu jeē sándaā Yaā Dios siquī cuéchi ñayuu ñayīví yáha. Vijna cúu jeē scúnu ya jexeén jeē ndácu jniñu ini ñayīví yáha.

<sup>32</sup> Te ruhū, núu na jínu condita caa rī cuu rī ini ñayīví, te sáha ri jeē jnáā táca ñáyuu quīvícoo i ndaha rī, achí yá.

<sup>33</sup> Súcuan ni cahān yā jeē steén yā ndese modo cuu yā.

<sup>34</sup> Te ni cacahān ñayuu jíin yá:

Ni cajini sóho ná jeē cahān tutu ley Yaā Dios cánevāha yó, jeē Cristo cotecu yā ní cáni. ¿Te naun cáhān ni jeē Yaā ní nduu tēe, cánuú condita caa ya cuu yā? ¿Ndé ĩn cúu máá Yáá ní nduu tēe núu súcuan? Achí i.

<sup>35</sup> Yūcuán na te ni cahān Jesús:

Máá jecu na quiví condee rī jíin ró jeē cúu ri luz cundijin ini anuá rō. Núu súcuan te vijna jeē iyó gá luz rī jíin ró, te caca ró jíin, chí sanaa ni rō te cuahān rī, te nájnūhun quendōo ró núu néé. Chí ñayuu cájica nájnūhun nuū néé, tu cájini i ndé nuū cuángoo i.

<sup>36</sup> Núu súcuan te níni ndéé gá rī jíin ró, te candíje ró rúhū jeē cúu ri luz, návāha nduu ró ñáyuu cájica jíin luz, achí yá.

Súcuan ni cahān Jesús táca jnūhun yáha, te cuahān-ni ya, te tuá ni steén yā maá yá nuū i.

### *Jeē tu ní cácandíje ñayuu hebreo jeē cúu ya Cristo*

<sup>37</sup> Te vésú cuehē jniñu jéhnū ni sáha Jesús jeē steén yā poder yā nuū i, te tu ní cácandíje i ya.

<sup>38</sup> Chí squícu nahín jnūhun ni cahān Isaías, tēe ni nacani jnūhun Yaā Dios nde jenhán:

Tátá Yaā Dios, tu ní cácandíje ñayuu jnūhun ni canacani ná, te tu ní cácandíje i jniñu jéhnū jeē ni steén ni poder ni núu i. Achí Isaías.

<sup>39</sup> Jeē yúcuan tu ní cúu candíje i, chí ni cahān tucu Isaías:

<sup>40</sup> Ni sáha ya jeē nájnūhun cáhīyo cuáá ánuá i,

jíin jéé cáacunĭhni ni i,

návāha coo nájnūhun jeē tu cájito i,

te ni ma jécūhun ni i,

ni ma násāma ini i quīvícoo i nuū rī,

jeē nasávāha ri anuá i nuū cuéchi i.

Achí Cristo, achí tutu.

<sup>41</sup> Jñuhun yáha ní cahān Isaías, chi je ni jito de ndese yōhyo cújéhnū Jesús, te ni cahān de ndese coo quivī jeē quíji ya.

<sup>42</sup> Te vēsú súcuan te cuehē ñayuu hebreo chi ni cacandíje i ya, te suni nde jíin sava tēe cándacu jniñu. Te tu ní cáacachi de jeē cáacandíje de ya, chi siquī jeē cáyūhú de tāca tēe fariseo. Chi núu súcuan te quenehen ún de ini vehe íi sinagoga jeē ma cuáha ga jñuhun quivīcoo de.

<sup>43</sup> Chi cácusī gā ni de jeē cújéhnū de sáha ñayuu, vēsú jeē cújéhnū de sáha Yaā Dios.

*Jñuhun cáhán Jesús cúu jeē sándaā siquī ñáyuu*

<sup>44</sup> Te ni cahān jee Jesús:

Ñayuu cáacandíje ruhū, nasūu máñúhún-ni ruhū cáacandíje i, chi suni cáacandíje i nde maá Tátá rī, Yaā ní tají rúhū.

<sup>45</sup> Te ñayuu cájito nuū rī, suni cájito i nuū Yaā ní tají rúhū.

<sup>46</sup> Máá rí jeē cúu ri luz cúndijin ini anuá ñayuu, ní quiji ri ini ñayivī návāha tāca ñáyuu cáacandíje ruhū, ma cáca i nájnūhun nuū néē.

<sup>47</sup> Te núu ñin ñayuu jíni sōho i jñuhun cáhán rī, te núu tu jétáhú i, te nasūu rúhū sándaā siquī í. Chi tú vēji ri jeē ndénehen rī cuéchi siquī ñayuu ñayivī, chi sa suhva jeē jnáma ri i.

<sup>48</sup> Te ñayuu jeē casquéhichī i ruhū te tu cájetáhú i jñuhun cáhán rī, íyó ñin jeē sándaā siquī í. Suu tāca jñuhun jeē ní cahān rī, jñuhun un cúu jeē ndenehen cuéchi siquī i quivī jínu ñayivī.

<sup>49</sup> Chi tu cáhán rī jeē cúu ní maá rí, chi Tátá rī, Yaā ní tají rúhū, máá yá ni ndacu jniñu nuū rī ndese cahān rī jíin ndese stéén rī.

<sup>50</sup> Te jíni rī jeē jniñu ndácu Tátá rī sáha jeē cótecu ñayuu níí cáni. Núu súcuan te jñuhun cáhán rī, chi máni jñuhun jeē ní cachí Tátá rī cúu, áchí yá.

*Jeē ní nacate ya jehē tēe cáscuáha*

## 13

<sup>1</sup> Te jehíni inga quivī te quejéé vico pascua. Te je jíni Jesús jeē ní quee quivī jeē quénda ya ñayivī yáha quínuhun yā nuū Tátá yā. Te níni cúndáhú ní yā ñayuu maá yá jeē cáyūcú ini ñayivī. Te vijna jeē jínu jeē íne ya ñayivī, te sáha ya ñin jniñu jeē steén cají yá jeē cundáhú ní yā i.

<sup>2</sup> Te jexeén je ní squivī ini anuá Judas Iscariote sehe Simón, jeē vijna nastúu de ya.

<sup>3</sup> Te jíni Jesús jeē vēji ya nuū Yaā Dios, te nuhūn yā nuū Yaā Dios, jíin jéē ní sáha Tátá yā jeē cújéhnū ya siquī ndíhi-ní.

<sup>4</sup> Te cúxini ya jíin tēe cáscuáha jíin yá, te ni ndocuñī yā. Te ni stáa ya sahma ndíi ya, te ni jihni yā ñin toalla chíji ya.

<sup>5</sup> Te ni chuhun ya ndute ini ñin tijehēn. Te ni quejéé yá nácate ya jehē tēe cáscuáha. Te násíchí yā jíin toalla jeē nuhní chíji ya.

<sup>6</sup> Te ni jínu yā nuū Simón Pedro. Te ni cahān Pedro jíin yá:

¿Sa máá ní nacate jehē ná naún?

<sup>7</sup> Te ni cahān Jesús:

Tu jécūhun ní rō jeē sáha ri vijna, te cúcuéé gá te jecūhun ní rō.

<sup>8</sup> Te ni cahān Pedro jíin yá:

Ma nácate cuiiti ní jehē ná.

Te ni cahān Jesús:

Núu tú nacate ri jehē rō, te ma cúu cundúú rō jíin rí.

<sup>9</sup> Te ni cahān Simón Pedro:

Núu súcuan cúu te nasūu máá jéhē-ni ná, chí suni nacate ní ndaha ná jíin xíní ná, áchí de.

<sup>10</sup> Te ni cahān Jesús jíin de:

Tēe jeē sa ní jichi, tu jíni nūhún ndundoo ní cáhnu de, chí máá jéhē-ni de, chí je iyó ndoo ní cáhnu de. Te máá rō chí je ní candundoo rō. Te tú ndihí rō cáhíyo ndoo.

<sup>11</sup> Chí je jíni yā ndé ñn de cúu jeē nastúu de ya, te jeē yúcuan ní cahān yā: Tú ndihí rō cáhíyo ndoo.

<sup>12</sup> Te nuū ní jínu ní nacate ya jehē de jíjnāhan de, te ni naquihin ya sahma ndíi ya, te ni nucōo tucu ya nuū mesa. Te ni cahān yā:

¿A cájecūhun ní rō na vé cuní cahān jeē ní sáha ri jíin rō?

<sup>13</sup> Cácahān rō jeē Maestro jíin Jítoho rō cúu ri, te ndaá cácahān rō, chí suu ndije cúu ri.

<sup>14</sup> Núu súcuan te vēsú Maestro rō jíin Jítoho rō cúu ri, te ni nacate ri jehē rō jíjnāhan rō, te suni súcuan cánuú jēē nacate máá rō jehē jnāhan rō.

<sup>15</sup> Chí jniñu yáha ní sáha ri jeē steén rí nuū rō jeē suni súcuan sa cuajniñu rō nuū jnāhan rō, nájnūhun sa máá rí ní jejniñu ri nuū rō.

<sup>16</sup> Jendaá cahán rí jíin rō jeē ñn mozo tu cújéñu de nuū patrón de, te tēe jíca jniñu táhú nuū de, te cújéñu de nuū téé ní tají de. Te máá rō cácuu mozo rí, te na cuájniñu rō nuū jnāhan rō nájnūhun ní steén rí nuū rō.

<sup>17</sup> Te núu ní cajecūhun ní rō jnūhun yáha, te yōhyo ndetū rō te núu squícu rō.

<sup>18</sup> Te nasūu jēē cahán rí jeē ndihí rō ndetū, chí je jíni rí táca rōhó jēé ní nacáji ri. Te cánuú squícu jnūhun yáha jeē cáhán tutu íi: Tēe yéji staā jíin rí, ní ndió cuíñí de siquí rí, achí tutu.

<sup>19</sup> Te vijna te je cástūhun rí táca jēē yáha núu rō nde ná tu coo, návāha núu na cóo, te candíje rō jēē máá rí cúu Yaā ní tají Yaā Dios.

<sup>20</sup> Jendaá cahán rí jíin rō jeē na-ni ñayuu jeē cuatáhú i táca jēē tají rí, te ruhū jetáhú i. Te ñayuu jetáhú rúhū, suni jétáhú i Yaā ní tají rúhū vēji rí, achí yá.

*Jeē ní cachi yā jeē nastúu Judas yā*

*(Mt. 26.20-25; Mr. 14.17-21; Lc. 22.21-23)*

<sup>21</sup> Te ná ní cahān Jesús táca jnūhun yáha, te ni cucuíhyá ndasí ní yā. Te ni cahān cají yá:

Jendaá cahán rí jíin rō jíjnāhan rō jēē ñn máá rō nastúu ruhū, achí yá.

<sup>22</sup> Yūcuán na te tēe cáscuáha jíin yá, ní candacoto de nuū jnāhan de, cájeni ní de ndé ñn de cúu jeē ní cahān yā.

<sup>23</sup> Te ñn máá téé scuáha jeē maní gā yā jíin, néne de xiin ya mesa jeē cácuixíni de jíin yá.

<sup>24</sup> Te ní sáha Simón Pedro seña nuū de jeē na cájnūhún de ya ndé ñn de cúu jeē ní cahān yā.

<sup>25</sup> Yūcuán na te tēe un ní scáyi de máá de nuū Jesús, te ni cajnūhún de ya:

¿Ndé ñn de cúu? áchí de jíin yá.

<sup>26</sup> Te ni cahān Jesús:

Na chūndaji ri staā te cuáha ri nuū ñn de, te suu tēe un cúu, áchí yá.

Te ní chundaji ya staā, te ní jēhe ya nuū Judas Iscariote sēhe Simón.

<sup>27</sup> Te jeē ní quihin de staā ún, te ní quívi-ni Satanás ini anuá de. Yūcuán na te ni cahān Jesús jíin de:

Jniñu jeē sāha ró, na sāha yachī rō.

<sup>28</sup> Te ni ñin tēe cáyeji staā jiín yá, tu ní cájecūhun ni de naun ni cahān yā súcuan jiín de.

<sup>29</sup> Chi sava de cájeni ni de jeē ni cáhān Jesús jiín Judas jeē cuāan de jeē jini ñuhūn yá vico ún, chí jēe cuāha de jecu xūhun núu ñayuu ndahú. Chi máa de ndíso yjini xūhūn.

<sup>30</sup> Te jeē ní yeji de staā ún, te ni quenda-ni de cuahān de. Te je ni cuaa.

### *Jeē ní ndacu ya jniñu jéé*

<sup>31</sup> Yūcuán na te jeē cuahán Judas te ni cahān Jesús:

Vijna te ruhū, Yaā ní nduu tēe, stéén rī ndese cújéhu ri, te suni jiín rúhū te cuni ñayuu ndese cújéhu Yaā Dios.

<sup>32</sup> Te núu jiín rúhū cuni ñayuu ndese cújéhu Yaā Dios, núu súcuan te suni stéén Yaā Dios ndese cújéhu ruhū jeē cúu ri Sēhe ya. Te yachī-ni stéén yā.

<sup>33</sup> Séhē, tuá nahán condee rī jiín ró jijnáhan ró. Te nanducú ró ruhū, te nájnūhun ni cahān rī jiín táca jnáhan yó hebreo, suni súcuan cáhán rī jiín ró vijna, jeē ma cúu jinūcoo ró núu quihín rī.

<sup>34</sup> Te vijna te ndácu ri ñin jniñu jéé núu rō, jeē na cúndáhú ni rō jnáhan ró. Nájnūhun cúndáhú ni rī rohó, suni súcuan na cúndáhú ni rō jnáhan ró.

<sup>35</sup> Te núu cúndáhú ni rō jnáhan ró, súcuan te cuni táca ñayuu jeē cácuu ró tée cáscuáha jiín rí, achí yá.

### *Jeē ní cachi yā jeē yūhu Pedro cahān de jeē jini de ya (Mt. 26.31-35; Mr. 14.27-31; Lc. 22.31-34)*

<sup>36</sup> Te ni cahān Simón Pedro jiín yá:

¿Ndé nuū quihín ni núu súcuan?

Te ni cahān Jesús:

Nuū quihín rī chí ma cúu condiquín rō ruhū vijna, te cúcuéé gá te jinū rō.

<sup>37</sup> Te ni cahān Pedro:

¿Najehē ma cúu condiquín na níhín vijna? Tu yúhú ná cuu na jéé siquí ní.

<sup>38</sup> Te ni cahān Jesús:

¿A jéni ni rō jeē tu yúhú ró cuu rō jeē siquí rí? Jendaá cahán rī jiín ró jeē nde ná tu cana líhli, te uní jínu yūhu ró te cahān rō jeē tu jini rō ruhū. Achí yá.

### *Jesús cúu ichi jeē jinú yō nuū Tatá yā*

## 14

<sup>1</sup> Te ni cahān gā yā:

Ma cuculhyá ni rō siquí táca jnúndóho. Na cándije ró jéé sāha Yaā Dios jehē rō, te suni na cándije ró jéé sāha rí jehē rō.

<sup>2</sup> Chi nuū ndeé Tátá rí, íyó cuéhē vehe condee rō jijnáhan ró. Te núu jeē tu súcuan íyó, te je ni castūhun rí nuū rō nuú. Núu súcuan te quihín rí quisátūhva rí nuū cóyūcu ró.

<sup>3</sup> Te jeē quihín rí sátūhva ri nuū cóyūcu ró, te ndiji ri quinaquihin ri rohó quihín yō, návaha suni coyūcu ró nuū cóndee maá rí.

<sup>4</sup> Te je cájini rō ndé nuū quihín rí, te cájini rō ndese jinū rō yūcuán. Achí yá.

<sup>5</sup> Te ni cahān Tomás jiín yá:

Tu cájini na ndé nuū quihín ni, ¿te ndese cuni ná ichi jínú yūcuu núu súcuan?

<sup>6</sup> Te ni cahān Jesús jiín de:

Máá rí cúu ichi jinū rō andiví, te máá rí cúu jnūhun ndaā jíin jnúhun cotecu rō níí cáni. Te ni ñn ma jinú nuū Tatá rī te núu tú ruhū.

<sup>7</sup> Te núu je ni cajini rō ruhū, te suni je ni cajini rō Tatá rī núu súcuan. Te ndé vijná je cájini rō yā, chí je ni cajito ró núu rī, achí yá.

<sup>8</sup> Te ni cahān Felipe jíin yá:

Stéén ni Tatá ni núu ná, te na cúvāha ni na jíjnāhan ná, áchí de.

<sup>9</sup> Te ni cahān Jesús:

Felipe, je ni cuu cuehē quiví jica ri jíin ró jíjnāhan ró, ¿te á ná tu cuni rō ndé ñn cúu rī naún? Tēe jeē jíto ruhū, suu Tatá rī jíto de. Núu súcuan ¿te najehē cahān rō jeē steén rī Tatá rī nuū rō?

<sup>10</sup> ¿A tu cándije ró jēē ñn-ni cúu rī jíin Tatá rī, te Tatá rī ñn-ni cúu ya jíin rí? Tāca jnúhun cáhān rī jíin ró, nasūu jnúhun máá rí cúu. Chí Tatá rī jeē ñn-ni cúu ya jíin rí, máá yá sāha tācá jniñu jeē sāha rī.

<sup>11</sup> Candije ró jíjnāhan ró jēē ñn-ni cúu rī jíin máá Tatá rī, te Tatá rī ñn-ni cúu ya jíin rí. Te núu tu cájecūhun ni rō, te candije ró rúhū siquī tācá jniñu sāha rī.

<sup>12</sup> Jendaá cahān rī jíin ró, núu ndé ñāyuu candije ruhū, jniñu jéhnū jeē sāha rī yáhá, suni sāha i. Te jéhnū ga jniñu sāha i vēsú yāhá, chí quínuhun rī nuū ndeé Tatá rī.

<sup>13</sup> Te tācá na-ni vé cacán rō nuū Tatá rī siquī jeē cácandije ró jēē cúu rī Sēhe ya, te sāha rī jeē cacán rō, te súcuan stéén rī jeē yóhōyó cújéhnū Tatá rī.

<sup>14</sup> Chí tācá na-ni vé cacán rō siquī jeē cácandije ró rúhū, te sāha nahín rí.

### *Jeē ni jéjnūhun ya jeē tají yá Espíritu Santo*

<sup>15</sup> Te núu maní rō jíin rí jíjnāhan ró, te na squícu ró jniñu ndácu rī nuū rō.

<sup>16</sup> Te cacān tahú rī nuū Tatá rī, te tají yá inga Yaā chindéé ñāhān rōhó, te sāha ya jeē cóo sñ ni rō jíjnāhan ró. Te Yaā un cúu máá Espíritu jeē steén jnūhun ndaā, te condee yā jíin ró níí cáni.

<sup>17</sup> Te ñāyuu ñayiví má cúu cuatáhú i ya, chí tu cúu coto i nuū yā, ni tu cúu cuni i ndese Yaā cúu ya. Te máá ró chí je cájini rō ndese Yaā cúu ya, chí ndeé yá jíin ró, te condee yā ini anuá rō níí cáni.

<sup>18</sup> Ma stóo uun rī rohó, chí ndiji rī nuū rō.

<sup>19</sup> Jecu na quiví te ma cóto ga ñāyuu ñayiví núu rī. Te máá ró jíjnāhan ró chí coto ró núu rī, chí cotecu rī níí cáni, te jeē yúcuan suni cotecu máá ró.

<sup>20</sup> Te quiví ún te cuni rō jeē ñn-ni cúu rī jíin Tatá rī, te máá ró ñn-ni cúu ró jíin rí jeē ndeé rí ini anuá rō jíjnāhan ró.

<sup>21</sup> Te na-ni ñāyuu núu ññuhun ni i jniñu ní ndacu rī, te squícu i, ñāyuu un cúu jeē maní ndije jíin rí. Te ñāyuu jeē maní jíin rí, suni coo maní Tatá rī jíin i. Te suni ruhū coo maní rī jíin i, te stéén rī nuū i jeē nduú rí jíin i. Achí yá.

<sup>22</sup> Te ni cahān Judas jíin yá (te nasūu tēe cúu Iscariote):

Najehē cúu jeē steén ni máá ní nuū ná, te nuū ñāyuu ñayiví chí tuú?

<sup>23</sup> Te ni cahān Jesús:

Ñāyuu jeē maní jíin rí, chí cásquícu i jeē cahān rī. Te coo maní Tatá rī jíin i. Te Tatá rī jíin máá rí quíjicoo rí cundúu rí jíin i.

<sup>24</sup> Te ñāyuu jeē tú maní jíin rí, tu cásquícu i jeē cahān rī. Te jnūhun cájini sōho ró cáhān rī, nasūu jnúhun máá rí cúu, chí jnūhun máá Tatá rī jeē ní tají rúhū cúu.

<sup>25</sup> Tāca jnúhun yáha cáhān rī jíin ró níni íne ga rī jíin ró.

26 Te Tatá rī chi tají yá Espíritu Santo, quiji nucuíñī nuū rī. Te máa yá chindéé ñáhán yá rohó, te sáha ya jeé cóo sñī ni rō. Te steén yā tāca jnūhun nuū rō, te nacachi tucu ya tāca jée ni cáhān rī jín rō.

27 Te jeé quihín rī, te sáha ri jeé cóo ndeyí coo sñī ni rō. Nájñūhun íyó ndeyí sñī ni maá rī, suni súcuan coo ndeyí sñī ni rō sáha ri. Te jeé sáha ri jeé cóo ndeyí sñī ni rō, tu quíjnáhan jín jnūhun ndeyí cácahān ñayuu ñayīví. Ma cucuíhyá ni rō siquī tāca jnūndóho, te ni ma yūhu rō.

28 Je ni cajini sōho ró jée ni cáhān rī jeé quihín rī, te ndiji ri cundúú rí jín ró. Te núu cáhīyo manī váha ró jín rí, te cusñī ni rō jeé ni cáhān rī jeé nuhún rī nuū Tatá rī. Chí cújéhu ga Tatá rī vijna vésú ruhū.

29 Je ni castūhun rí nuū rō tāca jnūhun yáha nde ná tu coo, návāha núu je ni cuu, te candíje ró ruhū jijnáhan ró.

30 Ma cahán rī cuehē gā jnūhun jín ró, chi je vēji jexeén jeé ndácu jniñū ini ñayīví yáha. Te tú na vé cúu sáha siquī rī nuū.

31 Te na cóo nájñūhun ni ndacu Tatá rī jniñū nuū rī, návāha cuni ñayuu ñayīví jée maní rī jín Tatá rī, te sáha ri jniñū ní ndacu ya. Ndocuíñī jijnáhan ró na quíngoo yó. Achí yá.

*Jesús cúu nájñūhun yoyúcu uva*

## 15

1 Máa rí cúu nájñūhun yoyúcu uva váha ndaā, te Tatá rī cúu nájñūhun tēe ndíto yoyúcu uva un.

2 Te máa ró chi cácuu ró nájñūhun ndaha, te núu tu jéhe ró ndéhē te quende yā rohó. Te núu cácuu ró nájñūhun ndaha jeé jéhe ndehē, te nasándoo ya nacahnde yā rohó nájñūhun jeé cúu ró ndaha ún, návāha cuāha ró cuéhē gā ndehē.

3 Te máa ró chi je ni candundoo ánuá rō jín jnūhun ni steén rī nuū rō, nájñūhun ndúndoo ndaha uva.

4 Na cundúú ró jín rí, te suni máa rí cundúú rí jín ró. Ñn ndaha uva ma cúu cuāha ndehē jeé maá, te núu tu yíjnñī jicá yóho. Te suni súcuan máa ró, ma cúu sáha ró jniñū váha te núu tu cundúú ró jín rí.

5 Máa rí cúu yoyúcu un, te máa ró cácuu ndaha ri. Ñayuu jeé nduú jín rí, te ruhū ndúú rí jín i, máa i cúu nájñūhun ndaha jeé jéhe cuehē ndehē. Chí núu tú cundúú ró jín rí, te tú cuiti na jniñū váha cuu sáha ró.

6 Ñayuu jeé tu cundúú jín rí, quende yā i nájñūhun ñn ndaha uva, te ichī. Te ndoho i nájñūhun ndaha uva un jée ndutútú te cayū nuū ñuhún.

7 Núu ndúú ró jín rí, te cáñuhun ni rō jnūhun cáhān rī, yūcuán na te cacān rō na-ni vé cácuni rō, te sáha ri jeé cácahān rī.

8 Te núu cásáha ró cuéhē jniñū váha, súcuan cástéén rō jeé cúu ndije ró ñayuu cascuáha jín rí, te súcuan nácuni ñayuu jeé yóhoo cújéhu Tatá rī.

9 Nájñūhun maní Tatá rī jín rí, suni súcuan maní rī jín ró jijnáhan ró. Núu súcuan te ma siaá rō jnūhun maní rī jín ró.

10 Núu squícu ró jniñū ní ndacu ri nuū rō, te níni coo maní rī jín ró, nájñūhun máa rí squícu ri jniñū ní ndacu Tatá rī nuū rī, te níni íyó máni yā jín rí.

11 Súcuan ni cahān rī jín ró návāha coo sñī ni rō nájñūhun íyó sñī ni rī, chí nde cusñī teyí ni rō.

12 Te yáha cúu jniñū ndácu ri nuū rō jijnáhan ró: jeé na cundáhú ni rō jnāhan ró nájñūhun cundáhú ni rī rohó.

13 Núu ñn tēe cuu de jehē amigo de, te tuá na vé cúmanī gā sáha de jeē cundáhú ni de amigo de.

14 Te máá ró cácuu amigo rī núu squícu ró jniñu ndácu ri nuū rō.

15 Ma cahán gā rī mozo jíin ró, chí ñn mozo tu cástühún patrón nuū i ndese jéni ni de sáha de. Chí sa suhva amigo cahán rī jíin ró, chí je ni castühun rí nuū rō táca jñuhun ni cahán Tatá rī jíin rí.

16 Máá rí ni nacáji róhó jéē jnáma rí rohó, te nasūu máá ró ni cánacani ni xíhna gā jeē cóndiquñ rō ruhū. Te ni jeni rí rohó jéē caca ndaā rō te scándíje ró cuéhē ñayuu jeē cuu i sēhe rí ñí cáni. Te súcuan te ndíhi jeē cacán rō nuū Tatá rī siquí jeē cácañde ró rúhū, sáha ya jeē jícan rō.

17 Te yáha cúu jniñu ndácu ri nuū rō: jeē na cúndáhú ni rō jnáhan rō.

*Jeē cáquití ni ñayuu ñayívi núu Jesús jíin núu ñayuu cácañde*

18 Te núu cáquití ni ñayuu ñayívi núu rō jíinánan rō, te je cájini rō jeē xíhna gā nuū máá rí ni caquití ni i.

19 Te núu jeē iyó gá rō jíin modo ñayuu ñayívi, te coo manī ñayuu ñayívi jíin ró nuú, nájnūhun manī i jíin jnáhan i. Te ní nacáji rí rohó jéē tuá coo ró jíin modo ñayuu ñayívi. Te jeē yúcuan cáquití ni i nuū rō, chí tuá cácuu ró cuenta ñayívi.

20 Nucūhun ni rō jñuhun ni cahán rī jíin ró: Núu tu iyó yíñuhún ñayuu nuū patrón, te nagā ni cuu nuū mozo de. Núu ni cajito xeē i ruhū, te suni súcuan coto xeē i róhó jéē cácuu ró mozo rī. Te núu jeē ni cájetáhú i jñuhun ni steén rí, te suni cuatáhú i jñuhun cásteén rō.

21 Te táca jniñu yáha sáha i jíin ró jeē siquí ruhū, chí tu cájini i Yaā ní tají rúhū vēji rí.

22 Núu jeē tu ní quíji rí nacani rí jñuhun nuū i, te ma cóo cuēchi i núu. Te vijna chí ma cúu ga cahán i jeē tu jíin i jeē iyó cuēchi i.

23 Ñayuu jeē cáquití ni nuū rí, suni nuū Tatá rí cáquití ni i.

24 Núu jeē tu ní sáha rí jniñu jéhu nuū i jeē ní ñn tēe tu ní sáha de súcuan, te ma cóo cuēchi i núu. Te vijna je ni cajito i jniñu ún, te vésú súcuan te cáquití ni i nuū rí jíin núu Tatá rí.

25 Te súcuan cása ha i návaha squícu jñuhun yósó núu tútu ley Yaā Dios jeē cánevaha i: Ni caquití ni i nuū rí, vésú tú na cuēchi rí, achí.

26 Te tají rí máá Yaā chindéé ñáhán róhó te sáha ya jeē cóo sñi ni rō. Te Yaā un cúu máá Espíritu jeē steén jñuhun ndaā, te quíji ya nde nuū Tatá rí, te nacani cáji yá jñuhun rí.

27 Te suni máá ró nacani ró jñuhun rí, chí je cáhñin ro jíin rí nde ná ni quejéé rí nácani rí jñuhun.

## 16

1 Táca jñuhun yáha ní cahán rī jíin ró návaha ma náyūhu ró jeē quíji jñūdóho.

2 Chí quenehen i róhó jéē ma cuáha ga i jñuhun cone ró táca vehe ñi sinagoga. Te quee quiví jeē cahni i róhó, te caní ni i jeē ñn jniñu yáha ni sáha i nuū Yaā Dios.

3 Te súcuan sáha i jíin ró, chí tu cájini cuiti i máá Tatá rí ni máá rí.

4 Te ní cahán rí jñuhun yáha jíin ró návaha núu je ní quee quiví jeē súcuan coo, te nucūhun ni rō jeē jé ni cahán rī jíin ró.

*Jniñu sáha Espíritu Santo*

"Te tu ní cáhán rī jñūhun yáha jíin ró nde xīhna ñúhún, chí íne máá rí jíin ró jijnáhan ró.

5 Te vijna chí nuhūn rī condee rī jíin Yaā ní tají rúhū vēji rī. Te ní ñin ró tu cájnūhun ró ndé nuū quihín rī.

6 Chí máá jéé cácuuíhyá ndasí ní ró jeē ní cáhán rī súcuan jíin ró.

7 Jendaá cahán rī jíin ró: Jeē váha máá ró jijnáhan ró cúu jeē quihín rī. Chí núu tú quihín rī, te ma quiji Yaā chindéé ñáhan róhó te sáha ya jeē cóo sñ ní ró. Te núu cuahán rī, te tají rí yā quiji ya nuū ró.

8 Te jeē quéé yā, te stéén yā nuū ñáyuu ñayīvi jéé iyó cuéchi i, jíin ndese quivicoo i ichi ndaā, jíin jéé sándaā Yaā Dios siquī cuéchi i.

9 Stéén yā jeē iyó cuéchi i, chí tu cácandije i ruhū.

10 Te stéén yā siquī ichi ndaā, chí máá rí nuhūn rī nuū Tatá rī, te ma cóto ga rō nuū rī.

11 Te stéén yā siquī jeē sándaā Yaā Dios cuéchi ñayuu, chí je ní cundaā jeē jñahnú ndetū máá jéxeén jeē kujéhnū ini ñayīvi yáha.

12 "Te iyó cuéhē gā jñūhun cúni rī cahán rī jíin ró, te ma cúu jecūhun ní ró vijna.

13 Te jeē quéé máá Espiritu jeē steén jñūhun ndaā, te máá yā steén tāca jñūhun ndaā un núu ró. Chí ma cahán yā jeē máá yā, chí cahán yā tāca jéé jíni sōho ya cahán Yaā Dios. Te stéén yā siquī tācá jñiñu jeē coo.

14 Te stéén yā jeē kujéhnū rī, chí nacastūhun yā nuū ró tāca jñūhun jeē jé ní cahán rī, te sáha ya jeē jécūhun ní ró.

15 Ndihi ndese cújéhnū Tátá rī, suni súcuan cújéhnū máá rí. Jeē yúcuan ní cahán rī jeē Espiritu Santo nacastūhun yā nuū ró tāca jñūhun jeē jé ní cahán rī, te sáha ya jeē jécūhun ní ró jijnáhan ró.

### *Vēsú cácuuíhyá ní ró, te ndusñ ní ró*

16 "Jecu na te ma cóto ga rō nuū rī. Te jecu tucu quivī te coto tucu ró núu rī, chí quínuhun rī nuū ndeé Tátá rī. Achí yá.

17 Yūcuán na te sava tēe cáscuáha jíin yá, ní cacajnūhun jñáhan de:

¿Na jñūhun cúu jeē yáha jeē cahán yā jíin yó? Chí achí yá jeē jecu na te ma cóto ga yō nuū yā, te jecu tucu quivī te coto tucu yó núu yā, chí siquī jeē quínuhun yā nuū ndeé Tátá yā.

18 ¿Na jñūhun cúu jeē yáha jeē cahán yā, jecu na? Tu cájecūhun ní yō na vé cúu jeē cahán yā. Achí de.

19 Te ní jini Jesús jeē cácuni de cajñuhún de ya. Te ní cahán yā jíin de:

¿A cácajnūhun jñáhan ró na vé cúu jeē ní cáhán rī jíin ró jeē jecu na te ma cóto ga rō nuū rī, te jecu tucu quivī te coto tucu ró núu rī?

20 Jendaá cahán rī jíin ró jeē ndahyū ró jijnáhan ró te cucuíhyá ní ró, te ñayuu ñayīvi chí sa cusñ ní i. Te vēsú cucuíhyá ní ró, te sa ndusñ ní ró jeē cóto tucu ró núu rī.

21 Ñin ñahan núu cuacuyajni scácu ña, te jéhnde chíji ña, chí je ní quee hora jeē scácu ña. Te núu je ní scácu ña sūchi lúli, te tuá nahán ña jeē ní ndoho ña, chí cusñ ní ña jeē ní cacu sehe ña.

22 Te suni súcuan cúu jeē cándoho ró vijna, chí cácuuíhyá ní ró jíin rí. Te jecu-ni quivī te coto jñáhan tucu yó, te cusñ ndasí ní ró. Te ní ñin ma cúu casi jeē cusñ ní ró.



<sup>23</sup> Te quivĩ ún chi tú na vé cacān gā rō nuū rī. Chi jendaá cahán rī jín rō jeē nuū maá Tátá rī cacān rō, te sáha ya ndihí jeē cájicān rō, siquĩ jeē cá candíje rō rúhū.

<sup>24</sup> Nde vijna te ná tu cacān rō nuū Tátá rī jeē jín síhví rí. Te vijna te na quejéé rō cacān rō jín síhví rí, te nihín rō, návāha cusĩ ndasí ni rō.

*Je ni quende yā poder ndihí jeneé cáh̄yo ini ñayiví*

<sup>25</sup> Tāca jnúhun yáha ní cahān yatá rí jín rō. Te quee quivĩ jeē ma cahán yatá gá rí jín rō, chí sa suhva castūhun cájĩ rí nuū rō siquĩ Tátá rī.

<sup>26</sup> Te quivĩ ún chi cacān rō nuū Tátá rī siquĩ jeē cá candíje rō rúhū. Te tu cahán rī jín rō jeē cacán tahú rī jehē rō nuū Tátá rī.

<sup>27</sup> Chi maá Tátá rī je cundáhú ni yā rohó siquĩ jeē cáh̄yo manī rō jín rí, te ni cacandíje rō jéé ndé nuū maá yá vēji rí.

<sup>28</sup> Ni quenda ri nde nuū Tátá rī, te ni quee rī ini ñayiví. Te vijna te quenda ri ini ñayiví, te nuhūn tucu ri nuū Tátá rī. Achí yá.

<sup>29</sup> Te ni cacahān tēe cáscuáha jín yá:

Vijna te cáhán cají ní, te tuá cahán yatá ní.

<sup>30</sup> Vijna te cájini na jéé jini ní ndivíi cuiti, te tuá jini ñúhún jéé cájnūhún ni ĩn ná níhín. Jeē yúcuān cá candíje ná jéé vēji ní ndé nuū Yaā Dios. Achí de.

<sup>31</sup> Te ni cahān Jesús jín de:

¿A ndé vijna te cá candíje rō naún?

<sup>32</sup> Te quiji quivĩ, te je ni quee, jeē cuité núu rō quínungoo rō ná vehe ná vehe rō, te stóo máñúhún rō ruhū. Te nasūu jéé quéndōo máñúhún rí, chí Tátá rī íne ya jín rí.

<sup>33</sup> Tāca jnúhun yáha ní cahān rī jín rō návāha coo ndeyí coo sī ni rō siquĩ jeē cá candíje rō rúhū. Ini ñayiví chí cánuú coto rō jnúndóho. Te vēsú súcuān te na cóo sī ni rō, chí je ni quende rī poder tāca jeneé cáh̄yo ini ñayiví. Achí yá.

*Jeē ni jicān tahú Jesús jehē ñayuu cá candíje*

## 17

<sup>1</sup> Te ná ni cahān Jesús tāca jnúhun yáha, te ni ndacoto ya ichi ándiví, te ni cahān yā:

Tátá, je ni quee quivĩ jeē ndóho ná. Vijna te steén ni jéé cujéhnú maá ná jeē cúu ná Séhe ní, návāha suni maá ná steén na jéé cujéhnú máá ní.

<sup>2</sup> Chi ní sáha ní jéé ndíso jníñu ná siquĩ tāca ñáyuu, návāha tāca ñáyuu jeē ni jéhe ní núu ná, cotecu i ní cáni sáha ná.

<sup>3</sup> Te suhva cúu jnúhun cotecu i ní cáni: suu jeē na cúni i níhín jéé mañúhún-ni ní cúu Yaā ndaā, jín jéé cúni i sáñá jeē cúu ná Jesucristo, Yaā ní tají ní.

<sup>4</sup> Je ni steén na núu ñáyuu ñayiví jéé cujéhnú ní, te je sínu ná jniñu ní ndacu ní núu ná.

<sup>5</sup> Te vijna, Tátá, sáha ní jéé ndujéhnú tucu ná ndé nuū néne ní, nájnūhun cújéhnú ná jín ní nde ná tu jecōo ñayiví.

<sup>6</sup> Ñayuu jeē ní nacāji ní ini ñayiví, ni jéhe ní i nuū ná, te ni steén na núu i ndese Yaā cúu ní. Cuenta maá ní cúu i, te ni jéhe ní i nuū ná. Te ni cajetáhú i jnúhun ní, te ni casquícú i.

<sup>7</sup> Te vijna te cájini i jeē ndé nuū maá ní vēji tāca jéé iyó jín ná.

<sup>8</sup> Chi tāca jnúhun ni cahān ni jín ná, ní castūhun ná nú i, te ni cajetáhú i. Te ni cajini i jeē ní quenda ndije ná ndé nuū maá ní, te ni cacandíje i jeē maá ní ni tají sãña.

<sup>9</sup> Te jícán tahú na jéhē maá i jínáhan i. Tu jícán tahú na jéhē ñayuu ñayivi jéē tu cácan díje, chi sa jehē maá ñayuu ni jéhe ni nú ná, chi cuenta maá ní cácuu i.

<sup>10</sup> Te tācá i jeē yñi i ndaha maá ná, suni cuenta maá ní cúu. Te tācá i jeē cúu i cuenta maá ní, suni cuenta maá ná cúu i. Te cástéén i ndese cújéhu ná.

<sup>11</sup> Te tuá condee ná ini ñayivi. Te maá i chi quendōo i ini ñayivi, te maá ná chi najeē ná condee na jín ní. Yaā i Yaā ndoo cúu ní, Tātā. Te jín poder ní condito ní tāca ñayuu ni jéhe ni nú ná, návaha inuú na cóo ni i jínáhan i, nájñūhun cúu maá yó.

<sup>12</sup> Te jeē ní condee na jín i ini ñayivi, te jín poder ni ní condito ná i. Tāca ñayuu ni jéhe ni nú ná, ni condito yúcun ná i. Te tu ní jéhe na jnúhun naa i jínáhan i, chi maá ñn-ni tēe jeē je cúu de tēe jnahnū ndetū, návaha squicu jñūhun yósó nú tútu i.

<sup>13</sup> Te vijna te najeē na nú ní, te cáhán na tāca jnúhun yáha jín i níni jéē íne ga ná ini ñayivi, návaha na cóo sñ ndasí ni i nájñūhun cúsní ni maá ná.

<sup>14</sup> Ni castūhun ná jñūhun ní nú i. Te ni caquiti ni ñayuu ñayivi nú i, chi tuá cácuu i cuenta ñayivi, nájñūhun maá ná tu cúu ná cuenta ñayivi.

<sup>15</sup> Te tu jícán tahú na jéē quénehen ní i ini ñayivi, chi sa suhva jeē cóndito ní i nuū jexeén.

<sup>16</sup> Nasūu cuenta ñayivi cácuu i, nájñūhun maá ná jéē násūu cuenta ñayivi cúu ná.

<sup>17</sup> Jín jnúhun ndaā ní te sáha ní jéē coo ndoo coo i i nuū ní. Tāca jnúhun cáhán maá ní cúu jñūhun ndaā.

<sup>18</sup> Te nájñūhun ni tají ní sãña ní quiji ná ini ñayivi, suni súcuan tají ná i nacani i jñūhun ní nú ñayuu ñayivi.

<sup>19</sup> Te jehē maá i cúu jeē jéhe ná maá ná cuu ná, návaha suni maá i coo ndoo coo i i nuū ni jéē jín jnúhun ndaā.

<sup>20</sup> Te nasūu maá ñn-ni jehē ñayuu yáha jícán tahú na, chi suni jehē tāca gá ñayuu jeē candíje i sãña nú na cúni sōho i jñūhun jeē nacani maá i jínáhan i.

<sup>21</sup> Te jícán tahú na jéē inuú na cóo ni i jínáhan i. Nájñūhun ñn-ni cúu ní jín ná, Tātā, te ñn-ni cúu ná jín maá ní, suni súcuan na cóo inuú i jín yó. Te cúni na jéē inuú na cóo ni i, návaha na cándíje ñayuu ñayivi jéē maá ní ni tají ní sãña.

<sup>22</sup> Ni sajhenu ná i nájñūhun ni sajhenu ní sãña, návaha inuú na cóo ni i, nájñūhun inuú-ni cúu yó.

<sup>23</sup> Te ndúú ná jín i, te ndúú ní jín ná, te súcuan te inuú cuiti coo ni i jínáhan i. Yūcuán na te cuni ñayuu ñayivi jéē maá ní ní tají ní sãña, jín jéē maní ndasí ní jín i nájñūhun maní ni jín ná.

<sup>24</sup> Tātā, maá ní ni jéhe ní i nuū ná. Te cúni na jéē cóyúcú i jín ná nuū cóndee ná, návaha coto i ndese luu cújéhu ná ni sáha ní. Chi íyó maní ndasí ní jín ná nde ná tu jecōo ñayivi te nde vijna.

<sup>25</sup> Yaā ndaā cúu ní, Tātā, te ñayuu ñayivi tu jín i níhín, te maá ná chi jín na níhín. Te ñayuu yáha chi cajini i jeē maá ní ni tají sãña.

<sup>26</sup> Ni stéén na nú i jínáhan i ndese Yaā cúu ní. Te stéén gā na súcuan nuū i, návaha na cóo maní ndasí i jín jnáhan i, nájñūhun íyó maní ndasí ní jín ná, te návaha condee ná ini anuá i. Achí yá.

*Jeē ní cajñi de Jesús*  
(Mt. 26.47-56; Mr. 14.43-50; Lc. 22.47-53)

## 18

<sup>1</sup> Te nuū ní cuu ni cahān Jesús tāca jnúhun yáha, te ni quenda ya jiín tée cáscuáha jiín yá, cuahān yā inga lado yuu Cedrón. Te yūcuan íyó ñin huerto nuū ní quivi ya jiín tée cáscuáha jiín yá.

<sup>2</sup> Te Judas, tēe jeē nastúu de ya, suni jíní de lugar un, chi cuehē jínu ni nataca Jesús yūcuan jiín tée cáscuáha jiín yá.

<sup>3</sup> Te ni jinū de yūcuan jiín ñin grupo soldado jiín jecu policía cándito templo, jeē ní catají sutū cácujeñnu jiín tée grupo fariseo. Te cándiso de machete, te cájni de linterna jiín yiti.

<sup>4</sup> Te Jesús je jíní yā tāca jnúndóho jeē véji siquí yā. Te ni quenda ya ichi núu de, te ni cahān yā:

¿Ndé ñin cánanducú ró?

<sup>5</sup> Te ni cacahān de jiín yá:

Jesús tēe ñuu Nazaret cánanducú rí.

Te ni cahān yā:

Máá rí cúu.

Te Judas, tēe jeē nastúu de ya, suni íne de jiín tée ún.

<sup>6</sup> Te jeē súcuan ni cahān yā, máá rí cúu, te ni cajica yátá de, te ni cacotúu-ni de.

<sup>7</sup> Yūcuán na te ni cajnúhún tucu ya de:

¿Ndé ñin cánanducú ró?

Te ni cacahān de:

Jesús tēe ñuu Nazaret.

<sup>8</sup> Te ni cahān Jesús:

Je ni cachi rí jeē máá rí cúu. Te núu ruhū cánanducú ró, te máá-ni ri jñi ró, te tēe yáha na quingoo de. Achí yá.

<sup>9</sup> Súcuan ni cuu návāha na squicu jnúhun jeē ni cahān yā jiín Tátá yā: Tu ní jéhe na jnúhun naa ni ñin tēe jeē ní jéhe ni núu na, achí yá.

<sup>10</sup> Te Simón Pedro ndiso de ñin espada. Te ni tava de, te ni jehnde de sōho lado váha ñin tēe nání Malco. Te tēe un cúu de mozo máá sutū cujéñnu.

<sup>11</sup> Te ni cahān Jesús jiín Pedro:

Nachuvāha espada rō ini cubierta. ¿A tu cánuú jéē ndóho ri jnúndóho yáha jeē ni sándaā Tátá rí jeē ndóho rí? Achí yá.

*Jeē ní indichi Jesús nuū sutū cujéñnu*  
(Mt. 26.57-58; Mr. 14.53-54; Lc. 22.54)

<sup>12</sup> Yūcuán na te táca soldado un, jiín capitán de, jiín táca policía tēe hebreo un, ni cajñi de Jesús, te ni cajihni de ya.

<sup>13</sup> Te xihna gā vehe Anás cuangoo de jiín yá. Te tátá chíso Caifás cúu Anás. Te Caifás cúu máá sutū cujéñnu ga cuiyā ún.

<sup>14</sup> Te suu de ni cachi nuū jnáhan de hebreo jeē cánuú jéē cúu ñin tēe jehē nación de.

*Jeē ní cachi Pedro jeē tu jíní de ya*  
(Mt. 26.69-70; Mr. 14.66-68; Lc. 22.55-57)

<sup>15</sup> Te Simón Pedro jiín inga tēe scuáha, cándiquin de Jesús cuangoo de yatā yā. Te inga tēe scuáha ún chi jíní jnáhan de jiín sutū cujéñnu. Jeē yúcuan ní quivi de jiín Jesús ini patio vehe sutū cujéñnu ún.

16 Te Pedro ni quendōo de yatā yehyí. Te máá tée scuáha jéé jíní jnáhan jíin sūtū kujéhnū ún, ni quenda de ni cahān de jíin ñahan ndíto yéhyí, te ni squívi de Pedro ini patio.

17 Yūcuán na te ñahan ndíto yéhyí un ní cajnūhún ña Pedro:

¿A násūū ñin tēe scuáha jíin tēe índichi nuū sutú un cúu ró?

Te ni cahān de:

Nasūu cúu ri, achí de.

18 Te tāca mozo jíin policía un ní cascáyú de ñuhūn jíin tícāyi, chí mījin sāha. Te cáhīn de cánasaā de. Te suni índichi Pedro, násaā de jíin tāca tēe ún.

*Jeé ni stíchí sutū kujéhnū ún Jesús*

*(Mt. 26.59-66; Mr. 14.55-64; Lc. 22.66-71)*

19 Te sutū kujéhnū un ní stíchí de Jesús ndé-ni cúu tēe cáscuáha jíin yá, jíin na jnūhun cúu jeé steén yā.

20 Te ni cahān Jesús:

Níní ní cahān rī nuū chítū ñáyuu, ni cajini sōho ndíhi ñayuu. Te níní ní steén rī jnūhun ini tācá vehe ñi sinagoga jíin ini templo cáhnu nuū ndutútú ndivíi jnáhan yó hebreo. Te tú ni ñin jnūhun ní cáhán sāhi rí.

21 ¿Te naun cajnūhun ró ruhū? Cajnūhun ñáyuu ní cajini sōho jnūhun ni cahān rī, te máá í cachi ndese ni cahān rī. Chí cájini í ndese ni cahān rī.

22 Te jeé ni cáhán Jesús súcuan, te ñin policía ndíto templo jeé índichi de yūcuán, ní cani-ni de nuū yā. Te ni cahān de jíin yá:

¿A súcuan cáhán rō jíin sūtū kujéhnū naún?

23 Te ni cahān Jesús:

Núu ni cahān rī ñin jnūhun néé, cachi na jnūhun néé ní cahān rī. Te núu tu ní cáhán rī ñin jnūhun néé, ¿te naun cáni ró ruhū? achí yá.

24 Yūcuán na te Anás, sutū kujéhnū un, ní tají de ya, núhni yā cuahān yā nuū Caifás, tēe cúu máá sūtū kujéhnū ga.

*Jeé ní cachi tucu Pedro jeé tu jíin de ya*

*(Mt. 26.71-75; Mr. 14.69-72; Lc. 22.58-62)*

25 Te níní jeé súcuan cúu, te índichi-ni Pedro, násaā de yuñúhún. Te ni cacahān jíin de:

¿A násūū ñin tēe scuáha jíin tēe un cúu ró, chí naún?

Te máá de tu ní cáchi de:

Nasūu cúu ri, achí de.

26 Yūcuán na te ñin mozo sutū kujéhnū, jnáhan tēe jeé ní jehnde Pedro sōho, ni cahān jíin de:

¿A násūu máá ró cúu jeé ní jito ri jíin de ini huerto?

27 Te Pedro tu ní cáchi tucu de. Te ni cana-ni líhli.

*Jeé ní índichi Jesús nuū Pilato*

*(Mt. 27.1-2, 11-14; Mr. 15.1-5; Lc. 23.1-5)*

28 Yūcuán na te ni quendacoo de jíin Jesús vehe Caifás, cuango de jíin yá nde palacio tēe nación Roma jeé cúu gobernador. Te je cuacundijin. Te ñayuu hebreo tu ní quívicoo i ini palacio, návaha tu stívi i ley i jeé cáhán jeé ma quívi i ini vehe ñin ñayuu jeé násūū hebreo cúu. Chí núu súcuan te ma cúu cuxíni i vico pascua jeé cóo inga quívi ún.

29 Yūcuán na te ni quenda Pilato, tēe cúu gobernador, ni cahān de jíin i jíinánhan i:

¿Na cuēchi cájicān rō siquī tēe yáha?

30 Te ni cacahān i:

Núu jeē násūu tée cúnéé cúu tēe yáha, te ma jn# ná de jeē quíndeca ná de nuū ni núu, áhí i.

<sup>31</sup> Te ni cahān Pilato:

Cuángoo jijnáhan ró, te sándaā rō siquī de jín ley cánevāha máá ró.

Te ni cacahān ñayuu hebreo un:

Máá ná jeē cácuu ná ñáyuu hebreo, tú na permiso cánevāha ná jēe cáhni ná ni ñn ñayuu.

<sup>32</sup> Súcuan ni cacahān i návāha squícu jnūhun jeē ní cachi Jesús jeē quívi ya ndaha tēe Roma te cahni de ya jicā cruz.

<sup>33</sup> Te ni ndīvi Pilato ini palacio, te ni cana de jeē na quíji Jesús. Te ni cajnúhún de ya:

¿A máá ró cúu Rey ñayuu hebreo naún?

<sup>34</sup> Te ni cahān Jesús jín de:

¿A cájnūhun ró ruhū jeē súcuan jéni ni maá ró, chí jēe ní cacastūhun ñáyuu hebreo nuū rō?

<sup>35</sup> Te ni cahān Pilato:

¿Chí tēe hebreo cúu ri jeē cúni rī? Ñayuu nación maá ró jín sūtū cácujuhnu ni cachihi róhó ndaha ri. ¿Na vé ni sáha ró núu súcuan? Achí de.

<sup>36</sup> Te ni cahān Jesús:

Nasūu jēe ndácu ri jniñu nájnúhun cándacu tāca rey ñayīvi yáha. Chi núu jeē ñáyuu ñayīvi ní casáha jeē cúu ri rey, yūcuán na te tēe cándiquín ruhū, cuajnáhan de návāha ma quívi ri ndaha jnáhan ri hebreo nuú. Te nasūu núu ñayīvi yáha cúu jeē ndácu ri jniñu vijna. Achí yá.

<sup>37</sup> Yūcuán na te ni cahān Pilato jín yá:

¿Te á ñn rey cúu ró jēe súcuan?

Te ni cahān Jesús:

Rey cúu rī, nájnúhun cáhán rō. Ni quiji ri ni cacu ri ini ñayīvi yáha návāha nacani ri jnūhun ndaā. Te ndīhi ñayuu cájetáhú jnūhun ndaā, cájini nahín i jnūhun cáhán rī. Achí yá.

<sup>38</sup> Te ni cahān Pilato:

¿Ndese cuni yō ndé ñn cúu máá jnúhun ndaā?

*Jeē ní cundaā jeē cúu yā*

*(Mt. 27.15-31; Mr. 15.6-20; Lc. 23.13-25)*

Te jeē ni cáhān de jnūhun yáha, te ni quenda tucu de nuū ñáyuu hebreo. Te ni cahān de jín i:

Tú cuíti na cuēchi níhín rī siquī de.

<sup>39</sup> Te iyó costumbre maá ró jijnáhan ró jēe vico pascua te siaá rī ñn tēe íne vecāa nuū rō. ¿Te á tu cácu ni rō jeē siaá rī Rey rō nuū rō? Achí de.

<sup>40</sup> Yūcuán na te ndīvii i ni cacana jee tucu i:

Ma siaá ni tēe jíñá, chí Barrabás siaá ni, áhí i.

Te tēe cuíhná cúu Barrabás.

## 19

<sup>1</sup> Yūcuán na te ni cahān Pilato jeē na jn# soldado Jesús, te cani de ya jín cuarta ñii.

<sup>2</sup> Te ni casáha de ñn corona iñu, ni cachuhun de xinī yā. Te ni cachuhun de ya ñn sahma cuehé ndíhí jēe cúu sahma rey.

<sup>3</sup> Te ni jecondichi de nuū yā, te ni cacahān catá de:

Nacā jeē váha rey cúu Rey ñayuu hebreo.

Te ni cacani de nuū yā.

<sup>4</sup> Yūcuán na te ni quenda Pilato inga jínu, te ni cahān de jíin ñáyyuu:

Yāhá condēhe ró tava rī de, návāha na cúni rō jeē tú na cuēchi níhín rī siquī de.

<sup>5</sup> Te ni quenda Jesús, ñūhun ya corona iñu jíin sahma cuehé ndíhí un. Te ni cahān Pilato jíin i:

Yāhá condēhe ró de jíināhan ró.

<sup>6</sup> Te nuū ní cajito sutū cácujeñnu jíin táca policia nuū yā, te ni cacana jee de: Cata caa ní de jicā cruz, na cúu de.

Te ni cahān Pilato:

Núu súcuan te najnī máá ró de te cahni rō de. Chi ruhū, tú na cuēchi níhín rī siquī de.

<sup>7</sup> Te ni cacahān ñáyyuu hebreo un:

Cánevāha ná ñin ley, te jeē siquī ley un cánuú jēē cúu de, chi sáha de máá de jeē Séhe Yāá Dios cúu de.

<sup>8</sup> Te jeē ní jini sōho Pilato jñūhun yáha, te víhyá gā ni yūhú de.

<sup>9</sup> Te ni ndívicoo tucu de ini palacio, te ni cajñūhún de Jesús:

¿Ndé nuū véji ró?

Te tu ní cáhán cuiti Jesús jíin de.

<sup>10</sup> Yūcuán na te ni cahān de jíin yá:

¿Naun tu cáhán rō jeē cahán rī? ¿A tu jíin rō jeē ndíso jñíñu ri jeē cáhni rī rohó jicā cruz, te suni ndíso jñíñu ri jeē siaá rī rohó quíhín rō?

<sup>11</sup> Te ni cahān Jesús:

Núu tu ní sáha Yāá Dios jeē ndíso jñíñu ró, te tú na vé cúu sáha ró siquī rī. Jeē yúcuau tēe jeē ní nacuaāha ruhū ndaha ró, cuēchi xeēn gā condee siquī de vēsū máá ró. Achí yá.

<sup>12</sup> Yūcuán na te nde hora un ndúcú ndéyí Pilato ndese siaá de ya. Te ñáyyuu hebreo chi cácana jee i:

Núu siaá ni tēe jíñā, te tu cúu ní amigo rey Roma jeē cujéñnu ndácu jñíñu núu súcuan. Chi táca tēe jeē sáha de rey máá de, núu súcuan te cúu de enemigo siquī rey un. Achí i.

<sup>13</sup> Te jeē ní jini sōho Pilato jñūhun yáha, te ni ndacu de jñíñu jeē na quenda Jesús ini vehe quiji ya. Te ni cucōo de silla nuū cúndaā jñíñu, nuū máni máá yúu ni jecáva, te lugar un nání Gabata nuū yúhu hebreo.

<sup>14</sup> Te cuacuu cahuxí uū, te jehíni quivī ún quejéé vico pascua. Te ni cahān Pilato jíin ñáyyuu hebreo:

Yāha índichi máá rey rō.

<sup>15</sup> Te ni cacana jee i:

Na cúu de. Cata caa ní de jicā cruz, achí i.

Te ni cahān Pilato jíin i:

¿A jēē cata caa rī rey rō jicā cruz naún?

Te sutū cácujeñnu un ní cacahān de:

Tuá na inga rey cánevāha ná jíināhan ná, chi máá-ni rey Roma jeē cujéñnu ndácu jñíñu nuū ná.

<sup>16</sup> Yūcuán na te Pilato ni nacuaāha de ya nuū i jeē na cúu yā jicā cruz. Te ni cajnī i ya cuango i jíin yá.

*Jeē ní cacata caa de ya jicā cruz*

*(Mt. 27.32-44; Mr. 15.21-32; Lc. 23.26-43)*

<sup>17</sup> Te ni quenda Jesús, ndíso ya cruz yā, cuango de jíin yá ñin lugar nuū naní Yiquí Xíní, te nuū yúhu hebreo naní Gólgota.

18 Te yūcuan ní cacata caa de ya jicā cruz. Te suni ni cacata caa de uū tēe nuū uū gā cruz, ñin ñin de ñin lado yā, te máá Jesús mēhñú.

19 Te suni ni ndacu Pilato jñiñu jeē na cóndee jñuhun xinī cruz yā, jeē cahán: Tēe yáha cúu Jesús ñuu Nazaret, Rey ñayuu hebreo, achí.

20 Te cuehē ñayuu hebreo ni cacahu i jñuhun yáha, chi máá yajni yuñúú cúu nuū ní cacata caa de ya. Te jñuhun un yósó jíin yuhu hebreo jíin griego jíin latín.

21 Te tāca sūtū cácujeñnu nuū ñáyuu hebreo, ni cacahān de jíin Pilato:

Ma tēe ní jēe cúu de Rey ñayuu hebreo, chi sa suhva tee ní jēe máa de ni cahān jeē cúu de Rey ñayuu hebreo.

22 Te ni cahān Pilato:

Ma násama ri jeē jé ni ndacu ri jñiñu ni jecondee.

23 Te soldado un, nuū ní cuu ni cacata caa de Jesús jicā cruz, te ni caquihin de sahma ya, te ni cajehnde de ni nduu cuñn parte, te ñin ñin parte ni cuu ñin ñin soldado un. Te suni ni caquihin de camisa yā. Te camisa un tu ní quícu, chí ni cunu níí.

24 Te ni cacahān máa de:

Ma cáhnde yō, chí vāha ga na sáha yó sorteo, te na cóndēhe yó ndé ñin yó níhñ, achí de.

Te sūcuan ni squícu jñuhun yósó núu tútu ñi nde jenahán jēe cahān Jesús: Ni caquihin de sahma ri cuu máa de. Te ni casáha de sorteo siquī camisa rí. Achí. Sūcuan ni casáha soldado un.

25 Te yajni cruz nuū ndíta caa Jesús íne náná yā, jíin cúhū ña María ñasihí Cleofas, jíin María ñuu Magdala.

26 Te ni jito Jesús nuū náná yā jíin núu tēe scuáha jeē maní gā yā jíin, suni índichi de yūcuán. Te ni cahān yā jíin náná yā:

Náná, nde vijna te máá de nucuiñí de cuu de sēhe ní.

27 Yūcuán na te ni cahān yā jíin tēe scuáha ún:

Nde vijna te cuu ña nájñuhun náná rō, achí yá.

Te nde hora un ní cana de ña cuacondee ña vehe de condito de ña.

### *Jeē ni jñi Jesús*

*(Mt. 27.45-56; Mr. 15.33-41; Lc. 23.44-49)*

28 Yūcuán na te ni jini Jesús jeē jé ni jñu tācá jñiñu jeē cánuu ndoho ya. Te návāha squícu jñuhun cáhán tutu ñi, te ni cahān yā:

Jíchí rí ndute, achí yá.

29 Te yūcuan íin ñin tindohō ñuhun chitú vinagre iyá. Te ni cachundaji de ñin cachí nuū vinagre un, te ni catee de xinī ñin ndaha yújnu hisopo, te ni catee de yuhu ya jeē cóho ya.

30 Te ná ni jñi ya vinagre un, te ni cahān yā:

Je ni jñu, achí yá.

Te ni cāyí-ni xinī yā, te ni jihí-ni ya.

### *Jeē ní cují soldado lanza xiin ya*

31 Te inga quiví ún coo vico pascua. Te tēe hebreo tu cácu ni de jeē cóndita caa ndiyí ún jicā cruz quiví ndétátú un. Chi quiví ndétátú jeē cúu vico pascua, ñi ndasí gá vésú tāca gá quiví ndétátú. Te ni cacahān de jíin Pilato jeē ni ndácu de jñiñu jeē jñahnú síhñ tēe cándita caa, te na cújiyo de jicā cruz.

32 Te ni quecoo soldado, te ni cajehnú de síhñ ñin tēe jeē ndíta caa jíin yá, te suni sūcuan inga de.

<sup>33</sup> Te nuū ní quecoo de nuū Jesús, te ni cajito de jeē jé ni jihī yā. Jeē yúcuan tu ní cájehnū de sīhin ya.

<sup>34</sup> Te ñn soldado chi ní cují de lanza xiin ya, te ni cane-ni niñī jín ndute.

<sup>35</sup> Te máá rí jeē tēe tutu yáha, ni jito rí jeē súcuan ni cuu, te nácani ndaa rī jñūhun ndese ni cuu. Te jíní rí jeē iyó ndaa jñūhun cáhán rī, návāha suni candíje máá ró jijnáhan ró.

<sup>36</sup> Chi súcuan ni cuu návāha squícu jñūhun cáhán tutu iī: Ma cahnú de ni ñn yiqui ya, achí.

<sup>37</sup> Te suni inga jñūhun cáhán tutu iī: ñn quivī te coto i nuū Yaā jeē ní cují i lanza, achí.

### *Jeē ní quindūji Jesús*

*(Mt. 27.57-61; Mr. 15.42-47; Lc. 23.50-56)*

<sup>38</sup> Te ni cuu táca jéē yáha. Te iyó ñn tēe ñuu Arimatea jeē naní José, te cúu de tēe cándíje Jesús. Te yuhu-ni cándíje de, chi yúhú de jnáhan de hebreo. Te ni cahān ndahú de jín Pilato jeē na cuáha jñūhun quihin de yiqui cúñu Jesús. Te ni jēhe Pilato jñūhun. Yūcuán na te cuahān José, ni snúu de yiqui cúñu Jesús.

<sup>39</sup> Te suni ni jinū Nicodemo, tēe ni quiji nuū Jesús ñn jecuāā. Te ndíso de nájñūhun ocó uxī kilo sūje uvuā jeē ní saca jnáhan jín yúcū áloe.

<sup>40</sup> Te ndindúú de ni caquihin de yiqui cúñu Jesús, te ni cachusúcún de jín tira sahma jeē ní quivī yucū jeē jeén asin ún, nájñūhun iyó costumbre maá ñayuu hebreo jeē cáchindūji i ndīyi.

<sup>41</sup> Te yajni nuū ni jihī Jesús iyó ñn huerto. Te nuū huerto un ndéé ñn yaū jeē ní caan jeē jicā ñn cava, nuū ná tu quindūji ndīyi.

<sup>42</sup> Te yúcuan ní cachindūji de Jesús, chi íne yajni yaū ndīyi ún. Chi je yajni quejéé quivī ndétátú de jeē cácuu de ñayuu hebreo, te tú na ley chindūji de ndīyi núu je ni quejéé quivī ún.

### *Jeē ní natecu Jesús*

*(Mt. 28.1-10; Mr. 16.1-8; Lc. 24.1-12)*

## 20

<sup>1</sup> Te jenéhen quivī domingo ni jinū María ñuu Magdala nuū ní yindūji Jesús, te yínee gā cúu. Te ni jito ña jeē ní cujiyo yuū ndihyú yuyáú ndīyi.

<sup>2</sup> Yūcuán na te jínu ña cuahān ña nuū Simón Pedro jín núu inga tēe scuáha ún jeē maní gā Jesús jín. Te ni cahān ña jín de:

Ni catava de Jitoho yō nuū ní yindūji ya, te tu cájini yō ndé nuū ní cachune de ya, achí ña.

<sup>3</sup> Te ni quendacoo Pedro jín inga tēe scuáha ún, cuácondéhē de yaū ndīyi.

<sup>4</sup> Te cájini tayí ndindúú de. Te inga tēe scuáha ún, ñihin ga ni jinu de vésú Pedro. Te xīhna gā de ni jinū yaū ndīyi.

<sup>5</sup> Te ni scáyí de máá de, te ni jito nihni de ini yaū. Te ni jito de jeē tira sahma un cáyūcu máá na. Te tu ní quivī de.

<sup>6</sup> Te sáá te ni jinū Simón Pedro jeē ndiquín jnáhan de vēji de jín inga tēe ún. Te ni quivī de nuū ní yindūji Jesús. Te suni ni jito de jeē tira sahma cáyūcu máá na.

<sup>7</sup> Te ni jito de sahma jeē ni ñúsúcún xíní Jesús, tu cátú jín tira sahma, chi ni natuu te cátú sīn.

<sup>8</sup> Yūcuán na te suni ni quivī inga tēe scuáha jeē ní jinū xīhna gā nuū ní yindūji ya. Te ni jito de ndese iyó, te ni candíje de jeē ní natecu yā.



<sup>9</sup> Chi nde ná tu jinū<sup>coo</sup> de yaū ndāyī, te tu ní jécūhun ni de jnūhun cáhán tutu iī, jeē jíni nūhún natecu yā núu je ní jihī yā.

<sup>10</sup> Yūcuán na te ndīndūú tée cáscuáha ún cuanungoo de vehe de.

*Jeē ní nane ya nuū María űuu Magdala  
(Mr. 16.9-11)*

<sup>11</sup> Te María índichi ña ndáhyú ña nuū ní yindūji ya. Te níni ndáhyú ña, te ni scáyī ña máá ña, ni jito nihni ña ini yaū ún.

<sup>12</sup> Te ni jito ña uū ndajéhé andiví, cáñuhun ya sahma cuijín. Te ñn ya néne ichi xíní, te inga ya néne ichi núu jehé nuū ni cátu yiqui cúñu Jesús.

<sup>13</sup> Te ni cahān yā jíin ña:

¿Najehē ndahyú rō?

Te ni cahān ña:

Ni catava de Jitoho ná, te tu jíni na ndé nuū ní cachune de ya.

<sup>14</sup> Te jeē ni cáhān ña súcuan, te ni ndió cóto ña, te ni jito ña nuū Jesús jeē índichi yā yūcuán. Te tu ní nácuni ña jeē máá yá cúu.

<sup>15</sup> Te ni cahān yā jíin ña:

¿Najehē ndahyú rō? ¿Ndé ñn nánducú rō? achí yá.

Te máá ña jéni ní ña jeē tée ndíto huerto cúu ya. Te ni cahān ña jíin yá:

Núu máá ní ni quenehen ní yá, te cachi ní ndé nuū ni jécune ní yá, te na quínuquihin ná yá, achí ña.

<sup>16</sup> Te ni cahān Jesús jíin ña:

María, achí yá.

Te jeē ni cáhān yā súcuan, te ni nacuni ña ya, te ni ndió cóto ña, te ni cahān ña jíin yuhu hebreo:

Raboni, achí ña. Te jnūhun un cúní cahān, Maestro.

<sup>17</sup> Te ni cahān Jesús jíin ña:

Ma quehé rō rúhū, chí ná tu ndaa ri quinhun rī nuū Tatá rī. Te cuáhán núu táca hermano rī, tée ni cascuáha jíin rí, te cachi rō nuū de jeē ndaa ri quinhun rī nuū Tatá rī, jeē suni Tátá máá ró jijnáhan ró cúu. Te cúu ya Yaā Dios máá rí jíin Yaā Dios máá ró jijnáhan ró. Achí yá.

<sup>18</sup> Yūcuán na te María űuu Magdala un, cuáhān ña, te ni castūhún ña nuū tée cáscuáha un jéé ní jito ña nuū máá Jitoho yō jíin jéé ni cáhān yā jnūhun yáha jíin ña.

*Jeē ní nane ya nuū tée cáscuáha jíin yá  
(Mt. 28.16-20; Mr. 16.14-18; Lc. 24.36-49)*

<sup>19</sup> Te jeē ní cuaa máá quívī domingo un, te cáhīn tūtú tée cáscuáha ún ini ñn vehe. Te cándiyū yehyí, chí cáyūhú de jnáhan de hebreo jeē coto xeēn i de. Te ni quee-ni Jesús, ni jecuiñī yā mēhñú de vēsū ndihyú yehyí, te ni cahān yā jíin de:

Ndeyí sñ coo ni rō jijnáhan ró, áchí yá.

<sup>20</sup> Te ná ni cahān yā súcuan, te ni steén yā ndaha ya jíin xiin ya nuū de. Te ni cacusī ni tée cáscuáha un jéé ní cajito de nuū máá Jitoho yō.

<sup>21</sup> Yūcuán na te ni cahān tucu Jesús:

Ndeyí sñ coo ni rō jijnáhan ró. Te nájnūhun ni tají Tátá rī ruhū ini ñayīví, suni súcuan tájí rí rohó nacani ró jnūhun ri nuū ñayuu. Achí yá.

<sup>22</sup> Yūcuán na te ni tiví tachí yā nuū de jijnáhan de. Te ni cahān yā:

Vijna te ni canihīn rō Espíritu Santo.

<sup>23</sup> Te tāca ñáyuu jeē cone cáhnu ni rō nuū cuéchi i, núu súcuan te coo jñūhun cáhnu ni nuū cuéchi i. Te núu tú cone cáhnu ni rō nuū cuéchi i, te ma cóo jñūhun cáhnu ni nuū cuéchi i. Achí yá.

*Jeē ní nane ya nuū Tomás*

<sup>24</sup> Te Tomás, tēe ni cacu cuatí, ñn jnáhan jeē uxí uū tēe cáscuáha jíin yá, tu ní íne de quiví jeē ní nane Jesús nuū tāca gá tēe cáscuáha.

<sup>25</sup> Yūcuán na te sava ga tēe cáscuáha un, ní cacahān de jíin Tomás:

Ni cajito ri nuū maá Jítoho yō.

Te ni cahān Tomás:

Núu tú coto ri nuū ni túji ndaha ya ni sáha ndūyu cāa, te núu tú chune ri xinī ndáha ri nuū ni íne ndūyu cāa, te núu tú chune ri ndaha ri xiin ya, te ma candíje cuiṭi rī, achí de.

<sup>26</sup> Te nuū uná quiví, te tēe cáscuáha un cáhīn tūtú tucu de ini ñn vehe. Te íne Tomás jíin de. Yūcuán na te ni quee-ni tucu Jesús, ni jecuiñí yā mēhñú de, vēsú cándihyū yehyí. Te ni cahān yā jíin de:

Ndeyí sñ coo ni rō jijnáhan ró.

<sup>27</sup> Te ni cahān-ni ya jíin Tomás:

Chune xinī ndáha ró ini ndaha ri yāhá te coto ró. Te scaá ndaha ró, te chune ró xiin ri nuū ni tújī. Te ma cáni siquí gá ni rō, chí sa suhva na cándíje ró.

<sup>28</sup> Yūcuán na te ni cahān Tomás jíin yá:

Aī, Jítoho maá ná jíin Yaā Dios maá ná cúu ní, áchí de.

<sup>29</sup> Te ni cahān Jesús jíin de:

Tomás, nde ni jito ró núu rī, te ni candíje ró. Te yōhyo ndetū tāca ñáyuu jeē candíje ruhū vēsú tu ní jíto i nuū rī, achí yá.

*Najehē ni tee Juan libro yáha*

<sup>30</sup> Te suni ni sáha Jesús cuehē gā jniñu jéhnu jeē ni stéen yā poder yā nuū tée cáscuáha jíin yá, jeē tu yósó núu tūtú yáha.

<sup>31</sup> Te tācá jniñu yáha ní tee ri návāha candíje ró jijnáhan ró jēe Jesús cúu Cristo, maá Séhe Yaā Dios. Chí jeē candíje ró yá, te cotecu rō ní cáni sáha ya.

*Jeē ní nane ya nuū uxá tēe cáscuáha jíin yá*

## 21

<sup>1</sup> Te ni cuu jecu quiví, te inga jínu ní nane Jesús nuū tée cáscuáha jíin yá, jeē cáhīn de yumar Tiberias. Te suhva ni stéen yā maá yá nuū de:

<sup>2</sup> Cáhīn tūtú Simón Pedro, jíin Tomás, tēe ni cacu cuatí, jíin Natanael, tēe ñnu Caná ndañū Galilea, jíin ndindúú séhe Zebedeo, jíin uū gá tēe cáscuáha.

<sup>3</sup> Te ni cahān Simón Pedro jíin de jijnáhan de:

Quíjnñi ri chācá.

Te ni cacahān de:

Suni quingoo ri jíin ró.

Te cuangoo de, te ni quivícoo de ñn barco. Te tu ní cánihīn cuiṭi de ti jecuáá yúcuan.

<sup>4</sup> Te jeē cuácundijin, te íne Jesús yumar. Te tēe cáscuáha ún, tu ní cánacuni de jeē maá yá cúu.

<sup>5</sup> Yūcuán na te ni cahān yā jíin de:

Aá rō jijnáhan ró, ¿á ní canihīn rō chācá caji yō?

Te ni cacahān de:

Tú cuiṭi, achí de.

<sup>6</sup> Yūcuán na te ni cahān yā jíin de:

Síngava ñunu ró ichi lado váha barco, te nihīn rō tī.

Te ni casíngava de ñunu, te tuá ní cúu cuítī natava de, jeē ni quívicoo cuehē ndasí cháca.

<sup>7</sup> Yūcuán na te tēe scuáha jeē maní gā Jesús jíin, ní cahān de jíin Pedro:

Maá Jítóho yō cúu, áchí de.

Te jeē ní jíin sōho Simón Pedro jeē maá Jítóho yō cúu, te ni nachuhun de sahma de, chí ni tava de jeē sájniñu de. Te ni ndava-ni de nuū mar cuahān de nuū yā.

<sup>8</sup> Te tāca gá tēe cáscuáha ún, vendicoo de jíin barco yundúte, cástaa de ñunu ñuhun chítú cháca. Chí tu jíca cáhīn de jíin ñuhun íchi, chí nájnūhun ciento-ni metro cúu.

<sup>9</sup> Te nuū ní quendacoo de ini barco, te ni cajito de jeē nduhvá tīcua ñuhūn, te íne staā jíin ñin chācá chíhyó.

<sup>10</sup> Te ni cahān Jesús jíin de:

Cuáquihin jecu chācá jēe sa ní cajnií ró, na táu yó, áchí yá.

<sup>11</sup> Te ni quívi Simón Pedro ini barco, te ni staa de ñunu, ni quee de jíin ndé nuū ñuhun íchi. Te ñuhun chítú cháca náhnu, ñin ciento uū xico uxī unī tī cúu. Te vésú ñin súcuan tī ñuhun, te tu ní táhndé ñunu.

<sup>12</sup> Te ni cahān Jesús jíin de:

Nehen jíjnáhan ró na cási ní yō.

Te ni ñin tēe cáscuáha ún tu ní cúndeyí ni de cajnūhún de ya núu ndé ñin cúu ya. Chí je cájini de jeē maá Jítóho yō cúu ya.

<sup>13</sup> Te ni quíndēhe Jesús yuñuhún, te ni quihin ya staā ún, te ni jēhe ya nuū de, te suni súcuan chācá un.

<sup>14</sup> Yáha cúu vuelta unī jeē ní nane Jesús nuū tēe cáscuáha jíin yá, ná ni natecu yā.

### *Jeē ní ndajnūhún Jesús jíin Simón Pedro*

<sup>15</sup> Te nuū ní cuu ni cajesi ní de, te Jesús ni cajnūhun yá Simón Pedro:

Simón sēhe Jonás, ¿á manī gā rō jíin rí vésú tāca gá tēe yáha?

Te ni cahān de:

Je jíiní ní jēe maní na jíin ní, achí de.

Te ni cahān yā jíin de:

Núu súcuan te stéén rō jnūhun ri nuū ñáyuu cácuu nájnūhun londe ri.

<sup>16</sup> Te ni cajnūhun yá de vuelta uū:

Simón sēhe Jonás, ¿á manī rō jíin rí?

Te ni cahān de jíin yá:

Je jíiní ní jēe maní na jíin ní, achí de.

Te ni cahān yā:

Condito ró ñáyuu cácuu nájnūhun lanchi ri núu súcuan.

<sup>17</sup> Te ni cajnūhún tucu ya de vuelta unī:

Simón sēhe Jonás, ¿á manī rō jíin rí?

Te ni cucuíhyá ní Pedro jeē ní cajnūhun yá de vuelta unī núu manī de jíin yá. Te ni cahān de:

Maá ní jíiní ní ndihí, te jíiní ní jēe maní na jíin ní.

Te ni cahān yā:

Núu súcuan te stéén rō jnūhun ri nuū ñáyuu cácuu nájnūhun lanchi ri.

<sup>18</sup> Te jendaá cahán rí jíin ró jeē nde ná suchí ró, te ni quihin máá ró sahma ró, te ní jica ró ndé nuū cuní máá ró. Te núu na yá ró, te nasúu jēe cuní máá ró,

chi inga ñayuu quindēca i rōhó nuū tu cúní rō quihīn rō. Te scáá rō ndindúú ndaha ró jéē cuu rō.

<sup>19</sup> Jnūhun yáha ní cahān yā jeē ni stéén yā jeē cóndita caa de jicā cruz cuu de, te jeē súcuan cuatáhú de cúu jeē steén de jeē yóhoyo cújéhnú Yaā Dios. Yūcuán na te ni cahān gā yā:

Condiquīn rō ruhū jeē sáha ró jniñu ní ndacu ri nuū rō, achí yá.

*Jnūhun tēe scuáha jeē maní gā yā jíin*

<sup>20</sup> Te ni ndió cóto Pedro, te ni jito de tēe scuáha jeē maní gā Jesús jíin, ndíquín de vēji de yatā. Tēe un cúu jeē ní conene xiin Jesús ná ni cacuxíni de jíin yá, te ni cajnūhún de ya: ¿Ndé ñin de cúu jeē nastúu níhín?

<sup>21</sup> Te jeē ní jito Pedro nuū tēe ún, te ni cajnūhún de Jesús:

Te tēe yáha, ¿ndese coo jíin de?

<sup>22</sup> Te ni cahān Jesús:

Núu cúní rī jeē cótecu de nde quivī ndíji ri, ¿te naun ndíhví ni rō? Máá ró chi condiquīn rō ruhū jeē sáha ró jniñu ní ndacu ri nuū rō, achí yá.

<sup>23</sup> Yūcuán na te jnūhun yáha ní jītē núu nuū tēcá hermano, jeē tēe scuáha un má cúu de. Te tu ní cáhán Jesús jeē ma cúu de, chi sa suhva ni cahān yā: Núu cúní rī jeē cótecu de nde quivī ndíji ri, ¿te naun ndíhví ni rō?

<sup>24</sup> Te tēe scuáha un jéē maní gā Jesús jíin, suu cúu ruhū jeē nácani jnūhun tēcá jniñu yáha, te suu ri tēe tēcá jnūhun yáha. Te cájini rō jijnáhan ró jéē iyó ndáā jnūhun nácani ri.

<sup>25</sup> Te suni iyó cuéhē ndasí gá jniñu ní sáha Jesús. Te núu tee yó ná ñin ná ñin, te ma cánda ní ñáyāví cuhun tutu jeē cóso jnūhun ún, jéni ni rī. Te ni cuu. Amén.

## JNIÑU JEHNU JEE NI CASAHA TEE APOSTOL

### *Jeē ni jéjnūhun ya quiji Espiritu Santo*

<sup>1</sup> Amigo Teófilo, nuū tútu jeē ní tee ná xihna gā ni castūhun ná nuū ni táca jniñu ní sáha Jesús, jín táca jnúhun ni steén yā nde quiví ní quejéé yá ni sáha ya.

<sup>2</sup> Te nde quiví ní ndaa ya cuanuhun yā andiví. Te nde ná tu ndaa ya quihīn yā, te ni sáha Espiritu Santo jeē ní ndacu ya jniñu nuū táca apóstol, tē ni nacāji ya.

<sup>3</sup> Te nuū ni jínu ni ndoho ya jeē ni jíhī yā, te uū xico quiví te tijni jínu ni steén ndijin yā maá yá nuū té un jíjnáhan de, te súcuan ni cajini de jeē iyó ndāā jeē ní natecu yā. Te ni cahān yā jín de siquī ndese ndácu Yaā Dios jniñu.

<sup>4</sup> Te ná cáhīn tútu de jín yá, te ni cahān yā jín ndihi de jeē ma quéndacoo de ini ñuu Jerusalén, chí áchí yá:

Condetu ró ndé quee Espiritu Santo jeē ni jéjnūhun maá Tátá rī Yaā Dios. Chi je ni cachi rī nuū rō jeē ni jéjnūhun ya quiji Espiritu Santo.

<sup>5</sup> Chi Juan, jendaá jeē maá ndute-ni ni scuándute de ñayuu. Te róhó jíjnáhan ró, jecu na quiví te nájnūhun cuandute ró jín Espiritu Santo, cúu jeē condee yā ini anuá rō, achí yá.

### *Jeē ní ndaa Jesús cuanuhun yā andiví*

<sup>6</sup> Yūcuán na te tē cáhīn tútu jín yá, ni cacajnúhún de ya:

¿A vijna te nasáha ní jéē ñayuu ñuu yō Israel ndujéhu i ndacu i jniñu nuū nación yō chí naún? áchí de.

<sup>7</sup> Te ni cahān yā:

Ma cúu cuni rō quiví chí cuiyā jeē cóo jeē ni sándaā maá Tátá rī, chí maá ñin-ni maá yá jini yā na quiví sáha ya.

<sup>8</sup> Te jeē cúni rō cúu jeē quée Espiritu Santo te condee yā ini anuá rō jíjnáhan ró. Yūcuán na te nihīn rō poder te nacani ró jnúhun rī ní ini ñuu Jerusalén, ní Judea, ní Samaria, nde ní cáhnu ñayiví, áchí yá jín de.

<sup>9</sup> Te ni ndihi ni cahān yā táca jnúhun yáha. Te níni cájito de nuū yā, te ni ndaa-ni ya cuanuhun yā andiví. Te ni quee vicō ni jesi-ni nuū cuahān yā, te tuá ni cájito de ya.

<sup>10</sup> Te níni cáhīn de cájito ndaa de ichi ándiví núu ní ndaa ya cuahān yā, te uū jnáhan ndajéhé yā cáñuhun ya sahma cuijín ní cajecuiñí yā xiin de jíjnáhan de, te cájito ya nájnūhun tēe.

<sup>11</sup> Te ni cacahān yā jín de:

Róhó tēe Galilea, ¿najehē cájito ndaa ró ichi ándiví? Chi maá Yáā Dios ni naquihin ya Jesús cuanuhun yā andiví, te suni súcuan ndiji ya nájnūhun cájito ró cuahān yā andiví, áchí yá.

### *Jeē ní canacāji de Matías jeē nucuiñí de nuū Judas*

<sup>12</sup> Yūcuán na te ni nanungoo de yucu jeē naní Olivos, cuanungoo de ñuu Jerusalén. Te yajni-ni íne yucu un jín ñuu Jerusalén, nájnūhun ñin kilómetro-ni, cūhva jeē ni jéhe ley permiso caca ñayuu quiví ndétātu.

<sup>13</sup> Te ni ndivicoo de ini ñuu. Te ni ndacoo de cuarto xiní véhe nuū cáyūcu núu de. Te táca de cúu Pedro, Jacobo, Juan, Andrés, Felipe, Tomás, Bartolomé,

Mateo, Jacobo sêhe Alfeo, Simón jeē cúu jnáhan grupo cananista, jíin Judas ñani Jacobo.

<sup>14</sup> Tāca tēe yáha, níni cándutútú inuú de cájicān tahu de jíin tāca ñani Jesús jíin náná yā María jíin sava ga ñahan.

<sup>15</sup> Te ñin quiví te ni jecondichi Pedro nuū tācá hermano cácanđije. Te cáhīn nájñuhun ciento ocō ñayuu. Te ni cahān de:

<sup>16</sup> Hermano jijnáhan ní, ni squícu nahín jñuhun cáhán tutu ñi jeē ni cáhān David nde jenahán ní sáha Espíritu Santo. Te jñuhun un ní cuu siquī Judas jeē ní yosnúu núu tēe ni cajñi Jitoho yō Jesús.

<sup>17</sup> Te suu tēe un ní jica de jíin yó, te ni chindéé ñáhán jnáhan de jíin yó siquī jniñu ní jeni ya yohó.

<sup>18</sup> Te ni cajeen ñin ñuhun jíin xúhun ní nihīn tēe un siquī jniñu neé ní sáha de. Te ni ñinga ndeyi de, te ni ndatā sáva chīji de, te ndihí yiti de ni jite.

<sup>19</sup> Te ni jite jñuhun yáha núu tāca ñáyuu cáyūcú ñuu Jerusalén, te jeē yúcuan cúu jeē ní casnání i ñuhun ún Acéldama nuū yúhu máá i, jeē cuní cahān ñuhun jeē cúu cuenta ñiñi.

<sup>20</sup> Chi súcuan je yósó núu tútu Salmo siquī Judas:

Vehe de na quéndōo iyú,

te ma cóndee ni ñin ga ñayuu ñini vehe ún.

Te suni cáhán:

Jniñu ní condiso de na cóndiso inga tēe.

Achí.

<sup>21</sup> Núu súcuan te jíni ñuhún jeē núcuiñi ñin tēe lugar maá de jíin yó. Te tēe núcuiñi jíin yó un, nacāji yó de mēhñu tāca tēe ni cajica jíin yó tāca quiví jeē ní jica máá Jitoho yō Jesús jíin yó.

<sup>22</sup> Te tēe nacāji yó un cúu tēe jeē ni iyo de jíin yó nde quiví ní jendute ya ni sáha Juan, te nde quiví ní ndaa ya cuanuhun yā andiví. Te tēe núcuiñi jíin yó na cúu de testigo jíin yó jeē jé ni natecu yā, achí de.

<sup>23</sup> Te ni catee nuū de uū jnáhan tēe: Matías jíin José jeē naní de Barsabás te suni nání de Justo.

<sup>24</sup> Te ni cajicān tahu de:

Tátā Yāā Dios, máá ní chi jíni ni ndese cáa ánuá tāca ñayuu. Núu súcuan te jeē ndindúú tēe yáha, stéén ni ndé ñin de cúu jeē ní nacāji ní.

<sup>25</sup> Te condiso jniñu de cuu de apóstol. Te naquihin de jniñu ní stóo Judas, chí ní sáha de cuēchi te cuahān de lugar xeēn nuū cánuú quíhīn de, achí de.

<sup>26</sup> Yūcuán na te ni casáha de ñin sorteo te ni jinū Matías, te ni núcuiñi de ni nduu de jnáhan ndihúxí ñin apóstol.

*Jeē ní quee Espíritu Santo*

## 2

<sup>1</sup> Te máá quiví víco Pentecostés ni cahīn tútu ñayuu cácanđije ñuu Jerusalén.

<sup>2</sup> Te sanaa-ñi te ni quejéé ñihīn vēji nde andiví nájñuhun tachī ñihīn queé, te tāca ñayuu jeē cáyūcú ñini vehe un ní cajini sōho i jeē ñihīn ún.

<sup>3</sup> Te ni cajito i nájñuhun yáñuhūn jeē ní cajitē núu te ni cacucōo xinī ná ñin ná ñin i.

<sup>4</sup> Te ndihí i, ni cunuú Espíritu Santo jíin i, te ni quejéé i cácahān i sñin sñin yuhu, ndese ni steén máá Espíritu nuū ná ñin ná ñin i cahān i.

<sup>5</sup> Te ñuu Jerusalén, suni cáhīn ñayuu hebreo, yñuhún núu Yāā Dios, jeē ní quijicoo i nde tācá nación ñi cáhnu ñayiví.

<sup>6</sup> Te jeē ni n̄h̄in súcuan te ni cacutútú cuéhē ñayuu ún. Te ni cunéé í ni ni j̄j̄n̄ahan i, chi ná ñ̄n ná ñ̄n i ni cajini s̄oho i jeē tée ni canih̄in Esp̄iritu Santo cacah̄an de j̄n̄uhun yuhu ñ̄úú j̄cá nuū véji i.

<sup>7</sup> Te ni canaa ni i cájito i te ni cacah̄an i:

¿A násū tée Galilea cácuu táca tée yáha jéē cacah̄an de táca yuhu ñ̄úú nuū vējicoo yó?

<sup>8</sup> ¿Na vé ni cuu yáha núu súcuan? Chi ná ñ̄n ná ñ̄n yó cájini s̄oho yó cacah̄an de j̄n̄uhun yuhu ñ̄úú nuū ní cacacu yó.

<sup>9</sup> Chi vējicoo yó ndé táca ñ̄uu j̄cá. Sava yó véji nde Partia j̄j̄n Media j̄j̄n Elam. Te sava ga yō vēji yó ndé Mesopotamia j̄j̄n Judea j̄j̄n Capadocia j̄j̄n Ponto j̄j̄n Asia.

<sup>10</sup> Suni nde Frigia j̄j̄n Panfilia j̄j̄n Egipto j̄j̄n tijni ñ̄uu jeē íne nde yatā gā ñ̄uu Cirene ñ̄uhun Africa vējicoo yó. Te sava ga yō nde ñ̄uu Roma vējicoo yó, te cáyūcu j̄j̄nu-ni yó yáha. Te máa yó jeē vējicoo ñ̄uu Roma, sava yó cácuu máa ñ̄áyuu hebreo te sava ga yō cácuu ñ̄ayuu s̄ín ñ̄uu, ni cacandíje yó ndíquín yō ley ñ̄ayuu hebreo.

<sup>11</sup> Suni nde Creta j̄j̄n Arabia vējicoo sava yó. Te cájini s̄oho yó jéē j̄j̄n j̄n̄uhun yuhu ñ̄úú ná ñ̄n ná ñ̄n máa yó cacah̄an de táca j̄n̄iñu jéhnu ní sáha Yáa Dios, achí i.

<sup>12</sup> Te ndih̄i i chi ni canaa í ni i cájini nahín i. Te ni candaj̄n̄uhún i j̄j̄n j̄n̄ahan i:

¿Na vé cúu jeē ní cuu núu súcuan jeē cacah̄an de yuhu ñ̄úú yō? achí i.

<sup>13</sup> Te sava i ni cacah̄an catá i:

Tuú chi jeē cánañ̄i de, achí i.

### *Jeē ní nacani Pedro j̄n̄uhun nuū ñ̄áyuu*

<sup>14</sup> Yūcuán na te ni candocuiñ̄i Pedro j̄j̄n ndih̄úxí ñ̄n ga apóstol, te ni cah̄an jee Pedro j̄j̄n ñ̄áyuu ún:

Nihín j̄n̄ahan ñ̄uu yō hebreo, j̄j̄n ndih̄i nihín jéē cáyūcu ní Jerusalén, j̄n̄uhun yáha na ch̄uhun ni ni j̄j̄n̄ahan ní, chi cuni nahín ní cah̄an na j̄j̄n ní.

<sup>15</sup> Chi máa ná j̄j̄n̄ahan ná, nasūu jéē cájini ná náj̄n̄uhun cájeni ni ní, chi sáa cah̄an jenéhen cúu, te nasūu hora cánañ̄i ñ̄ayuu cúu.

<sup>16</sup> Chi sa suhva squícu j̄n̄iñu yáha náj̄n̄uhun ni cah̄an Joel, tée ni nacani j̄n̄uhun Yáa Dios nde jenahán, chi súcuan ni cah̄an de:

<sup>17</sup> Achí Yáa Dios: Quiv̄i sándih̄i na te tají rí Esp̄iritu rí cunuú yá j̄j̄n táca ñ̄áyuu, te sēhe yí rí j̄j̄n séhe s̄h̄i rí, nacani i j̄n̄uhun rí, te táca tée lulí chi coto ndijin de jeē steén rí nuū de, te táca tée jéhnu chi sáha rí jeē scóto jēni de.

<sup>18</sup> Te quiv̄i ún chi tají rí Esp̄iritu rí cunuú yá j̄j̄n táca mozo rí, cúu tée cúu ñ̄ahan, te nacani i j̄n̄uhun rí.

<sup>19</sup> Te ichi ándiv̄i sáha rí j̄n̄iñu jéhnu jeē náa ni ñ̄ayuu coto i, te sáha rí j̄n̄iñu jéhnu iní ñ̄ayiv̄i jéē steén jeē cujéhnu rí, chi coo niñ̄i j̄j̄n ñ̄úh̄un j̄j̄n ñ̄úhmā náj̄n̄uhun víco. Yūcuán cúu jeē sáha rí jeē cóo j̄n̄úndóho xeén.

<sup>20</sup> Te nduu j̄n̄úú níandii te ma cúndijin gā,

te yoó coto cuéhē náj̄n̄uhun niñ̄i.

Yūcuán na te quee quiv̄i jeē ndíji máa Jítóho rō Jesús.

Quiv̄i ún coo cuehē j̄n̄iñu jéhnu, te cuni ndih̄i ñ̄ayuu jeē quiv̄i maá Jítóho rō cúu.

<sup>21</sup> Te táca ñ̄áyuu jeē cah̄an ndahú i j̄j̄n yá te j̄n̄ama ya i, achí Yáa Dios.

Achí Joel ni nacani de jnūhun ya.

<sup>22</sup> Jeē yúcuan nihín téē ñuu yō Israel, cuni nahín gá ni jnúhun yáha jijnáhan ní. Ní steén Yaā Dios jeē ní tají yá maá Jesús, Yaā ní jehnu ñuu Nazaret, chí maá Yáa Dios ni jēhe ya jeē ní sáha Jesús jniñu jéhnú mēhñu maá ní, jíin jniñu jeē steén jeē kujéhnú ya, te jniñu un ní canaa ní ní cajito ní. Te je cájini vāha ní jēē súcuan ní cuu.

<sup>23</sup> Te maá ní ní cajniñ ní yá, te ní cajendēca ní yá nuū téē xeēn ní cajehni de ya jicā cruz ni casáha ní. Te nde jíin tiempo je ní jini Yaā Dios jeē súcuan sáha ní jijnáhan ní, chí súcuan je ní sándaā yā.

<sup>24</sup> Te ní nastēcu Yaā Dios Jesús te tuá ní cúu ya ndīyi, chí jnūhun xeēn jeē jihí ñayuu, tuá na vé cúu ga sáha jíin yá.

<sup>25</sup> Chí nde jenahán suhva ni tee David jnūhun ndese ní cahān Jesús jíin Yáa Dios: Jíni na núu maá ní jeē cúu ní Jítóho ná, chí ní cáni ndéé ní jíin ná, chí ndéé ní ichi ndáváha ná, cúu jeē chindéé ñáhán ní sáña náváha coo ndeyí ní ná.

<sup>26</sup> Jeē yúcuan cúsiñ ní ná te cáhán na jnúhun siñ ní.

Jeē yúcuan ma nácani uhū ní na síquī jnúhun cuu ná.

<sup>27</sup> Chí ma cuáha ní jnúhun quendōo ánuá na lugar nuū cáyūcu ánuá ndīyi, ní ma cuáha ní jnúhun tehyū ná, chí jéjníñu ná núu ní te maní ní jíin ná.

<sup>28</sup> Te ní steén ní núu na jēē nátecu ná, te sáha ní jēē cusīñ teyí ní ná condee na jíin ní ní cáni. Achí Jesús, ní achí David.

<sup>29</sup> Tāca nihín jijnáhan ní, na cástūhun cájí ná nuū ní jnúhun jíi yō David, chí tu ní cáhán de jnūhun yáha síquī maá de. Chí ní jihí de te ní quindūji de, te jíin yō nuū yíndūji de nde vijna.

<sup>30</sup> Chí ní cuu de tēe ní nacani jnūhun Yaā Dios nde jenahán. Te ní jini de jeē vāha ní jejnūhun ya nuū de jeē chíji yucūn maá de quiji Cristo, te condee yā mesa de ndacu ya jniñu nájñūhun ní ndacu de jniñu jeē ní cuu de rey.

<sup>31</sup> Te nde jíin tiempo ní jini de jeē nátecu Cristo, te ní cahān de jeē anuá yā, ma ndóo lugar nuū cáyūcu ánuá ndīyi, ní yiqui cúñu yā ma tehyú.

<sup>32</sup> Chí Yaā Dios ní nastēcu yā Jesús, te maá ná cácuu ná testigo jeē ní natecu yā.

<sup>33</sup> Te ní ndujéhnú tucu ya ní sáha Yaā Dios jíin poder yā. Te nde nuū maá Yáa Dios, Yaā cúu Tátá yā, ní nihín Jesús Espíritu Santo, chí súcuan ní jejnūhun ya. Te ní tají Jesús Espíritu Santo, te suu ya sáha jniñu jeē cájito ní te cájini sōho ní vijna.

<sup>34</sup> Te David, nasūu síquī maá de ní cáhán de tāca jnúhun yáha, chí tu ní ndáa yiqui cúñu de andiví. Chí síquī Cristo cúu jeē ní cahān de suhva:

Maá Yáa Dios ní cahān yā jíin Jítóho rī Cristo:

Cucōo ró ichi ndáváha ri jeē steén jeē kujéhnú ró.

<sup>35</sup> Te na sáha ri jeē quende rō poder tāca jēē cájito uhū rohó, áchí yá.

Achí David.

<sup>36</sup> Núu súcuan te ndihi ní jēē cácuu yó ñayuu Israel, na cúni vāha ní jēē vēsú ní cajehni ní yá jicā cruz, te Yaā Dios ní jeni ya maá Jesús jeē cúu ya Jítóho yō te suni cúu ya Cristo, Yáa jnáma yóhó, áchí Pedro jíin í.

<sup>37</sup> Te jeē súcuan ní cajini sōho í jnūhun yáha, te ní cajnahuhū ní anuá í. Te ní cacajñuhún í Pedro jíin táca gá apóstol:

¿Te ndese sáha ná jijnáhan ná núu súcuan? áchí í.



38 Te ni cahān Pedro jíin i:

Nacani ni ni jéé stóo ni cuéchi ní jijnáhan ní, te cuandute ní jéé ní cacandíje ní Jesucristo, návaha cone cáhnu ní Yaā Dios nuū cuéchi ní, te cuāha Yaā Dios Espíritu Santo yā condee yā ini anuá ni.

39 Chi súcuan ni jejnūhun máá Tátá yō Yaā Dios nuū yō jíin núū séhe yó, te suni súcuan ni jejnūhun ya nuū ñayuu tāca gá nación, tācá i jeē cána ya i candíje i.

40 Te jíin cuéhē gā jnūhun súcuan ni cahān cají Pedro, te ni stihví ni de i:

Nducú ndéyí ní jeē na cácu ní, chi jnahnū ndetú ñayuu casáha jniñu néé, áchí de.

41 Yūcuán na te tācá i jeē ní cajetáhú jnūhun ni cahān de, ni cajendute i. Te quiví un ní nducuehē gā ñayuu cácandíje, nájñūhun unī mil gā ñayuu.

42 Te ni cahīin nihin i siquí jnūhun cástéén apóstol. Te inuú-ni cándajnūhun manī i te cájicān tahú i, te in cáhnu-ni cáyeji i pan, nájñūhun ni steén máá Jítoho yō jeē núcūhun ni yō siquí yā.

*Ndese ni coyūcu ñayuu jeē ní cacandíje jeē xíhna ñúhún*

43 Te ndihí ñayuu ni cayūhú i ni cajito i, chi cuehē jniñu jénu jeē steén jeē kujénu ya ni casáha tēe apóstol.

44 Te inuú ní cahīyo ni ñayuu cácandíje, te ni cacuu inuú i tāca jéē cánevāha i.

45 Te ni caxíco i na-ni na vé cánevāha i, te ni casaja i xūhún un núū tāca jnāhan i, núū ndese jíni ñúhún in in i.

46 Te ndijnahan quiví ni candutútu i ini templo. Te manī ni cayeji cáhnu i pan tācá vehe jnāhan i nájñūhun ni steén yā, te ni cahīyo sī ni i.

47 Te ni cacahān i jeē yóhoyo cújénu Yaā Dios. Te ndihí ñayuu ñuu un ní cajejnúhún i ñayuu cácandíje. Te ndijnahan quiví ni jnama Jítoho yō sava ga ñayuu, te ni nduu inuú i jíin ñayuu cácandíje.

*Jeē ní nduvāha tēe ríngo*

### 3

1 Te in quiví te máá cáhuní jehíni ni caa Pedro jíin Juan cuangoo de templo, chi hora un cájicān tahú jnāhan de hebreo.

2 Te cájendēca ñayuu in tēe cáríngo nde quiví ní cacu de. Te tēe un ndéé de ndijnahan quiví yehví templo jeē naní Hermosa, jícan de caridad nuū tāca ñayuu quívicoo ini templo.

3 Te tēe un ní jito de nuū Pedro jíin Juan jeē véji de quívicoo de ini templo, te ni jícan de caridad nuū Pedro jíin Juan.

4 Te Pedro jíin Juan ni cajito vāha de nuū tēe ún. Te ni cahān Pedro jíin de: Condēhe núū rí jijnáhan ri, achí de.

5 Te máá tēe un ndétu tūhva de, ni jeni ni de jeē cuāha Pedro jíin Juan jecu xūhun núū de.

6 Te ni cahān Pedro:

Tú na xūhun plata ni xūhun oro cánevāha ri. Te íyo in jeē vāha ga sáha ri jíin ró: jíin poder máá Jesucristo, Yaā ní jehnu ñuu Nazaret, cáhán rí jíin ró, ndocuñí te caca ró, achí de.

7 Te ní jni de ndavāha tēe ún, te ni ndonehen de. Te jehē de jíin súcūn jehé de ni nduvāha-ni.

8 Te in ni scānda de máá de ni ndocuñí de, te ni quejéé de jíca de. Te ni quiví de jíin Pedro jíin Juan ini templo, jíca de, cánda de, te nácuatáhú de nuū Yaā Dios.

<sup>9</sup> Te ni cajini tāca ñáyyuu jeē jíca de te nácuatáhú de nuū yā.

<sup>10</sup> Te ni canacuni i de jeē maá de cúu tēe ni condee yehyí templo jeē naní Hermosa, ni jicān de caridad. Te ni canaa ni i ni cajito i, te ni cayühú i cájito i jeē ní nduvāha tēe ún.

*Jeē ní nacani Pedro jñūhun ini corredor jeē naní Salomón*

<sup>11</sup> Te tēe ni nduvāha ún, tu siáá de Pedro jíin Juan. Te ni cacutútú-ni cuehē ñayuu nuū de ini corredor jeē naní Salomón, te ni canaa ni i cájito i.

<sup>12</sup> Te ni jito Pedro jeē ní cutútú ñáyyuu ún, te ni cahān de jíin i:

Níhín tēe ñuu yō Israel jijnáhan ní, ¿najahē cánaa ni ni cájito ní jniñu yáha? ¿Najahē cájito ní nuū ná te cájeni ni ni jéē maá ná jijnáhan ná iyó poder na jéē sáha ná jéē nácaca tēe yáha? ¿Chí ní nduvāha de siquī jeē tēe cájica ndaā cácuu ná cájeni ni ní?

<sup>13</sup> Tuú chí maá Yáa Dios jíi yō Abraham jíin Isaac jíin Jacob jíin táca gá jíi yō, ni sáha ya jniñu yáha návāha cuni ñayuu jeē cujéhnu Sēhe ya Jesús, Yaā jeē ní cajendēca ní nuū tēe cácujuhnu. Te ná ni cuni Pilato jeē siaá de ya, te tu ní cájēhe ni jñūhun.

<sup>14</sup> Te ni casquéhichí ni yá vēsú cúu ya Yaā ndaā, Yaā ií. Te sa suhva ñn tēe jéhni ndíyí ni cacahān ni jíin Pilato jeē na siáá de.

<sup>15</sup> Te ni cacahān ni jéē na cúu Yaā jeē sáha jeē tēcu ndíhi-ni. Te Yaā Dios ni nastēcu yā Jesús jeē ní cuu ya ndíyí, te maá ná cácuu testigo jeē ní natecu yā.

<sup>16</sup> Te tēe yáha jéē cájito ní te cánacuni ní de, ni candíje de jíin ná jeē iyó poder Jesús nasávāha ya de, te jeē yúcuu ní nasávāha ya de. Te jeē súcuu ni cacandíje ná ní sáha ya, jeē yúcuu ní nduvāha vāha de nájñūhun cájito ndíhi ní.

<sup>17</sup> Te na cástūhun ná nuū ní jíináhan ní, je jíiní na jéē maá ní jíináhan ní jíin tēe cácujuhnu nuū yō, tu ní cájecūhun ni ní, te jeē yúcuu ní cajehni ní yá.

<sup>18</sup> Te súcuu ni squícu jñūhun ni cahān Yaā Dios nde jenahán jéē cánuú ndoho Cristo siquī cuéchi ñayuu, chí ni sáha ya jeē súcuu ni cacahān tēe ni canacani jñūhun ya nde jenahán.

<sup>19</sup> Te na nácani ni ni jéē stóo ni cuéchi ní, te nasāma ini ní, te quívicoo ní ndaha Yaā Dios návāha ndahva yā cuéchi ní. Te quee quíiví jeē ndúsñ ni ní sáha maá Jítoho yō.

<sup>20</sup> Te natajái yá Jesús ndíji ya, chí cúu ya Cristo, Yaā ní jeni Yaā Dios jeē jnáma ya yohó.

<sup>21</sup> Te jíni ñūhún jéē cóo ya andiví ndé nasájeé yá táca jéē iyó, nájñūhun ni cacahān tēe ndoo ni canacani jñūhun nde jenahán ní sáha Yaā Dios.

<sup>22</sup> Chí suhva ni nacani jíi yō Moisés jñūhun nuū táca jíi yō: Máa Jítoho yō Yaā Dios cani ya Yaā nacani jñūhun nuū rō jijnáhan ró, nájñūhun ni jeni ya ruhū. Te cuu ya ñn jnáhan ñuu yō. Te na chúhun ni rō táca jñūhun jeē nácani ya ún.

<sup>23</sup> Te núu ndé tēe tú chuhun ni de jñūhun cahān yā, jnahnū ndetū de, te ma cúu ga de jnáhan ñayuu yā Israel, áchí Moisés.

<sup>24</sup> Te táca tēe ni canacani jñūhun nde jenahán, nde tiempo ni quiiji Samuel te ní gá nde vijna, suni ni canacani de jñūhun siquī táca jniñu cúu quíiví yáha.

<sup>25</sup> Yucūn maá tēe ni canacani jñūhun ya nde jenahán cácuu yó, te suni siquī maá yó jijnáhan yó cúu jeē ni sáha Yaā Dios contrato jíin jíi yō. Chí ni cahān yā jíin Abraham: Yucūn maá ró cane Yaā sáha jeē quéndōo ndetū táca ñayuu ñí cáhnu ñayívi, áchí yá.

26 Te jeē ní nastécu Yaā Dios Sēhe ya, te ni quiji ya nuū maá yó xíhna gā, návāha quendōo ndetū yō sáha ya, chi sama ya anuá yō jeē ma sáha ga yō jniñu neé, áchí Pedro.

*Jeē ní cajendēca de Pedro jiín Juan nuū tēe cácujeñhu*

## 4

1 Te Pedro jiín Juan níni cácahān gā de jiín ñáyuu ún te ni quecoo tāca sūtū jiín tēe grupo saduceo, jiín tēe cácujeñhu nuū tēe cándito templo.

2 Te yōhyo ni caquitī ní de siquī jeē castéén Pedro jiín Juan nuū ñáyuu, jiín jēe cánacani de jñūhun jeē nátecu ndiyi chi je ni natecu Jesús.

3 Te ni cajñi ún de, te ni cachuhun ún de vecāa cone de nde cundijin inga quivī, chi je ni ini.

4 Te cuehē ñayuu jeē ní cajini sōho jñūhun ni cacahān Pedro jiín Juan ni cacandíje i. Te ni nduu nájnūhun uhūn mil jeē maá nene tēe jeē ní cacandíje.

5 Te jeē ní cundijin inga quivī ún, te tēe cácujeñhu nuū ñáyuu hebreo jiín tēe jēhu cándiso jniñu jiín tēe cástéén jñūhun tutu ley yā, ni candutútú de ini ñuu Jerusalén.

6 Te suni ni candutútú de jiín Anás jeē cúu sutū cujēhnu ga, jiín Caifás jiín Juan jiín Alejandro jiín táca gá jeē cácuu jnáhan sutū cujēhnu ga ún.

7 Te ni candacu jniñu jeē na quíjicoo Pedro jiín Juan condichi de mēhñú, te ni cacajnūhún de:

¿Ndé ñni ni tejniñu róho te ndese ni nihīn jniñu ró ní sáha ró jēe nduvāha tēe yáha? áchí.

8 Yūcuán na te Pedro chi ni cunuú maá Espíritu Santo jiín de, te jiín poder yā ni cahān de jiín táca tēe ún:

Tāca níhín tēe cácujeñhu nuū ñūū yō Israel jiín táca níhín tēe jēhu cándiso jniñu,

9 vijna te cástíchí ni sáña siquī ñni jniñu váha ní casáha ná jēe ní nduvāha tēe chúu yáhá.

10 Te na cástūhun ná nuū nihín jēe cácujeñhu ní, návāha suni cuni ndihi jnáhan ñuu yō Israel jeē jiín poder maá Jesucristo, Yaā ní jehnu ñuu Nazaret, ni nduvāha tēe índichi nuū ní yáha. Te suu ya cúu Yaā jeē ní cajehni ni jíca cruz, te ní sáha Yaā Dios jeē ní natecu yā.

11 Jesús cúu nájnūhun yuū cimientu jeē quítuu vehe. Te máá ní jijnáhan ní cácuu nájnūhun tēe casáha vehe, te ni casquéhichí ni yá nájnūhun jeē cátejiyo ní yūū, chi tu ní cácadíje ní yá. Te ní sáha Yaā Dios jeē cúu ya nájnūhun yuū cánuú gá jeē quítuu vehe.

12 Te tú cuiti inga jeē cúu jnama yóhó, chi tuá na inga jeē cujēhnu ní jéni Yaā Dios ini ñayivī yáha jēe cúu jnama yóhó, áchí Pedro.

13 Yūcuán na te ni cajini un jēe Pedro jiín Juan jēhnu-ni cácahān de. Te je cájini jeē tú tūhva de, chi tēe sūcuán-ni cácuu de. Te ni canaa ni cájito nuū de, te ni casáha cuenta jeē ní cajica de jiín Jesús.

14 Te cándēhe núú tēe ní nduvāha un, índichi de jiín Pedro jiín Juan, te tu ní cánihīn gā modo ndese ga cahān.

15 Yūcuán na te ni candacu jniñu jeē na quéndacoo sñn de yatā véhe juzgado te ndajnūhun máá jijnáhan.

16 Te ni cacahān:

¿Ndese sáha yó jíin tée yáha núu súcuan? Chi ni jitē jnūhun yáha núu tāca ñayuu ñuu Jerusalén jeē súcuan ni casáha de ñin jniñu jéhnu, te ma cúu cahān yō jeē tu iyó ndāa.

<sup>17</sup> Te návaha ma cuité ga jnūhun yáha, na cúxeēn yō nuū de jeē ma cahán cuiti gā de jnūhun Jesús nuū ní ñin ñayuu, áhí.

<sup>18</sup> Te ni cacana ún de, te ni cacahān ñihin jíin de jeē ma cahán cuiti gā de jnūhun Jesús ni ma steén gā de jnūhun un núu ní ñin ñayuu.

<sup>19</sup> Yūcuán na te ni cacahān Pedro jíin Juan:

Cani vāha ni ní te núu nújnahan ni Yaā Dios jeē stóo ná jniñu ní ndacu ya jeē sáha ná te cuandije ná máá na jniñu nāndacu ní.

<sup>20</sup> Chi ma cúu stóo ná jniñu jeē nácani ná jnūhun ní cajini sōho ná jíin jniñu ní cajito ná, áhí de.

<sup>21</sup> Yūcuán na te tēe ní cacutútú un ní cacuxeēn tucu de nuū Pedro jíin Juan. Te ni casiáá de cuangoo de, chi tú cuiti na modo stóho de chi cáyūhu cajito ñayuu, chi siquī jniñu jéhnu ni cuu ún te ndihí i cácahān i jeē yóhoyo cújéhnu Yaā Dios.

<sup>22</sup> Chi tēe jeē ní sáha ya jniñu jéhnu jíin de jeē ní nduvāha de, víhyá gā uū xico cuiyā de.

*Jeē ní cajicān tahu ñayuu cácañdije*

<sup>23</sup> Te ná ni casiáá un Pedro jíin Juan cuangoo de, te ni najinūcoo de nuū tāca gá jnāhan de, te ni cacachi de ndese ni cacahān sutú cácujeñu jíin tée jéhnu cándiso jniñu.

<sup>24</sup> Te jeē ní cajini sōho de jnūhun yúcuan, te ñnuú-ni ni cajicān tahu de nuū Yaā Dios:

Tātā Yaā Dios jeē cujéhnu ní núu ndihí, máá ní cúu Yaā Dios ni sáha andiví jíin ñáyiví jíin mar jíin táca ndihí jeē iyó.

<sup>25</sup> Te jeē jíin Espíritu Santo te ni sáha ní jéē ní cáhān mozo ní David nde jenhán:

¿Najehē cáquití ndevāha ni ñayuu sñn nación?

¿Te najehē cájeni sáá ni i jeē ndónnda i siquī ní?

<sup>26</sup> Ni cacutútú jéē cácuu rey ñáyiví jijnáhan,

te tēe cácujeñu ni cacutútú de,

te ñnuú-ni ni candonda de siquī maá ní jeē cúu ní Jitoho ná,

jíin siquī Cristo, Yaā jeē ní jeni ní.

Ahí David.

<sup>27</sup> Te jendaá chi Herodes jíin Poncio Pilato jíin táca tée ñuu yō Israel jíin tée táca gá nación, ni cacutútú de ini ñuu yáha ní candonda de siquī Séhe ñi ní Jesús, Yaā ní jeni ní.

<sup>28</sup> Te súcuan ni cuu návaha squícu táca jniñu jeē jíin poder ni ní cundaā ni ní ndé jenhán jéē súcuan coo.

<sup>29</sup> Te vijna, Tātā, coto ní ndese cácahān xeēn de nuū na jijnáhan ná, te cuāha ni fuerza ni núu na jéē cácuu ná mozo ní, návaha jéhnu-ni nacani ná jnūhun máá ní.

<sup>30</sup> Te jíin poder ní nasávaha ni ñayuu cácuñu, te sáha ní jniñu jéhnu jeē steén jeē cujéhnu ní. Te táca jéē yáha sáha ní jíin poder Séhe ñi ní Jesús, áhí i jijnáhan i.

<sup>31</sup> Te nuū ní ndihí ni cajicān tahu i, te nuū cáyūcu tútu i un ní sáha ya jeē ni jnāa. Te ndihí i ni cunuú Espíritu Santo jíin i, te ni jéhe ya fuerza te jéhnu-ni ni canacani i jnūhun Yaā Dios.

*Jeē ní canevehā cáhnu i ndajníñu*

<sup>32</sup> Te ñayuu cuehē jeē ní cacandíje chi inuú cáhīyo ni i jíjnáhan i. Te tú ni ñin i ní cáhán jeē ndajníñu jeē névāha máá i cuu máá-ni i, chi táca ndajníñu ni canevehā cáhnu i.

<sup>33</sup> Te nīhin cánacani apóstol jñuhun jeē ní cajito de jeē ní natecu Jitoho yō Jesús. Te yōhoyo ni chindéé ñáhán yá ñayuu cácadíje.

<sup>34</sup> Chi tú cuiti ni ñin i ní ndóho jeē cumanī nuū i, chi táca ñáyuu cánevāha cuehē ñuhun chí vehe, ni caxīcó i sava te ni caquindecia i xūhún un.

<sup>35</sup> Te ni cajēhe i xūhún un núū téé apóstol, te ni casaja téé apóstol nuū ñáyuu cácadíje núu ndese jíni ñūhún ñin ñin i.

<sup>36</sup> Te íyo ñin téé nání José jeē cúu yucūn Leví, ni cacu de Chipre, ñuhun jeē íne sñin nuū ndúte. Te téé apóstol ni casnání de téé ún Bernabé, jeē cuní cahān: téé cáhán jñuhun ndeyí ni.

<sup>37</sup> Te ni xīcó de ñin ñuhun de, te ndáhá de xūhún un ní jēhe de nuū téé apóstol.

*Siquí cuēchi jeē ní casáha Ananías jíin Safira*

## 5

<sup>1</sup> Te suni inga téé nání Ananías jíin ñasihí de Safira, ni caxīcó de ñin ñuhun de.

<sup>2</sup> Te ni chuvāha de sava xūhún un cuu máá de jíin ña, chi súcuan ni candajñuhún de jíin ña, te ndáhá de inga sava nájñuhun jeē ndíhi cúu, te ni jēhe de nuū téé cácuu apóstol.

<sup>3</sup> Te ni cahān Pedro:

Ananías, ¿naun ni jēhe ro jñuhun jeē quívi jexeén, jeē cúu Satanás, ini anuá rō te stahú ró Espíritu Santo cuní rō? Chi jeē ní caxico ró ñuhun ró te cuēchi ró cúu jeē tu ní cáchi ndaā rō jeē ní squéndōo ró jecu xūhún un cuajníñu máá ró, chí ni sáha ró nájñuhun jeē ndíhi xūhun ní jēhe ró.

<sup>4</sup> ¿Te á násūu cuenta máá ró cúu ñuhun un ndé ná tu xīco ró? Te ná ni xīco ró ¿te á násūu cuenta máá ró cúu xūhun jéé cuajníñu ró ndé nuū cuní máá ró? ¿Te naun ni jeni ni rō jeē stahú ró súcuan? Te nasūu máni máá téé cúu jeē jícu ró stahú ró, chí suni Yaā Dios, áchí Pedro.

<sup>5</sup> Te ná ni jíni sōho Ananías táca jñuhun yáha, te ni cotuú-ni de ni jihí de. Te táca ñáyuu ní canihñ jñuhun ún, yōhoyo ni cayūhú i.

<sup>6</sup> Te ni candocuiñí téé suchí, te ni cachusúcun de ndíy i cuáchindūji de.

<sup>7</sup> Te ni cunúu nájñuhun uní hora. Te ni jinū ñasihí ndíy i un ní quívi ña ini vehe ún, te tú na vé jíni cuiti ña.

<sup>8</sup> Te Pedro ni cajñuhún de ña:

Cachi nuū rī, ¿á ñin súcuan-ni ni caxīco ró ñuhun ró chí tuú? áchí de.

Te ni cachi ña:

Suu súcuan-ni ni caxīco ná, áchí ña.

<sup>9</sup> Te ni cahān Pedro jíin ña:

¿Naun ni casquínáhan jñuhun ró jéé cóto ndee rō Espíritu Santo máá Jitoho yō? Chi ni nducú ró stahú ró yā. Cuni nahín jéé cáhma nanecoo téé cuachindūji yí ró, te suni súcuan quichindūji de róho, áchí de.

<sup>10</sup> Te ni cotuú-ni ña nuū jehé Pedro te ni jihí-ni ña. Te ni ndívicoo téé suchí un te ni cajito de jeē jé ni jihí ña, te ni caquenehen de ña, te ni jechindūji de ña xiin yí ña.

<sup>11</sup> Te yōhoyo ni cayūhú ndíviñ ñayuu cácadíje jíin táca gá ñayuu jeē ní cajini jñuhun jeē súcuan ni cuu.

*Cuehē jniñu jéhnu ni casáha apóstol*

12 Te cuehē jniñu jéhnu jeē steén jeē cujéhnu Yaā Dios ni casáha tēe apóstol nuū ñáyuu. Te tāca ñáyuu cácanđije, inuū-ni cándutútú i ini corredor jeē naní Salomón.

13 Te tu ní cáchundeyí ni inga ñayuu quijnáhan jíin i. Te cájejnúhún i ñayuu cácanđije.

14 Te ni nducuehē gā i, chí cúu tēe cúu ñahan ni cacandije i máá Jítoho yō.

15 Te cáquindeca ñayuu jnáhan i jeē cácuñu, te cájequin i ini calle cácaa i nuū camilla jíin núu yúu, chí cácuni i vésú ste cuándahū Pedro na yáha siquí i te nduváha i.

16 Te suni cuehē ñayuu tācá ñuu cáhıyo yajni yūcuan ní quiijicoo i ñuu Jerusalén ni caquindeca i jnáhan i jeē cácuñu jíin jéé cándoho tachı, te ndihi i ni canduváha i.

### *Jeē ní cajito xeēn i tēe cácuu apóstol*

17 Yūcuán na te sutū cujéhnu ga jíin táca gá jnáhan jeē cácanđije sahan saduceo, ni cacucúésún ni jeē siquí tēe cácuu apóstol.

18 Te ni cajni de tēe cácuu apóstol ni cachuhun de vecāa.

19 Te in ndajéhé máá Jítoho yō ni nune ya yehı́ vécāa ún jecuáa, te ni quenehen ya de jíjnáhan de. Te ni cahān yā jíin de:

20 Cuáhán te cuñi ró ini templo, te yūcuán nacani cájí ró jnūhun nuū ñáyuu siquí ndese nihın tahı i cotecu i ní cáni, áchı ndajéhé yā.

21 Te ni cajini sōho de jnūhun yáha. Te nuū ní cundijin te nehen ni quıvıcoo de ini templo, te cástéen de jnūhun ya nuū ñáyuu.

Te níni cástéen de te sutū cujéhnu ga jíin táca jnáhan de ni canastútú de tēe junta cujéhnu ga, jeē cúu ndihi tēe jéhnu cándıso jniñu nuū ñáyuu nación Israel. Te ni catají de policıa cuaquenehen tēe apóstol ini vecāa.

22 Te nuū ni jíinūcoo te tuá gā tēe apóstol. Te ni canandıó cóo te ni cacachi:

23 Jendaá cúu jeē ní cajito ná ndési váha vecāa, te cáhıin tēe cándıto yéhyı un. Te nuū ní canune ná, te tú cuıti gā tēe un cáhıin ini vecāa ún, áchı de.

24 Te sutū cujéhnu ga jíin tēe cújéhnu nuū tēe cándıto templo jíin sūtū cácujeñu, nuū ní cajini sōho de jnūhun yáha, te ni cajeni ni de ndese ga cúu un núu sūcuan.

25 Te ni quee-ni in tēe te ni cachi:

Tēe jeē ní cachuhun ní vecāa, cáhıin de ini templo, te cástéen de jnūhun nuū ñáyuu, áchı de.

26 Yūcuán na te tēe cácujeñu nuū tēe cándıto templo, jíin tēe cácuu policıa de, ni jengoo de, te yúcún ní nacueca de táca tēe apóstol vendıcoo de jíin, chí cáyūhı de jeē sanaa te cuáha ñayuu yuū xinı de núu sáha xeēn de jíin táca tēe apóstol.

27 Te nuū ní najinūcoo de jíin tēe apóstol, te ni cajecuiñı de nuū tēe casáha junta. Te sutū cujéhnu ga ni cahān:

28 Ni cacahān nıhin ri jíin ró jeē ma steén cuıti gā rō jnūhun tēe nanı Jesús. ¿Te naun ni casáha ró jéé ní ndecáva jnūhun un ní ñuu Jerusalén yáhı? Te cácuni rō staú yáhu ró rúhı jíjnáhan ri siquı jeē ní jíhı tēe ún, áchı.

29 Te Pedro jíin táca gá apóstol ni cacahān de:

Cánuú jéé squıcu ná jniñu ní ndacu Yaā Dios nuū ná te nasúú jniñu nándacu tēe.

30 Máá Yáa Dios jíı yō ni nastécu yā Jesús, Yaā ní cajehni máá ní jeē ní cata caa ní yá jíca cruz.

<sup>31</sup> Te ni sáha Yaā Dios jeē ní ndujéhnú tucu Jesús néne ya ichi ndáváha Yaā Dios, te cúu ya Yaā ndácu jniñu, Yaā jnáma ñayuu. Te súcuan ni sáha Yaā Dios náváha yóhó, jéē cácuu yó ñáyuu Israel, na nácani ni yō jeē stóo yó cuéchi yó, te cone cáhnu ni yā nuū táca cuéchi yó.

<sup>32</sup> Te máá ná ni cajito ná táca jniñu yáha, te suni máá Espíritu Santo steén cají yá jeē súcuan cúu, chi jéhe Yaā Dios Espíritu Santo yā condee ini anuá táca ñáyuu jeē cájendetú nuū yā, achí de.

<sup>33</sup> Te ná ni cajini sōho un jnúhun yáha, te yōhyo ni caquĩtĩ ni, te cahni de cácani nuū.

<sup>34</sup> Te mēhñú un jínáhan néne ñin tēe grupo fariseo nání de Gamaliel, te cúu de maestro jeē steén ley yā, te táca ñáyuu cájejnúhún i de. Te ni ndocuiñĩ de, te ni ndacu de jniñu jeē na cújyo núu tēe apóstol.

<sup>35</sup> Te ni cahān de:

Róhó jnáhan ñuu yō Israel, cani vāha ni rō núu na vé cácani rō sáha ró jín táca tēe yáha.

<sup>36</sup> Chi nucūhun ni rō jeē ñin cuiyā ni ndonda Teudas siquĩ gobierno, te ni cahān de jeē tēe téyí cúu de, te ni cacutútú nájñuhun cuñin ciento tēe jín de. Yūcuán na te ni cajehni ñayuu Teudas, te táca jéē ní caquijnáhan jín de ni cajitē núu cuangoo sáa-ni, te ni jecuiñĩ-ni jniñu ún.

<sup>37</sup> Yūcuán na te quivĩ ni iyo censo te Judas, ñin tēe Galilea, ni ndonda de siquĩ gobierno, te ni cacutútú cuéhē tēe jín de. Te suni ni cajehni ñayuu Judas, te táca tēe jeē ní caquijnáhan jín de ni cajitē núu cuangoo.

<sup>38</sup> Te vijna na cuáha ri consejo rohó. Ma stáhān gā rō tēe yáha. Siáá de na quíngoo de. Chi núu ñayuu-ni ni squejéé jniñu yáha, te jecuiñĩ ñi.

<sup>39</sup> Te núu Yaā Dios ni squejéé, te ma cúu casi rō, chi sanaa te siquĩ Yaā Dios cándonda ró, achí de.

<sup>40</sup> Te ni cachusóhó jéē ni cáhān Gamaliel. Te ni canacana tēe cácuu apóstol, te ni cacani de jín cuarta ñi te ni cacahān xeēn jín de jeē ma cahán gā de jnúhun Jesús, te ni casiáá de cuangoo de.

<sup>41</sup> Te máá apóstol ni quendacoo de nuū junta cuangoo de, cácusñi ni de jeē ni jéhe ya jnúhun ndoho de jeē cuáha ñayuu jnúhun canu de siquĩ jeē cácandje de ya.

<sup>42</sup> Te ndiquivĩ castéén de jnúhun vāha Jesucristo, te cánacani de jnúhun ún ini templo jín táca-ni vehe.

*Jeē ní cajeni de uxā tēe cuajniñu mēhñu ñáyuu cácandje*

## 6

<sup>1</sup> Te ni cucuehē ñayuu cácandje. Te tiempo un te tēe hebreo jeē cácahān yuhu griego, ni quejéé de cácahñu de nuū jnáhan hebreo de, achí de jeē ñahan viuda jeē cácahān yuhu griego tu cániñin vāha ña staā jeē cásaja de táca quivĩ cuu ña.

<sup>2</sup> Yūcuán na te máá ndihúxí uū apóstol ni canastútú de táca ñáyuu cácandje, te ni cacahān de:

Tú vāha jeē jécuiñĩ jniñu jeē cánacani ri jnúhun Yaā Dios siquĩ jeē cásaja rĩ staā.

<sup>3</sup> Núu súcuan te róhó, hermano, nacāji ró uxā jnáhan máá yó, te na cóndiso jniñu de saja de staā. Te nacāji ró tēe jeē cájejnúhún ñáyuu de, tēe ndíchí jéē ní cunuú Espíritu Santo jín de.

<sup>4</sup> Te ruhū jijnáhan rĩ, máni cacān tahú rĩ jín jéē nácani ri jnúhun ya, achí de.

<sup>5</sup> Te ndihí ñayuu ni canujnahan ni i jñūhun ni cacahān de. Te ni canacāji i Esteban, tēe cándije vāha jeē ní cunuú Espíritu Santo jíin de. Te suni ni canacāji i Felipe jíin Prócoro jíin Nicanor jíin Timón jíin Parmenas jíin Nicolás. Te Nicolás cúu tēe ñuu Antioquía, te ni nduu de tēe cándije sahān ñayuu hebreo nde ná tu candije de jñūhun Cristo.

<sup>6</sup> Te ni cajeni i tāca tēe yáha núū tēe cácuu apóstol, te tēe apóstol un ní casoó de ndaha de xini tāca tēe un ní cajičan tahú de nuū Yaā Dios siquū jñíñu condiso de.

<sup>7</sup> Te jñūhun Yaā Dios ni jitē gā cuahān, te ni nducuehē teyí ñáyuu cácan dije i jñūhun ya ini ñuu Jerusalén. Te suni cuehē sutū ni cacandije de jñūhun ya.

### *Jeē ní cajni de Esteban*

<sup>8</sup> Te ni chindéé ñahán yá Esteban ni jēhe ya poder nuū de, te ni sáha de tāca jñíñu jéñnu nuū ñayuu, jñíñu jeē steén jeē cujéñnu Yaā Dios.

<sup>9</sup> Te ñayuu hebreo jeē ní cacuyāhu i te ni canduu libre i, íyó vehe i sinagoga i. Te tēe un cácuu tēe ñuu Cirene jíin tēe ñuu Alejandría jíin tēe Cilicia jíin tēe Asia. Te sava tēe un ní caquejé de cástāhān jñáhan de jíin Esteban.

<sup>10</sup> Te tu ní cácuudeyí jíin de, chi ndíchí ní cahān de ni sáha máa Espíritu Santo.

<sup>11</sup> Yūcuán na te ni cascáhān sava tēe jeē na cáhān jñūhun stáhú síquū Esteban. Te ni cacahān jeē ní cajini sōho cáhān ndevāha Esteban siquū Moisés jíin síquū Yaā Dios.

<sup>12</sup> Te jeē súcuān ni cacahān te ni caquitī ni tāca ñayuu jíin tēe jéñnu cándiso jñíñu jíin tēe cástéén jñūhun tutu ley yā. Te ndihí de ni candonda siquū Esteban, te ni cajni de cuango jíin de nde nuū junta cujéñnu ga.

<sup>13</sup> Te ni cajeni de tēe cahān jñūhun yáa síquū Esteban, te suhva ni cacahān:

Tēe yáha tu ndé jécuiñi de jeē cahān ndevāha de síquū templo i yáha jíin síquū ley yā.

<sup>14</sup> Chi ni cajini sōho ná cáhān de jeē Jesús, tēe ni jehnu ñuu Nazaret, canu de templo yáha te nasama de jeē tajnúni ley yā jeē ni jēhe Moisés nuū yō, áchí.

<sup>15</sup> Yūcuán na te ndihí tēe cáyūcu núū junta un ní candacoto vāha nuū Esteban, te ni cajini jeē jito nuū de ná jito nuū ñn ndajéhé Yaā Dios.

### *Jñūhun ni nacani Esteban*

## 7

<sup>1</sup> Te máa sūtū cujéñnu ga ni cajñūhún Esteban:

¿A ndáa jeē súcuān ni sáha ró nájnūhun cácahān de yāhá? áchí.

<sup>2</sup> Te ni cahān Esteban:

Ndihí níhín jēe cácuu ní jñáhan ñuu yō, jíin ndihí níhín jēe cácuujéñnu ní núū ñúū yō, cuni nahín ní jñūhun cahān ná: Máa Yáa Dios jeē yóhoyo cujéñnu ya, ni steén yā maá yā nuū jíi yō Abraham nde na néne ga de región Mesopotamia, nde ná tu quihín de condee de ñuu Harán.

<sup>3</sup> Te ni cahān yā jíin de: Stóo ñuu rō jíin tāca jñáhan ró te quihín rō nuū cuáha rí condee rō, chí máa rí steén ichi nuū quihín rō, achí yā.

<sup>4</sup> Yūcuán na te ni quenda de región Caldea, te ni jinū de ni condee de ñuu Harán. Te yūcuān ní jihí tatá de. Yūcuán na te ni sáha Yaā Dios jeē ní quee de ñuu yáha núū cáyūcu yó vijna.

<sup>5</sup> Te tu ní jēhe ya ni ñn tíhli ñuhun yáha cuu tahū de. Te vēsú súcuān te ni jejnūhun ya jeē cuáha ya ñuhun un núū de nde jíin núū tāca séhe de, vēsú ná tu coo séhe de sáa.



<sup>6</sup> Te súcuan ni cahān Yaā Dios jíin de: Sēhe ró coyūcu jícá i inga ñuu, te cuūn ciento cuiyā sájniñu sáá-ni i te stóho ñayuu yúcuan i.

<sup>7</sup> Te siquī jeē súcuan sáha i jíin sēhe ró, te maá ri chí stóho ri ñayuu ñuu ún. Te sáá te quendacoo sēhe ró yúcuan, te nucoyūcú i yāhá chiñúhún i ruhū, achí yá.

<sup>8</sup> Te ni cahān yā jíin Abraham jeē na cúu de circuncidar, jeē cúu ñin jnuni jeē ni sáha ya contrato jíin de. Te ná ni cacu sēhe de Isaac te ni sáha de circuncidar i nuū uná quivī. Te suni súcuan ni sáha Isaac jíin sēhe de Jacob, te Jacob jíin sēhe yí de jeē cácuu ndihúxí uū yucūn ñayuu Israel.

<sup>9</sup> Te táca sēhe Jacob ni cacucuésun ni de jíin ñani maá de José, te ni caxícó de i nuū tée jeē ní cajendēca i nde naciún Egipto. Te Yaā Dios chi ni ndito ya José.

<sup>10</sup> Te ni jnama ya i nuū táca jnúndóho ní jito i, te ni cundíchí i ni sáha ya. Te Faraón, tēe cúu rey naciún Egipto, ni cusī ni de jíin i ni sáha ya, te ni tejníñu de José jeē cúu de gobernador te ndacu de jniñu naciún Egipto jíin núu ñayuu cáyūcú vehe Faraón.

<sup>11</sup> Te ni quiji quivī jeē ni íyo ñin jnamā xeēn, te ni ndoho ñayuu ní cáhnu naciún Egipto jíin ndé ñuu Canaán. Te táca jí yō ún, tuá ni cániñin de jeē cáji de.

<sup>12</sup> Te ni nihīn Jacob jnúhun jeē iyó trigo nde naciún Egipto, te ni tají de sēhe de ni jengoo de ni cajeen de trigo vuelta ñin.

<sup>13</sup> Te jeē cuángoo de vuelta uū te ni nastúu José jeē maá de cúu ñani de jínáhan de. Yūcuán na te ni jini rey Faraón ndé ñin jnáhan cúu José.

<sup>14</sup> Te ni cahān José jíin táca ñani de jeē na cóndeca de tátá de Jacob jíin ndihi jnáhan vehe de. Te ni íyo unī xico xahūn i.

<sup>15</sup> Te súcuan ni cuu jeē ni jínū Jacob ni condee de naciún Egipto nde ni jihī de. Te suni yūcuán ní coyūcu sēhe de jeē cácuu jí yō un ndé ní cajihī maá de.

<sup>16</sup> Te ná ni quee quivī jeē ndénehen ya táca yúcūn de jeē cáyūcu tátú de naciún Egipto, te ni cacondiso de yiqui ndihúxí uū ndīyi jíi un jéé ndíji ñuu Siquem, te ni cachindūji de ini yaū ndīyi ndeé jícá cáva jeē ní jeen jíi yō Abraham nuū táca sēhe Hamor ñuu Siquem.

<sup>17</sup> Te nde ná cáyūcu gá de naciún Egipto, te cuacuyajni quivī jeē squícu jnúhun ni cahān Yaā Dios jíin Abraham jeē quéndacoo sēhe de nucoyūcú i ñuu ni jéjnúhun ya nuū i, te ñayuu un ní tahū cuehē i ini naciún Egipto.

<sup>18</sup> Yūcuán na te ni nucuñī inga rey ñuu Egipto jeē tu ní jíni de jeē váha ni sáha ndīyi José.

<sup>19</sup> Te rey un ní stahú de táca jíi yō te ni sáha ndevāha de jíin i, chi ni sáha fuerza de i jeē ma cóto ga i sēhe yiquín i te na cúu.

<sup>20</sup> Te tiempo un ní cacu Moisés, te ni cusī ni Yaā Dios jíin i. Te unī yoō ni condito sáhi náná i tátá i.

<sup>21</sup> Te tuá ni cúu condito sáhi de i, te ni cachune de i nuū nanihīn sēhe síhi Faraón i, te ni naquihīn sēhe ña i ni scuéhnu ña i nájnūhun sēhe maá ña.

<sup>22</sup> Te ni cutūhva Moisés táca jnúhun ndíchí ñuu Egipto, te ni cujéhnu de jíin jnúhun cáhán de jíin jniñu sáha de.

<sup>23</sup> Te nuū uú xico cuiyā de te ni jcondēhé de jnáhan de jeē cácuu ñayuu Israel.

<sup>24</sup> Te ni jito de nuū ñin tēe naciún Egipto jeē sáha ndevāha jíin ñin tēe Israel. Te Moisés ni jnama de jnáhan de Israel ún, chi ni jehni de tēe Egipto un. Te súcuan ni ndutahū jeē ni sáha ndevāha jíin jnáhan de ún.

25 Te maá Moisés jeni ni de jeē jécūhun ni tāca jnāhan de jeē Yāa Dios ni tají yá de jeē jnáma de jnāhan de ún ini nación Egipto nuū, te tu ní cájecūhun cuiñi ni jnāhan de ún.

26 Te inga quivī suni ni jito de nuū uú tēe Israel jeē cájejnāhan, te cúní de jeē na jécuiñī. Te jeē yúcuán ní cahān de jíin: ¿Najehē casáha ndevāha ró jíin jnāhan ró? Chí nájñūhun ñn ñani-ni cácuu ró, áchí de.

27 Te maá tēe cáni tahú jnāhan un ní chundahá de Moisés te ni cahān de: ¿Ndé ñn ni jeni róhó jēe cujéhnū ró núū rī te sándaā rō jniñu ri jijnāhan ri?

28 ¿Chí suni cúní rō cahni rō ruhū nájñūhun ni jehni rō tēe Egipto icu chí naún? áchí de jíin Moisés.

29 Te nuū ní jíni sōho Moisés jñūhun yáha, te ni yūhú de jeē cáhni rey de, te ni jinu de cuahān de inga nación. Te ni condee de ñuu jicá Madián, te yūcuán ní scácu ñasihí de uū sēhe yí de.

30 Te ni jīnu uū xico cuiyā jeē néne de yūcuán. Yūcuán na te ñn ndajéhé Yāa Dios ni quenda ya nuū de nde nuū ñūhun téhé nuū ín yucu súcún Sinaí. Te ni quenda ya nuū de xinī ñn yucū cuií cáhnu cándahá yáñuhūn, te tu ní cáyú yucū ún.

31 Yūcuán na te Moisés ni naa ni de jito de ún, te ni jehēn de nde nuū, návāha coto vāha de. Te ni jíni sōho de jeē cahán maá Jítoho yō jíin de:

32 Maá rí cúu Yāa Dios tāca jíi rō jenahán, Abraham jíin Isaac jíin Jacob, achí yá. Te Moisés, quísi i de jeē yūhú de, te jeē yúcuán tuá ni cúndeyí ni de coto de nuū.

33 Te maá Jítoho yō ni cahān yā jíin de: Quenehen ndijēn rō chí nuū ín ró, ñuhun íi cúu.

34 Je ni jíni rī ñayuu maá rí jeē yóhoyo cándoho i nación Egipto, te suni jíni sōho ri jeē cájnana uhū i, te ni cuun ri vēji ri jeē jnáma ri i jijnāhan i. Núu súcuan te vijna chí tají rí rohó ndicó ró quihīn rō nde nación Egipto, achí yá jíin de.

35 Te nde ná tu quenda Moisés Egipto, te tāca jnāhan de ni casquéhichī i de jeē ní cacahān i jíin de: ¿Ndé ñn ni jeni róhó jēe cujéhnū ró núū rī te sándaā rō jniñu ri? ni cacahān i jíin de. Te vēsú súcuan te maá ndajéhé Yāa Dios ni quenda nuū Moisés un jēe cándahá cáyú yucū cuií ún. Te súcuan ni cuu jeē ní natajái yá de cuanuhun de nde Egipto jeē ndácu de jniñu nuū i te jnama de i.

36 Te maá Moisés ni sáha de jeē ní quendacoo jnāhan ñuu de ini nación yúcuán, te ni cayāha de Mar Rojo, te ni cajica cuu de ñuhun téhé úu xico cuiyā. Te ñí tiempo un ní sáha de cuehē jniñu jéhnū jeē steén jeē cujéhnū Yāa Dios.

37 Te maá Moisés cúu jeē suhva ni cahān de jñūhun yáha jíin jnāhan ñuu yō Israel: Maá Yāa Dios cani ya Yāa nacani jñūhun nuū rō jijnāhan ró nájñūhun ni jeni ya ruhū. Te cuu ya ñn jnāhan ñuu yō. Te na chūhun ni rō jñūhun cahān Yāa ún, áchí.

38 Te suni nde ná ni cajica cuu jíi yō nde nuū ñūhun téhé, te ni cahān ndajéhé yā jíin Moisés xinī yúcu súcún Sinaí, te ni nihīn de jñūhun jeē cahán ndese nihīn tahú yō cotecu yō, te ni nacani de jñūhun un núū tāca jíi yō, te ni quendōo jñūhun un núū yō.

39 Te tāca jíi yō ún tu ní cácuñi de cuandetū de nuū Moisés, chí sa suhva ni cacuni de squéhichī ni de Moisés, te ni cacuni de nandicó de nungoo de Egipto nuū.

40 Te ni cacahān de jíin Aarón: Sáha ní tijni yaā na cósnūu núū yō. Chí Moisés, jeē ní quenehen de yóhó Egipto vējicoo yó, tu cájini yō na vé ni ndoho de jeē tú de ndéé jeē cuahán de xinī yucu Sinaí, achí.

41 Yūcuán na te ni cajēhe de oro ni cuvāha ñn becerro oro, te nuū becerro ídolo un ní casocō de quiti, te ni cacusī ni de jín ídolo ni casáha de ún.

42 Te Yaā Dios ni cujiyo ya cuahān yā, te ni stóo ya de na chíñúhún de nuū tāca jēe jito yó ín andiví, nájñuhun yósó nuū tútu tēe ni canacani jñuhun Yaā Dios nde jenhán:

Ni cahān yā: Róhó ñáyuu Israel,

¿á cájeni ni rō jeē nuū ruhū ni casocō rō quiti  
ná ni cajica cuu ró úu xico cuiyā nde nuū ñúhun téhé?

43 Tuú, chi sa suhva ni cacondiso ró nicho jeē íne ídolo jeē naní Moloc  
jín figura quīmi jeē naní Renfán,  
ídolo jeē ní casáha máá ró ni cachiñúhún ró.

Jeē yúcuán cúu jeē síaha ri rohó quihín jicá ró nde yatā ñúu Babilonia, achí yá.

44 Te ni ndacu ya jniñu nuū Moisés jeē na sáha de vehe ññ nuū chíñúhún  
de ya, nájñuhun cáa jeē ní steén yā nuū de. Te tāca jí yō, nde nuū ñúhun téhé  
ní caneavāha de vehe ññ un núu ní cachuvāha de tabla yuū jeē yósó jñuhun ley  
yā.

45 Te ni castóo de vehe un núu ndihí sēhe de jeē cúu jí yō. Te ni quīvi Josué  
jín jí yō ñni nación yáha, te ni sáha ya jeē ní cacundeyí de jín táca ñáyuu jeē  
ní cacoyūcu yáha ní cajinu i cuangoo i. Te ni quīvicoo de táca ñuu i jín vehe ññ  
ún, te ni quendōo nde quīvi ní cuu David rey.

46 Te ni cusī ni Yaā Dios jín rey David. Te ni jicān de nuū yā jeē sáha de ññ  
vehe ññ yā nuú, chi máá yá cúu Yaā Dios jí de Jacob.

47 Te ni cuu jeē nde sēhe yí de Salomón ni sáha vehe ññ yā.

48 Te vésú súcuán ni cuu te Yaā cujéhu téyí, tu ndéé yá maá vehe jeē casáha  
ñáyuu, nájñuhun ni cahān tēe ni nacani jñuhun ya nde jenhán:

49 Ni cahān yā:

Andiví cúu nájñuhun mesa nuū ndácu ri jniñu

te ñáyivi cúu nájñuhun ññ nuū yítuu jehē rí.

Núu súcuán ¿te ndese cuu sáha ró vehe jeē cóndee rí,

te ndese cuu sáha ró núu ndétātu rí?

50 ¿A násūu máá rí ní sáha ndihí jeē iyó?

áchí máá Jítoho yō Yaā Dios.

51 Te cáhán gā Esteban:

Yōhoyo cácuñhni ní ní, te tu cácuñi ní chusóhó ní, te cácuu ní nájñuhun ñáyuu  
táca nación jeē tu cájini i jñuhun ya ní tu cácandje i ya. Chi níni cájesi ní núu  
Espíritu Santo, te nájñuhun ní casáha jí yō jenhán, suni súcuán cásaña ní  
vijna.

52 ¿A ní ñyo tēe nácani jñuhun ya nde jenhán jeē tu ní sáha ndevāha jí yō jín  
de? Chi jí yō ní cajehni de tēe ni canacani jñuhun jeē quíji máá Yāa ndaa. Te  
je ní quíji Yaā ún, te máá ní ní canastúu ní yá nuū tēe ní cajehni de ya.

53 Te vésú nde jín táca ndajéhé yā ní jēhe ya ley yā nuū yō, te máá ní chi tu  
cásquicu ní, achí Esteban.

### *Jeē ní cajehni de Esteban*

54 Táca jñuhun yáha ní cajini sōho, te yōhoyo ní caquiti ní, te cánacayihí yuhu  
cájito nuū Esteban.

55 Te máá Esteban chi ní cunuú Espiritu Santo jín de. Te ní jito de ichi andiví,  
te ní jini de jeē ndíndee núu néne Yaā Dios, te índichi Jesús ichi ndávāha ya.

56 Te ní cahān de:

Vijna te jító ri jeē núne andiví, te jító ri nuū maá Yáa ní nduu tēe, índichi yā nuū cujéhnū ya lado váha Yaā Dios, áchí de.

57 Yūcuán na te ni cajesi un sóho, te ni cacana cóhó, te inuú-ni ni candonda siquī Esteban.

58 Te ni caquenehen Esteban cuangoo jíin de nde yatā ñūū. Te tēe ni cacahān yaá un jíin ndihi jnáhan de ni cachucú de ticāchí de ndíto ñn tēe suchí nání Saulo, te ni cacani de yuū xinī Esteban.

59 Te níní jēē cácani tāca tēe un yūū xinī de te ni jicān tahú de nuū yā: Tátā Jesús jeē cúu ní Jitoho ná, naquihñ ní ánuá na vijna, áchí de.

60 Te ni jecuiñi yití de te ni cahān jee de:

Tátā Yaā Dios, ma quēnehen ní cuéchi siquī i jeē casáha i jíin ná, áchí de.

Súcuān ni cahān de te ni jihī-ni de.

*Jeē ní jito xeēn Saulo ñayuu cácanđje*

## 8

1 Te Saulo, ni nujnahan ni de jeē ni jihī Esteban.

Te quiví un ní caquejéé de cájito xeēn ndasí de ñayuu cácanđje Jesús ini ñuu Jerusalén, te jeē yúcuān cúu jeē ní cajitē núu ñayuu cácanđje cuangoo i ní Judea jíin ní Samaria. Te tēe apóstol chí tu ní cájitē núu de.

2 Te sava tēe yíñúhún núu Yaā Dios, ni cachindūji de Esteban. Te yōhyo ni candahyū de jeē ni jihī Esteban.

3 Te Saulo chí jító xeēn de ñayuu cácanđje, te quívi de ndijnahan vehe te jnái de tēe, ñahan, chúhun de i vecāa.

*Jeē ní canacani i jñūhun Yaā Dios ndañūū Samaria*

4 Te tācā ñuu nuū cuángoo tāca ñayuu ní cajitē núu un ní canacani i jñūhun ndese jnáma Yaā Dios ñayuu.

5 Te ni jinū Felipe ñn ñuu ndañūū Samaria, te nuū ñayuu yúcuān ní nacani de jñūhun Cristo, Yaā ní jeni Yaā Dios jeē jnáma ya yohó.

6 Te tāca ñayuu ní cacutútú un ní cajini nahñ váha i tāca jñūhun ni nacani Felipe, te ni cajito i tācā jñūñu jéhnū ní sáha de.

7 Chi cuehē ñayuu cándoho tachī ni canduvāha i, te cácana cóhó táchī un ní caquendacoo. Te cuehē ñayuu ní íjin jíin ñayuu ríngo ni canduvāha.

8 Te jeē yúcuān ní cacusi teyí ní ñayuu ñuu ún.

9 Te ñni ñuu un néne ñn tēe nání Simón, te tēe tásí cúu de. Te nde ná tu jinū Felipe ñuu Samaria, te yōhyo cánaa ni ñayuu ñuu un cájito i jeē sáha Simón, te ni stahú de i ni cahān de jeē ñn tēe cújéhnū teyí cúu máá de.

10 Te nde tēe cácuájéhnū jíin ndivii cuiti ñayuu, cájetáhú ndasí i jñūhun cáhán de, te ni cajeni ní maá i te ni cacahān i:

Tēe yáha ní jēhe Yaā Dios cuehē poder nuū de, áchí i.

11 Te cájetáhú váha i jñūhun cáhán de, chí cuehē tiempo ni sáha de jñiñu stahú ní canaa ni i ni cajito i.

12 Te nuū ni jinū Felipe, ni nacani de jñūhun váha ndese ndácu Yaā Dios jñiñu, jíin jñūñun Jesucristo, te ni cacandje i te ni cajendute i, cúu tēe cúu ñahan.

13 Te suni máá Simón ni candje de te ni jendute de, te ni jica cuu de jíin Felipe. Te ni naa ni de jító de tācā jñiñu jéhnū jeē sáha Felipe jeē steén jeē cujéhnū Yaā Dios.

14 Te cáyūcu tée apóstol ñūu Jerusalén, te ni canihīn de jnūhun jeē ñáyūu Samaria ni cacandíje i jnūhun Yaā Dios. Te ni catají de Pedro jíin Juan cuangoo de yūcuán.

15 Te ni jinūcoo de, te ni cajicān tahu de jehē ñáyūu un návāha na quívi Espíritu Santo ini anuá i jíjnáhan i.

16 Chí ná tu quívi ya ini anuá ni ñn i, chí máá-ni jeē ní cajendute i jeē ní cacandíje i Jítoho yō Jesús.

17 Yūcuán na te Pedro jíin Juan ni casoó de ndaha de xinī i jíjnáhan i, te ni quívi Espíritu Santo ini anuá i.

18 Te ni jito Simón jeē súcuan casoó apóstol ndaha de xinī ñáyūu ún te súcuan quívi Espíritu Santo ini anuá i, te cúní de cuāha de xūhun núū tée apóstol návāha nihīn de poder un núú.

19 Chí ni cahān de:

Cúní na jée cuāha ní poder yāha núū na, návāha núū ndé ñáyūu soó ná ndaha ná xinī i te quívi Espíritu Santo ini anuá i, áchí de.

20 Yūcuán na te ni cahān Pedro jíin de:

Na náā xūhun ró je jnahnū ndetū rō siquī jeē jéni ni rō jeē jíin xūhun te cuu cuan ró táhū jeē véji nuū Yaā Dios.

21 Ma nihīn tahu rō jeē sáha ró jniñu yāha, chí tu íyó ndāā anuá rō nuū Yaā Dios.

22 Núū súcuan te jíni ñúhún jée stóo rō jnūhun jeē jéni neé ni rō súcuan te cahān ndahú ró jíin Yāā Dios, te máá yá sanaa te cone cáhnu ní yā siquī jeē jéni neé ni rō súcuan.

23 Chí jíni rī jeē cucuésún ni rō siquī jeē sáha ri jniñu yāha. Te tāca jée neé jéni ni rō ni cunuú un jíin ró, achí Pedro jíin de.

24 Yūcuán na te ni cahān Simón jíin de:

Cacān tahu ní jehē na jíjnáhan ní núū máá Jítoho yō návāha tú jnahnū ndetū na nájnūhun ní cahān ní, áchí de.

25 Te Pedro jíin Juan ni cacahān cají de ndese cáacandíje de jnūhun Yaā Dios. Te jeē cuánungoo de ichi ñūū Jerusalén, te tijni ndañūū Samaria ni canacani de jnūhun jeē jnáma ya ñayūu.

### *Felipe jíin tée nación Etiopía*

26 Yūcuán na te ni cahān ndajéhé máá Jítoho yō jíin Felipe:

Quihīn ichi te quihīn rō ichi sur, ichi jeē quénda Jerusalén cuahān nde ñūu Gaza, áchí yá.

Te ichi chúcuan chí máá ñūhun téhé cúu.

27 Te ní quihīn Felipe ichi cuahān de. Te nde nación Etiopía ní quiji ñn tēe eunuco jeē ndíso jniñu de cúu de tesorero nuū ñáhan cúu reina ndácu jniñu nación Etiopía, nání ña Candace. Tēe un ní quichiñúhún de Yaā Dios ñūu Jerusalén.

28 Te cuanuhun de néne de nuū carreta de, te cáhu de tutu jeē ní tee Isaías, tēe ní nacani jnūhun Yaā Dios nde jenahán.

29 Te máá Espíritu ní cahān yā jíin Felipe:

Cuáhán quíjnahan rō tēe cuahān jíin carreta un.

30 Te ní jejnahan Felipe carreta un, te ní jini sōho de jeē cáhu tēe ún tutu jeē ní tee Isaías. Te ní cajnūhún de tēe ún:

¿A jécūhun ní ní jnūhun jeē cáhu ní chí tuú? áchí de.

31 Te ní cahān máá tēe un jíin Felipe:

¿Te ndese jecūhun ni ná? Chi tú na tēe castūhun nuū ná ndese cúu ún, áchí de.

Te ni cahān de jíin Felipe jeē na cáa de conēne ndúú de jíin de ini carreta.

<sup>32</sup> Te jnūhun cáhu de tutu īi un cáhán suhva:

Nájnūhun lanchi jeē cuahán tī nuū cúu tī, súcuan ni casáha ñayuu jíin yá.

Te nájnūhun īin londe quiti sáte jéē tu ndáhyú tī, súcuan ni sáha ya, chí tú na vé ni cáhán cuiti yā ná ni cajicān i cuēchi siquī yā.

<sup>33</sup> Te hora jeē ní cajēhe i jnūhun canu yā, tu ní cásáha ndaā i siquī yā jíin jnūhun ndaā,

te ni cajehni i ya ini ñayīvi yáha.

Te coo cuehē ñayuu candíje nuū yā jeē ma cánda ni īin ñayuu cahu i ñayuu ún.

Achí.

<sup>34</sup> Yūcuán na te ni cahān tēe Etiopía un:

Cava vāha ni ní cachi ni nuū ná, ¿ndé siquī cahán tēe ni nacani jnūhun yáha?

¿A siquī maá de chí siquī inga tēe? áchí de jíin Felipe.

<sup>35</sup> Yūcuán na te ni nacani Felipe jnūhun vāha Jesús nuū tée ún, chi ni quejéé de ni castūhún de jnūhun jeē ní cahu tēe ún, jíin táca gá jnūhun jeē yosó nuū tútu yā.

<sup>36</sup> Te níni cuángoo de ichi ún te ni jinūcoo de nuū ñūhun ndute, te ni cahān tēe Etiopía:

Yāha ñūhun ndute ¿te á tú cuu cuandute ná? áchí de.

<sup>37</sup> Te ni cahān Felipe:

Cuu te núu cándíje ñihin ni ndé jíin ini jíin ánuá ni táca jéē ni sáha Jitoho yō Jesús jehē yō, áchí de.

Te ni cahān tēe Etiopía:

Cándíje ná jéé Jesucristo cúu maá Séhe Yaā Dios, achí de.

<sup>38</sup> Te ni sáha de jeē na jécuiñi carreta de, te ni nuu ndindúú de cuangoo de ichi véyí nuū ñūhun ndute ún, te ni scuándute Felipe tēe Etiopía.

<sup>39</sup> Te nuū ní quendacoo de nuū ndúte, te Espíritu maá Jítoho yō ni sáha ya jeē ní ndoñhún-ni Felipe. Te tēe Etiopía vésú tuá ni jito de nuū Felipe, te cúsī ni de cuahān de.

<sup>40</sup> Te ni nane Felipe ñuu Azoto. Te nácani de jnūhun ndese jnáma ya ñayuu, cuahān de táca ñuu nde ni jinū de Cesarea.

*Jeē ní nasāma ini Saulo ni sáha Jesucristo  
(Hch. 22.6-16; 26.12-18)*

## 9

<sup>1</sup> Te Saulo chi máni cáhán de jeē cáhni de táca ñayuu cácandíje i maá Jítoho yō, te jeē yúcuán ní jehēn de nuū sutú cujéhu ga.

<sup>2</sup> Te ni jicān de carta jeē cahán jeē quihín de táca vehe īi sinagoga ñuu Damasco te cuhni de tēe ñahan jeē cácandíje i Jesús, quiji de jíin i ñuu Jerusalén nuú.

<sup>3</sup> Te ni quihin de ichi cuahān de. Te cuacuyajni de ñuu Damasco, te sanaa-ni te ichi ándiví ní stíndēē īin luz nuū de.

<sup>4</sup> Te ni cotúú-ni de nuū ñūhun, te ni jini sōho de īin jnūhun cáhán jíin de:

Saulo, Saulo, ¿najehē jito xeēn rō ruhú? achí.

<sup>5</sup> Te ni cahān maá de:

¿Na ñihín cúu jeē cahán, Tátā?

Te ni cahān yā jíin de:

Maá rí cúu Jesús, te jeē jító xeēn rō ñayuu cá candíje i ruhū cúu jeē jító xeēn rō ruhū. Te jeē sáha ró súcuan cúu nájnūhun stiquí jeē tu jéndíje ti te jéñú yatá tí xiní pulla, te súcuan stóho ti maá tí, achí yá.

<sup>6</sup> Te maá de chí quísi i de jeē yūhú de, te ní cahān de:

Tátā, ¿na vé cuní ní jéé sáha ná núu súcuan? áchí de.

Te ní cahān maá Jítóho yō jíin de:

Ndocuñī, quívi ró ini ñuu, te yūcuan íyó ñn tēe jeē cachi nuū rō na vé cúu jeē cánuú sáha ró, achí yá.

<sup>7</sup> Te tēe cuangoo jíin Saulo, ní canaa ndasí ní de cájini sōho de ndusu jeē cahán, te tu ní cájito cuiti de nuū jeē cahán un.

<sup>8</sup> Yūcuán na te ní ndocuñī Saulo. Te ní nducú de coto de, te tuá cúu coto de, te ní cajni tēe ún ndaha de ní jinūcoo jíin de nde ini ñuu Damasco.

<sup>9</sup> Te yūcuan ní condee de uní quívi. Te tu ní cúu cuiti coto de, ní tú na vé ní yeji de, ní tú na vé ní jíhi de.

<sup>10</sup> Te ñuu Damasco néne ñn tēe cándíje, nání de Ananías. Te maá Jítóho yō ní steén ndijin ya maá yá nuū de te ní cahān yā jíin de:

Ananías, achí yá.

Te maá de ní cahān de jíin yá:

Naun ní sáña, Tátā, áchí de.

<sup>11</sup> Te ní cahān maá Jítóho yō jíin de:

Quihin ichi te quihín rō calle jeē nání Calle Derecha, te vehe Judas cajnūhun rō ñn tēe nání Saulo ñuu Tarso, chí jícán tahu de.

<sup>12</sup> Te nájnūhun ní jito ndijin de jeē maá ró, Ananías, ní jinū rō, te ní soó ró ndaha ró xíní de, te ní nanune tinūú de, áchí yá.

<sup>13</sup> Yūcuán na te ní cahān Ananías:

Tátā, cuehē ñayuu cácahān jeē tēe yúcuán yōhyo jító xeēn de ñayuu cá candíje i níhín ñuu Jerusalén.

<sup>14</sup> Te vijna ní quee de yāhá, chí sutū cácujuhnu ní catejníñu de véji de jni de tāca ñayuu cácahān ndahú i jíin ní, áchí de.

<sup>15</sup> Te ní cahān maá Jítóho yō jíin de:

Cuáhán, chí maá rí ní nacāji tēe un jéé quihín de nacani de jnūhun rí nuū tāca ñayuu nación Israel jíin núu ñayuu tāca gá nación nde jíin núu tāca rey.

<sup>16</sup> Chí stéén rí nuū de jeē cánuú ndoho de cuehē jnūndóho jeē siquí rí, achí yá.

<sup>17</sup> Yūcuán na te cuahān Ananías. Te ní quívi de ini vehe nuū néne Saulo, te ní soó de ndaha de xiní Saulo, te ní cahān de:

Hermano Saulo, maá Jítóho yō Jesús, Yaā ní quenda ndijin nuū ní ichi jeē véji ní, ní taji yá sáña véji ná núu ní návaha na nánune tinūu ní, te návaha na cúnuú Espiritu Santo yā jíin ní, áchí de.

<sup>18</sup> Te ní nanune ní tinūu Saulo, chí ní nungoo-ni nájnūhun soó chācá ní condihyū tinūú de ún. Te ní ndocuñī de ní jendute de.

<sup>19</sup> Yūcuán na te ní nacāji de staā, te ní nanihín ní de. Te ní condee de jecu quívi jíin tēe cá candíje jeē cáyúcú ini ñuu Damasco.

### *Jeē ní nacani Saulo jnūhun ini ñuu Damasco*

<sup>20</sup> Te ní quejéé-ni de nacani de jnūhun Jesús ini tācá vehe íi sinagoga, áchí de jeē Jesús cúu Sēhe Yaā Dios.

<sup>21</sup> Te tāca ñayuu ní cajini sōho jnūhun cáhān de ní canaa ní i, te ní cacahān i:

¿A násũu tée yáha cúu jeē yóh̄yo jíto xeēn de táca ñáyuu Jerusalén jeē cájicān tahú nuū Jesús? Te siquī yúcuan ní quee de yáha jéē cūhni de ñayuu cácanđije, te quih̄n de jíin i nuū sutú cácujuh̄nu nuū, áchí i.

<sup>22</sup> Te víhyá gā ni nacani Saulo jnūhun ya, te ni steén cají de jeē Jesús cúu Cristo, Yaā ní jeni Yaā Dios jeē jnáma ya yohó. Te tēe hebreo jeē cáyūcú ñuu Damasco, tu ní cánih̄n de modo cahān de jeē tu íyó ndāā jeē cahān Saulo.

### *Jeē ní cácu Saulo nuū jnāhan de hebreo*

<sup>23</sup> Te ni yáha cuehē quiv̄i. Te jnāhan de hebreo ni casquijnāhan jnūhun de jeē cáhni de Saulo.

<sup>24</sup> Te ni nih̄n Saulo jnūhun jeē cándito de nduú ñuú táca yéhyi pared jeē ní condúu ndihyú ñuu ún.

<sup>25</sup> Yūcuán na te ñn jecuāā te tēe cácanđije ni caquihin de Saulo, te ini ñn jica cáhnu ni cascúun de Saulo jicā pared ún, te súcuan ni cācu de.

### *Jeē ní najinū Saulo ñuu Jerusalén*

<sup>26</sup> Te nuū ní najinū de ñuu Jerusalén, te cúní de najnāhan de jíin tēe cácanđije. Te ni cayūhu tēe un ní cajito de Saulo, chí tu ní cácanđije de jeē ní nduu Saulo tēe cándije nuū Jesús.

<sup>27</sup> Te Bernabé cuahān de jíin Saulo nuū cáyūcu tēe apóstol, te ni nacani de jnūhun nuū tēe ún ndese ni jini Saulo nuū maá Jítoho yō ichi nuū cuahān de, jíin jéē ni cáhān yā jíin de, jíin jéē jéhu-ni ni nacani de jnūhun Jesús ini ñuu Damasco.

<sup>28</sup> Te ni condee Saulo ñuu Jerusalén ni jica de jíin táca tēe apóstol.

<sup>29</sup> Te jéhu-ni ni nacani de jnūhun maá Jítoho yō. Te jnāhan ñuu de hebreo jeē cácahān yuhu griego, ni castāhān jnāhan jíin de, te maá tēe un cácuni de cahni de Saulo.

<sup>30</sup> Te ni cajini táca hermano cácanđije, te ni cajendēca de Saulo nde ñuu Cesarea. Te yūcuan ní canatajī de Saulo cuanuhun de nde ñuu de Tarso.

<sup>31</sup> Te ñayuu cácanđije Jesús jeē cáyūcú Judea jíin Galilea jíin Samaria, tuá ni cájito xeēn ñayuu i. Te ni ije ga i jíin jnūhun ya, te cándiso iyo i nuū maá Jítoho yō. Te Espíritu Santo ni chindéé ñáhán yá i te ni nducuehē gā i.

### *Jeē ní nduvāha Eneas*

<sup>32</sup> Te táca lado jécondēhe Pedro ñayuu cácanđije, te suni ni jecondēhé de ñayuu cácanđije cáyūcú ñuu Lida.

<sup>33</sup> Te yūcuan ní jini de nuū ñn tēe nání Eneas jeē ní cuu unā cuiyā cáa de chí ni ijin de.

<sup>34</sup> Te ni cahān Pedro jíin de:

Eneas, Jesucristo cúu Yaā nasávāha ya rohó. Ndocuiñi te natuu rō yuu ró, áchí de.

Te ni ndocuiñi-ni tēe ún.

<sup>35</sup> Te táca ñáyuu cáyūcú ñuu Lida jíin ndúhvā Sarón ni cajito i jeē ní nacaca Eneas, te ni casquéndōo i táca jnūhun jeē tu íyó ndāā te ni cacandije i maá Jítoho yō.

### *Jeē ní natecu Dorcas*

<sup>36</sup> Te nde ñuu Jope ni iyo ñn ñahan cándije, nání ña Tabita, te nuū yūhu griego nání ña Dorcas. Te ñahan yáha máni jniñu váha ni sáha ña, te ni sáha ña caridad ni chindéé ñáhán ña ñayuu cúmanī nuū.

<sup>37</sup> Te tiempo yúcuan ní quejéé cuéhyi jíin ña, te ni jihī ña. Te ni cascúchi i ndiyi ún, te ni cajequin i ndiyi un ndé ini cuarto xinī véhe.



<sup>38</sup> Te yajni ñe ñuu Lida jíin ñuu Jope, te tēe cácanđije ñuu Jope ni cajini jñūhun de jeē néne Pedro ñuu Lida, te ni catají de uū tēe cuacana de Pedro, te ni cacahān de:

Ma cucuée ní na quíhín yachī yō ñuu Jope, achí de.

<sup>39</sup> Yūcuán na te ni quihin Pedro ichi cuahān de jíin tēe ún. Te nuū ni jíin de, te ni cacao tēe un jíin de nde xinī véhe nuū catú ndíyí ún. Te tãcá ñahan viuda ni candicó ndúū ña de cándahyū ña, te cástéén ña tãcá sahma jíin tícachi jéē ni sáha Dorcas te ni saja ña nde na técu ña.

<sup>40</sup> Yūcuán na te ni ndacu Pedro jñiñu jeē na quéndacoo ndihi ñayuu ún quingoo i nde yatā véhe. Te ni jecuñi yití de ni jicān tahú de, te ni nandió coto de nuū catú ndíyí ún, te ni cahān de:

Tabita, ndocuñi ní, achí de.

Te máá ña ni ndacoto-ni ña te ni jito ña nuū Pedro, te ni nucōo-ni ña.

<sup>41</sup> Te ni jñi de ndaha ña, te ni ndonehen de ña. Yūcuán na te ni nacana de xinī ñayuu cácanđije nde jíin ñahan viuda ni ndívicoo i, te ni steén de ña nuū i jeē ní natecu ña.

<sup>42</sup> Te ni jītē jñūhun jñiñu yáha ní ñuu Jope cuahān, te cuehē ñayuu ni cacandíje i jñūhun máá Jítóho yō.

<sup>43</sup> Te cuehē quiṽi ni ndōo Pedro ini ñuu Jope, néne de vehe ñin tēe sáha curtir ñi, nání de Simón.

*Pedro jíin Cornelio*

## 10

<sup>1</sup> Te ini ñuu Cesarea ni ñyo ñin tēe nání Cornelio, ni cuu de capitán grupo soldado jeē naní Italiano.

<sup>2</sup> Te cúu de tēe ndiso ñyo nuū Yaā Dios nde jíin ndihi ñayuu vehe de, te yōhyo caridad ni tēe cúu de, chi jéhe de xūhun núū ñayuu hebreo cándoho ndáhú, vēsú nasūu tēe hebreo cúu de. Te níni jíicán tahú de nuū Yaā Dios.

<sup>3</sup> Te ñin quiṽi ni steén ndijin yā nuū tēe yáha nájñūhun cahunī jehíni, te ni jito de jeē ñin ndajéhé máá Yáā Dios ni quiṽi ya nuū néne de. Te ni cahān yā jíin de:

Cornelio, achí yá.

<sup>4</sup> Te máá de ni ndacoto vāha de nuū yā, te ni yūhú de. Te ni cahān de:

¿Na vé cuní ni, Tátá? achí de.

Te ni cahān yā jíin de:

Je chíhi Yaā Dios cuenta jeē jicān tahú ró jíin jéē sáha ró caridad.

<sup>5</sup> Vijna te tají ró jecu tēe na quingoo de nde ñuu Jope, quicana de Simón jeē suni nání de Pedro, na quíji de.

<sup>6</sup> Chi néne núu de vehe tocayo de Simón, tēe sáha curtir ñi, te ndéé vehe ún yajni yumar. Te máá de castūhun núū rō na vé cúu inga jeē cánuú sáhá ró, achí ndajéhé yā.

<sup>7</sup> Te ndajéhé yā jeē ni cáhān jíin Cornelio, cuahān-ni ya. Te ni cana de uū mozo de jíin ñin soldado jeē yñúhún núū Yaā Dios, chi cúcāhnu ni de jeē squícu vāha tēe ún.

<sup>8</sup> Te ni nacani ndihi de jñūhun nuū tãca tēe ún, te ni tají de cuangoo nde ñuu Jope.

<sup>9</sup> Te inga quiṽi un cájica de ichi cuangoo de, te cuacuyajni de ñuu Jope. Te je yajni cahuxí uū cúu, te suu hora un ní caa Pedro siquí véhe chí cándaā, te yūcuan cácan tahú de.

10 Te ni quee sōco chīji de, te ni cuni de caji de staā. Te sáá cásáha ña ndeyu te ni steén ndijin yā nuū de.

11 Te ni jito de jeē núne andiví. Te ni jito de nájñuhun ñin sahma manta jité cáhnu te núhni jñáhan ndicúun punta, te ni cuun vēji nuū de.

12 Te chīji un cáñuhun ndinuū quití, tǎcǎ quití cúun ndaha jíin táca cóo jíin táca quití cándava.

13 Te ni jini sōho de ñin jñuhun ni cahān:

Pedro, ndocuñī te cahni rō tǎcǎ quití jíñā, te caji rō tī, áchí.

14 Te ni cahān Pedro:

Ma cǎji na, Tǎtǎ, chí tu yéji cuiṭi na táca quití jeē cahán ley ni jéé tú vāha caji na tǐ, chí nájñuhun jeē tu cáhīyo ndoo tī nuū ní, áchí de.

15 Te ni cahān tucu jñuhun un jíin de:

Achí rí jeē iyó vāha caji rō tǎcǎ quití jíñā, chí ni sándoo rí, te ma cahán maá ró jeē tu cáhīyo ndoo tī, áchí. Te súcuan ni steén caji yá nuū de jeē cúu quihīn de nuū ñáyuu vēsú násūu jñáhan ñuu de hebreo cúu.

16 Te uní jínu ni cahān súcuan jíin de. Te sahma un ní ndaa cuanuhun andiví.

17 Te níni nácani ndasí ní Pedro na vé cuni cahān jeē ní jito ndijin de ún, te ni jinūcoo-ni tēe ni tají Cornelio, cácajnūhún de vehe Simón nde ni jinūcoo de yéhyí tēe ún.

18 Te cácahān jee de cácajnūhún de núu yūcuan ndéé Simón jeē suni nání de Pedro.

19 Te níni nácani ga ní Pedro siquī jeē ní jito ndijin de ún, te Espíritu Santo ni cahān yā jíin de:

Ni quecoo uní tēe cánanducú róhó.

20 Ndocuñī te nanuu ró, te ma cáni ni rō jeē tú vāha quihīn rō jíin de, vēsú nasūu jñáhan ñuu rō hebreo cácuu de, chí maá rí ní tají rí de vējicoo de, áchí yá.

21 Yūcuán na te ni nanuu Pedro nuū tēe ní tají Cornelio, te ni cahān de:

Maá ná cúu tēe cánanducú ní. ¿Te na siquī vējicoo ní núu na núu súcuan? áchí de.

22 Te ni cacahān mozo un:

Cornelio, tēe cúu capitán, ni tají de sañá. Te tēe ndaā, tēe ndíso Iyo nuū Yaá Dios cúu de, te táca ñáyuu hebreo suni cácahān i jeē tēe vāha cúu de. Te ni cahān ñin ndajéhé yā jíin de jeē na cána de níhín jéé ní vehe de te chusóhó de jñuhun cahān ni jíin de.

23 Yūcuán na te ni cahān Pedro jíin mozo un jéé na cúcōo de ini vehe ún, te ni candōo de yūcuán. Te nuū ní cundijin, te ní quihīn Pedro ichi cuahān de jíin mozo un. Te suni cuangoo jecu hermano cácañje ñuu Jope jíin de.

24 Te nde inga quivī ní jinūcoo de ñuu Cesarea. Te Cornelio ndétu de jinūcoo Pedro, chí ni nastútú de táca jñáhan de jíin táca amigo de jeē quijnáhan vāha ga de jíin.

25 Te nuū ní jínū Pedro jijnáhan de, te ni quenda Cornelio ni cahān de jíin Pedro, te ni jecuiñī yití de jeē chíñuhún de Pedro nuú.

26 Te Pedro ni ndonehen de Cornelio, te ni cahān de:

Ndocuñī ní, chí sañá suni ñin tēe-ni cúu ná, áchí de.

27 Te cácajnūhún de ní quivicoo de ini vehe. Te ni jito Pedro jeē cáyūcu cuéhé ñayuu ini vehe de.

28 Te ni cahān Pedro jíin ñáyuu ún:

Je cájini vāha ni jínáhan ní jēē ley jeē cánevāha sāña ñáyuu hebreo, cáhán jeē tú vāha jeē quijnáhan ná jíin ní quivicoo ná vehe ní síquī jeē cúu ní ñáyuu sñn naciòn. Te Yaā Dios chí ni steén yā nuū na jēē ma kujēē ní na núū ní ñn ñayuu.

<sup>29</sup> Jeē yúcuan cúu jeē vēji-ni ná, chí ni cana ní sáña, te tu ní sájēē ni ná. Te na cájñuhun ná nihín, ¿na síquī ní cana ní sáña? áhí Pedro.

<sup>30</sup> Yūcuán na te ni cahān Cornelio:

Vijna iyó cúun quiví nájñuhun máo hora yāha jēē cúu cahuní jehíni, te ndite ni ná chí súcuan chíñúhún ná nuū yā, te jícán tahu na ini vehe ná. Te ni quiji ñn ndajéhé yā nuū ná, te ndíndēē sahma ññuhun ya.

<sup>31</sup> Te ni cahān yā jíin ná: Cornelio, je ni jini sōho Yaā Dios jeē jícán tahu rō, te chíhi ya cuenta jeē sáha ró caridad.

<sup>32</sup> Núu súcuan te tají ró mozo na quíngoo de ñuu Jope quicana de Simón jeē suni nání de Pedro, na quíji de nuū rō. Chí tēe un néne de vehe tocayo de Simón, tēe sáha curtir ññi, te yajni yumar ndeé vehe de. Te quee tēe ún te castúhún de nuū rō jñuhun cánuú, áhí yá jíin ná.

<sup>33</sup> Súcuan ni cuu te ni tají-ni ná mozo na cuajēcoo de cana de níhín, te na cútahū ná, chí vāha ni sáha ní jēē vēji ní. Te vijna ni candutútú ná yāha návāha táca ná cuni sōho ná ndíhi jñuhun Jitoho yō Yaā Dios jeē ni jēhe ya cahān ní, áhí de.

### *Jeē ní nacani Pedro jñuhun ya vehe Cornelio*

<sup>34</sup> Yūcuán na te ni cahān Pedro:

Vijna te ni jini vāha ná jēē Yaā Dios inuú-ni sáha ya jíin táca ñáyuu, cúu ñayuu hebreo jíin ñáyuu táca gá naciòn.

<sup>35</sup> Chí cúsiñ ni yā jíin ñáyuu táca-ni naciòn núu cándiso Iyo i nuū ya te cásáha i jniñu ndaā.

<sup>36</sup> Chí ni cahān yā jíin ñáyuu Israel jeē ndívicoo táca ñáyuu nuū jñuhun maní yā jíin i sáha Jesucristo. Te máá yá cúu Jitoho táca yóhó.

<sup>37</sup> Máá ní je cájini ní ndese ni cuu. Chí ná ni jíinu ni nacani Juan jñuhun jíin jēē ní scuándute de ñayuu, te ni quejéé Jesús nácani ya jñuhun nde Galilea, te ni jítē jñuhun un ní cáhnu Judea.

<sup>38</sup> Te cájini ní jēē Yaā Dios ni jēhe ya Espíritu Santo jíin poder nuū Jesús, Yaā ní jehnu ñuu Nazaret. Te cájini ní jēē ní jica cuu ya ní sáha ya jniñu vāha, te ni nasávāha ya táca ñáyuu jeē cándoho i sáha jexéén, chí Yaā Dios ni chindéé ñáhán yá Jesús.

<sup>39</sup> Chí máá ná cáncani cájí ná jñuhun táca jniñu ní cajito ná ní sáha ya ní cáhnu Judea jíin ini ñuu Jerusalén. Yūcuán na te ni cajehni i ya, chí ni cata caa i ya jícá cruz.

<sup>40</sup> Te Yaā Dios ní nastécu yā máá Jesús nuū uní quiví, te ni ndiji ya nuū na ní cajito ná núu yā ni sáha Yaā Dios.

<sup>41</sup> Te tu ní quíji ya nuū táca inga ñayuu, chí nuū maá-ni táca ná jeē jé ni nacāji Yaā Dios sāña jēē nácani ná jñuhun táca jniñu jeē ní cajito ná. Chí ni cayejí na stāā ni cajihí ná ndute jíin yá ná ni nane ya jeē ní natecu yā.

<sup>42</sup> Te ni ndacu ya jniñu nuū na jíjñáhan ná jēē na nácani ná jñuhun ya nuū táca ñáyuu te cahān cají ná jeē maá Yāā Dios ni jeni ya Jesús jeē sándaā yā jniñu ñayuu cátecu jíin ñáyuu ní cajihí.

<sup>43</sup> Chí jñuhun Jesús cúu jeē ní cacahān táca tēe ni canacani jñuhun Yaā Dios nde jenahán. Chí ni cacahān de jeē táca ñáyuu jeē candíje i Jesús, cone cáhnu ni yā nuū cuéchi i, áhí Pedro.

*Jeē ni quīvi Espírиту Santo ini anuá ñayuu jeē násūū hebreo cácuu*

<sup>44</sup> Te níni cáhán gā Pedro táca jnūhun yáha te ni quīvi-ni Espírиту Santo ini anuá táca ñayuu cájini nahín jnūhun ya jeē cahán de.

<sup>45</sup> Te tēe hebreo jeē ni jínūcoo jíin Pedro jeē suni cácandíje de Jesús, nahán ní canaa ní de ní cajito de jeē suni ni quīvi Espírиту Santo ini anuá ñayuu jeē násūū hebreo cácuu.

<sup>46</sup> Chi ní cajini sōho de cácahān ñayuu un sīn yuhu, te cácahān i jeē yōhyo cújéhnū Yaā Dios.

<sup>47</sup> Yūcuán na te ni cahān Pedro:

¿Nde ĩn casi jeē ma cuándute ñayuu yáha? Chi ní quīvi Espírиту Santo ini anuá maá i, nájnūhun ni quīvi ya ini anuá maá yó, áchí de.

<sup>48</sup> Te ní cahān de jíin i jeē na cuándute i síquī jeē ní cacandíje i Jesucristo. Yūcuán na te ní cacahān ndahú i jíin Pedro jeē na quéndōo de jecu quīvi jíin i.

*Jeē ní nacūāha Pedro cuenta nuū ñáyuu cácandíje ini ñuu Jerusalén*

## 11

<sup>1</sup> Te tēe apóstol jíin táca hermano cáyūcú Judea, ni canihīn de jnūhun jeē súni ñayuu sīn nación ni cacandíje i jnūhun Yaā Dios.

<sup>2</sup> Te cuanuhun Pedro ñuu Jerusalén. Te sava tēe hebreo jeē cácandíje de ya ni cacahān de nuū Pedro:

<sup>3</sup> ¿Najehē ní condee ní vehe ñayuu jeē násūū ñáyuu nación yō cúu? Te ni yeji ní jíin i, áchí.

<sup>4</sup> Yūcuán na te ni nacani cájī Pedro jnūhun nuū tée ún ndihī ndese ni cuu síquī tée sīn nación:

<sup>5</sup> Néne ná ñuu Jope. Te níni jícan tahu na, te ní steén ndijin yā nuū ná, te ní jito ná nájnūhun ĩn sahma manta jité cáhnu jeē nuhní jnáhan ndicúún punta, te nde ichi ándiví ní cuun ní quiji nuū ná.

<sup>6</sup> Te ní jito vāha ná, te ní jini na jéé chíji un cáñūhun quiti cúun ndaha jíin quiti xéén jíin cóō jíin quiti cándava.

<sup>7</sup> Te ní jini sōho ná ĩn jnūhun ni cahān jíin ná: Pedro, ndocuiñī te cahni rō táca quiti jíñā, te caji rō tí, áchí jíni ná.

<sup>8</sup> Te ní cahān ná: Ma cáji na, Tātā, chí tu yéji cuiti na táca quiti jeē cahán ley ní jéé tu cáhīyo ndoo tí nuū ní, áchí ná.

<sup>9</sup> Yūcuán na te jnūhun jeē véji nde ándiví ní cahān tucu jíin ná: Ní sándoo máá rí tí, te ma cahán gā rō jeē tu cáhīyo ndoo tí, áchí jíni ná.

<sup>10</sup> Te unī jínu ni cahān súcuan. Yūcuán na te ní ndaa sahma un cuánuhun ándiví.

<sup>11</sup> Te hora un ní jinūcoo unī tēe vehe nuū ni cóndee ná un, cánanducú de sãñá, te ĩn jnáhan ñuu de Cesarea ni tají de vējicoo de.

<sup>12</sup> Te máá Espírиту ní cahān yā jíin ná jeē ma cáni ní na jéé tú vāha quihīn na jíin de. Te suni iñū hermano yáha ní jengoo jíin ná, te ní quīvicoo ná ini vehe tēe nání Cornelio.

<sup>13</sup> Te tēe un ní nacani de jnūhun nuū na jíjnáhan ná jéé ní jito de ĩn ndajéhé Yaā Dios, índichi yā ini vehe de, te ní cahān yā jíin de: Tají ró jecu tēe na quíngoo de ñuu Jope, quicana de Simón jeē suni nání de Pedro, na quíji de.

<sup>14</sup> Te tēe ún cachí de nuū rō ndese jnama Yaā Dios rohó jíin ndihī ñayuu cáyūcú vehe ró, áchí yá. Achí Cornelio jíin ná.

<sup>15</sup> Te nuū ní quejéé ná cahán na, te ní quīvi-ni Espírиту Santo ini anuá i jíjnáhan i, nájnūhun ni quīvi ya ini anuá maá yó xīhna gā.

16 Yūcuán na te ni nucūhun ni na jnúhun ni cahān maá Jítóho yō: Jendaá jeē maá ndute-ni ni scuándute Juan ñayuu. Te róho jíjnāhan ró chi nájnūhun cuandute ró jíin Espíritu Santo, cúu jeē cóndee yā ini anuá rō, achí yá.

17 Te suni ni jēhe Yaā Dios Espíritu yā nuū maá i nájnūhun ni jēhe ya nuū maá yó jeē cácadnje yó Jítóho yō Jesucristo. Núu súcuan ꞥte ndé ñin cúu ná jéé cási ná jniñu jeē sáha Yaā Dios? áhí Pedro.

18 Súcuan ni cajini sōho de jnūhun yáha, te tuá ni cácahān de nuū Pedro, chi sa suhva ni cacahān de jeē yóhoyo cújéhnú Yaā Dios. Te ni cacahān de:

Suni ni jēhe Yaā Dios jnūhun jeē na nácani ni ñayuu tāca gá nación jeē stóo i cuēchi i návāha cotecu i ní cáni núu súcuan, áhí de.

### *Ñayuu cácadnje ini ñuu Antioquía*

19 Te quiví ní cajehni de Esteban ni quejéé de cájito xeēn de ñayuu cácadnje, te jeē yūcuán ní cajitē núu ñayuu un tāca ñuu cuangoo i, te ni jinūcoo i Fenicia jíin Chipre jíin ñuu Antioquía. Te ni canacani i jnūhun vāha ya nuū máni jnāhan hebreo i jeē cáyūcu yūcuán, te tu ní canacani i jnūhun ya nuū ñnga ñayuu.

20 Te jecu tēe cácadnje jeē cáyūcu Chipre jíin ñuu Cirene ni jinūcoo de ñuu Antioquía, te suni nuū ñayuu tāca nación jeē tu cájini i jnūhun ya ni canacani de jnūhun máá Jítóho yō Jesús jeē jnáma ya i.

21 Te máá Jítóho yō ni chindéé ñáhán yá de, te cuehē ñayuu ni castóo i jniñu jeē tu íyó ndáá te ni cacandje i máá Jítóho yō.

22 Te ñayuu cácadnje ini ñuu Jerusalén ni cajini jnūhun i, te ni catají i Bernabé cuahān de nde ñuu Antioquía.

23 Te nuū ni jíin Bernabé yūcuán, te ni jini de jeē yóhoyo vāha ni sáha Yaā Dios jíin i, te ni cusñ ndasí ni de. Te ni stihví ni de tāca ñayuu un jéé jíin ini jíin ánuá i na cóndihví ni i squícu vāha i nuū maá Jítóho yō, te ma náyūhú i.

24 Chi tēe vāha cúu Bernabé, te ni cunuú Espíritu Santo jíin de, te cándje ñihin de. Te ni cacandje cuehē ñayuu nuū maá Jítóho yō ni sáha de.

25 Yūcuán na te cuahān de nde ñuu Tarso cuananducú de Saulo. Te ni naniñin jnāhan de jíin Saulo, te ndéca de tēe un ní ndee de ñuu Antioquía.

26 Te ní ñin cuiyá ni candutútú de jíin ñayuu cácadnje yūcuán, te ni castéén de jnūhun ya nuū cuehē ñayuu. Te ñuu Antioquía cúu nuū xihna ñühún gá ni cacananí ñayuu cristiano síquī jeē ní cacandje i Cristo.

27 Te suni tiempo un ní quendacoo tēe canacani jnūhun Yaā Dios ñuu Jerusalén cuangoo de nde ñuu Antioquía.

28 Te ñin jnāhan de jeē naní Agabo ní ndocuiñí nuū hermano cácadnje. Te ni steén Espíritu Santo nuū de, te ni castühún de jeē cóo ñin jnamā xeēn ní cáhnu. Te ni cuu jnamā ún ñin parte tiempo jeē ní ndacu Claudio jniñu jeē ní cuu de rey.

29 Yūcuán na te ni candajnūhun tēe cácadnje ñuu Antioquía jeē cuáha ñin ñin de nasaa canda de cuáha de te tají de quihñ cotecu hermano cáyūcú Judea.

30 Te súcuan ni casáha de. Te ni catají de Bernabé jíin Saulo ni cajendēca de nuū tēe jéhnú cándiso jniñu nuū ñayuu cácadnje cáyūcú Judea.

### *Jeē ní jehni Herodes Jacobo, te ni chune de Pedro vecā*

## 12

1 Te suu tiempo un ní quejéé rey Herodes jito xeēn de sava ñayuu cácadnje.

2 Te ni ndacu de jniñu jeē jíin espada na cáhni i Jacobo ñani Juan.

<sup>3</sup> Te ni jini de jeē ní cacusiñ ni tēe hebreo jeē ni sāha de súcuan, te jeē yúcuan suni ni jniñ de Pedro. Te máá quiví un ní cuu vico jeē yéji ñayuu pan jeē tu yíhi levadura.

<sup>4</sup> Te nuū ní jniñ de Pedro, te ni chune de vecāa, te ni jeni de cuñ grupo soldado jeē cóndito Pedro, cuñ cuñ soldado cúu jeē ñin ñin grupo. Chi cúní Herodes jeē na yáha vico un jéé cúu vico pascua te quenehen de Pedro vecāa un stéén de nuū ñáyuu cuehē.

<sup>5</sup> Te súcuan íne Pedro vecāa, te cándito soldado un de. Te ñayuu cácan dije chi ñihin ni cajicān tahú i jehē Pedro nuū Yaā Dios jeē na cácu de.

### *Jeē ní quenehen Yaā Dios Pedro vecāa*

<sup>6</sup> Te jeni ni Herodes jeē na cundijin inga quiví te quenehen de Pedro vecāa, te stéén de nuū ñáyuu un núú. Te nuñní Pedro jiñ uū cadena, catú de quixí de mēhñu uū soldado jecuāá ún, te suni cáhñin ga soldado cándito yéhyí vecāa ún.

<sup>7</sup> Te suu jecuāá ún te sanaa-ni te ni jinū ñin ndajéhé máá Jítoho yō, te ni ndindéé ini vecāa. Te ni squñi ya Pedro, te ni natahū ni de. Te ni cahān yā:

Yachí ndocuñí rō, achí yá.

Te cadena nuñní ndaha de un ní canandajī-ni.

<sup>8</sup> Te ni cahān ndajéhé yā jiñ de:

Nacuhni ñihin chíji ró, te nuquñi ró ndjēn rō, achí yá.

Te súcuan ni sāha de. Te ni cahān tucu ndajéhé yā jiñ de:

Condií ticāchi ró, te condiquin rō ruhū na quihñ yō, achí yá.

<sup>9</sup> Te ni quenda de ndíquín de ya cuahān de jiñ yá, te jeni ni de jeē násūu jendaá cúu jeē sāha ndajéhé yā jiñ de, chi jeni ni de jeē ñin jeē ni stéén yā jito ndijin de cúu.

<sup>10</sup> Te ni yāha ya jiñ de uū nuū cándito soldado. Te ni jinū yā jiñ de yéhyí cáa nuū quenda de caca de calle, te yéhyí un ní nune iñ-ni máá. Te ni quenda ya jiñ de, te ni yāha de ñin calle cuahān de. Yūcuán na te ni cujiyo-ni ndajéhé yā nuū de cuahān yā.

<sup>11</sup> Te ni nducájí ni Pedro te ni cahān máá ní cahān ñin de:

Vijna te ni jini ndaā rī jeē ní tají máá Jítoho rī ndajéhé yā ni quiji, te ni jnama ya ruhū nuū Herodes jiñ núú táca ñáyuu hebreo jeē cácani i sāha xeēn i jiñ rí nuú, áchí de.

<sup>12</sup> Te nuū ní jini de jeē ni cácu ndije de, te ni quihñ de ichi cuahān de vehe María naná Juan jeē suni nání de Marcos. Te yúcuan cáhñin tütú cuehē ñayuu cájicān tahú i jehē Pedro.

<sup>13</sup> Te cáhñ Pedro ni jinū de yéhyí fuera, te ñin sūchi síñi nání Rode cuahān i jeē cúní i núu ndé ñin cúu jeē cahān.

<sup>14</sup> Te ni nacuni i tachí Pedro, te jeē ní cusñ ni i te tu ní núne i yéhyí un, chi ni nandió cóo i te jinu i ni ndiví i ini cuarto. Te ni castühún i jeē ní quee Pedro indichi de yéhyí fuera.

<sup>15</sup> Te ni cacahān jiñ i:

Jeē cahān neé ró, achí.

Te máá i ñihin cáhñ i jeē máá de cúu. Yūcuán na te ni cacahān:

Ndajéhé yā jeē ndito Pedro cúu núu súcuan, áchí.

<sup>16</sup> Te víhyá gā cahān Pedro. Yūcuán na te ni canune i yéhyí, te ni canacuni i nuū de, te nahān ní canaa ni i cájito i.

<sup>17</sup> Te máá de ni sāha de ndaha de jeē ma cúvaā gā i, te ni castühún de ndese ni quenehen máá Jítoho yō de vecāa. Te ni cahān de:

Castūhun núū Jacobo jíin núū tāca gá hermano jeē ní quenehen ya ruhū vecāa, áchí de.

Te ní quenda de cuahān de inga lugar.

<sup>18</sup> Te nuū ní cundijin, te ní cacuvaā teyí soldado jeē tuá Pedro.

<sup>19</sup> Te ní ndacu Herodes jniñu jeē na nánducú váha i Pedro. Te tu ní cánanihīn i de, te nuū ní cuu ní stichí de soldado jíjnáhan, te ní ndacu de jniñu jeē na cúū. Yūcuán na te ní quenda Herodes Judea cuahān de ñuu Cesarea, te ní condee de yūcuán.

### *Jeē ní jhī Herodes*

<sup>20</sup> Te yōhō ní quīī ní rey Herodes nuū ñáyuū ñuu Tiro jíin ñuu Sidón. Te ñayuu un ní candajñuhún i jeē inuú-ni quāvícoo ndihi i nuū rey un. Te ní casáha i amigo i jíin Blasto, tēe cújéhu jéjníñu nuū rey un. Te ní cacahān ndahú i jíin de jeē na cáhān ndahú de jíin rey un jēe na ndēe ní de jíin i. Chi nde ñuu maá rey un cájeen i jeē cáyeje i.

<sup>21</sup> Te ní jeni Herodes ñn quivī. Te ní nucūhun de sahma yíñuhún de, te ní cucōo de mesa nuū ndácu de jniñu, te ní cahān de ñn jñuhun jehū ní cajini sōho i.

<sup>22</sup> Te ñayuu un ní caquejéé i cácahān jee i jñuhun yíñuhún jíin de:

Nasūu tēe-ni cúu ní, chí ñn yaā cúu ní, áchí i jíjnáhan i.

<sup>23</sup> Te máá hora un ní sáha-ni ñn ndajéhé máá Jítoho yō jeē ní jñi ñn cuehyī xeēn rey Herodes, te ní cayejei tñdācú de, te ní jihī de, chí ní sandúxí-ni de máa de te tu ní cáhān de jeē Yaā Dios cúu jeē cújéhu.

<sup>24</sup> Te ní jité gā jñuhun máá Jítoho yō, te cuehē ndasí ñáyuū ní cacandije i tācá-ni lugar.

<sup>25</sup> Te ní jñu jniñu jeē ní quindeca Bernabé jíin Saulo jeē cótecu ñayuu Judea. Te ní quendacoo de Jerusalén cuanungoo de Antioquía, te cándēca de Juan jeē suni nání de Marcos cuahān jíin de.

### *Jeē ní caquejéé Bernabé jíin Saulo caca cuu de nacani de jñuhun ya*

## 13

<sup>1</sup> Te mēhñu grupo ñayuu cácaandije ini ñuu Antioquía ní cahīyo tēe cástéén jíin tēe canacani jñuhun Yaā Dios, te cánani de Bernabé, Simón jeē suni nání de Negro, Lucio ñuu Cirene, Saulo, jíin Manaén tēe ní jehnu jíin inga Herodes jeē ní cuu gobernador Galilea.

<sup>2</sup> Te ñn quivī jeē cáhīyo ndite ní tēe yáha cáchiñuhún de nuū maá Jítoho yō, te ní cahān maá Espíritu Santo jíin de:

Cúni rī jeē sasñn ró Bernabé jíin Saulo na quíngoo de jniñu jeē ní jeni ri de, áchí yá.

<sup>3</sup> Yūcuán na te ní cajicān tahú ndite ní de, te ní casoó de ndaha de xinī Bernabé jíin Saulo, te súcuan ní catajī de ndíndúú tēe ún cuanacani de jñuhun nuū tāca ñayuu.

### *Jeē ní canacani Bernabé jíin Saulo jñuhun ya nde Chipre*

<sup>4</sup> Te ní sáha Espíritu Santo jeē íchi ñūū Seleucia cuangoo de. Te yūcuan ní quívicoo de ñn barco cuangoo de nde Chipre, ñuhun jeē íne sñn nuū ndúte.

<sup>5</sup> Te ní jinūcoo de ñuu Salamina nuū cájecuifñi barco, te ní canacani de jñuhun Yaā Dios ini tācá vehe i sinagoga jnáhan hebreo de. Te suni cuahān Juan chindéé ñáhán jíin de.

<sup>6</sup> Te ni cajica nuu de ní-ni Chipre nde ni jinūcoo de ñuu Pafos jeē suni íne nuū Chipre. Te yūcuan ní cajini de nuū ñin tēe hebreo nání Barjesús. Te tēe tásí cúu de, te cáhán stahú de jeē ñin tēe nácani jñuhun Yaā Dios cúu de.

<sup>7</sup> Te tēe tásí un jéjñíñu de nuū gobernador Sergio Paulo, te tēe ndíchí cúu gobernador ún. Te ni cana de Bernabé jíin Saulo jeē cúni nahín de jñuhun Yaā Dios.

<sup>8</sup> Te tēe tásí un suni nání de Elimas. Te ndúcú ndéyí de casi de jeē ma cándíje gobernador ún.

<sup>9</sup> Te Saulo jeē suni nání de Pablo, ni cunuú Espíritu Santo jíin de, te ni ndacoto vāha de nuū tēe tásí un.

<sup>10</sup> Te ni cahān de:

Tēe sāha jñíñu néé stahú ñáhán cúu ró, chi sēhe jexeén cúu ró te jési rō nuū táca jñíñu ndaā. Te tu jécuiñí rō jeē sáca núu ró síquí jñuhun ndaā maá Jítoho yō návāha ma cándíje ñayuu nuū yā.

<sup>11</sup> Te maá Jítoho yō stóho ya rohó vijna, te cucuáá ró jeē ma cóto ga rō niāndii jecu quiví, achí Pablo.

Te ni cunee-ni nuū tēe tásí un, te quéndāha quéhiyú de cuahān de ndúcú de ndé vé jñí ndaha de stéén ichi nuū de quinhun de.

<sup>12</sup> Yūcuán na te ni jini gobernador jeē súcuan ni cuu, te ni cándíje de jñuhun maá Jítoho yō, te náa ni de jíni sōho de jñuhun ya.

### *Jeē ní coyūcu Pablo jíin Bernabé Antioquía ndañúu Pisidia*

<sup>13</sup> Yūcuán na te ni quendacoo Pablo jíin Bernabé jíin Juan ñuu Pafos, te ni quívicoo de barco te cuangoo de ñuu Perge ndañúu Panfilia. Te yūcuan ní cusín Juan, te cuanhun de ñuu Jerusalén.

<sup>14</sup> Te ni quendacoo Pablo jíin Bernabé ñuu Perge cuangoo de, te ni jinūcoo de ñuu Antioquía ndañúu Pisidia. Te quiví ndétātu ní quívicoo de ini vehe ñi sinagoga, te ni cacucō de.

<sup>15</sup> Te ni cahu tutu ley yá jíin tutu ní catee tēe ni canacani jñuhun ya nde jenahán. Yūcuán na te tēe cácujeñhu ini vehe ñi sinagoga, vi-ni ni catají de tēe cahān jíin Pablo jíin Bernabé:

Amigo, núu íyó jñuhun cahān ni jéē stihví ni ni ñáyuu yāha, te cahān ní na cúni nahín i núu súcuan, achí de.

<sup>16</sup> Yūcuán na te ni ndocuiñí Pablo te ni sāha de seña jíin ndaha de jeē nahín-ni coo ñayuu ún, te ni cahān de:

Níhín jñáhan ñuu yō Israel jíin níhín tēe jeē suni cáchiñúhún ní Yaā Dios, cuni nahín ní jijnáhan ní.

<sup>17</sup> Maá Yáa Dios yohó ñáyuu Israel, ni nacāji ya jíi yō jijnáhan de. Te níni jéē cáyūcu tátú de ñuu Egipto, te ni sāha ya jeē ní nducuehē de. Yūcuán na te jíin poder maá yá ní quenehen ya de nación Egipto.

<sup>18</sup> Te uū xico cuiyā ni cajica de nuū ñúhun téhé, te ni jendeyí ni yā jíin de jeē ní castíví de.

<sup>19</sup> Te ni snāa yā uxā nación Canaán, te ni jēhe ya ñuhun un núu táca jíi yō cúu tahú de.

<sup>20</sup> Yūcuán na te ni jeni ya táca tēe ni candacu jñíñu nuū de nájñuhun cuñ ciento uū xico uxí cuiyā, nde quiví ní cotecu Samuel, tēe ni nacani jñuhun ya.

<sup>21</sup> Yūcuán na te maá ñáyuu un ní cajicān i ñin rey, te ni jeni Yaā Dios Saúl ni ndacu de jñíñu nuū i uū xico cuiyā. Te yucūn Benjamín sēhe Cis ni cuu Saúl.



22 Te ni quenehen ya jniñu Saúl, te ni jeni ya David ni cuu de rey nuū i. Te ni cahān cají yá jñūhun de: Cúsī ni rī jín David sēhe Isaí, chi sáha de tāca jéē cuní rī, achí yá.

23 Te cáhān gā Pablo:

Te sēhe yucūn David ni cacu Jesús, Yaā ní jeni Yaā Dios jeē jnáma ya yohó ñáyuu Israel, chi súcuan ni jejnūhun ya.

24 Te nde ná tu quejéé Jesús nacani ya jñūhun nuū ñáyuu, te ni nacani Juan jñūhun nuū tāca jnáhan ñuu yō Israel jeē na nácani ni i jeē stóo i cuēchi i, te cuandute i.

25 Te nuū cuácuyajni jeē cūu Juan, te ni cahān de: Cándētu ró jéē quíji Cristo, te jéni ní rō jeē ruhū cūu, te nasūu rí cūu. Chi quíji ya, te cújéhuu ndasí yá jeē ní ndijēn yá tu cújéhuu ri tava rī, achí de.

26 'Amigo jijnáhan ní, tāca níhín jéē cácuu yó sēhe yucūn Abraham jín tāca níhín jéē suní cándiso Iyo ní núu Yaā Dios, chi cúní Yaā Dios jeē na cúní yō jñūhun yáha jeē cáhān ndese jnáma ya yohó.

27 Chi tāca ñáyuu ñuu Jerusalén jín tāca tée cácujeñhu nuū i, tu ní cájecūhun ni i jeē Jesús cūu Cristo, Yaā ní jeni Yaā Dios jeē jnáma ya yohó. Te ndijnahan quivī ndétātu ní cajini sōho i jñūhun ni cacahu jeē ní catee tēe ni canacani jñūhun Yaā Dios nde jenahán. Te vēsú súcuan te tu ní cájecūhun ni i, te ni candonda i ni cacahān i jeē na cūu yā. Te súcuan ni casquícú i siquī tāca jñūhun jeē ní cacahān tēe ni canacani jñūhun ya nde jenahán.

28 Vēsú tu ní cániñi ni ñi cuēchi siquī yá jeē cūu yā, te ni cacahān níhin i jín Pilato jeē na cūu yā.

29 Te ná ni jīnu ni squícú siquī yá tāca jñūhun cáhān nuū tútu ñi, te ni casnúu de ya jicā cruz, te ni cachindūji de ya ñi yaū ní jete jicā cáva.

30 Te ní sáha Yaā Dios jeē ní natecu yá.

31 Te ñáyuu Galilea jeē ní jéngoo jín yá nde Jerusalén nde na técu yā, nuū maá i ni steén ndijin yá maá yá cuehē quivī ná ni natecu yā, te ñáyuu un cácuu jeē cánacani cají jñūhun ya nuū tāca gá jnáhan yó hebreo vijna.

32 Te maá ná jijnáhan ná cánacani ná jñūhun vāha yáha núu ni jijnáhan ní jéē súcuan ni jejnūhun ya nuū tāca jíi yō.

33 Te jñūhun yáha ní squícú Yaā Dios nuū maá yó jeē cácuu yó sēhe yucūn de, chi ni nastécu yá Jesús. Chi suhva cáhān salmo uū jeē cahān yá jín Sēhe ya Jesús: Máa ró cūu Sēhe ri, te vijna ni sajeñhu ri rohó jéē cūu ri Tatá rō, achí yá.

34 Te ni nastécu yá Sēhe ya Jesús návāha ma tehyú cuiti yá, chi suhva cáhān tutu ñi jeē ní cahān Yaā Dios nde jenahán: Te níhín maá ró tāca jéē vāha ni jejnūhun ri nuū David, achí.

35 Te suni súcuan cáhān inga salmo jeē ní tee David jñūhun jeē cahān Jesús jín Yāā Dios: Ma cuáha ni jñūhun tehyū ná, chi jéniñu ná núu ní te maní ni jín ná, achí.

36 Te David chi jíní yō jeē ní jejniñu de nuū ñáyuu ní cotecu de jín, nájnūhun ni cuni Yaā Dios. Te ni jihí de, te ni quindūji de nájnūhun ni quindūji tāca jíi yō, te ni tehyū de.

37 Te Jesús, Yaā ní nastécu Yaā Dios, chi tu ní téhyú cuiti yá.

38 Jeē yúcuan jini ñūhún jecūhun ni ní, amigo, jeē Jesús cūu Yaā cóne cáhuu ni nuū tāca cuéchi yó.

39 Chi ni canducú ní ndahva ni cuéchi ní jéē squícú ní ley jeē ni jéhe ya nuū Moisés, te tu ní cūu ndahvā cuéchi ní súcuan. Te Jesús cūu Yaā ndáhva ndihi cuéchi ñáyuu jeē cácandíje i tāca jéē ní sáha ya jehē i.

<sup>40</sup> Núu súcuan te coto ní jínáhan ní jéē ma ndóho ní táca castigo jeē ní cacahān tēe ni canacani jnūhun Yaā Dios nde jenahán, chí suhva ni cahān Yaā Dios:

<sup>41</sup> Táca róhó ñáyuu jeē casácatā, na cóto ró na castigo xeēn quiiji siquī rō, te naa ní rō coto ró, te cuu rō.

Chí tiempo maá ró te sáha ri jniñu xeēn

jeē ma cándíje cuiti rō jeē súcuan sáha ri vēsú nacani ñáyuu jnūhun un núu rō, achí yá.

Achí Pablo.

<sup>42</sup> Te ní quendacoo Pablo jíin táca jnáhan de vehe íi sinagoga jnáhan hebreo de. Te ñáyuu sñn nación ni cacahān ndahú i jíin de jeē inga quivī ndétátú nacani tucu de jnūhun yáha núu i.

<sup>43</sup> Te ní jitē ñáyuu un cuángoo i. Te cuehē ñáyuu hebreo jíin ñáyuu sñn nación jeē ní cacandíje sahān hebreo te cáchiñúhún i nuū Yaā Dios, cuangoo i jíin Pablo jíin Bernabé. Te ní cacahān nihin de jíin i jeē na cuñi nihin i jíin jnūhun jeē maní Yaā Dios jíin i.

<sup>44</sup> Te quivī ndétátú inga semana te je yajni ndíhi ñáyuu ñuu un ní candutútú i jeē cúni nahín i jnūhun Yaā Dios.

<sup>45</sup> Te nuū ní cajini tēe hebreo jeē ní candutútú cuehē ñáyuu, te ni cacucuésún ni de, te ni cacahān de jeē násūu jnūhun vāha cúu jeē steén Pablo, te ni cacahān neé de nuū Pablo.

<sup>46</sup> Yūcuán na te jéhnú-ni ni cacahān Pablo jíin Bernabé, achí de:

Cánuú jéē xíhna gā nuū maá ní jeē cácuu ní jnáhan ñuu yō hebreo nacani ná jnūhun Yaā Dios, te tu ní cájetáhú ní. Núu súcuan te cuēchi máá ní cúu jeē ma nihín tahú ní cotecu ni ní cáni. Te vijna te quinacani ná jnūhun ya nuū ñáyuu táca nación jeē tu cájini i jnūhun ya.

<sup>47</sup> Chí suhva ni ndacu máá Jítoho yō jniñu nuū na jíináhan ná:

Ni jeni ri rohó jéē cúu ró nájnūhun luz jeē steén ini anuá ñáyuu táca nación, chí ní ñáyivi stéén rō jnūhun ri nuū ñáyuu jeē jnáma ri i, achí yá.

Achí de.

<sup>48</sup> Te ñáyuu sñn nación, nuū ní cajini sōho i jnūhun yáha te ni cacusī teyí ni i. Te ni cacahān i jeē yōhyo vāha jnūhun cúu jnūhun máá Jítoho yō, te táca ñáyuu jeē ní nacāji Yaā Dios i jeē cótecu i ní cáni, ni cacandíje i.

<sup>49</sup> Te ní jitē jnūhun máá Jítoho yō cuahān ní región yūcuán.

<sup>50</sup> Te ñuu Antioquía cáyúcú ñahan cácuu nuū te cáchiñúhún ña Yaā Dios. Te tēe hebreo ni cascáhán de ña, te suni ni cascáhán de tēe cácujeñnu ñuu ún, te ní cajito xeēn i Pablo jíin Bernabé te nde ni cascúnu i de cuangoo de.

<sup>51</sup> Te ní cascóyo de ticachá jehé de jeē steén de jeē iyó cuéchi i. Te ní jinūcoo de ñuu Iconio.

<sup>52</sup> Te vēsú súcuan te ñáyuu cácuandíje un ní cunuú Espíritu Santo jíin i, te cácusī teyí ni i.

*Jeē ní coyūcu Pablo jíin Bernabé ñuu Iconio*

## 14

<sup>1</sup> Te ñuu Iconio ni quivicoo Pablo jíin Bernabé ini vehe íi sinagoga jnáhan de hebreo. Te jíin jnūhun jeē ní canacani de te ni cacandíje cuehē jnáhan de hebreo, te suni súcuan cuehē ñáyuu sñn nación ni cacandíje i.

<sup>2</sup> Te jnáhan de hebreo jeē tu ní cácuandíje, ni cascáhán de ñáyuu sñn nación, te ni cajeni ni i jeē násūu ñáyuu vāha cácuu ñáyuu cácuandíje.

<sup>3</sup> Te ni caquendōo Pablo jíin Bernabé yūcuan cuéhē gā quivī. Te jéhnun-ni ni canacani de jnūhun Jitoho yō, chí cácucahnu ni de ya jeē váha quihīn jniñu un sáha ya. Te máá yá chí ni steén yā jeē iyó ndáā jnūhun jeē yóhoyo váha ni yā jíin i jeē cánacani de, chí ni jēhe ya jeē sáha de jniñu jéhnun jeē steén jeē cujéhnun ya.

<sup>4</sup> Te ñayuu ñuu un ní cacusīn ni i jíjnáhan i, sava i jíin téé hebreo jeē tu cácdíje de Jesús, te sava ga i jíin téé apóstol.

<sup>5</sup> Te ñayuu hebreo jíin ñayuu sín nación jíin téé cácuu tohō ni casquíjnahan jnūhun jeē sáha xeēn jíin Pablo jíin Bernabé, jíin jéē cuáha yuū xinī de nuú.

<sup>6</sup> Te ni cajini de jeē súcuan cácuu sáha, te ni cajinu de cuangoo de nde ñuu Lистра jíin ñuu Derbe ndañuū Licaonia jíin táca ñuu yajni yūcuán.

<sup>7</sup> Te yūcuan ní canacani de jnūhun jeē jnáma ya yohó.

### *Jeē ní cajēhe i yuū xinī Pablo ini ñuu Lистра*

<sup>8</sup> Te ñuu Lистра néne iin téé jeē tu cúu caca, te tu jíca cuiti de chí nde quivī ní cacu de cácojō de.

<sup>9</sup> Téé un ní jíni sóho de jnūhun jeē cahán Pablo, te ni jito váha Pablo nuú de, te ni jíni de jeē cácdíje váha téé un jéé ndúváha de.

<sup>10</sup> Te ni cahán jee Pablo jíin de:

Ndocuñī, condichi rō, achí de.

Te ní scánda téé un máá de ní nucōndichi-ni de, te ní quejéé de caca de.

<sup>11</sup> Te ni cajini ñayuu ún jniñu jéhnun jeē ní sáha Pablo, te ní cacahán jee i jíin yuhu máá i jeē cúu yuhu Licaonia:

Ni cuun yaā ní quecoo nuú yō, te cájica nájñūhun cájica téé, achí i.

<sup>12</sup> Te ní cacahán i jeē Bernabé cúu yaā Júpiter, te Pablo cúu yaā Mercurio chí Pablo cúu téé nácani jnūhun.

<sup>13</sup> Te yajni yuñuū un néne veñūhun yaā Júpiter. Te máá sūtú jejniñu ini veñūhun un ní quihīn de stiquī jíjnáhan tí te ní scutú de tí ita te vēji de nde nuú quivī i yuñuū, te máá de jíin ñayuu ñuu un cácuu de cahni de stiquī un sóco de nuú Bernabé jíin Pablo nuú.

<sup>14</sup> Te Bernabé jíin Pablo, téé cácuu apóstol, ní cajito de jeē súcuan cácuu ñayuu un sáha i, te ní candatá de sahma de jeē steén de jeē castívi ndasí i jeē casáha i súcuan. Te ní quenendava de ní quivicoo de mēhñu ñayuu cuéhē ún, te ní cacana jee de:

<sup>15</sup> Tátā jíjnáhan ní, ma sáha cuiti ní súcuan, chí sáñá suni téé-ni cácuu ná nájñūhun máá ní jíjnáhan ní. Te vējicoo ná nacani ná jnūhun váha Yaā Dios nuú ní, chí cahán na jíin ní jeē ma sáha ga ní táca jniñu yáha jéé tu ndé jéjniñu cuiti, chí sa suhva na chíñúhún ní máá Yáā Dios, Yaā técu, Yaā ní sáha andívi jíin ñáyivī jíin ndute mar jíin táca gá jeē iyó ní cáhnu.

<sup>16</sup> Te nde jenahán ní jēhe ya jnūhun jeē na sáha táca ñayuu modo cácuu máá i.

<sup>17</sup> Te vēsú súcuan te ní ní stéén yā ndese Yaā cúu ya, chí máni sáha ya jniñu váha jíin yó, chí scúun ya saū, te sáha ya jeē cúu váha itu yō, te jēhe ya jeē jíni ñúhún yó náváha caji yō te coo sī ní yō, achí ndíndúú de.

<sup>18</sup> Te vēsú súcuan ní cacahán de, te yóhoyo uhū ní cajesí de nuú ñayuu un náváha tú socō i stiquī un núu de jeē chíñúhún i ndíndúú de.

<sup>19</sup> Yūcuán na te ní quecoo jecu téé hebreo ñuu Antioquia jíin ñuu Iconio, te ní cascáhan de ñayuu cuéhē ún, te ní cajēhe i yuū xinī Pablo. Te ní caquenehen i de yatā ñuū ún, chí ní cajeni ní i jeē jé ní jíhī de.

<sup>20</sup> Te téé cácdíje ní cacondúu de Pablo, te ní ndonda Pablo, te ní ndívi de ini ñuu. Te inga quivī ní quihīn de ichi cuahán de jíin Bernabé nde ñuu Derbe.

<sup>21</sup> Te ini ñuu un ní canacani de jñuhun jeē jñáma ya ñayuu, te ni cacandíje cuehē ñayuu ni casáha de. Te ni canandicó de cuanuhun de ñuu Listra jiín ñuu Iconio jiín ñuu Antioquía.

<sup>22</sup> Te ni cahije ga ni ñayuu cácandíje yūcuan ní casáha de. Te ni castíhví ni de i jeē na cuiñi ñihin i jiín jñuhun ya, chi ni cacahān de jeē niní quiji cuehē jñúndóho siquī yō te yūcuán na te jinū yō ñuu nuū ndácu Yaā Dios jniñu.

<sup>23</sup> Te tācá ñuu ni cajeni de tēe jéhu cándiso jniñu condito de ñayuu cácandíje. Te ni cahīyo ndite ní Pablo jiín Bernabé nuū yā, te ni cajicān tahú de, te ni cacahān de jiín máá Jítoho yō jeē na cóto ya ñayuu ún chi cácandíje i máá yá.

### *Jeē cuánuhun tucu Pablo jiín Bernabé ñuu Antioquía ndañūú Siria*

<sup>24</sup> Te ni cayāha de cuangoo de región Pisidia, te ni najinūcoo de región Panfilia.

<sup>25</sup> Te ni canacani de jñuhun ya ini ñuu Perge región Panfilia, te sáa te cuangoo de ñuu Atalia.

<sup>26</sup> Te yūcuan ní quívicoo de barco, te ni najinūcoo de ñuu Antioquía. Te ñuu yūcuan cúu nuū ní cajicān tahú ñayuu nuū Yaā Dios jehē de jeē na chindéé ñáhán yá de jeē quíngoo de nacani de jñuhun. Te ni jīnu jniñu, te ni najinūcoo de ñuu ún.

<sup>27</sup> Te nuū ní najinūcoo de yūcuán, te ni casáha de junta jiín ñáyuu cácandíje, te ni canacani de jñuhun tācá ndese cuehē jeē váha ni sáha Yaā Dios jiín de, chi ni jēhe ya jñuhun jeē suni candíje ñayuu tācá nación jeē tu ní cájini i jñuhun ya.

<sup>28</sup> Te ni caquendōo de yūcuan cuehē quivī jiín ñáyuu cácandíje.

### *Siqū junta ñuu Jerusalén*

## 15

<sup>1</sup> Yūcuán na te jecu tēe Judea ni quijicoo de ñuu Antioquía, te ni castéén de nuū tācá hermano jeē núu tu sáha i circuncidar, nájñuhun cáhán ley jeē ni jēhe ya nuū Moisés, te tú na modo cācu i.

<sup>2</sup> Te Pablo jiín Bernabé ni catejnáhan de jiín tēe ún, te tu ní cūndaā. Te jeē yūcuan ní candajnūhún de jeē quíngoo Pablo jiín Bernabé jiín jecu gā tēe cácandíje un ndé ñuu Jerusalén, te yūcuán ndajnūhún de siquī jñuhun yáha jiín tēe cácuu apóstol jiín tēe jéhu cándiso jniñu nuū ñáyuu cácandíje yūcuán.

<sup>3</sup> Te ñayuu cácandíje un ní canachuhun íchi i de. Te ni cayāha de ichi Fenicia jiín Samaria, te cánacani de jñuhun jeē suni ñayuu tāca gá nación jeē tu ní cájini i jñuhun ya, ni castóo i jniñu jeē tu íyó ndáā te ni cacandíje i Yaā Dios. Te yōhyo ni cacusī ni tācá hermano jeē ní canihīn de jñuhun jeē súcuan ni cacandíje ñayuu ún.

<sup>4</sup> Te ni najinūcoo de ñuu Jerusalén, te ñayuu cácandíje yūcuan jiín tēe apóstol jiín tēe jéhu cándiso jniñu nuū ñáyuu un, ní cacusī ni de jeē ní najinūcoo jñáhan de ún. Te Pablo jiín Bernabé ni canacani de tāca jñuhun ndese cuehē jeē váha ni sáha ya siquī jniñu jeē ní canacani de jñuhun ya.

<sup>5</sup> Te sava tēe grupo fariseo jeē cácandíje ni candocuiñi te ni cacahān:

Ñayuu sñn nación jeē cácandíje i Jesús, jini ñūhún jéē sáha i circuncidar nájñuhun casáha máá yó, te canúu ndacu yó jniñu nuū i jeē na squícu i ley jeē ni jēhe ya nuū Moisés, áchí.

<sup>6</sup> Te tāca tēe apóstol jiín tāca tēe jéhu cándiso jniñu nuū ñáyuu cácandíje, ni candutútú de junta návaha ndajnūhún de te sándaā de siquī jñuhun yáha.

<sup>7</sup> Te tãcã de ni cacahãn de ndese cãjeni ni de. Yũcuãn na te ni ndocuĩĩ Pedro, te ni cahãn de:

Hermano jijnãhan ní, je cãjini vãha ni jẽẽ je iyó tiempo jeẽ ní nacãji Yaã Dios sãña jẽẽ quihĩn na núũ ñáyuu s̃ĩn naciõn te nacani ná jnũhun nuũ i jeẽ jnãma ya i, nãvãha candije i Jesucristo.

<sup>8</sup> Te Yaã Dios chi jini yã ndese cãa ánuã ndihi ñayuu, te ni steén yã jeẽ jetáhú yá i, chi suni ni jẽhe ya Espiritu Santo nuũ i jijnãhan i, nãjnũhun ni jẽhe ya nuũ maá yó.

<sup>9</sup> Te inuú-ni sãha ya jiin yó jiin maá i, chi siquĩ jeẽ suni ni cacandije i jnũhun jeẽ jnãma ya i, te jeẽ yũcuan ní sãndoo ya anuã i nuũ tãca cuẽchi i.

<sup>10</sup> Te vijna ñnaun cãcuni ní ndacu ní jniñu jeẽ na squĩcu i ley un? Chi tu nũjnahan ni Yaã Dios jeẽ sũcuan. Chi cãcuni ní tee ní jniñu yĩ yãha siquĩ ñáyuu cãcandije ún, te ni tãca jii yõ tu ní cãcundeyĩ de squĩcu de, te ni maá yó.

<sup>11</sup> Chi sa suhva cãcandije yó jẽẽ jnãma ya yohó sũcuan-ni siquĩ jeẽ yóhyo vãha ni maá Jítoho yõ Jesús jiin yó, te suni sũcuan-ni jnãma ya maá i, nasũu siquĩ jeẽ squĩcu i ley un, áchi de.

<sup>12</sup> Yũcuãn na te tẽe cuẽhẽ un ní cacuu nayúú de, te ni cajini nahĩn de jnũhun cãcahãn Bernabé jiin Pablo. Chi ni cacastũhũn de jeẽ ni jẽhe ya poder jeẽ ní casãha de tãcã jniñu jẽhnu jeẽ steén jeẽ cujẽhnu ya, ni cajito ñayuu tãcã naciõn jeẽ tu cãjini i jnũhun ya.

<sup>13</sup> Te nuũ ni jinu ni cacahãn Pablo jiin Bernabé, te ni cahãn Jacobo:

Hermano jijnãhan ní, cuni sõho ní na cãhãn na.

<sup>14</sup> Ni nacani Simõn Pedro jnũhun ndese ni quejẽẽ nuũ jniñu jeẽ jnãma Yaã Dios ñayuu tãcã naciõn jeẽ tu cãjini i jnũhun ya, chi suni mẽhñu maá i nacãji ya ñayuu jeẽ ndũu i ñayuu maá yá.

<sup>15</sup> Te quijnãhan jnũhun ni cahãn de yãha jiin jnũhun ni catee tẽe ni canacani jnũhun Yaã Dios nde jenhãn jeẽ yosó nuũ tutu iĩ:

<sup>16</sup> Achí Yáã Dios:

Nãjnũhun ni cotúú vehe David cúu jeẽ tuã ndãcu sẽhe yucũn de jniñu, nãjnũhun ni ndacu maá de jniñu nde jenhãn.

Te iin quivĩ te ndee rĩ

te jeẽ nasãha ri vehe de cúu jeẽ sãha ri jeẽ nandacu Sẽhe yucũn de jniñu.

<sup>17</sup> Sũcuan sãha ri nãvãha tãca gã ñayuu na nãnducú i ruhũ

nde jiin ñáyuu tãcã naciõn jeẽ tu cãjini jnũhun ri, tãcã i jeẽ cána ri i candije i ruhũ.

<sup>18</sup> Sũcuan cãhãn maá Jítoho yõ, te nde jenhãn ní steén yã jnũhun yãha núũ ñáyuu.

Achí tutu iĩ.

<sup>19</sup> Jeẽ yũcuan jeni ni na jẽẽ ñáyuu tãca gã naciõn jeẽ ní castóo i jniñu jeẽ tu iyó ndãã te ni cacandije i maá Yáã Dios, ma stãhãn yõ i jeẽ ndãcu yó jniñu jeẽ squĩcu i ley Moisés.

<sup>20</sup> Chi sa suhva na tẽe yó carta quihĩn nuũ i jeẽ ma cãji i ndeyu jeẽ ni sócõ nuũ ídolo, te ma cãca jnení i, te ma cãji i cũñu quiti jeẽ jihí jeẽ tu jéti niĩĩ tĩ, te ni ma cãji i niĩĩ.

<sup>21</sup> Jnũhun yãha-ni tee yó quihĩn nuũ i nãjnũhun je cãstéén nde jenhãn. Chi nde jenhãn je iyó tẽe cãstéén jnũhun ley jeẽ ni jẽhe ya nuũ Moisés, te ndijnahan quivĩ ndétãtu cãcahu de ley un ini vehe iĩ sinagoga tãcã ñuu, áchi Jacobo.

22 Yūcuán na te tēe apóstol, jíin tēe jéhnū cándiso jníñū, jíin ndivii ñayuu cácañdije, ni cacundaā ni de jeē nácāji de tēe quingoo jíin Pablo jíin Bernabé nde ñuu Antioquía. Te tēe ni canacāji de un cácuu Silas jíin Judas, te inga sihví de cúu Barsabás. Te cándiso jníñū de nuū tācá hermano cácañdije.

23 Te ni cajendēca de carta jeē cahán suhva:

Máa ná cácuu tēe apóstol, jíin táca tēe jéhnū cándiso jníñū nuū ñayuu cácañdije, jíin táca gá hermano yō. Te cátee ná carta yáha cuájeē nuū ni jíináhan ní, hermano, jeē cácuu ní ñáyuu sáin nación jeē cáyūcu ní ñuu Antioquía jíin Siria jíin Cilicia. Cuandeyí ni ni jíináhan ní.

24 Ni cajini jnūhun ná jēē ní quendacoo sava jnáhan ná yáha ní jengoo nuū ní, te jíin jnūhun jeē ní cacahán de te ni casáha jeē ní canacani ndasi ni ní, te ni cacuxii ní ní, chi cándacu de jniñū jeē sáha ní circuncidar jíin jēē squícu ní jniñū cáhan ley jehán jēē ni jéhe ya nuū Moisés. Te nasūu sáña ní cátaji tēe un jēē jeé de nuū ní.

25 Jeē yúcuán ní cajeni ni ná, te inuú-ni ni cacundaā ni ná, te ni nacāji ná tēe cuajēcoo nuū ni jíin úu hermano yō jeē maní yō jíin, cúu Bernabé jíin Pablo.

26 Te ndindúú de je ni catana de máa de nuū jnundóho vesú na cúu de jeē siquí jnūhun Jitoho yō Jesucristo.

27 Núu súcuán te cátaji ná Judas jíin Silas jeē nuū ní, te suni nájnūhun cáhan carta yáha suni súcuán castūhún de nuū ni jíináhan ní.

28 Chi máa Espíritu Santo ni steén yā in modo jeē ní cacundaā ni na jēē ma tēe ná táca jniñū yí ley Moisés siquí ní, chi máa-ni jniñū yáha jēē cánuú gá:

29 Ma cáji ní táca jēē ní casocō nuū ídolo, ni ma cáji ní níñi ni quiti jeē jihí jeē tu jéti niñi tī, te ma cáca jnéni ní. Te vāha squícu ní núu tuá sáha ní táca jēē yáha. Súcuán na cóo te sándeýí ni ní, áchí carta.

30 Yūcuán na te tēe quingoo un cuángoo de nde ñuu Antioquía. Te ni cacana de xiní ñáyuu cácañdije ni candutútu de junta, te ni cajēhe de carta un núu í.

31 Te ni cacaha í, te ni candusí ni i jeē ni níñi i jnūhun ndeyí ni nuū carta ún.

32 Te suni tēe cáncani jnūhun Yaā Dios cácuu Judas jíin Silas, te jíin cuéhé jnūhun ni cacahán de te ni candundeyí ni tācá hermano un, te ni cahije ga ni i jíin jnūhun ya.

33 Te ni coyúcú de yūcuán jecu quiví. Yūcuán na te hermano yúcuán ní canacuatáhu i nuū de jeē quinhun de nuū tēe jeē ní cataji de.

34 Te Silas ni nujnahan ni de ni quendōo de yūcuán.

35 Te suni ni caquendōo Pablo jíin Bernabé ñuu Antioquía, te máa de jíin sava ga tēe ni castéén de te ni canacani de jnūhun vāha máa Jitoho yō.

### *Jeē quihín Pablo inga jínu nacani de jnūhun ya*

36 Te ni cuu ga quiví, te ni cahán Pablo jíin Bernabé:

Vijna te na quícondēhe yó tācá hermano yō ndijnahan ñuu nuū ní nacani yó jnūhun máa Jitoho yō, na cóndēhe yó ndese cáhiyo í, áchí de.

37 Te Juan jeē suni nání de Marcos, cúní Bernabé jeē quihín tēe un jíin de.

38 Te tu ní cúní Pablo jeē quihín tēe un jíin de, chi nde Panfilia ni cusín Marcos nuū Pablo jíin Bernabé, chi tuá ni chindéé ñáhan de ndindúú tēe un siquí jniñū ya nde saá.

39 Te nahán ní candajnūhun Pablo jíin Bernabé, te tu ní cacundaā ni de siquí Marcos, te ni cacusín de. Te Bernabé ni jeca de Marcos, te ni quívicoo de barco cuangoo de nde Chipre, ñuhun jeē íne sáin nuū ndúte.

40 Te Pablo ni nacāji de Silas quihīn jīn de. Te tācá hermano cácanđije ni cajicān tahú de nuū maá Jítóho yō jeē siquī jeē váha ni yā te na chindéé ñáhán yá Pablo. Te cuahān Silas jīn Pablo.

41 Te ni cajica cuu de ñí Siria jīn Cilicia. Te tāca grupo ñayuu cácanđije ni cahije ga ni i jīn jnūhun ya ni casáha de.

### *Jeē cuahán Timoteo jīn Pablo jīn Silas*

## 16

1 Yūcuán na te sáa te ni jinū Pablo jīn Silas ñuu Derbe jīn ñuu Listra. Te yūcuan néne ĩn tēe suchí cándije, nání i Timoteo. Sēhe yí ĩn ñahan hebrea cúu i, te ñahan cándije cúu ña. Te tátá i chi tēe griego cúu de.

2 Te tācá hermano ñuu Listra jīn ñuu Iconio cájejnūhún de Timoteo.

3 Te cúní Pablo condeca de Timoteo quihīn de jīn i. Te ni cahān Pablo jeē quihīn i cuu i circuncidar, chi tu cúní Pablo jeē cahān ñayuu hebreo jeē tu ní squícu Timoteo costumbre un, chi ndihí ñayuu cájini i jeē tēe griego cúu tátá i.

4 Te tācá ñuu nuū cuángoo de te ni cacastūhun de nuū ñayuu cácanđije jeē na squícu i máá jniū jeē ní casándaā tēe apóstol jīn táca tēe jēhnu cáyūcú ñuu Jerusalén jeē cándiso jniū nuū ñayuu cácanđije.

5 Te ñayuu cácanđije ni cahije ga ni i. Te ndijnahan quivī ni cacandije cuehē gā ñayuu.

### *Jeē ní jito ndijin Pablo ĩn tēe ñuu Macedonia*

6 Te tu ní jēhe Espíritu Santo yā jnūhun jeē nácani de jnūhun ya ní Asia. Jeē yūcuan ní cayāha de ichi Frigia jīn Galacia cuangoo de.

7 Te ni jinūcoo de nuū quijnáhan Misia jīn Bitinia. Te cácuni de quingoo de Bitinia, te máá Espíritu Jesús tu ní jēhe ya jnūhun quingoo de.

8 Te ni cayāha de ĩn lado Misia cuangoo de ñuu Troas jeē íne yajni yumar.

9 Te ĩn jecuáa te nájñūhun ĩn jēni ní jito ndijin Pablo, te ní jito de jeē índichi ĩn tēe ñuu Macedonia nuū de cáhán ndahú jín de: Nehen ní ñuu ná Macedonia te chindéé ñáhán ní sãña jijnáhan ná, áchí.

10 Te sūcuan ní jito ndijin de. Yūcuán na te sãña, Lucas, ni quijnáhan ná jín de. Te ni casátūhva ná jín de jijnáhan de jeē quingoo ná Macedonia, chi ni cajini cají ná jeē maá Yáa Dios tájí yá sãña jijnáhan ná jēe castūhun ná nuū ñayuu yūcuan jnūhun jnama ya i.

### *Jeē ní coyūcu Pablo jīn Silas ñuu Filipos*

11 Te jín barco ni quendacoo ná ñuu Troas, te cuangoo ndaā-ni ná ndé Samotracia, ñuhun jeē íne sñn nuū ndúte. Te inga quivī ni jinūcoo ná ñuu Neápolis.

12 Te yūcuan ní quendacoo ná, te ni jinūcoo ná ñuu Filipos jeē cúu ñuu cuyēhnu ga íne Macedonia, chi máá ñayuu ñuu Roma ni casáha i ñuu i ún. Te ni coyūcu ná ñuu Filipos jecu quivī.

13 Te ĩn quivī ndétātu ní quendacoo ná ñuu ún, te ni jengoo ná ĩn yuyúte, chi yūcuan cúu ĩn lugar nuū cájicān tahú ñayuu. Te ni cacucōo ná, te ni canacani ná jnūhun ya nuū tācá ñahan ní canataca yūcuán.

14 Te ĩn ña nání Lidia jeē véji ña ñuu Tiatira, xico ña sahma ndihí jēe yáhu ga ndeé. Te máá ña níni chíñūhún ña Yaā Dios. Te ní jini sōho ña jnūhun cáncani ná, te máá Jítóho yō Jesús ni sáha ya jeē ní candije ña jnūhun jnama ya ña jeē ní cahān Pablo.

15 Te ni jendute ña nde jíin ñáyuu cáyūcú vehe ña, te ni cahān ndahú ña jíin ná:

Núu cácucahnu ni ní jéē candíje ndije ná máá Jítóho yō, te cuajeē ní coyūcu ní vehe ná, áchí ña.

Te ni cana fuerza ña sãña jíjnahan ná.

16 Te ñin quiví te cuango tucu ná suu lugar nuū jéngoo ñayuu cájicān tahú. Te ni canajñahan ná jíin ñin sūchi síhí jéē ñūhun tachí ini i, te máá un sáha jeē cahán i táca ndese coo te cūndaā jeē cahán i. Te sūchí un ní cajeen patrón i, návaha nihīn de cuehē xūhun síquī jeē cástūhún i nuū ñin ñin ñayuu ndese coo ichi núu.

17 Te sūchí un ndíquín i sãña jíjnahan ná cána jee i:

Tēe yáha cájejniñu de nuū Yaā Dios, Yaā cujénu téyí, te cácastūhún de ndese cácu ní núu cuéchi ní jíjnahan ní, áchí i.

18 Te cuehē quiví ní cuu súcuan te nde ni jnaniní ni Pablo. Te ni ndió cóto de nuū i, te ni cahān de jíin táchí ún:

Jíin poder maá Jesucristo ndácu ri jniñu nuū rō jeē na quénda ró ini i quihīn rō, achí de.

Te hora un ní quenda-ni cuahān.

19 Yūcuán na te ni cajini patrón i jeē ma níhín gā i xūhún cuu de, te jeē yúcuán ní cajni de Pablo jíin Silas cuango jíin de nde vehe juzgado nuū cáyūcu tóhō.

20 Te ni cajeen ún de nuū juez, tēe cásañdaā jniñu, te ni cacahān:

Tēe hebreo cácuu tēe yáha, te cástóna de ñayuu ñuu yō cúvaā i.

21 Te cájequin de inga costumbre jeē ma cúu cuatáhú cuiti yō, ní ma cúu sáha yó, chí tu jéhe ley nación yō jñūhun, chí ñayuu nación Roma cácuu yó, áchí.

22 Te suni ní candonda ñayuu síquī Pablo jíin Silas. Te tēe cácuu juez ní candacu de jniñu jeē na quénda sahma ndindúú de te caní yujnu síquī de.

23 Te nuū ní jínu ní cacani téyí un de, te ní casquíví de vecāa. Te ní candacu jniñu nuū tēe ndíto vecāa jeē na cóndito ndasí de jeē ma cácu ndindúú tēe ún.

24 Te jeē súcuan ní tahū jniñu nuū tēe ndíto vecāa te ní squíví de Pablo jíin Silas nde ichi íni gā, te ní squíví jehē de t̄isin yujnu ndéé yaū te ní cajihni de.

25 Te nuū ní cuu sava ñuú, te cájicān tahú Pablo jíin Silas, te cájita de yaa íi nuū máá Yáā Dios. Te ñayuu cáhīn jíin de vecāa un ní cajini nahín i.

26 Te sanaa-ni te ní jñā nihin téyí, te nde nuū cimiento vecāa un ní canda. Te ní canune-ni yéhyí vecāa ún, te ní canandajī-ni cadena jeē cánuhní táca ñáyuu ún.

27 Te ní natahū ní tēe ndíto vecāa, te ní jito de jeē núne yéhyí vecāa ún. Te ní tava de espada jeē cáhni de máá de núu, chí ní jeni ní de jeē ndívii cuiti ñayuu cáhīn vecāa un cuángoo i.

28 Te ní cana jee Pablo:

Ma cáhni ní máá ní, chí cáhīn ndihí ná, áchí de.

29 Yūcuán na te máá tēe ndíto vecāa ní cana de jeē na quíndeca i ñūhūn, te yachí ní quíví de ini vecāa. Te ní jecuiñí yití de nuū Pablo jíin Silas, te quísi i de jeē yūhú de.

30 Te ní quenehen de Pablo jíin Silas, te ní cajnūhún de:

Tátā, ¿na vé cánuú sáha ná te jnama ya sãñá? áchí de.

31 Te ní cacahān de jíin tēe ún:

Candíje ní táca jéē ní sáha Jítóho yō Jesucristo jehē ní te cācu ní, te suni súcuan cácu ndihí ñayuu cáyūcú vehe ní, áchí de.



32 Te ni canacani de jñuhun máá Jítóho yō nuū tēe un jíin núū táca ñáyuu cáyúcú vehe de.

33 Te suu máá jecuáā yúcuan ní nacate tēe ndító vecāa un núū ní catuji Pablo jíin Silas jeē ní cacani yujnu siquí de. Yūcuán na te ni jendute de jíin ndihi ñáyuu cáyúcú vehe de.

34 Te ni jeca de Pablo jíin Silas cuahān de jíin vehe de, te ni jēhe de staā ni cayejí de, te cácusii ni ndihi de vehe de jeē ní cacandíje de Yaā Dios.

35 Te nuū ní cundijin, te tēe cácuu juez ni catají de policía cuango jíin jñuhun jeē na siáá tēe ndító vecāa un Pablo jíin Silas quingoo de.

36 Te tēe ndító vecāa un ní castühún de jñuhun yáha núū Pablo:

Tēe cácuu juez ni catají de jñuhun vēji jeē na siáá na níhn quingoo ní. Núu súcuan te quendacoo ní quíhín ní, te cuandeyí ní ní, áchí de.

37 Te ni cahān Pablo jíin policía:

Cuehē ñayuu ni cajito i jeē ní cacani de sañá, te ni tu ní casāndaā de xīhna gā núu ndaā jeē iyó cuéchi ná. Te ni cachuhun de sañá vecāa, vēsú cácuu ná séhe nación Roma, te iyó ley jeē ma cúu sáha súcuan jíin ñáyuu cácuu séhe nación Roma. Te vijna ¿á quenehen sáhi de saña cácuu de naún? Ma cúu cuiiti. Na quícoo máá de quenehen de saña jíin náhan ná, áchí Pablo.

38 Te ni canandió cóo policía ni castühún de jñuhun yáha núū tēe cácuu juez, te ni cayūhú de jeē ní cajini sōho de jñuhun jeē séhe nación Roma cácuu Pablo jíin Silas.

39 Te ni quecoo tēe cácuu juez ún, te yōhoyo ni cacahān ndahú jíin Pablo jíin Silas jeē na cóne cáhnu ni de. Te ni caquenehen de vecāa ún, te ni cacahān ndahú jíin de jeē na quéndacoo de ñuu un quingoo de.

40 Yūcuán na te ni quendacoo de vecāa, te ni jengoo tucu de vehe Lidia, te ni cacahān de jñuhun ndeyí ní jíin táca hermano. Te ni caquihin de ichi cuango de.

### *Jeē ní cacuvaā ñayuu Tesalónica*

## 17

1 Te Pablo jíin Silas ni cayāha de ñuu Anfípolis jíin ñuu Apolonia cuango de, te ni jinūcoo de ñuu Tesalónica nuū iyó ñin vehe ii sinagoga jñahan de hebreo.

2 Te ni coyúcú de yúcuan únī semana, te táca quívī ndétātu jéhén Pablo vehe ii sinagoga, nájñuhun sáha sáha de, te ni nacani de jñuhun ya nuū tēe un.

3 Te jíin jñuhun cáhán tutu ii ni steén de jeē súcuan ni jini ñúhún ndoho Cristo jeē cúu yā te natecu yā. Te ni cahān de:

Jñuhun nácani ná núu ni cúu jñuhun Jesús, te máá yá cúu Cristo, Yaā ní jeni Yaā Dios jeē jnáma ya yohó, áchí de.

4 Te ni cacandíje sava jñahan de hebreo jíin cuéhē ñayuu griego jeē cáchiñúhún i Yaā Dios, jíin cuéhē ñahan cácuu nuū, te ni nduu ñnuú ní i jíin Pablo jíin Silas.

5 Yūcuán na te yōhoyo ni cacucuésun ni jñahan de hebreo jeē tu cacandíje, te ni castúrú tēe cunéé jēé cájica cúxí-ni, te ni quejéé cácana ndee cuango. Te súcuan ni casaca núu de xínī ñáyuu ñuu ún. Te ni jengoo de vehe Jasón cánuanducú de Pablo jíin Silas jeē jñi de tēe un quíndeca de nuū ñáyuu cuehē.

6 Te tu ní cánanihín de, te ni cañuhun de Jasón jíin sava ga hermano cuango de jíin núu tohó ñuu ún. Te jeē siquí Pablo jíin Silas ni cacana jee de:

Tēe jeē castívi xínī ñáyuu ní ñáyiví, je ni quecoo de nde yáhá.

<sup>7</sup> Te máá Jasón ni jēhe núu vehe cáyūcu tēe ún. Te tēe ún tu cájetáhú de ley maá rey yohó ñáyyu Roma, chí sa suhva cácahān de jeē cájetáhú de nuū inga rey jeē naní Jesús, achí de jíjnāhan de.

<sup>8</sup> Te ñayuu jíjn tēe cácuu tohō ni cajini sōho i jñūhun yáha, te ni cacuvaā i siquī.

<sup>9</sup> Te Jasón jíjn táca gá hermano ni castóo de xūhún de, chí ni cacahān tohō un jíjn de jeē nde núu tají de Pablo jíjn Silas quingoo de inga ñuu, yūcuán na te nacuaāha tohō un xūhun de. Te súcuan te ni casiáá de Jasón jíjn táca gá hermano cuangoo de.

### *Jeē ní coyūcu Pablo jíjn Silas ñuu Berea*

<sup>10</sup> Yūcuán na te tǎcá hermano un, yachī-ni ni cascáca de Pablo jíjn Silas jecuāā un, cuángoo de nde ñuu Berea. Te nuū ni jíjnūcoo de yūcuán, te ni quívicoo de vehe íi sinagoga jnāhan ñuu de hebreo.

<sup>11</sup> Te jnāhan ñuu de hebreo cáyūcu yúcuan, vāha ga ni maá de vēsú jnāhan ñuu de hebreo cáyūcú ñuu Tesalónica, chí vāha ni cacusií ni de jíjn jñūhun ni cacahān Pablo jíjn Silas. Te ndijnahan quivī cánanducú yúcún de nuū tútu íi núu súcuan cáhán chí tuú.

<sup>12</sup> Jeē yúcuan ní cacandíje cuehē jnāhan ñuu de hebreo te suni nde jíjn cuéhē ñayuu griego, cúu tēe cúu ñahan cácuu nuū.

<sup>13</sup> Te jnāhan ñuu de hebreo cáyūcú ñuu Tesalónica ni cajini jñūhun de jeē suni nde ñuu Berea nácani Pablo jñūhun Yáa Dios, te ni caquihin de ichi cuangoo de Berea, te suni yúcuan ní castónda de ñayuu siquī Pablo.

<sup>14</sup> Yūcuán na te tǎcá hermano ni catajī-ni de Pablo cuahān de nde yumar. Te ni ndōo Silas jíjn Timoteo ñuu Berea.

<sup>15</sup> Te jecu hermano ni cajendēca de Pablo nde ñuu Atenas. Te ni cahān Pablo jíjn de jeē cahān de jíjn Silas jíjn Timoteo jeē na quíngoo yachí de nuū Pablo. Te vendicoo de ñuu Berea.

### *Jeē ní íne Pablo ñuu Atenas*

<sup>16</sup> Te níní ndétu Pablo jeē jinúcoo Silas jíjn Timoteo nuū de ñuu Atenas, te ni jini de jeē ñáyyu ñuu ún yōhyo cáchiñúhún i ídolo, te ni nacani cuíhyá ni de.

<sup>17</sup> Te ini vehe íi sinagoga ni cahān de jñūhun ya jíjn jnāhan ñuu de hebreo jíjn táca gá tēe cáchiñúhún Yáa Dios. Te suni táca quivī ni nacani de jñūhun ya nuū táca ñáyyu cáhīn nuū yáhu.

<sup>18</sup> Te sava tēe cáscuáha jñūhun jeē castéén grupo epicúreo, jíjn inga sava tēe cáscuáha jñūhun jeē castéén grupo estoico, ni caquejéé cácahān jíjn Pablo. Te sava ni cacahān:

¿Na jñūhun cáhán tēe tǎlólhlé yáha? áchí.

Te sava ga de ni cacahān:

Tēe nácani jñūhun táca yáa jeē tu cánevāha yó cúu de, áchí.

Súcuan ni cacahān de, chí nácani Pablo jñūhun vāha Jesús jeē ní natecu yā mēhñu ndíyi.

<sup>19</sup> Te ni cajeca de Pablo cuangoo de, te ni jinúcoo de nde lugar nuū naní Areópago nuū cándutútú ñáyyu cándacu jniñu, te ni cacahān de:

Cácani ná cachi ni núu na jñūhun jeé jéē steén ni.

<sup>20</sup> Chí cáhán ni jñūhun jeé ná tu cuni cuiti na jíjnāhan ná, te jeē yúcuan cácani ná jecūhun ni na siquī táca jñūhun yáha, áchí jíjn de.

<sup>21</sup> Chí táca ñáyyu ñuu Atenas jíjn táca ñáyyu inga ñuu jeē cáyūcu núu i yūcuán, tuá na inga jniñu cácusíi gá ni i jíjn chí máa-ni jeē cuni nahín i jñūhun jeé chí jéé cahán i jñūhun jeé.

<sup>22</sup> Te índichi Pablo mēhñu ñáyuu ní candutútú núu naní Areópago, te ni cahān de:

Tēe ñuu Atenas jijnāhan ní, jito ná jēe yóhoyo cáchiñúhún ní yaā maá ní.

<sup>23</sup> Chi ni jica nuu ná, te ni jecondēhe ná nuū jeē cáchiñúhún ní, te ni jito ná ñn altar jeē yosó jnūhun yáha: Yáha cúu altar yaā jeē ná tu cuni yō jnūhun ya, achí. Te máa Yāa un jēe cáchiñúhún ní, vesú ná tu cuni ní jnūhun ya, suu jnūhun Yaā un cúu jeē nácani ná núu ní vijna.

<sup>24</sup> Chi Yaā un cúu Yaā jeē ní sáha ñayiví jíin táca ndihi jeē iyó, te máa yá cúu Jitoho andiví jíin ñáyiví, te tu ndéé yá ñni veñūhun cásáha ñayuu.

<sup>25</sup> Te ni tu cúmani ní ñn nuū yā jeē cuáha ñayuu nuū yā, chi máa yá sáha jeē técu ñayuu, jíin jēe stáa i tachí i, jíin jēe nihín i ndihi jeē jíni ñúhún i.

<sup>26</sup> Te ni sáha ya jeē chíji ñn-ni yucūn ni tahū táca ñayuu jeē ní nduu táca nacióon, nāvāha coyūcú i ní cáhnu ñayiví, te ni tana yā cuiyā cotecu ñayuu jíin lugar coyūcú i jijnāhan i.

<sup>27</sup> Te súcuan ní sáha ya chi cúni yā jeē nanducú yó yā, chi núu nanducú yó yā te cuni yō jeē iyó yá, chi yajni-ni cúu ya jíin ñn ñn yó.

<sup>28</sup> Chi máa yá sáha jeē iyó yó jíin jēe cátecu yō jíin jēe cácada yō. Chi suni súcuan ní cacahān sava tēe ñuu ní jēe cátava yaa: Suni nde yucūn máa yá cácuu yó, áchí.

<sup>29</sup> Te núu yucūn Yaā Dios cácuu yó, te ma cáni ní yō jeē ídolo oro chí plata chí yūu cúu ya, chi cájeni ní ñayuu jeē súcuan cáa ya, te súcuan cásávāha i ídolo.

<sup>30</sup> Te ni jendeyí ní yā siquí jeē tu ní cájecūhun ní i ní ndé saá, te vijna chí ndácu ya jniñu jeē ñayuu ní cáhnu ñayiví na nácani ní i jeē stóo i cuēchi i.

<sup>31</sup> Chi Yaā Dios, je ní jeni ya quiví jeē ndaā sándaā yā siquí ñayuu ñayiví, te ní jeni ya Jesús jeē máa yá sándaā. Te je ní steén cají Yaā Dios nuū táca ñayuu jeē máa yá ní jeni Jesús, chí ní nastécu yā Jesús, achí Pablo.

<sup>32</sup> Te jeē ní cajini sōho i jnūhun jeē nátecu ndīyí te sava i ní cacahān catá i, te sava ga i ní cacahān i:

Vāha te núu cuu cuni sōho na jnūhun cáhán ní ndé inga jínu, áchí i.

<sup>33</sup> Te ni quenda Pablo mēhñu ñáyuu un cuahān de.

<sup>34</sup> Te cuahān jecu ñayuu jíin Pablo, te ni cacandije. Te ñn de cúu Dionisio, tēe ndútútú jíin tēe cácujeñu cásáha junta nuū naní Areópago, jíin ñn ñahan naní Dámaris, jíin jecu gā i.

*Jeē ní ñne Pablo ñuu Corinto*

## 18

<sup>1</sup> Yūcuán na te ni quenda Pablo ñuu Atenas, te cuahān de nde ñuu Corinto.

<sup>2</sup> Te yūcuán ní jito de nuū ñn jnāhan ñuu de hebreo, naní Aquila, te tēe región Ponto cúu de. Te saá jecu-ni tiempo ní quee de jíin ñasihí de Priscila jeē ní quenda de Italia, chí rey Claudio ní ndacu de jniñu jeē na quéndacoo táca ñáyuu hebreo ñuu Roma, jeē cúu capital Italia. Te ni jinū Pablo vehe Aquila jíin Priscila jeē cáyūcú de ñuu Corinto.

<sup>3</sup> Te suni jniñu sáha tēe un sáha Pablo, chí cáquicu de ññ cuu vehe. Te ni quendō Pablo jíin tēe ún, te ní casájniñu de.

<sup>4</sup> Te táca quiví ndétātu ní jehēn Pablo vehe ñi sinagoga ní nacani de jnūhun ya, te ní nducú ndéyí de jeē na cándije ñayuu jnūhun Jesús, cúu jnāhan ñuu de hebreo jíin ñáyuu táca nacióon jeē tu ní cájini i jnūhun ya.

<sup>5</sup> Te ní jinūcoo Silas jíin Timoteo ñuu Corinto jeē véjicoo de nde Macedonia. Yūcuán na te tuá na inga jniñu ní sáha Pablo, chí máni jnūhun ya nácani cají

de nuū ñáyuu cácuu jnáhan de hebreo, jeē maá Jesús cúu ya Cristo, Yaa jeē cáñuhun ní i quiji ya.

<sup>6</sup> Te ní caquejeé i ní cacahán i síquī jnúhun ún, te ní cacahán xeēn i nuū Pablo. Te maá de ní caja de sahna de jeē cúu seña jeē stóo de i jíin cuéchi i, te ní cahán de jíin i:

Cuéchi maá ní cúu jeē jnahnū ndetū ní núu súcuan, te nasūu cuéchi maá ná cúu. Nde vijna te quihín na núu ñáyuu táca nación jeē tu cájini i jnúhun ya, te nacani ná jnúhun ya nuū i, áchí de.

<sup>7</sup> Te ní quenda de ini vehe ñi sinagoga, te ní jinū de vehe ñin tēe nání Justo ní condee de. Te chíñúhún tēe un Yaa Dios, te vehe tēe un néne yajni xiin véhe ñi sinagoga.

<sup>8</sup> Te Crispo, tēe cújéhuu ñni vehe ñi sinagoga, ní candíje de maá Jítoho yō nde jíin ndíhi ñayuu vehe de. Te cuehē ñayuu ñuu Corinto ní cajini nahín i jnúhun nácani Pablo, te ní cacandíje i, te ní cajendute i.

<sup>9</sup> Te ñin jecuáa ní sáha maá Jítoho yō jeē ní jito ndijin Pablo yā ní cahán yā jíin de:

Ma yūhu ró ní ma cási rō yuhu ró, chí níni nacani ró jnúhun ri.

<sup>10</sup> Chí ndító ri rohó, te ma cúu sáha xeēn ní ñin ñayuu jíin ró. Nacani ró jnúhun ri, chí coo cuehē ñayuu candíje jnúhun ri ñuu yáha, áchí yá.

<sup>11</sup> Te ní condee Pablo yūcuán ñin cuiyā yosáva ní steén de jnúhun Yaa Dios nuū ñáyuu ún.

<sup>12</sup> Te ná cúu Galión gobernador Acaya, te ñayuu hebreo jeē cúu jnáhan ñuu Pablo, ñin cáhnu-ni ní candonda i síquī Pablo. Te ní cajeca i de cuango i jíin de nde vehe juzgado.

<sup>13</sup> Te ní cacahán i jíin Galión:

Tēe yáha yōhyo scáhán de táca ñáyuu jeē ñnga modo chíñúhún i Yaa Dios, suu ñin modo jeē cúu contra síquī ley, áchí i.

<sup>14</sup> Te quejeé Pablo cahán de núu, te ní cahán-ni Galión jíin ñáyuu hebreo un:

Ñayuu hebreo jijnáhan ró, núu ñin cuéchi xeēn cúu, te cánuú cuni nahín ri jnúhun cácahán rō núu.

<sup>15</sup> Te tuú, chí máni síquī jnúhun-ni jíin síquī ley maá ró jíin síquī tēe cástéén cúu. Te na sándaá maá ró síquī jníñu yáha, chí tu sándaá ri síquī maá ñin jeē súcuan-ni, áchí de.

<sup>16</sup> Te ní cahán de nuū i jeē na quíngo i fuera.

<sup>17</sup> Yūcuán na te ñayuu griego ní cajni i Sóstenes, tēe cújéhuu ñni vehe ñi sinagoga, te maá fuera yehyí vehe juzgado ní cacani i de, te Galión chí tu ní sáha cuiiti de cuenta.

*Jeē ní najinū Pablo ñuu Antioquía, te cuahán de vuelta uní jeē nacani de jnúhun ya*

<sup>18</sup> Te cuehē gā quivī ní condee Pablo ñuu Corinto. Yūcuán na te ní nacuatáhu de nuū táca hermano yúcuan, te Aquila jíin ñasihí de Priscila cuango de jíin Pablo, te ní jinūcoo de ñuu Cencrea. Te yúcuan ní saté lii Pablo xiní de, te súcuan stéén de jeē squicu de nuū Yaa Dios jeē ní jéjnúhun de. Te ní quivicoo de barco jíin Aquila jíin Priscila quihín de región Siria.

<sup>19</sup> Te ní jinūcoo de ñuu Efeso, te yúcuan ní caquendōo Aquila jíin Priscila. Te ní jehēn-ni Pablo vehe ñi sinagoga, te ní cahán de jnúhun ya jíin jnáhan ñuu de hebreo jeē cándutútú yúcuan.

<sup>20</sup> Te ní cacahán ndahú i jíin de jeē na cónēne de jecu gā quivī jíin i, te tu ní jéhe de jnúhun.

21 Chi ni nacuatáhú de nuū i, te ni cahān de:

Cānuú jēē nuhūn ná űuu Jerusalén cone ná vico. Te núu cúni Yaā Dios te ndee tucu ná nuū ní, áhí de.

Te ni quenda de űuu Efeso, te ni quiví de barco cuahān de.

22 Te ni jinū de űuu Cesarea, te ni jehēn de űuu Jerusalén. Te nuū ní ndihí ni cahān de jín grupo űayuu cácadíje yūcuán, te cuanuhun de űuu Antioquía.

23 Te ni coyūcú de yūcuán jecu quiví, te sáá te ni quenda tucu de cuahān de ni jica cuu de ní Galacia jín Frigia. Te űayuu cácadíje ni cahije ga ni i jín jnūhun ya ni sáha de.

### *Jeē ní nacani Apolos jnūhun Jesús űuu Efeso*

24 Te űuu Efeso ni quee in tēe hebreo nání Apolos, te tēe űuu Alejandría cúu de. Te vāha nācani de jnūhun ya, chí vāha jíní de jnūhun jeē cahán tutu íi.

25 Te je ni cutūhva vāha tēe un jín jnūhun máá Jítoho yō Jesús, vēsú jíní de máni máá jnūhun ya jeē ni stēen Juan ná ni scuándute de űayuu, te ndíhví ni de stēen cají de jnūhun ya nuū űayuu.

26 Te jēhnu-ni ni nacani de jnūhun ya ini vehe íi sinagoga. Te ni cajini sōho Aquila jín Priscila jnūhun nācani de, te ni cajeca de Apolos cuango sūn de, te ni cacastūhun yūcún ndíndúú de jnūhun ya jeē ná tu cuni Apolos.

27 Te cúni Apolos quihīn de nde región Acaya. Te je cácadíje sava űayuu yūcuan ní sáha Yaā Dios síquí jeē vāha ni yā. Te táca hermano űuu Efeso ni cachindéé űáhán i de, chí ni catee i carta quihīn de jín núu űayuu cácadíje cáyūcú Acaya jeē na cuatáhú i Apolos. Te nuū ni jínū de yūcuán, te vāha ni chindéé űáhán de táca űayuu cácadíje un jín jnūhun ya.

28 Te nuū táca űayuu űuu un ndé jín jnāhan űuu de hebreo jeē cáyūcu yūcuan, ní steén cají de ndese cástívi táca jnāhan hebreo de síquí jnūhun ya. Te tu ni cánihīn jnāhan de un jnūhun cahān síquí jeē ni stēen de, chí jín jeē cahán tutu íi ni steén de jeē Jesús cúu Cristo, Yaā jeē cáñuhun ni de quiji ya.

### *Jeē ni íne Pablo űuu Efeso*

## 19

1 Te níní néne Apolos űuu Corinto, te ni yāha Pablo ichi síquí űuu Efeso, te ni nanuu de ni jinū de máá űuu ún. Te yūcuan ní nijnāhan de jín tijni tēe cácadíje.

2 Te ni cajnūhún de tēe ún:

¿A ní canihīn ní Espíritu Santo ná ni cacandíje ní, chí ná tuú? áhí de.

Te ni cacahān de jín Pablo:

Tuú, chí ni ná tu nihīn na jnūhun jeē iyó Espíritu Santo, achí de.

3 Yūcuán na te ni cahān Pablo:

¿Na síquí ni cajendute ní núu sūcuan? áhí de.

Te ni cacahān de:

Ni cajendute ná síquí jnūhun ni steén Juan, achí de.

4 Te ni cahān Pablo:

Jeē ní scuándute Juan űayuu cúu jeē ni stēen de jeē na nācani ni i jeē stóo i cuēchi i, te ni cahān de jeē na cándíje i máá Yáa quiji jeē cúu Cristo Jesús, áhí Pablo.

5 Te nuū ní cajini sōho tēe un jnūhun yáha, te ni cajendute de jeē ní cacandíje de máá Jítoho yō Jesús.

6 Te ni soó Pablo ndíndúú ndaha de xiní táca tēe ún, te ni quiví ni Espíritu Santo ini anuá de jínāhan de, te ni cacahān de sūn sūn yuhu te ni canacani de jnūhun ya.

<sup>7</sup> Te ni Iyo nájñuhun uxī uū jnahán tēe.

<sup>8</sup> Te unī yoō ni jehēn jehēn Pablo vehe īi sinagoga. Te jéhnū ni nacani de jñuhun ya, te ni nducú ndéyí de jeē na cándije ñayuu jñuhun ndese ndácu Yaā Dios jñiñu.

<sup>9</sup> Yūcuán na te sava i ni cacunihni ni i te tu ní cácan dije i, chi sa ni cacahān neé i siquī jñuhun vāha Yaā Dios jín ñayuu cánataca. Jeē yúcuan ní cujiyo-ni Pablo nuū ñayuu ún, te ñayuu cácan dije cuango i jín de. Te ndijnahan quivī ni steén de nuū ñayuu ún ini escuela ñin tēe nání Tiranno.

<sup>10</sup> Te súcuan ni sáha de uū cuiyā, te tāca ñayuu cáyūcu Asia, cúu ñayuu hebreo cúu ñayuu tāca gá nación, ni cajini sōho i jñuhun máá Jítoho yō Jesús.

<sup>11</sup> Te ni jēhe Yaā Dios poder nuū Pablo jeē sáha de cuehē jñiñu jéhnū téyí.

<sup>12</sup> Te nde pañú jín sahma jeē ní jñi de ni cajengoo jín núú ñayuu cácuñū, te ni canduvāha-ni i cuehyī cándoho i, te ni quendacoo tachī ini i cuango.

<sup>13</sup> Te jecu tēe hebreo cájica cuu de jeē quēnehen de tachī ini ñayuu, te ni cajeni siquī ni de jeē suni jín poder máá Jítoho yō Jesús quēnehen de tachī, te suhva ni cacahān de jín tāca táchi:

Jín poder Jesús jeē nácani Pablo jñuhun ya, cáhán ñihin ri jín ró jeē na quénda ró quihīn ró, achí de.

<sup>14</sup> Te súcuan ni casáha uxā sēhe yí ñin tēe hebreo nání Esceva, cúu de ñin sutū cujéhnū.

<sup>15</sup> Te ná ni casáha de, te ni cahān-ni tachī ún:

Je jín rī Jesús, te suni jín rī Pablo. Te róho jijnáhan ró ¿ndé tēe cácuu ró jéē cuatáhú rī rohó? áchí jín de.

<sup>16</sup> Te tēe ndóho tachī un ní ndonda de, te ni cundeyí de siquī ndihúxá tēe ún. Te ni sáha xeēn ndasí de jín ndé ni catujī te ni cacuvichí lí ni quendacoo vehe un ní cajinu cuango.

<sup>17</sup> Te jñuhun yáha ní cajini tāca ñayuu cáyūcú ini ñuu Efeso, cúu ñayuu hebreo cúu ñayuu tāca gá nación, te yōhoyo ní cayūhú i, te ni cacahān i jeē yóhoyo cújéhnū máá Jítoho yō Jesús.

<sup>18</sup> Te cuehē ñayuu jeē ní cacandije ni quijicoo i nuū Pablo ni nacani ndaā i jñuhun táca jñiñu neé ní casáha i.

<sup>19</sup> Te cuehē i jeē ní casáha jñiñu tásí ní jinūcoo i cándiso i tutu i, te ni cajehmu i tutu un jito nuū tāca ñayuu. Te ni catava i cuenta nasaa ndéé tutu ni cáyū ún, te ni cajini i jeē uú xico uxī mil xuhun plata cúu.

<sup>20</sup> Te ni jité jñuhun máá Jítoho yō cuahān, te ndihi ñayuu ni cajini i jeē cujéhnū ndasí jñuhun ya.

<sup>21</sup> Te nuū ní ndihi táca jñiñu yáha, te jéni téyí ni Pablo jeē quihīn de Macedonia jín Acaya, te sáa te najinū de ñuu Jerusalén. Te ni cahān de jeē na nájñū de ñuu Jerusalén, yūcuán na te jín ñuhún quihīn de nde ñuu Roma.

<sup>22</sup> Te uū tēe jeē cáchindéé ñahán jín Pablo cúu Timoteo jín Erasto, te ni scánu de ndindúú tēe yáhá cuango de nde Macedonia, te ni quendōo máa de Asia jecu gá quivī.

### *Jeē ní cacuvaā ñayuu ñuu Efeso*

<sup>23</sup> Te suu quivī ún yóhoyo ni candonda ñayuu siquī jñuhun ya.

<sup>24</sup> Chi ni Iyo ñin tēe sájniñu siquī plata, nání de Demetrio. Te máa de jín ndihi tēe cásjniñu jín de, cániñ de cuehē xuhún, chí jín plata casáha de vehe lulí jéē modo veñuhun ídolo i jeē cúu yaā Diana.

25 Te Demetrio ni nastútú de tēe cásájniñu jín de jín táca gá tēe jeē suni jniñu yúcuán cásáha, te ni cahān de:

Tátā, cájini ni jēe siquí jniñu cásáha yó yáha vāha cániñn yō xūhún.

26 Te cájito ní te cájini sōho ní jēe ñn tēe nání Pablo chí cáhān de jeē násūu yāá cácuu jeē casáha ñayuu. Te je ni scandíje de cuehē ñayuu, nasūu máá ñn-ni ñuu Efeso yāhá chí ní cáhnu Asia.

27 Te quiyūhú ní na jēe cahān ñayuu jeē tu ndé jéjniñu jeē casáha yó. Te sanaa te suni sūcuán cahān i coto i máá veñūhun yaā sihí Diana jeē cujéñnu, te suni sájēe ni i nuū yaā Diana, te ma cúu ga cujéñnu ya vēsú ndivii ñayuu Asia jín ñayuu ní cáhnu ñayiví cáchiñūhún i ya vijna, áchí de.

28 Sūcuán ni cajini sōho de jñūhun yáha te yōhoyo ni caquifí ni de, te ni cacana jee de:

Cujéñnu téyí Diana, yaā cúu patrona ñuu yō Efeso, achí de.

29 Te ñayuu ñuu Efeso ni cacuvaā i, te ñn cáhnu-ni ni candonda i ni cajñi i Gayo jín Aristarco cuango i jín de nde vehe nuū cándutútú ñayuu casáha i junta. Te ndindúú tēe un cácuu tēe Macedonia, te cájica de jín Pablo.

30 Te cúní Pablo quiví de nuū ñayuu cuehē un cáhān de jín i, te ñayuu cácañdije tu ní cájēhe i jñūhun quihín de.

31 Te suni sava tohō jeē cácuu amigo de cáyūcu Asia, ni catají jñūhun cuahān nuū de, cácahān ndahú jín de jeē ma quihín de nuū ní cacutútú ñayuu ún.

32 Te ñayuu ní cacutútú un, sava i ni cacana jee i ñn jñūhun te sava ga i ñga jñūhun, te sūcuán ni cacuvaā teyí i, te cuehē i ni tu cájini cuiñi i na siquí cúu jeē ní cacutútú i.

33 Te sava tēe hebreo ni cajeni de ñn jnáhan de jeē naní Alejandro nuū ñayuu cuehē ún, te ni cacastūhún de nuū tēe ún na siquí cúu jeē cacuvaā i. Yūcuán na te Alejandro ni sáha de seña jín ndaha de jeē na cúnayúú ñayuu, chí cúní de cahān de jín i jeē násūu cuéchi táca ñayuu hebreo cúu.

34 Te ni canacuni ñayuu un jēe tēe hebreo cúu de, te jeē yúcuán ní cacana jee téyí gá i nájnūhun uū hora:

Cujéñnu téyí Diana, yaā cúu patrona ñuu yō Efeso, achí i.

35 Yūcuán na te ni cacunahín ñayuu ní sáha tēe cúu secretario ñuu ún, te ni cahān de:

Nihín ñayuu ñuu yō Efeso, ndihi ñayuu chí je cájini i jeē cándito vāha yó veñūhun yaā Diana jín imagen Diana jeē ní ñnga nde andiví.

36 Te ni ñn chí ma cúu cahān jeē tú ndaā jñūhun yáha. Núu sūcuán te vāha ga na cási ní yuhu ní, te ma sáha yachí ní ñn jeē tu ní nácani vāha ni ní siquí.

37 Chí tēe yáha ní caquindecá ní de yáhá vēsú tu ní cásáha de ni ñn cuéchi siquí Diana yō, ni tu ní cácahān ndevāha de ni ñn jñūhun siquí.

38 Te Demetrio jín táca gá tēe jeē ñn-ni jniñu cásáha jín de, núu cácuñi de cahān de cuéchi siquí ñn tēe, te na quíngoo de nde vehe juzgado nuū cáyūcu juez, tēe cásandaā jniñu, te yūcuán cundaā siquí de jín náhan de.

39 Te núu íyó jñūhun jeē ma cúu cundaā yūcuán, te jini ñūhún cundaā nuū ñn junta nájnūhun tájnúñi ley.

40 Chí yúhú ná jeē sanaa te cahān táca tóhō Roma jeē siquí gobierno de ni candonda yó, chí ma nihín yō jñūhun castūhun yó na siquí cúu jeē ní cacutútú yó ni cacuvaā yō vijna, áchí de.

41 Te nuū ní ndihi ni cahān secretario jñūhun yáha, te ni cajitē ñayuu un cuango.

*Jeē ni jéhēn Pablo Macedonia jín Grecia***20**

<sup>1</sup> Te ná ni yāha jeē ní cacuvaā ñayuu, te ni cana Pablo ñayuu cácandíje, te ni jeni ichí de í. Te ni cañunundee jnāhan de jín Pablo jeē ní nacuatáhú de, te cuahān de Macedonia.

<sup>2</sup> Te ni jica cuu de tǎcǎ ñuu yúcuan. Te jín cuéhē jnūhun ni stihví ni de tǎcǎ hermano cácandíje. Te ni jinū de Grecia.

<sup>3</sup> Te ni condee de yúcuan úní yoō. Te je yajni quihīn de jín barco nde Siria nuú, te máa quívī ún te ni nihīn de jnūhun jeē jnāhan ñuu de hebreo ni casquijnāhan jnūhun jeē ndonda siquī de ichi nuú quihīn de, te jeē yúcuan ní nacani ni de te cuahān tucu de ichi Macedonia.

<sup>4</sup> Te ni cahīyo sava tēe cájica jín Pablo, te cánani de Sópater ñuu Berea, Aristarco jín tēe nání Segundo nde ñuu Tesalónica, Gayo ñuu Derbe, Tíquico jín Trófimo nde Asia, jín Timoteo.

<sup>5</sup> Te ni cacandu tēe yáha, te cándetu de Pablo jín sáña, Lucas, nde ñuu Troas.

<sup>6</sup> Te nuū ni yáha vico jeē cáyeji i pan jeē tu yñi levadura, te jín barco ni quendacoo ná ñuu Filipos, te nde nuū uhún quívī te ni canajnāhan ná jín de nde ñuu Troas. Te ñuu yúcuan ní coyūcu ná uxǎ quívī.

*Jeē ni íne Pablo ñuu Troas*

<sup>7</sup> Te máa quívī domingo ni candutútú ñáyuu cácandíje jeē cáji i pan, nájñūhun ni steén maá Jítóho yō jeē núcūhun ni yō siquī yā. Te ni steén Pablo jnūhun nuū ñáyuu ún. Te siquī jeē inga quívī un jini ñúhún quenda de quihīn de, te nahán ní nacani de jnūhun nde ni cuñúu.

<sup>8</sup> Te vehe yósó jnāhan cúu vehe ún. Te nde cuarto xiní nuū ní candutútú ná un ní iyo cuehē lámpara ni cundijin.

<sup>9</sup> Te iin sūchi yí nání i Eutico, néne i yuhu ventana. Te jeē ní cunahán nácani Pablo jnūhun, te yōhyo jí i māhná, te ni quixī-ni i. Te nde piso uní un ní ñinga i nde nuū ñúhún. Te je ni jihī i ni candonehen de i.

<sup>10</sup> Yūcuán na te ni nuu Pablo te ni jita ndeyi de ni canehen de i ni ñunundee de i, te ni cahān de:

Ma yūhu ní jijnāhan ní, chi ni natecu i, áchí de.

<sup>11</sup> Te ni ndaa Pablo, te ni yeji de pan jín i jijnāhan i jeē cánucūhun ni de siquī yā. Te nahán gá ni nacani de jnūhun nde cuacundijin. Yūcuán na te ni quenda de cuahān de.

<sup>12</sup> Te Eutico chi íyó váha i cuanuhun i jín de jijnāhan de, te ndivii ñayuu ún yōhyo cácusī ni i.

*Jeē ní quenda Pablo ñuu Troas cuahān de ñuu Mileto*

<sup>13</sup> Te ni quívicoo ná ini barco cuangoo ná. Te Pablo chi cúní de caca jéhé de, te ni cundaā jeē najnāhan ná jín de nde ñuu Asón.

<sup>14</sup> Te nuū ní canajnāhan ná jín de ñuu Asón, te ni quíví de barco te cuangoo ná jín de nde ñuu Mítilene.

<sup>15</sup> Te yúcuan ní quendacoo tucu ná jín barco te inga quívī ní jinūcoo ná xiin Quío, ñuhun jeē íne sñn nuū ndúte. Te quívī uní ní jinūcoo ná Samos jeē sūni nuū ndúte íne, te ni caquendōo ná Trogilio. Te quívī cuún ní jinūcoo ná ñuu Mileto.

<sup>16</sup> Te tu ní jéngoo ná ñuu Efeso, chi jéni ni Pablo jeē yáha-ni de ñuu un quihīn de, návāha ma cucuéé de Asia te naa tiempo nuú, chi núú de jinū yachí de ñuu Jerusalén cone de máa quívī Pentecostés núu na cúu.



*Jeē ní jeni ichí Pablo tēe jéhnú cándiso jníñu nuū ñáyyu cácandíje ñuu Efeso*

<sup>17</sup> Te ná íne ga Pablo ñuu Mileto, te ni tají de jñuhun cuahān nde ñuu Efeso jeē na quíjicoo tēe jéhnú cándiso jníñu nuū ñáyyu cácandíje yūcuán.

<sup>18</sup> Te nuū ní quecoo tēe ún, te ni cahān de:

Je cájini vāha ní ndese ni jica ndaā na ndé ná ni quee nuú ná Asia te nde vijna.

<sup>19</sup> Chi ní tiempo jeē ni íne ná jíin ní te nde vijna, jéjníñu vāha na síquī jñuhun máá Jítoho yō, te tu ní sándúxí ná maá ná. Te íyó jínu ni ndahyū na jéhē ñáyyu. Te ni ndoho ná jnúndóho ni casáha jnáhan ñuu ná hebreo, chi ni casquínáhan jñuhun i síquī ná.

<sup>20</sup> Te cájini ni jéē tu ní táñúhún ná ni ñin, vēsú ndese ga cácahān ñayuu síquī ná, chi ní nacani ná ndíhi jñuhun ya jeē quéndōo vāha ní sáha. Te ni steén na jñuhun ya nuū ní jíjnáhan ní, cúu nuū chítú cúu táca vehe ní.

<sup>21</sup> Te ínuú-ni jñuhun ni nacani ná núu ndíhi ní, cúu jnáhan ñuu ná hebreo cúu ñayuu táca gá nación, chi ní cahān na jéē na nácani ni ní jéē stóo ni cuéchi ní te na cándíje ní máá Jítoho yō Jesucristo.

<sup>22</sup> Te vijna chi ñúhun ichí ná quihīn ná ñuu Jerusalén, chi stáhvī ni Espíritu Santo sáña quihīn ná. Te tu jíin ná ndese ga coo jíin ná yūcuán.

<sup>23</sup> Te íyó ñin jeē jíin na, cúu jeē chune i sáña vecāa te quíjijí jnúndóho síquī ná, chi Espíritu Santo súcuan cáhán jíin ná ndijnahan ñuu nuū jíca ná.

<sup>24</sup> Te ni tu sáha ná cuenta vēsú na cáhni i sáña, chi jeē cuní na cúu jeē na sínu vāha ná jníñu jeē ní tee máá Jítoho yō Jesús síquī ná, te súcuan cusī ni ná. Te jníñu un cúu jeē nácani ná jñuhun vāha ya nuū táca ñáyyu ndese vāha ni Yaā Dios jíin yó.

<sup>25</sup> Te je ni jica cuu ná, ní nacani ná jñuhun ya nuū ní ndese ndácu Yaā Dios jníñu. Te vijna chi jíin na jéē ni ñin ní ma najnáhan ga yō nuū ñáyivī yāha.

<sup>26</sup> Jeē yúcuan cástúhun cájí ná nuū ní jíjnáhan ní vijna jeē násúu cuéchi ná cúu núu ndé ñin ní stívi.

<sup>27</sup> Chi ní nacani ná núu ní ndíhi jñuhun Yaā Dios jeē ni sándaā yā ndese coo, te tu ní quéndōo ni ñin jñuhun.

<sup>28</sup> Núu súcuan te coto vāha ní máá ní jíin ndíhi ñayuu cácandíje, chi Espíritu Santo ni jeni ya nihín jéē cóndito ní ñáyyu maá Jítoho yō, chi ní nacuaan ya i jíin níñi yā.

<sup>29</sup> Chi jeē quihín na te jíin na jéē quíjicoo tēe cástáhú quívicoo mēhñu ní, te nducú de snāa de jñuhun ni cajetáhú ñáyyu cácandíje, te xeēn sáha jñuhun stáhú de nájnúhun xeēn sáha yihī jeē cájehni tí lanchi.

<sup>30</sup> Te suni nuū grupo maá ní quejéé sava de cahān de jñuhun stáhú, te stáhú de sava ñayuu cácandíje jeē na cóndiquīn i jñuhun stáhú stéén de.

<sup>31</sup> Jeē yúcuan condito ní jéē ma cóo súcuan. Te ma náā ni ní jéē uní cuiyā ndíquívī ndíñuu ni condíhvī ndasí ni na ndé ndahyú na jéhē ni, ní jeni ichí ná ñin ñin ní jíjnáhan ní.

<sup>32</sup> Te vijna, hermano, jícan tahú na núu Yaā Dios jeē coto ya nihín. Chi jñuhun jeē vāha ni yā ndíso poder sáha jeē íje ga ni jíin, te suu sáha jeē ñin quívī te cuāha ya tahú jeē ndujéhnú luu ní ndé jíin ndíhi ñayuu ní nacāji ya jeē cóo ndoo coo íi i nuū yā.

<sup>33</sup> Tu ní ndúcú ná jeē nihín na xúhun chí sahma nuū ní ñin i.

<sup>34</sup> Chi je cájini vāha ni jéē sa suhva ni sájniñu níhin ná návāha nihīn na jéē cótecu na ndé jíin táca tēe cájica jíin ná.

<sup>35</sup> Te níní ní steén na núū ni jéé súcuan jíni ñúhún sájniñu yó návāha nihīn yō jeē cuáha yó núū ñayuu cúmanī nuū. Te ma náā ni ni jnúhun jeē ni cáhān maá Jítoho yō Jesús, chí suhva ni cahān yā: Ndetū gā quendōo yó jéé cuáha yó vēsū jeē nihín yō, achí yá. Achí Pablo.

<sup>36</sup> Te ni ndíhi ní cahān de tāca jnúhun yáha, te ni jecuiñī yití de, te ni jicān tahú de jíin ndíhi tēe ún.

<sup>37</sup> Yūcuán na te ndíhi de ni cajecunundee jnáhan de jíin Pablo ni catechuhú de jeē cánacuatáhú de, te ni candahyū de.

<sup>38</sup> Chí cácuuíhyá ndasí ni de jíin jnúhun ni cahān Pablo jeē ma ndácoto jnáhan ga de. Te cuangoo-ni de jíin Pablo nde núū ín barco.

*Jeē cuánuhun Pablo ñuu Jerusalén*

## 21

<sup>1</sup> Yūcuán na te ni caquendōo tācá hermano ñuu Efeso, te ni quivicoo ná barco, te cuangoo ndaā-ni ná ndé Cos. Te inga quiví ni jinūcoo ná Rodas, te yūcuan ní quendacoo ná te ni jinūcoo ná ñuu Pátara.

<sup>2</sup> Te ni cane in barco jeē quihín Fenicia, te ni quivicoo ná cuángoo ná.

<sup>3</sup> Te nuū ní cajito ná núū Chipre jeē ine sūn nuū ndúte, te ni quendōo ichi lado jecó barco, chí ni cayāha ná cuángoo ná nde Siria. Te ni jinūcoo ná ñuu Tiro, chí yūcuan ndóo jeē ndíso barco ún.

<sup>4</sup> Te ni jenanducú ná ñayuu cácandíje, te ni caquendōo ná jíin i uxā quiví. Te máá Espíritu Santo ni steén nuū i jeē quíji jnúndóho siquí Pablo ñuu Jerusalén, te jeē yūcuan ní cacahān i jíin de jeē ma quihín de.

<sup>5</sup> Te ni yāha uxā quiví ún, te ni quendacoo ná. Te tāca tēe cácandíje jíin ñasihí de jíin séhe de ni cachuhun ichí de sãña ní jengoo de jíin ná nde yatā ñúū, te ni cajecuiñī yití ná jíin de yumar te ni cajicān tahú na.

<sup>6</sup> Te ni cañunundee jnáhan ná ní canacuatahú ná yūcuán, te ni quivicoo ná barco cuangoo ná. Te ni canandió cóo de cuanungoo de vehe de.

<sup>7</sup> Te ni quendacoo ná ñuu Tiro cuangoo ná jíin barco, te ni jinūcoo ná ñuu Tolemaida ní quendacoo ná ini barco. Te yūcuan ní jengoo ná ní cacahān na jíin táca hermano, te ni caquendōo ná jíin de in quiví.

<sup>8</sup> Te inga quiví un ní cajica jéhé ná jíin Pablo, te ni jinūcoo ná ñuu Cesarea, te ni quivicoo ná vehe Felipe, tēe nácani jnúhun vāha ya. Tēe un cúu jnáhan jeē ndíhuxá tēe jeē ní casaja staā nuū ñáhan viuda. Te ni caquendōo ná jíin de.

<sup>9</sup> Te tēe un iyó cúun séhe síhí de jeē cáhīyo máá i, te cánacani i jnúhun Yaa Dios.

<sup>10</sup> Te ni coyūcu ná yūcuán tijni quiví. Te ichi Judea ni quiji in tēe nácani jnúhun Yaa Dios, nání de Agabo.

<sup>11</sup> Te ni quee de nuū ná. Te ni quihin de sanchí Pablo, te ni jihni de ndaha de jíin jéhé de, te ni cahān de:

Suhva cáhān Espíritu Santo. Jnáhan yó hebreo súcuan cuhni i tēe chíi sanchí yáha ini ñuu Jerusalén, te nastúu i de nuū ñayuu sñn nación, achí de.

<sup>12</sup> Te jeē ní cajini sóho na jnúhun yáha te máá ná jíin táca tēe cácandíje cáyūcú ñuu Cesarea ní cacahān ndahú ná jíin Pablo jeē ma quihín de ñuu Jerusalén.

<sup>13</sup> Yūcuán na te ni cahān Pablo:

¿Najehé cándahyū ní jñánhan ní, te cása ná jéé cucuíhyá ni ná? Chí sãñá je iyó túhva ná jéé násū máá jéé cónuhni ná ini ñuu Jerusalén, chí suni jeē vēsū na cúu na jéé siquí máá Jítoho yō Jesús, achí de.

<sup>14</sup> Te jeē tu ní cúu cuiití casícoo ná, yūcuán na te sa suhva ní cacahān ná:

Na cóo ndese cúní maá Jítóho yō nuu súcuan, áchí ná.

<sup>15</sup> Yūcuan na te sáa te ni casátūhva ná, te cuangoo ná ñuu Jerusalén.

<sup>16</sup> Te suni jecu tēe ñuu Cesarea jeē cácanđije cuangoo de jíin ná. Suni cuahān ĩin tēe Chipre nání de Mnasón, te je ni cuu cuehē cuiyā candije de. Te ná ni jínūcoo ná ñuu Jerusalén, te ni cacoyūcu ná vehe de.

### *Jeē ni jécondēhe Pablo Jacobo*

<sup>17</sup> Te nuū ni jínūcoo ná ñuu Jerusalén, te hermano cáyūcú ñuu ún yōhoyo ni cacusī ni de jeē ni jínūcoo ná.

<sup>18</sup> Te inga quivī un ní cajengoo ná jíjnáhan ná jíin Pablo vehe Jacobo, te yūcuan ní candutútú táca tēe jéhnū cándiso jníñu nuū ñáyuu cácanđije.

<sup>19</sup> Te Pablo ni sáha de saludar tēe ún jíjnáhan de. Yūcuán na te ni castūhún de ndihī jníñu ní sáha Yaā Dios ná ni nacani de jnūhun ya nuū ñáyuu táca nación jeē tu cájini i jnūhun ya.

<sup>20</sup> Te ni cajini sōho de jnūhun yáha, te ni cacahān de jeē yóhoyo cújéhnū Yaā Dios. Te ni cacahān de jíin Pablo:

Hermano, vijna te jíni ní náa cuehē mil jnáhan ñuu yō hebreo ni cacandije i Jesús, te cácahān níhin i jeē cánuú squícu yó ley jeē ní jéhe ya nuū Moisés.

<sup>21</sup> Te ni canihīn i jnūhun cácahān jeē stívī ní steén ni núū táca jnáhan yó ñáyuu hebreo cáyūcu jíca i táca gá nación, chí ni steén ni núū i jeē ma cuatáhú gá i nuū ley Moisés, ní ma sáha ga i circuncidar sēhe i, ní ma cuatáhú gá i táca gá jeē tajnúni jenahán.

<sup>22</sup> ¿Ndesé sáha ní núu súcuan? Chí cuni ñáyuu un jéé ní ndee ní te cutútú cuehē i.

<sup>23</sup> Suhva sáha ní núu súcuan. Yāha íyó cúin tēe jeē ní cajejnūhun de ĩin jeē squícu de nuū Yaā Dios.

<sup>24</sup> Cueca ní tēe yáha quíhīn ni jíin de templo, te cuchi ní nasándoo ní máá ní jíin de nuū yā, te cuaan ní jeē socó de nuū Yaā Dios jíjnáhan de. Yūcuán na te cuu sāté de xinī de, te suu steén jeē ní casquícu de ndihī jeē ní cajejnūhun de nuū yā. Yūcuán na te cuni ndihī ñáyuu jeē tú ndaā táca jnūhun ní cajini sōho i siquī ní, chí coto i jeē suni máá ní sa squícu ní ley yā.

<sup>25</sup> Te ñáyuu táca nación jeē násūu ñáyuu hebreo cácuu i te ni cacandije i ya, je ni cateé ná carta cuahān nuū i jeē tu cánuú squícu i ley un, chí máá-ni jeē ma cáji i cūñu jeē ní sóco nuū ídolo ni níñī ní quiti jeē jíhí jeē tu jéti níñī tī, te ni ma cáca jnéni i, áchí de.

### *Jeē ní cajni de Pablo ini templo*

<sup>26</sup> Yūcuán na te ni jeca Pablo tēe ún, te inga quivī un ní cajichi de ni canasándoo de máá de nuū yā. Te ni quivī Pablo ini templo ni cachi de nuū sutú na quivī jíinu jeē nasándoo tēe un máá de nuū yā, te quindeca de quiti jeē socó de nuū yā.

<sup>27</sup> Yūcuán na te cácuu de jeē sínu de ndihúxá quivī jeē cándundoo de nuū yā, te sava jnáhan hebreo de jeē véjicoo Asia ní cajini de jeē íne Pablo ini templo, te ni cascáhán de ndihī ñáyuu, te ní cajni i Pablo.

<sup>28</sup> Te ni cacana jee i:

Tēe ñuu yō Israel, cuāha núu ní ndaha jíjnáhan ní na jnī yó tēe yáha. Chí máá de cúu tēe jíca cuu ní cáhnū steén de nuū táca ñáyuu, te cáhán de siquī nación yō jíin siquī ley jeē ní jéhe ya nuū Moisés jíin siquī templo yáha. Te suni je ni quivícoo de jíin jecu tēe griego ini templo ĩi yáhá, te súcuan stívī de jnūhun ĩi

jeē cahán jeē ma cúu quívi ñayuu ini templo te núu nasūu ñáyuu hebreo cúu i, áhí.

<sup>29</sup> Chi nde na íne Pablo ini ñuu un ní cajini tēe hebreo jeē jíca de jíin Tróximo, tēe ñuu Efeso jeē násūu hebreo cúu de, te cájeni ni de jeē ni quívi tēe un jíin Pablo ini templo.

<sup>30</sup> Te ndíhi ñayuu ñuu un ní cuvaā, te ni cacutútú-ni i, te ni cajni i Pablo, te ni castáa i de ní quenehen i de ini templo un, te ni canacasi-ni i yéhyí.

<sup>31</sup> Te ni cacuni i cahni i de núu. Te general, tēe cújéhnú nuū ndíhi soldado, ni nihín de jnūhun jeē ndíhi ñayuu ñuu Jerusalén ni candonda i cácuvaā i.

<sup>32</sup> Te ni jeca general táca soldado jíin capitán, te cájino de cuango de nde nuū cáhíin ñayuu cuehē ún. Te ná ni cajito ñayuu jeē ní jínūcoo general jíin soldado, te ni cajecuiñi i jeē cácani i Pablo.

<sup>33</sup> Yūcuán na te ni quívi general mēhñu ñáyuu, te ni jni de Pablo, te ni ndacu de jniñu jeē conuhni de jíin úu cadena. Yūcuán na te ni cajnūhún general ndé tēe cúu Pablo te na cuēchi ni sáha de.

<sup>34</sup> Te ni cacana ñayuu cuehē ún, sava i ñin jnūhun te sava ga i inga jnūhun, te tu ní cúu cuni de na cuēchi ni sáha Pablo, chí cácuvaā i. Te ni ndacu de jniñu cuahān Pablo nde cuartel.

<sup>35</sup> Te nuū ni jíin Pablo escalera cuartel ún, te soldado ni cajni de Pablo cándiso de síquí jeē cácani ñayuu ún jni i Pablo sáha xeēn i jíin de.

<sup>36</sup> Chi ndíhi i vējicoo i ichi yátá soldado, te cácana jee i:

Cahni ni tēe jíin, áhí i.

### *Jeē ni cáhān Pablo jehē maā de nuū ñáyuu*

<sup>37</sup> Te cásqúvi de Pablo ini cuartel nuū, te jíin jnūhun griego ni cahān Pablo jíin general:

¿A cuáha ni jnūhun cahān ná ñin jnūhun jíin ní? achí de.

Te ni cahān general jíin de:

Te jíin rō cahán rō yuhu griego jeē súcuan.

<sup>38</sup> Núu súcuan te nasūu róhó cúu tēe Egipto jeē jé ni cuu quívi ni ndonda síquí gobierno te ni quenehen cuūn mil tēe jéhi ndíyí cuango jíin de nde nuū ñūhun téhé, áhí.

<sup>39</sup> Yūcuán na te ni cahān Pablo:

Tuú, chí tēe hebreo cúu ná, te ni cacu ná ñuu Tarso, ñin ñuu jeē cújéhnú ndañūu Cilicia. Te quiñūhun ni ni cuáha ní jnūhun na cáhān na jíin ñáyuu yáha jíin náhan i, áhí de.

<sup>40</sup> Te general ni jēhe de jnūhun jeē cahān de. Te ni jecondichi Pablo nuū escalera, te ni sáha de seña jíin ndaha de jeē na cúu nayúu ñáyuu ún. Te nuū ní cuu nayúu-ni i, te jíin jnūhun yuhu ñūu de hebreo ni cahān de:

## 22

<sup>1</sup> Ndihi níhín jeē cácuu ní jnāhan ñuu yō jíin ndíhi níhín jeē cácujeñu ní núu ñūu yō, cuni sōho ní jnūhun cahān na jehē maā ná, achí de.

<sup>2</sup> Te ni cajini sōho i jeē cahān Pablo yuhu hebreo jeē cúu yuhu ñūu i, te víhyá gā ni cacunahín i. Te ni cahān Pablo:

<sup>3</sup> Máa ná cúu jnāhan ñuu yō hebreo, te ni cacu ná ini ñuu Tarso ndañūu Cilicia. Te ini ñuu Jerusalén yáha ní jehnu ná, te ni cutūhva ná núu Gamaliel, te ni steén de nuū ná ndíhi síquí ley jeē ní jēhe ya nuū jíi yō. Te nde jíin ini jíin ánuá na ní nducú ndéyí ná squícu ná súcuan nuū Yaā Dios, nájnūhun cása ha máa ní vijna.

4 Te ni jito xeēn na ñáyuu cá candíje i jñuhun Jesús te nde cuní na jéē na cúu ndihí i núú. Chi cúu tēē cúu ñahan ni jñi ná ni chuhun ná vecāa.

5 Te sutú cujēhnu ga jíin táca tēē jēhnu cándiso jñiñu nuū ñúú yō, cácuu de testigo jeē súcuan ni sáha ná, te suni máá de ni cajēhe de tijni carta cuahān na jíin jéē cuáha na nuū táca jñahan yó cáyūcú ñuu Damasco. Chi cuahān ná ñuu un jéē jñi ná ñáyuu cá candíje i Jesús te quindeca ná i ñuu Jerusalén yāha, návāha ndoho i núú.

*Jeē ní cachi Pablo ndese ni sama ya de  
(Hch. 9.1-19; 26.12-18)*

6 Te ni quihñi ná ichi cuahān ná, te cuacuyajni ná ñuu Damasco, te nájñuhun caxú cúu. Te ichi ándiví ní quiji ñn nduva ní ndindéē ndaxín nuū ná.

7 Te ni cotúú-ni ná núú ñuhun, te ni jini sōho ná ñn jñuhun cáhán jíin ná: Saulo, Saulo, ¿najehe jíto xeēn rō ruhū? achí.

8 Yūcuán na te ni cahān ná: ¿Na nihín cúu jeē cahán, Tátā? achí ná. Te ni cahān yā jíin ná: Máá rí cúu Jesús jeē ní jehnu ñuu Nazaret, te jeē jíto xeēn rō ñáyuu cá candíje i ruhū cúu jeē jíto xeēn rō ruhū, achí yá.

9 Te tēē cuango jíin ná ni cajini ndije de jeē ndindéē, te ni cayūhú de, te tu ní cájini sōho de ndese ni cahān yā jíin ná.

10 Yūcuán na te ni cahān ná: Tátā, ¿na vé cuní ni jéē sáha ná? achí ná. Te ni cahān máá Jítoho yō jíin ná: Ndocuñiñi te quihñi rō ñuu Damasco, te yūcuan íyó ñn tēē jeē cachi nuū rō na vé cúu jeē cánuú sáha ró, achí yá jíin ná.

11 Te jeē ní ndindéē un ní sacuaá núú ná, te tēē cuango jíin ná un ní cajñi de ndaha ná cuango de jíin ná ní jinūcoo ná ndé ñuu Damasco.

12 Te yūcuan ní condee ñn tēē nání Ananías, te táca jñahan yó hebreo yūcuan cácahān jeē tēē vāha cúu Ananías, chi vāha squícu de ley jeē ni jéhe ya nuū Moisés.

13 Te ni quee tēē un núú néne ná, te ni cahān de jíin ná: Hermano Saulo, na ndúndijin tinūu ní, achí de. Te ni ndundijin-ni tinūu ná, te ni jito ná núú de.

14 Te ni cahān Ananías: Máá Yáa Dios táca jíi yō, je ni nacāji ya nihín návāha cuni ní na vé cuní yā jeē sáha ní, te coto ní núú maá Cristo, Yáa ndaā, te cuni sōho ni jñuhun jeē cahān yā.

15 Te nacani ní jñuhun ya nuū ndivii ñáyuu táca jéē ní jito ní jíin jéē ní jini sōho ní.

16 Ma cúhuun ni ni núú súcuan. Ndocuñiñi ní, te cuandute ní te cahān ndahú ní jíin máá Jítoho yō, návāha nacate ya anuá ni núú cuéchi, achí de jíin ná.

*Jeē ní cachi Pablo ndese ni tají Yáa Dios de nuū ñáyuu táca gá nación*

17 Te ni nandió cóo na ní ndee ná ñuu Jerusalén. Te jíicán tahú na ini templo, te ni sáha máá Jítoho yō jeē ní jito ndijin ná.

18 Te ni jini na núú yā ni cahān yā jíin ná: Yachí quenda ró ñuu Jerusalén yāhá, chi ma cuatáhu ñáyuu yāha jéē nacani ró jñuhun rí nuū i, achí yá.

19 Te ni cahān na jíin yá: Tuú, chi cuatáhu i, Tátā, chi je cájini i jeē ni quiví ná ndijnahan vehe iñ sinagoga ni jñi ná táca ñáyuu cá candíje i nihín, te ni cani ná i, te ni chuhun ná i vecāa.

20 Te je cájini i jeē quiví ní cajehni i Esteban, tēē ni nacani cáji jñuhun ní, suni ní indichi na yúcuu, te ni jejnúhñ ná jeē na cúu de, chi ni condito ná sahma tēē ni cajehni Esteban, achí ná jíin yá.

21 Te ni cahān yā jíin ná: Cuáhán, chi máá rí tají rí rohó quihñi jíicá ró nde nuū ñáyuu táca nación jeē tu cájini i jñuhun rí, achí yá jíin ná. Achí Pablo.

*Jeē ni íne Pablo nuū general*

<sup>22</sup> Te tāca ñáyyuu ún vāha-ni ni cajini sōho i te nde jñūhun sandīhi yáha jéē ní tají yá de nuū ñáyyuu tāca gá nación. Yūcuán na te ni cacuvaā i, te ni cacahān jee i:

Na cúu tēe jíñá, chí tú vāha jeē cótecu gā de, áchí i.

<sup>23</sup> Te súcuan cácana jee i, te ni cascádoó i ticáchí i, te ni cascánda i ticachā. Te súcuan cástéén i jeē cáquitī xeēn ní i.

<sup>24</sup> Te ni ndacu general jñiñu jeē na quíví Pablo ini cuartel, te ni cahān de jeē na stíchí soldado Pablo nde jíin cuarta ñíi, návāha cujnúní ni general na siquī cúu jeē ní candonda ñayuu un síquī de.

<sup>25</sup> Te ni cajihni de Pablo návāha súcuan te caní de. Te ni cahān Pablo jíin capitán jeē índichi tūhva:

¿A jéhe ley jñūhun jeē caní ní cuarta tēe cúu sēhe nación Roma núu ná tu sándaā ní núu íyó cuéchi de? áchí de.

<sup>26</sup> Te ni jini sōho capitán jñūhun yáha, te ni jecahān jíin general:

Coto vāha ní jéē ma stíví ní sáha ní jíin tēe yáha, chí cúu de sēhe nación Roma, achí.

<sup>27</sup> Yūcuán na te ni jinū general nuū Pablo, te ni cajñūhún de:

Cachí núu jendaá cúu jeē sēhe nación Roma cúu ró, áchí.

Te ní cahān Pablo:

Suu cúu ndije ná, áchí de.

<sup>28</sup> Te ni cahān general:

Ruhū chí nde jeē ní jéhe rí cuehē xūhún te ni nduu rí sēhe nación Roma, áchí.

Te ni cahān Pablo:

Te sáñá chí nde quíví ní cacu ná cúu ná sēhe nación yō Roma, achí de.

<sup>29</sup> Yūcuán na te tāca tēe jeē cáconi caní Pablo nuú, ní cacujiyo-ni cuangoo, te suni nde general ni yūhú de, chí ní stíví de jeē ní jihni de Pablo, chí tu íyó vāha sáha súcuan jíin sēhe nación Roma.

*Jeē ni índichi Pablo nuū junta cujéhnu ga jnāhan ñuu de hebreo*

<sup>30</sup> Te inga quíví un cúní general cundaā vāha ni de na siquī cúu jeē ní candonda tēe hebreo siquī Pablo. Te ni ndají de cadena jeē nuhni Pablo, te ni ndacu de jñiñu ni cacutútú táca sūtū cácujeñnu jíin táca tēe cásáha junta cujéhnu ga, te ni quenehen de Pablo, te ni jení de nuū tēe ni candutútú un.

## 23

<sup>1</sup> Yūcuán na te ni ndacoto Pablo nuū tēe ni candutútú junta un, te ni cahān de:

Tátā jijnāhan ní, ní ndé vijna vāha íyó ní anuá na jéē tú na cuéchi ná, jito jínúu Yāā Dios, áchí de.

<sup>2</sup> Yūcuán na te Ananías, sutū cujéhnu ga, ni cahān jíin tēe cáhīn yajni nuū de jeē na cátu maá yuhu de.

<sup>3</sup> Te ni cahān Pablo jíin sūtū cujéhnu ga ún:

Yāā Dios stóho ya nihín chí tēe stáhú-ni cúu ní, chí néne ní jéē sándaā ní núu ní stíví ná ley yā, ¿te naun stíví máá ní ley jeē ndácu ní jñiñu jeē cáni de sáñá? áchí de.

<sup>4</sup> Te ni cacahān tēe cáhīn nuū de ún:

¿Naun cáhán rō súcuan jíin sūtū cujéhnu ga? Chí nuū Yāā Dios jejniñu de, áchí jíin de.

5 Te ni cahān Pablo:

Tātā jijnáhan ní, tu ní jíní na jéē sutú cujéhnū ga cúu de, chí núu ní jíní na te ma cahān na súcuan núu, chí yósó núu tútu ìi jeē ní cahān yā jeē ma cahān neé yó coto yó táca téē cácujehnū nuū yō, áchí Pablo.

6 Te nuū ní jini Pablo jeē sava de cácuu grupo saduceo te sava ga de cácuu grupo fariseo, te ni cahān jee de:

Tātā jijnáhan ní, máá ná cúu ìn jnáhan grupo fariseo, te suni súcuan ní ìyo tátá na. Chí suni máá ná ñúhun ní na jéē nastécu yā ndíyí, te siquī yúcuu cúu jeē cácahān ní cuéchi siquī ná, áchí de.

7 Te jeē súcuan ní cahān de te ni cacusín ní tēe junta jeē cácuu grupo fariseo jíin grupo saduceo, te ni cacahān nīhin.

8 Chí cácahān tēe grupo saduceo jeē ma nátecu ndíyí, ní tu cáhíyo ndajéhé yā ní ánuá, te tēe grupo fariseo cájejnúhún de ndinúní jnúhun yáha.

9 Te yōhoyo ní cuvaā. Te sava tēe cástéén jnúhun cáhán tutu ley yā jeē cácuu jnáhan grupo fariseo, ní candocuíñí de, te ní cacahān de:

Tú ní ìn cuéchi cánihín na síquī téē yáha. Sanaa te ní cahān ndije ìn ánuá jíin de chí ìn ndajéhé yā. Ma sáníhni ní yō nuū Yaa Dios nuu súcuan, áchí.

10 Te yōhoyo ní catejnéhan, te yúhú general jeē quende i chíyō Pablo, te ni ndacu de jniñu jeē na quíví soldado te quenehen de Pablo sava mehñú i, te na ndíví de ìni cuartel.

11 Te jecuáā un ní quee-ni máá Jítóho yō nuū de, te ni cahān yā jíin de:

Pablo, cuandeyí ní rō, chí nájnúhun ní nacani ró jnúhun ri ìni ñuu Jerusalén yáha, suni súcuan nacani nahín ró jnúhun ri ìni ñuu Roma, áchí yá.

### *Jeē ní casquíjnáhan jnúhun cahni Pablo*

12 Te nuū ní cundijin te ni cacutútú sava ñayuu hebreo, te ni casquíjnáhan jnúhun, te ni cacahān teyí i jeē ma cáji cuiti i ní ìn ní ma cóho cuiti i nde núu tu cahni i Pablo.

13 Te víhyá gā uū xico tēe hebreo ní cacahān teyí jnúhun yáha.

14 Te ni jengoo nuū sutú cácujehnū jíin núu tēe jéhnū cándiso jniñu nuū ñáyuu hebreo, te ni cacahān jíin tēe ún:

Ni cacahān teyí ná jeē ma cáji cuiti ná ní ìn ní ní nde ná tu cahni na Pablo.

15 Núu súcuan te máá ní jijnáhan ní jíin táca gá tēe cásáha junta cujéhnū ga, cuacáhān ní jíin general jeē quenehen de Pablo na jéē de nuū junta sajnē, chí cachi ní jéē cáconi ní stíchí vāha ga ní de. Te máá ná jijnáhan ná cotúhva ná cahni ná de nde ná tu quee de nuū cáhíin tútu ní, áchí.

16 Te sēhe yíí cuáha Pablo ní nihín i jnúhun jeē súcuan ní cacahān, te ni jehēn i cuartel, te ni castúhún i nuū Pablo.

17 Te ní cana Pablo xiní ìn jnáhan capitán, te ni cahān de:

Condeca ní súchi yáha quíhín ní jíin i nuū general, chí íyó ìn jnúhun castúhún i nuū de, áchí de.

18 Te capitán un ní jeca de i cuahān i jíin de nuū general, te ni cahān de:

Pablo, tēe ìne vecāa, ní cana de sãñá, te ni cahān de jíin ná jeē quindeca ná súchi yáha núu ní, chí íyó ìn jnúhun cahān i jíin ní, áchí de.

19 Te ní jniñ general ndaha i cuahān de jíin i ìn lado, te yuhu-ni ní cajnúhún de i:

Na jnúhun cúni rō cahān rō jíin rí, áchí de.

20 Te ni cahān i:

Tēe hebreo ni casquínáhan jnūhun de jeē cahān ndahú de jíin ní quenehen ní Pablo sajnē quihīn de nuū tāca tēe cásáha junta cujéhnū ga, chí cahān-ni de jíin ní jeē cáconi de jeē stichí yáha ga de Pablo.

<sup>21</sup> Te ma cuáha ni jnúhun, chí víhyá gā uū xico de cándetu sáhí de ichi, te ni cacahān teyí de jeē ma cáji cuiti de ni ĩn ni ma cóho cuiti de nde núu tú cahni de Pablo, te vijna je cándetu tūhva de jeē cuáha ni jnúhun quihīn Pablo nuū junta, áchí i.

<sup>22</sup> Te ni cahān general jíin i jeē ma cáchi i nuū ní ĩn ñayuu jeē ni cáhān i jnūhun yáha jíin de, te ni tají de i cuanuhun i.

*Jeē ní tají general Pablo cuahān de nuū Félix, tēe cúu gobernador*

<sup>23</sup> Yūcuán na te ni cana general uū capitán de, te ni ndacu de jniñu jeē sátūhva de uū ciento soldado cájica jéhé jíin únī xico uxī jeē cáyōsó caballo jíin úu ciento jeē cándāha lanza, chí cahān jecuáá ún quendacoo de jíin Pablo quingoo de nde ñuu Cesarea.

<sup>24</sup> Te suni ni ndacu de jniñu jeē coo tūhva caballo jeē cóso Pablo, te condito yáha soldado un Pablo quingoo de nde nuū Félix, tēe cúu gobernador.

<sup>25</sup> Te ni tee de ĩn carta jeē cahán jnūhun yáha:

<sup>26</sup> Máá ná cúu Claudio Lisias, te tēe ná carta yáha cuájēe nuū ní, señor Félix, gobernador cujéhnū. Nde se tahū cúu ní.

<sup>27</sup> Ñayuu hebreo ni cajni i tēe yáha, te je yajni cahni i de núu, te ni jnama ná de jíin soldado, chí ni jini na jēe séhe nación Roma cúu de.

<sup>28</sup> Te ni jendeca ná de nuū junta maá i jíináhan i jeē sándaá i núu na cuēchi ní sáha de.

<sup>29</sup> Te ni jini na jēe siquí ley maá i cúu cuēchi cácahān i siquí de, te tu níhín na ni ĩn cuēchi siquí de jeē cúu de ni jeē cóne de vecāa.

<sup>30</sup> Te ni nihín na jnúhun jeē sava tēe hebreo ni casquínáhan jnūhun de jeē cahni de tēe yáha, te jeē yūcuán cúu jeē yachí ni tají ná de cuajēe de nuū ní. Te suni je ni cahān na jíin ñayuu cájicān cuēchi siquí de jecoo i nuū ní, te jíifā cahān i jíin ní na cuēchi ní sáha de. Je ni cahān yō, achí carta.

<sup>31</sup> Te ni cajca ñuu-ni soldado Pablo cuangoo jíin de nde ñuu Antípatris, nájnūhun ni tahū jniñu nuū de.

<sup>32</sup> Te inga quiví ni canandió cóo-ni soldado cájica jéhé cuánungoo nde cuartel, te soldado cáyōsó caballo cuangoo de jíin Pablo.

<sup>33</sup> Te ni jinūcoo ñuu Cesarea, te ni cachihí carta ndaha gobernador, te suni ni cajeni Pablo nuū de.

<sup>34</sup> Te ni cahu gobernador carta un. Te ni cajnūhún de ndé ñuu cúu Pablo, te ni jini de jeē tēe ndañúu Cilicia cúu Pablo.

<sup>35</sup> Te ni cahān de:

Nde na quécoo tēe cájequin cuēchi siquí rō te cuni nahín rí jnūhun cahān rō, áchí de.

Te ni cahān de jeē na quíndihyū Pablo ini palacio ndīyí Herodes.

*Jeē ní cáhān Pablo jehē maá de nuū Félix*

## 24

<sup>1</sup> Te nuū uhún quiví te Ananías, sutū cujéhnū ga, ni quee de ñuu ún. Te suni ní quecoo sava tēe jéhnū cándiso jniñu nuū jnāhan ñuu de hebreo jíin ĩn tēe cúu abogado, nání de Tértulo. Te ni quívicoo de nuū gobernador jeē cahān de cuēchi siquí Pablo.



2 Te ni cana gobernador Pablo ni quee de. Te ni quejéé Tértulo cahán de cuēchi siquī Pablo, chi suhva ni cahān de jíin Félix:

Tātā gobernador, siquī jeē cúu ní tóhō jeē váha ndíchí ndácu ní jniñu, te jeē yúcuán tú na jñuhun cájejnáhan íyó, chí cáyūcu váha yó.

3 Te na cútahū ná, chí tāca quíví váha cúu tāca núu ndácu ní jniñu jeē váha sáha ní, tátā Félix.

4 Te tu cúní na snāá na cuēhē tiempo ni, te cáhán ndahú ná jíin ní cuni nahín ní jecu-ni jñuhun cahān na jíin ní.

5 Chi ní cajini na tēe yáha jéé cúu de ñin tēe tíxín, te sáha de jeē cánacuajnáhan máá jnáhan ñuu ná hebreo níí cáhnu-ni tāca lado, te cúu de tēe cújéhnu nuū ñáyuu cascuáha jñuhun tēe nání Jesús jeē ní jehnu ñuu Nazaret.

6 Te suni je ndúcú de jeē stívi de tācá jniñu ini templo íi, te ni cajni ná de. Te cácuni na sándaā na siquī de núu, nájnūhun cáhán ley ñuu ná.

7 Te ni jinū-ni general Lisias, te ni quende fuerza de tēe yáha núu na jíjnáhan ná.

8 Te ni ndacu de jniñu jeē tāca ná jeē cácahān na cuēchi siquī tēe yáha quiijicoo ná ndé nuū ní. Te vijna cuu stíchí máá ní de, te jíin jñuhun cahān máá de te cuni ni jéé ni sáha de cuēchi jeē cácahān na jíin ní, áchí Tértulo.

9 Te suni ni cacahān tēe hebreo jeē ni jíinūcoo jíin de jeē iyó ndāā jeē súcuán cúu cuēchi Pablo.

10 Yūcuán na te ni sáha gobernador seña nuū Pablo jeē na cáhán de, te ni cahān Pablo:

Je jíiní na jéé cuēhē cuiyā cúu ní gobernador ñuu yáha, te jeē yúcuán nújnahan ni na jéé sándaā ni siquī ná.

11 Chi máá ní cuu nanducú ní te cuni ni jéé sáá máá úxí uū quíví ni cuu jeē ní jéhēn ná ñuu Jerusalén jeē chíñúhún ná Yaā Dios.

12 Te tu ní stáhān jnáhan ná jíin ní ñin ñáyuu, ni tu ní stóna ná ñáyuu ini templo ni ini vehe íi sinagoga ni ini máá ñuu.

13 Ni tú na jíin stéén de jeē iyó ndāā jñuhun cácahān de siquī ná.

14 Te jñuhun cáhán cají ná jíin ní cúu jeē chíñúhún ná Yaā Dios tāca jíi na, te suu cúu jeē chíñúhún ná máá Jesucristo, te máá jñuhun yáha-ni cúu jeē cácahān de jeē stívi ná. Te cándíje ná tāca jñuhun yósó núu tútu ley yā jíin núu tútu jeē ní catee tēe ni canacani jñuhun ya nde jenahán.

15 Te ñuu ñúhún ni na jíin de jeē sáha Yaā Dios jeē nátecu tāca ndíyi, cúu ñáyuu ní casáha váha jíin ñáyuu ní casáha néé.

16 Te jeē yúcuán máni jeē váha ndíhví ni na sáha ná. Súcuán te váha íyó ní anuá na jéé tú na cuēchi ndéé siquī na núu Yaā Dios ni nuū ñáyuu.

17 Te ni jica cuu ná tāca ñuu jicá jecu cuiyā, te sáá te ni ndee na jíin xúhun jéé ní cajéhe tāca ñáyuu jeē chindéé ñáhán i jnáhan ñuu na cáyūcú Jerusalén. Te suni ni ndee na jéé socó na quíti nuū Yaā Dios.

18 Te íne ná ini templo siquī jeē cuchi ná ndundoo ná núu Yaā Dios te socó ná. Te jecu jnáhan ñuu ná hebreo jeē véjicoo Asia ni cajito de sáñá ini templo, te tú na ñáyuu cuēhē ní cóyūcu jíin ná jeē sávaā í.

19 Te núu ní stívi ná ¿te naun tu ní quíjicoo tēe Asia un návāha suni cahān de ndese ní stívi ná?

20 Chí tēe ni quecoo yáhá na cáhán máá de núu na cuēchi ní canihīn de siquī na ná ni indíchí na núu junta tēe cácujeñhu ini ñuu ná.

<sup>21</sup> ¿Te chí cájequin de cuēchi siquī na jéē ni cáhān jee ná suhva ná ni iyo ná nuū junta naún? Chi ni achi na jéē cándije ná jéē nátecu táca ndíyi, te jeē yúcuan cájequin ni cuēchi siquī ná, ni achi na jíin de. Achí Pablo.

<sup>22</sup> Te Félix chi je jíni vāha de ndese cácandije ñayuu Cristo. Te jeē ní jini sōho de jñūhun yáha te ni stétu de un jíjnāhan, te ni cahān de:

Nde na quée general Lisias te cajñūhun gá rī siquī jñíñu yáha, áchí de.

<sup>23</sup> Te ni ndacu de jniñu nuū capitán jeē na cóne ga Pablo vecāa, te ma cási jeē sáha de jeē cuní de, te ni ma cási jeē quíjicoo jnāhan de jeē chindéē ñáhán i de.

<sup>24</sup> Te ni cuu jecu quivī, te ni quiji tucu Félix jíin ñasihí de Drusila, te ñahan hebrea cúu ña. Te ni ndacu de jniñu jeē na quiji Pablo návāha nacani de jñūhun ndese candije yó Jesucristo.

<sup>25</sup> Te ni cahān Pablo jíin de jeē cánuú sáha yó jniñu ndaā, te cánuú coto yó máa yó jeē ma sáha yó jniñu stívi, chí quivī sándihí te sándaā Yaā Dios jniñu ndívi ñayuu ndese ni casáha i. Te ni yūhu Félix te ni cahān de:

Vijna te cuáhán, te inga quivī jeē núne ri te cana ri rohó quiji ró, áchí de.

<sup>26</sup> Te ñūhun ni de jeē cuāha Pablo xūhun núu de te siáa de quenda de vecāa. Jeē yúcuan tíjni jínu ni cana de Pablo ni candajñūhún de.

<sup>27</sup> Te súcuan ni cuu uū cuiyā, te sáa te ni nucuíñi Porcio Festo nuū Félix. Te cúní Félix jeē na cúsñi ñayuu hebrea jíin de, te jeē yúcuan ní squéndō de Pablo vecāa.

### *Jeē ni índichi Pablo nuū Festo*

## 25

<sup>1</sup> Te sáa únī quivī jeē ni quivī Festo cuu de gobernador Judea, te ni quenda de ñuu Cesarea cuahān de ñuu Jerusalén.

<sup>2</sup> Te táca sūtū cácujeñu jíin téē cácujeñu nuū ñáyuu hebrea ni jinūcoo nuū Festo, te ni cajicān cuēchi siquī Pablo.

<sup>3</sup> Te ni cacahān ndahú jíin Festo jeē núu vāha ni de te na nátají de Pablo ndíji ñuu Jerusalén. Súcuan ni cacahān, chí je ni casquíjnāhan jñūhun jeē cahni Pablo ichi.

<sup>4</sup> Te ni cahān Festo jeē yíndesi vāha Pablo nde ñuu Cesarea, te je jéni ni de jeē jecu na quivī te nuhūn maá de ñuu Cesarea.

<sup>5</sup> Te jeē yúcuan ní cahān de jíin táca téē ún:

Tāca níhín jeē cándiso jñíñu, na quíngoo yó nde Cesarea, te yúcuan cácan ni cuēchi siquī de te núu íyó cuēchi de, áchí de.

<sup>6</sup> Te ni ine de yúcuan únā chí úxi-ni quivī, te ni ndee de ñuu Cesarea, te inga quivī ni cucōo de mesa nuū sándaā de jniñu, te ni cahān de jeē na quíji Pablo.

<sup>7</sup> Te je cáhīn téē hebrea jeē ní quíjicoo nde ñuu Jerusalén. Te ni quee Pablo, te ni cajicó ndūu nuū de, te ni caquejéé-ni cásajñūhún téyí siquī de, te tú na jíin ní cástéén jeē íyó ndāā jñūhun cácahān.

<sup>8</sup> Te ni cahān Pablo jehē maá de:

Tu ní sáha ná ni ñn cuēchi siquī ley ñuu na jéē cácuu ná ñayuu hebrea, ni siquī templo, ni siquī rey nación Roma, áchí de.

<sup>9</sup> Te Festo chí cúní de jeē cusñi ñayuu hebrea jíin de, te ni cajñūhún de Pablo:

¿A tu cúní rō quínuhun rō Jerusalén te yúcuan sándaā rī siquī rō? achí de.

<sup>10</sup> Te ni cahān Pablo:

Je índichi na núu cúndaā jniñu jeē ndácu máá tée cúu rey nación Roma, te yāha cúu nuū cánuú cundaā jniñu ná. Máá ní je jíni vāha ní jēe tú na cuēchi ní sáha ná síquī táca jnáhan ñuu ná hebreo.

<sup>11</sup> Chi núu ní sáha ná ñin cuēchi xeēn jeē jíni ñúhún cuu ná, te íyó váha jeē cúu na núu súcuan. Te núu tu íyó ndáā jnūhun jeē casájñúhún tée yāha síquī ná, te ní ñin tée ma cúu chihi de sáñá ndaha tée yāha jíjñáhan de. Núu súcuan te cúní na quihín na núu máa rey nación Roma sándaā de síquī na, áchí de.

<sup>12</sup> Te ni cajñūhun Festo ndese cájeni ni tée cándiso jniñu jíin de. Yūcuán na te ni cahān de jíin Pablo:

Je ni cahān rō jeē cuní rō quihín rō nuū máa rey nación Roma sándaā de síquī rō. Núu súcuan te quihín nahín ró nuū de, áchí de.

### *Jeē ni índichi Pablo nuū rey Agripa*

<sup>13</sup> Te ni cuu jecu quivī, te rey Agripa jíin Berenice ni jecondéhé de Festo nde ñuu Cesarea.

<sup>14</sup> Te tíjni quivī ní coyúcu de yūcuán. Te ni nacani Festo jnūhun síquī Pablo nuū rey un. Te suhva ní cahān de:

Félix jeē ní cuu de gobernador, ní stóo de ñin tée íne vecāa yāhá.

<sup>15</sup> Te ná ní jehēn ná ñuu Jerusalén, te sutū cácujuhnu jíin ñáyuu jéhu cándiso jniñu nuū ñáyuu hebreo ní jinūcoo i nuū na cájequin i cuēchi síquī tée ún, te cácuni i jeē na cúu de.

<sup>16</sup> Te ní cahān na jíin i jeē tu íyó costumbre táca tóhō Roma jeē cahni de ñin tée súcuan-ni, chi jíni ñúhún condichi de jíin ñáyuu cájequin cuēchi síquī de, návāha cahān de jehē máa de te cundaā núu íyó cuēchi de.

<sup>17</sup> Yūcuán na te ni quecoo tútú i yāhá. Te inga quivī ún tu ní cúcuéé ná, chi ní cucōo na mesa nuū sándaā na síquī cuēchi, te ní ndacu ná jniñu jeē na quíji tée ún.

<sup>18</sup> Te cáhīn ñáyuu cájequin cuēchi síquī de. Te ní jeni ní na jēe íyó cuēchi xeēn cahān de síquī tée un núu, te tú cuiti.

<sup>19</sup> Chi jeē cácahān de cúu máni síquī jnūhun cácañdije-ni máa de, jíin síquī ñin tée nání Jesús jeē jé ní jihī de, te Pablo cahán ñihin de jeē ní natecu ndije tée ún.

<sup>20</sup> Te tu ní cújñúní cuiti ní ná ndese sándaā ná, te ni cajñūhun ná de núu cúní de quihín de ñuu Jerusalén te yūcuán cundaā síquī de.

<sup>21</sup> Te máa Pablo ní cahān de jeē cuní de quihín de nuū Augusto, rey yō nación Roma, te yūcuan sándaā rey cuēchi de, ní achi de. Te ní cahān na jēe na cóne de vecāa nde tají ná de quihín de nuū rey un, áchí Festo.

<sup>22</sup> Yūcuán na te ni cahān Agripa jíin Festo:

Suni cúní máa ná cuni sōho ná jēe cahán tée un, áchí de.

Te ní cahān Festo:

Sajnē te cuni sōho ní jēe cahán de núu súcuan, áchí de.

<sup>23</sup> Te inga quivī un ní quecoo Agripa jíin Berenice. Te cáñūhun de sahna cújuhnu de, ní quivīcoo de ini vehe juzgado jíin táca general jíin tée cácujuhnu ñi ñuu ún. Te ní ndacu Festo jniñu jeē na quíji Pablo.

<sup>24</sup> Te ní cahān Festo:

Cahán na jíin ní, tátā rey Agripa, jíin ndihí níhín jēe cáyūcu jíin yó yāhá vijna. Yāha cúu tée jeē síquī de ní candonda ndivii jnáhan de hebreo ñuu Jerusalén jíin ndé ñuu Cesarea yāhá, te máni cácahān i jeē tú váha jeē cótecu gā de.

<sup>25</sup> Te jéni ni maá ná jéé tú na cuēchi xeēn ni sáha de jeē cúu de. Te je ni cahān de jeē cuní de quihīn de nuū rey Augusto jeē sándaā rey un síquī de, te jeē yúcuān ní cahān na jéé tají ná de quihīn de nuū rey un.

<sup>26</sup> Te tu cúcáhnū ni ná na jnūhun tee ná nuū tútu quihīn jíin de nuū rey yō. Jeē yúcuān ní ndacu ná jniñū ni quee de nuū yō jijnáhan yó, te cánuú gá nuū maá ní, tátā rey Agripa. Te stíchi ní de návāha nihīn na jnūhun tee ná síquī de, te quihīn jnūhun un jíin de nuū rey.

<sup>27</sup> Chi tu jéjniñū cuiti jeē tají ná in preso quihīn te núu tú castūhun ná nuū tútu na cuēchi ni sáha de, áchí Festo.

*Jeē ní cahān Pablo jehē maá de nuū rey Agripa*

## 26

<sup>1</sup> Yúcuán na te ni cahān rey Agripa jíin Pablo:

Vijna te jéhe ri jnūhun cahān rō jehē maá ró, áchí de.

Te Pablo ni sáha de ndaha de jeē ní quejéé de cáhān de, te suhva ni cahān de:

<sup>2</sup> Tátā rey Agripa, cúsi ni ná vijna jeē cúu cahān na jíin ní síquī ndihí jeē casájnuhún ñáyuu ñuu yō hebreo síquī ná.

<sup>3</sup> Chi je jíni vāha máá ní táca jéé ní tajnúni ñayuu ñuu yō hebreo jíin táca jnūhun jeē tu cáhīn inuú i jíin. Jeē yúcuān cáhān ndahú ná jíin ní jeē coo paciencia ni cuni sōho ní jnūhun cahān na jíin ní.

*Jeē ní cachi Pablo ndese ni sáha de nde ná tu sama ya ini de*

<sup>4</sup> Je cájini táca jnáhan ñuu yō hebreo ndese ni sáha ná ini ñuu nuū ní cacu ná jíin ini ñuu Jerusalén nde ná lulí ná.

<sup>5</sup> Te núu cácuni maá de cahān ndaā de, te je cájini de saña jéé ndé lulí ná ni quīvi ná nuū grupo fariseo, te grupo un nihin ga cánducú ndéyí de squícu de ley yā vēsú táca gá grupo tēe nación yō.

<sup>6</sup> Te ñūhun ni na jnūhun ni jejnūhun Yāā Dios nuū táca jíi yō jeē nastécu yā ndīyi, te máá síquī táca jnūhun yāha-ni cúu jeē cájequin de cuēchi síquī ná.

<sup>7</sup> Chi máá yó jeē cácuo yó jnáhan ndihúxi uū yucūn ñayuu Israel, cáñūhun ni yō jnūhun ni jejnūhun ya jeē nastécu yā ndīyi, te jeē yúcuān nduú ñuú cáchiñúhún yó Yāā Dios te cájejniñū yó núu yā. Te suni súcuān ñūhun ni maá ná, tátā rey Agripa, te síquī jeē nácani ná jnūhun jeē natecu ndīyi cúu jeē cájicān jnáhan ñuu yō hebreo cuēchi síquī ná.

<sup>8</sup> ¿Chi máá nastécu Yāā Dios táca ndīyi cájeni ni ní naún?

*Jeē ní cachi Pablo ndese ni jito xeēn de ñayuu cácandíje*

<sup>9</sup> Te máá ná chi ni jeni ni na jéé jíni ñūhún ndonda ná síquī ñayuu cácandíje i Jesús, Yāā ní jehnu ñuu Nazaret.

<sup>10</sup> Te súcuān ni sáha ná ini ñuu Jerusalén, chi táca sūtū cácujeñhu ni cajēhe de jnūhun jeē cóndiso jniñū ná chuhun ná cuéhē ñayuu vecāa síquī jeē cácandíje i Jesús, te iyó váha ni na núu cájehni de i.

<sup>11</sup> Te tijni jínu ni sáha ndevāha na jíin i ini táca vehe iī sinagoga jeē ni sáha fuerza na i jeē na stóo i jnūhun cácandíje i. Te xeēn ni quitī ni na núu i, chi nde ñuu jíicá ní jehēn ná ni sáha xeēn na jíin i.

*Jeē ní cachi tucu Pablo ndese ni sama ya ini de*

*(Hch. 9.1-19; 22.6-16)*

<sup>12</sup> Te sutū cácujeñhu ni cajēhe de jnūhun jeē cóndiso jniñū ná quihīn na sáha xeēn na jíin ñayuu cácandíje cáyúcu ñuu Damasco nuú.

<sup>13</sup> Te cuahān ná ichi ún, tátā rey, te caxū cúu, te ichi ándiví ní quiji ñn nduva ni ndindéé ndaxín núu na jíin núu téé cuangoo jíin ná, te víhyá gā ndí vēsú niāndii.

<sup>14</sup> Te ndíhi ná ní cacotúú ná nuū ñúhun. Te ni jini sōho ná ñn jnūhun ni cahān jíin ná jíin jnūhun yuhu yó hebreo: Saulo, Saulo, ¿najehe jito xeēn rō ruhū? Chi jeē sāha rō súcuan cúu nájñūhun siquī jeē tu jéndije ti, te jeñú yatá tí xini pulla, te súcuan stóho tí maá tí, áchí.

<sup>15</sup> Yūcuán na te ni cahān ná: ¿Na nihín cúu jeē cahán, Tátā? achí ná. Te maá jítoho na ní cahān yā jíin ná: Maá rí cúu Jesús, te jeē jito xeēn rō ñayuu cácadíje i ruhū cúu jeē jíto xeēn rō ruhū.

<sup>16</sup> Ndonda condichi rō, chi vēji ri nuū rō jeē tejníñu ri rohó sāha rō jniñu cúní rí, te nacani cájí rō jnūhun táca jeē ní jito rō vijna, jíin jeē steén gā rí nuū rō táca quívi quíji.

<sup>17</sup> Te jnama ri rohó núu táca jnáhan ñuu rō jíin núu ñáyuu táca gá nación, chi nuū ñáyuu un tájí rí rohó quíhín rō.

<sup>18</sup> Te tájí rí rohó quíhín rō nuū i, chi nájñūhun nanune rō tñnūú i cúu jeē steén rō jnūhun ri nuū i te jecūhun ni i. Chi ñayuu ná tu candíje i ruhū, nájñūhun cájica i nuū néé. Te jeē candíje i ruhū, quívi i nuū luz rí, te tuá quíhi i chíji jniñu jeē cuní jexeén jeē cúu Satanás, chi sa suhva quíhi i chíji jniñu cúní maá rí. Te tájí rí rohó quíhín rō nuū i, návaha candíje i ruhū te cone cáhnu ni rí nuū cuéchi i. Yūcuán na te ñnuú níhín tahú i jíin táca gá ñayuu jeē ni sándoo ri anuá i, áchí yá jíin ná.

### *Jeē ní cachi Pablo ndese ni jetáhú de jñūhun ni cahān yā*

<sup>19</sup> Jeē yúcuán tu ní sáníhni ni na núu jnūhun ni cahān yā ichi ándiví jíin ná, tátā rey Agripa.

<sup>20</sup> Chi ní jetáhú ná, te ni nacani ná jnūhun ya xihna gā nuū ñáyuu ñuu Damasco, te sáá te ni nacani ná jnūhun ya nuū ñáyuu ñuu Jerusalén jíin ní región Judea jíin núu ñáyuu táca gá nación. Te jnūhun ni nacani ná núu i cúu jeē na nácani ni i jeē stóo i cuéchi i te nasāma ini i sāha Yaā Dios, te na sāha i jniñu váha jeē steén jeē ní nasāma ini i.

<sup>21</sup> Te siquī jeē súcuan ni nacani ná jnūhun te ni cajñi jnáhan ñuu yó hebreo sañá ini templo, te ni cacuni i cahni i sañá núu.

<sup>22</sup> Te ni chindéé ñahán Yáā Dios sañá, te jeē yúcuán índichi níhni na ndé vijna nácani cájí ná jnūhun ya nuū ñáyuu cácujeñnu jíin núu táca-ni ñayuu. Chi tu chíso gá na jnūhun siquī jñūhun jeē ní nacani Moisés jíin táca gá tēe ni canacani jñūhun Yaā Dios nde jenahán.

<sup>23</sup> Te ni cundaā jñūhun ni canacani de un jéé cánuú ndoho Cristo nde cuu yā, te xihna gā maá yá natecu vēsú táca gá ndívi, te súcuan steén cájí yá nuū ñáyuu jeē jnama ya i, cúu ñayuu nación yó Israel jíin ñáyuu táca gá nación, áchí Pablo.

### *Jeē ní nducú ndéyi Pablo scandíje de Agripa jñūhun Jesús*

<sup>24</sup> Te súcuan ni cahān Pablo jehē maá de, te ni cahān jee Festo:

Ni nduloco rō, Pablo. Siquī jeē ni scuáha ndasí ró te jeē yúcuán ní tñvi xini rō, áchí de.

<sup>25</sup> Te ni cahān Pablo:

Tu ní tñvi xini na, tátā Festo, chi sa suhva iyó cájí ndāā jñūhun cáhna na.

<sup>26</sup> Te maá rey Agripa je jíni vāha de tāca jniñu ní íyo jeē ní nacani ná, te tu yúhú ná cahān na táca jnūhun yáha, chí je jíni vāha na jéē jíni de tāca jnūhun yáha, chí tú sāhi ní cúu tācá jniñu yáha.

<sup>27</sup> Tātā rey Agripa, ¿á cándíje ní jnūhun jeē ní cacahān tēe ni canacani jnūhun ya nde jenahán? Jéni ní na jéē cándíje ní, áhí Pablo.

<sup>28</sup> Yūcuán na te ni cahān Agripa jíni Pablo:

Va jéni ní rō jeē jíni jecu jnūhun ni cahān rō te sāha ró jeē cándíje ri Cristo, achí de.

<sup>29</sup> Te ni cahān Pablo:

Vésú jíni jecu-ni jnūhun chí jíni cuéhē, te jícan tahu na jéē maá ní jíni táca gá tēe cájini sōho jnūhun cáhán na vijna, na cándíje ní nájnūhun cándíje maá ná, te tu cúni na jéē cónuhni ní nájnūhun núhni na.

<sup>30</sup> Te ni ndihi ni cahān Pablo táca jnūhun yáha. Te ni ndocuiñi rey jíni gobernador jíni Berenice jíni táca gá tēe cácujeñu cáyūcu jíni de.

<sup>31</sup> Te ni cacujiyo de, te ni candajñūhun sín maá de:

Tú ní ñni cuēchi ní sāha tēe yáha jéē cúu de ni jeē cóne ga de vecāa.

<sup>32</sup> Te ni cahān Agripa jíni Festo:

Cuu siáá ní tēe yáha núu jeē tu ní cáhán maá de jeē quihín de nde nuū rey yō nación Roma núu, áhí de.

### *Jeē ní catajé de Pablo cuahān de ñuu Roma*

## 27

<sup>1</sup> Te ni cundaā jeē quihín Pablo jíni barco nde Italia, te suni quingoo ná jíni de. Te Pablo jíni sava ga tēe cáhiin vecāa ni quivicoo de ndaha ñni capitán naní Julio jeē quíndeca de tēe un ndé Italia. Te Julio cúu ñni jnáhan grupo soldado naní Augusto.

<sup>2</sup> Te nde ñuu Adramitio nuū cájecuiñi barco ni quenda ñni barco ni quee, te ni quivicoo ná, te quihín barco un táca ñuu jeē yíhi chíji Asia jeē yúcu yumar. Te suni cuahān Aristarco jíni ná, te maá de cúu tēe ñuu Tesalónica región Macedonia.

<sup>3</sup> Te inga quiví ni jinūcoo ná ñuu Sidón nuū cájecuiñi barco. Te Julio ni cundáhú ní de Pablo, te ni jēhe de jnūhun ni jecondēhe Pablo táca amigo de, te ni cachindéé ñáhán i de.

<sup>4</sup> Te ñuu yúcuani ní quenda barco cuahān jíni ná. Te siquí jeē níhin yíhi tachí te tu ní cúu quihín yohó barco, te ni tee xiin barco cuahān jíni ná xiin isla Chipre, ñuhun jeē íne sín nuū ndúte, te lado jecó barco ni quendōo Chipre.

<sup>5</sup> Te ni cayāha ná yumar Cilicia jíni Panfilia cuahān ná, te ni jinūcoo ná ñuu Mira ndañú Licia.

<sup>6</sup> Te ñuu yúcuani ní nihín capitán ñni barco jeē véji ñuu Alejandría te quihín ichi Italia, te ni cahān de jíni ná ni quivicoo ná barco un.

<sup>7</sup> Te cuéhē quiví ni cahān na núu ndúte jíni barco, chí cuéé ní jica, te fuerza-ni ní jinūcoo ná yuñú Gnido. Te tuá ní jēhe tachí un jnūhun quihín yohó barco, te ni cayāha ná núu jnūhma tachí xiin ñúu Salmón jeē íne nuū isla Creta.

<sup>8</sup> Te yōhoyo ni canducú ndéyí tēe cáscaca barco un, ní yāha jíni ná ní yumar xiin Creta. Te ni jinūcoo ná ñni lugar naní Buenos Puertos nuū cájecuiñi barco, te yajni un íne ñuu Lasea.

<sup>9</sup> Te je ni cuu cuehē quivī ni cajica ná jíin barco. Te je yajni quejéé vico míjin, te yūcuan cúu tiempo jeē yí jica barco te sanaa te coo jnūndóho nuū mar. Te ni cahān nihin Pablo jíin de:

<sup>10</sup> Tātā jijnáhan ní, jíin na jéē yóhoyo yí coo viaje yáha, te quiji jnūndóho siquī barco, te naa barco jíin ndajniñu, te nde maá yó sanaa te cuu yō, achí de.

<sup>11</sup> Te tu ní chúsóhó capitán jeē cahán Pablo, chí sa suhva jeē cahán tēe scáca barco un jíin tēe chíi barco.

<sup>12</sup> Te siquī jeē tu iyó váha lugar nuū ni jécuiñi barco un jéē cóyúcú de ní vico míjin, te ni cajeni ni cuehē gā de jeē váha ga núu quendacoo de yūcuán. Chí cájeni ni de jeē núu cuu te jinūcoo de ñuu Fenice te yūcuán coyúcú de vico míjin. Chí Fenice suni íne yundúte isla Creta nuū cájecuiñi barco, te ndijin ichi noroeste jíin suroeste.

### *Jeē ni jécuiñi ñin tachī nihin jeē stóna ndute mar*

<sup>13</sup> Te ni jécuiñi vīta táchi ichi sur, te ni cajeni ni de jeē jinú de Fenice nuú, te ni cascáca ga de barco jica jíin de xiin Creta.

<sup>14</sup> Te ni cunúu jecu gā, te ni quejéé-ni ñin tachī nihin ndasí jeē naní táchi nordeste.

<sup>15</sup> Te tuá ni cúu ga quihīn yohó barco, chí ni chundahá-ni tachī cuahān jíin, te ni casiáa-ni de jeē cascáca de, te cháha chúcuan cuahān barco jíin ndihi ná sáha tachī.

<sup>16</sup> Te ni yáha jíin ná xiin isla lulí jéē naní Clauda, nuū jnúhma tachī. Te vésú súcuan te yóhoyo uhū ni cascáca ná barco lulí jeē ndiquín yatā barco cáhnu.

<sup>17</sup> Te ni casquívī ná ini barco cáhnu. Te ni casucun núu de barco cáhnu jíin yoho. Te cáyühú de jeē quihín barco nuū yaxín ndute nuū naní Sirte te jñī nuū ñíti, te jeē yūcuan ní casnúu de sahma cóquin jeē stechí te jica barco. Te ni casiáa de jeē na quihín ndé chí chundahá táchi.

<sup>18</sup> Te tu jécuiñi cuiñi jeē yíhi tachī nihin. Te inga quivī un ní caquejéé de cájete de ndajniñu ndiso barco, návaha nduñama gā barco te ma queé chíji ndute.

<sup>19</sup> Te quivī uní ni cajēhe núu ná ndaha ni cajete ná máá ndajniñu jéjñiñu barco.

<sup>20</sup> Te cuehē quivī tu ní cájito ná níandii ni quimi siquī jeē ín vicō, ni tu jécuiñi cuiñi tachī nihin ún, te tuá cáñuhun ni na cácu ná.

<sup>21</sup> Te ni cuu quivī jeē tuá cáyeji cuiñi na stáa. Te ni jecondichi Pablo sava méhñu tēe ún, te ni cahān de:

Tātā jijnáhan ní, núu ní cájetáhú ní jñuhun jeē ni cahān ná te ma quéndacoo yó Creta nuú, te ni ma cóto yó jnūndóho yáha ni ma náa ndajniñu núu.

<sup>22</sup> Te vijna cahān nihin na jíin ní jeē cuandeyí ni ni jijnáhan ní, chí ni ñin ní má cúu ní, vésú naa barco.

<sup>23</sup> Chí jeē cúni ni quiji ñin ndajéhé jeē ní tají máá Yáa Dios nuū ná. Chí máá yá cúu Jitoho ná, te jéjñiñu ná núu yā.

<sup>24</sup> Te ndajéhé yā ún suhva ni cahān yā jíin ná: Pablo, ma yūhu ró, chí váha-ni jinū rō nuū rey nación Roma, te jeē siquí rohó te sáha Yáa Dios jeē cácu ndihi tēe cáhīn jíin ró ini barco yáha, achí yá jíin ná.

<sup>25</sup> Tātā jijnáhan ní, ma yūhu ní núu súcuan, chí máá ná cúcáhnu ni na Yáa Dios jeē coo nájnūhun ni cahān ndajéhé yā jíin ná.

<sup>26</sup> Te jinū nahín yó ñin isla, te ma jinú yachí yō nuū quíngoo yó, achí de.

<sup>27</sup> Te ni cuu uxí cuñ jecuáa nde jeē ní quejéé táchi, te jica barco nuū mar Adria, te cháha chúcuan cuahān barco sáha tachī. Te máá jecuáa ún te jeē ní

cuu sava ñuú te cájeni ni tēe cáscáca barco jeē je cuacuyajni jinū barco ñuhun íchi.

<sup>28</sup> Te ni casínga de ñin jeē cáchicuāhá de nasaa cúnú ndute, te ni cajini de jeē iyó ócō xahūn ñin metro. Te ni jica barco jecu gā te ni casínga tucu de, te ni cajini de jeē iyó ócō uxā na metro.

<sup>29</sup> Te cáyūhú de jeē jécujnáhan barco jíin toto, te ni cajihni de cuūn cāa gancho náhnu yatā barco un, te ni cascáne de nde jehē ndúte návāha chituu te jecuiñi barco. Te yōhyo jnáa de jeē na cúndijin yachī.

<sup>30</sup> Te tēe cáscáca barco un ní canducú de cunu de quíngoo de jíin barco lulí te cācu de nuū jnúndóho quiji siquī barco cáhnu núú. Jeē yúcuán ní casnúu de barco lulí un núu ndúte, te casáha-ni de nájnūhun jeē snúu de inga cāa gancho íchi núú barco návāha tú cuni ñayuu jeē cáculi de cunu de quíngoo de.

<sup>31</sup> Te ni cahān Pablo jíin capitán jíin táca soldado:

Núu tú coyūcu tēe yáha ini barco cáhnu jíin yó, te ma cácu cuiti maá ní jijnáhan ní, áchí de.

<sup>32</sup> Yūcuán na te soldado ni cajehnde de yoho núhni barco lulí, te ni jneni-ni cuahān.

<sup>33</sup> Te nuū cuácundijin te ni cahān Pablo jíin táca tēe un jēe na cáji de staā. Te suhva ní cahān de:

Vijna iyó úxí cuūn quiṽi jeē cándito ní te tu cáyeji cuiti ni stāā.

<sup>34</sup> Te cáhán ndahú ná jíin ní jeē na cáji ni stāā, návāha nanihīn ni ní te cācu ní, chí ni ñin yó má cúu, ni ma tují cuiti yō, achí de.

<sup>35</sup> Te ni ndihī ni cahān de jnūhun yáha, te ni quihīn de ñin staā, te mēhñu táca ñayuu un ní nacuatáhú de nuū Yaā Dios, te ni tahú sáva de staā ún, te ni quejéé de yéji de.

<sup>36</sup> Yūcuán na te ni candusiñi ni ndihī de, te suni ni cayejí de staā.

<sup>37</sup> Te ndivii na jēe cáñūhun ná ini barco cúu uū ciento uní xico xahūn ñin ná.

<sup>38</sup> Te ni cayejí vāha ndihī ná. Yūcuán na te ni cajete de trigo cuahān nuū ndúte un, návāha na ndúñama gā barco.

### *Jeē ni quée barco chīji ndute*

<sup>39</sup> Te nuū ní cundijin te ni cajito de ñuhun, te tu ní cánacuni de ndé nuū cúu. Te ni cajito de nuū íne cuiñi ndute, te suni maá ññti cúu, te cájeni ní de jinū de yūcuán jíin barco núu na cúu núú.

<sup>40</sup> Te ni cajehnde de yoho núhni cāa gancho yúcuán, te ni caquendōo cāa un núu mar. Te ni canandají de yujnu jeē scotú chíí barco, te ni nacata caa de sahma cóquin íchi núú návāha chundahá táchī barco, te ni quejéé caca quihīn jíin de íchi núu iyó ññti.

<sup>41</sup> Te ni jinū barco nuú níhin náquijnáhan ndute. Te ni quēe barco nuū ññti ñūhun chīji ndute, te ni jññi-ni íchi núú te tuá ní jica cuiti, te yatā barco un ní cahya-ni jeē níhin ni caní suhmā ndute mar.

<sup>42</sup> Yūcuán na te ni candajñūhún soldado jeē cáhni de táca preso návāha ma sūte i te cunu i quíngoo i.

<sup>43</sup> Te cúní capitán un jēe cācu Pablo, te ni jesicoo de. Chi sa ni cahān de núu ndé ñayuu jiní sūte te xihna gā i na núngoo i sūte i nuū ndúte, te na quēnda-ni i quihīn i nuū ñūhun íchi.

<sup>44</sup> Te suni súcuán na quécōo ndihī i quihīn i, sava i coso candá i jíin yujnu cúnu te sava ga i jíin pedazo yujnu barco. Te súcuán ni cacācu ndihī ná ní jinūcoo ná ñuhun íchi.



*Jeē ni íne Pablo isla Malta***28**

<sup>1</sup> Te nuū ní cacācu ná te ñayuu cáyūcu yúcuan ní cacachi i nuū na jéē isla un nání Malta.

<sup>2</sup> Te ñayuu un ní cacundáhú ni i saña jínáhan ná, te ni cascáyú i ñn ñuhūn cáhnu, te ni cacahān i jíin ná jeē nasaā ná, chí mǐjin sáha jeē cúun saū.

<sup>3</sup> Te ni stutú Pablo jecu tujnu íchi. Te jeē jnāā de tujnu un núū ñuhún te ñn coō xeén jínu ti ni quenda ti tujnu un jéē ní cujihní, te ni chiyuhú-ni ti ndaha de.

<sup>4</sup> Te ñayuu cáyūcu yúcuan ní cajito i jeē ndíta caa coō un yíyuhú tí ndaha de, te ni cacahān i:

Tēe yáha vā sanaa te ni jehni de ndīyī núu súcuan, te vēsú je ni cācu de nuū mar, te máá yāā sándaā jniñu ñayuu tu jéhe ga yā jñuhun jeē cótecu de, áchí i.

<sup>5</sup> Te ni caja Pablo ndaha de, te ni ñinga coō un núū ñuhún, te tú na vé ni ndóho de.

<sup>6</sup> Te cándetu tāca ñáyuu jeē chūhun i cuiñi de chí cotúú-ni de te cuu de. Te ni cunahán téyí cándetu i, te ni cajito i jeē tú na vé ni ndóho de. Yūcuán na te ni nasāma cájeni ni i, te ni cacahān i jeē ñn yaā cúu Pablo.

<sup>7</sup> Te yajni yūcuan íyó ñuhun tēe cújéhnu ga Malta un, nání de Publio. Te ni cana tēe un saña jínáhan ná, te ni jēhe núu de vehe de ni coyūcu ná jíin de unī quivī, te ni jito yúcún de sañá.

<sup>8</sup> Te tátá Publio cāa de, chí ndóho de cuehyī quiji jíin cuehyī niñi. Te ni jecondēhe Pablo tēe ún, te ni jicān tahu de te ni soó de ndaha de siquī tēe ún, te ni nduvāha-ni de.

<sup>9</sup> Yūcuán na te ni quijicoo ndihi ga ñayuu cácuñu yūcuán, te suni súcuan ni canduvāha-ni i.

<sup>10</sup> Te ñayuu un ní cajēhe i cuehē ndajniñu ni cacutahū ná. Te nuū ni jíinū quivī jeē quíngoo tucu ná jíin barco, te ni cajēhe i tācá ndajniñu cuu ná ichi.

*Jeē ni jíinū Pablo ñuu Roma*

<sup>11</sup> Te unī yoō ni coyūcu ná Malta. Te ñn barco jeē véji ñuu Alejandría ni ine Malta ñí vico mǐjin, te ichi núu barco un ndéé uñ figura ídolo ñuu de nání Cástor jíin Pólux. Te ni quívicoo ná barco un cuángoo ná.

<sup>12</sup> Te ni jíinūcoo ná ñuu Siracusa, te yūcuan ní coyūcu ná unī quivī.

<sup>13</sup> Te ni quenda barco cuahān jíin ná nduu nduu yundúte, te ni jíinūcoo ná ñuu Regio. Te inga quivī ún vāha ni quiji tachí ichi sur, te ni quendacoo ná ñuu Regio, te uñ quivī te ni jíinūcoo ná ñuu Puteoli.

<sup>14</sup> Te yūcuan ní caquijnáhan ná jíin jecu hermano cácandije, te ni cacana de saña ní coyūcu ná jíin de ñn semana. Yūcuán na te ni quendacoo ná jéē quihñ ná ñuu Roma.

<sup>15</sup> Te hermano cáyūcú ini ñuu Roma, je ni canihñ de jñuhun jeē jinúcoo ná, te ni quendacoo de, te sava de ni caquijnahan de saña ndé ñuu Foro de Apio te sava ga de ñuu Tres Tabernas. Te ná ni jito Pablo nuū de jíináhan de, te ni nacuatáhú de nuū Yaā Dios, te ni ndundeyí ni de.

<sup>16</sup> Te sáá te ni jíinūcoo ná ini ñuu Roma, te capitán ni squiví de tāca preso ndaha tēe cújéhnu nuū tācá soldado ñuu Roma. Te ni cajēhe de jñuhun jeē cone sñn Pablo te condito ñn soldado de.

*Jeē ní nacani Pablo jñuhun ya ini ñuu Roma*

17 Te nuū uní quivī te ni cana Pablo tāca tēe cácujuhnu nuū jnáhan ñuu de hebreo cáyucú ini ñuu Roma. Te ni cacutútú de, te ni cahān Pablo jíin de:

Tátá jijnáhan ní, tú cuiti na vé ni sáha ná síquī jnáhan yó hebreo ni síquī tācá jniñu ní catajnuñi jíi yō. Te vēsú súcuan te ni cajni i sãña ndé ñuu Jerusalén ni casquívī i sãñá ndaha tēe ñuu Roma jijnáhan de.

18 Te tēe ñuu Roma jeē cácujuhnu cáyucú Cesarea ni castichí de sãñá, te cácuni de siáá de sãña núú, chí ni cajini de jeē tú na cuéchi ná jēe cúu ná.

19 Te jnáhan ñuu yō hebreo tu ní cájēhe de jnūhun. Jeē yúcuan ní cahān na jēe quiji ná núu maá rey cujēhnu ga nde ñuu Roma yāhá te sándaā maá de síquī ná. Te tú vēji ná jēe cáquin na cuéchi síquī ñayuu nación yō.

20 Jeē yúcuan ní cana ná níhín jijnáhan ní, návaha cuni na táca ní te ndajnuhun yó. Chí yóhó ñáyuu Israel cáñūhun ni yō jeē nátecu ndīyī, te suu jnūhun un nácani ná, te jeē yúcuan cúu jeē nuhni na jíin cadena yáha, áchí de.

21 Te ni cacahān tēe un jíin Pablo:

Tú ni ñin carta ní cátají ñáyuu cáyucú Judea nuū na jēe cástūhún de jnūhun ní, te tāca jnáhan yó Judea jeē ní quijicoo yāhá, tú ni ñin jnūhun néé ní cacahān de síquī ní.

22 Te cánujnahan ni ná cuni sōho ná ndese cúu jnūhun jeē cahán ni, chí je cájini na jēe tācá-ni lado cacahān ñayuu contra síquī jnūhun jeē jēe steén ni, áchí de.

23 Te ni cajeni de ñin quivī, te ni quijicoo cuehē de vehe nuū néne Pablo. Te ni nacani de jnūhun ndese ndácu Yaā Dios jniñu, te ni steén cají de jnūhun nde jenéhen te nde ni ini. Te súcuan ni nducú ndéyí de scándíje de tāca tēe un jnūhun Jesús, te ni steén de jeē suni súcuan cáhán ley jeē ni jéhe ya nuū Moisés jíin jnūhun jeē ní catee tēe ni canacani jnūhun Yaā Dios nde jenahán.

24 Te ni cacandíje sava de jnūhun ni cahān Pablo, te sava ga de tu ní cájetáhú de.

25 Chí tú ñinuú cáhīyo ni de. Te sáá cánducú de quingoo de te ni cahān Pablo:

Ndaā cahán jnūhun jeē ní cahān Isaías, tēe ni nacani jnūhun Yaā Dios nde jenahán, chí suhva ni cahān de jíin táca jíi yō ní sáha Espíritu Santo:

26 Ni cahān Yaā Dios:

Cuáhán núu jnáhan ñuu rō yāhá te cahān rō jíin i:

Vēsú cuni nahín váha ró te ma jécūhun ni rō,

te vēsú coto vāha ró te ma cúni rō.

27 Chí yōhoyo níhni ni rō,

chí tu cácuni rō cuatáhú ró.

Te yōhoyo uhū cájini sōho ró,

chí tu cánujnahan ni rō cuni sōho ró jnūhun ri.

Te nájnūhun cájesi rō tinūu ró

cúu jeē tu cácuni rō nanducú ró ndese cúu,

te tu cácuni rō jeē násāma ini rō

návaha nasávaha ri anuá rō nuū cuéchi ró, ní achi Yaā Dios.

Achí tutu.

28 Núu súcuan te na cástūhun ná nuū ni jēe jnūhun ni tájí Yáa Dios jeē jnáma ya yohó, nde vijna te tájí yá jnūhun yáha quihñ nuū ñáyuu tācá nación jeē tu cájini i jnūhun ya, te máá i chí cuni sōho i, áchí de.

29 Te ni jíinu ni cahān de jnūhun yáha, te cuangoo jnáhan de hebreo, te yōhoyo ni cacahān de síquī jnūhun yáha jíijnáhan de.

<sup>30</sup> Te ni condee Pablo uū cuiyā vehe jeē ní quihin núu de ún. Te ni cusī ni de cahān de jíin táca ñáyuu ní quiijicoo nuū de.

<sup>31</sup> Te jéhnū-ni ni nacani de jnūhun ndese ndácu Yaā Dios jniñu, te ni steén de jnūhun máá Jítoho yō Jesucristo, te tú ni ñn ní jési jeē nácani de jnūhun.

## CARTA JEE NI TEE SAN PABLO APOSTOL NUU ÑAYUU ÑUU ROMA

<sup>1</sup> Máá rí cúu Pablo, mozo Jesucristo, chi ni cana Yaā Dios ruhū cúu ri apóstol yā, ni jeni ya ruhū te ni tají yá ruhū jeē nácani ri jñuhun jeē jnáma ya ñayuu.

<sup>2</sup> Te jñuhun un ní jejnūhun ya nde jenahán ndasí, te yósó núu tútu iī jeē ní catee tēe ní canacani jñuhun ya.

<sup>3</sup> Te jñuhun un cáhán siquī Jitoho yō Jesucristo, Yaā cúu Sēhe Yaā Dios. Te ni nduu ya tēe, ni cacu ya chíji yucūn rey David.

<sup>4</sup> Te ni natecu yā mēhñu ndíyi ní sáha Espíritu iī, te súcuan ní steén Yaā Dios jeē cúu ya Sēhe ya jeē ndíso poder.

<sup>5</sup> Te jeē jiín Jesucristo ní jēhe Yaā Dios jniñu luu yáha jeē cácuu ri apóstol, cájica ri jiín jñuhun Cristo, návaha coo ñayuu táca nación jeē candíje i jeē sáha ya jehē i, te cuatáhu i nuu yá.

<sup>6</sup> Te suni máá ró jijnáhan ró, suni ni cana ya rohó ní quávicoo ró ndaha Jesucristo.

<sup>7</sup> Te tée ri carta yáha cuajeē nuū rohó ñayuu ñuu Roma. Chi ni cundáhu ní Yaā Dios rohó, te ni cana ya rohó jéē coo ndoo coo iī rō nuu yā. Te ñuhun ní rī jeē máá Tátá yō Yaā Dios jiín Jitoho yō Jesucristo sáha ga yā jeē váha rōhó, te sáha ya jeē coo ndeyí coo sī ní rō.

### *Jeē cuní Pablo quihñ de ñuu Roma*

<sup>8</sup> Te xihna gā cástūhun rí nuū rō jeē nácuatáhu rí nuū Yaā Dios jeē siquī rohó jijnáhan ró, chi ní sáha Jesucristo jeē váha rōhó. Chi ní ñáyivi jíté núu jñuhun cuahñ ndese váha cácadíje rō yá.

<sup>9</sup> Te máá Yaā Dios jiní yā jeē niní jícán tahú rī jehē rō jijnáhan ró nuū jicán tahú rī. Chi yōhyo ndíhví ní rī jejniñu ri nuū yā jeē nácani ri jñuhun Sēhe ya.

<sup>10</sup> Te niní jícán tahú rī nuū yā jeē núu cuní yā te nde vijna te cuu jecondēhe rí rohó.

<sup>11</sup> Chi cúu ní rī coto ri nuū rō jijnáhan ró, te steén gā rī jñuhun ya nuū rō, návaha quendōo váha ga anuá rō te cuiñi níhin ga rō jiín.

<sup>12</sup> Súcuan cuní rí návaha sáha yó jéē inuú coo ndeyí ní yō jijnáhan yó siquī jeē inuú cácadíje yó yá.

<sup>13</sup> Hermano jijnáhan ró, cuní rī jeē na jécūhun ní rō jeē tíjni jínu ní cuu ní rī jecondēhe rí rohó, te nde vijna ná tu cuu. Chi cuní rí scuité núu ga rī jñuhun ya mēhñu ró, nájnūhun ní sáha ri mēhñu ñayuu táca gá nación.

<sup>14</sup> Chi cúu ri tēe táu siquī jñuhun ya, chi táu rī nacuāha ri jñuhun ya nuū ndíhi ñayuu, cúu ñayuu jiní gā siquī ndíhi jeē iyó ñáyivi jíin jéé tu jiní cuiñi, cúu ñayuu túhva jíin jéé tú túhva.

<sup>15</sup> Jeē yúcuan cúu jeē ndíhví ní rī jeē suni nuū rohó ñayuu ñuu Roma nacani ri jñuhun jnáma ya yohó.

### *Jeē ndíso jñuhun váha ya poder*

<sup>16</sup> Chi tu cúcanu rī siquī jñuhun váha ya, chi yúcuan cúu poder Yaā Dios jeē jnáma ya táca ñáyuu cácadíje, xihna gā ñayuu hebreo te suni táca gá ñayuu.

<sup>17</sup> Chi jñuhun váha ya un steén nuū yō jeē ndáhva Yaā Dios cuēchi yó siquī jeē candíje yó jéé sáha ya jehē yō, te máá jéé candíje yó ní cuahñ yō. Chi súcuan

cahán nuū tútu ii: Ñayuu jeē ní ndahva yā cuēchi i, técu i jeē candíje i jeē sáha ya jehē i, áchí.

*Siquí jeē iyó ndasí cuēchi ñayuu*

<sup>18</sup> Chi jíni vāha yó jéē Yaā Dios andiví, cuāha ya castigo xeēn nuū tāca ñayuu tu cácan dije te máni cuēchi casáha. Chi jíni jniñu néé casáha i te cájesi i nuū jnúhun ndaā.

<sup>19</sup> Te ma cúu cahān i jeē tu jécūhun ni i siquī ndese Yaā cúu Yaā Dios, chi máá yá ni steén nuū i.

<sup>20</sup> Chi jíni táca jeē ni sáha ya te cúu jécūhun ni ñayuu ndese Yaā cúu máá Yaā tu jíto i nuū. Chi nde ni jecōo ñayiví jíni ndé vjna te cúu jécūhun vāha ni i jeē máá yá cúu Yaā Dios te iyó poder yā ní cáni. Te jeē yúcuan má cúu cuiti cahān i jeē tu jíni i jeē iyó yá.

<sup>21</sup> Chi vésú ni cajini i ndese Yaā cúu ya, te tu ní cáchiñúhún i ya jeē cúu ya Yaā Dios, te ni tu ní nácuatáhú i nuū yā. Chi sa suhva ni nduu i ñayuu cájeni cáhá ni, chi ni candunéé íi i, te ni quendōo nee ni anuá i.

<sup>22</sup> Cácahān i jeē ndichí i, te sa suhva cácanéé i.

<sup>23</sup> Chi ni castóo i Yaā Dios jeē yóhoyo luu cújéhu, jeē ma cúu cuiti. Te ni cajetáhú i táca imagen jeē casáha i, jeē cáa nájnūhun tēe cájihí, te suni nde imagen saa jíni cóo jíni quiti cájica ndicúun ndaha.

<sup>24</sup> Te jeē yúcuan ní siaá Yaā Dios i jeē na sáha i táca jniñu jnéhén jniñu néé jéé cuní i. Te casáha i jniñu néé jíni jnáhan i jeē cúu máá jnúhun canu.

<sup>25</sup> Chi tu ní cácan dije i jnúhun ndaā Yaā Dios, chi sa ni cacandíje i jnúhun stáhú. Te cáhoyo yíñúhún i te cáchiñúhún i nuū táca jéé ni sáha ya, lugar jeē chíñúhún i máá Yaā ni sáha ún, Yaā jeē cánuú cahān yō jeē cújéhu ya ní cáni. Amén.

<sup>26</sup> Jeē yúcuan ní siaá Yaā Dios i jeē na sáha i táca jniñu néé jéé cándiyo ni i jeē cúu máá jnúhun canu. Chi nde ñahan ni casama ña modo síhí, te ni quiví ña jíni modo neé.

<sup>27</sup> Te suni súcuan tēe ni casiaá de modo chíjniñu jíni ñahan. Te nde ni nduquijí de ni casáha ndiyí de jíni jnáhan yí de, te tēe jíni tēe ni casáha de jniñu jnúhun canu. Te cándoho de castigo siquí jniñu néé ní casáha de.

<sup>28</sup> Te jeē tu ní cácani i cuajnúhún i Yaā Dios, jeē yúcuan ní siaá yā i jeē na cáni néé ni i, te sáha i táca jniñu jeē tu iyó vāha.

<sup>29</sup> Te máni máá na jniñu jeē tu iyó ndáá cándihvī ni, te cájica jnéni, casáha jniñu néé, cándiyo ni, cájito uhū jnáhan. Te máni jeē cácuuésún ni, cájehni ndiyí, cájehnáhan, cástáhú, cáśáhuhū jnáhan, cáśájnúhún siquí jnáhan.

<sup>30</sup> Cácahān jnúhun néé siquí jnáhan, cájito uhū Yaā Dios, cácujeé ni, cáśándúxi máá, cáśátéyí máá, cájequin costumbre neé, tu cájendetū nuū tatá nuū naná.

<sup>31</sup> Te tu cájecūhun cuiti ni, tu squícu jnúhun jéjnūhun, tu iyó máni jíni jnáhan, tu íne cáhnu ni nuū jnáhan, tu cúndáhú ni jnáhan.

<sup>32</sup> Te je cájini vāha i jeē ni sándaā Yaā Dios jeē ñayuu casáha súcuan, cánuú jnahnū ndetū i. Te vésú súcuan cájini i, te níni casáha i jniñu néé un, te suni cánujnahan ni i jeē casáha jnáhan i súcuan.

*Ndaā sándaā Yaā Dios siquí cuēchi*

## 2

<sup>1</sup> Núu súcuan te róhó jéé cahán cuēchi siquí jnáhan, núu na-ni ñayuu cúu ró, ma cúu cahān rō jeē tú na cuēchi máá ró. Chi jeē cahán rō cuēchi siquí jnáhan

ró cúu jeē ndénehen ró cuēchi siquī maá ró. Chi róhó jēē cahán cuēchi, suni súcuan sáha máá ró cuēchi.

<sup>2</sup> Chi jíní yō jeē Yaā Dios, ndaā sáha ya jeē ndóna ya siquī cuēchi ñayuu casáha súcuan.

<sup>3</sup> Te róhó jēē cahán cuēchi siquī ñayuu casáha cuēchi, te suni súcuan sáha máá ró, ¿te á jéni ni rō jeē cácu máá ró quiṽi ndóna Yaā Dios siquī cuēchi, chí naún?

<sup>4</sup> ¿A cújēē ni rō nuū jnúhun jeē yóhō vāha ni Yaā Dios jín ró, jín jēē iyó paciencia yā jeē tú yachí cuāha ya castigo nuū rō? ¿Te á tu jécūhun ni rō jeē jnúhun jeē yóhō vāha ni yā sáha jeē nácani ni rō siquī cuēchi ró?

<sup>5</sup> Chi nihni ni rō te tu nácani ni rō siquī cuēchi ró. Te jeē yúcuan cáyā gā rō castigo siquī rō quiṽi sáha Yaā Dios juicio, máá quiṽi jeē cóo ndijin jeē ndaā sándaā yā siquī cuēchi.

<sup>6</sup> Chi chunaa yā nuū ná ñn ná ñn ñayuu núu ndese jniñu ni casáha i.

<sup>7</sup> Te ñayuu jeē tu jécuiñi i jeē sáha i jniñu vāha, cuāha ya jnúhun jeē cótecu i ní cáni. Chi ndúcú i quiṽi i nuū ndujéhnu yíñúhún i, nuū ní cáni cotecu i.

<sup>8</sup> Te quití ni yā te cuāha ya castigo nuū ñayuu cújēē ni nuū yā, te cúnihni ni nuū jnúhun ndaā, chi sa nuū jnúhun yacuá yóho jetáhú i.

<sup>9</sup> Te tāca ñayuu casáha jniñu néé, chí nihñi i jnúndóho xeēn te cucuíhyá ndasí ni i, xíhna gā ñayuu hebreo te suni súcuan ñayuu tāca gá nación.

<sup>10</sup> Te sa suhva tāca ñayuu casáha jniñu vāha, chí quiṽi i nuū ndujéhnu yíñúhún i, te coo ndeyí coo sñi ni i, xíhna gā ñayuu hebreo te suni súcuan ñayuu tāca gá nación.

<sup>11</sup> Chi Yaā Dios tu sáha ya cuenta ndese cúu ñn ñn ñayuu, chí inuú sáha ya jín i.

<sup>12</sup> Chi tāca ñayuu jeē casáha cuēchi, vēsú tu cáyihí i chíji ley jeē ni jéhe ya nuū Moisés, te tu níni ley un te jnahnū ndetú i. Te tāca ñayuu cáyihí chíji ley Moisés te casáha cuēchi, jín ley un sándaā yā cuēchi i.

<sup>13</sup> Chi tu ndáhva Yaā Dios cuēchi ñayuu jeē maá jēē cúni nahín-ni i jnúhun cahán ley yā. Chi sa suhva ñayuu squícu jeē cahán ley yā cúu jeē ndáhva yā cuēchi i.

<sup>14</sup> Chi ñayuu tāca nación jeē tu cánevāha tutu ley jeē ni jéhe ya nuū ñayuu hebreo, te núu cásquícu máá i ley yā, suu cúu jeē cánevāha i ley yā ini anuá i, vēsú tu cánevāha i tutu ley un.

<sup>15</sup> Te súcuan cástéén i jeē jnúhun ndácu ley un chí ñúhun ini anuá i. Te tāca jēē cájeni ni i jín anuá i, suu cúu jeē steén nuū i siquī núu ni sáha i cuēchi chí vāha ni sáha i.

<sup>16</sup> Te súcuan coo máá quiṽi jeē jín Jesucristo sándaā Yaā Dios siquī tāca jēē tu iyó vāha jeē ní cajeni sáhí ni tāca ñayuu. Súcuan cahán jnúhun vāha ya jeē nácani ri.

### *Siquī jeē tu cásquícu ñayuu hebreo ley Moisés*

<sup>17</sup> Te róhó cácahān rō jeē téē hebreo cácuu ró, te cátenuū rō maá ley Moisés, te cácutéyí ró jeē siquī Yaā Dios.

<sup>18</sup> Te cájeni ni rō jeē jíní rō ndese nújnahan ni yā, jín jēē cúu nácāji vāha ró ndé-ni cúu jniñu vāha, chí ni cacutúhva ró ley un.

<sup>19</sup> Te cájeni ni rō jeē maá ró cácuu téē stéén ichi Yaā Dios nuū ñayuu tu cájini cuiti, jín jēē cúu sáha ró jēē cúndijin ini anuá ñayuu cájica nájnūhun nuū néé.

<sup>20</sup> Te cájeni ni rō jeē cúu stéén rō nuū ñayuu tú túhva jnúhun ya, jín jēē maá ró cácuu maestro nuū ñayuu tu jécūhun ni. Chí jín tutu ley yā te cájeni rō ndese cúu jnúhun ndíchí jnúhun ndaā, cájeni ni rō.

<sup>21</sup> Núu súcuan te máá ró jeē castéén nuū ñáyuu, ¿te naun tu cástéén rō nuū máá ró? Te máá ró jeē cácahān jeē ma sácúihná i, ¿te naun cásácúihná máá ró?

<sup>22</sup> Te máá ró jeē cácahān jeē ma cósiquí ndéē i, ¿te naun cásíquí ndéē máá ró? Te máá ró jeē cácahān jeē cácuquini ni rō ídolo, ¿te naun cásácúihná ró ndajníñu jeē yúcu ini vehe ídolo?

<sup>23</sup> Te cácutéyí ró jíin ley Yaā Dios, te vēsú súcuan te cásáha ró jéē cácahān ñayuu siquī yā, chi tu cásquícu máá ró jñūhun ndácu ley yā ún.

<sup>24</sup> Chi súcuan yósó núu tútu iī: Ñayuu tāca gá nación, máni cácahān ndevāha i siquī Yaā Dios, jeē siquí cuēchi róhó ñáyuu hebreo.

<sup>25</sup> Te núu cásquícu ró ley Moisés, yūcuán na te níhín jníñu ndije jeē ní canihīn rō jnunī circuncidar. Te núu tu cásquícu ró ley un, te vēsú ni cuu ró circuncidar, te nájnūhun jeē tu ní cúu ró.

<sup>26</sup> Te tēe tāca nación, núu cásquícu de jníñu ndácu ley un, vēsú tu ní cáníhīn de jnunī circuncidar, núu súcuan te nájnūhun ni canihīn de jnunī circuncidar.

<sup>27</sup> Te tēe jeē tu ní cúu circuncidar yíquí cúñu de, te cásquícu de ley yā, máá de cahān cuēchi siquī rō. Chi tu cásquícu ró, vēsú cánevāha ró tutu ley un, te ni cuu ró circuncidar.

<sup>28</sup> Chi nasūu jéē cáa ichi síquí ñn tēe sáha jeē cúu ndije de tēe hebreo. Te ni nasūu jéē cúu circuncidar yíquí cúñu ñn tēe sáha jeē cúu de tēe ndaā.

<sup>29</sup> Chi sa suhva tēe cúu hebreo ndije, cúu jeē ini anuá de ñūhun jñūhun ndaā. Te tēe cúu circuncidar ndije, chi nde jíin ini jíin anuá de sáha de jníñu ndaā te nasūu jéē ndíso de jnunī circuncidar jeē cahān ley un cúu. Tēe cándaā súcuan, nasūu ñáyuu cájejnúhún i de, chi máá Yaā Dios.

### 3

<sup>1</sup> ¿Núu súcuan te na vé iyó gá nuū ñáyuu hebreo jeē quéndō vāha ga i? ¿Te ndé níhín jníñu jeē casáha i circuncidar?

<sup>2</sup> Vāha ndasí níhín jníñu. Xihna gā nihín jníñu jeē ni jéhe Yaā Dios jñūhun ya nuū máá i.

<sup>3</sup> Te vēsú sava i tu ní cácahdije, ¿te á suu sáha jeē ma squícu ga Yaā Dios jñūhun ni jejnūhun ya, chí naún?

<sup>4</sup> Tú cuiti jeē súcuan, chi vēsú núu ndihí ñayuu castáhú i, te Yaā Dios chi iyó ndáa yā. Chí suhva yósó nuū tútu iī jeē ni cáhān ñn tēe jíin yá:

Cahān ñayuu jeē iyó ndáa ni jíin tāca jñūhun cáhān ni,

te cuni i jeē iyó ndáa ní vēsú núu cácahān i siquī ní.

Achí tutu.

<sup>5</sup> Te cácahān sava ñayuu jeē iyó váha jeē sáha yó cuēchi, chi cuēchi yó jéjníñu stéén jeē iyó ndáa Yaā Dios. Núu súcuan ¿te á cuu cahān yō jeē tú vāha sáha Yaā Dios jeē jéhe ya castigo núu jéjníñu cuēchi yó súcuan? (Va cáhān-ni nde ri nájnūhun cácahān ñayuu ñayíví.)

<sup>6</sup> Tú cuiti jeē súcuan. Chí núu jeē tú vāha sáha Yaā Dios, ¿te ndese cuu sándaā yā cuēchi ñayuu ñayíví?

<sup>7</sup> Te núu jñūhun stáhú cácahān ñayuu jéjníñu stéén jeē yóhoyo cújéhnu Yaā Dios siquī jeē máni cáhān ndaā yā, ¿te á cuu cahān yō jeē tú vāha jeē cahān yā jeē cuēchi cúu jeē castáhú i?

<sup>8</sup> Tuú, chí núu jeē súcuan cúu, te cuu cahān yō jeē vetū-ni sáha yó jéē neé návāha quee jeē váha núu. Te sava ñayuu cácahān ndevāha i siquī rī jeē súcuan cástéén rī, te tú ndaā. Ñayuu ún chí iyó váha jeē ndénehen ya cuēchi siquī i.

*Ndivii yō iyó cuēchi*

<sup>9</sup> Núu súcuan ¿te á váha ga ñayuu cácuu yóhó ñáyuu hebreo vésú inga ñayuu naún? Tú cuíti jeé súcuan. Chi je ni cacahān yō jeé vésú ñayuu hebreo chí ñáyuu táca gá nación, ndivii yō yíhi chíji cuēchi.

<sup>10</sup> Chi suhva cáhán tutu i:

Tú cuíti na ñayuu ndaā iyó, ni ñn i.

<sup>11</sup> Te tú cuíti ñayuu jécūhun ni iyó, te tú ni ñn i nánducú i Yaā Dios.

<sup>12</sup> Ndihi i ni cascuíta i jnūhun ya, te inuú-ni ni castívi ndihí i máá i.

Te tú cuíti ñayuu sáha jniñu váha iyó, ni ñn i.

<sup>13</sup> Yaū sucūn i cúu nájñūhun yaū ndiyi jeé núne, chí máni jnūhun stáhú cácahān i.

Te nájñūhun veneno coō yíhi yuhu i,

<sup>14</sup> chí máni máá jnúhun ndevāha jnūhun uvuā cácahān i.

<sup>15</sup> Te yōhyo ñama jehē i jeé cáhni i ndiyi.

<sup>16</sup> Te ndé-ni cúu-ni nuū cájica i te squívi i jnūndóho jeé jnahnú ndetū ñayuu.

<sup>17</sup> Te tu cájica cuíti i jíin jnúhun coyūcu máni i,

<sup>18</sup> te ni tu cánacani ni i jeé cónso iyo i nuū Yaā Dios.

Achí tutu.

<sup>19</sup> Te jíni yō jeé táca jnúhun cáhán ley jenahán, chí cáhán nuū ñáyuu yíhi chíji ley un, návāha ndihí i ma cúu cahān i jehē i. Chi ndenehen Yaā Dios cuēchi siquī i nde jíin ñáyuu ní ñáyivi.

<sup>20</sup> Chi tú ni ñn ñayuu quendōo ndaā i nuū yā jeé nducú i squícu i jniñu ndácu ley un. Chi ley un jéjniñu máni návāha cuni yō jeé iyó cuēchi yó.

### *Jeé jnáma ya yohó síquī jeé candíje yó jéé sáha ya jehē yō*

<sup>21</sup> Te vijna te je cájini váha yó ndese ndáhva Yaā Dios cuēchi yó. Te nasūu ley un sáha jeé quendōo ndaā yō, vésú maá tutu ley jíin téé ni canacani jnūhun ya, ni cacahān ndese ndáhva yā cuēchi ñayuu.

<sup>22</sup> Chi táca ñáyuu jeé cácandíje i jeé ni jíhi Jesucristo jeé chúnaa yā cuēchi i, chí ndahva Yaā Dios cuēchi i síquī jeé súcuan cácandíje i. Chi inuú-ni cúu táca ndihí ñayuu.

<sup>23</sup> Chi ndihí yó ni casáha cuēchi, te jeé yúcuan tu ní cúu quendōo ndaā yō nuū Yaā Dios.

<sup>24</sup> Te síquī jeé yóhyo váha ni Yaā Dios, jeé yúcuan ndáhva yā cuēchi yó súcuan-ni. Chi síquī jeé ni jíhi Cristo Jesús cúu jeé jnáma ya yohó.

<sup>25</sup> Chi Yaā Dios ni jeni ya Cristo návāha socō yā maá yá chunaa yā cuēchi yó jéé ni jíhi yā. Te jnáma ya yohó núu súcuan cándíje yó. Te súcuan ni sáha Yaā Dios návāha stéén yā jeé Yaā ndaā cúu ya. Chi ichi yátá ni iyo paciencia yā, te tu ní chíhi ya cuenta cuēchi ñayuu.

<sup>26</sup> Te tiempo yáha stéén yā jeé Yaā ndaā cúu ya, chí ndaā sáha ya jeé squéndōo ndaā yā ñayuu candíje vésú iyó cuēchi i, chí cácandíje i jeé ní chunaa Jesús cuēchi i ni ndahva yā.

<sup>27</sup> Núu súcuan ¿te á cuu cutéyí gá yō síquī maá yó? Ma cúu cuíti, chí ma cúu cutéyí yó cani ni yō jeé váha squícu yó ley yā. Chi jnáma ya yohó máá síquī jeé candíje yó jéé sáha ya jehē yō.

<sup>28</sup> Núu súcuan te je jíin jeé ndáhva Yaā Dios cuēchi yó síquī jeé súcuan cándíje yó, te nasūu jéé nducú yó squícu yó jéé ndácu ley.

<sup>29</sup> ¿Te á núu maá-ni ñayuu hebreo cúu ya Yaā Dios, chí naún? Tuú, chí suni cúu ya Yaā Dios jeé jnáma ñayuu táca gá nación.



<sup>30</sup> Chi ñn-ni Yaā Dios iyó, te ndáhva yā cuēchi ñayuu cácanđije jeē ni sáha ya jehē i, cúu ñayuu ndíso jnunī circuncidar, cúu ñayuu jeē tuú.

<sup>31</sup> Te jeē candíje yó jéē jnáma ya yohó, ¿á sáha jeē tuá jini ñúhún squícu yó ley yā, chí naún? Tú cuiti, chi sa suhva sáha jeē váha ga cuu squícu yó ley yā.

### *Abraham cúu ñn ejemplo nuū yō*

## 4

<sup>1</sup> Núu súcuan ¿te ndese cahān yō siquī tāca jéē ní cuu jíin jíi yō Abraham? ¿Ndese ni ndahvā cuēchi de?

<sup>2</sup> Nasūu jéē ni sáha máá de cúu jeē ní ndahva Yaā Dios cuēchi de. Chi núu jeē súcuan cúu núu, te cuu cutéyi de jeē váha ni sáha de. Te tu ní cutéyi de, chi nasūu siquī jeē ni sáha máá de cúu jeē ní ndahva Yaā Dios cuēchi de.

<sup>3</sup> ¿Chi ndese cáhán tutu ii? Cáhán jeē ní candíje Abraham jeē sáha ya jeē ni jéjnūhun ya nuū de, te jeē yúcuan ní ndahva yā cuēchi de.

<sup>4</sup> Te ñn ñayuu sájniñu, te yāhu i chi nasūu jéē cútahū i cúu, chi jeē chúnaa yō nuū i cúu.

<sup>5</sup> Te jeē jnáma Yaā Dios ñayuu, chi jeē cútahū i cúu. Chi vésu tu cúu squícu i tāca jniñu váha, te núu candíje i jeē jnáma ya i nuū cuēchi i, yūcuán na te ndahva yā cuēchi i.

<sup>6</sup> Te David suni ni cahān de ndese yōhyo ndetū ñayuu jeē ndáhva Yaā Dios cuēchi i, vésu tu cúu sáha i ni ñn jniñu jeē quéndōo ndaá i nuū yā.

<sup>7</sup> Chi ni cahān de:

Nacā ndetū ñayuu jeē íne cáhnu ni yā nuū jniñu néé ni sáha i, te tu ndénehen ya cuēchi siquī i.

<sup>8</sup> Te nacā ndetū tee jeē tuá chíhi máá Jítoho yō cuenta cuēchi de. Achí tutu.

<sup>9</sup> ¿Te á máni máá ñayuu squícu ley circuncidar cúu jeē quéndōo ndetū? ¿Chí suni quéndōo ndetū ñayuu jeē tu cúu circuncidar naún? Suni máá i quéndōo ndetū i. Chi je ni cahān yō jeē ní candíje Abraham jeē sáha ya jeē ni jéjnūhun ya, te jeē yúcuan ní ndahva yā cuēchi de.

<sup>10</sup> Te ná ni ndahva yā cuēchi de, ¿á je ni cuu de circuncidar, chí ndé ná tuú? Nasūu jéē jé ni cuu de circuncidar, chi nde ná tuú.

<sup>11</sup> Te cuéé gá te ni nihīn de jnunī circuncidar. Te suu ni cuu ñn seña, nájnūhun ñn sello jeē ní ndahva yā cuēchi de siquī jeē súcuan ni candíje de. Te jeé yúcuan ní cahān yā jeē cuu de jíi nuū tāca ñayuu jeē candíje i jeē sáha ya jehē i, suni nuū ñayuu tu ní cúu circuncidar, chi suni ndahva yā cuēchi máá i.

<sup>12</sup> Te suni cúu de jíi nuū ñayuu ní cuu circuncidar, te nasūu máni jeē ní cuu i circuncidar, chi suni jeē ní jni i ejemplo de. Chi cácanđije i jeē sáha ya jehē i, nájnūhun ni candíje máá de nde ná tu cuu de circuncidar.

### *Núu candíje yó te sáha Yaā Dios jeē ni jéjnūhun ya*

<sup>13</sup> Chi ni jéjnūhun Yaā Dios nuū Abraham jíin núu tāca yúcūn de jeē cuāha ya ní ñáyivi cuu tahū de. Te nasūu siquī jeē ní nducú de squícu de ley yā cúu jeē ní jéjnūhun ya un núu de, chi sa suhva siquī jeē ní candíje de jeē ni jéjnūhun ya, te ni ndahva yā cuēchi de.

<sup>14</sup> Chi núu jeē máni máá ñayuu nducú squícu ley cúu jeē nihín jeē ni jéjnūhun ya, núu súcuan te cándíje cāha yó nuú, te ma nihín jniñu jeē ni jéjnūhun ya ún.

<sup>15</sup> Te ley chi sáha jeē nihín ñayuu castigo siquī jeē tu cúu squícu i. Te núu jeē tu ley, te suni tú na jnūhun stívi ñayuu siquī ley coo núu.

16 Núu súcuan te ni jejnūhun ya jeē sāha ya jeē váha jíin ñáyyuu siquī jeē candíje i jeē súcuan sāha ya, te jeē cútahū i súcuan-ni cúu. Te jeē ni jéjnūhun ya ún, íyó cutú nuū tāca yúcūn Abraham, te nasūu núu maá-ni ñayuu jeē nducú squícu ley jenahán, chi suni nuū tāca ñáyyuu cácanđíje nájñūhun ni candíje Abraham. Te súcuan cúu de jíi nuū tāca yó jeē cácanđíje yó.

17 Súcuan ni sāha Yaā Dios chi ni candíje de jeē sāha ya. Chi súcuan cáhán tutu íi: Ni jeni ri rohó cuu ró jíi nuū cuehē ndasí ñáyyuu. Súcuan ni cahān maá Yaā jeē nastécu ndíyí te cáhán yā ndese coo tāca jéē ná tu coo.

18 Te ni candíje de, te ni cocuhun teyí ni de jeē ni jéjnūhun ya jeē coo cuehē yucūn de, vēsú tuá na modo coo sēhe de núu. Te jeē yúcuan ní nduu de jíi nuū cuehē ndasí ñáyyuu, nájñūhun ni cahān Yaā Dios: Súcuan nducuehē yucūn rō, achí yá jíin de.

19 Te je yajni jinū de ciento cuiyā, te vēsú súcuan te tu ní quénda de nuū jñūhun cándíje de, vēsú jiní de jeē maá de jíin ñasihí de Sara je jéhnū ndasí ndíndúu de jeē ma cúu ga coo sēhe de.

20 Te tu ní nácani siquī ni de jeē ma cándíje ga de jñūhun ní jejnūhun Yaā Dios jeē coo sēhe de. Chi sa suhva ni candíje ñihin ga de, te ni nacuatáhú de nuū Yaā Dios.

21 Chi ni cucáhnu váha ni de jeē cúu squícu Yaā Dios ndíhi jeē ni jéjnūhun ya.

22 Te jeē yúcuan ní ndahva yā cuēchi de siquī jeē súcuan ni candíje de.

23 Te nasūu maá-ni siquī Abraham cúu jeē yosó núu tútu jeē ní ndahva yā cuēchi de jeē ní candíje de.

24 Chi suni yósó jéē siquī yohó jíjnáhan yó. Chi suni ndáhva yā cuēchi maá yó jéē candíje yó jéē cúu ya Yaā ní nastécu Jitoho yō Jesús.

25 Chi ni jihí Jesús jeē chúnaa yā cuēchi yó, te ni natecu yā návāha ndahva Yaā Dios cuēchi yó.

*Ndese quéndōo ñayuu jeē ndáhva yā cuēchi*

## 5

1 Núu súcuan te je ni ndahva Yaā Dios cuēchi yó siquī jeē ní candíje yó jéē sāha ya jehē yō. Te jeē yúcuan ní sāha ya jeē ní ndívi yó núu jñūhun maní yā jíin yó, siquī jeē ni jihí Jitoho yō Jesucristo jehē yō.

2 Chi maá Cristo ni sāha jeē ní quívicoo yó núu Yaā Dios, chi ni sāha ya jeē váha yohó siquī jeē súcuan cándíje yó. Te cáhiin ñihin yó jíin jñūhun jeē sāha ya jeē váha yohó. Te cúsī ni yó chi ñūhun ni yó jeē jinú yó nuū lúu cujéhnū yó jíin Yaā Dios.

3 Te nasūu maá yáha-ni, chi suni cúsī ni yó jeē ndóho yó jñúndóho. Chi jíin yó jeē maá jñúndóho sāha jeē jéndeýí ni yō.

4 Te jeē jéndeýí ni yó sāha jeē íje váha yó cuu yó ñáyyuu ndaā. Te jeē íje váha yó sāha jeē ñūhun ni yó tāca jéē váha jeē cóo.

5 Te tāca jéē ñūhun ni yó, chi nihīn nahín yó. Chi jñūhun cúndáhú ni Yaā Dios yohó, ni cunuú ini anuá yō, sāha Yaā Dios jeē jíin Espíritu Santo jeē ni jéhe ya nuū yō.

6 Chi náa ndóho yó jéē ma cúu cuítí jnama yó maá yó, te ni jihí Cristo jehē yohó jéē cúu yó ñáyyuu íyó cuēchi. Te ni jihí yā maá quíví jeē jé ni jeni Yaā Dios.

7 Te yíi cúu jeē cúu íin ñayuu jehē inga ñayuu, vēsú jehē íin ñayuu ndaā. Chí sanaa te íyó jínu jeē chúndeýí ni íin tēe cuu de jehē íin tēe ndaā váha.

8 Te maá Cristo chi ni jihí yā jehē yó náa máni cuēchi sāha yó, te súcuan ni steén Yaā Dios jeē cundáhú ni yā yohó.

9 Te vijna je ni ndahva Yaā Dios cuēchi yó síquī jeē ni jíhī Cristo jehē yō. Núu súcuan te suni jíní vāha yó jée jnama Cristo yohó núu castigo quiji quivī sáha Yaā Dios juicio.

10 Chi náa cúu ga yō enemigo Yaā Dios, te síquī jeē ni jíhī Sēhe ya jehē yō, te ni sáha ya jeē ndívi yó núu jnúhun manī yā jíin yó. Te jeē súcuan ní ndívi yó nuū jnúhun manī yā jíin yó, te suni jíní vāha yó jée cácu yó síquī jeē técu Cristo, nduú yá jíin yó.

11 Te nasūu máa yáha-ni, chi suni cúsi ndasí ni yō jíin Yaā Dios síquī jeē ni sáha Jitoho yō Jesucristo jehē yō, chi máa yá ni sáha jeē ní ndívi yó núu jnúhun manī Yaā Dios jíin yó.

### *Jnúhun Adán jíin jnúhun Cristo*

12 Núu súcuan te jíní yō jeē ni quívi cuēchi ini ñayīvi ní sáha máa ñn-ni tēe Adán. Te jeē síquī cuēchi yúcuan te ni jecōo cuehyī jéhni ñayuu. Te jeē yúcuan cúu jeē jíhí ndíhi ñayuu, chí ndíhi i yíhi cuēchi.

13 Te nde ná tu cuāha ya ley nuū Moisés, te je íyó cuēchi ini ñayīvi. Te síquī jeē ná tu coo ley yā, te tu ní chíhi ya cuenta jeē castívi i.

14 Te vésú súcuan te nde tiempo Adán te nde tiempo Moisés ni yíhi ñayuu chíhi cuehyī jeē jéhni i síquī jeē iyó cuēchi i. Chi ni jíhí i síquī cuēchi ni casáha máa i, vésú tu ní sáha i jnáhan cuēchi jeē ni sáha Adán jeē ní cuníhni ni de nuū ñn jniñu ní ndacu ya. Te Adán ni cuu de ñn muestra máa Yaā ní quiji cuéé gá.

15 Te jnúhun jeē ni sáha Adán cuēchi, tu quíjnáhan cuiti jíin táhū jeē jnáma Yaā Dios yohó. Chi jeē ní stívi máa ñn-ni tēe ún, jeē yúcuan cúu jeē jíhí ndíhi yó. Te jnúhun jeē jnáma Yaā Dios yohó cújéhnu ndasí gá, chí síquī jeē ni sáha máa ñn-ni tēe Jesucristo cúu jeē súcuan-ni jnáma ya ndíhi ñayuu candije.

16 Te cuēchi jeē ni sáha máa ñn-ni Adán, tu quíjnáhan cuiti jíin jnúhun jeē jnáma Yaā Dios yohó. Chi síquī máa ñn-ni cuēchi ún te ni quívicoo ñayuu chíhi jnúhun jnahnū ndetū i. Te jnúhun jeē jnáma ya ñayuu, sa suhva sáha jeē súcuan-ni ndáha yā cuēchi i, vésú yóhyo cuehē cuēchi ni casáha i.

17 Chi síquī jeē ni sáha máa ñn-ni tēe Adán cuēchi, te ni nihīn poder cuehyi jéhni ñayuu. Te sa suhva síquī jeē ni jíhí máa ñn-ni tēe Jesucristo, te víhyá gā ni nihīn ñayuu máa yá poder jeē cótecu i caca ndaā i jíin yá. Chi ni ndahva yā cuēchi i síquī jeē yóhyo vāha ni yā.

18 Núu súcuan te síquī jeē ni sáha máa ñn-ni tēe Adán cuēchi, te ni quívicoo ndíhi ñayuu chíhi jnúhun jnahnū ndetū i. Te sa suhva síquī jeē ni sáha máa ñn-ni tēe Jesucristo ñn jniñu vāha ndasí, te ndáha Yaā Dios cuēchi ndíhi ñayuu te cotecu i ní cáni.

19 Chi síquī jeē tu ní jéndije máa ñn-ni tēe, te ni quívicoo cuehē ndasí ñayuu chíhi cuēchi. Te suni súcuan síquī jeē ní jendije máa ñn-ni tēe Jesucristo, te ndáha Yaā Dios cuēchi cuehē ndasí ñayuu.

20 Te ni jēhe ya ley yā návāha cuni yō jeē cuehē cuēchi casáha yó. Te jeē ní nducuehē cuēchi yó, te víhyá gā cuehē cúu jnúhun jeē vāha ni yā jeē íne cáhnu ni yā nuū yō.

21 Núu súcuan te nájnúhun ni nihīn poder cuehyi jéhni ñayuu síquī jeē iyó cuēchi i, suni súcuan iyó poder jnúhun jeē vāha ni yā jíin yó. Chi ndáha yā cuēchi yó te cotecu yō ní cáni síquī jeē ni jíhí Jitoho yō Jesucristo jehē yō.

*Jeē tuá yíhi yó chíji cuēchi chí yíhi yó ndaha Cristo*

## 6

1 Núu súcuan ¿te ndese cahān yō? ¿A caca ga yō jín cuéchi návāha víhyá gā sáha ya jeē váha yóhó jéē cóne cáhnu ni yā nuū yō?

2 Ma cúu cuiti. Chi nájñuhun je ni jihī yō jeē tuá yñi yó chíji cuéchi, te ma cúu ga caca yó jín cuéchi núu súcuan.

3 ¿A tu cájecūhun ni rō jeē tāca yó jeē ní jendute yó síquī jeē ni quívi yó ndaha Cristo Jesús, suni ni jendute yó síquī jeē ni quívi yó chíji jñuhun jeē ni jihī yō jín yá?

4 Chi jeē ní jendute yó cúu nájñuhun ni quindūji yó jéē ni jihī yō jín yá. Te vijna te cuu caca yó jín vida jeē jeē ni jéhe ya nuū yō, chi nájñuhun suni ni natecu yō jín yá. Chi ni natecu yā ni sáha Tátá yā jín poder jeē cujéhnu ndasí yá.

5 Chi núu ni cundúú yó jín yá síquī jñuhun jeē ni jihī yō jín yá, te suni súcuan cundúú yó jín yá síquī jñuhun jeē ní natecu yō jín yá.

6 Chi jíní yō jeē ní naa modo maá yó jeē ni jíca yó jín ichi yátá, chi ni quívi yó núu jñuhun jeē ni jihī yō jín Cristo jicā cruz. Te súcuan ni naa modo yō jeē cúu yó mozo nuū cuéchi, návāha tuá cuajññu yó núu táca jññu jeē máni cuéchi cúu.

7 Chi ñayuu jeē jé ni cajihī, je ni quendacoo i chíji tāca cuéchi.

8 Te núu je ni jihī yō jín Cristo, te cándíje yó jéē suni súcuan ni natecu yō jín yá.

9 Chi jíní yō jeē ní natecu Cristo, te ma cúu cuiti ga yā, chi cuehyī jéhni yóhó, tuá na vé cúu sáha jín yá.

10 Chi jeē ni jihī yā, te ñin jínu-ni ni jihī yā jeē síquī cuéchi ñayuu. Te jeē técu yā vijna, chi sáha ya jeē cuní Yaā Dios.

11 Te suni súcuan róhó jínánan ró, sáha ró cuenta jeē nájñuhun ni cajihī rō jeē ní quendacoo ró chíji cuéchi. Te cátecu rō návāha sáha ró jéē cuní Yaā Dios, chi ndúú ró jín Jítoho yō Cristo Jesús.

12 Núu súcuan te ma cuáha ga rō jñuhun quíhi ró chíji cuéchi jín yíqui cúñu rō jeē cúu. Chi cuéchi ún stíhví ni rohó jéē na sáha ró táca jéē ndíyo néé ni rō.

13 Te ma cuáha ró máá ró cuajññu ró núu cuéchi jeē cócuu ró jín jññu néé. Chi sa suhva cuāha ró máá ró nuū Yaā Dios, te sáha ró cuenta jeē nájñuhun je ni cajihī rō te ni canatecu rō nuū yā. Te cuāha ndíhi ró máá ró nuū yā jeē cuajññu ró núu jññu ndaā.

14 Chi tuá na poder cuéchi jeē cundeyí jín ró, chi tuá cáyihí ró chíji ley jenahán, chi sa cáyihí ró chíji jñuhun jeē váha ni yā jín ró.

*Jñuhun mozo jeē steén ndese quéndō ñayuu cácadíje*

15 ¿Ndesé sáha yó núu súcuan? ¿A caca ga yō jín cuéchi síquī jeē tuá yñi yó chíji ley jenahán, chi sa yñi yó chíji jñuhun jeē váha ni yā jín yó? Ma cúu cuiti.

16 Chi cájini rō jeē núu cuāha ró máá ró jeē cuatáhú ró sájññu ró núu ñin tee, núu súcuan te cácuu ró mozo nuū téé ún, te cánuú cuandíje ró núu de. Te suni súcuan núu cuāha ró máá ró jeē sáha ró cuéchi, te mozo cuéchi cácuu ró, te cuu rō. Te núu cuatáhú ró nuū maá yá, te mozo yā cácuu ró jéē cáca ndaā rō.

17 Te na cútahū yō nuū Yaā Dios, chi vésú ni cacuu ró mozo nuū cuéchi, te vijna chi nde jín ñin jín ánuá rō ni cajetáhú ró nuū jñuhun ya jeē ni quívicoo ró núu.

18 Te vijna te je ni nduu libre rō jeē tuá cácuu ró mozo nuū cuéchi, te cájeññu ró núu jññu ndaā.

19 (Ni cahān rī ñn jñūhun ndese cúu siquī mozo ini ñayīvi yáha, chi tu cájécūhun yachī ni rō siquī jñūhun ya.) Núu súcuan te nájnūhun ni cajēhe rō máá rō nde saá jeē ní cajejníñu rō núu táca jniñu jñéhén jniñu neé, suni súcuan cuāha rō máá rō vijna jeē cuajníñu rō núu jniñu ndaā, návāha coo ndoo coo ñi rō nuū Yaā Dios.

20 Chi nde náa cácuu rō mozo nuū cuéchi, te tu ní cájiejníñu rō núu jniñu ndaā.

21 ¿Te na vé ni canihīn rō siquī cuéchi ni casáha rō un jeē cáccuanu rō vijna sáha? Tú cuiti, chi máá jeē jnahnú ndetū rō ñí cáni sáha.

22 Te vijna te je ni canduu libre rō jeē tuá cácuu rō mozo nuū cuéchi, te cájiejníñu rō núu Yaā Dios. Te suu sáha jeē quéndōo vāha rō, chi cáhīyo ndoo cáhīyo ñi rō nuū yā, te nde sandihī te cotecu rō ñí cáni.

23 Chi yāhu jeē nihīn ñayuu siquī cuéchi cúu jeē jnahnú ndetū i. Te sa tahū jeē jéhe Yaā Dios cúu jeē cotecu yō ñí cáni andiví, siquī jeē nduú yó jíin Jítoho yō Cristo Jesús.

*Jñūhun ñasihí jíin yñi jeē steén ndese quéndōo ñayuu cáccandje*

## 7

1 Hermano, je cájini rō ndese cáhán ley yā, te cájini rō jeē yñi ñayuu chíji ley maá-ni núu técu i ñayīvi yáha.

2 Te yāha cúu nájnūhun ñn ñahan jeē ní quijnáhan, chi cáhán ley jeē yñi ña ndaha yñi ña maá-ni núu técu de. Te núu ni jihī yñi ña, te je ni quenda ña chíji ley jeē ní quijnáhan ña jíin de.

3 Núu súcuan te núu quijnáhan ña jíin inga tēe níni técu gā yñi ña, te casíquí ndéé ña de. Te núu je ni jihī yñi ña, te je ni quenda ña chíji ley un. Te cuu quijnáhan ña jíin inga tēe, chi nasūu jeē casíquí ndéé ña núu súcuan.

4 Te suni súcuan rōhó jíináhan rō, ñānī mánī, chi nduú rō jíin Cristo. Chi nájnūhun ni cajihī rō jíin Cristo, te ni quendacoo rō chíji ley jenahán. Te vijna chí nájnūhun ni quijnáhan rō jíin inga, cúu jeē ní quivicoo rō ndaha Cristo, Yaā ni natecu mehñu ndīyi, návāha cuu sáha rō jniñu vāha jeē cuní Yaā Dios.

5 Chi ná ni cajica yó jíin modo maá yó nde saá, te ley un ní sáha jeē ní ndīyo neé ni yō táca jeē cuní yiqui cúñu yō jeē sáha yó. Te yūcuan ní sáha jeē jnahnú ndetū yō nuū.

6 Te vijna te je ni quenda yó chíji ley jenahán, chi nájnūhun je ni jihī yō jeē ma nihín gā poder siquī yō. Te súcuan te iyó libre yō jeē cuajníñu yó núu Yaā Dios. Te jíca yó jíin modo jeē jeē cuní maá Espíritu, chi tuá yñi yó chíji ley jeē ní tee Moisés jenahán.

*Siquī cuéchi jeē ñūhun ini anuá yō*

7 ¿Ndesé cahān yō núu súcuan? ¿A ley ndíso cuéchi? Tú cuiti jeē súcuan. Te núu jeē tú ley yā, te ma cūni cuiti rī jeē iyó cuéchi rī. Chi ma cūni rī jeē cuéchi cúu jeē ndīyo ni rī ndajníñu jnáhan rī núu tu ní cáhán ley jeē ma ndīyo ni yō.

8 Te súcuan ni nihīn cuéchi modo cocuu jíin rī. Chi siquī jeē ndácu ley jniñu jeē ma sáha yó cuéchi, te ni quejéé ndīyo ni rī sáha rī táca jeé neé. Te núu jeē tu ley, te suni tú na jñūhun stívi yó siquī ley nuú.

9 Chi ni íyo tiempo jeē técu rī jeē ná tu jecūhun ni rī jeē cahán ley. Te ná ni quejéé rī jécūhun ni rī jniñu jeē ndácu ley, te ni jecūhun ni rī jeē iyó cuéchi rī, te ni nduu rī nájnūhun ndīyi.

10 Chi ni jini rī jeē ley jeē sáha jeē cótecu anuá rī nuú, te tuú chi sa ni sáha jeē jnahnú ndetū rī nuú.

11 Chi jíin jéé ndácu ley un jniñu, te ni nihin cuéchi modo cocuu jíin rí, te ni stahú ruhū. Chi jíin jéé ndácu ley jniñu, te cuéchi ni sáha jeé ní quenda jnūhun jeé jnahnū ndetū rí.

12 Núu súcuan te iyó ndáa maá ley, te tācá jniñu ndácu chi iyó ndoo iyó ndáa vāha.

13 Núu súcuan te ley jeé iyó váha ún, ¿á suu sáha jeé jnahnū ndetū rí naún? Tú cuiti. Chi sa suhva maá cuéchi cúu jeé sáha jeé jnahnū ndetū rí, te súcuan stúu cuéchi ndese iyó maá. Chi jíin jniñu váha jeé ndácu ley te ni natūu jniñu néé jéé cúu cuéchi.

14 Chi jíin yō jeé nuū maá Espiritu vēji ley. Te ruhū chi sa névāha ri ñn modo neé maá rí jeé ni squívi ruhū jejniñu cāha rí nuū cuéchi.

15 Chi tāca jéé sáha ri, tu jécūhun ni rí najehē cúu jeé sáha ri. Chi jniñu váha jeé cuní rí sáha ri, tu ndé níhín rí fuerza sáha ri, chi sa suhva sáha ri jniñu néé jéé tu cúvāha ni rí sáha ri.

16 Te náa sáha ri jniñu néé jéé tu cuní rí sáha ri, núu súcuan te nácuni rí jeé iyó ndáa ley.

17 Núu súcuan te nasūu rúhū cúu jeé sáha jniñu néé un, chi modo neé jéé ñūhun ini anuá rí cúu jeé sáha cuéchi.

18 Chi jíin rí jeé modo maá rí jeé névāha ri ini anuá rí, tú cuiti na vé jeé váha iyó. Chi cuní rí sáha ri jniñu váha, te tu ndé níhín rí fuerza sáha ri.

19 Chi jniñu váha jeé cuní rí sáha ri, tu sáha ri. Te jniñu néé jéé tu cuní rí, sa yūcuan sáha ri.

20 Te náa sáha ri jniñu jeé tu cuní rí sáha ri, te nasūu rúhū cúu jeé sáha, chi modo neé jéé ñūhun ini anuá rí cúu jeé sáha.

21 Núu súcuan te ni jíin rí jeé súcuan cúu jíin rí: Vēsú cuní rí sáha ri jniñu váha, te sa máni modo neé cúu jeé ñūhun ini anuá rí.

22 Chi cúsi ni rí jíin ley Yaā Dios nde jíin ini anuá rí.

23 Te ni nacuni rí jeé iyó inga modo neé maá rí jeé jési nuū jeé cuní rí sáha ri jeé váha. Te cúu rí nájñūhun preso nuū cuéchi jeé jicu jíin rí.

24 Nacá jeé ndahú gá cúu rí núu súcuan. ¿Ndé ñn jnama ruhū nuū modo neé maá rí jeé jicu jíin rí jeé jnahnū ndetū rí?

25 Na cútahū ndasí rí nuū Yaā Dios, chi máa yá cúu jeé jnáma ruhū nuū modo neé rí siquī jeé ni jíhī Jitoho rí Jesucristo jehē rí. Núu súcuan te vēsú cuní yō squícu yó ley Yaā Dios, te jeé jíin fuerza maá yó ma cúu, chi modo neé maá yó sáha jeé jejniñu cāha yó nuū cuéchi.

*Siquī jeé jica yó jíin modo cuní Espiritu Yaā Dios*

## 8

1 Núu súcuan te ma ndénehen Yaā Dios cuéchi siquī ñayuu cáyihī ndaha Cristo. Chi tuá cájica i jíin modo neé maá i, chi sa suhva cájica i nájñūhun cuní maá Espiritu yā.

2 Chi modo jeé sáha Espiritu cúu jeé técu yō siquī jeé yíhi yó ndaha Cristo Jesús. Te yūcuan ní sáha jeé ní nduu libre yō nuū jnūhun jeé ni yíhi yó chíji cuéchi jeé jnahnū ndetū yō nuū.

3 Chi ni sáha Yaā Dios jeé quéndōo vāha ñayuu jeé tu ní cúu quendōo vāha jíin ley Moisés, siquī jeé tú na fuerza i jíin modo maá i jeé squícu i ley un. Chi ni tají yá Sēhe ya ni quiji, te ni nduu ya nájñūhun ñayuu cáhīyo cuéchi, návāha socō yā maá yá siquī cuéchi, vēsú tú na cuéchi ya. Te súcuan ni ndonda Yaā Dios siquī cuéchi jeé ní casáha ñayuu jíin modo neé maá i.

<sup>4</sup> Súcuan ni cuu návāha cuu squícu yó táca jniñu ndaā jeē ndácu ley, chi tuá jica yó jín modo neé máá yó, chí jica yó nájñuhun cúní máá Espíritu.

<sup>5</sup> Chi ñayuu jeē cájica jín modo neé máá, chí máni ndíhví ni i siquī jeē cuní máá i. Te ñayuu jeē cájica nájñuhun cúní Espíritu, chí máni ndíhví ni i siquī jniñu cúní máá Espíritu.

<sup>6</sup> Te jeē ndíhví ni yō siquī modo cuní máá yó sáha jeē jnahnú ndetū yō. Te jeē ndíhví ni yō siquī jniñu cúní máá Espíritu, sa suhva sáha jeē cotecu yō ní cání te coo ndeyí coo siñ ni yō.

<sup>7</sup> Chi ñayuu jeē ndíhví ni siquī modo neé cúní máá i, chí jito uhū i Yaā Dios, chí tu cúní i cuatáhú i ley Yaā Dios, te ni ma cúu squícu i.

<sup>8</sup> Jeē yúcuan, ñayuu jica jín modo cuní máá, tu cúu sáha i jeē cúshī ni Yaā Dios jín i.

<sup>9</sup> Te máá ró jijnáhan ró, chí tuá cájica ró jín modo cuní máá ró, chí cájica ró nájñuhun cúní Espíritu, chí ndéé Espíritu Yaā Dios ini anuá rō. Te ñayuu jeē tu ndéé Espíritu Cristo ini i, tu cáyihí i ndaha ya.

<sup>10</sup> Te núu ndéé Cristo ini rō, te vēsú ñn quiví te cuu yiqui cúñu rō jeē siquī cuēchi, te cotecu anuá rō siquī jeē ní ndahva Yaā Dios cuēchi ró.

<sup>11</sup> Te núu ini rō jijnáhan ró ndéé Espíritu máá Yaā jeē ní nastécu Cristo Jesús mehñu ndíyí, yūcuán na te máá yá suní sáha ya jeē natecu yiqui cúñu rō jeē cúu. Te sáha ya súcuan jeē jín máá Espíritu yā jeē ndeé ini rō.

<sup>12</sup> Núu súcuan, hermano jijnáhan ró, ndéé jniñu yó jéē caca ndaā yō, te nasūu jéé sáha yó modo neé cúní máá yó.

<sup>13</sup> Chi núu caca ró jín modo neé máá ró, te jnahnū ndetū rō. Te núu jín fuerza máá Espíritu snáā rō táca jniñu cásáha ró jín modo neé máá ró, te cotecu rō ní cání.

<sup>14</sup> Chi táca ñayuu jeē cándiquñ modo jeē steén Espíritu Yaā Dios, máá i cácuu séhe Yaā Dios.

<sup>15</sup> Chi Espíritu jeē ní canihñ rō, tu ní sáha ya rohó jéé cuu ró nájñuhun mozo nuū yā jeē yūhú tucu ró núu yā, chí sa ni sáha ya jeē cúu yó séhe ya. Te jeē yúcuan cúu jeē cahán jee yó: Tátá máá ná.

<sup>16</sup> Te máá Espíritu steén yā ini anuá yō jeē cúu ndije yó séhe Yaā Dios.

<sup>17</sup> Te núu séhe ya cácuu yó, te suni nihñ yō máá táhū jeē ní jéñuhun ya, te ñn cáhnu-ni coo tahū yō jín Cristo. Chi núu ndóho yó jín yá vijná, suní cujéñu yó jín yá andiví.

<sup>18</sup> Núu súcuan te sáha ri cuenta jeē táca jnúndóho jeē ndóho yó vijná, lúlí ndasí cúu nuū jñuhun jeē cujéñu luu yó jín yá cucuéé gá.

<sup>19</sup> Chi ndíhí jeē ní jécōo, yōhyo cándetu jeē na sáha Yaā Dios jeē nduvāha, quiví quénda ndijñ jeē cujéñu séhe Yaā Dios jijnáhan i.

<sup>20</sup> Chi táca jéé ní jécōo, chí ní quiví chíji jñuhun jeē tu quéndōo vāha. Te nasūu jéé ní castíví máá, chí ñayuu ní casáha cuēchi, te jeē yúcuan ní squéndōo Yaā Dios súcuan. Te máni cándetu jeē ndúvāha.

<sup>21</sup> Chi ñn quiví te táca jéé ní jécōo, chí quenda chíji jñuhun jeē tíví jín jéé tehyú. Te nduluu ndasí nájñuhun coo táca séhe Yaā Dios, chí cácu nuū jñuhun jeē tu quéndōo vāha.

<sup>22</sup> Chi jíní yō jeé táca jéé ní jécōo, chí nde vijná te nájñuhun ñnuú-ni cándoho te cájitū ni jeē na ndúvāha ndíhí.

<sup>23</sup> Te nasūu máá-ni táca jéé ní jécōo cúu jeē ndóho, chí suni nde máá yó ndóho yó, vēsú je névāha yó Espíritu jeē cúu seña jeē ñn quiví te nihñ yō ndíhí



tahū yō. Chi yōhyo ndóho yó jnúndóho, te ndétu yó jée náquihin séhe ya yohó te jnama ya yiqui cúñu yō jeé tuá ndoho yó jíin.

24 Chi ni jnama ya yohó síquī jeé ñuhun ni yō jeé súcuan coo. Te núu je ni sáha ya nájnūhun ñuhun ni yō, yūcuán na te tuá ñuhun ni yō jeé sáha ya súcuan jíin yó. Chí tuá ndétu yó te núu je ni cuu súcuan.

25 Te núu ná tu coto yó jée sáha ya jeé ñuhun ni yō, yūcuán na te jíin paciencia ndétu yó jée sáha ya.

26 Te suni súcuan máa Espíritu chindéé ñáhán yá yohó jée tú na fuerza ini yō. Chi tu jíni yó cacān tahú yó nájnūhun cánuú. Te máa Espíritu cahán ndahú yá jíin Yaā Dios jehē yō síquī tāca jée jítu ndasí ni yō te tu níhín yō jnūhun ndese cacān tahú yō.

27 Te máa Yaā Dios jeé jito ndee anuá yō, chi jíni yā tāca jée cuní maá Espíritu cahán yā jehē yō. Chi ñayuu cáyihí ndaha Yaā Dios, cáhán ndahú Espíritu jehē i nájnūhun cuní Yaā Dios.

### *Vāha-ni cúndeyí yó síquī ndihí jeneé*

28 Te jíni yō jeé tācá-ni jeé quíji nuū ñayuu manī jíin Yaā Dios, jeé váha chí jée uhú, chí quéndōo vāha ga i nuū yā, sáha ya jíin tāca jée yúcuán. Chí cácuu i ñayuu jeé ní cana ya i ni quívicoo i ndaha ya síquī jeé súcuan ni tee ni yā nde jenahán.

29 Chi nde ná tu coo i te je jíni yā i, te je ni jeni ya i jeé ndoo ndaā nduu ánuá i ndacu i máa Séhe ya, návāha na cúu Séhe ya ñani jéhnū nuū cuehē ñayuu cácuu ñani cácandíje.

30 Te jeé ní jeni ya i, te suni ni cana ya i. Te jeé ní cana ya i, te suni ni ndahva yá cuéchi i. Te jeé ní ndahva yā cuéchi i, te suni ni sáha ya jeé cujéhnū i.

31 ¿Te ndese ga cahán yō síquī jnúhun jéhnū yáha núu súcuan? Chí núu íne Yaā Dios jíin yó, ¿te ndé ñin cuu cahán síquī yó? Tú ni ñin.

32 Chí máa yá tu ní jnáma ya Séhe ya jeé ma cúu yā, chí sa suhva ni jēhe ya Séhe ya ni jihí yā jehē ndihí yó. Te núu súcuan ni jēhe ya Séhe ya, te nagā ni cuu jeé ma cuáha ya tāca gá jeé jíni ñúhún yó.

33 ¿Te ndé ñin cuu cahán cuéchi síquī ñayuu jeé ní nacāji Yaā Dios? Tú ni ñin. Chí máa yá ni ndahva yā cuéchi i.

34 ¿Te ndé ñin cuu ndenehen cuéchi síquī yō núu súcuan? Tú ni ñin. Chí máa Cristo cúu jeé ni jihí yā jehē yō, te suni ni natecu yā. Te vijna te ndéé yá lado váha Yaā Dios nuū cujéhnū ya, te cáhán ndahú yá jíin Yaā Dios jehē yō.

35 ¿Te ndé ñin cuu quenehen yóhó núu jnúhun cúndáhú ni Cristo yohó? ¿A jnúndóho, chí tāca jée yí sáha, chí jée cájito xeēn ñayuu yohó, chí jnámā, chí jée cúmaní sahma, chí jnúhun yúhú, chí jée cáhni i yóhó naún? Ni ñin tāca jée yáha.

36 Chí súcuan yósó núu tútu ñi jeé cácahán ñayuu cácandíje jíin Yaā Dios:

Jeé síquī maá ní te ndihí-ni hora cácuni i cahni i sãñá.

Te cásáha i jíin ná nájnūhun cásáha i jíin lanchi, quti cū.

Achí tutu.

37 Te tuú chí vēsú cándoho yó tāca jée yáha, te vāha-ni cúndeyí yó síquī ndihí-ni, sáha máa Yaā jeé ní cundáhú ni yohó.

38 Jeé yúcuán cúcáhnū ni rī jeé tú ni ñin cuu quenehen yóhó núu jnúhun cúndáhú ni Yaā Dios yohó. Ni núu cuu yō, ni núu cotecu yō, ni tācá ndajéhé andiví, ni tāca jée neé jée cácujehnū jnñ poder, ni jeé iyó vijna, ni jeé cóo,



<sup>39</sup> ni jeē iyó núu sūcún, ni jeē iyó núu cūnú, ni tāca gá jeē ní jecōo, ma cúu cuiti quenehen yóhó núu Yaa Dios, jeē jíin Jítóho yō Cristo Jesús ni cundáhú ni yā yohó.

*Siqui ndese ni nacāji ya yucūn Israel*

## 9

<sup>1</sup> Te cáhán ndaā rī chi cúu rī tēe cándíje Cristo, te tu stáhú rí, te jíiní rī ini anuá rī jeē cahán ndaā rī sáha Espíritu Santo.

<sup>2</sup> Yōhoyo cúcuíhyá ni rī, te níiní jnáhuhū ni anuá rī

<sup>3</sup> jeē siquí tāca jnáhan rī ñayuu nación hebreo, chi ñin-ni yucūn rī jíin náhan rī. Chi jeē siquí máá i te cúu ni rī jeē núu na cúu te cujiyo rī nuū Cristo te jnahnū ndetū rī, návāha jíin yúcuu te cuu cācu ánuá máá i núú.

<sup>4</sup> Chi cácuu i yucūn ñayuu Israel, te nde jenahán ni sáha Yaa Dios jeē cúu i sēhe ya, te mēhñu vícō jeē ndíndēé ní condee yā jíin i sáá. Te jíin máá i ni sáha ya tācā contrato, te ni jēhe ya ley yā nuū Moisés jeē cúu máá i, te ni steén yā ndese chiñúhún i ya ini templo, te nuū máá i ni jejnūhun ya cuehē jnūhun.

<sup>5</sup> Te máá i cácuu yucūn tāca jíi yō jeē ní cacujéhnu, te suni yucūn máá i ni cacu Cristo jeē ní nduu ya tēe. Te máá yá cúu Yaa Dios jeē jnā ndihí-ni, te ní cáni cahán ñayuu jeē cujéhnu ya. Amén.

<sup>6</sup> Te nasūu jēé tu ní queé ndaā tāca jnūhun jeē ní jéjnūhun Yaa Dios nuū ñayuu Israel. Chi ní quee ndaā nahín núu vésú jecu-ni i, chi tú ndihí-ni yucūn Israel cúu jeē cácañdíje.

<sup>7</sup> Chi nasūu ndihí yucūn Abraham cácuu ndije sēhe de jeē ní jéjnūhun ya. Chi ní cahán Yaa Dios jíin de: Nuū máá-ni sēhe ró Isaac cúu nuū coo yucūn rō jeē ní jéjnūhun rī nuū rō.

<sup>8</sup> Te jnūhun yáha cúní cahán jeē ni ñin ñayuu tu cúu i sēhe Yaa Dios siquí jeē ní cacu i ñin yucūn jeē jéni ni i jeē váha ga cúu. Chi sa suhva máni yucūn jeē ní jéjnūhun ya cúu ndije yucūn jeē chíhi ya cuenta.

<sup>9</sup> Chi yáha cúu jnūhun jeē ní jéjnūhun ya nuū Abraham: Máá tiempo jeē ní jeni rī te quiji rī, te cacu ñin sēhe yá ñasihí ró Sara, achí yá.

<sup>10</sup> Te nasūu máá yáha-ni, chi suni Rebeca ni cacu uū sēhe yá ña, te ñin-ni tátá ndíndúú i, jeē ní cuu jíi yō Isaac.

<sup>11-13</sup> Te nde ná tu cacu ndíndúú i, te ná tu sáha i jeē váha jeē uhú, te je ni cahán yā jíin Rebeca: Sūchi ní cacu xīhna gā cuajníñu i nuū sūchi sándihí, achí yá. Chi suni sūcuu cáhán tutu ñi: Ni jito maní rī Jacob, te Esaú chi tuú, achí Yaa Dios. Te sūcuu jíiní yō jeē máá Yaa Dios cuu nacāji ya ñayuu núu ndese tēe ni máá yá, te nasūu siquí jniñu jeē sáha i, chi sa suhva siquí ndese cúní máá yá nacāji ya i.

<sup>14</sup> ¿Ndeese cahán yō núu sūcuu? ¿A jēé tu iyó ndaā Yaa Dios jeē sáha ya sūcuu, chí naún? Tú cuiti.

<sup>15</sup> Chi nde jenahán ní cahán yā jíin Moisés: Ndé-ni cúu jeē cuní rī cundáhú ni rī, te cundáhú ni rī. Te ndé-ni cúu jeē cuní rī sáha rī jeē váha jíin, te sáha rī jíin, achí yá.

<sup>16</sup> Núu sūcuu te nasūu siquí jeē cuní máá ñayuu, ni nasūu jēé nducú ndéyí máá i cúu, chi siquí ndese cúní máá yá cundáhú ni yā i.

<sup>17</sup> Chi suni sūcuu yósó núu tútu ñi jeē ní cahán yā jíin rey ñuu Egipto: Ni jeni rī rohó jēé cúu ró rey, návāha jíin rohó te steén rī poder rī, te návāha cuitē núu síhví rí ní ñáyiví, achí yá.

18 Núu súcuan te núu ndé ìn cúní yā cundáhú ni yā, te cundáhú ni yā. Te núu ndé ìn cúní yā jeē cunīhni ni, te sáha ya jeē cunīhni ni.

19 Te sanaa te cahān ìn ró jíín rí: Núu súcuan cúu ¿te najehē cahán gā yā jeē cuēchi sáha yó? Chi ma cúu casi yō nuū yā jeē ndese cúní maá yā sáha ya. Achí rō.

20 Te sa suhva cáhán rí jíín ró: Róhó, ¿ndé ìn cúu ró jēē jéni ni rō stió cuííí rō nuū Yaā Dios? ¿A cuu cahān quísi ñuhun jíín téé ni sáha: Najehē ni sáha ró rúhū súcuan? achí.

21 Chi téé sáha quísi, cuu sáha de ndese cúní maá de, chi ìn-ni ñuhun cuu sáha de ìn quísi fino te ìnga quísi corriente.

22 ¿Te á tu jétáhú ró jeē suni súcuan sáha Yaā Dios jíín ñáyuu? Chi cúní yā steén yā ndese sáha ya juicio siquí ñáyuu, te súcuan te cuni i poder yā. Te vēsú súcuan te ni ìyo paciencia ni yā jeē tu ní ndóna yachí yā siquí ñáyuu jeē jnahnú ndetū.

23 Te sáha ya súcuan návāha stéén yā ndese yōhyo luu cújéhnū ya siquí jniñū sáha ya jíín yóhó ñáyuu cundáhú ni yā. Chi nde jenahán je ni sátūhva ya yohó jéē luu cújéhnū yó jíín yá.

24 Chi ní cana ya yohó jéē candíje yó, te sava yó cúu ñayuu hebreo te sava yó cúu ñayuu tāca gá nación.

25 Chi suni súcuan ni cahān yā, yósó núu tútu Oseas:

Ñayuu jeē tu ní cúu ñayuu maá rí, vijna te cahān rí jeē cácuu i ñayuu maá rí. Te ñayuu jeē tu ní ìyo maní rí jíín, vijna te cahān rí jeē cácuu i ñayuu jeē maní rí jíín.

26 Te maá lugar nuū ni cáhán rí jeē násūu ñáyuu rí cácuu i, suu yūcuan cáhán ñayuu jeē cácuu i sēhe Yaā Dios, Yaā técu ní cáni. Achí yá.

27 Te Isaías sa suhva ni cahān de jnūhun ñayuu Israel: Vēsú ni cayā yucūn Israel nájñūhun ñííí yumar, te jecu-ni i jnama ya.

28 Chi Jitoho yō Yaā Dios, yachí sínu ya jniñū jeē sándaā yā cuēchi ñayuu ñayiví. Achí tutu.

29 Chi nájñūhun ni cahān tucu Isaías:

Máá Yáá cúu Jitoho nuū tāca ndajéhé andiví, núu tu ní jnáma ya jecu yucūn yō nuú, te je ni ndoho yó nájñūhun ñayuu ñuu Sodoma jíín ñuu Gomorra, jeē ní naa ndihi.

Achí tutu.

*Jeē tu cájetáhú ñayuu hebreo jñūhun jnama ya i*

30 ¿Ndese cahān yō núu súcuan? Suu jeē ñáyuu tāca gá nación, vēsú tu ní cánducú i quendō ndaā i nuū Yaā Dios, te ni ndahva yā cuēchi i. Chi siquí jeē ní candíje i jeē ní jííí Cristo jehē i cúu jeē ní ndahva yā cuēchi i.

31 Te sa suhva ñayuu Israel, vēsú cánducú i quendō ndaā i nuū Yaā Dios sáha ley yā, te tu cūndeyí i quendō ndaā i.

32 ¿Te najehē? Siquí jeē tu cánducú i jeē ndahva yā cuēchi i jeē candíje i jeē ní jííí Cristo jehē i, chí sa jéni ní i jeē squícu maá i ley te quendō ndaā i. Te jeē stíví i súcuan cúu nájñūhun cácotúú i siquí maá yúú jeē cácachihí jehē, te suu cúu Cristo.

33 Chi súcuan cáhán nuū tútu ìi:

Nde ñuu rí Sion sáha ri jeē cóne maá Yaā jeē cúu nájñūhun yuū jeē cácachihí i jehē i.

Te cúu ya nájñūhun toto jeē cotúú i sáha.  
Te sa suhva ñayuu cácanđije Yaā ún, chí jnama nahín yá i.  
Achí Yaā Dios.

## 10

<sup>1</sup> Hermano jijnáhan ró, cúu ndasí ní rī te jícán tahu rī nuū Yaā Dios jehē ñayuu nación rī Israel, jeē na jnáma ya i jijnáhan i.

<sup>2</sup> Chí cáhán rī jeē vāha cásáha i jeē ndihví ní i cáchiñúhún i Yaā Dios. Te vesú súcuan te cáchiñúhún cáhá i.

<sup>3</sup> Chí tu cájecūhun ní i ndese ndáhva Yaā Dios cuēchi ñayuu, te ndúcú i quendō ndaā i máa-ni jeē squícu i ley. Te tu cájetáhú i máa modo jeē ndáhva Yaā Dios cuēchi i.

<sup>4</sup> Chí siquī jeē ní sáha Cristo te cuu quenda ñayuu chíji ley Moisés. Te ndáhva Yaā Dios cuēchi táca ñayuu jeē candíje i jeē ní sáha Cristo jehē i.

<sup>5</sup> Chí súcuan ní tee Moisés jñūhun ñayuu jeē cánducú quendō ndaā jíin ley: Núu ññ ñayuu cuu squícu i táca jniñu ndácu ley, te cotecu i núú, áchí.

<sup>6</sup> Te jñūhun jeē ndáhva Yaā Dios cuēchi ñayuu siquī jeē candíje i jeē sáha ya jehē i, chí sa suhva cáhán: Ma cáni ní rō jeē jíni ññhún caa ró andiví nasnúu ró Cristo jeē ndahva yā cuēchi ró.

<sup>7</sup> Ní ma cáni ní rō jeē jíni ññhún cuun ró ndé nuū cūnū ndonehen ró Cristo mehñu ndíyi, nájñūhun jeē tu ní nátecu yā.

<sup>8</sup> ¿Te ndese cáhán jñūhun un núu súcuan? Yajni iyó jñūhun ya jíin ró, chí ññhún ini yuhu ró jíin ini anuá rō, achí tutu. Te suu cúu jñūhun jeē na cándíje yó jéé jnáma ya yohó. Te jñūhun yáha cúu jeē cánacani rí.

<sup>9</sup> Chí núu cahán rō jeē Jítoho rō cúu Jesús, te núu candíje ró jíin ini jíin ánuá rō jeē ní natecu yā mehñu ndíyi ní sáha Yaā Dios, yūcuán na te jnama ya rohó.

<sup>10</sup> Chí jíin ini jíin ánuá yō cándíje yó jéé ní jíhí yā jehē yō, te súcuan te ndáhva Yaā Dios cuēchi yó. Te jeē cahán yō jeē Jítoho yō cúu Jesucristo, te súcuan te jnama ya yohó.

<sup>11</sup> Chí cáhán tutu ññ: Táca ñayuu jeē candíje i ya, chí jnama nahín yá i, áchí.

<sup>12</sup> Chí inuú-ni cúu ñayuu hebreo jíin táca gá ñayuu, chí máa yá cúu Jítoho nuū ndíhi yó, te cuehē jeē vāha sáha ya jíin ñayuu cácahān ndahú jíin yá.

<sup>13</sup> Chí súcuan cáhán jñūhun ya: Ndihi ñayuu cácahān ndahú jíin máa Jítoho yō, chí jnama ya i, áchí.

<sup>14</sup> ¿Te ndese cahān ndahú i jíin yá te núu tu ní cándíje i jeē jnama ya i? ¿Te ndese candíje i te núu tu ní jíni sōho i jñūhun ya? ¿Te ndese cuni sōho i te núu tú na ñayuu nacani jñūhun nuū i?

<sup>15</sup> ¿Te ndese nacani ñayuu jñūhun ya te núu jeē tu tájí yá i quihín i? Chí nájñūhun cáhán tutu ññ: Yōhyo luu jniñu cásáha ñayuu cájica jíin jñūhun ndeyí sñ ní jeē cánacani i jñūhun vāha ya, achí.

<sup>16</sup> Te nasūú ndíhi i jétáhú nuū jñūhun jnama ya i. Chí ní cahān Isaías nde jenahán: Tātā Yaā Dios, ¿ndé ñayuu ní candíje jñūhun jeē cánacani ná ví? áchí de.

<sup>17</sup> Núu súcuan te núu cuni nahín ñayuu te cuu candíje i. Te jñūhun cuni nahín i cúu jñūhun Cristo.

<sup>18</sup> Te cájnūhun rí: ¿A tu ní cájini sōho i jñūhun un núu súcuan? Tuú chí ní cajini sōho i, chí cáhán tutu ññ:

Ñí ñáyiví ní cajini sōho ñayuu jñūhun jeē ní canacani de.

Te nde nuū jicá gá táca lado ní jinū jñūhun ún.

Achí tutu.

<sup>19</sup> Te suni cájnūhun rí: ¿A tu ní cájecūhun ni ñayuu Israel jnūhun ún? Tuú chi ni cajecūhun ni i, te tu ní cájetáhú i. Chi xīhna gā Moisés ni cachi de jeē ni cáhān Yaā Dios:

Cucuñí ró jijnáhan ró, chi cuáha ri jnūhun ri nuū inga ñayuu jeē násūú ñn nación cúu.

Te quití ni rō coto ró jéē cuáha ri jnūhun ri nuū ñn nación jeē tu jécūhun ni.

<sup>20</sup> Te suni Isaías ni chundeyí ni de ni cachi cáji de jeē ni cáhān Yaā Dios:

Ñayuu jeē tu ní cánanducú rúhū, ni cajini i ruhū.

Te nuū ñayuu jeē tu ní cácajnūhún, ni steén rī nuū i ndese Yaā cúu ri.

<sup>21</sup> Te siquí ñayuu Israel sa ni cahān de jeē ni cáhān yā: Ndiquiví ni cana ri i jeē quívicoo i nuū rī, te tu ní cácuni i, chí ñayuu ñihni ni, ñayuu jéē ni cácuu i. Achí yá, achí Isaías.

*Jeē iyó jecu na ñayuu Israel jeē jnáma ya*

## 11

<sup>1</sup> Núu súcuan te cájnūhun rí: ¿A ní stóo Yaā Dios ñayuu maá yá Israel, chí naún? Tú cuiti. Chi ruhū suni tēe Israel cúu ri, te yucūn Abraham cúu ri, te Benjamín cúu jíi rī jenahán.

<sup>2</sup> Tu ní stóo Yaā Dios ñayuu maá yá, chi je ni nacāji ya i nde jenahán. ¿A tu cájini rō ndese cáhán tutu i jnūhun Elías, tēe ni nacani jnūhun ya jenahán? Chi náa jícán tahu de, te ni cahān de siquí ñayuu Israel:

<sup>3</sup> Tātā Yaā Dios, ni cajehni i tāca tēe cánacani jnūhun ní, te ni cajenu i tācá altar ní. Te máñuhún na saña ní quendōo, te vijna suni cácuni i cahni i saña, achí de.

<sup>4</sup> Te Yaā Dios ni nastió cuñí yā: Iyó nahín úxā mil ñayuu cácandíje ruhū jeē tu ní cájecuñí yití i nuū ídolo naní Baal, achí yá.

<sup>5</sup> Te suni súcuan vijna, chí iyó jecu na ñayuu jeē ní nacāji ya siquí jeē váha ni yā jíin i.

<sup>6</sup> Te núu ni nacāji ya i siquí jeē váha ni yā jíin i, te nasūu siquí jeē ni sáha i jniñu váha cúu. Chí núu siquí jeē ni sáha i jniñu váha cúu, yūcuán na te nasūu siquí jeē váha ni yá cúu.

<sup>7</sup> ¿Te ndese cúu núu súcuan? Cúu jeē ñayuu Israel tu ní cúndeyí i quendōo ndaā i nájnūhun ni canducú i. Te sava i jeē ní nacāji ya, chí máá i ni ndahva yā cuéchi i. Te sava ga i ni ndunihni ni i,

<sup>8</sup> nájnūhun cáhán tutu i: Ni sáha Yaā Dios jeē tu jécūhun cuiti ni i siquí yā, ni tu jíni i jíin tñūú i, ni tu jíni nahín i jnūhun ya, te súcuan cúu nde vijna. Achí tutu.

<sup>9</sup> Te suni ni cahān David:

Vico jeē casáha i, na cóo nájnūhun ñn trampa chí ñn keyū, návaha ñihni i castigo xeēn siquí jeē castívi i casáha i cuéchi.

<sup>10</sup> Te ánuá i na ndúnee, nájnūhun jeē tuá cúu coto i,

te na jécostíhí jnūndóho siquí i ní cáni.

Achí tutu.

*Siquí jeē jnáma ya ñayuu tāca gá nación*

<sup>11</sup> Núu súcuan te cájnūhun rí: ¿A tuá cúu cuiti ndívi ñayuu Israel nuū Yaā Dios jeē súcuan ni castívi i? Tú cuiti. Chí sa suhva jeē ní cacuniñni ni i, te sa ñayuu tāca gá nación ni canihni tahu máá i jnūhun jeē jnáma ya i. Te yūcuan sáha tucu jeē ñayuu Israel condihví ni i jeē suni candíje máá i.

12 Chi jeē ní castívi i, te sa ñayuu ní cáhnu ñayívi ní canihīn maá i jnūhun ya. Te jeē ní cajica yátá i, suu ní sáha jeē ní canihīn ñayuu tācá nación jnūhun ya. Núu súcuan te quivī jeē ndívicoo tucu ndihi ñayuu Israel ndaha ya, te ñayuu ñayívi víhyá gā quendōo ndetū i sáha ún.

13 Te vijna te cáhán rī jíin rōhó ñáyuu tācá nación jeē tu ní jíni jnūhun ya. Chi ní taji Yaā Dios ruhū jeē scáca rī jnūhun nuū rōhó ñáyuu tācá nación. Te ndúcú rī jeē na cuájnuhūn rō jíjnáhan rō jniñu sáha rī jeē nácani rī jnūhun ya.

14 Chi cúní rī jeē jíin yúcuan te nacani ní sava jnáhan rī ñayuu Israel jeē suni candíje maá i, te jnama ya i.

15 Chi jeē ní stóo ya ñayuu Israel, jeē yúcuan cúu jeē sa ñayuu ñayívi ní sáha ya jeē ndívicoo i nuū jnūhun maní yā jíin i. Núu súcuan te quivī naquihin tucu ya ñayuu Israel, quivī ún suni váha ndasí sáha ya jíin ñáyuu ní cáhnu ñayívi. Chi coo nájnūhun jeē natecu i jeē cúu i nájnūhun ndiyi.

16 Te ñayuu Israel cásocó i nuū Yaā Dios pan jeē quénda xīhna gā nuū ñujen, te súcuan stéén i jeē ndihi un cúu cuenta yā. Te ñin yujnu, núu yíhi jeē cuenta yā cúu, te suu cúu nde yoho jíin ndé ndihi ndaha. Te suni súcuan ñayuu Israel, yíhi cuenta i nuū yā, siquī jeē jíi i xīhna ñūhún, ní quívicoo de ndaha ya.

17 Chi ñayuu Israel cácuu i nájnūhun ndayújnu olivo váha, te sava ndaha un ní quendē. Te rōhó ñáyuu tācá nación jeē tu jíni jnūhun ya, cácuu ró nájnūhun ndayújnu olivo yucú, te ní nachuhun ya rōhó núu ní quendē ñayuu cácuu ndayújnu váha ún. Te nájnūhun inuú-ni cástáa ró ndúxi jíin cajin jeē véji nde yoho yújnu ún.

18 Núu súcuan te ma sáha téyí ró maá ró nuū ñáyuu Israel jeē cácuu nájnūhun ndayújnu jeē ní quendē. Ma cutéyí ró, chi nucūhun ní rō jeē násúú jéē yoho stáa cajin nuū maá ró, chi sa maá ró stáa cajin jeē véji nde yoho.

19 Te sanaa te cahān rō: Tú chi sava ndaha ní quendē návāha nachuhun ya ruhū nuū ní quendē ún, achi rō.

20 Ndaā, te ní quendē i siquī jeē tu ní cácandíje i Cristo. Te rōhó chi máni siquī jeē cácandíje ró, jeē yúcuan cúu jeē ní quívicoo ró lugar i. Te ma sándúxi ró maá ró núu súcuan, chi sa suhva conso íyo ró núu Yaā Dios.

21 Chi tu ní íne cáhnu ní yā nuū maá ndaha jeē chíjniñu, te suni súcuan ma cóne cáhnu ní yā nuū rō jíjnáhan ró te núu stívi ró.

22 Núu súcuan te sáha váha ro cuenta ndese váha ní Yaā Dios jíin ndese xeēn ní yā. Chi ní nduxeēn ní yā jíin ñáyuu hebreo jeē ní castívi ún, te sa cundáhu ní yā rōhó. Te cánuú cuñiñi ñihin ro jíin jnūhun jeē váha ní yā jíin ró. Chi núu tuú, te suni quende yā rōhó.

23 Te maá i, núu candíje tucu i, te nucōndee tucu i, chi maá Yaā Dios cuu nachuhun tucu ya i.

24 Núu súcuan te rōhó ñáyuu tācá nación jeē tu ní jíni jnūhun ya, ní quendē ró xini yújnu olivo yucú, te ní nachuhun ya rōhó xini yujnu olivo váha, vésú násúú ndaha maá yujnu un cácuu ró. Te nagā ní cuu ñayuu hebreo jeē ma náchuhun ya i nuū ní quendē i, chi cácuu i maá ndayújnu váha ún.

### *Ín quivī te jnama ya ndihi ñayuu nación Israel*

25 Hermano, cúní rī jeē na jécūhun ní rō jíjnáhan ró ndese íyo jnūhun yáha jéē ní yisáhi, návāha ma cutéyí ró caní ní rō jeē ndichí xini maá ró: Chi sava ñayuu Israel ní ndunīhni ní i, te súcuan coo maá-ni nde quivī jínu candíje ñayuu tācá nación jeē tu jíni jnūhun ya.

26 Te saá te jnama ya ndihi ñayuu nación Israel, chí cáhán tutu íi:

Ichi ñuu rī Sión quiji Yaā jnáma ñayuu,  
te sáha ya jeē tuá coo cuēchi nuū tāca yúcūn Jacob.

<sup>27</sup> Te yāha cúu contrato jeē sándaā rī jín i,  
quívī jeē quénde ri cuēchi i jínáhan i, áhí Yaā Dios.  
Achí tutu.

<sup>28</sup> Chi ñayuu hebreo un ní nduu i nájnūhun enemigo Yaā Dios siquī jeē tu ní cácanđije i jnūhun jnáma ya i. Te jeē yúcuan te cuu cuitē núu jnūhun un núu tāca rōhó. Te vēsú súcuan te siquī jeē ní nacāji ya tāca jí i jenahán, te cundáhú gá ni yā i jeē ma stóo ya i ní cáni.

<sup>29</sup> Chi tu nácani yátá ni yā jeē cána ya ñayuu jín jéé jéhe ya tahū i.

<sup>30</sup> Te rōhó jínáhan ró, suni ní cahíyo nihni ní rō nuū Yaā Dios nde saá. Te vijna jeē ní cacunihni ní maá ñayuu hebreo, te cundáhú ni yā rohó.

<sup>31</sup> Te suni súcuan máá i, chi vēsú cacunihni ní i vijna, te cundáhú tucu ni yā i, nájnūhun cundáhú ni yā maá ró jínáhan ró.

<sup>32</sup> Chi Yaā Dios ní sáha ya jeē ní quendōo ndivii ñayuu chíji jnūhun cúnihni ní i, návāha suni cuu cundáhú ni yā ndivii i.

<sup>33</sup> Núu súcuan te nánhán nāá ni yō jeē yóhoyo cuehē jnūhun ndíchí íyó jíin Yaā Dios, te ndihi cuiti jíní yā. Te ní ma cúu cuiti castūhun yó ndese téé ni yā sáha ya tācá-ni, te ma cánda cuiti yō jecūhun ní yō ndese cúu tāca jéé sáha máá yā.

<sup>34</sup> Chi cáhán tutu íi: ¿Ndé ñn ní jecūhun ní ndese jéni ní maá Jítóho yō? ¿Chí ndé ñn ní steén nuū yā?

<sup>35</sup> ¿Ndé ñn ní jéhe xíhna gā nuū maá yá, návāha nachunaa yā nuū i?

<sup>36</sup> Chi nde nuū maá yá vēji tāca jéé íyó, te máá yá ní sáha ndihi, te jeē cúu máá yá cúu. Te na cáhán yō jeē yóhoyo luu cújéhnu Yaā Dios ní cáni. Amén.

*Jeē na cóo ndoo ánuá yō cuajníñu yó núu Yaā Dios*

## 12

<sup>1</sup> Núu súcuan te cáhán ndahú rí jíin ró jínáhan ró, hermano, jeē siquī jeē cundáhú ní Yaā Dios yohó. Na sócō rō maá ró núu yā, coo ndoo coo íi rō cuajníñu ró núu yā, nájnūhun cúsi ní yā. Chi yāha cúu jeē chíñúhún ró yā nde jíin íni jíin ánuá rō.

<sup>2</sup> Te ma cáca ró jíin tāca modo casáha ñayuu ñayiví yáha, chi sa na sáma ró modo caní ní rō, te ndujeé jéé níjnūní rō. Te súcuan te cuu nacāji ró ndé-ni cúu jeē váha jeē nújnahan ní Yaā Dios, jeē cúsi ní yā, jíin jéé íje ní rō jíin jnūhun ya.

<sup>3</sup> Te siquī jeē váha ní yā ní jéhe ya jniñu nácani ri jnūhun ya, jeē yúcuan cáhán rī jíin ndihi ró jéé ma cáni ní rō jeē váha ga ñayuu cúu ró núu cūhva jeē íyó ró. Chi ná ñn ná ñn ró na cáni ndaā ní rō siquī maá ró, te ma scáa ga rō caní ní rō jeē váha ga ñayuu cúu ró vēsú nuū cūhva jeē ní jéhe Yaā Dios fuerza íni rō cándije ró.

<sup>4</sup> Chi cácuu yó nájnūhun ñn yiqui cúñu jeē íyó cuehē parte, te sñn sñn jéjníñu ñn ñn.

<sup>5</sup> Chi vēsú íyó cuehē yō, te nájnūhun ñn-ni yiqui cúñu cúu yó jéé yíhi yó ndaha Cristo, chí ñn-ni ní nduu yó jíjnáhan yó.

<sup>6</sup> Te sñn sñn tahū ní jéhe Yaā Dios nuū yō jeē cuajníñu yó núu yā, núu ndese ní nujnahan ní yā ní jéhe ya nuū ñn ñn yó. Núu súcuan te na cuajníñu váha yó jíin táhū ún. Núu ní nihñn yō tahū jeē nácani yó jnūhun ya, te cánuú sáha yó ndé máá cūhva ní jéhe ya cándije yó.

<sup>7</sup> Te núu ni nihīn yō tahū jeē chindéé ñáhán yó jnáhan yó, te na sáha yúcún yó. Te núu ni nihīn yō tahū jeē steén yō, te na cóndihvī ni yō steén yō.

<sup>8</sup> Te ñayuu jeē stihvī ni inga ñayuu, suni na sáha yúcún i. Te ñayuu jéhe nuū jnáhan, na cuáha i súcuan-ni. Te ñayuu ndíso jniñu, na ndácu váha i jniñu. Te ñayuu jito ndáhú ñayuu ndahú, na cúsī ni i sáha i.

*Ndese cánuú squicu ñayuu cácandje*

<sup>9</sup> Te na cundáhú ndije ni rō jnáhan ró, nasūu máá jéé cahán-ni ró. Te coto uhū rō jniñu néé, te condiquīn rō jniñu váha.

<sup>10</sup> Te cánuú coo manī rō jīn jnáhan ró nájñuhun jéé manī rō jīn ñani rō. Te nducú ró jeē quéndōo yíñuhún gá jnáhan ró vēsú máá ró.

<sup>11</sup> Te ma cucúxí ró jīn jniñu casáha ró. Chi jīn ini jīn ánuá rō condihvī ni rō cuajniñu ró núu máá Jítoho yō.

<sup>12</sup> Te na cúsī ni rō jeē cáñuhun ni rō tāca jéé váha jeē cóo. Te na cuándeyí ni rō núu ndóho ró jnúndóho. Te níni na cacán tahú rō.

<sup>13</sup> Te coto ndáhú ró ñayuu cácandje núu cúmanī nuū i. Te cuáha núu ró vehe nuū ñayuu cájica.

<sup>14</sup> Te cacān tahú rō jehē ñayuu cájito xeēn rohó. Ma cahán ndevāha ro síquī i, chi sa cacān tahú rō jehē i.

<sup>15</sup> Te núu cúsī ni ñayuu, te suni na cúsī ni rō jīn i. Te núu cúcuíhyá ni ñayuu, te suni na cúcuíhyá ni rō jīn i.

<sup>16</sup> Na cóo inuú ni rō jīn táca jnáhan ró. Te ma cundúxí ró, chi sa quijnáhan ró jīn ñayuu núu ga. Ma cáni ni rō jeē ndichí xínī rō.

<sup>17</sup> Te ma nasáha ndevāha ró jīn ni in ñayuu, núu ni sáha ndevāha i jīn ró. Na cóndihvī ni rō sáha ró jniñu váha, jito jínúū tāca ñayuu.

<sup>18</sup> Te na cóndihvī ni rō coyūcu mánī rō jīn táca ñayuu, vēsú ndese cándāa máá i.

<sup>19</sup> Nānī mánī jijnáhan ró, ma nācuāha ró jéé ndútahū ñayuu casáha ndevāha jīn ró, chi sa cuáha ró jnúhun jeē máá Yaā Dios cuāha ya castigo i. Chi cáhán tutu i: Máá rí cuāha castigo i, máá rí nācuāha yāhu i, áchí Jítoho yō.

<sup>20</sup> Te suni cáhán tutu: Tēe jito uhū rohó, núu jí de sóco, te cuāha ró jéé cáji de. Te núu jíchí de, te cuāha ró jéé cóho de. Chi núu sáha ró súcuan, te cūcanu de te nacani uhū ni de jeē ni jito uhū de rohó.

<sup>21</sup> Ma cuáha ró jnúhun jeē cúndeyí jniñu néé jīn ró, chi sa jniñu váha na sáha ró návāha ndahvā jniñu néé.

## 13

<sup>1</sup> Tāca ñayuu na cuátáhú i nuū tohō cándiso jniñu ñuu. Chi ma cóo tēe cándiso jniñu te núu tu ní sáha máá Yaā Dios. Te tēe cándiso jniñu chi Yaā Dios ni tee jniñu siquī de.

<sup>2</sup> Te ñayuu jeē tu jétáhú núu tēe cándiso jniñu, núu súcuan te cúnīhni ni i nuū jeē ní jeni Yaā Dios. Te ñayuu jeē cúnīhni ni, chi cuēchi sáha i, te nihīn i castigo.

<sup>3</sup> Chi tāca tēe ndíso jniñu, nasūu jéé ndíso jniñu de jeē yūhú ñayuu casáha jniñu váha, chi sa jeē yūhú ñayuu casáha jniñu néé. Te núu cúní rō jeē ma cúxeēn tēe cándiso jniñu nuū rō, na sáha ró jniñu váha núu súcuan. Yūcuán na te cuajnúhún de rohó.

<sup>4</sup> Chi jéjniñu Yaā Dios de jijnáhan de, návāha coyūcu váha ró jijnáhan ró. Te núu sáha ró jniñu néé, te sa yūhu ró, chi nasūu cáha-ni cúu jeē cándiso jniñu de stóho de ñayuu. Chi jéjniñu Yaā Dios de, návāha cuāha de castigo ñayuu casáha jniñu néé.

<sup>5</sup> Jeē yúcuan cánuú jéē cuatáhú ró núū tēē cándiso jníñu, te nasūu máni jeē ma níñin rō castigo, chí suni jeē tú na cuēchi coo ánuá rō.

<sup>6</sup> Te jeē yúcuan cúu jeē suni cájēhe rō xúhun núū tēē cándiso jníñu cuu jniñu ñuu. Chí jéñiñu Yaā Dios de, te máni jniñu yúcuan cásáha de.

<sup>7</sup> Te chunaa rō ndihi jeē cátaū rō nuū táca ñáyuu. Cuāha rō xúhun ñuu nuū tēē stútú xúhun ñuu, te cuāha rō xúhun renta nuū tēē stútú renta. Te na cóo respeto rō nuū ñáyuu cánuú coo respeto rō. Te na cóo yíñúhún rō nuū ñáyuu cánuú coo yíñúhún rō.

<sup>8</sup> Ma cótaū rō nuū ní ñin. Te íyó ñin jeē taú rō jeē ma tahndé cuiti, suu jeē ni cáhān Yaā Dios jeē cundáhú ni rō jnáhan rō. Chí ñayuu cundáhú ni jnáhan, je ni squícu i ndihi jeē ndácu ley yā.

<sup>9</sup> Chí súcuan ndácu ley jniñu: Ma cosíquí ndéē rō jnáhan rō, ma cáhni rō ndiyi, ma sacuíhná ró, ma sajnúhún ró, ma ndíyo ni rō jeē névāha jnáhan rō. Te táca jnúhun yáha jíin táca gá jniñu ndácu ley, ndihi-ni yíhi chíji jnúhun yáha: Cundáhú ni rō jnáhan rō nájnúhun cundáhú ni rō maá ró, áchí tutu.

<sup>10</sup> Te núu cundáhú ni yō jnáhan yó, te tu sáha yó ni ñin jeē tu íyó váha nuū i. Núu súcuan te jeē cundáhú ni yō jnáhan yó, yúcuan cúu jeē squícu yó níí ley yā.

<sup>11</sup> Súcuan sáha ró jíjnáhan rō, chí sáha ró cuenta jeē cuácuyajni quiví ndíji ya. Te ma cóo ga rō nájnúhun ñayuu quixí, jeē cúhuun ni rō. Chí vijna je ni cuyajni ga quiví jnáma ya yohó vesú quiví ní candíje yó jnúhun ya.

<sup>12</sup> Chí nájnúhun je yajni yáha jecuáā, te cuacundijjin quiví jnáma ya yohó. Núu súcuan te na stóo yó jniñu jeē ni sáha yó núū néé, te na cúcutú yó jíin táca jniñu ndaā jeē caca yó jíin luz yā.

<sup>13</sup> Na cáca yíñúhún yó nájnúhun cánuú caca yó jíin luz yā. Ma náñini ró, ma sáha ró táca vico néé, ma cáca jnéni ró, ma sáha ró jniñu néé, ma cuajnáhan ró, ma cucuésún ni rō.

<sup>14</sup> Chí sa suhva cuiñi cutú ró jíin fuerza maá Jítoho yō Jesucristo, jeē ma cuáha ga rō jnúhun sáha ró jniñu cúní modo néé máá ró.

*Ma cahán neé yó coto yó jnáhan yó*

## 14

<sup>1</sup> Cuatáhú ró ñayuu jeē ná tu ije jíin jnúhun ya, te ma tejnáhan ró jíin i siquí táca jnúhun jeē sín jéni ni i jíin máá ró.

<sup>2</sup> Chí íyó ñáyuu jeē jéni ni i jeē cúu caji i ndinuū-ni. Te íyó ñáyuu jeē ná tu ije jíin jnúhun ya, te cájeni ni i jeē tú váha caji i cúñu, chí jeē ní casocó ñayuu nuū ídolo cúu.

<sup>3</sup> Te róhó tēē jeē yéji ndinuū-ni, ma cahán rō coto ró tēē jeē tu yéji ndinuū. Te róhó tēē jeē tu yéji ndinuū, ma cahán rō coto ró tēē jeē yéji ndinuū. Chí Yaa Dios ni jetáhú yá tēē ún.

<sup>4</sup> Te róhó, ¿ndé ñin cúu ró jéē cahán neé ró jíto ró mozo Yaā Dios? Chí núu váha chí néé sáha de, te máá yá cúu jeē sándaā jíin de, nasūu máá ró. Te tuú chí cuiñi váha de, chí mozo máá Jítoho yō cúu de, te cuu sáha ya jeē ma stíví de.

<sup>5</sup> Te suni íyó ñayuu jeē jéni ni jeē íí gā ñin quiví vésú inga quiví. Te inga ñayuu chí jéni ni i jeē ñnuú-ni cúu táca quiví. Te táca i na cúndaā váha ni máá i siquí jeē jéni ni i.

<sup>6</sup> Chí tēē jeē néé íí quiví, chíñúhún de máá Jítoho yō jeē sáha de súcuan. Te tēē jeē tu néé íí quiví, suni chíñúhún de Jítoho yō jeē sáha de súcuan. Te tēē jeē yéji ndinuū-ni, chíñúhún de máá Jítoho yō jeē sáha de súcuan, chí nácuatáhú



de nuū Yaā Dios. Te tēe jeē tu yéji ndinuū, suni chíñúhún de Jitoho yō jeē sāha de súcuān, te suni nácuatáhú de nuū yā.

<sup>7</sup> Chi ni ñn yó tu técu yō jeē váha máá-ni yó, te ni ñn yó tu jíhi yō jeē cuní maá yó.

<sup>8</sup> Chi núu técu yō, te técu yō jeē cuajníñu yó núu maá Jítoho yō. Te núu cuu yō, te suni cuu yō siquī jeē cuní maá Jítoho yō. Núu súcuān te núu jeē cótecu yō chí jéē cuu yō, te yíhi yó ndaha Jítoho yō.

<sup>9</sup> Chi ni jíhi Cristo te ni natecu yā, návaha cuu ya Jítoho nuū ñáyuu ni jíhi jíin ñáyuu técu.

<sup>10</sup> Te róhó, ¿naun jéni néé ni rō jíto ró jnāhan ró núu súcuān? ¿Te naun cújéé ni rō jíto ró de? Chi táca yó cuiñi yó yuhu mesa Cristo jeē sándaā yā jniñu yó.

<sup>11</sup> Chi suhva yósó núu tútu ñi:

Jendaá ndije chi nuū maá rí cuiñi yítí táca ñáyuu,

te ndihi i cahān jeē maá rí cúu Yaā Dios, áhí máá Jítoho yō.

<sup>12</sup> Núu súcuān te ná ñn ná ñn yó nacuāha yo cuenta nuū Yaā Dios ndese jniñu ni casáha yó.

### *Ma sāha yó jéē quívi jnāhan yó cuéchi*

<sup>13</sup> Te jeē yúcuān ma cahán neé gá yō coto yó jnāhan yó. Chi sa tee ni rō jeē ma sāha ró ni ñn jniñu jeē sāha jeē stívi jnāhan ró te quívi i cuéchi.

<sup>14</sup> Te jíni rí jeē ni ñn jeē ni sāha Yaā Dios, tu stívi ánuá yō. Chi súcuān ni cucáhnu váha ni rí siquī jeē candíje ri Jítoho yō Jesús. Te núu ñn ñáyuu jéni ni i jeē iyó jéē stívi ánuá i, yúcuán na te súcuān sāha un jíin máá i.

<sup>15</sup> Te núu jnāhan ró tu cúváha ni de jeē yéji rō cūñu ni casocō ñáyuu nuū ídolo, chi jéni ni de jeē stívi un ánuá rō, núu súcuān te tu cúndáhú ni rō de jeē sāha ró súcuān. Coto má snāā rō anuá jnāhan ró siquī jeē yéji rō ñn jeē jéni ni de jeē cuéchi cúu. Chi suni jehē maá de ni jíhi Cristo.

<sup>16</sup> Ma sāha ró jniñu jeē cahán i siquī, vésú jíni maá ró jeē iyó váha.

<sup>17</sup> Chi jeē ndácu Yaā Dios jniñu nuū yō, nasūu siquī ndese caji yō coho yó cúu, chi sa suhva siquī jeē na sāha yó jniñu ndaā, te coyūcu mánī yō jíin jnāhan yó, te cusñi ni yō sāha Espíritu Santo.

<sup>18</sup> Te ñáyuu jeē súcuān jéjníñu nuū Cristo, chi cúsnī ni Yaā Dios jíin i, te suni cájejnúhún ñáyuu i.

<sup>19</sup> Núu súcuān te na cóndihvi ni yō coyūcu mánī yō, návaha jíin yúcuān chindéé ñájnañan yó ije yó jíin jnúhun ya.

<sup>20</sup> Te ma cuáha ró jnúhun jeē ndeyu yéji rō snāā jniñu ni sāha Yaā Dios jíin jnāhan ró. Chi iyó ndoo ndije ndihi jeē yéji yō, te vésú súcuān te tú váha jeē yéji rō ndeyu jeē sāha jíin jnāhan ró jéē caji de jeē jéni ni de jeē cuéchi cúu.

<sup>21</sup> Váha ga ma cáji rō cūñu, ni ma cóho ró vino, te ni ñn ma sāha ró jéē stívi ánuá jnāhan ró, te quívi de cuéchi, te caca yátá de nuū jnúhun cándíje de.

<sup>22</sup> Te núu cándíje ró jéē tú na vé sāha jeē yéji rō, te súcuān na cándíje máá-ni ró núu Yaā Dios. Te nacā ndetū tēe jeē tu sāha jíin ánuá de jeē cuéchi cúu núu caji de coho de.

<sup>23</sup> Te tēe yéji ñn jeē jéni ni de sanaa te stívi ánuá de, núu súcuān te sāha de cuéchi, chí tu cándíje de jeē iyó váha jeē yéji de. Chi táca jéē sāha yó, núu tu cándíje yó jéē iyó váha, te cuéchi cúu.

*Jeē na sāha yó jéē cúsnī ni jnāhan yó*

## 15

1 Te yóhó jéē ni ije yó jíin jnúhun ya, cánuú condito yó ñáyuu jeē ná tu ije jíin jnúhun ya, náváha candíje váha i. Te ma sáha yó jéē maá-ni yó cusī ni.

2 Chi ná ñn ná ñn yó na sáha yó jéē cúsī ni jnáhan yó, náváha quendōo váha i te ije i jíin jnúhun cándíje i.

3 Chi ní Cristo, tu ní sáha ya jeē cúsī ni maá yá, chi sa suhva jeē cúsī ni Tatá yā. Chi suhva cáhán tutu iī: Tāca jnúhun ndeváha jeē cácahān ndeváha ñayuu siquī ní, ni ndīvi siquī maá ná, áchí Cristo jíin Tatá yā.

4 Chi tāca jnúhun jeē ni jecosō nuū tútu iī nde jenahán, chi ni jecosō náváha steén nuū yó, te nihīn yó jnúhun jeē sáha jeē cuandeyí ni yó te ndusī ni yó. Te súcuan te cocuhun ni yó tāca jéē váha jeē cóo.

5 Te maá Yaā Dios jeē jéhe jnúhun cuandeyí ni jíin jnúhun ndúsī ni, na sáha ya jeē cóo inuú ni rō, nájñūhun cúní Cristo Jesús.

6 Te súcuan te ñn-ni coo ró te inuú-ni cuu cahān rō jeē yóhoyo váha Yaā cúu Yaā Dios, Tatá Jitoho yó Jesucristo.

*Jeē ni jité jnúhun váha ya nuū ñáyuu tācá nación*

7 Núu súcuan te cuatáhú ró tāca jnáhan ró, nájñūhun ni jetáhú Cristo yohó, náváha cuni ñayuu jeē luu cújéhnu Yaā Dios.

8 Chi cáhán rī jeē ní quiji Cristo Jesús, ni sáha ya tācá jniñu jeē quéndōo váha ñayuu hebreo, náváha cundaā tāca jnúhun jeē ni jéjñūhun Yaā Dios nuū tāca jíi i. Te súcuan ni steén Cristo jeē squícu Yaā Dios tāca jéē ni jéjñūhun ya.

9 Te suni ni quiji ya náváha ñayuu tācá nación jeē tu jíní jnúhun ya, cahān i jeē yóhoyo váha ni Yaā Dios jeē cundáhú ni yā i. Chi suhva cáhán tutu iī: Núu súcuan te cahān na jéē yóhoyo váha ni ní, cuni ñayuu tācá nación, te cata ná yaa jeē chiñúhún ná nihín.

10 Te cáhán tucu tutu iī:

Róhó ñáyuu tācá nación, inuú na cúsī ni rō jíin ñáyuu maá yá.

11 Te cáhán tucu:

Róhó ñáyuu tācá nación, na cáhán rō jeē yóhoyo váha ni Jitoho yó Yaā Dios, te róhó ñáyuu tācá-ni ñuu, suni na cáhán rō jeē yóhoyo cújéhnu ya.

12 Te suni ni tee Isaiás jnúhun yáha:

Nuū yúcūn Isai quiji ñn jeē cujéhnu,

te ndacu ya jniñu nuū ñáyuu tācá nación.

Te ñayuu ún chi cocuhun ni i tāca jéē sáha ya.

Achí tutu.

13 Te maá Yaā Dios jeē sáha jeē cáñuhun ni yó tāca jéē váha jeē coo, na sáha ya jeē cóo sī ndasí ni rō jíin jéē cóo ndeyí ni rō siquī jeē cácañíje nihin ró yá. Te súcuan te cocuhun teyí gá ni rō tāca jéē váha jeē coo, sáha poder maá Espiritu Santo.

14 Náni máni, cúcáhnu ni rī jeē váha ndasí cándihvī ni rō jíin jniñu váha, te váha ndasí cájécūhun ni rō, te cúu stíhvī jnáhan ni rō.

15 Te ni jeni ní rī jeē tee ri carta yáha cáhán cají rī jíin ró jijnáhan ró, náváha víhyá gā na cócuhun ni rō tāca jnúhun yáha. Chi súcuan sáha rī siquī jeē váha ni Yaā Dios te ni jéhe ya jniñu nuū rī

16 jeē jejniñu ri nuū Jesucristo, jeē nácani ri jnúhun nuū ñáyuu tācá nación jeē tu jíní jnúhun ya. Te nácani ri jnúhun váha Yaā Dios nuū i jeē jnáma ya i. Súcuan sáha rī náváha ñayuu tācá nación, cuu squívi ri i ndaha ya jeē cúu i nájñūhun ñn jeē sócō rī nuū yā jeē cúsī ni yā jíin. Chi ni sáha Espiritu Santo jeē iyó ndoo iyó íi i nuū yā.

17 Nūu súcuan te siquī jeē candíje ri Cristo Jesús, te cúsī ni rī jeē jejniñu vāha ri nuū Yaā Dios.

18 Chi ma cúu cahān rī siquī jniñu cásaha inga tēe, chi máa-ni siquī ndese ni jejniñu Cristo ruhū jeē sáha ri jeē ñayuu tēcá nación tu ní jíní jnūhun Yaā Dios, vijna jétahú i nuū yā. Chi súcuan ni cuu jín jnūhun ni cahān rī jín jniñu ni sáha rī.

19 Chi ni sáha ri jniñu jéhu ndíso poder jeē steén jeē kujéhu ya, te ni Iyo poder Espíritu Santo jín rī. Te súcuan ni nacani ndihi ri jnūhun ndese jnáma Cristo ñayuu. Te ni nacani ri nde ñuu Jerusalén, jín ndihi tēcá ñuu, jín nde ní región Ilírico.

20 Súcuan cúu jeē ní condihvī ni rī ni nacani ri jnūhun jeē jnáma ya ñayuu. Te ni jehēn rī nuū ñayuu jeē ná tu cuní jnūhun Cristo, chi tu ní cuní rī nacani ri nuū ñayuu jeē ní jini i ni canacani inga tēe.

21 Chi sa suhva ní sáha ri nájñūhun cáhán tutu iī:

Tāca ñayuu jeē tu ní quíji jnūhun ya nuū i, vijna chi cuní i jnūhun ya, te tāca ñayuu jeē tu ní jíní cuiti jnūhun ya, vijna chi jecūhun ni i. Achí tutu.

### *Jeē ñūhun ni Pablo jeē quihín de Roma*

22 Te jeē yúcuan cúu jeē cuehē jínu ni cujnēñu ri, te tu ní cúu jecondēhe rí rohó jijnáhan ró.

23 Te vijna chi ni ndihi jniñu ri ní cáhnu tēcá región ndañū yáha. Te je ni cuu cuehē cuiyā jeē cuní rī jeē rī nuū rō.

24 Nūu súcuan te ñūhun ni rī jecondēhe rí rohó jijnáhan ró núu na yáha ri quihín rī España. Te ñūhun ni rī jeē núu je ni cusī ni rī jeē ní jito jnáhan yó, yūcuán na te chindéé ñáhán ró ruhū jeē quihín gā rī.

25 Te xīhna gā na quihín rī ñuu Jerusalén quindēca ri xūhún cuu hermano cáyūcu yúcuan.

26 Chi ñayuu Macedonia jín Acaya ni cajeni ni i jeē cáquin i xūhun quihín nuū hermano cándoho ndáhú ñuu Jerusalén.

27 Chi súcuan ni cacusī ni i ni casáha i. Te iyó váha jeē súcuan, chi máa i jeē cácuu i ñayuu tāca gá nación, táu i jeē sáha váha i nuū ñayuu hebreo un. Chi ñayuu hebreo ni casáha jeē ní quiji jnūhun Yaā Dios nuū i jeē quéndōo váha ánuá i sáha. Jeē yúcuan cánuú jéé chindéé ñáhán i ñayuu hebreo cá candíje jín ndajniñu ñayivi yáha.

28 Nūu súcuan te jeē jínu jniñu yáha jéé quindēca ri xūhun yáha nuū i, yūcuán na te jecondēhe rí rohó jijnáhan ró jéé yáha ri quihín rī España.

29 Te jíní váha ri jeē quivī jinú rī nuū rō, te váha ndasí quendōo ró jéé nacani ga rī jnūhun váha Cristo nuū rō.

30 Hermano jijnáhan ró, cáhán ndahú rí jín ró jeē chindéé ñáhán ró ruhū cacān tahú rō jehē rī nuū Yaā Dios siquī jniñu ndúcú ndeyí rí. Súcuan sáha ró siquī jeē candíje yó Jítho yó Jesucristo, jín siquī jeē cundáhú ni yō jnáhan yó sáha máa Espíritu.

31 Te cacān tahú rō jeē na cácu ri nuū tēe región Judea jeē tu cá candíje, jín jéé na cúsī ni tēcá hermano ñuu Jerusalén jeē quindēca ri xūhun yáha cuu de.

32 Te súcuan te núu cuní Yaā Dios te jecondēhe rí rohó jijnáhan ró, te cusī ni yō, te nanihín ni rī jeē condee rī jín ró.

33 Te máa Yaā Dios jeē jéhe jnūhun ndeyí sī ni, na cóo ya jín ró jijnáhan ró. Amén.

*Jeē cahán Pablo jeē sándeýí ni i*

## 16

<sup>1</sup> Te vijna te cáhán rī jín ró jijnáhan ró jéē na chindéé ñáhan ró hermana Febe, chí cúu ña ñahan jéjníñu jeē siquí jnúhun ya nuū ñáyuu cá candíje ñuu Cencrea.

<sup>2</sup> Te cuatáhú ró ña nájñuhun cúni maá Jítoho yō, chí súcuan cánuú sáha hermano cá candíje. Te chindéé ñáhan ró ña na-ni vē cúu jeē jini ñúhún ña, chí súcuan ni chindéé ñáhan maá ña cuehē ñayuu, te suni nde ruhū.

<sup>3</sup> Cahán rō jín Priscila jín Aquila jeē sándeýí ni ndindúú de, áchí rí, chí cáchindéé ñájnáhan de jín rí siquí jníñu Cristo Jesús.

<sup>4</sup> Chí ná ni iyo jnūndóho jeē cuu rī nuú, te ni cachundeyí ni de ni canducú de scácu de ruhū, vēsú suni cuu maá de núú. Te nácuatáhú rí nuū ndindúú de, te nasūu máa-ni ruhū, chí suni táca grupo ñayuu cá candíje táca nación.

<sup>5</sup> Te suni cahán rō jín ñáyuu cá candíje ndútútú vehe de, sándeýí ni i, áchí rí. Te cahán rō jeē sándeýí ni Epeneto, tēe manī rí jín. Chí ñuu Acaya, máa de cúu jeē ní candíje xihna gā nuū Cristo.

<sup>6</sup> Suni cahán rō jeē sándeýí ni María, ñahan jeē ní jejníñu ndasí jeē siquí jnúhun ya mēhñu ró jijnáhan rō.

<sup>7</sup> Te cahán rō jeē sándeýí ni Andrónico jín Junias, tēe cácuu jnáhan ñuu rī jeē ní cahīn jín rí vecāa. Te táca apóstol chí cájejnúhún de ndindúú tēe jíná, te xihna gā de ni cacandíje Cristo vēsú maá rí.

<sup>8</sup> Cahán rō jeē sándeýí ni Amplias, tēe manī rí jín, chí cándíje de Jítoho yō.

<sup>9</sup> Te cahán rō jeē sándeýí ni Urbano, tēe chindéé ñájnáhan jín yó siquí jníñu Cristo Jesús, te suni súcuan Estaquis, tēe jeē manī rí jín.

<sup>10</sup> Suni cahán rō jeē sándeýí ni Apeles, tēe jeē ní stēen jeē candíje vāha de Cristo, te suni súcuan cahán rō jín ñáyuu vehe Aristóbulo.

<sup>11</sup> Cahán rō jeē sándeýí ni Herodión, tēe cúu jnáhan ñuu rī. Te suni súcuan ñayuu vehe Narciso jeē cá candíje maá Jítoho yō.

<sup>12</sup> Te suni cahán rō jeē sándeýí ni Trifena jín Trifosa, ñahan casájniñu siquí jnúhun máa Jítoho yō. Te suni sándeýí ni Pérsida, hermana jeē manī yō jín, chí suni ní sájniñu ndasí ña siquí jnúhun Jítoho yō.

<sup>13</sup> Te cahán rō jeē sándeýí ni Rufo, tēe cájejnúhún ñáyuu jeē vāha cándíje de máa Jítoho yō. Te suni súcuan cahán rō jín náná de, te máa ña suni ní jito ña ruhū nájñuhun jeē naná rī cúu ña.

<sup>14</sup> Te cahán rō jeē sándeýí ni Asíncrito jín Flegonte jín Hermas jín Patrobas jín Hermes jín táca hermano jeē cáyūcu jín de.

<sup>15</sup> Te suni súcuan Filólogo jín Julia jín Nereo jín cuáha de, jín Olimpas jín ndíhi hermano cá candíje cáyūcu jín de jijnáhan de.

<sup>16</sup> Te jeē cahán táca ró jín jnáhan ró, te yínúhún techūhu ró ndaha i. Te táca grupo ñayuu cá candíje nuū Cristo, cáhán i jeē na sándeýí ni rō.

<sup>17</sup> Te cáhán ndahú rí jín ró, hermano jijnáhan ró, jéē cóto ró máa ró nuū ñáyuu cútuca ni te nducú stívi jnáhan jín jnúhun tu quíjnáhan jín jéē ní cacutúhva ró. Te cujiyo ró núu i jijnáhan i.

<sup>18</sup> Chí ñayuu súcuan, tu jéjníñu i nuū Jítoho yō Jesucristo, chí máni ndíhvi ni i siquí jeē cáji i. Te yōhoyo ndúxi i jín jnúhun cácahán i, te súcuan stáhú i ñayuu jeē tu jini vāha.

<sup>19</sup> Te máá ró jijnáhan ró, chi je cájini ndíhi ñayuu ndese vāha cájetáhú ró nuū yā, te jeē yúcuan cúsiñ ni rī. Te cúní rī jeē cóo listo vāha ró sáha ró jniñu vāha, te ma sáha ró jniñu néé.

<sup>20</sup> Te máá Yaā Dios jeē jéhe jnūhun ndeyí sñ ni, yachī sáha ya jeē cúndeyí ró siquī jexeén jeē cúu Satanás. Te ñúhun ni rī jeē Jítoho yō Jesucristo na sáha ya jeē vāha róhó jijnáhan ró.

<sup>21</sup> Sándeyí ni ró jijnáhan ró, áchí Timoteo, tēe chindéé ñáhán jíin rí siquī jnūhun ya. Te suni súcuan cácahān jnáhan ñuu rī Lucio jíin Jasón jíin Sosípater.

<sup>22</sup> Te ruhū jeē naní Tercio, jeē tēe ri carta yáha jeē cahán Pablo, suni cáhán rī jeē sándeyí ni ró jeē cácan dije ró Jítoho yō.

<sup>23</sup> Te Gayo, tēe ni jēhe núu vehe ndéé rúhū Pablo, cáhán de jeē sándeyí ni ró jijnáhan ró. Te suni jéhe núu de vehe nuū tāca ñayuu cácan dije. Te suni súcuan cáhán Erasto, tēe cúu tesorero ñuu yáha, te suni súcuan cáhán hermano Cuarto.

<sup>24</sup> Te ñúhun ni rī jeē máá Jítoho yō Jesucristo, na sáha ya jeē vāha róhó jijnáhan ró. Amén.

*Jnūhun sándíhi jéē cahán jeē yóhyo cújéhnu ya*

<sup>25</sup> Te vijna na cáhán yō jeē yóhyo cújéhnu Yaā Dios. Chi máá yá cuu sáha jeē cuiñi ñihin ga ró jijnáhan ró jíin jnūhun jnáma ya rohó jeē nácani ri, jíin jnūhun Jesucristo jeē steén rī. Chi súcuan ni steén Yaā Dios jnūhun sáhi yá, jeē ní yisáhi níí cáni nde ná tu jecōo ñayiví.

<sup>26</sup> Te vijna te je ni nane cájí. Chi jíin tútu iī jeē ní catee tēe ni canacani jnūhun ya, ni jitē núu jnūhun sáhi yáha nuū ñayuu tācá nación, návaha candije i te cuatáhú i. Chi Yaā Dios jeē técu níí cáni, súcuan ni ndacu ya jniñu.

<sup>27</sup> Te níí cáni na cáhán yō jeē yóhyo cújéhnu Yaā Dios siquī jniñu ní sáha ya jeē jíin Jesucristo. Chi máá ñn-ni ya iyó te yóhyo ndíchí yá. Súcuan na cóo. Amén.

## CARTA HN JEE NI TEE SAN PABLO APOSTOL NUU ÑAYUU ÑUU CORINTO

<sup>1</sup> Máá rí cúu Pablo, te ni cana Yaā Dios ruhū cúu ri apóstol Jesucristo. Chi súcuan ni nujnahan ni yā ni tají yá ruhū nacani ri jnūhun ya. Te ndindúú rí jiín hermano yō Sóstenes

<sup>2</sup> cátee ri carta yáha cuájeē nuū rohó ñáyyuu ñuu Corinto jeē cácanđije ró Yaā Dios. Chi cácuu ró ñayuu maá yá, chi cáyihí ró ndaha Cristo Jesús. Chi ni cana Yaā Dios rohó jijnáhan ró jée coo ndoo coo ii ró nuū yā. Te ni cana ya rohó ndé jiín táca gá ñayuu jeē ndácunehen i máá Jítoho yō Jesucristo, ndé-ni cúu nuū cáhīyo i. Chi Jítoho táca yó jiín i cúu ya.

<sup>3</sup> Te cáñuhun ni rí jeē Tatá yō Yaā Dios jiín Jítoho yō Jesucristo na sáha ga yā jeē váha rōhó, te sáha ya jeē coo ndeyí coo sñ ni rō.

### *Cristo sáha ya táca jée váha yóhó*

<sup>4</sup> Te níni nácuatáhú rí nuū Yaā Dios jeē siquí rohó jijnáhan ró, chi jeē jiín Cristo Jesús ni sáha ya jeē váha rōhó.

<sup>5</sup> Chi cáyihí ró ndaha Cristo, te jeē yúcuan ní sáha Yaā Dios jeē cáhīyo cúca ró jiín táca jnūhun ya, chi cájecūhun váha ni rō te cúu nácani ró.

<sup>6</sup> Chi súcuan cúu jeē cáhīin nīhin ró jiín jnūhun Cristo jeē ní canacani ri nuū rō.

<sup>7</sup> Te súcuan te tu cúmaní ni ñn tahū jeē jéhe ya cuu ánuá rō níni jée cándetu ró quíví jeē quénda ndijin Jítoho yō Jesucristo.

<sup>8</sup> Te máá yá chi sáha ya jeē cuiñi nīhin ró nde na jínu quíví, návaha ma cóo cuēchi siquí rō quíví ndiji Jítoho yō Jesucristo.

<sup>9</sup> Te squícu Yaā Dios táca jée ní jéjnūhun ya, te ni cana ya rohó jijnáhan ró návaha cuni jnáhan ró jiín Séhe ya, Yaā cúu Jítoho yō Jesucristo.

### *Siquí jeē ma cóo sñn ni i jín jnáhan i*

<sup>10</sup> Hermano, nde jiín síhví Jítoho yō Jesucristo cahán ndahú rí jiín ró jeē inuú-ni na ndájñuhun ró jijnáhan ró, te ma cóo sñn ni rō. Chi váha inuú na cóo ni rō jiín táca jée cájeni ni rō.

<sup>11</sup> Súcuan cáhán rí, ñání mání, chi ni cacastūhun ñáyyuu vehe Cloé nuū rí jeē cátejñáhan ró.

<sup>12</sup> Chi táca ñn ñn ró sñn sñn cácahān rō: Ruhū chi jiín Pablo índichi rí, cácahān sava ró. Te sava ga rō: Ruhū chi jiín Apolos. Ruhū chi jiín Pedro. Ruhū chi jiín Cristo. Cácahān rō.

<sup>13</sup> Te jeē cácahān rō súcuan ¿te á cájeni ni rō jeē sñn sñn Cristo iyó jée cánacani ri jnūhun? ¿Te á ruhū Pablo ni jihí jicā cruz jehē rō? ¿Chí jiín síhví ruhū ni cajendute ró, chí naún?

<sup>14</sup> Tú cuítí. Te na cútahū rí nuū Yaā Dios jeē tú cuehē rō ni scuándute rí, chi máá Crispo jiín Gayo-ni,

<sup>15</sup> návaha ma cahán ni ñn ró jée jiín síhví rí ni jendute ró.

<sup>16</sup> Te sá núcūhun ni rí jeē suni ni scuándute rí Estéfnas jiín ñáyyuu vehe de. Te sanaa te súcuan-ni cúu ñayuu ni scuándute rí, jéni ni rí.

<sup>17</sup> Chi tu ní téjniñu Cristo ruhū jeē scuándute rí, chi sa suhva jeē nácani ri jnūhun jeē jnáma ya ñayuu. Te tu ní ndúcú rí jeē steén rí nuū rō ñn modo ndichí

jeē ma jécūhun ni rō, chi núu súcuan te ma cúu jecūhun vāha ni rō jnūhun jeē ni jīhī Cristo jicā cruz.

*Jīn Cristo ni steén Yaā Dios poder yā jīn jnūhun ndíchí yá*

<sup>18</sup> Te jnūhun jeē ni jīhī yā jicā cruz jeē jnāma ya ñayuu, chi jnūhun cánéeé í cúu nuū ñayuu cuangoo nuū jnahnú ndetū. Te máá yó jeē cuahán yō nuū cácu yó, chi jíní yō jeē jnūhun Yaā Dios jeē ndíso poder cúu.

<sup>19</sup> Chi suhva yósó núu tútu íi jeē ni cáhān Yaā Dios:

Na snáa rī jnūhun ndíchí cácahān ñayuu ndichí cuenta ñayīvi yáha, te ma cuátáhú rí jnūhun cácahān ñayuu jeē jéni ni jeē jíní vāha. Achí yá.

<sup>20</sup> Núu súcuan ¿te ndé cuajníñu tēe ndíchí cuenta ñayīvi yáha, jíní tēe cástéén tutu, jíní tēe cánanducú yúcún síquī jeē steén ñayuu ñayīvi yáha? Chi tāca jnūhun ndíchí cuenta ñayīvi yáha, ni cáhān Yaā Dios jeē jnūhun cánéeé í cúu.

<sup>21</sup> Te yōhoyo ndíchí sáha Yaā Dios. Chi tāca jnūhun ndíchí cájini ñayuu ñayīvi, ni cachí ya jeē tu jéjníñu jeē cúni i ndese Yaā cúu ya. Yūcuán na te ni nujnahan ni yā jeē jíní jnūhun ya jeē cánacani ri te jnama ya ñayuu cácañdije, vésú cájeni ni ñayuu ñayīvi jéē jnūhun cánéeé íi cúu.

<sup>22</sup> Chi ñayuu hebreo, máni cácuni i jeē sáha Yaā Dios cuehē jniñu jéhu jeē steén poder yā. Te ñayuu griego chi máni síquī jnūhun ndíchí cándihvī ni i.

<sup>23</sup> Te máá rí chi sa suhva cánacani ri jnūhun jeē ni jīhī Cristo jicā cruz jeē jnāma ya ñayuu. Te jnūhun yáha sáha jeē jnáníní ni ñayuu hebreo, te ñayuu tāca gá nación chi cájeni ni i jeē jnūhun cánéeé íi cúu.

<sup>24</sup> Te ñayuu jeē ní cana ya ni quīvicoo ndaha ya, vésú ñayuu hebreo chí ñayuu griego, chí jíní i jeē jíní Cristo ni steén Yaā Dios poder yā jíní jnūhun ndíchí yá.

<sup>25</sup> Chi jnūhun Yaā Dios jeē cácahān ñayuu jeē jnūhun cánéeé íi cúu, yōhoyo ndíchí gá vésú jnūhun ndíchí ñayuu. Te cájeni ni ñayuu jeē tú na poder yā ná ni jīhī Jesús jeē jnāma ya yohó, te tuú chi ñihin téyí gá poder yā ún vésú poder ñayuu.

<sup>26</sup> Hermano, máá ró cácuu jeē ní cana ya ni quīvicoo ró ndaha ya. Te condēhe ró jeē tú cuehē rō ndíchí jíní jnūhun ñayīvi, ni tú cuehē rō cándacu jniñu, ni tú cuehē rō cácuu sēhe ñayuu cujéhu.

<sup>27</sup> Chi sa suhva ni nacāji Yaā Dios tāca jéē cácahān ñayuu ñayīvi jéē tu ndíchí cuiti, návāha coo jnūhun canu nuū tāca jéē ndíchí. Te ní nacāji ya ñayuu tu téyí íni ñayīvi, návāha coo jnūhun canu nuū ñayuu teyí.

<sup>28</sup> Te suni ní nacāji Yaā Dios tāca jéē tu cújéhu íni ñayīvi, jíní táca jéē sajéé ni i nuū, nde jíní táca jéē tú jniñu cájeni ni i, návāha snúu ya táca jéē cujéhu íni ñayīvi.

<sup>29</sup> Súcuan ni sáha ya návāha ni íin ñayuu ma cúu sátéyí i máá i nuū yá.

<sup>30</sup> Te máá ró jijnáhan ró chi ni sáha Yaā Dios jeē nduú ró jíní Cristo Jesús. Chi nde nuū máá yá ni canihin yō jnūhun ndíchí, te ni ndahva yā cuēchi yó, te ni sáha ya jeē iyó ndoo iyó íi yō nuū yā, chí ni jnama ya yohó.

<sup>31</sup> Te jeē yúcuan na cóo nájnūhun cáhān tutu íi: Núu íin ñayuu cuní i cutéyí i, te na cutéyí i síquī jeē ni sáha máá Jítoho yō jehē i, achí.

*Jeē nácani Pablo jnūhun jeē ni jīhī Cristo*

## 2

<sup>1</sup> Te ruhū, hermano, ná ni jeē rī nuū rō jijnáhan ró jéē nácani ndaā rī jnūhun Yaā Dios, te tu ní nácani rī jnūhun ndíchí jéē ma jécūhun ni rō.

<sup>2</sup> Chi ná ni iyo ri jíin ró te tú na inga jnūhun ní ndúcú rí castūhun rí nuū rō, chí máni máá jnūhun Jesucristo jeē ni jíhī yā jicā cruz jeē jnáma ya yohó.

<sup>3</sup> Te ná ni jinū rī nuū rō jijnáhan ró, chí tú na fuerza rī, te yúhú rí, te quísi i ruhū.

<sup>4</sup> Te ná ni nacani ri jnūhun nuū rō, chí nasūu jíin jnūhun ndíchí ñáyuu ñayívi ní scándije ri rohó, chí sa suhva jíin máá poder Espíritu yā ni steén rī nuū rō jijnáhan ró,

<sup>5</sup> návāha ma cuiñi ró síquī jnūhun ndíchí cácahān ñayuu, chí cuiñi ró síquī poder Yaā Dios.

### *Jíin Espíritu te stéén Yaā Dios ndese Yaā cúu ya*

<sup>6</sup> Te ndaā chí ndíchí cácahān rī jíin ñáyuu jeē jé ni ije jíin jnūhun cándije i ya. Te nasūu jnūhun ndíchí jéé iyó ini ñayívi yáha, ni nasūu jnūhun ndíchí cácahān tēe cácujuhnu ñayívi yáha, chí tēe ún yāha-ni jeē cácujuhnu de.

<sup>7</sup> Chí jnūhun cácahān rī cúu jnūhun ndíchí máá Yaā Dios jeē ní yisáhí. Chí jnūhun ndíchí un jéé ní yisáhí, ni jequín Yaā Dios nde ná tu jecōo ñayívi, návāha cácu yó jéé cótecu yō ní cáni sáha jnūhun ún.

<sup>8</sup> Chí ni ñin tēe cújéhnú nuū ñayívi yáha, tu ní jécūhun ni de jnūhun ndíchí un. Chí núu ni jecūhun ni de núú, te ma cáhni cuíti de máá Jítóho yō, Yaā cujéhnú luu.

<sup>9</sup> Chí cúu nájjnūhun cáhán tutu:

Tāca jéé ni sātūhva Yaā Dios jeē cúu ñayuu jeē maní jíin yá,

ni ñin ún tu ní jító jínúū ñayuu, ni tu ní jíni sōho i,

ni tu ní quíji jeē súcuan cani ni i.

Achí tutu.

<sup>10</sup> Te máá yó jijnáhan yó chí ni steén Yaā Dios tācá un núu yō jeē jíin Espíritu yā. Chí máá Espíritu jíni vāha ya te stéén yā ndíhi, chí nde ndíhi jeē ndíchí gá máá Yaā Dios.

<sup>11</sup> Chí ni ñin ñayuu ma cúu cuni i ndese jéni ni inga ñayuu, chí máá-ni i jíin ánuá i cúu jeē jíni. Te suni súcuan ni ñin ñayuu tu jíni i ndese jéni ni Yaā Dios, chí máá-ni Espíritu Yaā Dios cúu jeē jíni.

<sup>12</sup> Te máá yó chí ni nihīn yō Espíritu un jéé véji nuū Yaā Dios, te tu cájeni ni yō nájjnūhun cájeni ni ñayuu ñayívi. Te jeé yúcuán cúu jeé cájecūhun ni yō ndese ní sáha Yaā Dios jeé vāha yóho síquī jeé vāha ni yā.

<sup>13</sup> Te suu síquī tāca jéé yáha cúu jeé cácahān rī, te nasūu jíin jnūhun jeē castéén ñayuu ndíchí, chí jíin jnūhun jeē steén máá Espíritu. Chí cástéén rī jnūhun Espíritu nuū ñáyuu cánevāha Espíritu.

<sup>14</sup> Te ñayuu ñayívi tu cájétáhú i tāca jnūhun jeé véji nuū Espíritu Yaā Dios, chí cájeni ni i jeé jnūhun cánéé íi cúu. Te ma cúu jecūhun ni i, chí tu cánevāha i máá Espíritu jeé sáha jeé jécūhun ni i.

<sup>15</sup> Te ñayuu cánevāha Espíritu, chí cájecūhun ni i ndese íyó ndíhi-ni. Te ñayuu ñayívi ma cúu jecūhun ni i ndese ñayuu cácuu ñayuu ún.

<sup>16</sup> Chí suhva cáhán tutu íi: ¿Ndé ñin cuu cuni ndese jéni ni máá Jítóho yō? ¿Te ndé ñin cuu steén nuū yā? Ni ñin ma cúu. Achí tutu. Te vēsú súcuan te máá yó chí cájeni ni yō nájjnūhun jéni ni Cristo.

*Jeé cáchindéé ñájjnáhan de cájejnīñu de nuū Yaā Dios*



## 3

1 Te ruhū, hermano, tu ní cúu cahān rī jīn ró jijnáhan ró nájñūhun cáhān rī jīn ñáyuu jica jīn Espiritu. Chi ní cahān rī jīn ró nájñūhun jīn ñáyuu cájica jīn modo maá, chi cácuu ró nájñūhun sūchi lúli jéé ná tu ije ró jīn jñūhun Cristo.

2 Ni steén rī nuū rō jeé tú yí, chi cácuu ró nájñūhun sūchi lúli jéé jéxin gā. Te tu ní cáhān rī jīn ró jñūhun yí jeé cúu nájñūhun jeé ndáva jeé yéji ñáyuu ní ije, chi ná tu canda ró jīn ndé saá. Te ni vijna ná tu canda ró jīn.

3 Chi cájica ga rō jīn modo neé maá ró. Chi cácuuésún ni rō, te cácajnáhan ró, te cácusin ni rō. Núu súcuan te cácuu ró nájñūhun ñáyuu ñayivi jéé cájica jīn modo neé maá.

4 Chi ñn ró cáhān: Ruhū chi jīn Pablo índichi rī. Te inga rō cahān: Ruhū chi jīn Apolos. Te súcuan cúu jeé cájica ró jīn modo neé maá ró

5 ¿Te ndé ñn cúu ruhū, te ndé ñn cúu Apolos núu súcuan? Chi maá mozo-ni Yaā Dios cácuu ri, te ni jejniñu ya ruhū návaha candije ró maá Jítoho yō. Chi ná ñn ná ñn ri ní sáha jniñu ndese ní jēhe maá Jítoho yō nuū rī.

6 Ruhū, nájñūhun ní taji ri jñūhun ya ini anuá rō, te Apolos, nájñūhun ní chuhun de ndute cúu jeé ní steén gā de nuū rō. Te maá Yaā Dios cúu jeé ní scuéñu jñūhun ini anuá rō.

7 Núu súcuan te tú na vé cúu sáha tēe táji ní tēe chúhun ndute, chi sa suhva maá Yaā Dios cúu jeé scuéñu.

8 Te tēe táji jīn tēe chúhun ndute, ñn-ni cácuu de. Te táca de chi cuāha ya yāhu nuū de ndese jniñu ní casáha ñn ñn de.

9 Chi ruhū jijnáhan ri chí tēe chíndéé ñajnáhan cájejniñu nuū Yaā Dios cácuu ri. Te maá ró jijnáhan ró cácuu nájñūhun itu Yaā Dios jeé jícu ya jīn.

Te suni nájñūhun ñn vehe jeé sáha Yaā Dios cácuu ró.

10 Te ruhū chí cúu ri nájñūhun ñn maestro albañil jeé ní jequin rī cimientu vehe ún, cúu jeé ní scándije ri rohó. Te inga de cásama de siquī, cúu jeé castéén gā de nuū rō. Núu súcuan te ná ñn ná ñn de na cóo cuidado de ndese sáma de siquī.

11 Te Jesucristo cúu cimientu vehe ún, te ní ñn ma cúu caquin inga cimientu, chí maá yá cúu jeé ní ndahva cuēchi ró.

12 Te táca ñáyuu cácañdije, chí sáha i vehe siquī cimientu un, núu jīn ndajniñu vāha nájñūhun oro chí plata chí yūu luu, chí jīn jéé yachí naa, nájñūhun yujnu chí ite chí ndayóhō.

13 Te natūu jniñu un jéé ní sáha ñn ñn i, te suu cúu ndese ní condihvi ní i siquī maá yá. Chi maá quivī juicio jeé sándaā yā jniñu ñáyuu, quivī ún natūu cáji jniñu i. Chi jīn ññūñ quiji quivī ún, te nájñūhun sáha ññūñ jeé jéñmu táca jeé cúu cayū, súcuan coto ndee ya jniñu ñn ñn i.

14 Te núu tú cayū jniñu ní sáha i siquī cimientu un, te nihñ i tahū i.

15 Te núu tu ní condihvi ní i jīn jniñu ya, te ma nihñ i tahū i, chí nájñūhun cayū jniñu i. Te maá i chí cācu ánuá i, vēsú nájñūhun je yajni cayū i nuū yáñuhūn.

16 ¿A tu cájini rō jeé cácuu ró nájñūhun templo Yaā Dios, chí ndéé Espiritu Yaā Dios ini anuá rō?

17 Te núu ñn tēe stívi de templo Yaā Dios, te snáñnú ndetū yā tēe ún. Chí ndoo ndasí cúu templo yā, te suu cácuu maá ró.

18 Ni ñn ró ma stahú ró maá ró jīn jéé jéni ní rō. Núu ñn ñáyuu jéni ní i jeé ndichí i jīn jñūhun ñayivi yáha, vāha ga na siāā i ún, návaha coo ndichí ndije i jīn jñūhun maá yá.

<sup>19</sup> Chi jñūhun ndíchí jéē iyó ini ñayīví yáha, jñūhun cánéé íi cúu nuū Yaā Dios. Chi cáhán nuū tútu íi: Ñayuu ndíchí cuenta ñayīví, chi nájnīi ya i siquī jñūhun ndíchí i jeē jési i jñūhun ya, achí.

<sup>20</sup> Te cáhán tucu tutu: Máá Jítoho yō jiní yā tāca jéē jéni ni ñayuu ndíchí, chi máni jeē jéni cáhá ni i, áchí.

<sup>21</sup> Núu súcuan te ni ñin ró má cutéyí ró jeē siquí ni ñin tēe ndíchí. Chi cuenta maá ró cúu ndihi-ni.

<sup>22</sup> Cúu Pablo, cúu Apolos, cúu Pedro jeē castéén nuū rō. Cúu ndihi jeē iyó ini ñayīví, jeē iyó vijna jíin jéē quíji. Te vésú núu cotecu rō chí cuu rō, te ndihi-ni chí cuenta maá ró cúu.

<sup>23</sup> Te máá ró cácuu cuenta Cristo, te Cristo cúu cuenta Yaā Dios.

### *Jeē casájniñu apóstol siquī jñūhun ya*

## 4

<sup>1</sup> Núu súcuan te na cáni ni rō jijnáhan ró jeē mozo-ni nuū Cristo cácuu ri, jeē ní tejniñu ya ruhū jeē steén rī jñūhun Yaā Dios jeē ní yísāhi ndé jenahán.

<sup>2</sup> Te ndaā chí tēe jeē sájniñu siquī ún, iyó responsable ná ñin ná ñin de jeē squícu vāha de.

<sup>3</sup> Te ruhū tu sáha ri cuenta núu cánanducú ró siquī rī ndese sáha ri, chí núu cánanducú ñayuu cácujuhnu ini ñayīví. Te ni máá rí tu chíhi ri cuenta siquī maá rí.

<sup>4</sup> Chi vésú jiní rī jíin ánuá rī jeē tú na cuēchi ri, te nasūu yúcuu cúu jeē quéndōo ndaā rī, chí máá Jítoho yō cúu jeē jíto ndee ruhū.

<sup>5</sup> Jeē yúcuu ma nánducú ró siquī jniñu jnáhan ró, chí nde na quēē maá quíví te cuni rō. Chi nde na ndíji máá Jítoho yō te nastúu ndijin yā tācá jniñu jeē yísāhi núu néé, te steén ndijin yā tāca jéē jéni ni ñayuu jíin ánuá i. Yúcuán na te máá Yaā Dios cuajnúhún yá ná ñin ná ñin i ndese ni casáha i.

<sup>6</sup> Hermano, tāca jñūhun yáha ní cahán rī návāha quéndōo vāha ró jíjnáhan ró. Te ni cachi rī jeē maá rí jíin Apolos cácuu ri mozo-ni nuū yā, te súcuan cácuu ri ñin ejemplo nuū rō. Te cáhán rī jeē súcuan cácuu ri, návāha cutūhva ró caní ni rō maá-ni nájnūhun cáhán tutu íi. Chi ma sandúxí ró jeē cuajnúhún ró ñin tēe steén, te inga de tuú.

<sup>7</sup> ¿Te naun cácutéyí ró nuū jnáhan ró núu súcuan? ¿Te na vé cúu jeē iyó núu rō jeē tu ní cacutahū rō nuū yā? Te núu ni cacutahū rō nuū yā, ¿te naun casátéyí ró maá ró jeē nájnūhun jeē nasūu jéē ní cacutahū rō cúu?

<sup>8</sup> Va je ni cacucúca ró, chi je cánevāha ró ndihi, cájeni ni rō. Te je cándacu máá ró jniñu, te ni tuá cájini ñūhún ró ruhū, cájeni ni rō. Tú vāha jeē súcuan cácutéyí ró. Te nacá jeē vāha núu jeē cándacu ndije nde ró jniñu núu, návāha suni cuāha ró jñūhun jeē ndacu nde rī jniñu jíin ró jijnáhan rī.

<sup>9</sup> Te iyó jéni ni rī jeē ruhū tēe cácuu apóstol, ni sáha Yaā Dios jeē cácuu ri nájnūhun tēe núu ga nuū ñayuu, nájnūhun tēe jeē jé ni cundaā jeē cúu. Te ní ñayīví jíin andíví cándēhe vāha nuū rī, cúu ndajéhé Yaā Dios jíin ñayuu.

<sup>10</sup> Chi jeē siquí Cristo te cácahán i jeē tēe cánéé cácuu ri. Te tāca rōhó va ndíchí ró jíin jñūhun Cristo, cájeni ni rō. Te tāca rúhū chí tu fuerza rī, te rōhó va iyó fuerza rō, cájeni ni rō. Te rōhó chí cáhiyo yíñūhún ñayuu nuū rō, te nuū rī chí casájéē ni i.

<sup>11</sup> Níí véjicoo rī cájii rī sōco te nde vijna. Te cájichí rī ndute, te cúmanī sahma rī, te tu casáha vāha ñayuu jíin rí, te ni tu cánevāha ri vehe.

<sup>12</sup> Te nīhin cásájniñu ri jíin ndaha ri. Cácahān neé i nuū rī, te cácahān vāha ri jíin i. Cájito xeēn i ruhū, te cájendeyí ni rī.

<sup>13</sup> Cácahān neé i siquī rī, te sa cácahān manī rī jíin i. Te cácuu ri nájnūhun yācā ini ñayiví, te cásquéhichī i ruhū nde vijna.

<sup>14</sup> Te nasūu jéé tēe ri yāha jéé cúcanu rō, chi sa suhva jeē stihví ni rī rohó, chi cácuu ró nájnūhun sēhe ri chi manī rī jíin ró.

<sup>15</sup> Chi vēsú na cóo uxī mil tēe stēen jnūhun Cristo nuū rō, te ñn-ni tátá rō iyó. Te máá rí cúu nájnūhun tátá rō, chi ni scandíje ri rohó jéé ní nacani ri jnūhun vāha Cristo Jesús jeē jnáma ya yohó.

<sup>16</sup> Núu súcuan te cáhán ndahú rí jíin ró jeē na ndácu ró rúhū jijnáhan ró.

<sup>17</sup> Te jeē yúcuan cúu jeē tají rí Timoteo cuajeē de nuū rō. Chi cúu de nájnūhun sēhe ri jeē manī rī jíin de, te squícu vāha de nuū máá Jítoho yō. Te máá de nacachī tucu de nuū rō ndese jíca ri jeē candíje ri Cristo, jíin ndese stēen rī nuū tāca grupo ñayuu cácaandíje tāca lado.

<sup>18</sup> Te sava ró chi cásátéyí ró máá ró, chi cájeni ni rō jeē ma jéé cuiti gā rī nuū rō.

<sup>19</sup> Te tuú chi yachī jeē rī nuū rō te núu súcuan cúní máá Jítoho yō. Yūcuán na te nanducú rí siquī tēe cácutéyí, te ma sáha ri cuenta jnūhun cácahān-ni de, chi sa coto ndee rī de núu cuu squícu nde de.

<sup>20</sup> Chi jeē ndácu Yaā Dios jniñu nuū yō, nasūu máá jéé cahán ñi-ni yó cúu, chi jini ñūhún condiso poder jnūhun cáhán yō jíin jniñu sáha yó.

<sup>21</sup> Núu súcuan ¿te ndese cácuni rō? ¿A jéé cuxeēn rī nuū rō núu na jéé rī, siquī jeē tu cānacani ni rō, chi nacani ni rō te jeē rí jíin jnūhun cúndáhú ni jíin jnūhun vitá ni?

*Jeē sándaā Pablo siquī ñn cuēchi*

## 5

<sup>1</sup> Te ni nīhīn rī jnūhun jeē jíca jnéni ñn tēe jeē íne mēhñu ró, chi ndéca de naná uū de. Te xeēn ndasí sáha tēe ún, chi ni ñayuu jeē tu cájini jnūhun Yaā Dios, tu cásáha i súcuan.

<sup>2</sup> Te vēsú súcuan te cásátéyí ró máá ró jijnáhan ró. Vāha ga jeē na cúcuíhyá ndasí ni rō. Te cánuu jéé na quēnehen ró tēe sáha cuēchi ún na quēnda de mēhñu ró.

<sup>3</sup> Te ruhū, vēsú tu íyó rí jíin ró, te nájnūhun jeē iyó rí jíin ró cúu jeē ñūhún ni rī rohó. Te je ni sándaā rī siquī tēe ni sáha cuēchi ún, chi nájnūhun jeē iyó rí jíin ró cúu.

<sup>4</sup> Núu súcuan te na ndútútú ró jijnáhan ró, te máá Jítoho yō Jesucristo coo ya jíin ró. Te máá rí chi nájnūhun cone ri jíin ró, chi ñūhún ni rī rohó. Te poder máá Jítoho yō Jesús suni coo jíin ró.

<sup>5</sup> Te na chíhi yó tēe ún ndaha Satanás, návāha na ndóho yiqui cúñu de, te nacani ni de te cācu ánuá de quiví ndiji Jitoho yō Jesús.

<sup>6</sup> Tuú vāha jeē casátéyí ró máá ró. ¿A tu cájini rō jnūhun cáhan suhva? Vēsú jecu-ni levadura te ndáa ñí ñujen sáha, áchí.

<sup>7</sup> Núu súcuan te quenehen ró tēe un nájnūhun scáne ró levadura jeē ni tívi. Te súcuan te cuu ró nájnūhun pan jeē cúvāha jíin ñujen jéé jéé tú na levadura yíhi, jeé cáyeji i vico pascua. Te ndaā jeē súcuan cácuu ró. Chi je ni jíhi Cristo jeē ni sócō yā máá yá jehē yō, chi cúu ya nájnūhun londe pascua jeē ni jíhi.

<sup>8</sup> Núu súcuan te na cócūhun ni yō ndese ni cuu vico pascua un, te na cóo ndije ndaā anuá yō, te suu cúu nájñūhun pan jeē tú na levadura yíhi. Te ma sáha yó jniñu neé jín jniñu jnéhén, jeē cúu nájñūhun levadura jeē ni tívi.

<sup>9</sup> Nuū inga carta jeē ní tee ri nuū rō jijnáhan rō ni cahān rī jeē ma quívi nduu rō jín ñayuu cájica jnéni.

<sup>10</sup> Te tu ní cachi rī jeē ma quíjnáhan cuíti rō jín ñayuu tu cávandje jeē cájica jnéni, jeē ndiyo ni, jeē sácuihná, jeē chiñúhún ídolo. Chi núu súcuan te jini ñúhún jeē quénda rō ini ñayívi núú, chi tuá na inga modo jeē cújiyo rō núú i chi ndéé yó ñayívi jín i.

<sup>11</sup> Chi sa suhva ni cachi rī jeē ma quívi nduu rō jín máá ñayuu jeē cácahān i jeē cúu i hermano, te núu jica jnéni i, chí ndiyo ni i, chí chiñúhún i ídolo, chí chíso jñūhun i siquī jnáhan i, chí nájini i, chí cuihná i. Te ni ma cáji cuíti rō staa jín ñayuu casáha súcuan.

<sup>12-13</sup> Chi nasúú jniñu ri cúu jeē sándaā rī siquī ñayuu jeē tu cáhīn jín yó. Yaa Dios cúu jeē sándaā siquī i. Te ñayuu cáhīn jín rō chi cánuú jéé sándaā rō siquī i. Núu súcuan te cánuú jéé quénehen rō téé ni sáha cuēchi un jéé íne de mēhñu rō, na quénda de.

*Jeē ma cáquin i cuēchi siquī jnáhan i nuū tohó tu cávandje*

## 6

<sup>1</sup> Te núu jnáhan rō jéé candije ni sáha cuēchi siquī rō, ¿te naun jéngoo rō jín de nuū tohó jeē tu cávandje jín yó? ¿Te naun tu casándaā rō nuū jnáhan rō cávandje Yaa Dios?

<sup>2</sup> ¿A tu cájini rō jeē ñayuu cávandje Yaa Dios chi ñin quívi te sándaā i jniñu ñayuu ñayívi? Te núu ñin quívi sándaā rō jniñu ñayuu ñayívi, ¿te á má cúu sándaā rō vijna siquī táca cuēchi lúli casáha jnáhan rō?

<sup>3</sup> ¿A tu cájini rō jeē ñin quívi te sándaā yō nde jniñu táca ndajéhé andívi? Te nagā ni cuu jniñu ñayívi yáha jeē ma cúu sándaā yō.

<sup>4</sup> Núu súcuan te núu jnáhan rō sáha de ñin cuēchi siquī rō, ¿te naun jéngoo rō sa nuū táca téé jeē tu cúu de jnáhan ñayuu cávandje jeē sándaā de siquī cuēchi ún?

<sup>5</sup> Súcuan cáhán rī návaha na cúcanu rō jijnáhan rō. ¿A tu íyó ni ñin téé jécūhun ni mēhñu rō jeē cuu sándaā de siquī rō?

<sup>6</sup> Tú vaha jeē ñin hermano caquin cuēchi siquī inga hermano nuū tohó jeē tu cávandje.

<sup>7</sup> Te jeē cájequin rō cuēchi siquī jnáhan rō, chi jeē castívi lí rō cúu. ¿A tú vaha ga cuandeyí ni rō na sáha i cuēchi siquī rō chí quende i ndajniñu rō?

<sup>8</sup> Te tuú chi sa máá rō casáha cuēchi te cáquende rō ndajniñu, te nuū táca hermano rō cúu jeē casáha rō.

<sup>9-10</sup> ¿A tu cájini rō jeē ñayuu tu íyó ndáa, ma nihín tahú i quívi i ñuu nuū ndácu Yaa Dios jniñu? Ma stahú rō maá rō cani ni rō jeē nihín tahú rō, chi ni ñayuu jeē jica jnéni, ni ñayuu chiñúhún ídolo, ni ñayuu casiquí ndéé jnáhan, ni téé sáha ndiýi jín jnáhan yí, ni ñayuu cuihná, ni ñayuu ndiyo ni, ni ñayuu nájini, ni ñayuu chíso jñūhun siquī jnáhan, ni ñayuu stahú jnáhan siquī xuhun, ma nihín tahú i quívicoo i ñuu nuú ndácu Yaa Dios jniñu.

<sup>11</sup> Te súcuan ni candāa sava rō núú, te vijna chi je ni nacate ya rohó, te cáhīyo ndoo cáhīyo ñi rō nuū yā. Chi je ni ndahva yā cuēchi rō jéé jín máá Jítoho yó Jesús jín Espiritu Yaa Dios.

*Jeē iyó ndoo iyó tī yiqui cúñu ñayuu cácaandje*

<sup>12</sup> Te ndaā cúu jeē cácahān jeē ndihī-ni jniñu iyó váha sáha yó núu ndese cuní yō. Te vēsú súcuan te nasūú ndihī sáha jeē quéndōo váha ánuá yō. Ndihi chi cuu sáha yó, te vēsú súcuan te tu iyó váha jeē quívi yó núu jniñu jeē stívi ánuá yō.

<sup>13</sup> Te ndaā cúu jeē cácahān jeē ndeyu cúu jeē cúhun chíji, te chíji cúu jeē cúhun ndeyu. Te ñn quívi te tuá coo súcuan, chí naa ndindúú un sáha Yaā Dios. Te nasūu síquī jeē cáca jnéni yó cúu jeē iyó yiqui cúñu yō, chí sa suhva jeē sáha yó jéē cuní maá Jítoho yō. Te Jítoho yō chí ndíto ya yiqui cúñu yō.

<sup>14</sup> Te nájnūhun jeē ní nastécu Yaā Dios Jítoho yō, suni súcuan nastécu yā yohó jíin poder yā.

<sup>15</sup> ¿A tu cájini rō jeē yiqui cúñu táca ñn ñn ró cúu nájnūhun táca parte yiqui cúñu Cristo? Núu súcuan ¿te á cuu quende yó ñn parte yiqui cúñu Cristo te squíjñahan yó jíin ñn ñahan jica jnéni? Ma cúu cuiti súcuan.

<sup>16</sup> ¿A tu cájini rō jeē tēe quíjñahan jíin ñahan jica jnéni, ñn na yiqui cúñu ni nduu de jíin ña? Chí cáhán tuú i: Jeē ndindúú chí ñn na yiqui cúñu cuu, áchí.

<sup>17</sup> Te ñayuu jeē quíjñahan jíin maá Jítoho yō, chí suni súcuan ñn na cúu i jíin yá síquī jeē candje i ya.

<sup>18</sup> Núu súcuan te cunu ró jéē ma quívi ró núu jnúhun jica jnéni. Chí táca gá cuēchi jeē sáha ñayuu, chí nasūú yiqui cúñu i stívi i. Te núu jica jnéni i, te síquī yiqui cúñu i cúu jeē sáha i cuēchi.

<sup>19</sup> ¿A tu cájini rō jeē yiqui cúñu ró cúu templo Espíritu Santo jeē ni jéhe Yaā Dios nuū ró, te ndéé yá ini ró? Te nasūu cuenta maá ró cácuu ró.

<sup>20</sup> Chí Yaā Dios yahu ni cuu jeē ní nacuaan ya rohó jíjñahan ró. Te jeē yúcuan cánuú jéē cáca yíñuhún ró nuū Yaā Dios jeē sáha ró jniñu váha nde jíin yiqui cúñu ró jíin ini jíin ánuá ró, chí máni cuenta Yaā Dios cúu.

*Jnúhun cástūhun síquī tēe jíin ñasihí*

## 7

<sup>1</sup> Vijna te na cáchi rī síquī táca jnúhun jeē ní cacajnúhun ró ruhū nuū carta. Jendaá jeē váha ga quendōo ñn tēe núu tú condeca de ñahan.

<sup>2</sup> Te síquī jeē iyó jnúhun jnéni, te váha ga jeē táca tēe na cóo ñasihí maá de, te suni táca ñahan coo yíi maá ña.

<sup>3</sup> Te yíi na squícu váha de nuū ñasihí de jeē cúu de yíi ña. Te suni súcuan ñasihí na squícu váha ña nuū yíi ña.

<sup>4</sup> Chí ñasihí chí tu cúu sáha ña jeē cuní ña jíin yiqui cúñu ña, chí suni jeē cuní yíi ña. Te suni súcuan yíi tu cúu sáha de jeē cuní de jíin yiqui cúñu de, chí suni jeē cuní ñasihí de.

<sup>5</sup> Te ma sasáhán ró maá ró nuū jñahan ró. Te núu cácuni rō jeē vihyá gā cacān tahú ró jecu tiempo, te núu cáhīyo conforme ndindúú ró, te cuu sásáhán ró maá ró nuū jñahan ró. Te yūcuán na te váha ga naquijñahan tucu ró, návaha ma cóto ndee Satanás rohó síquī jnúhun jnéni.

<sup>6</sup> Te nasūu jéē ndácu ri jniñu jeē cánuú quíjñahan ró, chí jeē jéhe ri jnúhun cúu.

<sup>7</sup> Chí nújñahan ni rī jeē táca tēe na cóo maá ñn-ni de, nájnūhun iyó maá rí. Te sñn sñn ni sáha Yaā Dios jíin ñn ñn de ndese cúu maá de, chí sava de cuu quendōo maá ñn-ni de, te inga de chí tuú chí sñn ni sáha ya jíin de.

<sup>8</sup> Núu súcuan te cáhán rī jíin ñáyuu cáhīyo maá ñn-ni, jíin ñahan ní caquendōo ndáhú, jeē váha ga te núu quendōo maá ñn-ni i, nájnūhun iyó maá rí.

9 Te núu jíni i jeē ma cánda i quendōo máá ñn-ni i, te na quijnáhan i núu súcuan. Chi vāha ga jeē quijnáhan i vēsú jeē ndúquji i.

10 Te nuū ñáyuu jeē jé ni quijnáhan chi ndácu ri jniñu jeē ñahan ma ndusñ ña jíni yñ ña. Te nasūu rúhū cúu jeē ndácu jniñu, chi máá Jítoho yō.

11 Te núu ñn ñahan ndusñ ña jíni yñ ña, te na quendōo máá ñn-ni ña, chí cuu naquijnáhan ña jíni yñ ña. Te yñ suni ma ndusñ de jíni ñasihí de.

12 Te jíni sava ga ñayuu chi cahān rī yāha jēē jéni ni máá rí, te nasūu jēē ní cachi máá Jítoho yō cúu. Núu ñn hermano ndéca de ñahan jeē tu cándije, te núu nújnahan ni ña condee ña jíni de, te ma ndusñ de jíni ña.

13 Te núu ñn ñahan ndéca ña tēe jeē tu cándije, te núu nújnahan ni de condee de jíni ña, te ma ndusñ ña jíni de.

14 Chi tēe tu cándije, yñi cuenta de nuū Yaā Dios siquī jeē ní quijnáhan de jíni ñahan cándije. Te ñahan tu cándije, yñi cuenta ña nuū Yaā Dios siquī jeē ní quijnáhan ña jíni tēe cúu hermano cándije. Chi núu tu súcuan te sēhe i ma quñi cuenta i nuū Yaā Dios, te vijna chi yñi cuenta i nuū yā.

15 Te yñ chí ñasihí tu cándije, núu fuerza cuní i ndusñ i jíni jnáhan i, te na ndúsñ i. Chi núu súcuan cuní i, te hermano chí hermana cándije tu cánuú casi i jeē ndusñ jnáhan i jeē tu cándije. Chi ni cana Yaā Dios yohó jēē condee manī yō jíni jnáhan yō.

16 Te róhó jēē cácuu ñasihí, tu cájini rō, sanaa te cándije yñ ró sáha ró, te cácu de. Te suni súcuan róhó jēē cácuu yñ, tu cájini rō, sanaa te cándije ñasihí ró sáha ró, te cácu ña.

17 Te ná ñn ná ñn ró na quendōo ró ndese ni sáha Jítoho yō jeē cúu ró, jíni ndese íyó ró ná ni cana ya rohó ní cándije ró. Te súcuan ndácu ri nuū táca grupo ñayuu cácandije.

18 Núu ni cana ya ñn tēe jeē ní cuu circuncidar, te súcuan na quendōo de. Núu ni cana ya ñn tēe jeē tu ní cúu circuncidar, te ma cúu de circuncidar.

19 Chi tú na vé sáha núu cúu yó circuncidar chí tuú, chí jeē cánuú gá cúu jeē na squícu vāha yó jniñu cuní Yaā Dios.

20 Ná ñn ná ñn ró na quendōo ró ndese íyó ró ná ni cana ya rohó ní cándije ró.

21 Núu mozo jeē ní jeen ñayuu cúu ró ná ni cana ya rohó, te ma cóndihvī ni rō jeē quénda ró. Te núu íyó modo jeē quénda ró nduu libre rō, te íyó vāha jeē sáha ró.

22 Chi tēe cúu mozo jeē ní jeen ñayuu, te núu ni cana Jítoho yō de, te vijna chi ni nduu libre de nuū cuéchi de, jéjñiñu de nuū máá Jítoho yō. Te suni súcuan tēe sájniñu cuenta máá, te núu ni cana ya de, te vijna chi ni nduu de mozo jéjñiñu nuū Cristo jeē ní nacuaan ya de.

23 Chi yahu ni cuu jeē ní nacuaan Yaā Dios rohó jijnáhan ró, cúu jeē ni jíhī Sēhe ya jehē rō. Núu súcuan te ma cuajniñu ró núu jniñu cáhá-ni jeē ndácu ñayuu ñayiví.

24 Núu súcuan hermano, ná ñn ná ñn ró na quendōo ró núu Yaā Dios ndese íyó ró ná ni cana ya rohó.

25 Te vijna te siquī ñayuu jeē íyó máá-ni, tú na jñuhun ní ndácu Jítoho yō nuū rī. Te na cáhān rī jeē jéni ni máá rí, chí ni cundáhú ni Jítoho yō ruhū, te ni sáha ya jeē cúu cahān ndaā rī.

26 Jéni ni rī jeē vāha-ni núu quendōo-ni tēe ndese cáhīyo de, jeē siquī jeē íyó jñundóho tiempo yāha.

<sup>27</sup> Núu íyó ñasihí ró, te ma ndusín ró jíín ña. Te núu tu íyó ñasihí ró, te ma nducú ró ña.

<sup>28</sup> Te núu quijnáhan ró, te nasūu cuéchi cúu. Te núu quijnáhan sūchi síhí, te suni nasūu cuéchi cúu. Te ñayuu quijnáhan, chí nihín i jñúndóho ñayívi yáha, te cúni rí jeé ma nihín rō jñúndóho.

<sup>29</sup> Hermano jijnáhan ró, jñūhun jeé cahán rī yáha cúu jeé yachí-ni ndihi tiempo jeé sáha yó jniñu ya. Núu súcuan te nde vijna te tēe íyó ñasihí, na cóndihvī gā ni de siquī jniñu máá yá vēsú siquī ña.

<sup>30</sup> Te ñayuu jeé ni jíhí jnáhan vehe i, na sáha i nájnūhun jeé tu cúculhyá ni i. Te ñayuu cúsiñ ni, na sáha i nájnūhun jeé tu cúsiñ ni i. Te ñayuu jéen, na sáha i nájnūhun jeé nasūú ndajniñu i cúu. Ma cuáha i jñūhun jeé cásí tācá un jéé ma cúu condihvī ni i jniñu máá yá.

<sup>31</sup> Te ñayuu jeé ni cacondihvī ni siquī ndajniñu ñayívi yáha, ma cujnéñu ga i jíín. Chí je yajni naa tāca jéé íyó ñayívi yáha.

<sup>32</sup> Cúni rí jeé ma nácani ndasí ni rō siquī tāca jéé íyó ini ñayívi. Chí tēe cúu soltero, ndihvī ni de jniñu máá Jítoho yō, ndese cusī ni Jítoho yō sáha de.

<sup>33</sup> Te tēe íyó ñasihí chí ndihvī ni de jniñu íyó ñayívi, ndese cusī ni ñasihí de sáha de.

<sup>34</sup> Te suni súcuan sīn sīn jéni ni ñahan íyó yī jíín ñahan íyó máá. Chí ñahan íyó máá, ndihvī ni ña jniñu máá Jítoho yō, chí cúni ña jeé coo ndoo coo ī anuá ña jíín yiqui cúñu ña cuajniñu ña nuū yā. Te ñahan íyó yī chí ndihvī ni ña jniñu íyó ñayívi, ndese cusī ni yī ña sáha ña.

<sup>35</sup> Jeé váha máá ró jijnáhan ró cúu jeé ni cáhān rī súcuan. Chí nasūu jéé nducú rí casi rí jeé quijnáhan ró, chí sa suhva cúni rí jeé caca yíñuhún ró te nune ró cuajniñu cutú ró nuū máá Jítoho yō.

<sup>36</sup> Te núu ñn tēe íyó sēhe síhí de, te núu cuayī i, te núu jéni ni de jeé vāha ga jeé quijnáhan i, núu súcuan te na sáha de jeé jéni ni de, te cuáha de jñūhun quijnáhan i, chí nasūu cuéchi cúu.

<sup>37</sup> Te núu ñn tēe ni cundaā ni de jeé cóndee sēhe síhí de súcuan-ni, jeé ma cuáha de i vēsú fuerza jícán ñayuu i, núu súcuan te cuu quendōo i nájnūhun cúni de, chí jeé váha sáha de.

<sup>38</sup> Núu súcuan te tēe jéhe jñūhun quijnáhan i, vāha sáha de. Te tēe tu jéhe jñūhun, chí vāha ga sáha de.

<sup>39</sup> Te ñahan ní quijnáhan, chí yíhi ña ndaha yí ña níni jeé técu de. Te núu je ni jíhí yī ña, yūcuán na te je ni cuu libre ña jeé quijnáhan tucu ña jíín na-ni tēe cúu ni ña, te núu tēe cándíje nuū Jítoho yō cúu de.

<sup>40</sup> Te jéni ni rí jeé ndetū gā coo ña te núu quendōo ña súcuan-ni. Te suni jéni ni rí jeé jíín Espíritu Yaā Dios cúu jeé cahán rī.

*Siquī cúñu ni sócō nuū ídolo*

## 8

<sup>1</sup> Te vijna te na cáchi rí siquī cúñu ni sócō nuū ídolo. Ndaā chí tāca yó jéni ni yō jeé máá yó cúu jeé jiní ndese cúu. Te tāca jéé jiní yō ún, chí ndúcú sáha jeé cundúxí yó. Te sa suhva jeé cundáhú ni yō jnáhan yó, sáha un jéé íje i jíín jñūhun ya.

<sup>2</sup> Núu na-ni ñayuu jéni ni i jeé jiní vāha i, te tuú chí ná tu cuni cuiti i nájnūhun cánuú cuni i.

<sup>3</sup> Te sa suhva ñayuu jeé maní i jíín Yaā Dios, máá i cúu jeé jetáhú yá.



<sup>4</sup> Núu súcuan te na cástūhun rí siquī cūñu jeē ní casocō ñayuu nuū ídolo. Ndaā chi jíní yō jeē tāca ídolo ñayiví, tú ndaā cuiti. Te tú na inga yaā iyó, chi máa ñn-ni Yaā Dios.

<sup>5</sup> Te ñayuu chi cájeni ni i jeē iyó táca yáā ini andiví jín ñáyiví, chi cácahān i jeē iyó ndije cuehē yaā i jín jítoho i.

<sup>6</sup> Te nuū maá yó chi ñn-ni Yaā iyó, jeē cúu Tátá yō Yaā Dios. Te máá yá ni sáha tāca jéē iyó, te cuenta maá yá cúu yó jínáhan yó. Te suni iyó ñn-ni Jitoho yō Jesucristo, te nde nuū maá yá vēji táca jéē iyó, te suni máá yá ni sáha yóhó.

<sup>7</sup> Te ñayuu cácañdije, chi tú ndihi i jíní jñūhun yáha. Chi sava i ni cacāan i ni chiñūhún i ídolo nde ná tu candije i. Te nde vijna núu cáyeji i cūñu ún te sáha i cuenta jeē ní sócō nuū ídolo cúu. Te siquī jeē ná tu ije i jín jñūhun Yaā Dios, te jéni ni i jeē cunjéhén ánuá i sáha cūñu jeē ní sócō nuū ídolo ún.

<sup>8</sup> Te ndaā chi nasūu jéē yéji yō cúu jeē sáha jeē cuatáhú Yaā Dios yohó. Chi núu yéji yō, nasūu yúcuan sáha jeē quéndōo vāha ga yō nuū Yaā Dios. Te núu tu yéji yō, ni tu sáha jeē quéndōo ndáhú gá yō nuū yā.

<sup>9</sup> Te vēsú tú ni ñn jési jeē ma cúu caji rō cūñu ún, te coto rō jnáhan rō jéē ná tu ije jín jñūhun ya, te ma sáha rō jéē suni caji i jeē jéni ni i jeē cuēchi cúu.

<sup>10</sup> Vāha ga ma cáji rō núu súcuan, chi sanaa te hermano rō jeē ná tu ije jín jñūhun ya, coto de róhó jéē yéji rō ini vehe ídolo, chi jíní vāha rō jéē tú na vé sáha. Te súcuan te sáha rō jéē cájni ni de jeē suni caji maá de cūñu jeē ní sócō nuū ídolo, vēsú jéni ni de jeē cuēchi cúu.

<sup>11</sup> Te súcuan stívi rō anuá hermano rō jeē ná tu ije jín jñūhun ya, vēsú jíní vāha máá rō jeē tú na vé sáha jeē cáji rō. Te tú vāha sáha rō, chi suni jehē maá de ni jihí Cristo.

<sup>12</sup> Te núu súcuan stívi rō anuá hermano rō jeē ná tu ije jín jñūhun ya, núu súcuan te siquī Cristo cúu jeē sáha rō cuēchi.

<sup>13</sup> Núu súcuan te núu cūñu un sáha jeē quívi hermano rī cuēchi, te ma cáji cuiti ga rī cūñu ún, návāha ma sáha rī jeē quívi de cuēchi.

*Siquī jeē iyó derecho tēe cácuu apóstol*

## 9

<sup>1</sup> Te máá rí chi jíca libre rī, te iyó derecho rī siquī jeē cúu ri apóstol, tēe ni taji yá scáca jñūhun ya. Chi ni jito rī nuū maá Jítoho yō Jesús, te máá rō jijnáhan rō cácuu jñiñu jeē ní sáha ri jeē ní squívi ri rohó ndaha Jítoho yō.

<sup>2</sup> Te núu sava ga ñayuu tu jétáhú i jeē cúu ri apóstol, te nuū maá rō chi suu cúu ndije ri. Chi siquī jeē ní scandije ri rohó jijnáhan rō, te jeē yúcuan cácuu rō prueba jeē steén jeē ndíso jñiñu ri cúu ri apóstol nuū maá Jítoho yō.

<sup>3</sup> Te jñūhun yáha cáhán rī jehē maá rí nuū ñayuu cácahān siquī rī.

<sup>4</sup> Achí rí: Iyó derecho rī caji rī coho ri jeē cájēhe ñayuu núu cúní rī.

<sup>5</sup> Te suni iyó derecho rī núu jeē cúní rī condeca rī ñn hermana candije cuu ñasihí rí, caca ña jín rí, nájñūhun iyó ñasihí Pedro jín táca gá apóstol jín tēe cácuu ñani maá Jítoho yō.

<sup>6</sup> ¿Chí cájeni ni rō jeē maá rúhū-ni jín Bernabé tú na derecho rī jeē stóo ri jñiñu cásaáha rī jeē cótecu rī, návāha nune ga rī nacani ri jñūhun vāha ya, chí naún?

<sup>7</sup> ¿A iyó soldado jeē técu de xūhún vehe de? ¿A iyó tēe jeē jítu uva te tu yéji de ndehē ún? ¿A iyó tēe jeē ndító lanchi te tu jíhi de leche tí? Tú cuiti. ¿Te á suni tu iyó derecho rī cotecu rī siquī jñūhun ya naún?



8 Te ma cáni ni rō jeē tāca jēē cahán rī yāhá, máni máá jēē cácahān ñayuu ñayivi cúu. Chi nde maá ley yā jeē ni jēhe ya nuū Moisés, cáhán súcuan.

9 Chi cáhán nuū tútu ley yā: Ma chúhun rō ñunu yuhu stíquī, quiti jéxín trigo, achí. Te ndaā chi nasūu máni siquī stíquī cúu jeē ni cáhán yā súcuan.

10 Chi suni siquī maá yó ní cahán yā. Chi ley un ní jēhe ya jeē váha máá yó, chi stéén jeē tēe jítu jíin tēe jéxín trigo cánuū jeē nihín de sava un quívi ndutútú.

11 Te suni súcuan ruhū jijnáhan rī jeē ní cataji rī jñūhun Espíritu ini anuá rō, ¿te á véyi cúu jíin rō núu nastútú rī jeē cótecu rī nuū rō?

12 Te núu sava ga tēe cástéén nuū rō, íyó derecho de cacān de nuū rō, te nagā ni cuu ruhū jijnáhan rī jeē ma cóo derecho rī cacān rī.

Te tu ní cájicān rī derecho un, chi sa suhva ni jendeyí ni rī coto máá rī jeē cáji rī, návāha ma cási rī jeē cáca jñūhun váha Cristo.

13 Te cájini rō jeē sutú ni cajejníñu ini templo, ni cacotecu de siquī jeē ní casocō ñayuu ini templo. Chi sutú ni cajejníñu nuū altar nuū ní casocō i quiti, suni ni cayeji de sava quiti ún.

14 Te suni súcuan ni ndacu máá Jítóho yō jniñu jeē tēe cánacani jñūhun jeē jnáma ya yohó, siquī jniñu un nihín de jeē cótecu de.

15 Te ruhū tu ní jícán cuiñi rī derecho rī yāhá, te suni nasūu jēē tēe ri jñūhun yáha návāha cuáha rō núu rī jijnáhan rō. Chi jéni ni rī jeē váha ga núu na cúu rī nasūu jēē quíhin ri jeē cuáha rō, chi casi jeē cúsiñi ni rī scáca rī jñūhun ya súcuan-ni.

16 Te tú váha núu sátéyi rí maá rí siquī jeē nácani rī jñūhun jeē jnáma ya yohó. Chi ñn jeē ní tejníñu ya ruhū cúu, te cánuū squícu rī. Chi nacā ndahú cúu ri te núu tú nacani rī jñūhun ya.

17 Te núu jeē cúu ni maá rí sáha ri nuú, yūcuán na te cuu cacān rī yāhu ri. Te tuú chi cánuū sáha rī, chi máá Yaā Dios ni tee ya jniñu siquī rī.

18 Núu súcuan te yāhu rī cúu jeē cúsiñi ni rī jeē súcuan-ni nácani rī jñūhun jeē jnáma ya yohó, te tu jícán rī derecho rī jeē cotecu rī siquī jeē nácani rī jñūhun ya.

19 Chi vésú tú ni ñn ñayuu ndácu jniñu nuū rī, te ni sáha ri maá rí mozo nuū tēcá i jeē nácani rī jñūhun nuū i, návāha nihín rī cuehē i candíje i Cristo.

20 Núu íne ri jíin jnáhan ri hebreo te sáha ri nájñūhun cásáha i, návāha cuu scándíje ri i. Chi násáha ri maá rí nájñūhun tēe cáyihí chiji ley Moisés, návāha cuu scándíje ri i jeē cáyihí i chiji ley un, vésú tuá yíhi ri chiji ley un.

21 Te suni násáha ri maá rí nájñūhun ñayuu tu cáyihí chiji ley Moisés, návāha cuu scándíje ri ñayuu ún. Te vésú súcuan te yíhi ri chiji ley Yaā Dios, chi suu cúu ley Cristo jeē squícu rī.

22 Te núu íne ri jíin ñayuu jeē ná tu ije jíin jñūhun ya, te sáha ri maá rí nájñūhun jeē ná tu ije ri jíin jñūhun ya, návāha cuu scándíje ga rī i. Núu súcuan te násáha ri maá rí núu ndese cándāa tāca ñayuu, návāha tēcá-ni modo un te cuu scándíje ri sava i.

23 Tāca yáha sáha ri jeē siquī jñūhun jeē jnáma ya yohó, návāha suni nihín rī tahū jeē ndíso jñūhun ya.

24 Je cájini rō jeē tēe cájину carrera, jendaá chi ndihí de cájину, te ñn-ni de cúndeyí nihín premio. Te suni súcuan nducú ndéyi máá rō squícu rō, návāha nihín rō premio nuū yā.

25 Te tāca tēe cúní cundeyí siquī ñn deporte, chi cáscuáha de te cándito de máá de. Súcuan cásáha de návāha nihín de ñn premio jeē cúu corona ndaha

yújnu jeē náā yachī. Te máá yó chi sa suhva cánducú ndéyí yó návāha nihīn yō ìn premio jeē ma náā cuiti.

<sup>26</sup> Te máá rí suni ndúcú ndéyí rí nájnūhun tēe cájnu, te tu ndúcú ndéyí cāha rí. Te sáha rí nájnūhun tēe cácajnáhan juego jeē tu jéhe iyú de, chi quée jniñu sáha rí.

<sup>27</sup> Chi sa suhva stóho rí yiquí cúñu rí, te stíhví ni rí maá rí squícu rí. Chi vēsú ni stíhví ni rí inga ñayuu jeē nducú ndéyí i, te núu tu nducú ndéyí máá rí te snáa rí premio rí.

*Siquí jeē ma chíñúhún i ídolo*

## 10

<sup>1</sup> Hermano jijnáhan ró, cúní rí jeē na jécūhun ni rō ndese ni cajica jíi yō jenahán. Chi ndihi de ni cajica chíji vicō jeē ni stéén ichi nuū de, te ndihi de ni cayáha méhñū ndute Mar Rojo jeē ní cusín, ni nune ichi.

<sup>2</sup> Súcuan cúu jeē ní canduu inuú ndihi i jíin Moisés, chi ni candiquín i de chíji vicō jíin méhñu mar.

<sup>3</sup> Te ndihi i chí inuú-ni ni cayeji i alimento jeē ni jéhe máá Espíritu.

<sup>4</sup> Te suni ndihi i ni cajihí ndute jeē ni jéhe Espíritu. Chi ni cajihí i ndute jeē ní cane jicā cáva nuū ní cajica cuu i. Te Cristo cúu nájnūhun cava un jéé jéhe ya ndute cotecu yō níí cáni.

<sup>5</sup> Te vēsú súcuan te cuehē i ni cunīhni ni i, te tu ní cúsī ni Yaā Dios jíin i, te jeē yúcuan ní cajihí i nuū ñūhun téhé.

<sup>6</sup> Te tāca jéé ní cuu ún, ìn ejemplo cúu nuū yō, návāha ma ndíyo ni yō tāca jéé neé, nájnūhun ni candiyo ni ñayuu ún.

<sup>7</sup> Te ma chíñúhún ró ídolo, nájnūhun ni casáha sava i. Chi súcuan cáhán nuū tútu ìi: Ni cacucōo ñayuu ún, ni cayeji i ni cajihí i vico ídolo, te ni ndocuñī i ni cajita jéhé i, áchí.

<sup>8</sup> Te ni ma cáca jnéni ró nájnūhun ni casáha sava i, te ni cajihí ocō unī mil i jeē ìn quivī-ni.

<sup>9</sup> Te ni ma sáha ró jniñu jeē squití ni rō Jitohó yō, nájnūhun ni casáha sava i, te ni cajihí i jeē ní catuu coō i, ni sáha ya.

<sup>10</sup> Te ni ma cahán sōó ró siquí Yaā Dios, nájnūhun ni cacahān sōó sava i, te ni cajihí i jeē ní jehni ndajéhé yā i.

<sup>11</sup> Te tāca jéé ní cuu ún, chí ìn ejemplo cúu nuū yō. Te súcuan yósó núu tútu návāha na chúhun vāha ni máá yó. Chi cácuu yó ñayuu cátecu quiví cuándihi ñayiví.

<sup>12</sup> Núu súcuan te róhó jéé cájeni ni rō jeē cáhīn cōhīn ró jéé ma sáha ró cuéchi, coto má quiví ró cuéchi.

<sup>13</sup> Chí máni íyó jéé nducú squiví róhó cuéchi, te inuú-ni cándoho ró súcuan nde jíin táca gá ñayuu. Te cuu cucáhnū ni rō Yaā Dios jeē ma cuáha ya jñūhun jeē vihyá gā coto ndee jexeén róhó vēsú jeē cúu cundeyí ró jíin. Chí sa suhva núu vēji jeē nducú squiví róhó cuéchi, te chindéé ñáhán yá rohó quenda ró te cundeyí ró siquí.

<sup>14</sup> Ñānī mánī, ma chíñúhún cuiti rō ídolo núu súcuan.

<sup>15</sup> Cáhán rí jíin ró jéé cúu ró ñayuu cájecūhun ni, te na sáha ró cuenta núu ndaā jñūhun cáhán rí.

<sup>16</sup> Máá copa ìi jeē cájicān tahu yō jehē, suu cájihí cáhnū yó jéé steén yō jeē inuú cúu ndihi yó, chí ni jeti niñī Cristo jeē siquí yō ná ni jihí yā jicā cruz. Te

pan jeē sacuéchi yó cáyeji cáhnu yó, stéén jeē inuú cúu ndihi yó síquī jeē ni jéhe Cristo yiqui cúnu yā ni jihī yā jehē yō.

<sup>17</sup> Te vēsú cuehē yō iyó, te ñn-ni ñayuu cácuu yó, chi ñn-ni pan un cáyeji cáhnu yó síquī jeē cácandije yó.

<sup>18</sup> Condēhe ró ndese cásáha ñayuu Israel. Tāca tēe jeē yéji quitī jeē ni sócō nuū yā, chí inuú-ni cúu ndihi de síquī jeē cáyeji de jeē ni sócō ún.

<sup>19</sup> Núu súcuan te cáhán rī jeē tu ndé jéjníñu ídolo, ni tu jéjníñu cúnu jeē ni sócō nuū ídolo, chí inuú cúu jíin táca gá cúnu.

<sup>20</sup> Te suni cáhán rī jeē ñayuu tu cájini jnūhun Yaā Dios, núu cásocō i, te nuū tachī cásocō i, nasūu núu Yaā Dios. Te tu cúní rī jeē cuajníñu ró núu tachī.

<sup>21</sup> Ma cúu coho ró copa maá Jítoho yō te núu cájini ró jéē ni sócō nuū tachī. Te ma cúu caji rō nuū mesa Jítoho yō te núu cáyeji rō jeē ni sócō nuū tachī.

<sup>22</sup> Ma quívi nduu yō súcuan jíin táchī, náváha ma cucuíñi Jítoho yō jíin yó. ¿Chí téyí gá maá yó vēsú maá yá jeē ma cúu stóho ya yohó, cájeni ni rō, chí naún?

### *Ndihī chí sáha yó jíin jnūhun cúndáhú ni*

<sup>23</sup> Te ndaā cúu jeē cácahān jeē ndihī-ni jniñu iyó váha sáha yó núu ndese cúní yō. Te tuú chí nasúu ndihī sáha jeē quéndōo váha ánuá yō. Ndihī chí cuu sáha yó, te vēsú súcuan te nasúu ndihī sáha jeē ije jnáhan yó jíin jnūhun ya.

<sup>24</sup> Chí cánuú sáha yó jéē váha jnáhan yó, nasūu máni máá jéē váha máá yó.

<sup>25</sup> Cuu caji rō ndihī-ni cúnu cýāhu nuū yáhu, te ma cájnūhun ró ni ma cáni ni rō núu jeē ni sócō nuū ídolo cúu.

<sup>26</sup> Chí cuenta maá Jítoho yó cúu ñayivi jíin ndivii jeē iyó ini, te cuu cuajníñu yó.

<sup>27</sup> Te núu ñn tēe tu cándije, cana de róhó caji rō jíin de, te núu cácuni rō quihīn rō, núu súcuan te caji rō táca jéē cáni de nuū rō. Te ma cájnūhun ró ni ma cáni ni rō núu jeē ni sócō nuū ídolo cúu.

<sup>28</sup> Te núu cachi ñn i nuū rō jeē cúnu ni sócō nuū ídolo cúu, yūcuán na te ma cáji rō, chí síquī jeē jéni ni i jeē cuéchi cúu, te tu cúní rō sáha ró jéē quívi i cuéchi.

<sup>29</sup> Te súcuan cáhán rī síquī jeē inga i cájeni ni i jeē cuéchi cúu, te nasūu jéē súcuan cájeni ni maá ró.

Te sanaa te cahān ñn ró: ¿A tu iyó libre rī caji rī jeē cuní maá rí, vēsú cájeni ni inga i jeē cuéchi cúu?

<sup>30</sup> ¿Te núu nácuatáhú rí nuū Yaā Dios te yéji rī, te najehē cácahān i síquī rī jeē yéji rī? achi rō.

<sup>31</sup> Tuú chí ndihī jeē sáha ró, vēsú jeē caji rō chí jéē coho ró, chí na-ni jniñu sáha ró, ndihī na sáha yíñúhún ró jíin Yaā Dios, náváha cuni ñayuu jeē luu cújéhu ya.

<sup>32</sup> Te ma sáha ró jniñu jeē squívi ró ñayuu nuū cuéchi, cúu ñayuu hebreo, cúu ñayuu táca nación jeē tu jíin jnūhun ya, cúu ñayuu cácandije Yaā Dios.

<sup>33</sup> Te ruhū chí ndúcú rí jeē na cúsī ni táca ñayuu jíin táca jniñu sáha rí. Tu ndúcú rí jeē váha máá-ni rí, chí sa ndúcú rí sáha rí jeē váha cuehē ñayuu, náváha cācu i.

## 11

<sup>1</sup> Te na ndácu ró rúhū jijnáhan ró, nájnūhun ndácu máá rí Cristo.

*Siquī ndese cánuú sáha ñahan cándutúú*

<sup>2</sup> Vāha cāsāha ró, hermano, jeē niní cānucūhun ni rō ruhū, te cāndihvī ni rō jīn táca jniñu jeē ni steén rī nuū rō.

<sup>3</sup> Te cūnī rī jeē na jécūhun ni rō jeē Cristo cūnuú yá nuū tāca té. Te tēe cūnuú de nuū ñasihí de. Te Yaā Dios cūnuú yá nuū Cristo.

<sup>4</sup> Núu ñn tēe ñūhun de lélú te jícán tahú de chí nácani de jnūhun nuū ndutútú ñāyu cācandíje, núu sūcuan te jéhe de jnūhun canu máá de.

<sup>5</sup> Te sa núu ñn ñahan tu ndési xinī ña te jícán tahú ña chí nácani ña jnūhun, núu sūcuan te jéhe ña jnūhun canu máá ña, chí ñn-ni cúu un núu ní sáte xinī ña.

<sup>6</sup> Chí núu tú casi ña xinī ña, vāha ga na sáte ña ixi ña núu sūcuan. Te núu cūcanu ña jeē sáte ña ixi ña chí jéē sáte lii ña, te na cási ña núu sūcuan.

<sup>7</sup> Te tēe chí ma cási de xinī de, chí máá de cúu muestra jeē steén ndese cúu Yaā Dios jeē kujéhu ya. Te ñahan chí steén ña jeē kujéhu tēe.

<sup>8</sup> Chí ná ni sáha ya tēe, te nasūu jīn yiqui ñahan ni sáha ya, chí sa suhva jīn yiqui tēe ni sáha ya ñahan.

<sup>9</sup> Te ñahan chí ni cuvāha ña jeē siquī té, nasūu tēe jeē siquī ñahan.

<sup>10</sup> Te jeē yūcuan cānuú jéē cōndesi xinī ñahan, te suu steén jeē kujéhu tēe, chí suni cāndéhé ndajéhé yā ndese sáha ña.

<sup>11</sup> Te vēsú sūcuan te yóhó jéē candíje yó, chí jíní yō jeē tu íyó tēe núu jeē tu íyó ñahan, te tu íyó ñahan núu jeē tu íyó tēe.

<sup>12</sup> Chí vēsú ni sáha ya ñahan jīn yiqui tēe, te vijna cácu tēe chíji ñahan, te máá Yaā Dios cúu jeē sáha táca-ni.

<sup>13</sup> Na sáha máá ró cuenta ¿á íyó vāha núu tu ndési xinī ñahan te jícán tahú ña nuū Yaā Dios?

<sup>14</sup> Chí sáha yó cuenta jeē ini ñayīvi yáha, núu cáni ixi tēe te cūcanu de sáha.

<sup>15</sup> Te ñahan chí sa vāha jító ña te núu cáni ixi ña, chí suu ni jēhe ya jeē cōndesi xinī ña.

<sup>16</sup> Te núu ndé ñn ñayuu cuní i cahān i siquī jnūhun yáha, te ruhū jīn táca grupo ñayuu cācandíje nuū Yaā Dios, tú na inga costumbre jejnūhún rī siquī jnūhun yáha.

### *Jeē castívi i siquī Cena Jitoho yō*

<sup>17</sup> Te íyó inga jnūhun cānuú cahān rī jīn ró, chí tu cúu cahān rī jeē vāha cāsāha ró. Chí nuū cāndutútú ró te tu sáha jeē quéndōo vāha ga rō, chí sa jeē castívi ró.

<sup>18</sup> Xihna jnūhun yáha cāhán rī, jeē nihín rī jnūhun jeē nuū cāndutútú ró te cācusñn ni rō. Te jení ni rī jeē ndaā cúu.

<sup>19</sup> Chí níní coo sava ró jéē cusñn ni, návāha natūu ndé-ni cúu jeē cācandíje vāha mēhñu ró.

<sup>20</sup> Te jeē cācusñn ró sūcuan nuū cāndutútú ró, te nasūu cena máá Jitoho yō cúu jeē cáyeji rō núu sūcuan.

<sup>21</sup> Chí núu cáyeji rō, te táca ñn ñn ró cūnī caji xihna gā vēsú jnāhan ró. Te sūcuan te sava ró tu cānihīn, te cájii sōco, te sava ró cānajīni jeē cájihi cuehē.

<sup>22</sup> ¿A tu cānevāha ró vehe nuū cáji rō coho ró, chí naún? Chí jeē casáha ró sūcuan cúu jeē tu íyó yíñuhún ró iní vehe nuū cāndutútú ñāyu cācandíje Yaā Dios, chí casáha ró jéē cācucanu ñayuu jeē tú na vé névāha. ¿Ndese cahān rī jīn ró núu sūcuan? ¿A cāhān rī jeē vāha cāsāha ró? Tuú chí nasūu jéē vāha cúu jeē casáha ró sūcuan.

*Siquī jeē ní jequín Jitoho yō Cena yā  
(Mt. 26.26-29; Mr. 14.22-25; Lc. 22.14-20)*

<sup>23</sup> Chi jnūhun yáha jéē ní nastéén rī nuū rō, chi nuū maá Jítoho yō ni nihīn rī: Jeē maá jecuāā jeē ní nastúu de Jítoho yō Jesús, te ni quihin ya pan.

<sup>24</sup> Te ni nacuatáhú yá, te ni tahu cuéchi yá, te ni cahān yā jín tée cáscuáha jín yá: Quihin te caji rō jijnáhan ró, chi yáha cúu yiqui cúñu rī jeē ní sócō rī jeē síquī rō. Te níni caji rō súcuan jeē cáñuhun ni rō ruhū jeē ní jíhī rī jehē rō. Achí yá.

<sup>25</sup> Te suni súcuan ni quihin ya copa ná ni cuu ni cuxíni ya jín de, te ni cahān yā: Jeē ñūhun copa yáha cúu niñī rī jeē sácútu contrato jeé jeē jnáma ri ñayuu. Te táca jínu jeē cájiji ró, te nucūhun ni rō ruhū. Achí yá.

<sup>26</sup> Chi táca jínu jeē cáyeji rō pan un te cájiji ró copa un, súcuan cástéén rō jeē ni jíhī Jítoho yō jehē yō. Te súcuan na sáha ró ndé quivī ndíji ya.

### *Ndese caji yíñúhún i Cena yā*

<sup>27</sup> Te núu na-ni ñayuu caji i pan un chí coho i copa Jítoho yō ún, te núu tu sáha yíñúhún i nuū Yaā Dios, núu súcuan te sáha i cuéchi jeē tu iyó yíñúhún i síquī yiqui cúñu maá Jítoho yō jín síquī niñī yā.

<sup>28</sup> Núu súcuan te coto ndee rō maá ró núu iyó ndoo ánuá rō jeē tú cuéchi ró. Te sáa te cuu caji rō pan un te coho ró copa un.

<sup>29</sup> Chi núu ññayuu tu yéji tu jíhi yíñúhún i te tu núcūhun ni i jeē yiqui cúñu yā cúu, ñayuu ún chí nihīn i castigo núu na cáji i coho i.

<sup>30</sup> Jeē yúcuan cúu jeē iyó cuéhē ñayuu cácuñu jín jéē ní cacuxíi, cáhīyo mēññu ró. Te sava i je ni cajiñi.

<sup>31</sup> Te núu coto ndee yō maá yó nde ná tu caji yō, te Jítoho yō ma cuáha ya castigo yohó.

<sup>32</sup> Te núu Jítoho yō jéhe ya castigo yohó, te súcuan stóho ya yohó návāha ma jnahnú ndetú yō jín ñayuu ñayiví.

<sup>33</sup> Ñāni mánī, núu súcuan te jeē cándutútú ró jeē cáji rō Cena yā, te condetu ró te caji inuú ró.

<sup>34</sup> Te núu ññayuu jíi i sóco, te xīhna gā na cáji i vehe i návāha ma stívī i nuū cándutútú ró. Te súcuan te ma cuáha ya castigo i. Te quivī jécondēhe rí rohó te cachi rī ndese coo sava ga jniñu.

### *Siquī táca táhū jeē jéhe Espíritu*

## 12

<sup>1</sup> Hermano, cúnī rī jeē na jécūhun ni rō síquī táca táhū jeē jéhe Espíritu nuū yō, suu táca modo jejniñu ñññ yó nuū Yaā Dios.

<sup>2</sup> Te cájini rō jeē ná ni cuu ró ñayuu ná tu candíje, te ni cacondihvī ni rō ni cachiñúhún ró ídolo ñihīn.

<sup>3</sup> Te vijna te na jécūhun ni rō jeē núu ndé ñayuu cahán ndevāha i síquī Jesús, te nasūu jín poder Espíritu Yaā Dios cúu jeē cahán i súcuan. Te ni ñññ i ma cúu cahān i jeē Jítoho i cúu Jesús, te núu tu ndéé poder Espíritu Santo iní i.

<sup>4</sup> Te sññ sññ tahū jéhe ya jeē cuajniñu ñññ yó núu yā, te ñññ-ni máá Espíritu cúu jeē jéhe.

<sup>5</sup> Te sññ sññ jéjniñu yó, te nuū maá ñññ-ni Jítoho yō jejniñu yó.

<sup>6</sup> Te sññ sññ modo sáha yó jniñu ya, te ñññ-ni Yaā Dios cúu jeē sáha jniñu un jín yó.

<sup>7</sup> Te nuū ná ñññ ná ñññ yó ní jéhe Yaā Dios tahū jeē sáha Espíritu yā jín yó, návāha na sáha yó jéé ije jnāhan yó jín jnūhun ya.

<sup>8</sup> Chi sava yó ní canihīn tahū jeē ndichí cáhán yō jnūhun ya, sáha máá Espíritu. Te sava ga yō ní canihīn yō jeē cúu jécūhun vāha ni yō te castūhun yó, te suni máá Espíritu sáha.

<sup>9</sup> Te nuū sava ga yō ní jehe ya tahū jeē cúu cándije nīhin yó jéē sáha ya jeē jicán yō, te sava ga yō cúu sáha yó jéē ndúvāha ñayuu cácuḥū, te suni máá Espíritu sáha.

<sup>10</sup> Te sava ga yō cúu sáha jniñu jéhu jín fuerza Yaā Dios. Te sava ga yō cúu nácani jnūhun ya. Te sava ga yō ní sáha ya jeē nácuni yō tāca jnūhun, núu vēji nuū Espíritu yā chí tuú. Te sava ga yō ní nīhīn tahū jeē cahán yō tijni yuhu jeē tu jécūhun ní yō. Te sava ga yō cúu nacastūhun yó jnūhun ní cahān jnāhan yó jín inga yuhu ún.

<sup>11</sup> Te tāca táhū yáha, chí ñn-ni máá Espíritu sája, te sñn sñn jehe ya nuū ñn ñn yó, ndese nújnahan ní maá yá.

### *Ndihí yó cúu nájñūhun ñn na yiqui cúñu*

<sup>12</sup> Chi nájñūhun ñn yiqui cúñu iyó cuehē parte, súcuan cúu yó jín Cristo jeē cúu yó nájñūhun yiqui cúñu yā, chí ñn na cúu yó jín yá. Te vēsú cuehē parte cácuo yó te ñn-ni cúu yó, nájñūhun ñn yiqui cúñu jeē iyó cuehē parte.

<sup>13</sup> Chí ñn na ní canduu yó jín yá ní sáha ñn-ni máá Espíritu ná ní cajendute yó. Súcuan cúu vēsú cúu yó ñáyuu hebreo chí ñáyuu griego, vēsú mozo jeē ní jeen ñayuu chí téē sájñiñu cuenta maá. Te ndihí yó chí ñn-ni Espíritu ní canihīn yō.

<sup>14</sup> Te ñn yiqui cúñu chí nasūú ñn-ni parte cúu, chí sa cuehē parte cúu.

<sup>15</sup> Te núu jehē cahān: Nasūu cuenta yiqui cúñu cúu ri, chí nasūú ndaha cúu ri, te tuú chí parte yiqui cúñu cúu nahín.

<sup>16</sup> Te núu sōho cahān: Nasūu cuenta yiqui cúñu cúu ri, chí nasūu tñūu cúu ri, te tuú chí parte yiqui cúñu cúu nahín.

<sup>17</sup> Núu nñ yiqui cúñu yō cúu tñūú, ¿te ndese cuni sōho yó núu súcuan? Te núu nñ yiqui cúñu yō cúu sōho, ¿te ndese cuan yó xicō núu súcuan?

<sup>18</sup> Te Yaā Dios ní chujnáhan ya ñn ñn parte yiqui cúñu, nájñūhun cúni yā jeē coo.

<sup>19</sup> Chí núu ñn-ni parte cúu ndihí, te nasūú ñn nñ yiqui cúñu cúu núu súcuan.

<sup>20</sup> Te tuú chí cuehē parte iyó, te ñn-ni yiqui cúñu cúu.

<sup>21</sup> Te ní ma cúu cahān tñūu jín ndaha: Tu jíni ñúhún rí rohó. Te ní xiní ma cúu cahān jín jéhé: Tu jíni ñúhún rí rohó.

<sup>22</sup> Chí sa suhva tāca parte yiqui cúñu jeē jéni ní yō jeē núu ga fuerza, suu cúu jeē cánuú gá.

<sup>23</sup> Te tāca parte yiqui cúñu jeē jéni ní yō jeē tu cáa vāha, suu cúu jeē yucún gá chūhun yó sahma. Te parte jeē tú-ni luu cáa, sa vāha ga jési yō.

<sup>24</sup> Chí parte jeē lúu cáa, tu cánuú jéē condihyū. Chí súcuan ní chujnáhan Yaā Dios yiqui cúñu, jeē yucún gá ndító yó jéē tu cáa luu.

<sup>25</sup> Súcuan ní sáha ya návāha ma cusñn tāca parte yiqui cúñu, chí sa chindéé ñájñāhan vāha jín jnāhan.

<sup>26</sup> Te núu jétú ñn parte yiqui cúñu, te suni nñ cáhnu-ni jétú. Te núu ñn parte ndító yúcún yó, te suni ndihí-ni parte quéndōo vāha.

<sup>27</sup> Te róhó jñnāhan ró chí nájñūhun yiqui cúñu Cristo cácuo ró, chí ñn na cúu yó jín yá. Te ná ñn ná ñn ró cúu ñn ñn parte yā.

<sup>28</sup> Núu súcuan te sñn sñn jniñu ní jehe Yaā Dios nuū tāca ñáyuu cácuandije jeē cácuo í nájñūhun ñn ñn parte yā: Te suu ñn parte yā cúu táca apóstol jeē ní jeni

ya xīhna gā jeē scāca de jnūhun ya. Yūcuán na te jeē uú, tēe cánacani jnūhun ya, te jeē uní, tēe cástéén. Yūcuán na te ñayuu casáha jniñu jéhu jíin fuerza yā, jíin ñayuu casáha jeē ndúvaha ñayuu cácuñu, jíin ñayuu cachíndéé ñájnáhan, jíin ñayuu cándiso jniñu, jíin ñayuu cácahān sīn sīn yuhu jeē tu cájecūhun ni.

<sup>29</sup> ¿A ndihi yó cácuu apóstol, chí naún? ¿A ndihi yó cánacani jnūhun? ¿A ndihi yó cástéén? ¿A ndihi yó cuu sáha jniñu jéhu?

<sup>30</sup> ¿A ndihi yó cuu sáha jeē ndúvaha ñayuu cácuñu? ¿A ndihi yó cuu cahān sīn sīn yuhu? ¿A ndihi yó cuu nacastūhún yuhu ún, chí naún? Tuú chi sīn sīn tahū ni canihūn yō.

<sup>31</sup> Núu súcuan te na cóndihvī ni rō cacān rō jeē cuáha Yaā Dios tahū cánuú gá nuū rō. Te vijna te na stéén rī nuū rō ñin jeē váha ga nuū táca gá tahū ún, suu jnūhun cúndahú ni jnáhan.

### *Jnūhun jeē cundáhú ni jnáhan*

## 13

<sup>1</sup> Vēsú núu cuu cahān yō tijni yuhu jeē cácahān ñayuu chí jéē cácahān ndajéhé Yaā Dios, te núu tu cúndahú ni yō jnáhan yó, te jnūhun cahān yō un cúu nájnūhun ñin tambor jeē ndaxín cáján chí ñin platillo jeē ndaxín cáxín sánee sōho ñayuu.

<sup>2</sup> Te vēsú cuu nacani vāha yó jnūhun ya, te cuu jecūhun ni yō táca jnūhun sāhi yá jíin táca jnūhun ndíchí, te núu tu cúndahú ni yō jnáhan yó, te tu ndé jéjníñu cuiñi yō núu súcuan. Te vēsú cuu candije téyí yó jeē nde cuu cahān yō jeē cújiyo yucu, te núu tu cúndahú ni yō jnáhan yó, te tu ndé jéjníñu cuiñi.

<sup>3</sup> Te vēsú na sája yó ndihi jeē névaha yó cuu ñayuu ndahú, te vēsú núu cuāha yó jnūhun cahmu ñayuu yohó jéē siquí jnūhun ya, te núu tu cúndahú ni yō jnáhan yó, te tu ndé jéjníñu cuiñi.

<sup>4</sup> Ñayuu cundáhú ni chí íyó paciencia jíin jnáhan, te íyó mánī ni, te tu cúcuésún ni. Te tu sándúxí, te tu sátéyí máa.

<sup>5</sup> Tu sájéē ni, tu ndúcú jéē cúu máa-ni, tu quítí ni, tu ñúhun ni jnūhun quítí ni.

<sup>6</sup> Tu cúsn̄ ni jíto jniñu néé casáha jnáhan, chí sa cúsn̄ ni jíin jniñu váha.

<sup>7</sup> Ñayuu cundáhú ni chí ndihi jénde ni ndoho jehē jnáhan, te tu jécuiñī jeē candije jnáhan, jíin jéē ñúhun ni jeē squícu jnáhan, jíin jéē jéndeýí ni jíin jnáhan.

<sup>8</sup> Jnūhun cúndahú ni chí ma náá cuiñi. Te quiji quivī jeē tuá nacani i jnūhun, ni tuá cahān i tijni yuhu, ni tuá jíni ñúhún jnūhun ndíchí.

<sup>9</sup> Chí tu jíni vāha vāha yó vijna, te jnūhun cánacani yó suni jecu-ni cúu.

<sup>10</sup> Te núu na quíji quivī jeē cúni yó ndihi, yūcuán na te tuá coo jeē jíni yó jecu-ni.

<sup>11</sup> Ná ni cuu yó súchi lúlí te ni cahān yō, ni jeni ni yō, ni jecūhun ni yō nájnūhun sūchi lúlí. Te ná ni jehnu yó te ni stóo yó modo sūchi lúlí.

<sup>12</sup> Te suni súcuan, jecu-ni jécūhun ni yō vijna, nájnūhun jeē jíto yó núu ñin espejo jeē tú ndijin vāha. Te cúcuéé gá te jecūhun cájí ni yó ndihi. Te vijna chí jecu-ni jíni yō, te cúcuéé gá te cuni vāha yó ndese Yaā cúu ya, nájnūhun jíni vāha ya yohó ndese ñayuu cúu yó.

<sup>13</sup> Núu súcuan te íyó únī jnūhun jeē quéndōo cutú ní cáni: Jeē candije ñihin yó jéē squícu ya jeē ni jéjnūhun ya, jeē cócuhun ni yō táca jéē váha coo, jíin jéē cundáhú ni yō jnáhan yó. Te jnūhun cúndahú ni chí jéhu ndasí gá cúu nuū táca jéē váha.

*Siqui jeē cácahān i tijni yuhu***14**

<sup>1</sup> Na cóndihvī ni rō cundáhú ni rō jnāhan ró, te suni condihvī ni rō cacān rō tāca tahū jeē jéhe Espírítu. Te tahū jeē cánuú gá cúu jeē nácani ró jnúhun ya.

<sup>2</sup> Chi tēe névāha tahū jeē cahán de tijni yuhu jeē tu jécūhun ni de, chi máá-ni Yaa Dios jini jeē cahán de, nasūu ñáyuu. Chi ni ñn i ma jécūhun ni jeē cahán de. Chi sáha Espírítu jeē cahán de tāca jnúhun yísahí.

<sup>3</sup> Te sa suhva tēe nácani jnúhun ya, chi jíin ñáyuu cahán de návāha ije i jíin jnúhun ya, te stíhvī ni de i, te cahán ndeyí ni de jíin i.

<sup>4</sup> Te tēe jeē cahán tijni yuhu, chi máá-ni de íje jíin jnúhun ya. Te tēe jeē nácani jnúhun ya, chi sa suhva sáha de jeē ñáyuu cácaandíje íje i jíin jnúhun ya.

<sup>5</sup> Nújnahan ni rí jeē ndihí ró cuu cahán ró tijni yuhu jeē tu jécūhun ni rō, te jeē cánuú ndasí gá cúu jeē nácani ró jnúhun ya. Chi jéhu ga jniñu sáha tēe nácani jnúhun ya vésú tēe cahán tijni yuhu. Chi núu tú tēe castūhun jnúhun cahán de, te ma cuajniñu jeē íje ñayuu cácaandíje.

<sup>6</sup> Jeē yúcuan hermano jijnáhan ró, núu na jéé rī nuū rō, te núu cahán rī tijni yuhu jeē tu jécūhun ni rō, ¿te ndé cuajniñu ún? Te núu na cahán rī ñn jeē ní stéén yā, chí ñn jeē cutūhva ró jnúhun ndaā, chí ñn jeē nácani rí jnúhun ya, chí ñn jeē stéén rí nuū rō, yúcuan cúu jeē cuajniñu.

<sup>7</sup> Sáha yó cuenta jeē nájñūhun instrumento música, vésú tu técu, te cuu cata, nájñūhun flauta jíin arpa. Te núu tu jíta sñn sñn nota, ¿te ndese cuni yō na yaa jíta?

<sup>8</sup> Te núu corneta tu jécú cájí, te ni ñn tēe ma sátūhva de quihīn de guerra.

<sup>9</sup> Te suni súcuan róhó jijnáhan ró, núu tu cahán cají ró jnúhun jecūhun ni ñayuu, ¿te ndese cuni i na vé cahán rō? Chi jnúhun cahán rō ndiso tachī cuahán jíin.

<sup>10</sup> Te ndaā chí íyó cuéhē yuhu ini ñayiví, te tācá yuhu chí íyó ñáyuu jécūhun ni.

<sup>11</sup> Te núu tu jécūhun ni yō yuhu cahán ñn tēe, te cúu yó nájñūhun tēe ñuu jicá núu tēe cahán, te suni nájñūhun tēe ñuu jicá cúu de nuū maá yó.

<sup>12</sup> Jeē yúcuan róhó jéé cácani ndasí ró nihīn rō tahū jeē jéhe Espírítu, na cacán rō tahū jeē sáha jeē íje ñayuu cácaandíje jíin jnúhun ya.

<sup>13</sup> Núu súcuan te ñayuu jeē cahán inga yuhu jeē tu jécūhun ni i, na cacán tahú i jeē cuu nacastūhún i yuhu ún.

<sup>14</sup> Chi núu jicán tahú yō jíin inga yuhu, te máá ánuá-ni yó cúu jeē jicán tahú, te tu ndé jéjñū nuū jeē níjñūni yō.

<sup>15</sup> ¿Ndese sáha yó núu súcuan? Na cacán tahú yō jíin ánuá yō, te suni jíin jéé níjñūni yō. Na cáta yó yaa í jíin ánuá yō, te suni jíin jéé níjñūni yō.

<sup>16</sup> Chi núu nácuatáhú ró máni jnúhun jeē ní quiji nuū ánuá rō te tu jécūhun ni rō, núu súcuan te tēe jíni sōho te tu jécūhun ni, ma cúu nacuatáhú de jíin ró. Chi tu jíni cuiti de na jnúhun cahán rō.

<sup>17</sup> Ndaā chí vāha nácuatáhú máá ró, te inga de chí tú na vé nihín de jeē íje de jíin jnúhun ya.

<sup>18</sup> Na cutahū rī nuū Yaa Dios jeē cahán gā rī jíin tijni yuhu vésú maá ró jijnáhan ró.

<sup>19</sup> Te vésú súcuan te núu íne rí nuū cáyūcu tútú ñáyuu cácaandíje, te nújnahan gā ni rí cahán rí uhūn-ni jnúhun jeē jécūhun ni i te stéén nuū i, vésú jeē cahán rí uxí mil jnúhun jíin inga yuhu jeē tu jíni cuiti i.



<sup>20</sup> Hermano jijnáhan ró, ma cáni ni rō nájñūhun sūchi lúli, chi sa suhva na íje ró jeē jecūhun vāha ni rō. Te coo ró nájñūhun sūchi lúli jeē tu jíni i jniñu neé.

<sup>21</sup> Te yósó núu tútu ley yā jenahán: Jíin jñūhun cácahān tēe inga yuhu, jíin jñūhun cácahān tēe ñuu jicá, sáha ri jeē cúni sōho ñayuu yáha jñūhun ri. Te ni jíin súcuan ma sáha i cuenta jñūhun cahān rī, achí máá Jítoho yō.

<sup>22</sup> Núu súcuan te tahū jeē cahán yō tijni yuhu, yūcuan cúu ñin jeē steén poder Yaā Dios nuū ñáyuu tu cácañdije, nasūu núu ñáyuu cácañdije. Te jeē nácani yó jñūhun ya, yūcuan cúu jeē steén nuū ñáyuu cácañdije, nasūu núu ñáyuu tu cácañdije.

<sup>23</sup> Núu súcuan te núu ndihi ró ñáyuu cácañdije cáhīyo tútú, te tāca ró cácahān sñn sñn yuhu, te quīvícoo ñayuu tu jécūhun ni jíin ñáyuu tu cácañdije, ¿te á má cahán i jeē ní canduu loco rō?

<sup>24</sup> Te núu tāca ró cácanani jñūhun ya, te núu quīvi ñin tēe tu cácañdije chí ñin tēe tu jécūhun ni, yūcuán na te nacuni de jeē tée íyó cuéchi cúu de, te coto ndee de máá de jíin jñūhun cácanani ró.

<sup>25</sup> Te nucūhun ni de tāca jeē ní jeni yuhu ni de jíin ánuá de. Yūcuán na te jecuiñi yití de te chiñúhún de Yaā Dios. Te cahán de jeē íne ndije Yaā Dios jíin ró jijnáhan ró.

### *Siquí jeē yucún yñúhún na cóo nuū ndutútú yó*

<sup>26</sup> Núu súcuan hermano jijnáhan ró: Nuū cándutútú ró te tāca ró coo ñin yaa ñi cata ró, chí ñin jñūhun steén rō, chí ñin jñūhun jeē ni sáha Yaā Dios jeē jécūhun ni rō, chí inga yuhu jeē cahán rō, chí jeē nácastūhun ró jñūhun inga yuhu ún. Te ndihi ún na sáha ró návāha ije ñayuu cácañdije jíin jñūhun ya.

<sup>27</sup> Te núu cáhīyo tēe cahán inga yuhu, te na cáhán uē de chí únī-ni de, te ná ñin ná ñin de na cáhán. Te suni jíni ñúhún jeē nacastūhún ñin tēe jñūhun ún.

<sup>28</sup> Te núu tu íyó tée jeē cúu nacastūhun jñūhun ún, te tēe cácahān inga yuhu, vāha ga ma cahán de nuū cándutútú ró, te na cáhán maá-ni de jíin Yaā Dios.

<sup>29</sup> Te suni súcuan tēe cácanani jñūhun, na cáhán uū de chí únī de, te sava ga rō nacani ni rō núu íyó ndáa jeē cácahān tēe ún.

<sup>30</sup> Te núu inga tēe néne ni nihñ de ñin jñūhun jeē ni steén yā nuū de, núu súcuan te tēe cahán na jecuiñi jeē cahán de, návāha cahán inga tēe ún.

<sup>31</sup> Te súcuan te ná ñin ná ñin ró cuu nacani ró jñūhun jeē steén yā nuū rō, návāha cutūhva ró te coo ndeyí ni rō.

<sup>32</sup> Te tēe cácanani jñūhun, jíni ñúhún cuatáhú de jeē nácani inga tēe jñūhun te jecuiñi jeē cahán maá de.

<sup>33</sup> Chí Yaā Dios cuní yā jeē coo nayúu méhñu ró, násūu jeē sacā núu cuvaā rō.

Te nájñūhun cásáha tāca grupo hermano cácañdije,

<sup>34</sup> suni súcuan tācá ñahan cándutútú jíin ñáyuu cácañdije, na cóo nayúu ña. Chí tú vāha jeē cahán ña, chí sa cuatáhú ña nájñūhun cáhán tutu ley yā.

<sup>35</sup> Te núu cúní ña cucáhu ni ña ñin jñūhun, te nde vehe na cáññhún ña yñ ña. Chí jñūhun canu cúu jeē cahán ñin ñahan méhñu núu cándutútú ró.

<sup>36</sup> Te na sáha ró cuenta jeē tu ní quéndá jñūhun Yaā Dios nuū maá ró jijnáhan ró, te nasūu máá ñin máá ró ní cániññ jñūhun ya.

<sup>37</sup> Núu ñin tēe jéni ni de jeē tée nácani jñūhun ya jíin tée névāha Espíritu cúu de, núu súcuan te na cuájñhún de jeē jniñu ní ndacu Jítoho yō cúu jeē tée ri yāhá.

<sup>38</sup> Te núu tu jétáhú de jñūhun yáha, suni ma cuatáhú yó de.

<sup>39</sup> Núu súcuan, ñánī mánī jijnáhan ró, na cóndihvī ni rō nacani ró jnūhun ya, te ma cási rō nuū tée cácahān s̄n̄ s̄n̄ yuhu.

<sup>40</sup> Te yúcún yíñūhún na sáha ró táca jniñu.

### *Jnūhun jeē ní natecu Cristo*

## 15

<sup>1</sup> Hermano jijnáhan ró, vijna te nucūhun ni rō jnūhun jnáma ya yohó jeē ní nacani ri nuū rō. Te jnūhun ún chi je ni cajetáhú ró, te suni cáhīn nīhin ró jíin.

<sup>2</sup> Te suni jíin jnūhun ún te ni jnama ya rohó, te núu cáhīn nīhin ró jíin jnūhun ni nacani ri nuū rō, te núu tu ní cácaandíje cáha rō.

<sup>3</sup> Chi jnūhun cánuú gá jeē ní nīhīn maá rí ni nastéén rī nuū rō: Jeē ní jíhī Cristo siquī cuēchi yó, nájnūhun je cáhán tutu īi nde jenahán.

<sup>4</sup> Te ní quindūji ya, te ní natecu yā nuū uní quivī, nájnūhun cáhán tutu īi.

<sup>5</sup> Te ní nane ya nuū Pedro. Te saá te ní nane ya nuū ndihúxī gā apóstol.

<sup>6</sup> Te saá te ní nane ya nuū vihyá gā uhūn ciento hermano jeē cáyūcu tútú. Te sava i técu gā nde vijna, te sava i je ní jíhī.

<sup>7</sup> Te saá te ní nane ya nuū Jacobo, yūcuán na te nuū ndihī gā apóstol.

<sup>8</sup> Te jeē sándīhī na te ní nane ya nuū maá rí. Te nájnūhun ñn jeē ní cacu yúte, súcuan cúu jeē ñn sanaa-ni te ní nduu ri apóstol.

<sup>9</sup> Chi tée núu ga nuū táca gá apóstol cúu rí, te ní nasūu tée váha cúu rí jeē cónaní rí apóstol, chi ní jito xeēn rī ñayuu cácaandíje nuū Yaā Dios.

<sup>10</sup> Te siquī jeē ní sáha Yaā Dios jeē váha ruhū, jeē yúcuan cúu rí apóstol vijna. Te jeē ní sáha ya jeē váha ruhū, chí tú cáha ní cúu, chí sa ní scáca ga rī jnūhun ya vēsú táca gá tée apóstol. Te nasūu máá rí ní sáha, chí Yaā Dios ní sáha ya jeē váha un jíin rí.

<sup>11</sup> Núu súcuan te vēsú ruhū chí táca gá tée ún, súcuan cánacani ri jnūhun, te súcuan ní cacandíje rō.

### *Jnūhun jeē natecu ndīyi*

<sup>12</sup> Te jeē cánacani ri jnūhun Cristo jeē ní natecu yā mēhñu ndīyi, ¿te naun cácahān sava ró jéē ma nátecu ndīyi?

<sup>13</sup> Chi núu jeē tú natecu ndīyi, te suni tu ní nátecu Cristo nuú.

<sup>14</sup> Te núu jeē tu ní nátecu Cristo, te cánacani cáha rí jnūhun ya nuú, te suni cácaandíje cáha rō nuú.

<sup>15</sup> Chi núu jeē súcuan cúu núu, te cácuu ri tée jeē tu cácahān ndaā jnūhun Yaā Dios, chí ní cacachi rí jeē ní nastécu Yaā Dios Cristo. Te núu jeē tú natecu ndíje ndīyi, núu súcuan te tú ndaā jeē ní nastécu Yaā Dios Cristo.

<sup>16</sup> Chi núu tú natecu ndīyi, te ní Cristo suni tu ní nátecu yā nuú.

<sup>17</sup> Te núu tu ní nátecu Cristo, te cácaandíje cáha ró te cándiso īi gā rō cuēchi rō nuú.

<sup>18</sup> Te núu jeē súcuan cúu núu, te suni je ní cajnahñu ndetū ñayuu ní cacandíje Cristo.

<sup>19</sup> Chi núu tú natecu ndīyi, te núu máá ñn-ni siquī vida yáha ñūhun ni yō jeē sáha Cristo jeē váha yóhó, núu súcuan te ndahū ndasí gá cácuu yó vēsú táca gá ñayuu, chí cácaandíje cáha yó nuú.

<sup>20</sup> Te tuú chí íyó ndáā jeē ní natecu Cristo mēhñu ndīyi. Te máá yá cúu jeē xíhna gā ní natecu nuū táca gá ndīyi jeē natecu.

<sup>21</sup> Chi siquī jeē ní stívi ñn-ni tée Adán, te ní quejéé jíhī ñayuu. Te suni súcuan siquī jeē ní sáha ñn-ni tée Cristo, te natecu ñayuu.

22 Chi nájnūhun cájihī ndihī yó síquī jeē cácuu yó yúcūn Adán, suni súcuan natecu ndihī yó síquī jeē yíhi yó ndaha Cristo.

23 Te ná ìin ná ìin ndese ndiquín jnánhan máá: Xihna gā Cristo ni natecu yā, te sáá te quivī ndíji ya te natecu tāca ñáyuu yíhi ndaha ya.

24 Yūcuán na te jīnu tiempo, te snáā yā poder tācá enemigo jeē cujéhnū jín jeé ndácu jniñu jín jeé iyó poder. Te ndihī jeé ndácu ya jniñu nuū, nacuāha ya nuū Tatá yā Yaā Dios.

25 Chi cánuú jeé ndacu Cristo jniñu nde quiji quivī jeé quénde Yaā Dios poder tāca jeé jító uhū nuū Cristo, te stóho ya.

26 Te jeé sándihí na te snáā yā cuehyí jéhnī ñayuu.

27 Chi cáhán tutu ìi jeé sáha Yaā Dios jeé cujéhnū Cristo síquī ndihī, te cuatáhú núu yā. Te jeé cahán jeé cujéhnū ya nuū ndihī-ni, te jíní vāha yó jéé máá Yaā Dios ma quíhi ya ndaha Cristo, chi Yaā Dios cúu jeé ni chíhi tācá un ndaha Cristo.

28 Te ná ni quivī ndihī ún ndaha Cristo, yūcuán na te suni máá Cristo jeé cúu ya Sēhe, quivī ya ndaha Tatá yā, Yaā jeé ní chíhi tācá un ndaha ya. Te súcuan te máá Yaā Dios jniñi ya ndihī-ni.

29 Te íyó ñáyuu cájendute jehē ndíyi. Te núu tú natecu cuiti ndíyi, ¿te najehē cájendute i jehē ndíyi núu súcuan?

30 Te ruhū jijnánhan rī, ¿najehē cúu jeé ndiquivī cájendeyí ni rī jító rī jnūndóho cuu rī, te núu tú natecu ndíyi?

31 Hermano, nájnūhun íyó ndáā jeé cúsiñi ni rī síquī jeé cá candije ró Jítóho yó Jesucristo, suni súcuan íyó ndáā jeé ndiquivī nducú ñáyuu cahni ruhū síquī jniñu ya.

32 Te jeé ní ndoho rī ni casáha tēe xeēn ñuu Efeso, jeé cácuu de nájnūhun quiti xéén, ¿te na vé nihín rī síquī un núu súcuan? Chi núu tú natecu ndíyi, te cuu cahān yó nájnūhun áchí ñn jñūhun: Na cúsiñi ni yó caji yó coho yó, chi sanaa te sajnē te cuu yó, achi yó núu.

33 Ma cuáha ró jñūhun stáhú ñáyuu rohó. Chi áchí ñn jñūhun: Núu cájica ró jín ñáyuu neé, te stívī i róhó jéé tuá caca ndaā rō.

34 Nachuhun ni rō jijnánhan ró, te sáha ró jniñu ndaā, te ma sáha ga rō cuéchi. Chi sava ró tu cájini cuiti rō ndese Yaā cúu Yaā Dios. Súcuan cáhán rī návaha na cúcanu rō.

### *Ndese natecu ndíyi*

35 Te sanaa te cahān ñn ró: ¿Ndese natecu ndíyi? ¿Ndese coo yiqui cúñu i? achi rō.

36 Tu jécūhun cuiti ni rō núu súcuan. Chi cúu nájnūhun jeé cátají ró táca tata chíji ñuhun návaha nane yucū i.

37 Te tata jeé quivī chíji ñuhun, núu trigo chí inga tata, chi nasūu yúcū cúu, chi máá núnī-ni cúu.

38 Te cuéé gá te cane, chi Yaā Dios ni jēhe ya yucū tata ún, ndese ni nujnahan ni máá yá, te ná ñn ná ñn tata chí sñn sñn cáa yucū ni sáha ya.

39 Te suni súcuan tācá yiqui cúñu, chi tú inuú cándāa. Chi sñn cáa ñayuu, te sñn cáa quiti, te sñn cáa saa, te sñn cáa chācá.

40 Te suni súcuan cúu tāca jeé ñn andívī jín táca jéé iyó ñáyiví. Te sñn luu cáa jeé ñn andívī, te sñn luu cáa jeé iyó ñáyiví.

41 Te sñn ndíndēe níandii, te sñn ndíndēe yóó, te sñn ndíndēe táca quími. Te táca ñn ñn quími chi suni sñn sñn ndíndēe.

<sup>42</sup> Te suni súcuan coo jíin ndíyí jeē natecu. Ndíyí jeē chindūji yó chi téhyū, te jeē nastécu yā chi ma cūū gā.

<sup>43</sup> Jeē chindūji yó chi ndáhú cáa, te jeē nastécu yā chi luu cujéhnū. Jeē chindūji yó chi tú na fuerza, te jeē nastécu yā chi coo fuerza.

<sup>44</sup> Jeē chindūji yó chi ñn yiquí cūñu cuenta ñayívi cūu, te jeē nastécu yā chi ñn yiquí cūñu cuenta Espíritu yā cūu. Chi íyó yiquí cūñu cuenta ñayívi, te suni íyó yiquí cūñu cuenta Espíritu.

<sup>45</sup> Chi súcuan yósó núū tútu íi: Adán, tēe xihna ñúhún, ni cuvāha de jíin vida cuenta ñayívi, áchí. Te Cristo cūu nájñuhun inga Adán uū, te máá yá cūu Espíritu jeē jéhe vida.

<sup>46</sup> Te nasūū yiquí cūñu cuenta Espíritu cūu jeē ní cuvāha xihna gā, chi sa suhva yiquí cūñu cuenta ñayívi, te sáá te nduu cuenta Espíritu.

<sup>47</sup> Te cuenta ñayívi cūu tēe xihna ñúhún, chi ni cuvāha de jíin tícachā ñuhun. Te Adán uū jeē cūu máá Jítoho yó, chi nde andívi ní quiji ya.

<sup>48</sup> Te ñayuu ñayívi yáha, chi cūu i jnánhan Adán jeē ní cuvāha jíin tícachā ñuhun. Te ñayuu jeē quíviico andívi, chi ndúu i nájñuhun máá Yaā ní quiji nde andívi.

<sup>49</sup> Chi jeē cáa yó nájñuhun tēe ni cuvāha jíin tícachā ñuhun, suni súcuan coo yó nájñuhun cáa máá Yaā ní quiji nde andívi.

<sup>50</sup> Jñuhun yáha cástūhun rí nuū rō jijnánhan ró, hermano, jeē yiquí cūñu yó cuenta ñayívi yáha, ma cūu quívi ñuu nuū ndácu Yaā Dios jniñu. Chi jeē jíhi cūu, te ma cūu quívi nuū cótecu ní cáni.

<sup>51</sup> Te cúní rí jeē na jécūhun ni rō jñuhun yáha jeē ní yisáhi: Nasūū ndíhi yó cuu, te ndíhi yó chi nasāma yiquí cūñu yó.

<sup>52</sup> Chi quívi jeē cuécu sandíhi na trompeta, te ñn yachí-ni, nájñuhun ñn jeē nácuenī-ní yó, te nasama ya yohó. Chi cuécu trompeta un, te natecu tāca ndíyí jeē ma cūū gā i. Te tāca yó jeē cátecu yó quívi ún, chi nasama ya yiquí cūñu yó.

<sup>53</sup> Chi jeē tehyú yáha, cánuú nucūhun jeē ma téhyú gā. Te jeē jíhi cánuú nucūhun jeē ma cūū cuiti gā.

<sup>54</sup> Chi jeē jíhi jeē tehyú, chi quiji quívi jeē nucūhun jeē ma cūū gā ma tehyú gā. Yūcuán na te cundaā jñuhun yósó núū tútu íi: Jíin poder yā ni snáa yā cuehyí jéhni ñayuu.

<sup>55</sup> Cuehyí jéhni yóhó ¿ndese ga cuu sáha xeēn jíin yó? Chi natecu yó. ¿Te ndese ga cundeyí jíin yó? Chi snáa yā. Achí tutu.

<sup>56</sup> Chi cuéchi cūu jeē sáha jeē cundeyí cuehyí jéhni ñayuu. Te ley yā jenahán sáha jeē náne cuéchi síquí yó.

<sup>57</sup> Te na cútahū yó nuū Yaā Dios, chi jíin máá Jítoho yó Jesucristo sáha ya jeē cundeyí yó síquí cuéchi jíin síquí jñuhun cuu yó.

<sup>58</sup> Jeē yúcuan, ñání mání, cuiñi ñihin ró te ma cáca yátá ró jijnánhan ró. Te níni na sájñiñu vāha ró jíin jniñu máá Jítoho yó. Chi je cájini ró jeē tu casájñiñu cáha ró jíin máá Jítoho yó.

*Siquí jeē cáquin i xūhún cuu tācá hermano*

## 16

<sup>1</sup> Te vijna te cahán rí síquí xūhun jéé cáquin ró cuu hermano cácandíje cándoho ndáhú. Suni na sáha máá ró jijnánhan ró nájñuhun ni ndacu rí nuū tāca grupo ñayuu cácandíje ichi Galacia.

<sup>2</sup> Tācá domingo te ná ñn ná ñn ró chuvāha sñn ró jecu xūhún, núu ndese ni ñihñ maá ró, návāha quívi jeē jinú rí nuū rō te je íyó túhva.

<sup>3</sup> Te jeē jeé rī, te cuāha ri carta nuū tāca tée jeē nácāji ró, te tají rí de quingoo de nuū tācá hermano cáyūcú Jerusalén, quísiáha de xūhun jée ní casocō rō.

<sup>4</sup> Te núu íyó váha jeē quihín rī, te suni quihín rī jíin de jíjnáhan de.

*Jeē cahán Pablo siquī jeē quícondēhé de ñayuu cácadíje*

<sup>5</sup> Te jeē jeé rī nuū rō jíjnáhan ró, te jíni ñúhún jeē xíhna gā jeē rī región Macedonia, yūcuán na te jeē rī ñuu rō Corinto.

<sup>6</sup> Te sanaa te quendōo ri jíin ró jíjnáhan ró jecu tiempo, chí sanaa te coyūcu yó ní tiempo mījin. Yūcuán na te cuu chindéé ñáhán ró ruhū, núu ndé chí quihín tucu ri.

<sup>7</sup> Chí tu cúní rī jeē rī nuū rō vijna te yāha yachī rī quihín rī, chí ñúhún ni rī jeē quendōo ri jíin ró jecu tiempo, te núu cuāha Jitoho yō jnūhun.

<sup>8</sup> Te cone ri ñuu Efeso yáhá nde na yāha quivī Pentecostés.

<sup>9</sup> Chí coo cuehé ñayuu scandíje ri, te váha quihín jniñu Jitoho yō. Te suni íyó cuehé ñayuu cácuu contra.

<sup>10</sup> Te núu na jée Timoteo, te sáha ró jée coo sī ni de mēhñu ró, te ni ñn ma cáni ni de siquī. Chí suni jniñu máá Jitoho yō sáha de, nájnūhun máá rí.

<sup>11</sup> Núu súcuan te ni ñn ró má sajeé ni rō nuū de. Chí sa suhva chindéé ñájánhan ró jíin de jeē na quihín gā de, te coo ndeyí coo sī ni de, návāha ndiji de coto jnáhan ri jíin de. Chí ruhū jíin sava ga hermano cándetu ri de.

<sup>12</sup> Te hermano Apolos chí ni cahán ndahú rí jíin de jeē na jée de jíin sava ga hermano, condēhé de rōhó. Te ni jeni ni de jeē ma cúu jeē de vijna. Te núu na núne de te jeē de.

*Saludo jeē sándíhí*

<sup>13</sup> Ndito coo ni rō jíjnáhan ró, te cuiñi ñihin ro jíin jnūhun cácadíje ró. Te téyí na cóo ni rō, te na cóo fuerza ini rō.

<sup>14</sup> Te tāca jée casáha ró, na sáha ró jíin jnūhun cúndáhú ni jnáhan.

<sup>15</sup> Hermano, cájini rō jeē xíhna gā ñayuu vehe Estéfanas ni cacandíje ichi Acaya. Te ni cajēhe i máá i nuū jniñu jeē chindéé ñáhán i tācá hermano cácadíje.

<sup>16</sup> Te cúní rī jeē suni máá ró jíjnáhan ró, cuatáhú váha ró ñáyuu casáha súcuan, jíin táca ñáyuu cachindéé ñájánhan te cásájniñu siquī jniñu ya.

<sup>17</sup> Cúsī ni rī jeē ní quijicoo Estéfanas jíin Fortunato jíin Acaico, chí tēe yáha ni cajejniñu de nuū rī jehē rō jeē tu ní cáhīyo ró jíin rí.

<sup>18</sup> Chí ni ndundayí ni rī, te suni súcuan máá ró jíjnáhan ró, ni casáha de. Te cánúu cuajnúhún ró tāca tée cándāa súcuan.

<sup>19</sup> Sándeyí ni rō jíjnáhan ró, áchí táca grupo ñayuu cácadíje cáyūcu Asia. Aquila jíin Priscila jíin ñáyuu cácadíje jeē cándutútú vehe de, cácahān i jeē sándeyí ndasí ni rō jíin jnūhun máá Jitoho yō.

<sup>20</sup> Te tācá hermano cácahān i jeē sándeyí ni rō. Te jeē cahán rō jíin táca jnáhan rō, te yíñúhún techūhu ró ndaha i.

<sup>21</sup> Ruhū Pablo, jíin ndaha máá rí tée ri jnūhun yáha jeē na sándeyí ni rō jíjnáhan ró.

<sup>22</sup> Te núu ndé ñn tu íyó mání jíin Jitoho yō Jesucristo, te na jnánú ndetū i núu súcuan. Te na cáhán yō: Jitoho ná, cúní na jée yachī ndiji ní.

<sup>23</sup> Te ñúhún ni rī jeē máá Jitoho yō Jesucristo na sáha ga yā jeē váha rōhó jíjnáhan ró.

<sup>24</sup> Te maní rī jíin ró jíjnáhan ró jée cácadíje ró Cristo Jesús. Súcuan na cóo. Amén.

## CARTA UU JEE NI TEE SAN PABLO APOSTOL NUU ÑAYUU ÑUU CORINTO

<sup>1</sup> Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū nacani ri jñūhun ya. Te ndindúú rí jñūn hermano yō Timoteo cátee ri carta yáha cuájeē nuū rohó hermano ñuu Corinto jeē cácanđije ró Yaā Dios, jñūn núū ndihi róhó jéē cáyihí ndaha Yaā Dios jeē cáyūcu ní cáhnu Acaya.

<sup>2</sup> Te cáñuhun ni rí jeē Tatá yō Yaā Dios jñūn Jítóho yō Jesucristo na sáha ga yá jeē váha róhó te sáha ya jeē coo ndeyí coo sñi ni rō.

### *Siquí jeē ní ndoho Pablo jñūndóho*

<sup>3</sup> Na cáhán yō jeē yóhoyo cújéhnu Yaā Dios, Yaā cúu Tatá máá Jítóho yō Jesucristo. Chi máá yá cúu Tatá yō jeē cundáhú ni yohó, te níní sáha ya jeē ndúsñi ni yō.

<sup>4</sup> Chi sáha ya jeē ndúsñi ni yō siquí tāca jñūndóho ndóho yó, návāha suni cuu sáha máá yó jeē ndúsñi ni náhan yó jéē cándoho jñūndóho. Chi náñūhun ni sáha ya jeē ndúsñi ni máá yó, suni súcuan sáha yó jéē ndúsñi ni i.

<sup>5</sup> Chi jeē ndóho yó cuehē jñūndóho náñūhun ni ndoho Cristo, suni súcuan nihñi yō cuehē jñūhun ndusñi ni, sáha Cristo.

<sup>6</sup> Jeē yúcuu núu cándoho ri jñūndóho te súcuan te cuu sáha ri jeē ndúsñi ni rō te quendōo vāha ga anuá rō. Te jeē sáha Yaā Dios jeē ndúsñi ni rí, suu sáha tucu jeē ndúsñi ni máá ró, te quendōo vāha ga anuá rō. Te súcuan te nihñi rō fuerza jeē cuándeýi ni rō jñūn tāca jñūndóho náñūhun cándoho ri.

<sup>7</sup> Te cáñuhun ndasí ni rí jeē cúu róhó, chi cájini rí jeē náñūhun cándoho ró jñūndóho jñūn rí, suni súcuan ndusñi ni rō jñūn rí sáha máá Yaā Dios.

<sup>8</sup> Hermano, cácuni rí jeē na cūni rō jijnáhan ró ndese ni candoho ri ichi Asia. Chi yóhoyo xeēn jñūndóho ni cajito rí, nde je yajni tuá canda ri, te ni jeni ni rí jeē cuu rí nuú.

<sup>9</sup> Te siquí jeē ní cajehnde ni rí cuu rí, te yūcuu ní sáha jeē ní cajecūhun ni rí jeē ma ténuu rí máá rí chí tú jñiñu rí, chí sa suhva Yaā Dios jeē nastécu ndiyí tenuú rí.

<sup>10</sup> Chi máá yá ni scácu ruhū jijnáhan ri nuú jñūndóho xeēn jeē jé yajni cuu rí nuú, te suni súcuan scácu ya ruhū vijna. Te ñúhun ni rí jeē suni scácu tucu ya ruhū ichi núú gā.

<sup>11</sup> Te suni na chindéé ñáhán ró rúhū jijnáhan ri jeē cacān tahú rō jehē rí. Chi núu cuehē ñayuu cacān tahú jehē rí, te suni cuehē i cuu nacuatáhú jehē rí jee ni sáha ya jeē váha ruhū.

### *Jeē ní cucuéé Pablo quihñ de ñuu Corinto*

<sup>12</sup> Iyó ññ jeē sáha jeē cácusñi ni rí: Chi vāha íyó ni anuá rí jeē váha ndoo te ndaā ni cajica ri nuú ñayuu ñayiví, te víhyá gā nuú máá ró jijnáhan ró. Chi siquí jeē váha ni Yaā Dios, te ni chindéé ñáhán yá ruhū, te nasūu siquí jéē ndichí máá rí cúu jeē ní cajica ri súcuan.

<sup>13</sup> Te jñūhun cátee ri nuú tāca carta rí, chí máni jeē cúu cahu ró te jecūhun ni rō cúu. Te ñúhun ni rí jeē jecūhun vāha ga ni rō,

<sup>14</sup> náñūhun je cájecūhun ni rō jecu. Te súcuan te cuu cusñi ni rō siquí rí quiví ndíji Jítóho yō Jesús, náñūhun cácusñi ni rí siquí máá ró.

15 Te siquĩ jeē súcuan ni cucáhnu ni rĩ, te jeē yúcuan ní jeni ni rĩ jeē núu na quihín rĩ Macedonia te jeē rĩ nuū maá ró xihna gā, návāha cusĩ ni rō jeē jécondēhe rĩ rohó úu jinu nuú.

16 Chi ni jeni ni rĩ jeē jécondēhe rĩ rohó, te yāha ri quihín rĩ Macedonia, te jeē nándicó rĩ Macedonia te ndiji tucu ri nuū rō. Yūcuán na te cuu chindéé ñáhán rō ruhū jeē quihín rĩ ichi Judea nuú.

17 Te jeē súcuan ni jeni ni rĩ, ¿te á tée tu nácani vāha ni cúu ri jeē tu ní jéé rĩ nuū rō, chí naún? ¿A cájeni ni rō jeē cúu ri nájñuhun ñayuu ñayĩvi jéé yachĩ cahán jeē cuu, yūcuán na te tuú, chí naún?

18 Tuú chi máá Yaā Dios jíni yā jeē tu cáhán rĩ jíin ró jeē cuu, te yachĩ nácahān rĩ jeē ma cúu.

19 Chi ruhū jíin Silvano jíin Timoteo ni canacani ri jñuhun Jesucristo Sēhe Yaā Dios nuū rō jíináhán ró. Te máá yá tu cáhán yā jeē cuu te nacahān tucu ya jeē ma cúu. Chi squícu ya jeē cahán yā.

20 Chi ndihĩ jeē ni jéjñuhun Yaā Dios, squícu máá Cristo. Te jeē yúcuan cácahān yō jeē yóhoyo luu cújéhnu Yaā Dios, te cácahān yō Amén, chí ndihĩ squícu Cristo Jesús.

21 Te Yaā Dios cúu jeē sáha jeē ruhū jíináhán ri jíin róhó jíináhán ró, cáhĩn nihin yó jíin Cristo, te ni sándoo ya yohó jéé cuajniñu yó nuū yā.

22 Te suni ni jēhe ya Espíritu yā jeē cóndee ini anuá yō, te cúu ya nájñuhun ñin sello jeē steén jeē cúu yó sēhe Yaā Dios. Te sáha Espíritu jeē iyó ndáá ni yō jeē cuāha Yaā Dios tahū yō.

23 Te jeē ná tu jeē rĩ nuū rō ñuu Corinto, nájñuhun ni jeni ni rĩ, suu cúu siquĩ jeē tu ní cúnĩ rĩ cuxeēn rĩ nuū rō jeē tu cásáha vāha ró. Te máá Yaā Dios cúu Yaā jíni jeē cahán ndaā rĩ. Te iyó váha jeē na cúu rĩ te núu tu cáhán ndaā rĩ.

24 Te nasūu jéé cácuni rĩ ndacu nihin ri jniñu nuū rō siquĩ jñuhun cácañdije ró yá, chí je cáhĩn nihin ro jíin jñuhun ún. Chi sa suhva cácuni rĩ chindéé ñáhán rĩ rohó jéé na cúshĩ gā ni rō.

## 2

1 Núu súcuan te ni jeni ni rĩ jeē ma jéé rĩ inga jínu nuū rō jíin jñuhun cuxeēn rĩ te cucuíhyá ni rō sáha rĩ.

2 Chi núu cucuíhyá ni rō sáha ri, ¿te ndé ñayuu sáha jeē cusĩ ni maá rí? Tuá na inga ñayuu, chí máni máá róhó, te ndese cuu te núu ni sáha ri jeē cucuíhyá ni rō.

3 Te jeē yúcuan cúu jeē ní tee ri carta un núu rō, návāha nacani ni rō siquĩ cuéchi ró sáha, te ma cucuíhyá ni rĩ sáha cuéchi ró quĩvĩ jeé rĩ nuū rō. Chi sa suhva sáha ró jéé cúshĩ ni rĩ. Te jíni vāha ri jeē núu cusĩ ni rĩ, te suni ndihĩ ró jíináhán ró cusĩ ni rō.

4 Te jeē ní tee ri carta un núu rō, te yōhoyo ni nacani ni rĩ siquĩ rō, te ni jnahuhū ni rĩ, te nde ndahyú rĩ ni tee ri. Te tu ní tée ri jeē sáha ri jeē cucuíhyá ni rō, chí sa suhva návāha cuni rō ndese yōhoyo manĩ rĩ jíin ró.

### *Jeē íne cáhnu ni Pablo nuū tée ni sáha cuéchi*

5 Te jeē ní cucuíhyá ni rĩ ni sáha tēe jeē ni sáha cuéchi ún, te nasūu máá-ni ri, chí suni nde máá ró jíináhán ró ni sáha de jeē ní cacucuíhyá ni rō jecu. Te cáhán rĩ jeē jecu-ni, chí tu cúnĩ rĩ cuxeēn ndasĩ rĩ.

6 Te jíin jéé ní cacuxeēn rō nuū de ná ni candutútú ró, te jíin yúcuan-ni te ni cuu-ni.

<sup>7</sup> Te vijna chi jíni ñúhún jeē cóne cáhnu ni rō nuū de, te sáha ró jéē ndúsī ni de, chi sanaa te caa ga cucuíhyá ni de, te ma ndúsī gā ni de.

<sup>8</sup> Núu súcuan te cáhán ndahú rí jíin ró jijnáhan ró jéē steén tucu ró jéē iyó maní rō jíin de.

<sup>9</sup> Chi jeē siquī jniñu yáha cúu jeē ní tee ri carta un núu rō, návāha coto ndee rī rohó núu cuatáhú váha ró jniñu ndácu ri nuū rō.

<sup>10</sup> Núu súcuan te núu íne cáhnu ni rō nuū ñayuu, te suni súcuan ruhū. Chi jeē íne cáhnu ni rī nuū ñayuu núu ni sáha i cuēchi, te sáha ri súcuan siquī jeē maní rī jíin ró jíto jíinú Cristo.

<sup>11</sup> Chi cánuú cone cáhnu ni yō, chi tu cúni yō jeē nihín Satanás cuēchi siquī yō, chi je jíni váha yó ndese ndúcú un stáhú yóhó sáha yó cuéchi.

### *Jeē tu ní íyo nayúú ni Pablo ini ñuu Troas*

<sup>12</sup> Ná ni jehēn rī ñuu Troas jeē nácani rí jñūhun Jitoho yō Cristo, te váha ni sáha ya jeē ní íyo modo jeē nácani rí jñūhun ya.

<sup>13</sup> Te vēsú súcuan te tu ní íyo nayúú ni anuá rī, chi tu ní níjnáhan rí jíin hermano yō Tito. Yūcuán na te ni nacuatáhú rí nuū ñayuu yūcuán, te cuananducú rí de ichi Macedonia.

### *Jñūhun jeē kujéhu ndúú yó jíin Cristo*

<sup>14</sup> Te na cútahú yō nuū Yaā Dios, chi níni ndéca váha ya yohó cuángoo yó jíin Cristo Jesús, te ndúú yó jíin yá jeē kujéhu ndasí yá snāá yā poder ndíhi enemigo yā. Te jéjníñu ya yohó jéē scuité núu yó jñūhun ya tācá-ni lugar, nájñūhun jíte núu iin xicō asīn.

<sup>15</sup> Te cúu yó nájñūhun iin sūje jeē jeén asīn nuū Yaā Dios sáha Cristo. Te nájñūhun jeē jíinú xicō un núu ñayuu cácu ánuá jíin núu ñayuu jñahnū ndetū.

<sup>16</sup> Nuū ñayuu jñahnū ndetū chi cúu yó nájñūhun iin xicō jeē cúu i sáha, te nuū ñayuu cácu ánuá chi cúu yó nájñūhun iin xicō váha jeē cótecu i sáha. Te ni iin yó ma cánda yó sáha yó jniñu yáha, te núu ma chindéé ñáhán yá yohó.

<sup>17</sup> Te ruhū jijnáhan rí, tu cásáha rí nájñūhun cásáha cuehē tēe jeē cánducú de nihín de xūhun siquī jñūhun Yaā Dios. Chi sa cánacani ndaā rí jñūhun ya, chi máá Yaā Dios ni tají rúhū, te máá yá jíni jeē cánacani ndaā rí siquī jeē cácandíje rí Cristo.

### *Jñūhun siquī contrato jeé*

## 3

<sup>1</sup> Te jeē cácahān rī súcuan, ¿te á cájeni ni rō jeē cánducú tucu ri cahān rī jeē váha ga tēe cácuu rí, chí naún? ¿Te chí jíni ñúhún jéē steén rī carta recomendación nuū rō, chí jéē cacán rí cuáha ró núu rí jijnáhan rí, nájñūhun cásáha sava i?

<sup>2</sup> Tuú chí máá-ni ró cácuu nájñūhun iin carta recomendación rī. Te jeē ñūhun ni rī jeē ní cacandíje váha ró ni sáha rí, suu cúu nájñūhun jeē yosó jñūhun carta un iní anuá rī. Te ndíhi ñayuu chi nájñūhun cáhu i, cúu jeē jíni i ndese ni nasāma ró.

<sup>3</sup> Chi máá ró cácuu nájñūhun iin carta jeē ní tee Cristo te cáscáca rí. Te nasūu jíin tinta ni tee ya, chí sa suhva jíin Espíritu Yaā Dios, Yaā técu. Te nasūu núu tabla yuú nájñūhun ni tee ya ley yá, chí sa suhva nuū anuá ñayuu ni tee ya.

<sup>4</sup> Te cácahān rī súcuan, chí cácuáhnu ni rī Yaā Dios siquī jeē ní sáha Cristo.

<sup>5</sup> Te nasūu jéē cájeni ni rī jeē cúu canda máá rí sáha rí jniñu ún. Chi sa suhva máá Yaā Dios sáha jeē cuu squícu rí.



6 Te máá yá ni sáha jeē cuu cuajníñu vāha ri siquī contrato jeé yá. Te contrato yáha tu cáhán jeē squícu yó ley jeē ní tee jíin letra, chi sa suhva jeē caca yó jíin vida jeé, suu jeē ni jéhe Espíritu yā. Chi contrato ley jeē yosó jíin letra, jnahnū ndetū ñayuu sáha. Te jeē sáha máá Espíritu cúu jeē cótecu yó ní cání.

7 Te ley jenahán jeē ni jéhe ya nuū Moisés, ni yosó letra nuū tabla yuū. Te yōhyo ni kujéhnū, te ni ndindéé ndasí ni sáha, te nde Moisés ndí nuū de ni sáha. Te tu ní cúu coto vāha ñayuu Israel nuū de ni sáha. Te vēsú súcuan te cuéé-ni cuéé-ni ni ndahvā jeē ndíndēe núu de. Te núu súcuan ni kujéhnū ndasí ley jeē sáha jeē cuu ñayuu te jnahnū ndetū i,

8 te sa víhyá gā kujéhnū ndasí gá jñūhun cotecu yō jeē jéhe Espíritu nuū yō.

9 Chi núu yōhyo ni kujéhnū ley un jéē jnahnū ndetū ñayuu sáha, te sa víhyá gā kujéhnū jñūhun jeē ndáhva Yāā Dios cuēchi yó.

10 Chi ley un jéē ní kujéhnū nde saá, tuá kujéhnū cuiti, siquī jeē kujéhnū ndasí gá jñūhun Espíritu jeē iyó vijna.

11 Te núu súcuan ni kujéhnū ley jeē ni íyo jecu-ni tiempo, te sa kujéhnū ndasí gá jñūhun jeē coo ní cání.

12 Te jeē súcuan cáñuhun ni rī, jeē yúcuan cáñiyo téyí ni rī nácani ri jñūhun yáha.

13 Chi tu cásáha ri nájñūhun ni sáha Moisés jeē ní jesi de ñin sahma nuū de, náváha tú coto ñayuu Israel ndese cuandahvā jeē ní ndíndēe núu de.

14 Te ñayuu ún tu ní cájēcūhun ni i. Te nde vijna núu cácahu ñayuu Israel tutu contrato ley jenahán, suni tu cájēcūhun ni i, chi nájñūhun jési sahma un núu jeē níjnūní i, te tu cújiyo cuiti. Chi nde jeē candíje i Cristo, yūcuán na te cujiyo.

15 Te suni súcuan nde vijna núu cácahu i tutu ley Moisés, te nájñūhun jeē jési ñin sahma nuū jeē níjnūní i.

16 Te jeē násāma ini ñin ñayuu quiví i nuū maá Jítoho yō Cristo, yūcuán na te cújiyo-ni jeē jési ún.

17 Chi Jítoho yō cúu máá Espíritu. Te nuū íne Espíritu maá Jítoho yō, yūcuan cúu nuū iyó libre ñayuu jeē tuá yíhi i chíji ley jenahán.

18 Te jeē yúcuan máá yó jijnáhan yó, tuá jési nuū jeē níjnūní yō. Chi cácuu yó nájñūhun espejo jeē jéhe nduva, cúu jeē cájica ndaā yō te suu stéén ndese yōhyo luu kujéhnū máá Jítoho yō. Te máá yó taca quiví cuanasāma yó cuanduu luu ga anuá yō nájñūhun cáa máá yá. Chi máá Jítoho yō jeē cúu ya Espíritu, súcuan sáha ya jíin yó.

## 4

1 Núu súcuan te tu ndínuu ni rī cánacani ri jñūhun ya. Chi siquī jeē ní cundáhú ni yā ruhū jijnáhan ri te ni jéhe ya jniñu yáha nuū rī.

2 Te tu cásáha ri jniñu néé jéē cúcanu yō sáha, ni tu cájica cuu ri jíin jñūhun ndíchí stáhú, ni tu cásama ri jñūhun Yāā Dios. Chi sa suhva cácahān rī máni jñūhun ndaā. Te súcuan te cuu cuni taca ñayuu ini anuá i jeē cácahān ndaā ri jito jíinū Yāā Dios.

3 Te núu íyo ñayuu tu jécūhun ni jñūhun jnama ya yohó jéē cánacani ri, te súcuan cúu nuū máni máá ñayuu jnahnū ndetū.

4 Te jeē tu cácandíje i, te máá jéxeén jeē ndácu jniñu ini ñayiví yáha, ní jesi nuū jeē níjnūní i, náváha ma ndíndēe jñūhun Cristo ini anuá i, te ma cúni i jeē yóhyo luu kujéhnū Cristo, Yāā jeē ínuú cáa jíin Yāā Dios.

<sup>5</sup> Te jeē cānacani ri jnūhun, te nasūu jnūhun máá rí, chi sa suhva jnūhun Jitoho yō Jesucristo cānacani ri. Te máá rí chi cácuu ri mozo-ni nuū rō jijnáhan rō jéē siquí jeē maní rí jijn Jesús.

<sup>6</sup> Chi ná ni sáha Yaā Dios ñayīví te ni cahān yā jeē na cūndijin nuū nēē. Te suni súcuan ni sáha ya jeē ní cundijin nuū anuá yō jeē cájecūhun ni yō siquí Jesucristo, ndese ndíndēe nuū yā, cúu jeē yōhyo luu cújéhu ya nájnūhun cúu Yaā Dios.

*Jeē cándiquīn yō jnūhun cácandíje yó yá*

<sup>7</sup> Te tāca jnūhun yáha jeē yōhyo luu cújéhu, chi nájnūhun jeē ñūhun ini ñn quīsi ñuhun. Chi cácuu yó nájnūhun quīsi ñuhun, chi tú na fuerza yō. Te jeē yúcuan cájini vāha ri jeē maá Yaā Dios cúu jeē jéhe poder siquí jnūhun yáha jeē yōhyo luu cújéhu, te nasūu fuerza maá rí cúu.

<sup>8</sup> Te jeē yúcuan, vēsú tāca lado cájito ri jnūndóho, te tu sáha jeē ma ndúsī gā ni rī. Te vēsú cácuuhyá ni rī siquí jnūndóho, te cáñuhun ni rī jeē quee vāha jniñu rī.

<sup>9</sup> Te vēsú cájito xeēn ñayuu ruhū, te máá yá tu stóo ya ruhū jijnáhan ri. Te vēsú cánducú i snāá i ruhū jijn jniñu sáha ri, te ma cúu.

<sup>10</sup> Te ndé-ni cúu nuū cuángoo ri, te nájnūhun ni ndoho Jesús jeē ni jíhi yā, suni súcuan cándoho ri jeē jé yajni cuu rī, návāha suni cuu stéén rī fuerza Jesús jeē técu yā ini yiquí cúñu rī.

<sup>11</sup> Chi jeē niní cátecu rī, te tāca quíví je yajni cahni ñayuu ruhū jeē siquí Jesús. Te súcuan te cájito ñayuu jeē técu Jesús ini yiquí cúñu rī jeē cúu.

<sup>12</sup> Núu súcuan te ruhū jijnáhan ri, níní cúu jeē jé yajni cuu rī siquí jnūhun ya, te yúcuan sáha jeē cotecu maá rō ñí cáni jijnáhan rō.

<sup>13</sup> Te yósó nuū tútu ñi: Ni candíje ri te jeē yúcuan ní cahān rī, achí. Te suni jeē cácandíje máá rí cúu jeē cānacani ri jnūhun ya.

<sup>14</sup> Chi cájini rī jeē maá Yaā jeē ní nastécu Jitoho yō Jesús, suni súcuan nastécu yā ruhū, te sáha ya jeē ñn cáhnu ni cuiñi ndíhi yó nuū yā.

<sup>15</sup> Chi tāca jnūndóho yáha cándoho ri návāha coo vāha rō jijnáhan rō. Te súcuan te cayā cuehē gā ñayuu jeē sáha ya jeē vāha i. Yūcuán na te suni yōhyo cuehē i nacuatáhu i nuū Yaā Dios, te cújéhu ga yā sáha.

<sup>16</sup> Jeē yúcuan cúu jeē tu ndínuu ni rī, te vēsú cuandíhi fuerza yiquí cúñu rī, te sa suhva cuanduu fuerza gā anuá rī tāca quíví.

<sup>17</sup> Chi jnūndóho jeē ndóho yó ñayīví yáha, tú-ni xeēn cúu, te yachī yāha. Te sáha jeē niñn yō ñn tahū jeē cújéhu yó ñí cáni jeē cáa ndasí gā vēsú jnūndóho ún.

<sup>18</sup> Te tu táñuhún yó nuū tāca jnūndóho jito yó nuū vijna, chi sa suhva táñuhún yó nuū tāca jéē vāha jeē tu jito yó nuū vijna. Chi tāca jéē jito yó nuū vijna, chi yachī ndíhi, te tāca jéē tu jito yó nuū, chi coo ñí cáni.

## 5

<sup>1</sup> Chi yiquí cúñu yō jeē ndeē yó ñáyīví yáha, cúu nájnūhun ñn vehe jeē náá. Te cájini yō jeē núu na náá, te cuáha Yaā Dios ñn yiquí cúñu jeē, te suu cúu nájnūhun ñn vehe jeē coo ñí cáni ichi ándiví. Te nasūū ñn vehe jeē sáha ñayuu cúu, chi jeē sáha Yaā Dios cúu.

<sup>2</sup> Te niní jéē ndeē yó vehe yáha jeē cúu yiquí cúñu yō, te cájitū ni yō sáha, chi yōhyo cúní yō jeē núcūhun yó yiquí cúñu jeē yó nde andiví.

<sup>3</sup> Chi jeē núcūhun yó un, te ma cóo máá na anuá yō jeē náá yiquí cúñu yō yáha.

<sup>4</sup> Chi níní jéé iyó gá yō ini vehe yiqui cúñu yō yáha, te jítú ni yō te cúcuíhyá ni yō. Te nasūu jéé cuní yō jeē stóo yó yiqui cúñu yō te coo máá-ni ánuá yō. Chi sa suhva cúní yō nucūhun yó jéé jeé, návaha ndahvá yiqui cúñu yō jeé náá, te coo máá jéé cótecu níí cáni.

<sup>5</sup> Te Yaá Dios cúu jeē ni sáha ya jeē súcuan coo yó. Te ni jēhe ya Espíritu yā jeē cóndee ini anuá yō, te sáha Espíritu jeē iyó ndáá ni yō jeē cuáha Yaá Dios tahú yō.

<sup>6</sup> Núu súcuan te níní cúu jeē cácuacáhnu ni rī. Chi cájini rī jeē niní ndéé gá rī chīji yiqui cúñu yáha, te jíca cúu rī jíin núu ndéé máá Jítóho yō.

<sup>7</sup> Chi vijna chi cácuacáhnu rī jeē iyó yá jíin rí, vésú ná tu coto rī nuū yā.

<sup>8</sup> Te cácuacáhnu ni rī, chí sáha rī cuenta jeē váha ga núu na quénda rī chīji yiqui cúñu yáha te quihīn rī condee rī jíin máá Jítóho yō.

<sup>9</sup> Jeē yúcuan cúu jeē cánducú ndéyí rí sáha rī jeē cusī ni yā jíin rí, vésú núu ndéé gá rī yiqui cúñu rī chí vésú núu condee rī jíin yá.

<sup>10</sup> Chi cánuú jéé ndihí yó cuiñi yuhu mesa Cristo jeē sándaá yā jniñu yó. Te ná ñin ná ñin yó níhīn yō siquī ndese ni casáha yó, á jéé váha chí jéé neé, ná ni condee yō chīji yiqui cúñu yō.

### *Siquí jeé ndávicoo yó núu jnúhun maní Yaá Dios jíin yó*

<sup>11</sup> Núu súcuan te cándiso Iyo rī nuū máá Jítóho yō, te jeē yúcuan ndúcú ndéyí rí scandíje rī ñayuu. Te jíiní Yaá Dios jeē cáhīyo ndaá rī, te ñúhun ni rī jeē suni súcuan cájini máá ró.

<sup>12</sup> Te nasūu jéé cánducú tucu rī cahān rī jeē váha ga tēe cácuu rī, chí sa suhva cástūhun rī jeē cuu cusī ni rō jeé siquí rī jíinánhan rī. Te súcuan te cuu stío cuiñí rō nuū ñayuu jeé cutéyí i siquí ndese cáa ñayuu, te tu sáha i cuenta ndese cáa ini anuá ñayuu.

<sup>13</sup> Te va sanaa te cájeni ni rō jeé tēe loco cácuu rī jeē cácahān rī súcuan. Te siquí jeé cándihvī ni rī jēhē Yaá Dios cúu. Te tuú chí cáhīyo váha xinī rī, te jeé yúcuan cájēniñu rī jeé quéndōo váha ró.

<sup>14</sup> Chi siquí jeé ni cundáhú ni Cristo ruhū jíinánhan rī cúu jeé cánuú nacani rī jnúhun ya. Chi cájini váha rī jeé ni jíhī mañúhún-ni ya jeé siquí ndihí yó, te jeé yúcuan nájnūhun ni jíhī ndihí yó jíin yá.

<sup>15</sup> Chi ni jíhī yā jeé siquí ndihí yó návaha táca yó jéé técu, ma cótecu ga yō jeé sáha yó jéé cuní máá yó, chí sa suhva jeé cuní máá yá jeé ni jíhī yā te ni natecu yā jeé siquí yō.

<sup>16</sup> Jeé yúcuan tuá casáha rī cuenta ndese-ni cándāa ñayuu, nájnūhun casáha ñayuu ñayiví. Te vésú súcuan ni casáha rī cuenta siquí Cristo nde saá, jeé ñin tēe-ni cúu ya, te vijna chí cájini rī jeé cúu ya Sēhe Yaá Dios.

<sup>17</sup> Chi núu ñin ñayuu yāhi i ndaha Cristo, te je ni ndujeé i. Te táca modo neé ní neváha i, je ni yáha cuahān, te vijna je ni ndujeé ndihí.

<sup>18</sup> Te Yaá Dios cúu jeé sáha ndihí jeé yáha, chí jíin Cristo ni sáha ya jeé ní ndávicoo yó núu jnúhun maní yā jíin yó. Te ni tejníñu ya ruhū jeé cánacani rī jnúhun jeé ndávicoo ñayuu nuū jnúhun maní yā jíin i.

<sup>19</sup> Chi jíin Cristo te ni sáha Yaá Dios jeé ñayuu ñayiví ndávicoo i nuū jnúhun maní yā jíin i. Te tu ndácunehen ya cuēchi ni casáha ñayuu. Te ni tejníñu ya ruhū jeé cánacani rī jnúhun yáha ndese ndávicoo i nuū jnúhun maní yā jíin i.

<sup>20</sup> Núu súcuan te cácuu rī tēe cájica jniñu máá Cristo. Te jeé cahān rī, te nájnūhun jeé máá Yaá Dios cahān ndahú yá jíin ró. Núu súcuan te cácahān

ndahú rí jíin ró jeē cahán Cristo, jeē na ndáivicoo ró núū jnúhun manī Yaā Dios jíin ró.

<sup>21</sup> Te Cristo, vēsú tú ni ñin cuēchi ya, te ni sáha Yaā Dios jeē ní nucondee cuēchi yó síquī yā. Te súcuan te yóhó jéē yíhi ndaha Cristo, ni nucondee síquī yō jeē iyó ndāā yō nájñuhun iyó ndāā Yaā Dios.

## 6

<sup>1</sup> Núū súcuan te síquī jeē cácuu ri tēe cásájniñu jíin yá, te cácahān ndahú rí jíin ró jeē ma stóo uun ró jnúhun jeē ni sáha Yaā Dios jeē váha róhó.

<sup>2</sup> Chi áchí yá nuū tútu ñi:

Máá tiempo cuní maá rí te cuni sōho rí jnúhun cáhān ndahú ró jíin rí.

Te máá tiempo jnáma rí ñayuu, te jnama ri rohó.

Achí yá. Te vijna-ni cúu máá tiempo jeē cuní yā, chi vijna-ni cúu tiempo ni quiñi Yaā jnáma yóhó.

<sup>3</sup> Te cánducú rí jeē ma sáha ri ni ñin jniñu jeē casi jeē candíje ñayuu, návaha ma cahán i síquī jniñu ndíso ri.

<sup>4</sup> Chi sa suhva cánducú rí jeē ndihi jeē sáha ri, steén jeē cácuu ri tēe cájejníñu nuū Yaā Dios. Jeē yúcuan cájendeyí ni rí jíin jéē ndóho ri jnúndóho, jíin jéē cúmanī nuū rí, jíin jéē yí sáha jíin rí.

<sup>5</sup> Chi ni iyo tijni jínu jeē ní cacani i ruhū, jeē ní cachune i ruhū vecāa, jeē ní candonda i síquī rí, jeē ní cásájniñu ñihin rí, jeē ní cajehni rí mähna máá rí, jeē ní cahíyo ndite ni rí.

<sup>6</sup> Te suni cánducú rí jeē cuajnúhún i ruhū síquī jeē ndoo cájica ri, te cájecūhun váha ni rí jnúhun ndāā, te cáhíyo paciencia ni rí, te váha ni rí, te ndéé Espiritu Santo ini rí, te cákundáhú ndije ni rí jnáhan ri.

<sup>7</sup> Te cáncani ndāā rí jnúhun, te poder Yaā Dios íne jíin rí. Te jíin jnúhun ndāā cándahva rí táca jniñu néé, chi nájñuhun jeē cájejnáhan ri síquī. Chi nájñuhun jeē ndónnda un síquī rí te ndónnda ri síquī.

<sup>8</sup> Iyó jínu yíñúhún ñayuu jíin rí, te iyó jínu tuú. Iyó jínu jéjnúhún i ruhū, te iyó jínu cácahān i síquī rí. Iyó jínu cácahān i jeē tēe stáhú cácuu ri, te iyó jínu cácahān i jeē tēe ndāā cácuu ri.

<sup>9</sup> Iyó jínu cásáha i nájñuhun jeē tu jíin i ruhū jijnáhan ri, te iyó jínu jeē jiní váha i ruhū. Iyó jínu jeē cuní ñayuu cahni i ruhū, te cátecu nahin rí. Te vēsú cástóho i ruhū, te tu cájihí rí sáha.

<sup>10</sup> Te vēsú iyó jéē cácuuñhyá ni rí, te níni cácusñi ni rí. Te vēsú tēe ndáhú cácuu ri, te sácúca rí cuehē ñayuu jíin jnúhun ya. Te vēsú tú na vé cánevāha ri, te jíin máá yá te ndihi-ni cúu jeē cánevāha ri.

<sup>11</sup> Hermano ñuu Corinto, súcuan cúu jeē cácahān cají rí jíin ró jijnáhan ró, chi síquī jeē maní rí jíin ró, jeē yúcuan cáchí ndihi ri ndese cándoho ri.

<sup>12</sup> Máá rí jijnáhan ri cácahān cají rí síquī jeē maní ndasí rí jíin ró, te máá ró jijnáhan ró sanaa te tu súcuan cúu.

<sup>13</sup> Nájñuhun cáhān tatá jíin séhe, súcuan cáhān ndahú rí jíin ró jeē nájñuhun iyó mání rí jíin ró, súcuan na cóo maní tucu ró jíin rí.

### *Siquí jeē cúu yó templo Yaā Dios*

<sup>14</sup> Ma quívi nduu ró jíin jniñu néé cásáha ñayuu tu cácandíje, chi ma cúu coo inuú ró jíin i. ¿Chi ndese cuu quiñáhan jniñu cásáha ñayuu ndāā jíin jniñu cásáha ñayuu tú ndāā? ¿Te ndese cuu coyúcú inuú ñayuu cájica jíin luz yā jíin ñayuu cájica nájñuhun nuū néé?

15 ¿Ndese cuu coo inuú ni Cristo jín Satanás? ¿Te ndese cuu cuiñi cáhnu ñayuu cácandíje jín ñayuu tu cácandíje?

16 ¿Te ndese cuu quijnáhan templo Yaā Dios jín ídolo? Chi máá ró cácuu templo Yaā Dios, Yaā tēcu, chi ndée yá ini anuá rō, nájñuhun ni cahān yā:

Condee rī ini i te caca cuu ri mēhñú i,  
te cuu ri Yaā Dios maá i,  
te cuu i ñayuu maá rí.

17 Te jeē yúcuan ní cahān gā yā:

Ma quívī nduu rō jín jñiñu néé cásaha i,  
te cusñín ró jijnáhan ró, áchí Jítoho yō.  
Te ma jñí ró tāca jée tú ndaā.

Yūcuán na te naquihin ri rohó,

18 te cuu ri Tatá rō jijnáhan ró,  
te cuu ró séhe yí rí jín séhe síhí rí,  
áchí Jítoho yō, Yaā jñí ndihí poder.  
Achí tutu.

## 7

1 Núu súcuan, ñānī mánī, cánevāha yó tāca jñuhun yáha jée ni jéjñuhun ya. Jeē yúcuan na sándoo yó máá yó tāca jée sajnéhén yiqui cúñu yō jín ánuá yō. Te na cónso Iyo yó núu Yaā Dios, te coo ndoo coo ñi yō nuú yā jín ndihí jñiñu cúní yā.

*Jeē ní canacani ni ñayuu Corinto siquī cuéchi i*

2 Coo manī rō jín rí jijnáhan ró víi. Chi tu ní sáha ri falta nuú ní ñn ró, te tu ní stívī rí anuá ní ñn ró, te ní ñn ró tu ní stáhú rí.

3 Te nasūu jée nducú rí cahān rī nuú rō cúu jeē cahán rī súcuan, chi je ni cahān rī jeē yóhoyo manī rī jín ró. Te níñí ñuhun ni rī rohó, vésú cuu yō chí cotecu yō.

4 Te cúcáhnu ndasí ni rī rohó jijnáhan ró, te cúsñī teyí ni rī jeē siquí rō. Te vésú cájito ri tāca jñúndóho yáha, te íyó ndeyí ni rī te cúsñī ndasí ni rī jeē siquí rō.

5 Ná ni jengoo ri Macedonia te tu ní Iyo nayúú ni anuá rī, chí sa suhva yí ní Iyo jñúndóho jín rí tāca lado. Chi ni Iyo jeē ní castáhān jñáhan jín rí, te ni cayūhu rí sanaa te caca yátá ñayuu cácandíje.

6 Te Yaā Dios jeē sáha jeē ndúndeyí ni ñayuu cácuuíhyá ni, ni sáha ya jeē ní candundeyí ni rī, chí ní quiji Tito ní sáha ya.

7 Te ni candusñī ni rī, nasūu máá ñn-ni siquī jeē ní quiji de, chi suni jeē ní ndundeyí ni de ni casáha ró. Chi ni castühún de jeē cáñuhun ni rō coto tucu ró rúhū, jín jée cácuuíhyá ni rō jeē siquí cuéchi ró, jín jée cánacani ni rō jehé rī. Te jeē yúcuan ní cusñī gā ni rī.

8 Te carta jeē ní tají rí nuú rō, vésú ni sáha jeē ní cacucuíhyá ni rō, te tuá nácani cuíhyá ni rī jeē ní sáha súcuan. Chi vésú ni cucuíhyá ni rī saá, te vijna te tuá, chí jíñí rī jeē jecu-ni quívī ni cacucuíhyá ni rō ni sáha.

9 Te vijna te cúsñī ni rī, te nasūu siquī maá jée ní cacucuíhyá ni rō. Chi cúsñī ni rī jeē ní jéjñiñu jeē ní cacucuíhyá ni rō, chí ní sáha jeē ní canacani ni rō siquí cuéchi ró. Chi ní cacucuíhyá ni rō nájñuhun cúní maá Yaā Dios, te nasūu jée ní sáhuhū rī rohó.

10 Chi núu cucuíhyá ni yō nájñuhun cúní Yaā Dios, te suu sáha jeē nácani ni yō siquí cuéchi yó te jnama ya yohó, te ma cóo ga jeē nácani cuíhyá ni yō. Te jeē cácuuíhyá ni ñayuu tu cácandíje, tu jéjñiñu jeē nácani ni i, chí sa jnahnū ndetū i.

<sup>11</sup> Te ni cacucuíhyá ni rō nájñuhun cúní Yaā Dios, te vijna te cájito ró náa vāha ni jejnīñu. Chi ni canacani ndasí ni rō ni sáha, te ni canducú ró jeē quéndō ndaā rō, te ni cacuxeēn rō nuū téē ni sáha cuēchi, te ni cayūhu ró jeē ní castívi ró nuū yā. Yūcuán na te yōhyo ni cacuni rō coto tucu ró nuū rī, te yōhyo ni candihvī ni rō ni cacuxeēn rō nuū téē ni sáha cuēchi ún. Te súcuan ni castéēn rō jeē tú cuēchi ró, chí tu ní cájejnūhún ró cuēchi ni sáha téē ún.

<sup>12</sup> Te jeē ní tee ri carta un, nasūu máá-ni jeē cúxeēn rī nuū téē ni sáha cuēchi ún, ni nasūu máá-ni jeē cahán rī jehē téē ni ndoho ni sáha de. Chi sa suhva ni tee ri nāvāha nucūhun ni rō ndese yōhyo ni canacani ni rō jehē rī jito jínúú Yaā Dios.

<sup>13</sup> Jeē yúcuan ní candusī ni rī jeē siquī rō.

Te vihyá gā ni cacusī ni rī jeē ní jini rī jeē cúsi ni Tito, chi ni nduu nayúú ini de ni casáha ró.

<sup>14</sup> Chi je ni cahán rī jín de jeē cúsi ni rī jeē váha ñayuu cácuu ró, te vijna te tu ní quéndō rī jñuhun canu jeē siquī rō. Chi nájñuhun ni cajini ró jeē iyó ndáā táca jñuhun ni cacahán rī jín ró, suni súcuan ni cundaā jñuhun ni cacahán rī jín Tito jeē cúsi ni rī siquī rō jeē váha cáscuú ró.

<sup>15</sup> Te vihyá gā manī de jín ró vijna jeē ñuhun ni de jeē váha ni cajetáhú ró jeē cahán de, te ni cahīyo yíñúhún ró ni candiso Iyo ró nuū de.

<sup>16</sup> Núu súcuan te cúsi ni rī siquī jeē cucáhu ndasí ni rī rohó jijnáhan ró.

### *Jeē na cúsi ni i socō i cuehē*

## 8

<sup>1</sup> Hermano, vijna te suni cácuni rī castūhun rí nuū rō jijnáhan ró ndese cuehē jeē váha ni sáha Yaā Dios jín ñayuu cácandíje cáyucú Macedonia.

<sup>2</sup> Chi vésú yōhyo ní jito ndee jñúndóho i, te suni yōhyo ni cacusī ni i jín jñuhun ya. Te vésú ñayuu ndahú ndasí cácuu i, te yōhyo váha ni cajequin i cuehē xūhun jéē cúu ñayuu ndahú cácandíje.

<sup>3</sup> Chi cúu ri testigo jeē ní cacusī ni máá i ni cajēhe i ndésaa ni canda i, te nde vihyá gā ni cajēhe i.

<sup>4</sup> Chi ni cacahán ndahú ndasí i jín rí jeē na cuáha ri jñuhun chindéé ñáhán i jín yó cuáha i xūhún cuu hermano cándoho ndahú.

<sup>5</sup> Te vihyá gā ni casáha i vésú jeē ní cajeni ni rī, chí xīhna gā ni casocō i máá i nuū Jítoho yō, te sáa te ni cajēhe i máá i sáha i táca jéē cácuni rī, ndihí ndese núnjahan ni Yaā Dios.

<sup>6</sup> Te jeē súcuan ni casáha ñayuu Macedonia, te ni castíhvī ni rī Tito jeē na jéē tucu de nuū máá ró, sáha de jeē jīnu jniñu jeē ni squéjéē de jín ró jeē suni caquin rō cuehē xūhún cuu ñayuu ndahú.

<sup>7</sup> Chi máá ró yōhyo váha casáha ró táca-ni, chí váha cácandíje ró, váha cánacani ró jñuhun, váha cájecūhun ni rō, váha cándihvī ni rō, váha manī ró jín rī jijnáhan rī. Núu súcuan te suni cánuú sáha váha ró jniñu yáha jéē cuáha ró jéē cúu ñayuu ndahú.

<sup>8</sup> Te nasūu jéē cuní rī ndacu ri jniñu nuū rō, chí sa cástūhun rí nuū rō ndese yōhyo cácusī ni sava ga ñayuu jéhe i xūhún, te súcuan te cuni rī jeē suni máá ró cácundáhú ndije ni rō ñayuu ndahú.

<sup>9</sup> Chi je cájini rō ndese yōhyo váha ni Jítoho yō Jesucristo jín yó. Chi siquī jeē ní cundáhú ni yā rohó te ni nasáha ndahú yá máá yá, vésú cucá ndasí yá nde andiví núú. Te súcuan ni sáha ya jeē cácucú cá ró ndihí jeē ndiso jñuhun ya, siquī jeē ní nasáha ndahú yá máá yá.

<sup>10</sup> Te jeē váha máá ró cúu jeē na cáchi rī ndese jéni ni rī siquī jniñu yáha. Váha ni caquejéé ró nde jendujin, chi nasūu máá-ni jeē ní cajequin rō xūhún, chi suni yōhyo ni cacusiñ ni rō sáha ró.

<sup>11</sup> Núu súcuan te vijna te sínu ró. Te nájnūhun ni cacusiñ ni rō ni caquejéé ró jín, suni súcuan na cúsiñ ni rō sínu ró, chi cuáha ró núu ndese cánevāha ró.

<sup>12</sup> Chi núu cúsiñ ni yō cuáha yó, te jetáhu yá núu ndese névāha yó, chi tu jícan yá jeē cuáha yó jéé tu névāha yó.

<sup>13</sup> Te nasūu jéé cahán rī jeē cáhni ndahú ró máá ró jeē cáa ga nihīn i vēsú jeē ndóo nuū máá ró.

<sup>14</sup> Chi sa suhva jeē ĩn cūhva-ni coneváha ró jín i. Chi cánevāha cuehē rō vijna, te cuu cuáha ró jéé cúmanī nuū i. Yūcuán na te núu ndé ĩn quivī coneváha i, te suni cuu cuáha i te núu ni cumanī nuū rō. Te súcuan te ĩn cūhva-ni coneváha ró jínáhan ró,

<sup>15</sup> nájnūhun cáhán tutu ĩ siquī ñayuu jeē ní canastútú maná nde jenahán: Tēe jeē ní nastútú cuehē, tu ní ndóo ga nuū de. Te tēe jeē ní nastútú jecu-ni, suni tu ní cúmanī nuū de. Achí tutu.

### *Jnūhun Tito jín uū gā jnáhan de*

<sup>16</sup> Te na cútahū rī nuū Yaā Dios jeē ni sáha ya jeē ndihví ni Tito jehē rō nájnūhun cándihví ni máá rí.

<sup>17</sup> Chi ni jetáhu de jeē ní cacahán rī jín de jeē jeé de nuū rō. Te siquī jeē ndihví ni de jehē rō, jeē yúcuán cuájeē de, chi súcuan cúu ni máá de.

<sup>18</sup> Te suni cátají rī ĩn hermano cuajeē jín Tito nuū rō. Te tāca grupo ñayuu cácañde cájejnūhún i tēe un jéé váha jéjnīñu de siquī jnūhun jeē jnáma ya yohó.

<sup>19</sup> Te tāca grupo ñayuu cácañde suni ni catee i jniñu siquī de jeé cáca de jín rí chindéé ñáhán de quindēca de xūhun jín rí jeē ní cajēhe ñayuu. Te jniñu yáha cása ha rí návāha cahán ñayuu jeē yóhyo váha Yaā cúu máá Jítoho yō, chi cuni i ndese yōhyo cacusiñ ni rō cásocō rō xūhún.

<sup>20</sup> Te quingoo ndindúú rí návāha ni ĩn ñayuu ma tēe i cuēchi siquī rī siquī xūhun cásocō ñayuu.

<sup>21</sup> Chi ndúcú rí jeē squícu ndaā rī tācá jniñu, nasūu máá ĩn-ni nuū Yaā Dios, chi suni nuū ñayuu.

<sup>22</sup> Te suni cátají rí ĩnga hermano yō cuajeē de jín ndindúú tēe yáha. Te tijni jínu ni steén de jeē yóhyo cúsiñ ni de ndihví ni de tācá jniñu. Te vijna chi ndihví gā ni de jehē rō, chi cúcáhu ndasí ni de jeé cásquícu rō.

<sup>23</sup> Te núu cácajnūhún ñayuu siquī Tito, te achi rō jeē cúu de tēe chindéé ñáhán jéjnīñu jín rí nuū rō siquī jnūhun ya. Te uū gā hermano yō yáha, achi rō jeé cácuu de tēe jeē ní catejnīñu ñayuu cácañde, te cáhiyo yíñuhún de nuū Cristo.

<sup>24</sup> Núu súcuan te stéén rō nuū de jeē cáhiyo manī ndije ró jín de, návāha na cúni tāca grupo ñayuu cácañde. Te súcuan cuni i jeē tu ní cácusīñ cáhá ni rī siquī rō.

### *Siquī jeé cájequin i xūhún cuu tācá hermano*

## 9

<sup>1</sup> Te vijna te tuá jíni ñūhún tee ri nuū rō siquī xūhun jeē cájequin rō cuu tācá hermano cándoho ndáhú.

<sup>2</sup> Chi je jíni rí jeé cácnujanhan ni rō cuáha ró. Te jeē yúcuán máni cúsiñ ni rí cahán rí jín ñayuu Macedonia jeē rohó ñayuu Acaya, je ni casátūhva ró xūhun ndé jendujin. Te jeē súcuan ní cacusiñ ni máá ró, te jeē yúcuán cuehē ñayuu Macedonia ni cacondihví ni i ni cajēhe máá i.

<sup>3</sup> Te táji rí ndinúní hermano yáha cuájeē maá de nuū rō xīhna gā, návāha jeē jinú maá rí te ma quéndōo neé rí siquī jnūhun ni cahān rī jeē squícu vāha ró jíin jniñu ún. Chi coo tūhva ndije ró jíin xūhun nájñūhun ni cahān rī jíin i.

<sup>4</sup> Chi sanaa te jecoo jecu tēe Macedonia jíin rí, te núu cuni de jeē tu cáhīyo tūhva ró, te coo jnūhun canu nuū rī, te suni nuū maá ró jijnáhan ró, chi ni cahān teyí rí jeē cáhīyo tūhva ndije ró.

<sup>5</sup> Jeē yúcuān ní jeni ni rī jeē cánuū cahān rī jíin táca hermano yáha jecoo de xīhna gā, te sáa te jinū rī, návāha stūhví ni de rōhó jēē yáchī na cóo tūhva xūhun jēē ní cacahān rō jeē cuáha ró. Te súcuān te coo tūhva siquī jeē váha ni rō, te nasūu jēē safuerza rī rohó.

<sup>6</sup> Cocuhun ni rō jnūhun yáha, jeē núu jecu-ni cuāha ró te suni jecu-ni nanihīn rō: Chi tēe jeē tihlí-ni táji, suni tihlí-ni nastútú. Te tēe jeē táji cuehē, suni cuehē nastútú. Achí tutu.

<sup>7</sup> Tācá ñn rō cuāha ró ndésaa ni tee ni rō. Ma cúxī ni rō cuāha ró, chi nasūu fuerza cúu. Chi Yaā Dios manī yā jíin ñáyuu jeē cúsi ni cuāha.

<sup>8</sup> Te máá Yaā Dios cuu sáha ya jeē nducuehē ndinuū jeē váha cuu ró jijnáhan ró, návāha níni coneváha ró ndihi táca jeē jíini ñhún ró, te coo sobra gā jeē cuāha ró jēē cúu táca jniñu váha.

<sup>9</sup> Chi súcuān cáhān tutu i siquī táca ñáyuu jéhe: Ni scáa i ni jēhe i nuū ñáyuu ndahú.

Te táca jniñu váha sáha i, chi quéndōo ní cáni. Achí tutu.

<sup>10</sup> Te Yaā Dios jéhe ya tata nuū tēe táji, te nihīn de staā jeē cáji de. Te suni súcuān cuāha ya ndinuū jeē váha cuu ró, te sáha ya jeē cáyā te nducuehē jniñu váha cása ha ró.

<sup>11</sup> Súcuān cucúca ró jíin táca-ni, návāha cuu cuāha cuehē rō. Te xūhun jēē cuáha ró quíhīn nuū hermano cándoho ndahú, suu sáha jeē nácuatáhú i nuū Yaā Dios.

<sup>12</sup> Chi xūhun jēē cuáha ró núu i, nasūu máá ñn-ni jeē nihín i jeē cúmanī nuū i, chi suni sáha jeē nácuatáhú ndasí i nuū Yaā Dios.

<sup>13</sup> Te cahān i jeē yóhoyo váha Yaā cúu Yaā Dios, chi xūhun jēē ní cajēhe ró stéén jeē váha cácañje ró jnūhun Cristo. Te suni sáha jeē cahān i jeē yóhoyo cújéhnu Yaā Dios siquī jeē ní cajēhe cuehē rō nuū i jíin núu sava ga ñáyuu.

<sup>14</sup> Te suni cacān tahú i jehē rō, chi coo manī ndasí i jíin ró siquī jeē yóhoyo váha ni sáha Yaā Dios jíin ró.

<sup>15</sup> Te na cútahū yō nuū Yaā Dios, chi ni jēhe ya Sēhe ya nuū yō, jeē cúu ñn tahú cáhnu ndasí jēē ma cánda cuiti yō castūhún ndihi yō.

*Jeē ndiso jniñu Pablo cúu de apóstol*

## 10

<sup>1</sup> Te ruhū Pablo, cáhān ndahú rí jíin ró jijnáhan ró jíin modo maá Cristo jeē vitā ni yā te vāha ni yā. Ruhū, chi cácahān rō jeē iyó suchí ni rī núu ndéé rí jíin ró, te núu ndéé jíca rí te tu yúhú cuiti rī cahān nihīn rí jíin ró, cácahān rō.

<sup>2</sup> Núu súcuān te cáhān ndahú rí jíin ró jeē núu na jéé rí te ma cahān rō jnūhun jeē sáha jeē cuxeēn rī nuū rō. Chi sava ró cácahān jeē casáha rí jniñu ya siquī jeē máni jeē na nihín rí siquī ún. Núu súcuān te iyó tūhva rí cuxeēn rī nuū ñáyuu cácahān súcuān.

<sup>3</sup> Chi vésú cácuu rí ñáyuu cáyūcú ini ñayiví, te tu cájejnáhan rí modo cájejnáhan ñáyuu ñayiví. Chi nájñūhun jeē cájejnáhan rí siquī táca jniñu neé.



<sup>4</sup> Chi nasū ndajniñu ñayivi jéjniñu ri cájejnáhan ri, chi jín poder Yaā Dios cájejnáhan ri snāā rī tāca fuerza jeē cúu contra siquī yā.

<sup>5</sup> Súcuan cásnāā rī tāca jnúhun ndúxi jín jnúhun téyi jeē nducú casi jeē ma cúní ñayuu ndese Yaā cúu Yaā Dios. Te cájesi ri nuū ndihi jeē tú vāha jeē cájeni ni ñayuu, návāha cuandetū i nuū Cristo.

<sup>6</sup> Te jeē jínu cuandetū vāha máá ró, yūcuán na te coo tūhva ri cuāha ri castigo nuū tāca gā ñayuu jeē tu cájendetū.

<sup>7</sup> Máá ró jijnáhan ró máni cájeni ni rō modo ñayuu tu cájecūhun ni. Núu na-ni tēe jéni ni de jeē Cristo ni tejniñu ya de, te na sáha de cuenta jeē suni súcuan ni tejniñu ya ruhū jijnáhan ri.

<sup>8</sup> Te núu ni cahān téyi rí jín ró jeē ndíso jniñu ri, te tu cúcanu rī sáha. Chi máá Jítoho yō ni tejniñu ya ruhū jijnáhan ri, návāha sáha ri jeē ije ánuá rō jín jnúhun ya, nasūu jēe snāā rī.

<sup>9</sup> Núu súcuan te tu cúní rī jeē cáni ni rō jeē nducú rí siúhú rí rohó jín carta rī.

<sup>10</sup> Chi cácahān sava ró jēe tāca carta rī yōhyo stíhvi ni te nihin ndácu jniñu, te sa suhva núu ndéé rí jín ró te tu cúndeyi ni rī ndacu nihin ri jniñu, te suni tu cúu cahān vāvihí rí, achí ró.

<sup>11</sup> Te ñayuu cácahān súcuan na sáha i cuenta jeē nájnūhun nihin cáhān carta rī jeē íne jíca rí, suni súcuan nihin ndacu ri jniñu nuū rō jeē cóndee rí jín ró.

<sup>12</sup> Te va ma chúndeyi cuiti ni nde ri jeē sajeñnu ri maá rí, nájnūhun cásaħa sava tēe un jēe cájejnúhún nde de máá de. Tāca tēe ún chi cáacunéé de jeē cájeni ni de jeē cujeñnu ga de vésú jnáhan de, te tu cásaħa de cuenta ndese cúní Yaā Dios jeē caca de.

<sup>13</sup> Te ruhū jijnáhan ri, chi cutéyi nde ri maá cúhva-ni jniñu jeē ni jéhe Yaā Dios nuū rī, te ma yáha ga rī. Máá Yaā Dios ni tee cúhva yá ndésaa cúu jeē sáha ri, te máá yá ni jéhe jnúhun jeē ni jínū rī nuū rohó ñáyuu ñuu Corinto.

<sup>14</sup> Jeē yúcuán ná ni jinūcoo ri nuū rō jeē xíhna ñúhún te nasūu jēe ni yáha ri nuū cúhva jniñu ní jéhe ya nuū rī. Chi xíhna gā maá rí ni jinūcoo nuū rō ni canacani ri jnúhun vāha Cristo.

<sup>15</sup> Te tu cácutéyi rí siquī jniñu ní casáha inga tēe, nájnūhun jeē jniñu máá rí cúu. Chi sa suhva cáñuhun ni rī jeē cuehē gā candíje ró, te súcuan te cuu sáha ri cuehē gā jniñu ya mēhñu ró, te níni máá cúhva jeē ni jéhe ya nuū rī.

<sup>16</sup> Yūcuán na te cácuni rī scuité núu ga rī jnúhun jnáma ya yohó núu tāca gā ñuu yúcu ndé yúcuán gā. Te súcuan te ma quívi nduu rī cutéyi rí nuū jeē jé ni canacani inga tēe jnúhun.

<sup>17</sup> Te núu ndé tēe cúní de cutéyi de, na cutéyi de siquī jeē sáha máá Jítoho yō, nasūu siquī jēe sáha máá de.

<sup>18</sup> Chi nasūu tēe jeē jejnúhún máá cúu jeē quéndō yíñúhún, chi sa suhva tēe jeē jejnúhún máá yá.

*Jeē cahán Pablo siquī tēe cánacani jnúhun stáhu*

## 11

<sup>1</sup> Cone cáhnu ni rō jijnáhan ró jeē cahán rī jecu jnúhun modo nájnūhun cácahān ñayuu canéé. Núu súcuan te cáhnu coo ni rō ví.

<sup>2</sup> Chi cúcuñí rí jehē rō jijnáhan ró, nájnūhun cúcuñí Yaā Dios. Chi cácuu ró nájnūhun ñn sūchi síhí íyó ndoo, te ni sáha ri jeē quijnáhan ró jín Cristo, nájnūhun quijnáhan ñn sūchi síhí jín máñúhún-ni yí i.

<sup>3</sup> Te yúhú rí sanaa te cuāha ro jnúhun stáhú táca tée un róhó, te siáá rō jnúhun jeē chiñúhún ndáa rō Cristo nde jín ini jín ánuá rō. Chi suni súcuan ni sáha Satanás jín Eva, chi ni quiví ini in coō, te ni stahú un ña jín jnúhun ndíchí stáhú.

<sup>4</sup> Chi núu quíjicoo tée nuū rō jeē tu cánacani ndaā de jnúhun Jesús nájñuhun ni canacani ri nuū rō, te va yóhyo vāha cájetáhú nde ró de. Te suni súcuan vāha cájetáhú nde ró núu inga espíritu jín núu inga jnúhun jeē tu quíjnahan jín Espíritu jín jnúhun jeē ní cacandije ró jéē jnáma ya rohó.

<sup>5</sup> Te táca tée cácan dije ró un jéē cácahān jeē apóstol cujéhnu ga cácuu, tú cuiti jeē cujéhnu ga nde de nuū rí.

<sup>6</sup> Chi vésu tu níhín vāha nde ri modo cahān rí, te jécūhun vāha ni rí. Chi jín ndihí jniñu ni casáha ri mēhñu ró ni castéén cají rí nuū rō jeē súcuan cúu.

<sup>7</sup> Tu ní jícán rí xūhun núu rō siquí jeē ní nacani ri jnúhun jnáma ya yohó. Te súcuan ni cotecu ndahú rí návāha quendōo vāha ga maá ró jín jnúhun ya. ¿Te va cuēchi ni sáha ri jeē ni sáha ri súcuan, chí naún?

<sup>8</sup> Chi sava ga grupo ñayuu cácan dije ni quihín ri xūhun jéē ní cajēhe i nuū rí, návāha súcuan-ni nacani ri jnúhun ya nuū rō jijnáhan ró.

<sup>9</sup> Te ná ni condee rí jín ró te ni ndihí xūhun rí, te tu ní jícán cuiti rí nuū ní in ró. Chi hermano jeē ní quijicoo ichi Macedonia ni cajēhe de nuū rí jeē cúmaní. Te jeē súcuan tu ní stáhān rí rohó, te ni ma sáha cuiti rí.

<sup>10</sup> Te nájñuhun cúcáhnū vāha ni rí jeē jini rí jnúhun ndaā Cristo, suni súcuan jini rí jeē ma quihín ri xūhún nuū ni in ñayuu ni ndáñū Acaya, návāha ma cási i jeē cúsiñ rí rí jeē súcuan-ni nácani ri jnúhun ya.

<sup>11</sup> ¿Te á siquí jeē tú maní rí jín ró cúu jeē cahán rí súcuan, jéni ni rō, chí naún? Tuú chi máá Yaā Dios jini yā jeē maní rí jín ró jijnáhan ró.

<sup>12</sup> Te sáha ri ná-ni sáha ri, chi ma quihín ri xūhun ró, návāha casi rí nuū jeē casatéyí tée un máá de jeē cácahān de jeē inuú casáha de jniñu ya jín rí.

<sup>13</sup> Te tēe ún chi nasū apóstol ndaā cácuu de, chí máni máá jnúhun stáhú cácahān de, te casáha de máá de jeē cácuu de apóstol Cristo.

<sup>14</sup> Te tu náa ni yō jito yó jéē casáha de súcuan, chí je jini yō jeē suni Satanás násama máá te stáhú jéē sáha máá nájñuhun in ndajéhé Yaā Dios jeē jica jín luz yā.

<sup>15</sup> Te jeē yúcuan suni tu náa ni yō jito yó jéē téē cájejniñu nuū Satanás, casáha de máá de jeē téē ndaā cácuu de. Te in quiví te nanihín de siquí jniñu néē casáha de.

### *Jnūndóho ni ndoho Pablo siquí jeē cúu de apóstol*

<sup>16</sup> Inga jinu cáhán rí jín ró jeē ni in ró ma cáni ni rō jeē téē cánéé cúu ri. Te núu súcuan cájeni ni rō, te va cuatáhú nde ró jéē cahán rí nájñuhun téē cánéé, návāha suni cuu cutéyí nde ri jecu nájñuhun casáha téē un.

<sup>17</sup> Jeē cahán rí vijna chi nasūu jéē ní ndacu máá Jítoho yō cúu, chí sa nájñuhun téē cánéé cáhán rí jeē cutéyí nde ri.

<sup>18</sup> Chi cuehē de casatéyí de máá de modo jeē iyó ini ñayiví, te suni súcuan na satéyí nde ri máá rí núu súcuan.

<sup>19</sup> Te va téē cáhíyo cají xíní cácuu nde ró, te jeē yúcuan cúu vāha ni nde ró cuatáhú ró in téē cánéé núu súcuan.

<sup>20</sup> Chí va vāha-ni cájendeyí ni rō nuū téē un jéē casáfuerza de róhó cuajniñu ró núu de, chí casáha de jeē ndundáhú ró, chí cáquende de ndajniñu ró, chí casájéhnu de máá de nuū rō, chí ndé cácatu de nuū rō.

21 Te vēsú cūcanu nde ri cahān rī, te na cāhān rī jeē tu ní cūndeyí ni nde ri satéyí rí maá rí nájñūhun casáha tēe ún.

Te vijna te núu íyó sava tēe chūndeyí ni de sātéyí de máá de, te va suni chundeyí ni nde máá rí núu súcuan. Te va cāhān rī nájñūhun cāhān ìn tēe cánéé.

22 Núu cácutéyí de jeē tēe hebreo cácuu de, te suni súcuan ruhū. Núu tēe Israel cácuu de, te suni ruhū. Núu yucūn Abraham cácuu de, te suni ruhū.

23 Núu tēe cájejniñu nuū jñūhun Cristo cácuu de, te víhyá gā ruhū. Te va cāhān rī nájñūhun tēe cánéé jēe cutéyí rí súcuan. Chi ni caa ga ni sájñiñu ri vēsú maá de jññáhan de, te ni caa ga ni cacani i ruhū, te cuehē gā jínu ni ine ri vecāa, te suni cuehē gā jínu ni cacani ñayuu cahni i ruhū.

24 Te jñáhan ri hebreo, uhūn jínu ni cacani xeēn de ruhū jíin cuarta ññi, ìn cūhva jeē jé yajni cuu rí sáha.

25 Unī jínu ni cacani de ruhū jíin yujnu xíi, te ìn jínu ni cajēhe de yuū xinī rī. Unī jínu ni quēe barco jeē ní jica ri siquī jñūhun ya. Te ìn jecuáa jíin ìn ndiáca ni yosó candá rí nuū cunú ndute mar.

26 Cuehē jínu ni ndoho ri ni jica ri ichi, te ni cācu ri nuū táca yúte, te ni cācu ri nuū táca ñācuñhá. Ni cācu ri nuū ñāyuu nacióñ rī jíin nuū ñāyuu ñuu jicá. Ni cācu ri cháha chúcuan ná ni ìyo ri ñuu jíin rancho jíin mar. Ni cācu ri nuū táca jñáhan ri jeē tu íyó ndáa.

27 Ni sájñiñu nīhin ri te yí ní ndoho ri. Cuehē jínu ni jehni rī maá rí māñhá. Ni jíi rī sóco, ni jichī rī ndute. Cuehē jínu ni ìyo ndite ni rī, ni cuijnu rī, ni cumanī sahma ri

28 Te siquī táca jēe yáha chi íyó gá. Chi ndiquivī ndóho ri jeē nácani ndasí ni rí jehē táca grupo ñayuu cácanđije.

29 Núu ìn ñayuu tu fuerza ini i, te suni ndóho ri jehē i. Te núu ìn ñayuu quiví i cuēchi sáha jñáhan i, te ndóho ri jñūhun cūcanu jíin jñūhun náxeēn ni.

30 Núu súcuan te núu cánuu cutéyí nde ri, te va cutéyí rí siquī táca jēe steén jeē tú na fuerza ini rī.

31 Te Yaā Dios, Yaā cúu Tátá maá Jítoho yō Jesucristo, jíni yā jeē cahān ndaā rī. Te ní cáni na cāhān ñayuu jeē vāha ndasí Yaā cúu ya.

32 Ná ni ìyo ri ñuu Damasco, te gobernador jeē ndácu jñiñu ndañúu jeē jññ rey Aretas, ni jeni de soldado ni cacondito táca yéhyí jeē ní condúu ndihyú ñuu ún, chi jññ de ruhū quihñ rī vecāa ni cuni de núu.

33 Te ni quiví ri chíji ìn jíca, te ñayuu cácanđije ni cascúun i ruhū ventana ìn vehe jeē néne jicā jeē ndihyú ñuu ún. Te súcuan ni cācu ri nuū tēe ún.

*Jeē ní jito ndijin Pablo jeē ni stúu ya nuū de*

## 12

1 Te tu nínin jñiñu jeē cutéyí rí. Te vāha ga na cástūhun rí nuū rō siquī jeē ní jito ri jeē ni stúu maá Jítoho yō nuū rī te ni steén ndijin yā nuū rī.

2 Jíní rī ìn tēe cándije Cristo, te je ni cuu uxī cuñn cuiyā jeē ní sáha ya jeē ní caa tēe un ní jehēn de nde andiví únī. Te tu jíní rī núu ni jehēn rī jíin yiqui cúñu rī, chí ní jehēn anuá-ni rī. Máá Yaā Dios cúu jeē jíní.

3 Te jíní rī jeē ní ndonehen ya ruhū. Te á ní jehēn rī jíin yiqui cúñu rī, chí ní ndōo, tu jíní rī, chí máá-ni Yaā Dios cúu jeē jíní.

4 Chí ní sáha ya jeē ní caa ri ni jehēn rī nde jardín andiví. Te yūcuan ní jini sōho ri táca jñūhun sáhi ndasí jēe ma cúu castūhun yóhó ñayuu.

<sup>5</sup> Te siquĩ jeē ni sáha ya súcuan jíin rí cúu jeē cutéyí rí, te ma cutéyí rí siquĩ ndese cúu máá rí. Chi cutéyí rí máni jeē tú na fuerza ini rí.

<sup>6</sup> Te núu cúní rí cutéyí rí siquĩ maá rí nuú, te nasũu jéē canéé rí núu sáha ri súcuan núu, chi ndaã cúu jeē iyó jeē cutéyí rí. Te ni ma sáha ri, chi tu cúní rí jeē caní ni ñayuu jeē cujéhnũ ga rí vēsũ jeē ní jito i chí jéē ní jini i jnũhun ri.

<sup>7</sup> Te tu cúní yã jeē yáha ri cutéyí rí siquĩ jeē ni steén ndijin yã jniñũ jéhnũ ndasĩ un núu rí, te jeē yúcuan ni quiji ñin jnũndóho jeē ndiquín ruhũ te stóho ruhũ. Te ñin jeē ni jéhe ya jnũhun ni tají Satanás cúu, ñin jeē stóho ruhũ, návaha ma yáha ri cutéyí rí.

<sup>8</sup> Te unĩ jíinu ni cahãn ndahú rí jíin máá Jítoho yõ jeē na téjiyo ya quihĩn.

<sup>9</sup> Te ni cahãn yã jíin rí: Tuú chí tu cúmanĩ jeē cundáhú ni rí rohó. Chi ñayuu jeē tú na fuerza ini, sáha ri jeē nducuehẽ gã fuerza maá rí ini i, ni achi yã. Núu súcuan te cúsĩ ni rí jeē tú na fuerza ini rí, chi súcuan te nducuehẽ gã fuerza Cristo ini rí.

<sup>10</sup> Jeē yúcuan cúu jeē cúsĩ ni rí jeē tú na fuerza rí, jíin jéē cácahãn ndevãha ñayuu jíin rí, jíin jéē cúmanĩ nuú rí, jíin jéē cájito xeẽn i ruhũ, jíin jéē ndóho ri jnũndóho siquĩ Cristo. Chi jeē tú na fuerza maá rí, yúcuan sáha jeē nihĩn rí fuerza maá yã.

### *Jeē nãcani ni Pablo siquĩ ñayuu cácanđje ñuu Corinto*

<sup>11</sup> Te va tẽe canéé cúu ri jeē ni sátéyí nde ri maá rí. Te siquĩ jeē tu cácanđje ró ruhũ, jeē yúcuan ní sátéyí rí maá rí. Chi cánuú jéē máá ró cuajnúhún ró ruhũ nuú. Chi vēsũ tú jniñũ ri jeē maá rí, te va tu núu cuiĩ nde ri nuú tãca tẽe un jéē cácahãn rõ jeē apóstol cujéhnũ cácuu de.

<sup>12</sup> Chi mēhñũ ró ní sáha ri tãcã jniñũ jeē steén jeē cúu ndije ri apóstol. Chi jíin cuéhẽ paciencia ni sáha ri tãcã jniñũ jéhnũ jeē steén poder Yaã Dios, jíin tãca jniñũ jeē nahãn ní canaa ni rõ ni cajito rõ.

<sup>13</sup> Te tu ní sáha ri jeē núu ga cácuu ró núu tãca gã grupo ñayuu cácanđje, chi máá ñin-ni jeē tu ní stáhãn rí rohó jéē cuãha rõ jéē jíni ñũhún rí. Cone cáhnu ni rõ núu súcuan ni sáha nde ri falta nuú rõ ví.

<sup>14</sup> Te vijna je iyó túhva ri jecondẽhe rí rohó vuelta unĩ. Te suni tú na vé cacãn rí nuú rõ, chí nasúu ndajniñũ ró cúu jeē cúní rí, chí sa suhva jeē quendõo vãha ró jíin jnũhun ya. Chí nãjnũhun sēhe ri cácuu ró, te sēhe chí tu cánuú caya i jeē cúu tátã i, chí sa tátã cánuú cuãha de jeē quendõo vãha sēhe de.

<sup>15</sup> Jeē yúcuan cúsĩ ni rí stĩhi ri jeē névãha ri, te nde stĩhi ri fuerza maá rí, návaha sáha ri jeē quendõo vãha ánuã rõ jijnãhan ró. Te manĩ gã coo ri jíin ró, vēsũ sanaa te jecu-ni cáhĩyo manĩ rõ jíin rí.

<sup>16</sup> Te iyó jecu rõ cácahãn jeē vēsũ tú na vé ni jíicãn rí nuú rõ, te tẽe stáhú cúu ri, chí ni nducú rí modo ndichĩ nihĩn rí xũhun ró, cácahãn rõ.

<sup>17</sup> ¿A tãca tẽe ní tají rí nuú rõ, á ñin máá de ni stahú de rohó jéē nihĩn de xũhun ró cuu máá rí, chí naún? Tú cuiĩ.

<sup>18</sup> Ni cahãn ndahú rí jíin Tito jeē jécondẽhẽ de rohó, te ni tají rí ñin hermano ni jeē jíin de. ¿Te chí ní stahú Tito rohó ní quihĩn de xũhun núu rõ jeē cuu máá de, chí naún? Tuú chí inuú-ni casáha ndĩndúú rí, te ñin-ni ánuã ndĩndúú rí.

<sup>19</sup> ¿Sanaa te cájeni ni rõ jeē cahãn rí jnũhun yáha návaha quendõo vãha ri jíin ró, chí naún? Nasũu súcuan cúu, chí Yaã Dios jíin yã jeē cahãn rí maá-ni jnũhun jeē cúní Cristo. Te ndihĩ jeē cahãn rí chí ndúcú rí jeē ije ró jíin jnũhun ya, ñãní manĩ.

<sup>20</sup> Chí yúhú rí jeē núu na jéé rí, te sanaa te cuni rí jeē tu casáha ró jniñũ nũjnahan ni rí. Te máá ró jijnãhan ró, suni ma nũjnahan ni rõ ruhũ. Chí sanaa

te cátejñáhan ró, cácuacuésún ni rō, cáquitī ni rō, cásándúxí ró, cásájñúhún ró, cácahān rō siquí jñáhan ró, cácutéyí ró, cájica néé ró.

<sup>21</sup> Te yúhú rí jeē núu na jéé tucu ri te cuāha Yaā Dios jñúhun canu nuū rī jeē súcuan cásáha ró. Te sanaa te cucuíhyá ni rī núu íyó cuéhē rō jeē ní casáha cuēchi ichi yátá, te tu nácani ni rō stóo ró jniñu jnéhén jniñu jíca jnéni jíin jniñu néé ndasí ní casáha ró.

*Saludo jíin jñúhun cástúhun Pablo jeē sándihí*

## 13

<sup>1</sup> Yāha cúu vuelta unī jeē jécondēhe rí rohó. Te sándaā yō jniñu nájñúhun cáhán tutu: Jíin jñúhun jeē cahán uū chí únī testigo te cundaā tácá jniñu, áchí.

<sup>2</sup> Te vijna jeē íne jíca rí te cáhán tucu ri nájñúhun ni cahān rī ná ni ine ri jíin ró. Cáhán rī nuū ñáyuu ni casáha cuēchi un jíin núu ndihí ró, jeē núu na jéé tucu ri te ma cóo vítá ni ri jíin ró.

<sup>3</sup> Te yūcuán cuu prueba jeē cánducú ró, suu núu jendaá jeē cahán rī jíin fuerza Cristo. Chi Cristo tu cúmanī fuerza yā jeē sándaā yā jíin ró, chí stéén yā poder yā mēhñu ró.

<sup>4</sup> Te vésú tu ní stéén yā fuerza yā ná ni jihī yā jíca cruz, te vijna chí técu yā jíin poder Yaā Dios. Te nájñúhun ni ndoho maá yá, suni súcuan cándoho ri vijna jeē tu fuerza rī. Te vésú súcuan te jíin poder Yaā Dios cátecu rī jíin yá jeē cuajniñu ri nuū rō jeē siquí jñúhun ya.

<sup>5</sup> Coto ndee rō maá ró núu cáhīin nīhin ró jíin jñúhun cácañdije ró yá. Sáha vāha ro cuenta. ¿Te á tu cájini rō jeē ndeé Jesucristo ini anuá rō, te núu ndaā jeē ní cacandije ndije ró?

<sup>6</sup> Te ñúhun ni rī jeē suni cácucañnu ni rō jeē maá rí cácañdije ndije ri.

<sup>7</sup> Te cájicān tahú rī nuū Yaā Dios jeē ma sáha ró ni ññ jniñu néé. Te vésú núu cuajnúhún ró jeē váha ndácu ri jniñu nuū rō, chí vésú núu ma cuajnúhún ró, te tú na vé sáha, chí máni jeē na sáha ró jniñu ndaā cúu jeē cánducú rí.

<sup>8</sup> Chí tu jési ri nuū jniñu ndaā, chí sa suhva scáca ri.

<sup>9</sup> Núu súcuan te cácusī ni rī núu tú na fuerza maá rí, te núu íyó fuerza maá ró. Te níni cácañ tahú rī jeē na íje ga ni rō jijnáhan ró jíin jñúhun ya.

<sup>10</sup> Te téé ri carta yáha nuū rō nde ná tu jeē rī, návāha núu na jéé rī te tuá jíni ñúhún cuxeén rī nuū rō. Chí ni jēhe Jítoho yō jniñu ndíso ri yāha jéé sáha ri jeē íje ánuá rō jíin jñúhun ya, nasūu jéé snáā rī.

<sup>11</sup> Je ni cahān yō núu súcuan hermano, te na cóo jeē váha jíin ró jijnáhan ró. Te na cóndihvī ni rō íje ró jíin jñúhun ya, te coo ndeyí ni rō. Te na cóo ñnuú ni rō te coyūcu máni rō jíin jñáhan ró. Te Yaā ndíso jñúhun ndeyí sñ ni jíin jñúhun cóndáhú ni, coo ya jíin ró jijnáhan ró.

<sup>12</sup> Te jeē cahán rō jíin táca jñáhan ró, te yíñúhún techúhu ró ndaha i.

<sup>13</sup> Sándeyí ni rō jijnáhan ró, áchí hermano cácañdije jeē cáyūcu yáha.

<sup>14</sup> Te ñúhun ni rī jeē Jítoho yō Jesucristo na sáha ga yā jeē váha róhó jíijnáhan ró, te Yaā Dios cundáhú ni yā rohó, te Espíritu Santo condee cáhnu ya jíin ró. Súcuan na cóo. Amén.

## CARTA JEE NI TEE SAN PABLO APOSTOL NUU ÑAYUU GALACIA

<sup>1</sup> Máá rí cúu Pablo apóstol. Te nasūu ñáyuu ni jéni ruhū ni nasūu ñáyuu ni táji ruhū jeē nácani ri jnūhun, chí sa suhva máá Jesucristo jíin Tátá yō Yaā Dios, Yaā ní nastécu Jesús mēhñu ndíyi.

<sup>2</sup> Te ruhū jíin táca hermano cáyūcu jíin rí yāhá, cátee ri carta yáha cuájeē nuū rohó ñáyuu cácan díje ní región Galacia.

<sup>3</sup> Te cáñuhun ni rí jeē Tátá yō Yaā Dios jíin Jítoho yō Jesucristo, na sáha ga yā jeē váha rōhó, te sáha ya jeē coo ndeyí coo sīi ni rō.

<sup>4</sup> Chi Jesús ni socō yā máá yá jeē ni jíhī yā jeē siquí cuéchi yó, návāha jnama ya yohó nuū táca jéē neé iyó ñayívi yáha, chí súcuan ni nujnahan ni máá Tátá yō Yaā Dios.

<sup>5</sup> Jeē yúcuan na cáhán yō jeē yóhoyo luu cújéhnu ya ní cáni. Súcuan na cóo. Amén.

### *Siquí jeē tuá na inga jnūhun cácu ñayuu*

<sup>6</sup> Te nánhán nāā ni rí jíto ri jeē yóhoyo yachī cánducú ró stóo ró Yaā Dios, Yaā ní cana rōhó jéē quívi ró ndaha ya siquí jeē cundáhú ni Cristo yohó. Chí ni candiquín rō inga jnūhun jeē sīin cáhán.

<sup>7</sup> Te tú cuiti na inga jnūhun jnama yohó iyó. Te cáhīyo jecu ñayuu castáhán i rōhó, te cácuni i nasama i jnūhun ndese jnama Cristo yohó.

<sup>8</sup> Te núu ñin ñayuu nacani inga jnūhun nuū rō ndese jnama ya rohó, te núu tu quíjnahan jíin jnūhun ni canacani ri nuū rō xīhna gā, na jnáhnú ndetū ñayuu ún. Te vésú máá rí chí ñin ndajéhé jeē quíji nde andívi nacani inga jnūhun núu, na jnáhnú ndetū.

<sup>9</sup> Je ni cahán rí jíin ró, te suni súcuan cáhán tucu ri vijna: Na-ni tēe nacani inga jnūhun nuū rō, te núu tu quíjnahan jíin jnūhun jeē ní cajetáhú ró, na jnáhnú ndetū tēe ún.

<sup>10</sup> Te jeē cahán rí súcuan, ¿á ndúcú rí jeē cuajnúhún ñáyuu ruhū, chí Yaā Dios? ¿Chí ndúcú rí jeē cúsiñ ni ñayuu jíin rí, cájeni ni rō? Núu ndúcú gá rí jeē cúsiñ ni ñayuu jíin rí, te nasūu mozo Cristo cúu ri núu súcuan.

### *Ndese ni jinū Pablo cúu de apóstol*

<sup>11</sup> Te cástūhun rí nuū rō, hermano jíjnahan ró, jéē jnūhun jnama ya yohó jéē nácani rí, nasūu jéē ní jeni ni máá rí jíin ñáyuu cúu.

<sup>12</sup> Chi nasūu ñáyuu ni stéén nuū rí, ni nasūu ñáyuu ni sáha jeē ní cutūhva ri, chí sa suhva máá Jesucristo ni steén nuū rí.

<sup>13</sup> Chi je ni cajini jnūhun ró ndese ni sáha ri nde saá, ná ni chíñúhún rí sahán jnáhan ri ñayuu hebreo. Te cájini rō jeē yóhoyo ni jíto xeēn rí ñayuu cácan díje nuū Yaā Dios, te ni condíhvī ni rí snáā rí i núu.

<sup>14</sup> Te váha ga ni cutūhva ri sahán ún vésú cuehē gā tēe nación rí jeē ní cajehnu jíin rí, chí ni condíhvī gā ni rí siquí táca jéē ní cajequin jíi rí.

<sup>15</sup> Te vésú súcuan te Yaā Dios je ni nacāji ya ruhū nde ná tu cacu ri, te ñin quívi te ni cusíñ ni yā ni cana ya ruhū jeē quívi ri ndaha ya, siquí jeē yóhoyo ni cundáhú ni yá ruhū.

16 Te ni steén yā Sēhe ya nuū rī, nāvāha nacani ri jnūhun ndese jnáma ya ñayuu tācá nación jeē tu jíní jnūhun ya. Yūcuán na te tu ní cájnūhun rí ni ñn ñayuu,

17 ni tu ní jéhén rī ñuu Jerusalén nuū téé cácuu apóstol xīhna gā vēsú ruhū. Chi sa suhva ni jehēn-ni ri nde región Arabia, te saá te ni nuhūn tucu ri ñuu Damasco.

18 Yūcuán na te nde ni yāha unī cuiyā, te ni jehēn rī Jerusalén. Te ni jini jnāhan ri jín Pedro, te ni condee rī jín de xahūn-ni quivī.

19 Te tu ní jito ri nuū tāca gā apóstol, chi máá ñn-ni nuū Jacobo ñani maá Jítoho yō.

20 Jnūhun yáha jéé téé ri cuajeē nuū rō, chi jíní Yaā Dios jeē ndaā cúu.

21 Yūcuán na te ni jehēn rī ní región Siria jín Cilicia.

22 Te ñayuu cácadnje jeē yñi ndaha Cristo, jeē cáyucú región Judea, ná tu coto cuiti i nuū rī saá.

23 Chi máni jnūhun-ni ni cajini i cácahān ñayuu: Tēe ni jito xeēn yohó ndé saá, vijna chi nácani de jnūhun cándnje yó jéé ní nducú de snáa de nde saá, áchi i.

24 Te ni cacahān i jeē yóhoyo cújéhu Yaā Dios jeē súcuan ni sáha ya jín rí.

*Jeē ní cajetáhú táca gā apóstol un Pablo*

## 2

1 Yūcuán na te nde nuū uxí cuñ cuiyā, te ni jehēn tucu ri Jerusalén jín Bernabé, te suni ni jeca ri Tito ni jehēn de jín rí.

2 Te ni jehēn rī chi máá Yaā Dios ni steén ya jéé jíní ñúhún quíhñ rī. Te ni candutútú sñn nene téé cácujeñnu nuū ñáyuu cácadnje ún. Te ni castūhun ri nuū de siquī jnūhun jnáma ya yohó jéé nácani ri nuū ñáyuu tācá nación tu jíní jnūhun ya. Te súcuan ni sáha ri nāvāha cuajnúhún de jniñu ri, te ma quéndō cāhá jniñu sáha ri jín jéé ni sáha ri.

3 Te ni tu ní cásáha fuerza de Tito, téé ni jica jín rí, jeé cóndee jnuni circuncidar de, vēsú nasūu téé hebreo cúu de.

4 Te súcuan ni cundaā, vēsú ni quivicoo jecu téé stáhú jéé sáha de jeé hermano cácuu de. Te téé un ní quivicoo de nāvāha yuhu-ni coto de ndese ni ndulibre yō nuū ley circuncidar siquī jeé yñi yó ndaha Cristo Jesús. Chi cácuu de jeé siquī tucu yó ley un, nduu tucu yó mozo nuū ley un.

5 Te tu ní cajetáhú cuiti rī nuū téé ún, chi cúní rī jeé quéndō ññin ró jíjnāhan rō jín jnūhun jnáma ya yohó.

6 Te máá téé cácujeñnu nuū ñáyuu cácadnje ún, tuá na inga jniñu jéé ní cándacu de nuū rī. Te máá rí chi tu ní chíhi ri cuenta siquī jeé cácujeñnu de, chi suni Yaā Dios tu sáha ya cuenta, chi inuú-ni cúu ndivíi téé nuū yā.

7 Chi sa suhva ni cajini de jeé jnūhun jnáma ya yohó, ndíso jniñu ri nacani ri nuū ñáyuu tācá nación jeē tu cásáha circuncidar, nájñūhun nácani Pedro jnūhun un núu ñáyuu hebreo jeé casáha circuncidar.

8 Chi Yaā Dios jeé ní tají Pedro jeé nácani de jnūhun nuū ñáyuu hebreo, suni máá yá ni tají rúhū jeé nácani ri jnūhun nuū ñáyuu tācá nación tu jíní jnūhun ya.

9 Jeé yúcuan, Jacobo jín Pedro jín Juan, ni cajini de jeé Yaā Dios ni jēhe ya jniñu luu yáha nuū rī. Te téé un cácahān ñayuu cácadnje jeé máá de cácujeñnu ga. Te ni cajni de ndaha ri jín ndaha Bernabé, jeé ní castéén de jeé cáhoyo

manī de jíin rí, jíin jéē ní cacundaā ni de jeē maá rí quingōo nacani jnūhun nuū ñáyyu tāca gá nación, te maá de jíinánhan de nuū ñáyyu hebreo.

10 Te maá iin-ni jeē ní cajicān de cúu jeē cónahán rí chindéé ñáhán rí ñayuu cándoho ndáhú, te jniñu ún je ni condihvī ni rī ni sáha rī.

### *Jeē ni cáhān Pablo nuū Pedro*

11 Te ná ni quiji Pedro ñuu Antioquía, te ni cahān caji rí nuū de, chi ni stívi de jniñu.

12 Chi nde ná tu quecoo sava jnāhan de hebreo jeē ní tají Jacobo, te yéji de staā jíin ñáyyu jeē násūú hebreo cácuu. Yūcuán na te nuū ní quecoo tēe ún, te ni cusān de jeē tuá yéji de jíin i, chi yúhú de jeē cúni tāca tēe un jéē tuá squícu de ley jnāhan de hebreo. Chi áchí ley jeē ma cúu caji de staā jíin ñáyyu jeē tu cáśáha circuncidar.

13 Te sava ga tēe hebreo jeē cácadnje, suni ni cacujiyo de nuū i, nájñūhun ni sáha Pedro, chi cáyūhú de jeē cúni tēe ún. Te nde maá Bernabé ni cascáhán de ni cujiyo.

14 Yūcuán na te ni jini rī jeē ní canayūhú de caji de staā jíin ñáyyu ún, cúu jeē tuá jíca de jíin modo jeē cahān jnūhun náma ya yohó. Te ni cahān rī nuū Pedro, jito jiniú táca de: Róhó jéē cúu tēe nación yō hebreo, tuá squān ró ley jnāhan yó hebreo, chi yéji ró jíin ñáyyu ún. ¿Te najehē safuerza ró i jeē squícu i ley jnāhan yo hebreo núu súcuan? ni achi rī.

### *Īn-ni modo jnáma ya ñayuu hebreo jíin táca gá nación*

15 Te yóhó chi cúu yó ñáyyu hebreo, te cácahān yō jeē násūu ñáyyu tāca gá nación casáha cuēchi cácuu yó.

16 Te vēsú súcuan te jíni yō jeē ní iin yó tu quéndōo ndaā yō nuū Yaā Dios jeē squícu yó jniñu ndácu ley Moisés jenahán, chi maá jéē candnje yó jeē Jesucristo ndahva yā cuēchi yó. Jeē yúcuan suni maá yó ni candnje yó Jesucristo, návāha ndahva yā cuēchi yó síquī jeē candnje yó, nasūu jíin jéē nducú yó squícu yó ley un. Chi áchí tutu ĩi: Ni ĩn ñayuu ma quéndōo ndaā i nuū Yaā Dios jíin jéē nducú i squícu i jniñu jeē ndácu ley, áchí.

17 Te maá yó ñayuu hebreo, núu cúni yō jeē ndahva Yaā Dios cuēchi yó síquī jeē ní jíhī Cristo jehē yō, suu cúu jeē jécūhun ni yō jeē suni ñayuu casáha cuēchi cúu yó, nájñūhun tāca gá ñayuu. Núu súcuan ¿te á cuēchi ni sáha yó jeē ni stóo yó ley jenahán ná ni candnje yó Cristo? Tú cuiti jeē súcuan.

18 Chi sa núu naquihin tucu yó ley jeē ni stóo yó un, te súcuan tēe yó cuēchi síquī maá yó.

19 Chi ruhū, nájñūhun ni jíhī rī ni sáha ley un, te jeē yúcuan má cúu ga ndacu jniñu nuū rī. Te súcuan te cuu cotecu rī jeē sáha rī jeē cuní Yaā Dios.

20 Chi nájñūhun je ni jíhī rī jíca cruz jíin Cristo, te vijna chi tuá técu rī jeē maá rí, chi maá Cristo cúu jeē técu ĩni rī. Te jeē técu rī ĩni ñayivī yáha vijna cúu jeē candnje rī jeē Sēhe Yaā Dios chindéé ñáhán yá ruhū. Chi ni cundáhú ni yā ruhū te ni socó yā maá yá jehē rī.

21 Núu súcuan te tu cúni rī casi rī nuū jnūhun jeē ndáhva Yaā Dios cuēchi yó síquī jeē yóhyo vāha ni yā jíin yó. Chi núu jeē quéndōo ndaā yō nuū yā jeē nducú yó squícu yó ley jenahán, yūcuán na te tu ndé jéjñiñu jeē ní jíhī Cristo nuū.

### *Jnūhun ley jíin jnūhun cándnje*



## 3

1 Róhó hermano ñuu Galacia, ¿naun tu cájecūhun ni rō? ¿Ndé téé ni saca núu xiní rō jeē tuá cájetáhú rō jñūhun ndaā? Chi ná ni canacani ri jñūhun ya nuū rō, te cájí ndasí ni cajecūhun ni rō jeē ni jíhi Jesucristo jicā cruz jehē rō.

2 ñn-ni jñūhun yáha cájnūhun rí rohó: ¿Ndese ni canihīn rō Espíritu Santo? ¿A jeē ní cacundeyí rō squícu rō jñiñu ndácu ley Moisés? Tú cuiti, chi jeē ní cacandíje rō jñūhun jnáma ya rohó jéé ní cajini sōho rō.

3 ¿Ndese cúu jeē tu cájecūhun cuiti ni rō? Chi xīhna gā ni cacandíje rō jéé ni jíhi Cristo jeē jnama ya rohó, te ni canihīn rō Espíritu. Te vijna ¿á cájeni ni rō jeē stóo rō jñūhun ún te fuerza maá rō squícu rō ley un, te cácu rō naún?

4 Núu súcuan te tu ndé ní jéjñiñu cuiti jeē ní castóho ñayuu rohó síquī jñūhun jnáma Cristo rohó, chi vijna cánducú rō squéndōo rō jñūhun ún. Nacā jeē váha te núu jeē tu ní castóo rō, chi sa cáandíje ndíje rō yá.

5 ¿Te na síquī cúu jeē jéhe Yaā Dios Espíritu yā nuū rō te sáha ya jniñu jéhu mēhñu ró? Tu sáha ya síquī jeē cánducú rō squícu rō ley un, chi síquī jeē ní cacandíje rō jñūhun jnáma ya rohó jéé ní cajini sōho rō.

6 Abraham ni candíje de jeē sáha Yaā Dios jeē ni jéjñūhun ya, te jeē yúcuan ní ndahva yā cuēchi de.

7 Núu súcuan te na jécūhun ni rō jijnáhan rō jéé ñayuu cáandíje jeē sáha Yaā Dios jehē i, ndívi i yucūn Abraham síquī jeē súcuan cáandíje i.

8 Chi nde jehánan je cáhán tutu ií jeē ñayuu táca nacióon tu jíni jñūhun Yaā Dios, ndahva yā cuēchi i núu candíje i ún. Te nde ná tu cuu táca jéé yáha te je ni jejnūhun ya jñūhun váha yáha nuū Abraham: Jeē rohó cúu jeē quendōo ndetū ñayuu táca nacióon.

9 Núu súcuan te ñayuu cáandíje, quéndōo ndetū i jíin Abraham, tēe ni candíje jeē ní jéjñūhun ya.

10 Te sa jnahnū ndetū ñayuu jeē cánducú i quendōo ndaā i jeē jíin ley Moisés. Chi súcuan yósó núu tútu ií: Jnahnū ndetū táca ñayuu jeē tu squícu ndíhi cuiti jñūhun yósó núu tútu ley, achí.

11 Núu súcuan te cájí cúu jeē ni ñn ñayuu ma quéndōo ndaā i nuū Yaā Dios síquī jeē nducú i squícu i ley un. Chi cáhán tutu: Ñayuu jeē ní ndahva yā cuēchi i, técu i jeē candíje i jeē sáha ya jehē i, achí.

12 Te ley Moisés tu cáhán jeē cótecu yō níf cáni síquī jeē candíje yó, chi sa suhva cáhán: Núu ndé ñayuu squícu jniñu yáha, te cotecu i sáha, achí.

13 Te Cristo ni jnama ya yohó núu jñūhun cáhán ley jeē jnahnū ndetū yō síquī cuēchi yó, chi máá yá ni ndoho síquī jñūhun jeē jnahnū ndetū yō. Chi yósó núu tutu ií: Táca ñayuu condita caa jicā yújnu, jnahnū ndetū i, achí.

14 Te Cristo Jesús ni jíhi yā jicā yújnu cruz návaha quendōo ndetū ñayuu táca nacióon sáha ya. Chi jñūhun jeē ní jéjñūhun ya quendōo ndetū Abraham, jinū nuū i. Te súcuan te núu candíje yó jeē ní sáha Yaā Dios jehē yō, te nihīn yō Espíritu jeē ní jéjñūhun ya quíji.

*Síquī ley jíin síquī contrato jeē ní jéjñūhun ya*

15 Hermano, na cáhán rī ñn jñūhun ndese cásáha ñayuu ñayiví: Núu ñn tēe sáha de ñn contrato chí ñn acta, te núu je ni cucutú ní sáha de firmar, te ma cúu ga najnanū, ni ma cúu jecosó gā.

16 Te suni súcuan ní sáha Yaā Dios ñn contrato jeē ní jéjñūhun ya nuū Abraham jíin yúcūn de jeē quíji. Te tu cáhán tutu ií síquī cuehē yucūn de, chi sa cáhán síquī ñn-ni yucūn de, te suu cúu Cristo.

17 Núu súcuan te jnūhun jeē cahán rī yāha cúu jeē xīhna gā ni sāha Yaā Dios ñn contrato jīn Abraham, jeē quiji Cristo jnama ya yohó, te ni sácutu yá. Yūcuán na te ni yāha cuñ ciento ocō uxī cuiyā, te sáá te ni jēhe ya ley nuū Moisés. Te ley un jēē ní quee cuéé gá, ma cúu nacanu contrato un, ni ma cúu casi nuū jnūhun jeē ni jéjnūhun ya jeē jnama ya yohó.

18 Chi núu jeē jīn ley Moisés jnama Yaā Dios ñayuu, yūcuán na te nasūu síquī contrato jeē ni jéjnūhun ya cúu. Chi sa suhva síquī maá jēē ni jéjnūhun Yaā Dios nuū Abraham cúu jeē ní jnama ya de.

19 Núu súcuan ¿te ndese jéjníñu ley Moisés? Jéjníñu chi ni jēhe ya un cuéé gá návāha nastúu cuēchi i. Te ni ndacu jniñu máá-ni nde ná tu quiji Cristo, Yaā cúu yucūn jeē ni jéjnūhun Yaā Dios jeē quíji. Te nde ná ni jēhe Yaā Dios ley un núu ñayuu, te ni tají yá tǎcá ndajéhé yā ni cacastūhun núu Moisés, te Moisés ni nacachī nuū i.

20 Te sñn cúu jnūhun jeē ni jéjnūhun ya nuū Abraham jeē quíji Cristo, chi máñúhún-ni ya ni jejnūhun, te tu ní jīni ñúhún ni ñn jeē nacachī nuū Abraham.

### *Siquī ndese jéjníñu ley jenahán*

21 Núu súcuan ¿te á cúní cahán jeē ley jeē ni jēhe Yaā Dios nuū Moisés, téjiyo jeē ni jéjnūhun ya ún? Tú cuiti jeē súcuan. Chí núu jeē ni jēhe Yaā Dios ñn ley jeē cótecu ñayuu ní cání sāha, yūcuán na te quendōo ndaá i nuū yā síquī jeē síquī i jniñu ndácu ley un núu.

22 Te tuú chi yósó núu tútu ñi jeē ndihí ñayuu ñayíví, nájnūhun yíndihyū i vecāa chi cáyihí i chíji cuēchi. Te súcuan cúu návāha tǎcá i jeē candíje i jeē ni jíhí Jesucristo jehé i, nihīn i máá jēē ni jéjnūhun ya nuū i síquī jeē candíje i ún.

23 Chi nde ná tu quee jnūhun candíje yó Cristo, te nájnūhun ni yíndihyū yó ni sāha ley jenahán, návāha condetu yó quíví quiji Cristo, Yaā candíje yó.

24 Núu súcuan te ley ni cuu ñn jeē ndíto yóhó nájnūhun ñn mozo ndíto sūchi lúlí, te ni jejníñu nde quíví ní quiji Cristo, návāha candíje yó jēē ni jíhí yā jehé yó, te ndahva Yaā Dios cuēchi yó.

25 Te vijna jeē ní quee Cristo, Yaā candíje yó, te tuá yíhi yó ndaha ley jeē cúu nájnūhun mozo ndíto yóhó.

26 Chi ndívii rō cácuu sēhe Yaā Dios síquī jeē ní cacandíje ró Cristo Jesús.

27 Chi tǎca ró jeē ní jendute ró síquī jeē ní quíví ró ndaha Cristo, ni sāha ya jeē ní nduu ró nájnūhun cúu máá yá.

28 Te vijna chi tuá cúu ró ní ñayuu hebreo ni ñayuu griego, ni mozo jeē ní jeen ñayuu, ni ñayuu sájníñu cuenta maá, ni tēe ni ñahan. Chí ñn na cúu ró núu yá jeē cáyihí ró ndaha Cristo Jesús.

29 Te núu cáyihí ró ndaha Cristo, núu súcuan te yucūn Abraham cácuu ndije ró, te nihīn rō maá táhū jeē ni jéjnūhun ya.

## 4

1 Jeē cahán rī jīn ró jíjnahan ró cúu jeē yáha: ñn sūchi chíí táhū, vésú maá i naquihin ndihí jeē névāha tátá i, te núu lúlí i chí inuú cúu i jíjn mozo.

2 Chi yíhi i ndaha tǎca jēē ndíto i jíjn jēē ndíto ndajníñu i, nde quee quíví jeē ní jeni tátá i, te sáá te nihīn i.

3 Te suní súcuan yóhó, chí nde ná tu jecūhun ni yō síquī Cristo te ni cuu yó nájnūhun sūchi lúlí, te ni yíhi yó chíji tǎcá costumbre jeē ní cajequin ñayuu ñayíví.

4 Te nde ná ni quee quivī jeē ní jeni Yaā Dios, te ni tají yá Sēhe ya, ni cacu ya chíji ñn ñahan, te ni cacu ya yucūn ñayuu naciōn hebreo jeē cáyihī chíji ley Moisés.

5 Súcuan ni cacu ya návāha jnama ya yohó jéē tuá quihī yó chíji ley un, te návāha naquihīn Yaā Dios yohó cuu yó séhe ya.

6 Te siquī jeē cácuu ró séhe ya, te ni tají Yaā Dios Espíritu Sēhe ya ni quivī ini anuá rō, te sáha ya jeē cácahān jee rō: Tátá maá ná.

7 Núu súcuan te tuá cácuu ró nájnūhun mozo, chí séhe ya cácuu ró. Te jeē cácuu ró séhe Yaā Dios, te suni nihīn rō maá táhū jeē ni jéjnūhun ya jeē jíin Cristo.

### *Jeē nácani ni Pablo siquī ñáyuu cácañdije*

8 Chí nde saá, nde ná tu jecūhun ni rō ndese Yaā cúu Yaā Dios, te ni cacuu ró mozo nuū tāca jéē násūu yáa ndaā cúu.

9 Te vijna chí je cájini rō ndese Yaā cúu ya, te vāha ga na cáhán rī jeē maá yá je jíiní yā rohó. Núu súcuan ¿te najehē cácuu rō nandió cóo ró nduu tucu ró mozo nuū tācá costumbre ñayuu ñayivī jéē tu nihín jnīñu cuiñi?

10 Chí máni jeē cánēe ñ rō quivī jíin yóo jíin vico jíin cuiyā.

11 Te yúhú rī sanaa te tu ní jéjnīñu cuiñi jeē ní nacani rī jnūhun nuū rō.

12 Cáhán ndahú rī jíin ró hermano, jeē na cáni ni rō nájnūhun jéni ni maá rí jeē tuá squícu rī costumbre ñayuu hebreo. Chí ruhū ni nasáha rī maá rí nájnūhun máa ró jeē tu ní cáyihī ró núu ley costumbre ñayuu hebreo. Te tú na vé ni cásaħa ró jéē cucuíhyá ni rī nde saá.

13 Chí cájini rō ndese ni cuu ná ni nacani núu rí jnūhun nuū rō ndese jnáma ya yohó. Chí siquī jeē cuhú rī te ni jecuiñī rī ñuu rō ni nacani rī jnūhun.

14 Te vēsú jnūndóħo ni cuu jeē ní cocuhū rī, te tu ní cáśájéē ni rō nuū rī, ni tu ní cáśquéhichī ni rō ruhū. Chí sa ni cajetáhú ró ruhū nájnūhun jeē cúu rī ñn ndajéhé Yaā Dios, chí nájnūhun jeē cúu rī maá Cristo Jesús.

15 Núu súcuan ¿te najehē cúu jeē tuá cácuñi ni rō jíin rí vijna? Chí náhán rí jeē vāha ni casáħa ró jéē ní cajnahuhū ni rō núu jeē cúu te tava rō tinūu vāha máa ró, cuāħa ró nduu tinūu rí nuú.

16 Te vijna ¿á ní nduu rī enemigo rō siquī jeē cachí rí máni jnūhun ndaā nuū rō, chí naún?

17 Te cáhīyo tēe jeē cándihvī ni siquī rō jijnáħan ró, te nasūu jéē quéndōo vāha ánuá rō, chí sa jeē cácuu de nasásñn de róħó jíin rúhū, návāħa condihvī ni rō jeē cúu máa de.

18 Te iyó vāħa jeē cándihvī ni de jehē rō, te núu jeē quéndōo vāħa ánuá rō cúu núu. Chí níni jíiní ññhún sáħa de jeē vāħa róħó, vēsú núu ñne rí jíin ró chí núu tú rí ñne.

19 Séhē mánī jijnáħan ró, jeē siquí rohó cúu jeē inga jínu jnáhuhū ni rī, chí nájnūhun ñn ñahan scácu séhe, súcuan ndóħo rí jehē rō. Te suu cúu jeē jnáhuhū ni rī ndétu rí jeē na ndúndaā anuá rō ndacu ró Cristo.

20 Nacā jeē vāħa núu jeē ndeé rí jíin ró vijna ññhún, návāħa cuu cahān manī rí jíin ró. Te tu cújnúní cuiñi ni rī ndese ga cúu jeē cáni ni rí siquī rō.

### *Jnūhun yátá siquī Agar jíin Sara*

21 Róħó jijnáħan ró jéē cácuu rō quihī ró chíji ley Moisés, cachí nuū rī: ¿A tu ní cájini sóħo ró ndese cáhán ley un?

<sup>22</sup> Chi cáhán tutu ii jeē Abraham ni iyo uū sēhe yíi de. Te iin i cúu sēhe Agar, ñahan cúu mozo vehe de. Te inga i cúu sēhe ñahan íyó libre, suu ñasihí de Sara jeē ní cuu ña ñahan numá.

<sup>23</sup> Te sēhe ñahan cúu mozo, ni cacu i nájñuhun cácu tāca gá sūchi lúli. Te sēhe ñahan cúu libre, ni cacu i máá síquī jeē súcuan ni jejnūhun Yaā Dios.

<sup>24</sup> Te yāha cúu iin jñuhun yátá, chi ndindúú ñahan un cúu ña nájñuhun ndindúú contrato jeē ní sáha Yaā Dios jín ñáyuu. Máá ñahan nání Agar, cúu ña nájñuhun contrato ley jeē véji nde yucu Sinaí. Te ñayuu cáyihí chíji contrato ley, cácuu i mozo nuū ley un.

<sup>25</sup> Chi Agar cúu nájñuhun ley jeē ní jéhe Yaā Dios xinī yucu Sinaí jeē iin nde Arabia. Te cúu ña nájñuhun Jerusalén, ñuu ñayuu hebreo, jeē iyó vijna, chi tāca sēhe ñuu Jerusalén, cácuu i nájñuhun mozo nuū ley un.

<sup>26</sup> Te Jerusalén jeē iyó andívi, chí sa suhva íyó libre nájñuhun Sara. Te yóhó ñáyuu cácuu cácuu, nájñuhun sēhe un cácuu yó, chí íyó libre yó nuū contrato ley.

<sup>27</sup> Chi suhva yósó núu tútu ii:

Róhó jeē ní cuu ró ñahan numá jéé tú sēhe ró, na cúsī ni rō.

Róhó jéé tu ní jéhnde chíji ró jéé scácu ró, na cána jee ró jéé cúsī ni rō.

Chi coo cuéhē gá sēhe róhó jéé ní cuu ró ñahan numá vésú ñahan jeē jé ní scácu sēhe.

Achí tutu.

<sup>28</sup> Hermano, sēhe Yaā Dios cácuu yó, chí súcuan ni jejnūhun ya nuū yó, nájñuhun ni jejnūhun ya nuū Abraham jeē cacu sēhe de Isaac.

<sup>29</sup> Te nde saá te inga sūchi ní cacu nájñuhun cácu tāca gá ñayuu, ni jito xeēn i Isaac, sūchi ní cacu ní sáha Espíritu. Te nájñuhun ni iyo saá, suni súcuan cájito xeēn ñayuu tāca sēhe Yaā Dios nde vijna.

<sup>30</sup> ¿Te ndese cáhán tutu ii? Achí: Quenehen ró ñahan cúu mozo na quíhín ña jín sēhe ña. Chi sēhe ñahan cúu mozo, ma nihín i tahú jín sēhe ñahan libre, achí yá jín Abraham.

<sup>31</sup> Núu súcuan hermano, tu cúu yó nájñuhun sēhe ñahan cúu mozo, chí nájñuhun sēhe ñahan libre cúu yó.

*Na cuiñi ñihin yó jín jñuhun jeē ni sáha libre yohó*

## 5

<sup>1</sup> Te Cristo ni sáha libre yā yohó jéé tuá yíhi yó chíji ley Moisés. Núu súcuan te cuiñi ñihin ró jín jñuhun jeē ni sáha libre yā yohó, te ma ndávicoo tucu ró cuu ró mozo nuū ley un.

<sup>2</sup> Sáha ró cuenta jijnáhan ró, chí ruhū Pablo cahán rī jín ró jeē núu squícu ró ley circuncidar, yūcuán na te tu nihín jñiñu cuiñi jeē ní candíje ró jéé ní jíhi Cristo jehē rō.

<sup>3</sup> Te inga jínu cáhán ñihin rī jín táca téé cánducú cuu circuncidar, jeē núu súcuan te suni cánuú jéé squícu de ndívií cuiñi gá jñuhun cáhán ley Moisés.

<sup>4</sup> Róhó jéé cánducú ró quendōo ndaā rō jeē squícu ró ley un, je ní casiáá rō Cristo núu súcuan. Je ní castóo ró jñuhun jeē ndahva yā cuēchi ró síquī jeē cundáhú ni Yaā Dios rohó.

<sup>5</sup> Te máá yó chí cájica yó jín Espíritu, te cácuu yó jéé ní ndahva yā cuēchi yó, te jeē yūcuan ñuhun ni yó jeē quendōo ndaā yó quiví cuiñi yó núu Yaā Dios.

<sup>6</sup> Chi yóhó jéé cáyihí ndaha Cristo Jesús, vésú núu jeē cúu yó circuncidar chí tu cúu yó, tú na vé nihín jñiñu. Jeē nihín jñiñu cúu jeē candíje yó jeē sáha ya jehé yó. Te yūcuan sáha jeē cundáhú ni yó jñáhan yó.

<sup>7</sup> Vāha ni cacandíje ró núú. ¿Te ndé ñn ni jesi jeē tuá cájetáhú ró jñūhun ndaā núú súcuan?

<sup>8</sup> Jñūhun jeē ní cascáhán de róhó, chi tú vēji nuū maá Yaā ní cana róhó ní quivicoo ró ndaha ya.

<sup>9</sup> Te ma náa ni rō jeē tée cástáhú róhó, jñūhun cástéén de cúu nájnūhun levadura, chi vēsú jecu-ni levadura, te ndáa ndihi ñujen sáha.

<sup>10</sup> Te cúcáhnu ni rī jeē maá Jítóho yō sáha ya jeē ma cándíje ró jijnáhan ró inga jñūhun jeē sñn cáhán. Te maá Yaā Dios cuāha ya castigo tēe jeē sáca núu xinī rō, núu na-ni tēe cúu de.

<sup>11</sup> Te ruhū, hermano, núu jeē nácani ga rī jñūhun ley circuncidar nde vijna, te jnáhan rī ñayuu hebreo ma cóto xeēn i ruhū nuú. Chi ma quití ni i jeē nácani rī jñūhun jeē ni jíhi Cristo jicā cruz, núu jeē súni nácani rī jñūhun circuncidar nuú.

<sup>12</sup> Te tāca tēe jeē sáca núu xinī rō siquī jñūhun ún, vāha ga na cáhnde gā de máá de núu súcuan.

<sup>13</sup> Chi máá ró jijnáhan ró hermano, ni cana ya rohó návāha coo libre rō nuū ley un. Te vēsú iyó libre rō, te ma cáni ni rō jeē cúu quivicoo ró táca cuéchi jeē cúu modo neé cúní maá ró, chi sa suhva na sáha ró máá ró mozo jeē chindéé ñáhan ró jnáhan ró siquī jeē cundáhú ni rō i.

<sup>14</sup> Chi je ni squícu ró ndihi ley núu squícu ró ñn-ni jñūhun ndácu jniñu yáha: Cundáhú ni rō jnáhan ró nájnūhun cundáhú ni rō maá ró, achí.

<sup>15</sup> Te núu máni jeē ndóna xeēn rō siquī jnáhan ró jéē cuajnáhan ró, te coto ma snáa rō jniñu jeē ni sáha ya mēhñu ró jijnáhan ró.

### *Modo cuní ñayuu tu cándíje jíin modo sáha Espíritu*

<sup>16</sup> Súcuan cáhán rī jíin ró jijnáhan ró: Caca ró nájnūhun cúní maá Espíritu, te yūcuán na te ma sáha ga rō modo jeē cuní maá ró.

<sup>17</sup> Chi tāca jéē cuní maá yó, yūcuan jési nuū jeē cuní maá Espíritu. Te jeē cuní Espíritu, jési nuū modo neé jéē cuní maá yó. Te jeē ndíndúú yáha chi cájesi nuū jnáhan, te jeē yūcuan tu cúu sáha ró jniñu vāha jeē cuní rō sáha ró.

<sup>18</sup> Te núu máá Espíritu steén nuū rō, núu súcuan te tuá cáyihí ró chíji ley jengahán.

<sup>19</sup> Te iyó ndijin tācá jniñu casáha ñayuu cájica jíin modo neé máá, te yáha cúu: Cásiquí ndéé jnáhan i, casáha i jniñu jnéhén, casáha neé ndasí i.

<sup>20</sup> Cáchiñúhún i ídolo, casáha tásí i, cájito uhū jnáhan i, cájejnáhan i, cácuquíñí ni i. Te yachí cáquití ni i, te cándihví ni i jeē cúu máá-ni i, te cátejnáhan i casásñn i máá i.

<sup>21</sup> Te cácuquésún ni i, cájehni i ndíyi, cánajini i, casáha i vico neé, jíin táca gá jeē súcuan. Te cáhán nihin rī jíin ró, nájnūhun je ni cahán rī jíin ró saá, jeē ñayuu casáha súcuan, ma nihín tahú i quivicoo i ñuu nuū ndácu Yaā Dios jniñu.

<sup>22</sup> Te ñayuu jeē nduú i jíin Espíritu, tācá jniñu yáha sáha ya jíin i: Jeē cundáhú ni jnáhan, jeē cúsiñ ni, jeē iyó ndeyí sñ ni, jeē iyó paciencia, jeē maní ni, jeē vāha ni, jeē squícu vāha,

<sup>23</sup> jeē tu sáha jeē cujéhnu, jíin jéē jési modo jeē cuní maá. Te tú na ley cacān cuéchi siquī rō núu sáha ró táca jniñu yáha.

<sup>24</sup> Te ñayuu cáyihí ndaha Cristo, nájnūhun je ni cajehni i modo neé máá i jicā cruz, nde jíin táca jéē ndíyo neé ni i te cútíndí i.

<sup>25</sup> Te jeē súcuan ni jēhe máá Espíritu ñn vida jeé núu yō, te suni na cáca yó jíin modo steén Espíritu.

<sup>26</sup> Te ma sandúxí yó jéé squití ni yō jnáhan yó, te ni ma cucuésún ni yō siquī jnáhan yó.

*Jnūhun jeē chindéé ñáhán yó jnáhan yó*

## 6

<sup>1</sup> Hermano, núu ñn jnáhan ró ni sáha cuéchi, te róhó jéé cájica jíin Espíritu, na náchuhun ichí ró i. Te jíin jnúhun vítá cahān rō jíin i, te suní condito ró máá ró jeē ma cacán ini rō sáha ró táca cuéchi.

<sup>2</sup> Te chindéé ñáhán ró jnáhan ró núu na vé cúu jeē ndóho i, chí súcuan cúu jeē squícu ró ley Cristo.

<sup>3</sup> Chí núu ñn ñayuu jéni ni i jeē ñáyuu teyí cúu i, vésú nasūu súcuan cúu, te stáhú i máá i núu súcuan.

<sup>4</sup> Te táca ñn ñn ró na cóto ndee rō ndese cáa jniñu sáha ró. Te núu vāha sáha ró, yūcuán na te cuu cusñ ni rō jíin jéé sáha máá ró, te tu níni jéé scáni jnáhan ró máá ró jíin jnáhan ró.

<sup>5</sup> Chí táca ñn ñn yó cánuú squícu yó jíin jniñu ní jéhe ya nuū máá yó.

<sup>6</sup> Te róhó jéé cascuáha jnūhun vāha ya, na chindéé ñáhán ró tēe cástéén nuū rō jíin táca jéé vāha cánevāha ró.

<sup>7</sup> Ma stíví ró cani ni rō jeē cuu sáha ró cuéchi. Chí ma cúu sácata rō nuū Yaā Dios cani ni rō jeē tu sáha ya cuenta. Chí táca núu ndese sáha ñayuu, suu yūcuán nanihñ i.

<sup>8</sup> Chí ñayuu jeē sáha i jeē cuní modo neé máá i, nihñ i jeē jnahnú ndetū i sáha modo jeē cuní máá i ún. Te ñayuu jeē sáha jeē cuní máá Espíritu, chí nihñ i jeē cótecu i ní cáni andíví sáha Espíritu.

<sup>9</sup> Te ma cuíta yó jeē sáha yó jniñu vāha núu súcuan, chí jeē quée máá quíví te nanihñ yō, te núu ma cuíta yó.

<sup>10</sup> Núu súcuan te táca jínu jeē cúu sáha yó, te na sáha vāha yó jíin táca ñáyuu, te hermano yō jeē cácandíje cúu jeē cánuú gá.

*Saludo jíin jnúhun cástūhun Pablo jeē sándihí*

<sup>11</sup> Condēhe ró jeē náhnu letra tée ri cuajeé nuū rō jijnáhan ró, chí ndaha máá rí tée ri yāhá.

<sup>12</sup> Te tēe jeē casáfuerza de róhó cuu ró circuncidar, cásáha de siquī jeē cácuni de cuajnúhñ ñáyuu de. Te cásáha de návāha ma cóto xeñ ñayuu de jeē cánacani de jnūhun jeē ni jíihí Cristo jehē yō.

<sup>13</sup> Te ni máá de jeē casáha de circuncidar, suni tu squícu vāha de ndihí ga ley jenahán. Te cácuni de jeē cuu ró circuncidar, návāha cuu sátéyí de máá de núu quihñ ró jnúní circuncidar sáha de.

<sup>14</sup> Te ruhū tu cuní rí sátéyí rí máá rí siquī ní ñn jeē yúcuan, chí máá ñn-ni siquī jeē ni jíihí Jitoho yō Jesucristo jíca cruz. Chí siquī yúcuan cúu nájnūhun ni jíihí rí, chí ni siaá rí táca jéé iyó ini ñayíví, te suni nájnūhun ñn ndiyí cúu ri nuū ñayíví.

<sup>15</sup> Chí núu yíhi yó ndaha Cristo Jesus, te tu níhín jniñu núu cúu yó circuncidar chí tuú. Chí jeē níhín jniñu cúu jeē ní nasájeé yá anuá yó.

<sup>16</sup> Te ñūhun ni rí jeē táca ró jeé jíca ró jíin modo yáha, na sáha ga yā jeē coo ndeyí coo siñ ni rō, te cundáhú ni yā rohó. Te suni ñūhun ni rí jeē súcuan sáha ya jíin táca gá i jeē cúu ndije i ñayuu cácandíje Yaā Dios.

<sup>17</sup> Te vijna jíin ní gá cuahān yō, cúní rī jeē ma stáhān gā ni #n ñayuu ruhū. Chi yiqui cúñu rī ndiso seña jeē ni tújī rī ni ndoho ri jeē cúu ri mozo maá Jítoho yō Jesús.

<sup>18</sup> Hermano, ñúhun ni rī jeē na sáha ga Jítoho yō Jesucristo jeē váha róhó jíjnáhan ró. Súcuan na cóo. Amén.

## CARTA JEE NI TEE APOSTOL SAN PABLO NUU ÑAYUU ÑUU EFESO

<sup>1</sup> Máá rí cúu Pablo, apóstol Jesucristo, chi súcuan ni nujnahan ni Yaā Dios ni taji yá ruhū. Te tée ri carta yáha cuájeē nuū rohó ñáyuu ñuu Efeso, jeē cácuu ró ñáyuu maá yá jeē cácañdije ró Cristo Jesús.

<sup>2</sup> Te ñūhun ni rī jeē Tatá yō Yaā Dios jiin Jítoho yō Jesucristo, na sáha ga yā jeē váha rōhó, te sáha ya jeē coo ndeyí coo sī ni rō.

### *Jeē sáha Cristo jeē quéndōo vāha ánuá yō*

<sup>3</sup> Na cáhán yō jeē yóhoyo cújéhnū Yaā Dios, Yaā cúu Tatá Jítoho yō Jesucristo. Chi ni jēhe ya táca jéē váha íyó andiví jéē quéndōo vāha ánuá yō, chi yīhi yō ndaha Cristo.

<sup>4</sup> Chi nde ná tu jecōo ñayiví te ni nacāji ya yohó jéē quiví yó ndaha Cristo, návāha coo ndoo ánuá yō te caca ndaā yō nuū yā.

<sup>5</sup> Je ni cundáhú ni yā yohó nde saá, te ni tana ya yohó jéē náquihin séhe ya yohó. Te jiin Jesucristo ni sáha ya súcuan, chi ni nujnahan ni yā sáha ya.

<sup>6</sup> Te jeē yúcuan níni na cáhán yō jeē yóhoyo cújéhnū ya, chi yóhoyo vāha ni sáha ya yohó jiin táca jéē váha ni yā, siquī jeē yīhi yó ndaha Cristo, Sēhe ya jeē maní yā jiin.

<sup>7</sup> Te siquī jeē yóhoyo vāha ni yā jiin yó, te Sēhe ya ún ní jnama ya yohó jéē ni jíhi yā jēhe yō, te ni ine cáhnu ni yā nuū cuéchi yó.

<sup>8</sup> Te ni steén yā jeē cundáhú ndasí ni yā yohó, te ni sáha ya jeē jécūhun ni yō te cundíchí yó jiin jnūhun ya.

<sup>9</sup> Te ni sáha ya jeē cuni yō in jnūhun ya jeē ní yisáhí, jeē tu ní sáha ya jeē cuni ñáyuu jenahán. Chi súcuan ni tee ni yā nde saá, te újnahan ni yā sáha ya.

<sup>10</sup> Te yāha cúu jnūhun ún: Nde na quée tiempo te sáha ya jeē ndihi jeē yúcu andiví jiin jéē yúcu ñayiví, inuú-ni nduu, quihí ndaha Cristo.

<sup>11</sup> Te siquī jeē yīhi yó ndaha Cristo, te nihin yō tahū yō, chi je ni nacāji Yaā Dios yohó nde saá. Chi súcuan ni tee ni maá yá, chi sáha ya táca-ni jeē jé ni cundaā ni yā jeē újnahan ni yā sáha ya.

<sup>12</sup> Súcuan ni sáha ya návāha máá rí jeē xíhna gā ni cacandije ri Cristo, caca ndaā rí te súcuan sájéhnū ri yā jeē yóhoyo luu cújéhnū ya.

<sup>13</sup> Te suni máá ró jijnáhan ró, ni cajini ró jnūhun ndaā jnūhun vāha jeē jnáma ya rohó, te ni cacandije ró Cristo. Te ni canihin rō Espiritu Santo jeē ni jéjnūhun ya jeē cuáha ya. Te ndéé Espiritu yā ún ini anuá yō, te cúu ya nájnūhun sello jeē steén jeē cúu yó séhe Yaā Dios.

<sup>14</sup> Te sáha ya jeē jiní ndije yó jéē cucuéé gá te cuāha Yaā Dios tahū yō, nde na sínu ya jniñu jeē jnáma ya ñáyuu yā. Te quiví ún cahán yō jeē cújéhnū ya, chi yóhoyo luu cújéhnū ya.

### *Jeē jicán tahú Pablo jehē ñáyuu cácañdije*

<sup>15</sup> Te ruhū ni jini jnūhun ri ndese cácañdije ró jéē ni sáha Jítoho yō Jesús jehē rō, jiin ndese cácañdáhú ni rō ndihi ñáyuu cáyihí ndaha Yaā Dios.

<sup>16</sup> Te jeē yúcuan tu jécuiñī rī jeē nácuatáhú rí jehē rō, te jeē jicán tahú rī te tu ná ni rī cacān tahú rí jehē rō.



<sup>17</sup> Chi jícan tahú rī jeē na sáha Yaā Dios jeē jécūhun vāha ni rō te ndundíchi ró jíin jnúhun ya, te cuni gā rō ndese Yaā cúu ya. Chi máa yá cúu Yaā Dios Jitoho yō Jesucristo, te cúu ya Tatá yō jeē lúu ndasí cújéhu.

<sup>18</sup> Te jícan tahú rī jeē na sándijin gā yā nuū jeē níjnūnī rō, návāha jecūhun ni rō ndese cáa ndíhi jeē cáñuhun ni rō nihīn rō síquī jeē ní cana ya rohó. Te jecūhun ni rō ndese cúca cácuu ró jíin táca jnúhun jéhu luu ndíso jnúhun ya jeē cúu ñayuu maá yá.

<sup>19</sup> Te jícan tahú rī jeē na jécūhun ni rō ndese yōhyo jéhu poder yā jeē sájniñu ya ini anuá yohó jéé cúu yó ñayuu cácandíje. Chi tu ndíhi cuiti poder yā.

<sup>20</sup> Te suu poder un cúu jeē ni stéen yā ná ni sáha ya ñin jniñu jéhu ga jeē ní nastécu yā Cristo mēñhu ndíyi te ni scúcōo ya lado váha ya nde andiví.

<sup>21</sup> Te ni jeni ya Cristo síquī táca jéé cújéhu, jíin jéé ndíso jniñu, jíin jéé jñí poder, jíin jéé ndácu jniñu, jíin síquī táca jeē cácahān ñayuu jeé cújéhu, cúu tiempo yáha, cúu tiempo quiji.

<sup>22</sup> Te ni jēhe ya jeé cújéhu Cristo síquī ndivii. Te ni sáha ya jeé cúnuú yá cújéhu ya nuū ñayuu cácandíje.

<sup>23</sup> Te ñayuu cácandíje un cácuu i nájnūhun yiqui cúñu ya, chi ñin na cúu i jíin yá te ñúhun chitú yá ini anuá i, chi Yaā jeē ñúhun chitú ní cáhnu-ni cúu ya.

*Ni cácu yó síquī jeé ní cundáhu ni yā yohó*

## 2

<sup>1</sup> Te ni sáha ya jeé cotecu rō ní cáni jíin Cristo. Chi je ni cacuu ró nájnūhun ndíyi nuū yā, ni sáha cuēchi ró jíin jniñu néé ní casáha ró.

<sup>2</sup> Chi ni cajica ró jíin jniñu yúcuan nde saá, ná ni cacondiquīn rō jniñu ñayuu ñayiví, ná ni cajetáhú ró núú jexeén jeē ndácu jniñu nuū táca táchí xeén, te jica nuú tachí. Te suu cúu jeé scánda ñin ñayuu ñihni ni nuū Yaā Dios.

<sup>3</sup> Te máa rí jijnáhan ri, suni súcuan ni cajica ri, chi ni casáha ri jniñu néé jéé cuni maá rí, jíin táca jéé jícan yiqui cúñu rī, jíin jéé cájeni néé ni rī nde saá. Jeé yúcuan suni ni cacuu rī ñayuu jeé ñihīn castigo xeén jeé cuáha ya nuú, chi ñnuú-ni ni casáha ri nájnūhun casáha máa i.

<sup>4</sup> Te Yaā Dios chi yōhyo cuehē ni cundáhu ni yā yohó, te vāha ndasí ni yā jíin yó.

<sup>5</sup> Te náa cúu yó nájnūhun ndíyi nuū yā ni sáha cuēchi yó, te ni nastécu yā yohó jéé cotecu yō ní cáni jíin Cristo. Chi síquī jeé yōhyo vāha ni yā cúu jeé ní jnama ya yohó.

<sup>6</sup> Te ni nastécu yā yohó jéé cotecu ñnuú yó jíin Cristo Jesús, te scúcōo ya yohó jíin yá nde andiví.

<sup>7</sup> Súcuan ni sáha ya návāha ní gá tiempo jeé quíji, te stéen yā ndese yōhyo maní yā jíin yó, jíin ndese vāha ni yā jíin yó jeé síquī Cristo Jesús.

<sup>8</sup> Chi síquī jeé yóhyo maní yā jíin ró cúu jeé ní jnama ya rohó, chi ni cacandíje ró jéé sáha ya jēhē rō. Te nasūu síquī jeé ní casáha máa ró cúu, chi tahū jeé ni jēhe ya nuū rō cúu.

<sup>9</sup> Chi tú na jniñu vāha ní casáha yó jéé jnáma ya yohó, te jeé yúcuan ni ñin yó ma cúu sátéyi yó maá yó.

<sup>10</sup> Chi cúu yó ñin jniñu luu jeé ní nasáha máa yá, chi ni nasáha ya yohó jéé cundúu yó jíin Cristo Jesús, návāha sáha yó táca jniñu vāha jeé jé ni sátūhva Yaā Dios jeé sáha yó.

*Jeé sáha Cristo jeé ndíyi yó núú jnúhun maní Yaā Dios jíin yó*

11 Núu súcuan te na núcūhun ni rō ndese ñayuu ni cacuu ró ndé saá. Chi tu ní cácuu ró ñayuu hebreo, chi sa suhva ni cacuu ró ñayuu táca nación jeē tu jíni jñūhun ya. Te ñayuu hebreo jeē casáha circuncidar yiqui cúñu, ni cacahān i jeē cácuu ró ñayuu tu sáha circuncidar.

12 Na núcūhun ni rō jeē ndé saá tu ní cáhiin ró jíin Cristo, te ni cacuu ró ñayuu ñuu jicá núu nación Israel. Te tu ní cájini rō táca jñūhun contrato jeē ni jéjñūhun Yaā Dios. Te tu ní íne Yaā Dios jíin ró ñayivi yáha, te tú na vé jeē váha ní cáñuhun ni rō jeē cóo.

13 Te vjna chi ni ndivicoo ró núu Yaā Dios jeē tu ní cájini rō jñūhun ya nde saá, chi ni quivicoo ró ndaha Cristo siquī jeē ni jihī yā jehē rō.

14 Chi Cristo cúu Yaā sáha jeē ndúmanī jñáhan yó. Chi ní sáha ya jeē ñayuu hebreo jíin ñayuu táca gá nación, ni nduu yó ñn na nuū yā. Chi ní sáha ya jeē tuá jito uhū jñáhan yó, te suu cúu nájnūhun jeē ní jenu ya ñn jeē ndihyú sava mēñu yó jeē sásin yóhó.

15 Chi ní socō yā maá yá ni jihī yā, te súcuan ni ndahva yā ley jenahán jíin jñūhun ndácu jñiñu jíin jeē tajnúni ndiso máa. Chi ley un ní sásin ñayuu hebreo jíin táca nación jeē tu ní jíni i ley un. Te ní nasquijñáhan ya ndihi yó jeē ní nduu yó ñn na nación jeé, yñi yó ndaha ya. Te súcuan ní sáha ya jeē ní ndumanī jñáhan yó.

16 Te jíin jeē ni jihī yā jicā cruz, te ní snáa yā jñūhun cájito uhū jñáhan ñayuu hebreo jíin táca gá nación. Te ní sáha ya jeē ndivicoo yó núu jñūhun manī Yaā Dios jíin yó, te ní nduu yó ñn na ñayuu maá yá.

17 Chi ní quiji Cristo ni nacani ya jñūhun váha nuū táca ñayuu jeē na ndivi i nuū jñūhun manī yā jíin i, cúu rohó ñayuu tu ní cájini jñūhun ya, te suni ñayuu jñáhan ri hebreo jeē cájini jñūhun ya.

18 Te vjna te siquī jeē ní jihī Cristo, te ndihi yó, cúu ñayuu hebreo chí ñayuu táca gá nación, cuu quivicoo yó núu Tatá yó Yaā Dios, te ñn-ni Espiritu yā sáha.

19 Núu súcuan te tuá cúu ró nájnūhun ñayuu ñuu jicá ní ñayuu tatú, chí ñn na ní nduu ró jíin ñayuu ñuu maá yá. Te jñáhan ñayuu vehe Yaā Dios cácuu ró.

20 Te cácuu ró nájnūhun ñn ñn parte ñn vehe cáhnu jeē cúváha siquī cimientó, te cimientó un cúu jñūhun Cristo jeē ní canacani táca apóstol jíin tée ní canacani jñūhun ya jenahán. Te máa Jesucristo cúu nájnūhun yuū cánuú gá jeē yítuu vehe.

21 Te ní vehe cúváha váha siquī maá yá, cúsucún cuáhān, cúu ñn templo i jeē ndeé maá Jítoho yó.

22 Te suu cúu máa ró jijnáhan ró, chí ndúú ró jíin Cristo, te inuú-ni sáma ya rohó jíin táca ñayuu cácadije, cácuu ró nájnūhun ñn ñn yuū templo. Te suu cúu jeē ndeé Espiritu Yaā Dios ini rō nájnūhun ini ñn templo.

*Jeē ndiso jñiñu Pablo nacani de jñūhun nuū ñayuu tu jíni jñūhun Yaā Dios*

### 3

1 Te jeē yúcuan ruhū Pablo, jicán tahu rī nuū yā. Te íne ri vecāa siquī jeē ní nacani ri jñūhun Cristo Jesús nuū rohó ñayuu táca nación jeē tu ní jíni jñūhun ya nuū.

2 Te jíni rī jeē ní cajini ró jñūhun ndese yóhyo váha ni sáha Yaā Dios jíin rī, chí ní jehe ya jñiñu nuū rī jeē nacani ri jñūhun váha ya nuū rō.

3 Te jñūhun ya jeē ní yisáhi, ní nastúu ya nuū rī, nájnūhun je ní tee ri jecu siquī un núu rō.

4 Te núu na cáhu ró te cuu jecūhun ni rō jeē ní jini vāha ri jnūhun Cristo jeē ní yisāhí un.

5 Te tu ní stéén yā jnūhun sāhí un núu ní ññayuu tāca cuiyā ní quiiji ichi yátá. Te vijna cúu jeē steén ndijin yā jíin Espíritu yā nuū tācá apóstol jeē ní jeni ndoo ya, jíin nuū téé cánacani jnūhun ya.

6 Te súcuan cáhán jnūhun ní yisāhí un: Ñayuu tāca gá nación, ññ cáhnu-ni nihin i tahú i jíin ñayuu hebreo, chi ni cacandíje i jnūhun jeē jnáma ya i. Te ñnuú-ni ni nduu ndíhi i, te ññ cáhnu-ni quéndōo ndetū anuá i sáha Cristo, nájnūhun ni jejnūhun Yaā Dios.

7 Te jeē siquí jnūhun yáha cúu jeē ní jeni ya ruhū jeē nácani ri jnūhun nuū rō. Chi ni cutahú rí jniñu luu yáha jeē ní jéhe ya nuū rí. Te jíin poder yā ni sáha ya un jíin rí.

8 Te ruhū chi cúu ri tēe núu ga nuū tāca ñayuu núu ga jeē yíhi ndaha ya. Te vésú súcuan te nuū maá rí ni jéhe ya jniñu luu yáha jéē nácani ri jnūhun vāha ya nuū ñayuu tācá nación jeē tu jíin, ndese yōhoyo cúcá yó ndíhi jeē ndíso jnūhun Cristo, jeē ma cánda cuiiti yō jecūhun ni yō.

9 Chi ni jeni ya ruhū jeē steén cají rí jeē suni máá i jnama ya i. Te yūcuan cúu jnūhun Yaā Dios jeē ni yisāhi ndé jenahán ndasí, chi máá yá ni sáha ndíhi-ni.

10 Te súcuan ni sáha ya jíin ñayuu, návāha vijna te tāca jéē cácujeñnu jíin jéē ndíso jniñu nuū sucún, na cúni ndese ndíchí ndasí Yaā Dios. Chi ndíchí ndasí ni sáha ya jíin ñayuu cácandíje.

11 Chi súcuan ni tee ni yā nde ññ cáni, te ni sáha ya jeē Jítoho yō Cristo Jesús ni squícu ya ún.

12 Te siquí jeē ni sáha Cristo, te vijna te jíin ndije yó jéē cúu quívi yó cáhán yō jíin Yaā Dios siquí jeē candíje yó Cristo.

13 Núu súcuan te cáhán ndahú rí jíin ró jeē ma cucuíhyá ni rō siquí jnūndóho jeē ndóho ri jehē rō. Chi suu sáha jeē quéndōo ndetū anuá rō jijnáhan ró.

### *Cristo yōhoyo cúndáhú ni yā yohó*

14 Te jeē yūcuan cúu jeē jécuiñi yiti rí nuū maá Yaā cúu Tátá Jítoho yō Jesucristo.

15 Te máá yá cúu Tátá nuū ndíhi ñayuu yā jeē yúcu andívi jíin ñayívi.

16 Te jíicán tahú rí jeē jíin poder yā jeē cujéñnu ndasí yá, na sáha ya jeē íje vāha ni rō jíin jnūhun ya, te coo fuerza ini anuá rō, sáha Espíritu yā.

17 Te jíicán rí jeē candíje nihin ró Cristo, návāha condee yā ini anuá rō, te jniñ vāha ró jnūhun jeē cundáhú ni yā rohó, te cuiñi nihin ró jíin.

18 Te súcuan te cuu jecūhun vāha ni rō jíin táca ñayuu candíje, ndese cáa jnūhun cúndáhú ni Cristo yohó. Chi yōhoyo jíté, cáni, cúnu, súcún jnūhun ún, chi yōhoyo cuehē sáha.

19 Te jíicán rí jeē na cúni vāha ró ndese cúndáhú ni yā yohó, vésú tu cúu cuiiti jecūhun ni yō ndíhi ndíhi. Te súcuan te cundúú ró jíin Yaā Dios jeē cunuú yá ini anuá rō.

20 Núu súcuan te na cáhán yō jeē yōhoyo luu cújéñnu ya, chi máá yá cúu Yaā iyó poder jeē sáha ya jeē váha ndasí gá vésú ndíhi jeē jíicán yō chí jéē jéni ni yō. Te sáha ya un jíin poder yā jeē sájniñu ini anuá yō.

21 Te na cáhán yō jeē yōhoyo luu cújéñnu ya jeē siquí jeē ni sáha ya jehē ñayuu cácandíje jíin jéē siquí Cristo Jesús. Te súcuan na coo nde ññ cáni cuiiti tiempo jeē quiji. Amén.

*Ñnuú-ni cácuu ñayuu cácandíje sáha Espíritu*

## 4

<sup>1</sup> Te ruhū jeē ine ri vecāa siquī jnūhun maá Jítoho yō, cáhán ndahú rí jín ró jeē na cáca ndaā rō nájñūhun cánuú caca ró jeē cácuu ró ñayuu ni cana ya.

<sup>2</sup> Te níni na cóo suchí ni rō, te coo vītá ni rō. Te na cóo paciencia rō, te cuandeyí ni rō jín jnáhan ró jeē cundáhú ni rō i.

<sup>3</sup> Te na cóndihvī ni rō coyūcu mánī inuú ró, sáha máá Espíritu nuū véji jñūhun maní ni.

<sup>4</sup> Chi ñn-ni cácuu ñayuu maá yá, te íyó ñn-ni Espíritu, te inuú cáñūhun ni yō jeē cóo jeē váha siquī jeē ní cana ya yohó.

<sup>5</sup> Te íyó ñn-ni Jítoho yō, jín ñn-ni jñūhun cándíje yó, jín ñn-ni jñūhun jéndute yó.

<sup>6</sup> Te íyó ñn-ni Yaā Dios jeē cúu Tátá yō jijnáhan yó. Te máá yá cujéñnu siquī ndihí yó, te sájniñu ya jín ndihí yó, te ndeé yá ini ndihí yó.

<sup>7</sup> Te táca ñn ñn yó ní cacutahū yō sñn sñn jniñu sáha yó, núu ndese ni tana Cristo cūhva tahū un núu yō.

<sup>8</sup> Jeē yúcuan cáhán tutu ñ:

Ná ni ndaa ya cuanuhun yā andiví, te ni stutú yá cuehē jeē yíndihyū, cuahān yā jín.

Te ni saja ya tahū nuū táca ñayuu.

<sup>9</sup> Te jeē cahán tutu jeē ní ndaa ya, suni cúní cahān jeē xīhna gā nde andiví ni cuun ya nde nuū cunú gá ñayiví yáha.

<sup>10</sup> Te Yaā ní cuun, suni máá yá cúu jeē ní ndaa nde nuū sucún gá andiví, návāha cuhun chitú yá ní cáhnu-ni.

<sup>11</sup> Te ni tana ya sñn sñn jniñu sáha ñayuu. Chi ni jeni ya sava ñayuu cuu apóstol, te sava ga nacani jñūhun ya, te sava ga scándíje ñayuu jñūhun jeē jnáma ya i, te sava ga coo pastor condito ñayuu cácandíje, te sava ga steén.

<sup>12</sup> Súcuan ni jeni ya ñayuu maá yá jeē cuajniñu i nuū yā, návāha cuehnu ga ñayuu Cristo jín jñūhun ya.

<sup>13</sup> Te súcuan coo nde nduu inuú-ni ndihí yó jín jñūhun cándíje yó, te cuni váha yó ndese Yaā cúu Sēhe Yaā Dios. Te súcuan ije váha yó ndé na cúchitú yó jín ndihí jñūhun jeē ññūhun chitú ini Cristo.

<sup>14</sup> Te súcuan te ma cóo ga yō nájñūhun sūchi lúlí jéē yachí jéni yāha jéni yūcuán ni i, ni ma quiví nduu yō chíha chúcuan jín sñn sñn jñūhun jeē cástéén tē stáhú jéē yóhyo ndito de squívi de yóhó nuū jñūhun stáhú.

<sup>15</sup> Chi sa suhva na cóndiquñ yō jñūhun ndaā jín jñūhun cundáhú ni. Te súcuan cuehnu yó jín táca jniñu cúní Cristo, Yaā cujéñnu nuū ñayuu cácuu nájñūhun yiquí cúñu yā, chí ñn na cúu i jín yá.

<sup>16</sup> Te sáha ya jeē nduu inuú ni táca i jeē cáhije i cuahān i, chí cácuu i nájñūhun ñn na yiquí cúñu jín yá. Te jéjniñu váha táca ñn ñn i ndese ni nihñ jniñu i, návāha scuéñnu jnáhan te ije jijnáhan jín jñūhun cundáhú ni.

### *Jeē ndújeé yó sáha Cristo*

<sup>17</sup> Núu súcuan te yāha cúu jñūhun cáhán rí jín ró, te jeē achí Jítoho yō cúu jeē cahán nihñ rí jín ró: jeē ma cáca ga rō nájñūhun cájica sava ga ñayuu jeē tu jíní i ndese Yaā cúu Yaā Dios, chí cájica i jín jñūhun jeē jéni sáa-ni máá i.

<sup>18</sup> Te íyó nee nuū jeē njññí í, te tu névāha i Espíritu jeē véji nuū Yaā Dios, chí tu jíní i jñūhun ya, siquī jeē níhni ni i.

<sup>19</sup> Te tuá cúcanu i, chí ni quivícoo i jín jniñu néé ndasí, te ndíhví ni i sáha i táca jniñu jnéhñ.

20 Te rǒhó jǐjnáhan rǒ, nasūu súcuan ní cáscuáha rǒ jnúhun Cristo,

21 te núu ndaā jeē ní cajini rǒ jnúhun ya jíin jeē ní cacutǔhva rǒ jíin jnúhun ndaā Jesús.

22 Núu súcuan te na stóo rǒ táca jniñu ní casáha rǒ ichi yátá, ná ni casáha rǒ modo cuní maá rǒ jeē ní cunjéhén ánuá rǒ ni sáha jniñu néé stáhú jeē ní ndiyo ní rǒ.

23 Te na ndújeé ánuá rǒ jíin jeē níjnūnǐ rǒ.

24 Te na cuáha rǒ jnúhun ndujeé rǒ, chí nasáha Yaā Dios rohó nájñūhun cuní maá yá jeē cáca ndaā rǒ jíin jniñu váha jniñu ndoo.

25 Núu súcuan te ma cahán gā rǒ jnúhun stáhú, te na cáhán ndaā rǒ jíin táca jnáhan rǒ, chí ñin-ni cácuu ndihí yó.

26 Núu vēji ñin jeē squitǐ ní rohó, te ma quitǐ neé ni rǒ. Te ma quitǐ ni rǒ nde quēe niāndii.

27 Ma cuáha rǒ jnúhun jeē sáha jexeén jeē quǐvi rǒ cuéchi.

28 Ñayuu ní sacuíhná, ma sacuíhná gá i, chí sa suhva na sájniñu i, te na cócuu i jíin jniñu váha, návāha nihīn i jeē cuáha i nuū ñáyuu cúmanǐ nuū.

29 Ni ñin jnúhun néé ma cahán rǒ, chí sa suhva na cáhán rǒ jnúhun váha jeē scuéhnu jnáhan jíin jnúhun ya, te sáha jeē quéndōo váha ñayuu jíini sōho.

30 Ma sáha rǒ cuéchi návāha ma cucuíhyá ni Espiritu Santo Yaā Dios. Chí Espiritu yā cúu nájñūhun sello jeē steén jeē cúu yó séhe Yaā Dios, nde quiji quǐvi jínu jniñu jeē jnáma ya rohó.

31 Te na siáá rǒ táca jnúhun cútucu ni, jíin jnúhun xeēn ni, jíin jnúhun quitǐ ni, jíin jnúhun cáhán ndevāha, jíin táca jnúhun néé.

32 Chí sa suhva na cóo váha ni rǒ jíin jnáhan rǒ, te cundáhú ni rǒ i. Na cóne cáhnu ni rǒ nuū jnáhan rǒ, nájñūhun ni ine cáhnu ni Yaā Dios nuū rǒ siquǐ Cristo.

*Ndese cánúú caca ndaā séhe Yaā Dios*

## 5

1 Núu súcuan te na ndácu rǒ Yaā Dios, chí cácuu rǒ séhe ya jeē manǐ yā jíin.

2 Te níni cundáhú ni rǒ jnáhan rǒ, nájñūhun ni cundáhú ni Cristo yohó, te ni socó yā maá yá jehē yō, ni cuu ya nájñūhun ñin londe jeē jeén asīn nuū Yaā Dios jeē ni sócō yā maá yá.

3 Te vijna jeē cácuu rǒ séhe Yaā Dios, te ni ma sáha rǒ ni ma ndájñūhun rǒ siquǐ jnúhun jíca jnéni, ní táca jniñu jnéhén, ni jnúhun ndiyo ni ndajniñu.

4 Te ni ma cahán rǒ táca jnúhun sáha jeē cúcanu jnáhan, ni jnúhun cánéé íi, ni jnúhun jeē tu ndé jéjniñu cuiiti. Chí táca un tu nihín jniñu. Chí sa suhva na nácuatáhú rǒ nuū Yaā Dios.

5 Chí je cájini rǒ jeē ní ñin ñayuu cájica jnéni, ni jeē sáha jniñu jnéhén, ni jeē ndiyo ní táca ndajniñu, ma nihín tahú i quǐvi i ndaha Cristo jíin Yaā Dios jeē ndacu ya jniñu nuū i. Chí táca jeē ndiyo ní i cúu nájñūhun ídolo i jeē cáchiñtǔhún i.

6 Te coto rǒ jeē ma stáhú ni ñin i rǒhó jíin táca jnúhun cáhán saá ni i, chí siquǐ táca jnúhun néé yáha cúu jeē quǐji castigo xeēn Yaā Dios nuū táca ñáyuu nihni ni.

7 Ma quǐvi nduu rǒ jíin i núu súcuan.

8 Chí táca quǐvi saá ni coyūcu rǒ nájñūhun nuū néé, te vijna chí cáyūcu rǒ jíin luz maá Jítóho yō, cúu jeē cájecūhun ni rǒ siquǐ yā. Te na cáca rǒ nájñūhun cájica ñayuu jeē steén luz yá ini anuá i.

<sup>9</sup> Chi jniñu sáha luz yā jíin yó cúu tǎcá jniñu manī ni, jniñu ndaā, jíin jniñu váha.

<sup>10</sup> Scuáha ró sáha ró táca jniñu jeē nújnahan ni maá Jítoho yō.

<sup>11</sup> Te ma quívi nduu rō jíin táca jeē tu níhín jniñu jeē casáha ñayuu cáyūcu nájnūhun nuū nēé. Chi sa suhva stéén rō nuū i jeē tú váha casáha i.

<sup>12</sup> Chi cúcanu yō cahān yō siquī jniñu casáha yuhu maá i.

<sup>13</sup> Te luz yā sáha jeē nátūu tǎcá jniñu nēé casáha i. Te núu cuatáhú i luz yā te caca i jíin luz ún.

<sup>14</sup> Jeē yúcuan cáhán tutu:

Róhó jeē cúhuun ni, jeē nájnūhun quíxi, natahū ni, te quenda ró méhñu ñayuu jeē cácuu nájnūhun ndiyi.

Te Cristo steén yā luz yā ini anuá rō.

Achí tutu.

<sup>15</sup> Núu súcuan te coto váha ró ndese caca yúcún ró. Te ma cáca ró nájnūhun cájica ñayuu canéé, chi caca ró nájnūhun cájica tēe ndíchí.

<sup>16</sup> Ma snáá rō tiempo, chi condihví ni rō jíin jniñu ya, chi íyó cuéhé cuéchi quívi yáha.

<sup>17</sup> Núu súcuan te ma cóo nēé xíní rō, chi sa suhva na jécūhun váha ni rō na jniñu nújnahan ni maá Jítoho yō.

<sup>18</sup> Te ma nájni ró, chi tiví ró sáha. Chi sa suhva na ndúcú ró jeē cúnuú Espíritu Santo ini anuá rō.

<sup>19</sup> Te cahān rō jíin náhan ró jíin salmo jíin himno, yaa ii jeē cahán jnūhun ya. Te ini anuá rō cahān rō jíin yá jíin táca yaa, chi yúcuan cúu jeē jíta ánuá rō nuū yā chíñúhún ró yā.

<sup>20</sup> Te níni nacuatáhú ró siquī tǎcá-ni nuū Tatá yō Yaá Dios te ndacunehen ró síhvi máá Jítoho yō Jesucristo.

### *Ndese squícu váha ñayuu cácadíje nuū jnáhan i*

<sup>21</sup> Te cuatáhú ró nuū jnáhan ró síquī jeē cáhíyo yíñúhún ró nuū Cristo.

<sup>22</sup> Róhó ñahan cácuu ñasihí, cuatáhú ró nuū yí ró, nájnūhun jétáhú ró nuū Jítoho yō.

<sup>23</sup> Chi yí cújéhnu nuū ñasihí, nájnūhun cújéhnu Cristo nuū yohó ñayuu cácadíje, jeē cácuu yó nájnūhun yiqui cúñu yā, chi ñn na cúu yó jíin yá. Te máá yá jnáma ya yohó.

<sup>24</sup> Chi nájnūhun ñayuu cácadíje cájetáhú i nuū Cristo, suni súcuan ñasihí cuatáhú ña ndihi jeē cahán yí ña.

<sup>25</sup> Te róhó tēe cácuu yí, cundáhú ni rō ñasihí ró, nájnūhun ni cundáhú ni Cristo yohó ñayuu cácadíje, te ni socō yā maá yá jehé yō.

<sup>26</sup> Súcuan ni sáha ya jeē cóo ndoo coo ii yō nuū yā, te ni nacate ya anuá yō jíin jnūhun ya jíin jéé ní jendute yó.

<sup>27</sup> Te yohó ñayuu cácadíje chí cuiñi yó núu yā, te luu cújéhnu yó. Te ma cóndee cuéchi ánuá yō, ni jeē tú luu, ni ñn jeē súcuan, chí sa suhva coo ndoo coo ii yō nuū yā, te tú na vé cumaní gā.

<sup>28</sup> Te nájnūhun Cristo ni cundáhú ni yā ñayuu cácadíje, suni súcuan cánuú jéé cundáhú ni yí ñasihí de, nájnūhun cundáhú ni de máá de. Chí tēe cundáhú ni de ñasihí de, máá de cundáhú ni de.

<sup>29</sup> Chí ni ñn tēe tu jító uhū de máá de, chí sa suhva yéji de te ndíto yúcún de máá de. Te suni súcuan sáha Cristo jíin yohó ñayuu cácadíje nuū yā.

<sup>30</sup> Chi cácuu yó nájñūhun yiqui cúñu yā, te ñin ñin yó cácuu nájñūhun ñin ñin parte yiqui cúñu yā.

<sup>31</sup> Te suu cúu nájñūhun tēe jeē stóo de tátá de náná de, te quijnáhan de jín ñasihí de, te ñin na cúu ndindúú de.

<sup>32</sup> Yōhyo jéñu jñūhun sāhi yáha, te cáhán rī jeē ñáyuu cácadije suni súcuan quijnáhan i jín Cristo.

<sup>33</sup> Te suni súcuan ná ñin ná ñin ró cundáhú ni rō ñasihí ró, nájñūhun cundáhú ni rō maá ró. Te ñasihí na cúu yñúhún ña jín yí ña.

## 6

<sup>1</sup> Te rōhó séhe jijnáhan ró, cuandije ró nuū tatá rō nuū naná rō, chi yūcuan cúu jeē váha sāha ró jeē candije ró Jítoho yō.

<sup>2</sup> Chi yáha cúu ñin jnáhan jeē uxí jñūhun ndácu jniñu jeē ni jéhe ya, te xihna gā jñūhun yáha ndíso tahū: Coó yñúhún ró nuū tatá rō nuū naná rō,

<sup>3</sup> návāha quendōo ndetū rō, te nánhán cotecu rō ini ñayivi yáha. Achí.

<sup>4</sup> Te rōhó tátá jijnáhan ró, ma squití ni rō séhe ró, chi sa suhva scuéñu ró i jín jñūhun cuandije i, te stéén rō nuū i jeē candije i máá Jítoho yō.

<sup>5</sup> Te rōhó mozo jijnáhan ró, cuandije ró nuū patrón rō ñayivi yáha, te coo yñúhún ró te conso Iyo ró nuū de. Te na sájñiñu ndaā sájñiñu ndije ró, cani ni rō jeē nuū Cristo cájejniñu ró.

<sup>6</sup> Ma sájñiñu ndúxi ró jeē maá jéé coto de te cuajnúhún de rōhó. Chi sa suhva sāha ró cuenta jeē mozo Cristo cácuu ró. Te sāha ró jeē nújnahan ni Yaā Dios nde jín ini jín ánuá rō.

<sup>7</sup> Te na cúsiñi ni rō sájñiñu ró, te na cáni ni rō jeē nuū maá Jítoho yō cájejniñu ró, nasūu núu ñáyuu.

<sup>8</sup> Chi je cájini rō jeē jniñu váha sāha ñin ñin ró, te nihin rō yáhu jniñu yūcuan núu maá Jítoho yō, vēsú cúu ró mozo chí tēe sájñiñu máá.

<sup>9</sup> Te rōhó patrón jijnáhan ró, suni súcuan sāha ró jín mozo rō, te ma cahán xeēn rō jín i. Chi na cócuhun ni rō jeē suni máá ró jín máá i yíhi ró ndaha Jítoho yō, Yaā ndeé andiví. Te tu sāha ya cuenta ndese cúu ñin ñin ñayuu, chi inuú sāha ya jín i.

### *Na cúcutú yó jín táca fuerza Yaā Dios*

<sup>10</sup> Te íyó inga jñūhun, hermano jijnáhan ró. Nducú ró jeē na cóo fuerza ini rō jín fuerza maá Jítoho yō jeē nduú yá jín ró, chi íyó téyí poder yā.

<sup>11</sup> Na cúcutú ró jín táca fuerza Yaā Dios, návāha cuu cuiñi ñihin ró jeē ma stahú jexeén rōhó.

<sup>12</sup> Chi nájñūhun jeē cájejnáhan yó jín táca jéé neé. Te nasūu ñáyuu cúu jeē cájejnáhan yó jín, chi sa suhva jín táca táchí cájica nuū súcun. Te yūcuan cúu jeē cácujeñu, jín jéé cándiso jniñu, jín jéé cándacu jniñu nuū ñáyuu ñayivi yáha jeē nájñūhun cájica i nuū néé.

<sup>13</sup> Núu súcuan te na cúcutú ró jín ndihi fuerza Yaā Dios, návāha cuu cuiñi ñihin ró quiví jito ndee jexeén rohó. Te súcuan coo tūhva ró jín táca ndihi jeé cuiñi ñihin ró jín.

<sup>14</sup> Núu súcuan te cuiñi ñihin ró jín jñūhun ndaā jeē cúu nájñūhun jeē yíhi ñihin sanchí chiji ró. Te sácútu ró maá ró jín jñūhun caca ndaā rō, te suu cúu nájñūhun jeē cúcutú soldado jín sahma cáa jeē ndihyú de.

<sup>15</sup> Te níni cotūhva ró nacani ró jñūhun ndeyí jñūhun siñi ni jeē véji nuū Yaā Dios. Te suu cúu nájñūhun jeé chíhi soldado ndijēn jehē de.

<sup>16</sup> Te jeē cānuú gá cúu jeē candíje ró jeē iyó yá jíin ró. Te yūcuan cúu nájñūhun jeē túhva ró máá ró yatā ñin escudo. Chi jíin jñūhun cándíje ró un te cuu ndahva rō ndihí jeē tají máá jéxeén, jeē cúu nájñūhun nduva jeē cayú yáñuhūn punta.

<sup>17</sup> Te cuiñi ró jíin jñūhun ni jnama ya rohó, jeē cúu nájñūhun ñin lélú cāa. Te cuajñiñu ró jñūhun jeē yosó nuū tútu Yaā Dios jeē ni jéhe Espíritu Santo nuū rō. Chi yūcuan cúu nájñūhun jéjñiñu soldado espada de.

<sup>18</sup> Te níni cācān tahú rō nuū Yaā Dios siquī ndihí-ni, te cahān ndahú ró jíin yá jíin fuerza Espíritu. Núu súcuan te ndito na cóo ni rō, te ma jécuiñī rō jeē cacán tahú rō jehē tāca ñáyuu máá yá.

<sup>19</sup> Te suni cahān rō jehē rī, návāha nihīn rī jñūhun cahān rī, te coo téyí ni rī nacani cájí rī jñūhun jeē jnáma ya yohó, suu jñūhun jeē ní yisáhí un.

<sup>20</sup> Chi ní tají yá ruhū jeē jíca rī nácani rī jñūhun ya ún, te jeē siquí un cúu jeē íne rī vecāa. Te na cācān tahú rō jeē coo téyí ni rī cahān rī jñūhun ya, nájñūhun cānuú cahān rī.

### *Saludo jeē sándihí*

<sup>21</sup> Tíquico cúu ñin hermano jeē maní yō jíin, te cúu de tēe squícu vāha chíndéé ñájñáhan jíin rí nuū jñiñu máá Jítoho yō. Te máá de castūhún ndihí ndese cuahān jñiñu rí te ndese íyó rí.

<sup>22</sup> Jeē yūcuan ní tají rí de cuajeē de nuū rō, návāha cachi de ndese cáhīyo rí, te coo ndeyí ni rō jíjñáhan ró sáha de.

<sup>23</sup> Te ñūhun ni rī jeē Tatá yō Yaā Dios jíin Jítoho yō Jesucristo, na sáha ya jeē coo ndeyí coo sīi ni tāca róhó jéē cácuu hermano, te coo maní gā rō jíin yá, te candíje vāha ró.

<sup>24</sup> Te ñūhun ni rī jeē na sáha ga yā jeē váha róhó jíjñáhan ró jéē maní ndije ró jíin Jítoho yō Jesucristo. Súcuan na cóo. Amén.



## CARTA JEE NI TEE APOSTOL SAN PABLO NUU ÑAYUU ÑUU FILIPOS

<sup>1</sup> Máá rí cúu Pablo jíin Timoteo, mozo Jesucristo. Te cátee ri carta yáha cuájeē nuū tāca róhó hermano cáyūcú ñuu Filipos, jeē cácuu ró ñáyuu maá yá jeē cáyihí ró ndaha Cristo Jesús. Te suni cátee ri nuū téē cándiso jíníñu cándito róhó, jíin nuū téē cájejníñu mēhñu ró.

<sup>2</sup> Te cáñuhun ni rí jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te sáha ya jeē coo ndeyí coo sīñ ni rō.

### *Jeē jicán tahú Pablo jehē ñáyuu cácadñje*

<sup>3</sup> Tāca jínu jeē núcūhun ni rí rohó jíjnáhan ró, te nácuatáhú rí nuū Yaā Dios.

<sup>4</sup> Te náa jicán tahú rí, te níni cúsiñ ni rí jicán tahú rí jehē rō.

<sup>5</sup> Chi ni chindéē ñájánhan ró jíin rí jeē scáca yó jnúhun váha ya, nde quiví ni cacandñje ró te nde vijna.

<sup>6</sup> Te jíni ndije ri jeē maá Yaā ní squéjéē jniñu váha jíin ró, cocu ya jíin ndé quiví ndíji Jesucristo, te sínu ndíhi ya.

<sup>7</sup> Te iyó váha jeē súcuan jéni ni rí siquī tāca róhó, chí yōhyo manī rí jíin ró, te inuú-ni ni sáha ya jeē váha yóhó. Te súcuan cúu vēsú íne ri vecāa chí vēsú cuiñi rí nuū tāca téē cújéñu, cahān rí jehē jnúhun jeē jnáma ya yohó jéē jnúhun ndaā cúu.

<sup>8</sup> Chi Yaā Dios jíni yā ndese yōhyo manī rí jíin ró jíjnáhan ró, nájnūhun yōhyo manī Jesucristo jíin yó.

<sup>9</sup> Te jicán tahú rí jeē na cáa ga jeē cundáhú ni rō jnáhan ró, jíin jéē na jécūhun ga ni rō te cundíchí ró jíin táca jnúhun ya.

<sup>10</sup> Te súcuan te cuu nacāji ró táca jéē váha condiquín rō, te caca ndaā rō, te ma cóo ni ñin cuēchi siquī rō quiví ndíji Cristo.

<sup>11</sup> Te súcuan te cayā cuehē jniñu váha jeē sáha Jesucristo jíin ró. Te sáha jeē coo yíñuhún ñáyuu jíin Yaā Dios te cahān i jeē yóhyo luu cújéñu ya.

### *Jnúhun jeē técu nduú yó jíin Cristo*

<sup>12</sup> Hermano, cúni rí jeē na cúcáñu ni rō jíjnáhan ró ndese ni sáha jnúndóho ni ndoho rí. Chi ni sáha jeē ni jíitē núu ga jnúhun jeē jnáma ya yohó.

<sup>13</sup> Chi táca soldado cáyūcú ñni palacio, jíin táca gá ñáyuu, cájini i jeē íne ri vecāa jeē siquí Cristo.

<sup>14</sup> Te siquí jeē íne ri vecāa, jeē yúcuan cúu jeē vihyá gā nihín ndeyí ni cuehē táca hermano cácadñje nuū Jítóho yō. Te cáhiyo téyí gá ni de nácani de jnúhun ya, te tu ndé ndínuu ni de.

<sup>15</sup> Te ndaā chí sava téē cánacani de jnúhun Cristo siquí jeē cuesún ni de jíin jéē nduxí de. Te sava ga de chí sa suhva cánacani de jnúhun ya siquí jeē váha ni de.

<sup>16</sup> Sava de cánacani jnúhun Cristo siquí jeē nducú de jeē váha máa-ni de, te tú ndije de, chí cácuñi de jeē nihín gā rí jnúndóho jeē íne ri vecāa.

<sup>17</sup> Te sava ga de chí cánacani de jnúhun Cristo siquí jeē cundáhú ni de ruhū, chí cájini de jeē íne ri vecāa siquí jeē cahān rí jehē jnúhun jeē jnáma ya yohó.

<sup>18</sup> Tú na vé sáha núu súcuan, chí táca-ni modo cascuítē núu de jnúhun Cristo, vēsú núu ndije de chí tuú. Te yáha cúu jeē cúsiñ ni rí sáha.

Te suni cúsiñ gā ni rí,

19 chi jín rī jeē tāca jēē yáha sáha jeē váha ga coo jíin rí, chi cájicān tahú rō jehē rī, te Espírítu Jesucristo chéndéé ñáhán yá ruhū.

20 Chi ñúhun ni rī te cúu ndasí ni rī jeē ma sáha ri ni ñin jeē sáha jeē cucanu ri nuú yā. Chi sa suhva coo téyí ni rī cahān rī jnúhun ya, návāha ndujéhu ga Cristo sáha máá rī vijna, nájnūhun je ni sáha ri ñá véji ri, te vēsú na cótecu rī chí vēsú na cúu rī.

21 Chi jeē técu rī cúu jeē nduú rí jíin Cristo, te jeē cúu rī cúu jeē vihyá gā váha coo jíin rí.

22 Te núu coteču gā rī, te cuu scáca ga rī jniñu máá Jítóho yō. Núu súcuan te tu cúcáhu ni rī ndé ñin cúu jeē váha ga, núu jeē cótecu rī chí jēē cúu rī.

23 Chi mēhñú ndíndúú jnúhun yáha íne ñihin rī. Chi ñin cúu jeē cuní rī quihñ rī condee rī jíin Cristo, chi yūcuan cúu jeē vihyá gā váha coo jíin rí.

24 Te suni cánuú gá jeē cótecu gā rī jeē siquí rohó jíinánan ró.

25 Núu súcuan te iyó ndáā ni rī jeē quéndōo rī condee gā rī jíin ró, návāha stéén gā rī nuú rō ndese caca váha ga rō jíin yá, te cusñ gā ni rō jíin jnúhun cácadíje ró.

26 Núu súcuan te condee tucu ri jíin ró, te cusñ teyí ni rō jeē siquí ruhū, sáha máá Cristo Jesús.

27 Te máá ñin-ni jeē condihvī ni rō caca ndáā rō, nájnūhun cánuú caca ró siquí jeē cácadíje ró jnúhun Cristo. Yūcuán na te vēsú na jínú rī coto jnáhan yó, chí condee jíca rí, te ñihin rī jnúhun ro jēē cáhin ñihin ró jíin jnúhun ya, te cáhīyo inuú ni rō, te inuú-ni cánducú ndéyí ró siquí jnúhun jeē cácadíje yó jēē jnáma ya yohó.

28 Te ma yūhú cuiti rō sáha jeē cájito uhū rohó. Chi jeē jító uhū i rōhó, yūcuan stéén jeē jnahnú ndetū i, te suni stéén jeē cácu ánuá máá ró jíinánan ró sáha Yāā Dios.

29 Chi ni jēhe Cristo uū jeē váha nuú rō: nasūu máá ñin-ni jeē candíje ró yá, chí suni jeē na ndóho ró jēē siquí yā.

30 Chi máá rí jíin róhó jíinánan ró, nájnūhun jeē cájejnánan yó jíin táca jēē neé. Chi ni cajito ró jēē súcuan ni sáha máá rí, te cánihñ rō jnúhun jeē sáha ga rī nde vijna.

*Jeē ni sáha suchí yá máá yá te ni ndujéhu ya*

## 2

1 Núu súcuan te sáha Cristo jeē cáhīyo ndeyí ni rō, jíin jēē cúsn ni rō siquí jeē váha ni yá jíin ró. Te ndéé Espírítu yā jíin ró, te manī rō jíin jnáhan ró, te cájito ndáhú ró i.

2 Núu súcuan te na cócu ga rō jíin táca jnúhun yáha, návāha cusñ teyí ni rī. Te inuú-ni na cóo ni rō, te coyūcu máni rō, te inuú na cóo ánuá rō, te inuú cani ni rō.

3 Te ni ñin jniñu ma sáha ró jēē nducú ró jeē váha máá-ni ró, ni jeē satéyí ró maá ró. Chi sa suhva sáha suchí ró maá ró, te sáha ró cuenta jeē váha ga jnáhan ró vēsú maá ró.

4 Te ma cóndihvī ni rō máá-ni jniñu jeē quéndōo váha máá-ni ró, chí suni na cóndihvī ni rō jniñu jeē quéndōo váha jnáhan ró.

5 Te na cáni ni rō jíinánan ró nájnūhun ni jeni ni Cristo Jesús.

6 Chi máá yá kujéhu inuú yá jíin Yāā Dios, te vēsú súcuan te tu ní jéni ni yá jeē kujéhu inuú yá jíin Yāā Dios.

7 Chi ni siaá yā jeē cujéhnu ya, te ni nduu ya nájnūhun índāa mozo, te ni cacu ya ni nduu ya tēe.

8 Te ná ni nduu inuú yá jíin tēe, te ni sáha suchí yá maá yá. Te ni jendije ya nde jíin jnúhun jeē cúu yā, te nde jíin jnúhun canu jeē cúu yā jicā cruz.

9 Jeē yúcuan ní sáha Yaā Dios jeē yóhoyo ni ndujéhnu luu ya, te síhvi yá cujéhnu ndasí gá nuū tāca gá síhvi.

10 Te tāca jéé cáhiin andívi jíin ñáyivi jíin chíji ñayívi, núu na cúni i síhvi Jesús te jecuíñi yití i.

11 Te cahān ndaā ndivii i jeē Jesucristo cúu maá Jítoho. Te súcuan stéén i jeē yóhoyo cujéhnu maá Tátá yā Yaā Dios.

### *Ñayuu cácadje cúu i nájnūhun quimi jeē ndíndēé*

12 Núu súcuan hermano jijnáhan ró, nájnūhun níni ní cajendije ró jnúhun ni cahān rī ná ni condee rī jíin ró, suni súcuan víhyá gā cuandije ró vijna jeē ndeé jíicá rī jíin ró. Te condíhvi ní ró jeē caca ndaā ró jíin jnúhun ní jnama ya rohó, te caca yáñúhún ró conso íyo ró núu yā.

13 Chi Yaā Dios jícu ya jíin ró jeē cúu ní ró sáha ró jniñu váha, te chíndéé ñáhán yá rohó jéé squícu ró jniñu nújnahan ni yā.

14 Ndihi jeē sáha ró, ma cahān sōo ró, ni ma tejnáhan ró,

15 návāha cuu ró séhe Yaā Dios jeē tú na cuēchi coo síquī ró te coo ndaā ró. Te caca ndoo ró méhñu ñáyuu níhni ni jeē casáha néé. Chi méhñu ñáyuu un stéén ró jniñu váha ró, te súcuan cácuu ró nájnūhun quimi jeē ndíndēe núu néé ñayívi.

16 Te stéén ró jnúhun ya nuū i jeē cótecu i ní cáni sáha. Te súcuan te cusí teyí ni rī quívi ndíji Cristo, chí cuni rī jeē tu ní jíca cáhá rí, ni tu ní sájniñu cáhá rí.

17 Te vésu na cúu rī jeē socō rī maá rí nuū yā jeē síquí rohó, te yúcuan cúu jeē nducú rí scandíje ga rī rohó, návāha socō ró maá ró sáha ró jniñu váha jeē cácadíje ró yá. Jeē yúcuan cúsi ni rī, te cúni rī jeē suni cusí ní ró jíin rí jijnáhan ró.

18 Núu súcuan te na cúsi ni maá ró jíin rí, te inuú na cúsi ni yō jijnáhan yó.

### *Jnúhun Timoteo jíin Epafrodito*

19 Te ñúhun ni rī jeē cuáha maá Jítoho yō Jesús jnúhun jeē tají yáchí rī Timoteo jeē de nuū ró, návāha ndusi ni rī núu na níhín rī jnúhun ndese cáhíyo ró.

20 Chi tuá na inga tēe íyo yáha jéé inuú jéni ní jíin rí, nájnūhun maá de jeē ndíhvi ndije ni de jehé ró.

21 Chi táca de cánducú de jeé cúu maá de, te nasūu jéé cuní Cristo Jesús.

22 Te je cájini ró jeē tēe váha cúu Timoteo. Chi nájnūhun séhe jíin tátá, súcuan ni jejniñu de jeé nácani de jnúhun váha ya jíin rí.

23 Núu súcuan te ñúhun ni rī tají rí de jeé de nuū ró, te núu je ni cucáhnu ni rī ndese coo jíin rí.

24 Te jéni ndije ni rī jeē cuáha Jítoho yō jnúhun jeē suni maá rí jinū yachí rī nuū ró jijnáhan ró.

25 Te suni jéni ní rī jeé cánuú tají rí hermano yō Epafrodito jeé de, chí tēe sájniñu jíin rí síquí jnúhun ya cúu de te chíndéé ñájnáhan de jíin rí. Chi maá ró ní catají ró de jeé cuajniñu de nuū rī tāca jéé cúmani nuū rí.

26 Chi yóhoyo cúu ni de ndacoto tucu de nuū ró jijnáhan ró. Te ni cucuíhyá ndasí ni de, chí ni canihín ró jnúhun jeé ní cocuhū de.

<sup>27</sup> Chi jendaá ni cocuhū de, te je yajni cuu de núú. Te Yaā Dios ni cundáhú ni yā de, te nasūu máñúhún-ni de, chí suni ruhū, návāha tú caa ga cucuíhyá ni rī jehē de núú.

<sup>28</sup> Jeē yúcuau cúu jeē ndihví gā ni rī tají rí de nuū rō, návāha ndusī ni rō jeē ndácoto tucu ró núú de. Te suni ruhū ma cucuíhyá ndasí gá ni rī.

<sup>29</sup> Núu súcuan te na cúsī ni rō jeē nájínū de nuū rō, chí cúu de hermano yō jeē candíje de maá Jítoho yō. Te coo yíñúhún ró jín táca téé índāa nájínūhun cáa de.

<sup>30</sup> Chi jeē siquí jniñu Cristo cúu jeē jé yajni cuu de núú. Chi ni chundeyí ni de jeē cúu de siquí jeē chindéé ñáhán de ruhū jín jniñu jeē tu ní íyo modo sáha máá ró jijnáhan ró.

### *Jñuhun jeē cáca ndaā vāha yó*

## 3

<sup>1</sup> Te vijna, hermano jijnáhan ró, na cúsī ni rō jín máá Jítoho yō. Ruhū chi tu jnánini ni rī jeē téé tucu ri jñuhun yáha núú rō, chí cuajniñu jeē quéndōo vāha ga rō.

<sup>2</sup> Condito ró máá ró nuū téé casáha jniñu néé, jeē cándāa ná cándāa ina. Chi cánducú de stújí de róhó jéé casáha de circuncidar, te tu casáha de jniñu ndaā.

<sup>3</sup> Te máá yó cácuu ñayuu ni cuu circuncidar ndije, chí cáchiñúhún yó nuū Yaā Dios nde jín ini jín ánuá yō, te cácusī ni yō jeē yihí yó ndaha Cristo Jesús, te tu tenuū yō jeē quéndōo ndaā yō jín jniñu jeē sáha máá-ni yó.

<sup>4</sup> Núu jeē súcuan cúu te ruhū chí suni cuu tenuū rī jniñu jeē sáha máá-ni ri nuú. Chí núu ndé téé jéni ni de jeē cuu tenuū de máá de, te ruhū chí víhyá gā cuu tenuū rī máá rí.

<sup>5</sup> Chí ni casáha circuncidar ruhū nuū uná quiví ná ni cacu ri. Te yucūn Israel cúu ri, te suni jnáhan yucūn Benjamín, te ñin hebreo sēhe hebreo cúu ri. Te suni ni cuu ri téé grupo fariseo jeē ni squícu ri táca ley jnáhan ñuu rī hebreo.

<sup>6</sup> Te ni jito xeēn rī ñayuu cácadíje, chí yōhyo ni condihví ni rī jeē ma sáma i modo ley jenahán. Te ni ñin tu ní cúu cahān jeē tu squícu ri ley un, chí ni squícu vāha ri.

<sup>7</sup> Te táca jéé ní tenuū rī ún, chí sáha ri cuenta jeē tu ndé níhín jniñu cuiti, chí vijna te ni candíje ri Cristo.

<sup>8</sup> Te suni chíri ri cuenta jeē vāha ga na náa ndihi jeē ní tenuū rī ún, chí vāha ndasí gá cúu jeē ni quiví ri ndaha máá Jítoho ri Cristo Jesús. Te jeē siquí maá yá te ni siaá rī ndihi ún, te sáha ri cuenta jeē nájínūhun yācá-ni cúu. Chí ni quiví ri ndaha Cristo,

<sup>9</sup> te ndúú yá jín rí. Te tuá nducú rí quéndōo ndaā rī jeē jín ley un, chí sa suhva Yaā Dios ni ndahva yā cuēchi ri jeē ní candíje ri Cristo. Chí súcuan squéndōo ndaā yā ñayuu cácadíje.

<sup>10</sup> Te vijna te cúní rī jecūhun vāha ni rī ndese Yaā cúu ya. Te cúní rī jeē poder jeē ní natecu yā cone jín rí. Te cúní rī ndoho ri jín yá, te nde jinū rī ndoho ri nájínūhun ni ndoho máá yá jeē ni jíhi yā.

<sup>11</sup> Chí yōhyo ññuhun ni rī natecu rī nájínūhun ni natecu yā.

### *Jeē nducú ndéyí Pablo sínu de carrera de*

<sup>12</sup> Te ná tu nihín rī ndihi jeē ni cáhān rī ún, ni ná tu ije ri jín. Te nducú ndéyí rí siquí ún, chí ññuhun ni rī jeē nihín rī táca un, chí jeē yúcuau cúu jeē ni níhín Cristo Jesús ruhū xihna gā.

<sup>13</sup> Hermano jijnáhan ró, tu sáha ri cuenta jeē jé ni nihīn rī ndihī ún. Te íyó ñn jeē sáha ri, cúu jeē squéndōo ri tāca jéé ní cuu ichi yátá, te ndúcú ndeyí rī nihīn rī tāca jéé iyó ichi núú.

<sup>14</sup> Chi cúu un nájñuhun jeē jínu ri ñn carrera cuahān rī nde jinū rī andiví, te nihīn rī premio jeē cuáha Yaā Dios. Chi ni cana ya yohó jéé quihín yō nuū yā andiví siquī jeē yíhi yó ndaha Cristo Jesús.

<sup>15</sup> Te tāca yó jeē jé ni ije vāha yó jíin jñuhun cándije yó, súcuan na cáni ni yō. Te núu ndé ñn ró sñn jéni ni rō, te Yaā Dios suni stéén yā nuū rō jeē násūu súcuan cúu.

<sup>16</sup> Te jíni ñúhún cani ni yō te caca yó modo jeē quijnáhan jíin jéé jé ni nihīn yō.

<sup>17</sup> Hermano, na ndácu ró rúhū jijnáhan ró. Te condēhe vāha ró ndese cájica ñayuu ndaā, chi cájica i nájñuhun ni castéén rī nuū rō.

<sup>18</sup> Te je ni cuu tijni jínu ni cahān rī jíin ró, te nde ndahyú rī cahán tucu ri vijna, jeē iyó cuéhē ñayuu cájica i ñn modo jeē steén jeē jíto uhū i jñuhun jeē ni jíhī Cristo jicā cruz.

<sup>19</sup> Te ñn quiví te jnahnū ndetū ñayuu ún. Chi máni jeē cáji vāha i cúu jeē cáchiñuhún i. Te sátéyí i máa i jíin jñiñu néé jeē jéhe jñuhun canu. Te máni máa jéé iyó ini ñayiví cúu jeē ndihví ni i.

<sup>20</sup> Te máa yó chi ñayuu coyúcú andiví cúu yó, te cándetu yó jéé nde yūcuán ndiji Jítoho yō Jesucristo, Yaā jnáma yóhó.

<sup>21</sup> Te máa yá nasama ya yiqui cúñu ndahú yó, návāha nduu yó nájñuhun cáa máa yá jeē lúu cújéhnu ya. Te súcuan sáha ya jíin poder yā jeē cújéhnu ya siquī ndihī-ni.

*Níni na cúsiñ ni yō jíin Jítoho yō*

## 4

<sup>1</sup> Núu súcuan hermano jijnáhan ró, cuiñi nihin ró jíin jñuhun máa Jítoho yō. Chi yōhyo maní rī jíin ró, te cúní rī jeē coto jnáhan yó, te cúsiñ ni rī jíin ró, te nájñuhun premio rī cácuu ró.

<sup>2</sup> Te cahán ndahú rí jíin róhó Evodia jíin Síntique jeē inuú na cóo ni rō, chi cácuu ró hermana jeē cácandije ró máa Jítoho yō.

<sup>3</sup> Te suni cahán ndahú rí jíin róhó, téé jeé ní chindéé ñájñáhan vāha jíin rí, jeé na chindéé ñáhán ró hermana un, chi ni casájñiñu nihin ña jíin rí siquī jñuhun jeé jnáma ya yohó. Te suni súcuan ni sáha Clemente jíin sava ga ñayuu ni sájñiñu jíin rí. Te ni jecosó sihví i nuū libro jeé yosó sihví ñayuu cotecu ñi cáni.

<sup>4</sup> Te níni na cúsiñ ni rō jijnáhan ró jíin máa Jítoho yō. Te inga jínu cahán rī jeé na cúsiñ ni rō.

<sup>5</sup> Sáha vāha ró jíin tāca ñayuu, návāha cuni i jeé súcuan vāha ni rō. Chi máa Jítoho yō, yajni-ni cúu ya jíin ró.

<sup>6</sup> Ma nácani ndasí ni rō siquī ni ñn. Chi sa cahán rō jíin Yaā Dios siquī tāca jéé nácani ni rō. Chi cacān tahú rō, te cahán ndahú ró, te suni nacuatáhú ró nuū yā.

<sup>7</sup> Yūcuán na te sáha Yaā Dios jeé cóo ndeyí coo siñ ndasí ni rō, te súcuan coo jíin ró nde cūhva jeé ma jécūhun ni rō ndese cúu jeé sáha ya ún. Te condito vāha ya anuá rō jíin jéé níjñūni rō, coo cuehē jñuhun ndeyí jñuhun siñ ni jíin ró, siquī jeé yíhi ró ndaha Cristo Jesús.

*Jeé na cáni ni yō siquī tāca jéé vāha*

<sup>8</sup> Te ñn na jñūhun íyó, hermano jijnáhan ró. Na cáni ni rō siquī tāca jēe iyó ndāa, jiín jēe sāha yññūhún, jiín tāca jniñu sāha vāha, jiín jniñu íyó ndoo, jiín tāca jēe iyó mání ni, jiín jēe lúu sāha. Te mání na núcūhun ni rō tāca jēe vāha jeē sāha jeē nácuatáhú ró nuū yā.

<sup>9</sup> Tāca jēe ni stéen rī nuū rō, jeē ní cacutūhva ró nuū rī, jiín jēe ní cajini ró ní cahān rī, jiín jēe ní cajito ró ní sāha rī, tāca yúcuau suni na sāha máa ró. Yūcuán na te máa Yaā jeē jéhe jñūhun ndeyí sñ ni, coo ya jiín ró.

### *Jeē ní casocō ñayuu Filipos nuū Pablo*

<sup>10</sup> Te yōhoyo cúsñ ni rī sāha máa Jítóho yō, chi vijna te ni canucūhun tucu ni rō jeē chindéé ñáhán ró rúhū. Te nasūu jēe ní naa ni rō sāha ró súcuau, chí siquī jeē tu ní íyo modo.

<sup>11</sup> Te nasūu jēe cahán rī siquī jeē ndóho ndáhú rí, chí je ni cutūhva rí cusñ ni rī jiín jēe névāha rí.

<sup>12</sup> Jíni rī cotecu ndahú rí, te jíni rī cotecu cucá rí. Chí ni cāan rí jiín tāca-ni, núu jeē ndutú chíji rí chí jēe ndóho rí sóco, núu jeē cónevāha cuehē rí chí jēe cúmaní nuū rī.

<sup>13</sup> Ndihi-ni cúu sāha rí, chí máa Cristo jéhe ya fuerza ini rí.

<sup>14</sup> Te vesú súcuau te vāha ni casáha ró jēe ní chindéé ñáhán ró ruhū jiín jñúndóho jeē ndóho rí.

<sup>15</sup> Te róhó ñayuu ñuu Filipos, je cájini rō ndese ni cuu. Chí nde quiñí ní quejéé rí nácani rí jñūhun jeē jñáma ya yohó, ná ni quenda rí Macedonia vēji rí, te ni casocō rō xūhun núu rī siquī jeē ní canihñ rō jñūhun ya ni nacani rí. Te ni ñn grupo ñayuu cácanđje tu ní sāha súcuau, chí máa-ni róhó jijnáhan ró.

<sup>16</sup> Te ná íne rí ñuu Tesalónica, te ni catají ró jecu jeē jíni ññhún rí, ni jinū ñn uū jínu.

<sup>17</sup> Te nasūu jēe nducú rí jeē cuáha ró nuū rī, chí sa ndúcú rí jeē na cáyá gā jniñu vāha ró, návāha cayā tahū rō nuū Yaā Dios.

<sup>18</sup> Chí je ni nihñ rí ndihi jeē jíni ññhún rí, te ndóo ga. Te íyó cuehē nuū rí, chí ni nihñ rí jeē ní catají ró vēji jíni Epafrodito. Te jeē ní catají ró cúu nájñūhun ñn ofrenda jeē asín jeén, ni casocō rō nuū Yaā Dios, te cúsñ ni yā jiín.

<sup>19</sup> Te Yaā Dios chí cuáha ya nuū rō tāca jēe cúmaní nuū rō, chí cucá ndasí yá jiín tāca jēe vāha jeē lúu íyó núu Cristo Jesús.

<sup>20</sup> Te na cahán yō jeē yóhoyo luu cújéhnu Tátá yō Yaā Dios ní cáni. Amén.

### *Saludo jeē sándñi*

<sup>21</sup> Cachi rō nuū tāca ñayuu máa yá jeē sándeyí ni i, áchí rí, chí cácanđje i Jesucristo. Te hermano yō cáyūcu jiín rí yáha, cácahān de jeē sándeyí ní rō jijnáhan ró.

<sup>22</sup> Te tāca ñayuu máa yá jeē cáhīyo yáha, suni cácahān i jeē sándeyí ni rō. Te ñayuu cáyūcú vehe rey cújéhnu ñuu Roma yáha, máa i cácahān gā súcuau.

<sup>23</sup> Te ññhún ni rí jeē máa Jítóho yō Jesucristo, na sāha ga yā jeē vāha róhó jijnáhan ró. Súcuau na cóo. Amén.

## CARTA JEE NI TEE APOSTOL SAN PABLO NUU ÑAYUU ÑUU COLOSAS

<sup>1</sup> Máá rí cúu Pablo, apóstol Jesucristo, chí súcuan ni nujnahan ni Yaā Dios ni tají yá ruhū. Te jíin hermano yō Timoteo

<sup>2</sup> cátee rí carta yáha cuájeē nuū rohó ñáyyuu ñuu Colosas, jeē cácuu ró ñáyyuu maá yá jeē cácañdije vāha nuū Cristo. Te cáñuhun ni rí jeē Tatá yō Yaā Dios na sáha ga yā jeē váha róhó, te sáha ya jeē coo ndeyí coo sī ni rō.

*Jeē jicán tahu Pablo jehē ñáyyuu cácañdije*

<sup>3</sup> Te jeē cájicān tahu rí nuū Yaā Dios, Yaā cúu Tatá maá Jítóho yō Jesucristo, te níni cánaquatáhú rí nuū yā jeē síquí rohó jíjnāhan rō.

<sup>4</sup> Chí ni cajini jñuhun rí ndese váha cácañdije ró Cristo Jesús, jíin ndese cácañdáhú ni rō táca ñáyyuu maá yá.

<sup>5</sup> Chí cáñuhun ni rō nihīn rō jeē ñuhun váha nde andiví cuu ró. Chí ná ni cajini ró jñuhun ndaā jeē jnáma ya rohó, te ni caquejéé rō ñuhun ni rō.

<sup>6</sup> Te jñuhun un jéē ní canacani nuū rō, chí ndúcuehē cuahān te níhín jniñu ní cáhnu ñayiví. Te suni súcuan ni sáha jíin róhó jíjnāhan ró ndé quiví ní cajini ró te ni cajecūhun ni rō jeē ndaā cúu jeē yóhyo váha ni Yaā Dios jíin ró.

<sup>7</sup> Te jñuhun un cúu jeē ni stéén Epafras nuū rō, tēe sájniñu jíin rí jeē maní rí jíin. Chí cúu de tēe jéjniñu squícu váha nuū Cristo jeē ndíto de róhó.

<sup>8</sup> Te máá de ni castūhun núu rí síquí rohó, ndese cácañdáhú ni rō jnáhan ró sáha máá yá.

<sup>9</sup> Jeē yúcuan suni tu cájecuñī rí jeē cájicān tahu rí jehē rō, nde quiví ni níhīn rí jñuhun ún te nde vijna. Te cájicān rí nuū yā jeē na jécūhun váha ni rō te coo ndíchí ró jíin jñuhun ya, sáha máá Espíritu, návaha cuni rō ndihí ndese nújnahan ni máá yá.

<sup>10</sup> Te cájicān rí jeē caca ndaā rō nájnūhun cánuú caca ró jéē cácuu ró ñáyyuu maá Jítóho yō. Te súcuan te sáha ró ndihí jeē nújnahan ni yā, te níhīn jniñu ró jíin táca jniñu váha, te jecūhun ga ni rō ndese Yaā cúu Yaā Dios.

<sup>11</sup> Te cájicān rí jeē cuáha ya fuerza ini rō, nájnūhun íyó fuerza maá yá jeē kujéhu luu ya. Te súcuan te cuu cuandeyí ni rō jíin táca-ni jñundóho, te cusī teyí ni rō.

<sup>12</sup> Te cuu nacuatáhú ró nuū Tatá yō, chí máá yá ni chihí fuerza yohó jéē ñn cáhnu-ni jíin táca ñáyyuu maá yá níhín yō tahu yō. Chí cájica yó jíin luz yā jeē yíhi yó ndaha ya.

<sup>13</sup> Chí ni jnama ya yohó jéē ni yíhi yó ndaha máá jéē jñí poder nuū néé, te ni síquíví ya yohó ndaha Séhe ya jeē maní yā jíin, ndácu ya jniñu nuū yō.

<sup>14</sup> Chí Séhe ya un ní jnama ya yohó jéē ni jíhi yā jehē yō, te ni ine cáhnu ni yā nuū cuéchi yó.

*Jeē ni sáha Cristo jeē ní ndiví yó núu jñuhun maní Yaā Dios jíin yó*

<sup>15</sup> Yaā Dios jeē tu cúu coto yó, ni sáha ya jeē ní quiji Séhe ya, te súcuan ni jito yó máá yá. Te Séhe ya ún, je iyó yá nde ná tu jecōo táca jéē iyó.

<sup>16</sup> Chí jíin Séhe ya ni sáha Yaā Dios ndihí jeē ní jécōo, ndihí jeē iyó andiví jíin jéē iyó ñayiví, jeē jíni yō nuū jíin jéē tu jíni yō nuū. Te suni ni sáha ya táca ndajéhé jeē cándacu jniñu, jíin jéē cándiso jniñu, jíin jéē cácujeñu, jíin jéē cájni poder. Jíin Cristo ni sáha Yaā Dios jeē ni jécōo ndihí, te jeē cúu Cristo cúu.

17 Te je iyó Cristo nde ná tu coo ndihi jeē iyó. Te ndaha máá yá yíhi vāha ndihi-ni.

18 Te máá yá cújéhu nuū ñáyuu cácadje, nájñuhun cújéhu xinī nuū yiqui cúñu, chi nájñuhun yiqui cúñu yā cácuu i, cúu jeē ñn na cúu i jíin yá. Te máá yá sáha jeē cotecu i ní cáni, te xīhna gā maá yá ni natecu mēhñu ndíyí, návāha cújéhu ya nuū tǎcá-ni.

19 Chi ni cusñi ni Yaā Dios jeē ndihi ndese cúu máá yá, suni súcuan cúu Cristo.

20 Te siquī jeē ni jíhi Cristo, te ni cusñi ni Yaā Dios sáha ya jeē ndívicoo tǎcá-ni nuū jñuhun manī yā jíin, tǎca jéē yúcu ñayívi jíin jéē yúcu andívi. Chi jíin jéē ni jíhi Cristo jicā cruz, te ni sáha Yaā Dios jeē ndívicoo tǎcá-ni nuū jñuhun manī yā jíin.

21 Te máá ró jijnáhan ró, chi sñn siquī ni cahñin ró ndé saá, te ni cajito uhū rō yā ñni anuá rō, chi máni jñiñu néé ní casáha ró. Te vijna chi je ni sáha Yaā Dios jeē ní ndívicoo ró núu jñuhun manī yā jíin ró.

22 Súcuan ni sáha ya siquī jeē ni sócō Cristo maá yá ni jíhi yā, návāha coo ndoo coo ñi rō cuiñi ró núu yā, te ma cóo jñéhén ró, te tú na cuéchi coo siquī rō.

23 Te súcuan sáha ya núu cuiñi ñihin ró jéē candje vāha ró, te núu quendō ñihin ró jíin jñuhun vāha jeē cáñuhun ni rō jeē jnáma ya rohó, te ma siaá cuiñi rō. Chi jñuhun un ní cajini ró, te ni jite núu ní cáhnu ñayívi. Te ruhū Pablo suni jéjñiñu ri jeē nácani ri jñuhun ún.

### *Jeē jejniñu Pablo siquī ñáyuu cácadje*

24 Te vijna te cúsiñi ní ri jeē ndóho ri jehē rō jijnáhan ró. Chi jíin yiqui cúñu rī ndóho ri jeē cúmani gā ndoho ri jíin Cristo jehē ñáyuu cácadje, suu ñáyuu cúu nájñuhun yiqui cúñu yā.

25 Te cúu rī tēe jéjniñu siquī ñáyuu cácadje, chi súcuan ni tejniñu Yaā Dios ruhū, návāha nacani ndihi ri jñuhun ya nuū rō te quendō vāha rō.

26 Te nácani ri jñuhun ya jeē ní yisáhi, jeē tu ní cájini ñáyuu nde jenahán ndasí te nde ní cáni vēji. Te vijna te je ni steén cají yá jñuhun un núu ñáyuu máá yá.

27 Chi ni cusñi ni yā jeē steén yā nuū i ndese cúcúca ndasí i jíin ndihi jeē ndíso jñuhun sáhi yáha jéē lúu cújéhu, te cuiñe núu quihñ nuū tǎcá nación jeē tu jíni. Te jñuhun sáhi yáha cúu jeē ndeé Cristo ñni anuá rō, ndúú yá jíin ró, te jeē yúcuan cáñuhun ni rō tǎca jéē lúu jéhu jeē coo.

28 Te jñuhun Cristo un cúu jeē cánacani ri, te cástíhví ni rī tǎca ñáyuu, te cástéén rī jñuhun ya návāha jecūhun vāha ni i. Te súcuan te ije vāha ni ndivii i jeē yíhi i ndaha Cristo Jesús.

29 Te siquī yúcuan cúu jeē sájniñu ri, chi ndíhví ni rī nácani ri jñuhun jíin tǎca fuerza Cristo jeē chindéé ñájñáhan ya jíin rí.

## 2

1 Chi cúní rī jeē na jécūhun ni rō ndese yōhyo ndúcú ndéyí rí jehē rō, jíin jéhē ñáyuu ñnu Laodicea, jíin ndé tǎca ñáyuu jeē tu ní cájini cuiñi nuū rī.

2 Chi cúní rī jeē coo ndeyí ni anuá i, te ñnu-ñi coyūcu máni i, te jecūhun ndihi ni i ndese yōhyo cúcá i jíin jñuhun jeē candje ñihin i. Chi cuni i ndese Yaā cúu Cristo, chi máá yá cúu jñuhun Yaā Dios jeē ni yisáhi un.

3 Te ñni Cristo yisáhi tǎca jñuhun jeē cucúca ró jíin, suu jñuhun ndíchí jíin jñuhun jécūhun ni.

4 Te jñuhun yáha cáhán rī jíin ró jijnáhan ró, návāha ma stahú ni ñn i rohó jíin tǎca jñuhun stahú jéē lúu cáhán.



<sup>5</sup> Chi vēsú ndeé jíca rí jíin ró, te ñúhun ni rī rohó, te cúsñ ni rī jeē jíni rī ndese cájica ndaā rō te cácanđije ñihin ró Cristo.

<sup>6</sup> Núu súcuan te nájnūhun ni cajetáhú ró jeē Jítoho rō cúu Jesucristo, suni súcuan na cáca ndaā rō jíin yá.

<sup>7</sup> Te na jñí vāha jñūhun ya ini rō, te na íje vāha ró jíin jñūhun cácanđije ró yá, nájnūhun je ni cajini rō. Te níni nacuatáhú ró nuū Yaa Dios.

### *Jeē ndújeé yó sáha Cristo*

<sup>8</sup> Coto má cuāha ró jñūhun jeē stahú ni ññ ñayuu rohó jíin jñūhun ndíchí jée tu jéjñíñu, jíin jñūhun ndúxí stáhú. Chi tu cácanđije i jñūhun Cristo, chi sa cácanđije i táca jée tajnúni ñayuu, modo jeē castéén ini ñayívi yáha.

<sup>9</sup> Chi ndíhi ndese cúu máa Yaa Dios, suni súcuan cúu Cristo.

<sup>10</sup> Te ndíhi ndese cúu Cristo, suni súcuan cúu ró jíin náhan ró, chí cáyihí ró ndaha ya. Te máa yá cújéñu nuū táca jée cújéñu jíin jée ndiso jñíñu andívi.

<sup>11</sup> Te síquī jeē cáyihí ró ndaha ya, suu cúu jeē nájnūhun ni cuu ró circuncidar. Te jeē súcuan ni sáha ya circuncidar rohó, chí nasúú ññ jñunī jeē yíhi yíqui cúñu rō cúu, chí sa suhva jeē ní sándoo ya táca cuéchi ni casáha ró jíin modo neé máa ró. Chí súcuan cúu jeē sáha Cristo circuncidar rohó.

<sup>12</sup> Te jeē ní cajendute ró cúu nájnūhun jeē ní quíndūji ró jíin Cristo, te suni nájnūhun jeē ní natecu rō jíin yá. Chí ni cacandíje ró jée jíin poder Yaa Dios ni nastécu yá Cristo mēññu ndíyi.

<sup>13</sup> Chí ni cacuu ró nájnūhun ndíyi nuū yá síquī cuéchi ró, chí ná tu sáha ya circuncidar anuá rō nde saá. Te víjna te ni sáha Yaa Dios jeē cotecu rō níf cáni jíin Cristo, chí ni ine cáñnu ni yá nuū táca cuéchi ró.

<sup>14</sup> Te nájnūhun jeē iyó ññ acta jeē jíicán cuéchi síquī yō jeē ni stívi yó ley yā. Te ni ndahva yá acta un, chí ni chunaa Cristo cuéchi yó jée ni jíhi yá jíicā cruz.

<sup>15</sup> Chí ná ni jíhi yá jíicā cruz, te ni quende yá ndíhi poder táca jéneé jée cácujeñu jíin jée cájñi poder. Te ni quende yá jeē tuá cújéñu, chí ni sáha ya jeē cuángoo nuū quíndihyū, te súcuan ni steén yá poder yá.

### *Na ndúcu yó jeē quéndoo vāha yó ndé andívi*

<sup>16</sup> Núu súcuan te ma cuatáhú ró núu cácaññ ñayuu cuéchi síquī rō, síquī ññ jeē yéji rō chí síquī ññ jeē jíhi ró, chí jée tu nées i rō quívi víco jíin quívi núcosó yoō jíin quívi ndetátú.

<sup>17</sup> Chí táca ley síquī un ní jejníñu máa ndé ná tu quiji Cristo. Te víjna te ni quiyi ya te tuá jíni ññhún táca ún.

<sup>18</sup> Ma cuāha ro jñūhun jeē cási ni ññ ñayuu jeē nihín rō tahū rō. Chí cáchiññhún i táca ndajéhe yá, te cácaññ i jeē súcuan cásaña suchí i máa i. Te cácaññ i jeē cájini ndije i jeē iyó ndaā jñūhun cánacani i, te tuú. Te súcuan cásaña téyi sáa-ni i máa i, chí cájeni neé ni i.

<sup>19</sup> Te tu cáññi i jíin Cristo, Yaa cújéñu nuū ñayuu cácuu nájnūhun yíqui cúñu yá chí ññ na cúu i jíin yá. Chí máa yá scuéñu ya i jíin jñūhun ya, te nduu inuú ni táca i jeē cáhije i cuahān i, nájnūhun ni jeni ni Yaa Dios.

<sup>20</sup> Núu súcuan te nájnūhun jeē je ni cajihí rō jíin Cristo, cúu jeē ní casiáá rō táca jée tajnúni jeē castéén ini ñayívi. Núu súcuan ¿te naun cásaña ga rō nájnūhun cásaña ñayuu ñayívi jée jéndije ró táca jée tajnúni i?

<sup>21</sup> Chí cácaññ i: Ma quehé ró ma cáji rō jeē yáha chí jée yúcuau, ni ma jñí rō, áchí i.

<sup>22</sup> Te máni jeē tajnúni ñayuu jíin costumbre máa i cúu te tu níhín jñíñu jeē quéndoo ndaā ñayuu.

<sup>23</sup> Te ndaā chi cájeni ni i jeē jnūhun ndíchí cúu ún, chi sáha jíin i jeē chiñúhún níhin i, jíin jée sáha suchí i máá i, jíin jée stóho i yiqui cúñu i. Te tu níhin jniñu cuiti jeē casi táca jniñu nées jeē cuní i sáha i.

### 3

<sup>1</sup> Núu súcuan te nájñūhun ni natecu Cristo, suni súcuan ni canatecu rō jeē ní cuu rō nájñūhun ndīyi ni sáha cuēchi rō. Te na cóndihví ni rō siquī táca jée iyó andiví núu ndeé Cristo lado váha Yaā Dios nuū kujéñu ya.

<sup>2</sup> Te na cáni ni rō siquī táca jée iyó andiví, nasūu siquī jeē iyó ini ñayiví.

<sup>3</sup> Chi nájñūhun je ni cajihí rō jíin Cristo, te vijna chi nájñūhun cátecu rō jíin yá andiví, chi cáyihí rō ini ndaha Yaā Dios.

<sup>4</sup> Te quiví ndíji Cristo, Yaā sáha jeē cótecu yō ní cáni, yūcuán na te suni quendacoo ndijin máá rō jíin yá, te kujéñu luu rō jíin yá.

*Ñayuu jíca jíin modo cuní maá, jíin ñayuu ní ndujeé*

<sup>5</sup> Núu súcuan te casi rō táca modo cuní maá rō jeē cáhīyo rō ini ñayiví yáha. Chi ma cáca jnéni rō, ma sáha rō jniñu jnéhén, ma ndíyo ni rō sáha rō táca jniñu nées, ma cutóo rō, ma ndíyo ni rō ndajniñu. Chi táca ndajniñu jeē ndíyo ni yō cúu nájñūhun ídolo yō jeē chiñúhún yó.

<sup>6</sup> Chi siquī táca jniñu yáha cúu jeē cuāha Yaā Dios castigo xeēn nuū ñayuu níni ni nuū yá.

<sup>7</sup> Te suni jíin jniñu yáha ní cajica rō ndé saá, ná ni casáha rō súcuan.

<sup>8</sup> Te vijna te na stóo rō táca jée yáha: jeē quití ní, jeē xeēn ni, jeē sáha jniñu nées, jeē cahán ndeváha nuū jnáhan, jíin jée cahán táca jnūhun tú vāha.

<sup>9</sup> Ma stahú rō jnáhan rō, chí yūcuán cúu modo maá rō jeē ní cajica rō jíin ndé saá, te je ni castóo rō.

<sup>10</sup> Te ni canduu rō ñayuu jeé, cuandacu rō máá Yaā ni sáha rōhó, te cuajecūhun vāha ni rō ndese Yaā cúu ya.

<sup>11</sup> Te ñayuu ní ndujeé tuá cúu i ñayuu griego, ni ñayuu hebreo, ni ñayuu ni sáha circuncidar, ni ñayuu tu ní sáha circuncidar, ni ñayuu ñuu jíca, ni ñayuu yucú jeē ní indāa nées, ni mozo jeē ní jeen ñayuu, ni ñayuu sájniñu cuenta maá, chí inuú cúu ndíhi i nuū yá. Chí Cristo cúu Jitoho ndíhi i, te ndéé yá ini anuá ndíhi i, ndúu yá jíin i.

<sup>12</sup> Chí ni nacāji Yaā Dios rohó jíjnáhan rō jeē cúu rō ñayuu maá yá jeē maní yá jíin. Núu súcuan te níni cundáhú ni rō jnáhan rō, te coo vāha ni rō jíin jnáhan rō. Te coo suchí ni rō, te coo vítá ni rō, te coo paciencia ni rō.

<sup>13</sup> Cuandeyí ni rō jíin jnáhan rō, te cone cáhnu ni rō nuū i te núu na vé ni sáha i nuū rō. Chí nájñūhun ni ine cáhnu ni Cristo nuū rō, suni súcuan sáha máá rō.

<sup>14</sup> Te jeē cánuú gá cúu jeē cundáhú ndasí ni rō jnáhan rō. Chí yūcuán sáha jeē ndúu inuú ni rō te íje vāha ni rō jíin jniñu váha.

<sup>15</sup> Te jñūhun coyūcu mání na cúnuú ini anuá rō sáha Yaā Dios. Chí ni cana ya rohó jée nduu rō ñn na ñayuu jée cóyūcu mání rō. Te níni na nácuatáhú rō núu yá.

<sup>16</sup> Te scuáha vāha rō jnūhun Cristo návāha cunuú jnūhun ún ini anuá rō. Te stéén rō nuū jnáhan rō, te stíhví ni rō i jíin táca jnūhun ndíchí yá. Te jíin salmo jíin himno, yaa íi jeē cahán jñūhun ya, na cáta luu rō jée nácuatáhú rō ini anuá rō nuū Yaā Dios.

<sup>17</sup> Te táca jniñu sáha rō, núu jeē cahán rō chí jée sáha rō cúu, ndíhi na sáha rō jée ndujéñu síhví máá Jitoho yō Jesús, te nacuatáhú rō núu Tatá yō Yaā Dios sáha ya.

*Ndese cánuú squícu ñayuu cácanđije nuū jnáhan i*

18 Róhó ñahan cácuu ñasihí, cuatáhú ró nuū yí ró, chi súcuan cánuú sáha ró siquí jeē candije ró Jítoho yō.

19 Te róhó tēe cácuu yí, cundáhú ni rō ñasihí ró, te ma cútucu ni rō jíin ña.

20 Róhó séhe jíjnáhan ró, táca-ni jniñu cuandije ró nuū tatá rō nuū naná rō, chi súcuan cúsi ni maá Jítoho yō.

21 Te róhó tátá jíjnáhan ró, ma squítí ni rō séhe ró, návaha ma cucuíhyá ni i.

22 Róhó mozo jíjnáhan ró, táca-ni jniñu cuandije ró nuū patrón rō ñayívi yáha. Ma sájniñu ndúxí ró jeē maá jēe coto de te cuajnúhún de róhó. Chi na sájniñu ndaá sájniñu ndije ró, te conso Iyo ró nuū Yaā Dios.

23 Te táca jniñu sáha ró, na cúsi ni rō sáha ró, te na cáni ni rō jeē nuū Jítoho yō cájejniñu ró, nasūu nuū ñáyuu.

24 Chi je cájini rō jeē maá Jítoho yō cuāha ya cuehē tahū cuu ró ní cáni. Chi nuū maá Cristo cájejniñu ró, chi máá yá cúu Jítoho rō.

25 Te ñayuu casáha jniñu néé, chi sa suhva ndutahū i siquí jeē ni sáha i. Chi tu sáha Yaā Dios cuenta ndese cúu ññ ññ ñayuu, chi inuú sáha ya jíin i.

## 4

1 Róhó patrón jíjnáhan ró, vāha ndaā na sáha ró jíin mozo rō. Te na núcūhun ni rō jeē suni iyó Jítoho maá ró, Yaā ndeé andívi.

2 Te ndívi rō ma jécuiñi rō jeē jicán tahú rō, chi coo ndito ni rō jíin, te nacuatáhú ró nuū Yaā Dios.

3 Te suni cacān tahú rō jehē rí jíjnáhan ri, jeē na sáha Yaā Dios jeē cóo ga modo nacani rí jñūhun, návaha cuu cahān rí jñūhun Cristo jeē ní yisáhí, jeē tu ní cájini ñayuu jenahán. Te siquí jñūhun un cúu jeē íne ri vecāa.

4 Te cacān tahú rō jeē cuu cahān cají rí ndese cánuú cáhān rí.

5 Sáha yúcún vāha ró jíin ñáyuu tu cácanđije. Ma cúhuun ni rō siquí i, chi condihví ni rō scandije ró i.

6 Te máni cahān vāha ró jíin ñáyuu, te cahān rō jñūhun cuajníñu jeē quéndō vāha i sáha. Te cani ni rō ndese vāha nastió cuñí rō jñūhun nuū ññ ññ i.

*Saludo jeē sándihí*

7 Tíquico cúu ññ hermano jeē maní yō jíin, te tēe squícu vāha chindéé ñájnañan jíin rí cúu de, te jéjniñu de jíin rí nuū maá Jítoho yō. Te máá de castūhún ndihi nuū rō ndese cuahān jniñu ri.

8 Jeē yúcuan ní taji rí de cuajeē de nuū rō jíjnáhan ró, návaha cuni rō ndese cáhíyo rí jíin jniñu, te coo ndeyí ni rō sáha de.

9 Te suni cuajeē Onésimo jíin de, tēe cúu jnáhan máá ró jíjnáhan ró. Te cúu de hermano jeē squícu vāha jeē maní yō jíin. Te ndíndúú de castūhun nuū rō ndese cuahān táca jniñu ichi cháha.

10 Sándeyí ni rō jíjnáhan ró, áchí Aristarco, tēe íne jíin rí vecāa. Te suni súcuan cáhān Marcos, ñani primo Bernabé. Te je ni ndacu rí jniñu nuū rō siquí Marcos, te núu ni jecondéhé de róhó te sáha vāha ró jíin de.

11 Te suni súcuan cáhān Jesús, tēe jeē suni nání Justo, jeē sándeyí ni rō. Te máá-ni de cácuu tēe hebreo cácanđije jeē chindéé ñáhán cánacani jñūhun jíin rí siquí ndese ndácu Yaā Dios jniñu. Te yōhyo ndeyí iyó ni rí casáha de.

12 Sándeyí ni rō jíjnáhan ró, áchí Epafras, tēe cúu jnáhan máá ró, te mozo Cristo cúu de. Te níni jicán tahú ndasí de jehē rō, jeē na cuñí nñhin ró, te ije vāha ni rō jeē squícu vāha ró ndihi jniñu cúni Yaā Dios.

<sup>13</sup> Chi cáhán ndaā rī jeē yóhyo ndǎhví ni de jehē rō jijnáhan ró, jín jéhē ñáyuu ñuu Laodicea jín Hierápolis.

<sup>14</sup> Lucas, tēe cúu médico jeē maní yō jín, suni cáhán de jeē sándeýí ni rō, te suni súcuan cáhán Demas.

<sup>15</sup> Cachi rō nuū tǎcá hermano ñuu Laodicea jeē sándeýí ni i, áchí rí. Te suni súcuan cahān rō jín Ninfas, jín táca ñáyuu cácandíje cándutútú vehe ña.

<sup>16</sup> Te ná ni jīnu ni cacahu ró carta yáha, te suni tají ró na cáhu ñáyuu cácandíje ñuu Laodicea. Te suni cahu máá ró carta jeē cuahán nuū ñáyuu Laodicea te ndiji nuū rō.

<sup>17</sup> Te cachi rō nuū Arquipo jeē na ndúcú ndéýí de squícu de jniñu ní tee Jitoho yō siquī de, áchí rí.

<sup>18</sup> Ruhū Pablo, yāhá-ni cúu jeē tée ri jín ndaha máá rí, jeē sándeýí ni rō. Te nucūhun ni rō ruhū jeē íne ri vecāa. Te ñúhun ni rī jeē na sáha ga Yaā Dios jee váha róhó jijnáhan ró. Súcuan na cóo. Amén.

## CARTA HN JEE NI TEE APOSTOL SAN PABLO NUU ÑAYUU ÑUU TESALONICA

<sup>1</sup> Máá rí cúu Pablo jiín Silvano jiín Timoteo, te cátee ri carta yáha cuájeē nuū rohó ñayuu cácanđije ñuu Tesalónica, jeē cáyihí ró ndaha Tátá yō Yaā Dios jiín Jítoho yō Jesucristo. Te cáñuhun ni ri jeē Tatá yō Yaā Dios jiín Jítoho yō Jesucristo, na sáha ga yā jeē váha rōhó, te sáha ya jeē coo ndeyí coo sī ni rō jijnáhan ró.

### *Ñayuu Tesalónica cúu i ñn ejemplo vāha*

<sup>2</sup> Níní cánacuatahú rí nuū Yaā Dios jeē siquí rohó jijnáhan ró, te tu náā ni rí cacān tahú rí jehē rō jeē cájicān tahú rí.

<sup>3</sup> Te níní ndácunehen ri rohó núu Tatá yō Yaā Dios, jeē váha casáha ró táca jniñu chi cácanđije ró, jiín jēē váha cájejniñu ró núu yā chi maní rō jiín yā, jiín jēē cájendeyí ni rō chi cáñuhun ni rō jeē coo jeē váha sáha Jítoho yō Jesucristo.

<sup>4</sup> Chi maní Yaā Dios jiín ró jijnáhan ró hermano, te cájini rí jeē ní nacāji ya rohó.

<sup>5</sup> Chi ná ni canacani ri jñuhun nuū rō jeē jnāma ya rohó, te nasūu jēē ni cáhān rí súcuan-ni, chi ni nacani ri jiín poder Espíritu Santo, te ni cacucáhnu vāha ni rí jeē jñuhun ndaā cúu. Te cájini rō ndese ni casáha vāha ri ná ni coyūcu rí jiín rō, chi ni nducú rí jeē quéndōo vāha ró.

<sup>6</sup> Te rōhó jijnáhan ró chi ni candacu ró rúhū, te suni ni candacu ró máá Jítoho yō. Chi ni cajetáhú ró jñuhun ya, te ni cacusī ni rō ni sáha Espíritu Santo, vēsú ni cajito ró cuehē jñúndóho siquí ún.

<sup>7</sup> Te súcuan cácuu ró ñn ejemplo nuū ndihí ñayuu cácanđije jeē cáyūcú región Macedonia jiín Acaya jiñā.

<sup>8</sup> Chi jeē siquí rohó jijnáhan ró cúu jeē ní jite núu jñuhun Jítoho yō, te nasūu máni Macedonia jiín Acaya, chi suni nī cáhnu-ni ni jité núu jñuhun ndese cácanđije ró Yaā Dios. Te jeē yúcuan tuá jini ññhún jeē nácani máá rí jñuhun nuū i.

<sup>9</sup> Chi sa máá i cánacani ndese ni cajetáhú váha ró rúhū ná ni jecoo ri nuū rō, jiín ndese ni castóo ro ídolo te ni quivicoo ró ndaha Yaā Dios, Yaā ndaā Yaā técu, jeē cuajniñu ró núu yā.

<sup>10</sup> Te cánacani i jeē cándetu ró jēē ichi ándiví ndiji Sēhe ya Jesús jeē ní nastécu yā. Te máá Jesús jnama ya yohó núu castigo xeēn jeē quíji.

### *Jniñu jeē ni sáha Pablo ñuu Tesalónica*

## 2

<sup>1</sup> Chi cájini rō hermano, jeē tu ní jécōo cáhā-ni ri nuū rō.

<sup>2</sup> Te cájini rō jeē ní castóho i ruhū te ni cacahān ndevāha i nuū rí ini ñuu Filipos. Te vēsú súcuan te máá Yaā Dios ni chindéē ñáhán yā ruhū, ni sáha ya jeē ní iyo ndeyí ni rí, te ni jecoo rí ñuu rō ni canacani ri jñuhun jeē jnāma ya rohó. Súcuan ni casáha ri vēsú xeēn ni iyo jñúndóho.

<sup>3</sup> Te jñuhun ni canacani ri, nasūu jñuhun ni castívi ri cúu, ni nasūu jēē nihín rí siquí rō, ni nasūu jēē ní castáhú rí rohó.

<sup>4</sup> Chi máá Yaā Dios ni jito ndee yā ruhū, te ni tejniñu ya ruhū jeē nácani ri jñuhun jeē jnāma ya rohó. Te jeē yúcuan cúu jeē cáhān rí. Te tu cáhān rí

jnūhun jeē núnjahan ni ñayuu, chi sa jeē núnjahan ni Yaā Dios, chi máá yá jító ndee anuá rī.

<sup>5</sup> Te cájini rō jeē tu ní cánducú rí cuajnúhún rí rohó ñin modo stahú, ni tu ní cácahān rī jeē cúsiñ ni rī jíin ró návāha nihīn rī xūhun ró. Te jíiní Yaā Dios jeē súcuan cúu.

<sup>6</sup> Te ni tu ní cánducú rí jeē cuajnúhún ró ruhū, ni jeē cuajnúhún ñinga ñayuu ruhū, vēsú súcuan cánuú coo núú, chi apóstol Cristo cácuu rī.

<sup>7</sup> Chi sa suhva vīta ní cacahān rī jíin ró, nájñūhun sáha ñahan ndéca yiquín jēe yucún ndíto ña sēhe ña.

<sup>8</sup> Te siquī jeē cácondáhú ndasí ni rī rohó, jeē yúcuan ní cacondihvī ni rī nacani rī jñūhun vāha Yaā Dios nuū rō. Te nasūu máá yúcuan-ni, chi suni nde vida rī cuāha rī jeē siquī rō nuú, chi yōhoyo manī rī jíin ró.

<sup>9</sup> Te cánahan ró hermano, jeē tú ni ñin ró ní stáhān rī jeē cacān rī nuū rō ná ni canacani rī jñūhun vāha Yaā Dios nuū rō. Chi ni canducú ndeyí rí ni casájniñu ndasí rí siquī jeē cótecu rī. Te nduú ñuú ni casájniñu rī.

<sup>10</sup> Máá ró cájini rō, te suni Yaā Dios jíiní yā ndese ndaā ndoo ni cajica rī nuū rohó ñayuu cácondíje. Te ni ñin tu cúu cahān cuēchi siquī rī.

<sup>11</sup> Te suni cájini rō ndese ni castíhvī ni rī ná ñin ná ñin ró, te ni cacahān rī jñūhun ndeyí ni jíin ró, nájñūhun sáha ñin tátá jíin sēhe de.

<sup>12</sup> Te ni cacahān nihin rī jíin ró jeē na cáca ndaā rō nuū Yaā Dios nájñūhun cánuú caca ró. Chi ni cana ya rohó jēe quíngoo ró núu ndácu ya jniñu, nuū luu cujéhu ró jíin yá.

<sup>13</sup> Te jeē yúcuan níiní nácuatáhú rí nuū Yaā Dios, chi ni cajetáhú ró jñūhun ya jeē ní canacani rī. Chi ni cajini rō jeē násūu jñūhun ñin tēe cúu, chi jñūhun Yaā Dios cúu. Te máá jéndaá jeē jñūhun un sájniñu ñin anuá rohó ñayuu cácondíje nde ndacu ró yá.

<sup>14</sup> Hermano, ñayuu ñuu rō ni cajito xeēn i róhó, te súcuan ni candoho ró nájñūhun ni candoho ñayuu cácondíje cáyūcú región Judea jeē cáyihī ndaha Yaā Dios jíin Cristo Jesús. Chi nájñūhun ni candoho i ni sáha jnāhan i ñayuu hebreo, suni súcuan ni candoho ró.

<sup>15</sup> Chi suu ñayuu hebreo ni cajehni de máá Jítóho yō Jesús, nájñūhun ni cajehni de tāca tēe ñuu de jeē ní canacani jñūhun ya nde jenahān. Te suni nde ruhū jijnáhan rī ni cascúnu de. Te casáha de jniñu jeē tu núnjahan ni Yaā Dios, te cúu de contra siquī tāca ñayuu.

<sup>16</sup> Chi Jesúscoo de jeē ma nácani rī jñūhun nuū ñayuu tācá nación jeē tu jíiní, návāha tú cácu i. Te súcuan sáha de jeē nducuehē gā cuēchi siquī de. Te vijna te yachī quiji quivī jeē cuāha Yaā Díos castigo xeēn nuū de.

### *Jeē cuní Pablo quicōndēhé tuco de ñayuu Tesalónica*

<sup>17</sup> Hermano, ni cacujiyo rī ñin núnúu-ni nuū rō jijnáhan ró. Te vēsú tu cájito jnāhan yó, te níiní cáñuhun ni rī rohó. Te yōhoyo ní cacuu ni rī ndacoto rī nuū rō jijnáhan ró.

<sup>18</sup> Te jeē yúcuan ní cajeni ni rī jecoo rī nuū rō nuú. Te ruhū Pablo, tijni jínu ni nducú rí modo jeē rī, te Satanás ni jesí ichi rī jijnáhan rī.

<sup>19</sup> Chi tuá na ñinga cáñuhun ni rī, te tuá na ñinga cácusīñ ni rī, chi suu máá ró jijnáhan ró. Te jeē siquī máá ró cúu jeē nihín rī premio rī te cusīñ teyí ni rī cuiñi yó núu máá Jítóho yō Jesucristo quivī ndíji ya.

<sup>20</sup> Suu jeē siquī rohó cúu jeē cácusīñ teyí ni rī.

## 3

<sup>1</sup> Te jeē yúcuan tuá ni cáncanda ri condetu ri nde nihīn rī jnūhun ndese cáhīyo ró. Te ni casándaā rī jeē quéndōo máá-ni rī űuu Atenas.

<sup>2</sup> Te ni catajī rī hermano yō Timoteo, tēe jéjníñu jīn rī nuū Yaā Dios siquī jnūhun jeē jnáma Cristo yohó. Te ni jecondéhé de rohó návāha sáha de jeē cuiñi nīhin ró te coo ndeyí ni rō jīn jnūhun cáncandje ró.

<sup>3</sup> Te ni jeē de návāha ma náyūhú ni ĩn ró siquī tāca jnúndóho jeē sáha ñayuu. Chi je cájini rō jeē súcuan cánuú ndoho yó.

<sup>4</sup> Chi nde ná ni coyūcu rī jīn ró, te ni cacastūhun rī nuū rō jeē nihīn nahín yó jnúndóho. Te je cájini rō jeē súcuan ni cuu, nájnūhun ni cacahān rī.

<sup>5</sup> Te jeē yúcuan, náa tuá ni cánda ri condetu ri jeē nihīn rī jnūhun ndese cáhīyo ró, te ni tají rí de ni jeē de, návāha cuni rī núu cáncandje nahín ró. Chi ni jeni ni rī á sanaa te jexeén jeē jito ndee yohó ní cundeyí jīn ró, te naa cáhá-ni jniñu jeē ní casáha ri jīn ró.

<sup>6</sup> Te vijna chi je ni ndee Timoteo nuū rī jijnáhan ri jeē ni jéē de űuu rō Tesalónica. Te ni nacani de jeē cáncandje vāha ró, te cákundáhú ni rō jnáhan ró. Te ni cachi de jeē cáñuhun ni rō ruhū, chi cáhīyo manī rō jīn rí. Te cácuni rō ndacoto ró núu rī, nájnūhun cácuni rī ndacoto ri nuū rō.

<sup>7</sup> Te jeē yúcuan ní candusī ni rī siquī jeē cáncandje vāha ró, hermano, vēsú xeēn iyó jnúndóho siquī rī.

<sup>8</sup> Te vijna je ni cananihīn ni rī, chi cáhīin nīhin ró jīn máá Jítoho yō.

<sup>9</sup> Núu súcuan te tu jīnu cuiñi nacuatáhú rī nuū Yaā Dios jeē siquī rohó jijnáhan ró. Chi jito ya jeē cácusī ndasí ni rī jeē súcuan cáhīyo ró.

<sup>10</sup> Te nduú űuú cájicān tahu ndasí rī jeē ndácoto tucu ri nuū rō, te stéén gā rī na-ni jnūhun cúmanī jecūhun ni rō siquī jnūhun cáncandje yó.

<sup>11</sup> Te cácuni rī jeē máá Tátá yō Yaā Dios jīn Jítoho yō Jesucristo, na núne ya ichi jeē cuu jecoo tucu ri nuū rō.

<sup>12</sup> Te na sáha máá Jítoho yō jeē cuehē ndasí gá cundáhú ni rō jnáhan ró jīn táca gá ñayuu, nájnūhun cákundáhú ni rī rohó jijnáhan ró.

<sup>13</sup> Te na sáha ya jeē ĩje ánuá rō jeē cuiñi nīhin ró, návāha coo ndoo ró jéē ma coo cuēchi ró núu máá Tátá yō Yaā Dios, quivī ndīji Jítoho yō Jesucristo jīn táca ñayuu yñhi ndaha ya.

*Siquī jeē caca ndaā yō modo jeē cúsi ni yā*

## 4

<sup>1</sup> Te vijna hermano, iyó inga jnūhun jeē cacahān ndahú rī jīn ró te cáhán nīhin ri jīn ró, chi súcuan cúní máá Jítoho yō Jesús. Je ni castéén rī nuū rō ndese cánuú caca ndaā rō návāha cusī ni Yaā Dios. Te cacahān ndahú rī jīn ró jeē sa vīhyá gā na cáca ró súcuan.

<sup>2</sup> Chi je cájini rō na jniñu ni candacu ri nuū rō jeē ní ndacu máá Jítoho yō Jesús.

<sup>3</sup> Te cúní Yaā Dios jeē na coo ndoo coo ĩi rō nuū yā, te ma cáca jnéni ró.

<sup>4</sup> Te ná ĩn ná ĩn ró na cóndeca yíñhún ró ñasihí máá ró, te súcuan caca ndoo ró.

<sup>5</sup> Te ma sáha ró jniñu néé jéē ndīyo ni rō jesihí, nájnūhun casáha ñayuu táca nación jeē tu cájini i jnūhun Yaā Dios.

<sup>6</sup> Ni ĩn ró ma sáha ró cuēchi jeē quénde rō ñasihí jnáhan ró. Chi máá Jítoho yō cuāha ya castigo xeēn nuū ñayuu casáha táca jniñu súcuan, nájnūhun je ni cacahān nīhin ri ni castūhun rī nuū rō.

7 Chi tu ní cána Yaā Dios yohó jéē sáha yó jniñu jnéhén, chi sa jeē caca ndoo yó.

8 Núu súcuan te ñayuu jeē squéhichī jnūhun yáha, nasūu jnúhun ñin tēe squéhichī i, chi sa jnūhun Yaā Dios, Yaā ni jéhe Espíritu Santo nuū yō.

9 Te tu jini ñúhún jéē tée ri nuū carta yáha jéē coo manī rō jín táca hermano, chi je ni steén Yaā Dios nuū rō jeē coo manī rō jín jnáhan rō.

10 Te je cáhīyo manī rō súcuan jín táca hermano cáyūcu ní cáhnu Macedonia jiñā. Te cáhán ndahú rí jín ró hermano, jeē sa víhyá gā na cóo manī rō jín i.

11 Te na cóndihvī ni rō coyūcú nayúú ró, te ma cóndihvī ni rō siquī ndese cáśaha jnáhan ró, chí condihvī ni rō sáha ró jniñu máá ró, nájñūhun ni candacu ri nuū rō.

12 Súcuan na sáha ró návāha ñayuu tu cándije, cuatáhú i róhó, te suni ma cúmanī jeē cotecu rō.

### *Siquī jeē ndíji Jitoho yō*

13 Suni cácuni rī, hermano, jeē na jécūhun ni rō jijnáhan ró siquī ñayuu cájihī, návāha ma cucúhyá ni rō nájñūhun sava ga ñayuu jeē tu cáñuhun ni i jeē nátecu ndíyi.

14 Chi nájñūhun cácandije yó jéē ni jhī Jesús te ni natecu yā, suni súcuan cácandije yó jéē nastécu Yaā Dios táca ñayuu ni cacandije nuū Jesús te ni cajihī.

15 Jeē yúcuán cácastūhun rí ñin jnūhun jeē ní castūhun máá Jítoho yō nuū rī: Jeē yohó jéē cátecu gā quivī ndíji máá Jítoho yō, nasūu máá yó cosnú jéē ndaa yó quihīn yō. Chi xīhna gā ñayuu je ni cajihī ndaa i quihīn i.

16 Chi máá Jítoho yō nuu ya quiji ya ichi ándivī, te cana jee ya jeē maá yá ndácu jniñu, te cana jee ndajéhé cujéhnu ga, te cuecu trompeta Yaā Dios. Te xīhna gā natecu táca ndíyi jeē ní cacandije Cristo.

17 Yúcuán na te yohó jeē cátecu gā yō quivī ndíji ya, suni ndonehen ya yohó jín i, quihīn yō mēhñu vícō. Te naquijnáhan yó jín máá Jítoho yō sava ándivī. Te súcuan condee yō ní cáni jín máá Jítoho yō.

18 Núu súcuan te jín jnúhun yáha cahān ndeyí ni rō jín táca jnáhan ró.

## 5

1 Te tu jini ñúhún jéē tée ri nuū carta yáha siquī cuiyā chí quivī jeē coo táca un, hermano.

2 Chi je cájini vāha ró jéē ñin sanaa ni yō te quee quivī ndíji máá Jítoho yō, nájñūhun ñin sanaa ni yō te quíji ñacuñhá jecuáá.

3 Chi ná-ni cácahān ñayuu jeē nayúú-ni ñin te tú na jñúndóho coo, te ná-ni cácahān i súcuan te ñin sanaa ni i te quíji jñúndóho siquī i jeē náá i, te ma cácu cuít i. Chi quíji quivī un nájñūhun ñin sanaa-ni te quéjéé jéhnđe chíji ñin ñahan scácu sēhe.

4 Te róhó hermano, tu cácuu ró ñayuu cájica nájñūhun nuū néé jeē ñin sanaa-ni te quíji quivī un siquī rō nájñūhun quíji ñacuñhá.

5 Chi ndihī ró cácuu ñayuu jeē nájñūhun cájica ró nduú, chí stéén luz yā ini anuá rō. Chi tu cácuu yó nájñūhun ñayuu jeē tu jécūhun ni siquī Yaā Dios, jeē nájñūhun cájica i nuū néé.

6 Núu súcuan te ma chúhun ni yō nájñūhun ñayuu cáquixī, chí sa ndito na cóo ni yō te coo cájī xínī yō.

7 Chi jecuáá cúu jeē cáquixī ñayuu, te suni jecuáá cúu jeē nájñini i.

8 Te máá yó chí nájñūhun jeē cájica yó nduú, te na cóo cájī xínī yō. Te na cúcutú yó jín jnúhun cándije ñihin yó jín jnúhun cúndáhú ni yó jnáhan



yó, nájñuhun cúcutú soldado jíin sahma cáa. Te na cúcutú yó jíin jñuhun jeé cáñuhun ni yó jeé cácu yó, nájñuhun cúcutú soldado jeé ñuhun lélú cáa xiní de.

<sup>9</sup> Chi Yaā Dios tu ní jéni ya yohó jéé cuáha ya castigo yohó, chi sa suhva jeé jnama ya yohó sáha máá Jítóho yó Jesucristo.

<sup>10</sup> Te máá yá ni jihí yá jehé yó, návāha cotecu inuú yó jíin yá, vēsú núu cotecu gā yó ñayiví yáha chí cúu yó.

<sup>11</sup> Núu súcuan te cahān rō jñuhun ndeyí ni jíin táca jnáhan rō, te scuéhnu jnáhan rō jíin jñuhun ya, nájñuhun je casáha rō.

### *Jeé jéni ichí Pablo táca hermano*

<sup>12</sup> Te cácahān ndahú rí jíin rō hermano, jeé cuatáhú rō tēe cájejníñu cándito róhó, jeé cácujeñnu de nuū rō jíin jñiñu máá Jítóho yó, te cájeni ichí de róhó.

<sup>13</sup> Te coo yíñúhún ndasi rō nuū de, te coo maní rō jíin de siquí jñiñu ya jeé casáha de. Te na cóyūcu mání rō jíin táca jnáhan rō.

<sup>14</sup> Te suni cácahān ndahú rí jíin rō hermano, jeé na stáhví ni rō ñayuu cájica cúxí. Te cahān rō jñuhun ndeyí ni jíin ñáyuu jeé yachí ndínuu ni i. Te chindéé ñáhán rō ñayuu jeé tu fuerza iní. Te cuandeyí ni rō jíin ndihí ñayuu.

<sup>15</sup> Te coto má nasáha ndevāha ro jíin ni ññ ñayuu te núu sáha ndevāha i jíin rō. Chi máni jeé váha nducú rō sáha rō jíin táca jnáhan rō jíin ndihí-ni ñayuu.

<sup>16</sup> Níní na cóo sñ ni rō jijnáhan rō.

<sup>17</sup> Te níní na cácan tahú rō.

<sup>18</sup> Te nacuatáhú rō jeé siquí táca-ni. Chi súcuan cúni Yaā Dios jeé sáha rō jéé cácañje rō Cristo Jesús.

<sup>19</sup> Te ma cási rō nuū jñiñu jeé sáha Espíritu Santo jíin rō.

<sup>20</sup> Te ni ma cujéé ni rō nuū jñuhun cácahān tēe cánacani jñuhun Yaā Dios.

<sup>21</sup> Chi coto ndee rō táca jñuhun, te núu jeé váha cúu, te cuatáhú rō.

<sup>22</sup> Te ma quívi nduu rō jíin ni ññ jñiñu néé.

<sup>23</sup> Te máá Yaā Dios jeé jéhe jñuhun ndeyí sñ ni, ñuhun ni rí jeé sáha ndihí ya jeé cóo ndoo coo iñ rō nuū yā. Te ñuhun ni rí jeé cóndito váha ya anuá rō jíin jéé níjnūni rō, jíin yiquí cúñu rō, návāha tú na cuēchi coo siquí rō quívi ndíji máá Jítóho yó Jesucristo.

<sup>24</sup> Chi Yaā jeé ní cana róhó, sáha ya ndihí un jíin rō, chi squícu ya jeé ni jéjnūhun ya.

### *Saludo jíin bendición jeé sándihí*

<sup>25</sup> Hermano jijnáhan rō, cacān tahú rō jehé rí jijnáhan rí.

<sup>26</sup> Te núu na cáhán rō jíin táca hermano, te techūhu yíñúhún rō ndaha i.

<sup>27</sup> Te cáhán nñhin rí jíin rō, chi súcuan cúni máá Jítóho yó, jeé na cáhu rō carta yáha núu táca hermano.

<sup>28</sup> Te ñuhun ni rí jeé máá Jítóho yó Jesucristo na sáha ga yá jeé váha róhó. Súcuan na cóo. Amén.

## CARTA UU JEE NI TEE APOSTOL SAN PABLO NUU ÑAYUU ÑUU TESALONICA

<sup>1</sup> Máá rí cúu Pablo jíin Silvano jíin Timoteo, te cátee rí carta yáha cuájeē nuū rohó ñayuu cácanđije ñuu Tesalónica, jeē cáyihí ró ndaha Tátá yō Yaā Dios jíin Jítóho yō Jesucristo.

<sup>2</sup> Te cáñuhun ni rí jeē Tátá yō Yaā Dios jíin Jítóho yō Jesucristo, na sáha ga yā jeē yáha rōhó, te sáha ya jeē coo ndeyí coo sī ni rō jijnáhan rō.

### *Jeē sándaā yā cuēchi quivī ndíji Cristo*

<sup>3</sup> Cánúú jéē niní nacuatáhú rí nuū Yaā Dios jeē siquí rohó jijnáhan rō hermano. Chi súcuan íyó váha, chi yōhyo váha cuahije rō jíin jñuhun jeē cácanđije rō yá, te yōhyo cuanducuehē jeē cákundáhú ni rō táca jnáhan rō.

<sup>4</sup> Te jeē yúcuan cúu jeē cácusī teyí ni rí canacani rí jñuhun rō núú táca grupo ñayuu cácanđije nuū Yaā Dios. Chi váha cácanđije rō, te váha cájendeyí ni rō jeē cájito xeēn ñayuu rohó jíin jéē cándoho rō táca gá jñundóho.

<sup>5</sup> Te jíin táca jéē yáha chíhi ya cuenta jeē cácuu rō ñayuu váha jeē quívicoo rō ñuu nuū ndácu ya jñíñu. Chi siquī ñuu un cúu jeē cándoho rō. Te jeē súcuan chíhi ya cuenta siquī rō, yáha stéén nuū yō jeē váha Yaā cúu ya.

<sup>6</sup> Te suni íyó váha jeē nastóho ya ñayuu castóho rōhó.

<sup>7</sup> Te quivī ndíji Jítóho yō Jesús, quivī un sáha Yaā Dios jeē ndétātu rōhó jéē cándoho, te suni ruhū jijnáhan rí. Chi jíin yáñuhun quiji Jesús ichi ándiví jíin táca ndajéhé yā jeē ndíso poder.

<sup>8</sup> Te cuāha ya castigo nuū ñayuu jeē tu ní cájēhe i jñuhun cuni i ndese Yaā cúu Yaā Dios, te tu ní cájetáhú i jñuhun máá Jítóho yō Jesucristo jeē jnáma ya i.

<sup>9</sup> Te ñayuu ún chi ndoho i nī cáni, chi cujiyo i nuū máá Jítóho yō, te ma cúu quívicoo i nuū lúu ndasí cújéñu ya jíin poder yā.

<sup>10</sup> Súcuan sáha ya quivī ndíji ya jeē lúu cujéñu ya sáha ñayuu cácanđije jeē yíhi ndaha ya. Te nahán naa ni i coto i nuū yā. Te suni súcuan rōhó jijnáhan rō, chi ni cacandíje rō jñuhun jeē ní canacani rí nuū rō.

<sup>11</sup> Te jeē yúcuan cúu jeē niní cájicān tahú rí jehē rō, jeē na cúu rō ñayuu váha jeē ní cana ya rohó. Te jíin fuerza yā na sáha ya jíin rō jeē squícu rō táca jñíñu váha jeē ní catee ni rō sáha rō siquī jeē cácanđije rō.

<sup>12</sup> Te súcuan te cujéñu máá Jítóho yō Jesucristo sáha rō, te suni cujéñu máá rō jijnáhan rō sáha ya. Chi Yaā Dios yō jíin Jítóho yō Jesucristo, súcuan cúu jeē sáha ya jeē váha yóhó.

### *Jñuhun siquī máá téé sáha xeēn cuēchi*

## 2

<sup>1</sup> Vijna te cahān rí siquī jeē ndíji máá Jítóho yō Jesucristo jíin jéē ndutútú yó núu yā. Cácahān ndahú rí jíin rō jijnáhan rō hermano,

<sup>2</sup> jeē ma cuáha rō jñuhun sacā nuu caní ni rō, ni ma cunéé ni rō núu cácahān ñayuu jeē jé ni quee quivī ndíji máá Jítóho yō. Ma candíje cuiti rō vēsú núu cahān i jeē ni níhīn i ñn jñuhun siquī un núú Espíritu, chí ñn jñuhun jeē ni cáhān inga, chí núu cachi i jeē ruhú jijnáhan rí ni tají ñn carta jeē cahān súcuan.

<sup>3</sup> Ma cuáha cuiti rō jnūhun jeē stahú ni ñn i róhó. Chi nde ná tu quiji quivī ún te xihna gā ndunihni ni cuehē ñayuu nuū yā, te quenda ndijin máá téé sáha xeēn cuēchi, te téé jnāhnū ndetū cúu máá téé ún.

<sup>4</sup> Chi téé jito uhū Yaā Dios cúu de, te ndonda de contra siquī tāca jéé casnání i yaā i jín tāca jeē cáchiñúhún i. Te xeēn gā sáha de, chi nde cucōo de ini templo Yaā Dios jeē iyó Jerusalén, te cahān de jeē maá de cúu Yaā Dios.

<sup>5</sup> ¿A cáhán rō jnūhun yáha? Chi súcuan ni cahān rī jín ró ná ni ñyo ri jín ró.

<sup>6</sup> Te je cájini rō ndé vé cúu jeē jési jeē ná tu quenda ndijin téé ún, chi nde na quée quivī maá de.

<sup>7</sup> Chi je jícú sáhi tāca cuēchi xeēn ini ñayiví, te vijna chi iyó jéé jési nuū, návāha ma cáa ndasí gā cuēchi, chi nde na cújiyo máá jéé jési nuū.

<sup>8</sup> Te sáá te quenda ndijin máá téé xeēn ún. Te máá Jítoho yō Jesús cahni ya téé un jín táchī yuhu-ni ya, te jín jéé ndíndēe yá ndiji ya te snāhnú ndetū yā de.

<sup>9</sup> Te jeē quiji téé xeēn ún chi máá Satanás sáha. Te quiji de jín cuéhē poder, te sáha de tāca jniñu jéhu jeē stahú de, jeē nahán naa ni ñayuu coto i.

<sup>10</sup> Te jín tāca jniñu néé te stahú ndasí de ñayuu jeē jnahnú ndetū, chi tu ní cúní i cuatáhú i jnūhun ndaā jeē cácu i núú.

<sup>11</sup> Te jeē yúcuan cuáha Yaā Dios jnūhun jeē cuatáhú i jnūhun jeē tú ndaā cuiti, te candíje i jnūhun stáhú un.

<sup>12</sup> Te súcuan te jecondee cuēchi siquī ndihí i jeē tu ní cácandíje i jnūhun ndaā, chi sa jniñu néé ni cacusiñ ni i jín.

### *Ñayuu jeē ní nacāji ya jeē cācu i*

<sup>13</sup> Te cánuú jéé niní nacuatáhú rí jijnáhan ri nuū Yaā Dios jeē siquí rohó jéé cácuu ró hermano jeē maní Jítoho yō jín. Chi nde ná ni jecōo ñayiví, te je ni nacāji Yaā Dios rohó jéé jnáma ya rohó. Chi sáha Espíritu yā jeē cáhiyo ndoo cáhiyo ñi rō nuū yā te cácandíje ró jnūhun ndaā.

<sup>14</sup> Chi jeē yúcuan ní cana ya rohó jín jnūhun jeē jnáma ya yohó jeē ní canacani ri, návāha quāvicoo ró núú kujéhu luu ró jín máá Jítoho yō Jesucristo.

<sup>15</sup> Núu súcuan te cuiñi ñihin ró hermano, te conahán váha ró jnūhun jeē ní cacutūhva ró núú rī, núu jeē ní cacahān rī chí jéé ní tee ri nuū carta.

<sup>16</sup> Máá Jítoho yō Jesucristo jín Tátá yō Yaā Dios ni cundáhú ni yā yohó, te ni sáha ya jeē coo siñ ni yō ñi cáni, jín jéé ñūhun ni yō tāca jéé váha jeē coo siquí jeē váha ni yā jín yó.

<sup>17</sup> Te na sáha ga yā jeē cóo ndeyí ni anuá rō jijnáhan ró, te na sáha ya jeē íje ró cáhān rō tāca jnūhun váha ya, te sáha ró tāca jniñu váha.

### *Jeē na cácan tahú i jehē de*

## 3

<sup>1</sup> Te iyó inga jnūhun cánuú, hermano. Na cácan tahú rō jehē rī jijnáhan ri, návāha yachí cuitē núu jnūhun máá Jítoho yō, te cuatáhú váha ñayuu, nájñūhun ni cajetáhú máá ró.

<sup>2</sup> Te suní cacān tahú rō jeē na cácu ri nuū tāca téé cásáha néé jéé cátejñáhan jín rí. Chi tú ndihí téé cácandíje jnūhun ya.

<sup>3</sup> Te máá Jítoho yō chí váha squícu ya jeē ni jéjñūhun ya, te sáha ya jeē íje ni tāca ró jín jnūhun ya, te coto ya rohó núú jeneé.

<sup>4</sup> Te cácucahnu ni rī sāha máá Jítóho yō, jeē cócuu ró jíin jniñu jeē ní candacu ri nuū rō, te suni cocuu ga rō jíin.

<sup>5</sup> Te ñúhun ni rī jeē máá Jítóho yō steén gā yā ndese coo manī gā rō jíin Yaa Dios nde jíin ini jíin ánuá rō, jíin jeē cuándeyí ni rō nájñuhun ni sāha Cristo.

*Jeē cánuú sájñiñu yó*

<sup>6</sup> Te cándacu ri jniñu nuū rō hermano, chi súcuan ni ndacu máá Jítóho yō Jesucristo, jeē na cújiyo ró núú táca hermano cájica cúxí te tu cájica vāha de nájñuhun ni castéén rī nuū rō.

<sup>7</sup> Chi je cájini rō ndese cánuú ndacu ró rúhū jijnáhan ri, chi tu ní cájica cúxí rí ná ni cahīyo ri jíin rō.

<sup>8</sup> Ni tu ní cáyeji rī staā ni ñn ró súcuan-ni, chi ni cachunaa rī. Chi sa ni canducú ndeyí rí ni casájñiñu téyí rí nduú ñuú, návāha ma stáhān rī ni ñn ró.

<sup>9</sup> Te vēsú íyó derecho rī jeē cacán rī nuū rō nuú, te tu ní cájicān rī, chi súcuan ni casáha ri návāha cuu ri ñn ejemplo nuū rō ndese sāha ró jijnáhan ró.

<sup>10</sup> Chi ná ni coyūcu rí jíin ró, te ni candacu ri jniñu yāha nuū rō: Núu ndé ñn ñayuu tu cúní i sájñiñu i, te suni ma cáji i núu súcuan.

<sup>11</sup> Chi ni canihīn rī jñuhun jeē cájica cúxí sava ró, te tu casájñiñu ró, chi yāha yúcuan-ni sāha rō.

<sup>12</sup> Te cándacu ri jniñu nuū rohó jeē casáha súcuan, te cástñví ni rī rohó jeē na cóo nayúú ró te sájñiñu ró, návāha nihīn rō jeē cáji rō siquī jniñu sāha máá ró. Chi súcuan ndácu máá Jítóho yō Jesucristo jniñu.

<sup>13</sup> Hermano, ma ndínuu ni rō jijnáhan ró sāha ró táca jniñu váha.

<sup>14</sup> Te núu ndé ñn i tu jétáhú i jñuhun jeē cahán rī nuú carta yāha, te condēhe váha ro ndé-ni i cúu, te ma quijnáhan ga rō jíin i, návāha na cúcanu i te nacani ni i.

<sup>15</sup> Te nasūu jeē cóto uhū rō i, chi sa cahān rō jíin i nájñuhun jíin ñani rō jeē na sájñiñu vāha i.

*Bendición jeē sándñí*

<sup>16</sup> Te ñúhun ni rī jeē máá Jítóho yō, Yaa jeē jéhe jñuhun ndeyí sñ ni, níní na sāha ya jeē coo ndeyí coo sñ ni rō siquī táca-ni, te coo ya jíin ró jijnáhan ró.

<sup>17</sup> Ruhū Pablo, yāhá-ni cúu jeē téé ri jíin ndaha máá rí jeē cahán rí jeē sándeyí ni rō jijnáhan ró. Te súcuan jéhe ri firma nuū táca carta rī, návāha cuni rō jeē carta máá rí cúu. Súcuan cáa letra rī.

<sup>18</sup> Te ñúhun ni rī jeē máá Jítóho yō Jesucristo, na sāha ga yā jeē váha ró jijnáhan ró. Súcuan na cóo. Amén.

## CARTA HN JEE NI TEE SAN PABLO APOSTOL NUU TIMOTEO

<sup>1</sup> Máá rí cúu Pablo, apóstol Jesucristo, chi Yaā Dios jeē jnáma yóhó, jíin Jítóho yō Jesucristo jeē ñúhun ni yō coto yó, ni catají yá ruhū jeē nácani rí jnúhun ya.

<sup>2</sup> Te tée rí carta yáha cuájeē nuū rō Timoteo, chi cúu ndije ró nájñúhun sēhe rí siquī jeē ni scándíje rí rohó. Te ñúhun ni rí jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo sī ni rō.

### *Jeē ma candíje i tāca jnúhun stáhú*

<sup>3</sup> Ná ni quihin rí ichi jeē quihín rí Macedonia, te ni cahān ndahú rí jíin ró jeē quéndō ró ñuu Efeso. Te suni súcuan cahán rí jíin ró vijna, návāha cahān ñihin ró jíin sava ñayuu yúcuan jeē ma stéen i inga jnúhun jeē tú ndaa.

<sup>4</sup> Te ma cuatáhú i tāca jnúhun jeē cúu máá cuento-ni, jíin jnúhun jeē cahán siquī ndese vēji yucūn tāca jíi yō. Chi tāca jēē yúcuan sáha jeē nahán cándajñúhún i siquī, te tu ndé jéjníñu, te tu sáha jeē íje i squícu i nuū Yaā Dios siquī jnúhun cácandíje yó.

<sup>5</sup> Te ndácu rí jniñu yáha chi cúní rí jeē na cundáhú ni i jnáhan i siquī jeē iyó ndoo iyó ndáa anuá i, te cácandíje ndije i ya.

<sup>6</sup> Te sava ñayuu chi ni cajica yátá i, te ni cascuíta i jnúhun ya, ni quívicoo i nuū tāca jnúhun jeē tu ndé jéjníñu.

<sup>7</sup> Chi cáculni i cuu i maestro ley yā, te ni tu cájecūhun ni i na jnúhun cúu jeē cácahān i, jíin na vé cúu jeē castéén ñihin i.

<sup>8</sup> Te jíni yō jeē iyó váha ley un, te núu jecūhun ni yō ndese jéjníñu.

<sup>9</sup> Chi cánuú sáha yó cuenta jeē tu ní jécōo ni ñin ley jeē siquī ñayuu ndaa, chi sa suhva siquī ñayuu jeē tu cájetáhú, jeē níhni ni, jeē casáha jniñu néé, jeē casáha cuéchi, jeē tu cáchiñúhún Yaā Dios ni tu cácandíje ley yā, jeē cájehni tatá jíin náná, jíin jéē cájehni ndiyi.

<sup>10</sup> Te suni ní jécōo siquī ñayuu cájica jnéni, jíin téé casáha ndiyí jíin jnáhan yí, jíin ñayuu casacuíhná inga ñayuu, jíin ñayuu castáhú, jíin ñayuu cácahān ñihin jnúhun yáa. Te ni jécōo siquī tāca gá ñayuu jeē casáha jniñu tu quíjñáhan jíin jnúhun ya jeē steén ndaa váha.

<sup>11</sup> Te jnúhun ya un cúu jnúhun yōhyo jéhnu jeē jnáma Yaā Dios yohó. Te yōhyo ndetū Yaā cúu ya. Te ni tejníñu ya ruhū nácani rí jnúhun ya.

### *Jeē nácuatáhú Pablo siquī jeē ní cundáhú ni yā de*

<sup>12</sup> Te nácuatáhú rí nuū Jítóho yō Jesucristo, Yaā ni jēhe fuerza ini rí, chi ni quihin ya ruhū ni sáha ya jeē cuu squícu rí, te ni tejníñu ya ruhū nácani rí jnúhun ya.

<sup>13</sup> Te súcuan ni sáha ya jíin rí vēsú ni cahān ndevāha rí siquī yā nde saá, te ni sáha ndevāha rí jíin ñayuu cácandíje, te xeēn ni sáha rí. Te vēsú súcuan te ni cundáhú ni yā ruhū, chi ná tu candíje rí yā nde saá, te tu ní jécūhun ni rí na vé cúu jeē sáha rí.

<sup>14</sup> Súcuan ni sáha Jítóho yō jeē váha ndasí jíin rí. Te ni sáha ya jeē candíje rí jíin jéē cundáhú ni rí jnáhan rí siquī jeē ní quívi rí ndaha Cristo Jesús.

15 Te ndaā ndije cúu jnūhun yáha, te jeē cánuú candíje ndihi ñayuu cúu: jeē ní quiji Cristo Jesús ini ñayvī nāvāha jnama ya ñayuu iyó cuéchi. Te ruhū cúu tēe jeē vihyá gā ni sáha cuéchi.

16 Te ni cundáhú ni Yaā Dios ruhū, nāvāha jíin rúhū jeē vihyá gā ni sáha cuéchi te stéén Jesucristo ndese yōhoyo íne cáhnu ni yā. Te súcuan ni sáha ya jeē cúu ri ñin ejemplo nuū tāca ñayuu candíje ní cuáhān yō, nāvāha nihīn tahú i cotecu i níí cáni.

17 Núu súcuan te níí cáni na cáhān yíñúhún yó jeē yóhoyo luu cújéhnu máá Yaā jeē cúu Rey siquī ndihi, jeē técu níí cáni, jeē tu nāā cuiti. Te tu cúu coto yó núu yā vijna, te máá ñin-ni ya iyó, te ndíchí yá. Amén.

18 Nájñūhun sēhe ri cúu ró Timoteo, te jniñu yáha téjníñu ri rohó, jéē na ndúcú ndéyí ró siquī jniñu váha. Te na cándíje váha ró, te na cóo ndaā anuá rō. Chí nde saá je ni cacahān tācá hermano jíin jnūhun Yaā Dios jeē súcuan condiso jniñu rō.

19 Chí sava ñayuu tuá iyó ndāā anuá i nuū yā, te ni casnáā i jnūhun cácandíje i.

20 Himeneo jíin Alejandro cúu uū tēe ni casáha súcuan. Te je ni siaá rī de nuū Satanás, jeē stóho ún de, nāvāha jíin jnūndóho ún te cutūhva de jeē ma cáhān ndevāha ga de siquī Yaā Dios.

### *Siquī ndese cacān tahú yō*

## 2

1 Núu súcuan te xīhna gā ndácu ri jeē cacān tahú rō jehē tāca ñayuu. Te cahān ndahú rō jehē i, te cacān rō na-ni na vé jíni níñhún i, te nacuatáhú ró nuū yā jeē siquí i.

2 Te cacān tahú rō jehē tāca tēe cácujeñnu jíin jéē ndácu jniñu, nāvāha sáha de jeē cuu coyūcu váha yó te tú na jnūndóho coo siquī yō, te cuu chiñúhún váha yó Yaā Dios te sáha yíñúhún yó jíin tāca-ni.

3 Chí yáha cúu jeē váha jeē núnjahan ni Yaā Dios, Yaā jnáma yóhó.

4 Chí máá yá cuní yā jnama ya tāca ñayuu te cuni i ndese iyó jnūhun ndaā yā.

5 Chí iyó ñin-ni Yaā Dios, te suni iyó ñin-ni Yaā jeē cahān jíin Yaā Dios jehē ñayuu. Te Yaā un cúu máá Jesucristo jeē ní nduu tēe.

6 Te ni socō yā máá yá ni jihī yā jeē ní chunaa yā cuéchi ndihi yó. Te ná ni quiji máá quívī ún, te ni quejéé ní canacani jnūhun ún.

7 Te jeē siquí yúcuan ní jeni ya ruhū cúu ri apóstol jeē nácani ri jnūhun ya, nāvāha stéén rī nuū ñayuu tācá nación jeē tu jíni jnūhun ya, jeē na cándíje i jnūhun ún te sáha i jniñu ndaā. Te siquí jeē candíje ri Cristo te ndaā cúu jeē cahān rī.

8 Núu súcuan te cuní rī jeē ndihi-ni lugar na cacān tahú tāca tēe. Te na cóo ndoo ánuá de jeē ma quití ni de ni ma tejnāhan de.

9 Te suni súcuan tācá ñahan, na cási váha ña máá ña nájñūhun cánuú, nāvāha ma cóo jnūhun canu. Te ma cóndihvī ni ña jeē sáha luu ndasí ña xinī ña, chí jéé cuhan ña siquí oro chí perla chí sahma váha ga.

10 Chí sa suhva na quéndōo luu ánuá ña jíin jniñu váha sáha ña, nájñūhun cánuú sáha ñahan ndoo ánuá jeē cájejniñu nuū Yaā Dios.

11 Te núu cáhīn ña jíin ñayuu cascuáha jnūhun ya, te na cuní nahín ña te cuatáhú ña.

12 Chi tu jéhe ri jnūhun jeē steén ñahan nuū ñáyuu ndutútú, ni jeē ndácu ña jniñu nuū tēe. Chi sa suhva na cúni nahín ña.

13 Chi xihna gā Adán ni sáha ya, te sáá te ni sáha ya Eva.

14 Te tu ni stáhú jexeén Adán, chi sa suhva ni stahú un ñasihí de, te ni sáha ña cuēchi.

15 Te jeē scácu tǎcá ña sēhe te coo vāha ña, te núu na quéndōo ña jíin jnūhun cándíje ña ya, jíin jéē cundáhú ni ña jnáhan ña, jíin jéē cóo ndoo ánuá ña, jíin jéē sáha yíñúhún ña.

*Ndese cánuú coo tēe cándiso jniñu nuū ñáyuu cácañdije*

### 3

1 Ndaā cúu jnūhun yáha: Núu ñin tēe cúni de condiso jniñu de condito de ñayuu cácañdije, te vāha jniñu ndúcú de sáha de.

2 Núu súcuan te tēe ndíso jniñu nuū ñáyuu cácañdije, cánuú jeē ma cóo ni ñin jeē nihín ñayuu cuēchi siquí de. Te na cóo ñin-ni ñasihí de, te cájí coo ni de, te ndito coo xiní de, te sáha yíñúhún de. Te cánuú jeē niní cuanúu de vehe nuū ñáyuu cájica, te níní stéén vāha de jnūhun ya.

3 Te ma cúu de tēe nájini, te ma tejnáhan de, te ma ndíyo ni de xūhún. Chi sa suhva coo vāha ni de, te coo vítá ni de, te ma cutóo ni de siquí xúhun.

4 Te cánuú jéē na ndácu vāha de jniñu ini vehe de, te sáha de jeē squícu vāha sēhe de te coo yíñúhún i nuū de.

5 Chi núu ñin tēe tu jíni de ndacu vāha de jniñu ini vehe de, ¿te ndese cuu condiso jniñu de nuū ñáyuu cácañdije nuū Yaā Dios?

6 Núu súcuan te tēe ndíso jniñu nuū ñáyuu cácañdije, ma cúu de tēe jeē saá ní cañdije, chi núu súcuan te sanaa te sándúxí de máá de, te ñnuú-ni cuēchi jecondee siquí de jíin jéxeén.

7 Te cánuú cuu de tēe jeē suni nde ñayuu tu cácañdije, cuajnúhún i de, návāha ma nihín i cuēchi siquí de, te ma cúndeyí jéxeén jíin de.

*Ndese cánuú coo tēe cájejniñu mēhñu ñáyuu cácañdije*

8 Te suni súcuan tēe cájejniñu mēhñu ñáyuu cácañdije, cánuú jéē na cóo yíñúhún de, te na squícu de jíin jnūhun cáhán de. Te ma cúu de tēe nájini, te ni ma ndíyo ni de xūhún.

9 Te na cuñiñi nihin de jíin jnūhun cándije yó jéē ní yisāhi ndé jenahán, te na cóo ndoo anuá de.

10 Te cánuú jéē xihna gā coto ndee rō de, te núu ni jini rō jeē tú na cuēchi de, yūcuán na te cuu cuajniñu de mēhñu ñáyuu cácañdije.

11 Te suni súcuan ñasihí de jíin náhan ña, cánuú coo yíñúhún ña, te ma sajnúhún ña, te cájí coo ni ña, te squícu vāha ña tǎcá-ni jniñu.

12 Te tēe cájejniñu mēhñu ñáyuu cácañdije, na cóo ñin-ni ñasihí de, te na ndácu vāha de jniñu nuū sēhe de jíin núu ñáyuu vehe de.

13 Chi tǎca tēe cájejniñu vāha mēhñu ñáyuu cácañdije, chi vāha quéndōo yíñúhún de, te nihín de modo jeē cají gá nácani de jnūhun Cristo Jesús jeē cácañdije yó.

*Jnūhun sāhi yá jeē cácañdije yó*

14 Te vēsú ñūhun ni rī cuajeē yachī rī coto jnáhan yó, te tēe ri jnūhun yáha cuajeē nuū rō,

<sup>15</sup> návaha núu cucuéé rí, te je jíni rō ndese cánuú sáha vāha ñayuu cácuu sēhe Yaā Dios. Chi máá i cácuu ñayuu cácanđije nuū Yaā Dios, Yaā técu. Te máá i cásáha jeē iyó cutú jnúhun ndaā, chi cáhlin nihin i jíin.

<sup>16</sup> Te jendaá ndije chi jéhnú ndasí cúu jnúhun yáha jeē cácanđije yó, jeē ní yisáhi ndé jenahán:

Yaā Dios ni steén yā maá yá, chi ni nduu ya tēe, te Espiritu ni steén jeē iyó ndāā jniñu ni sáha ya, te tācá ndajéhé andiví ní cajito jniñu ní sáha ya. Te ni jitē núu jnúhun ya nuū ñáyuu tācá nacióin, te ni cacandije ñayuu ní ñáyiví núu yā, te ni ndaa ya cuanuhun yā andiví.

*Siquí ñáyuu cájica yátá nuū jnúhun cácanđije yó*

#### 4

<sup>1</sup> Te cáji stéén Espiritu Yaā Dios jeē quiví cuándihi te coo sava ñayuu caca yátá i nuū jnúhun cácanđije yó. Te cuatáhú i tāca jéē cácahān jnúhun stáhú jíin jnúhun ní castéén tachí.

<sup>2</sup> Chi cuni nahín i jnúhun cástéén tēe cástáhú-ni, jeē tu cácahān ndaā de. Chi tēe un ní cahije ndasí ní de jíin jnúhun stáhú, te tuá sáha jíin ánuá de jeē nácani ní de.

<sup>3</sup> Te cahān de jeē cuéchi cúu jeē coo ñasihí tēe, te suni súcuan núu caji ñayuu sava ndeyu. Te ndeyu ún chi ní sáha Yaā Dios jeē cúu ñayuu cácanđije jeē jíni jnúhun ndaā, návaha caji i te nacuatáhú i nuū yá.

<sup>4</sup> Chi ndihi jeē ní sáha Yaā Dios, iyó váha, te ma squexícó yō ni ñin, chi sa nacuatáhú yó te caji yō.

<sup>5</sup> Chi jíin jéē cáhu yó jnúhun Yaā Dios jíin jéē nácuatáhú yó nuū yā, te iyó ndoo ndihi-ni.

*Tēe jéjniñu vāha nuū Jesucristo*

<sup>6</sup> Te núu stéén rō jnúhun yáha núu tācá hermano, núu súcuan te cuu ró tēe jéjniñu vāha nuū Jesucristo, te ije ró jíin jnúhun vāha ya jeē candije ró, chi ni cutúhva ró te ndíquin rō.

<sup>7</sup> Te ma quiví nduu ró jíin tāca jnúhun jeē cúu cuento-ni jeē cájeni cāhá ni ñayuu. Chi níni na scuáha ró ndese chiñúhún váha ró Yaā Dios.

<sup>8</sup> Chi jeē scuáha yó ejercicio jeē cóo ndacuí yiquí cúñu yō, jecu-ni níhín jniñu. Te jeē scuáha yó chiñúhún váha yó yá, suu yúcuan cúu jeē váha níhín jniñu siquí tācá-ni, jeē cúu vida yáha jíin vida quiji.

<sup>9</sup> Te ndaā ndije cúu jnúhun yáha, te jeē cánuú candije ndihi ñayuu cúu.

<sup>10</sup> Te jeē siquí yáha cúu jeē sájniñu nihin yó siquí jnúhun ya te ndóho yó jéē cácahān ndevāha i nuū yō. Chi ñúhún ni yō jeē coto yó núu maá Yaā Dios, Yaā técu. Te máá yá cúu Yaā jnáma tāca ñáyuu, te ñayuu cácanđije jnúhun cundáhú ni yā i, máá i cúu jeē jnáma ya.

<sup>11</sup> Tāca jnúhun yáha cánuú jéē ndacu ró núu i te steén rō.

<sup>12</sup> Ma cuáha ro jnúhun jeē kujéé ni ní ñin i nuū rō siquí jeē suchí ró. Chi sa coo ró ñin ejemplo nuū ñáyuu cácanđije, jeē cúni i ndese vāha cáhán rō, ndese vāha sáha ró, ndese cundáhú ní rō jnáhan ró, ndese cándije ró, ndese iyó ndoo ánuá rō.

<sup>13</sup> Te níni ndé ná tu jinū rī nuū rō, te condihví ni rō jeē cáhu ró tutu ñi nuū hermano cándututú, jíin jéē stihví ní rō i, jíin jéē steén rō nuū i.



<sup>14</sup> Ma cúhuun ni rō jíin táhū jeē ni jéhe Yaā Dios nuū rō jeē nácani ró jnúhun ya. Chi táca téé jéhnū cándiso jniñū nuū ñáyyu cácandíje, ni casóó de ndaha de xiní rō, te ni sáha Yaā Dios jeē ní cacahān de jeē súcuan condiso jniñū rō.

<sup>15</sup> Núu súcuan te cocuu ró jíin táca jniñū yáha, te condihví ni rō jíin, návāha cuni táca ñáyyu jeē váha íje ró cuáhān rō jíin.

<sup>16</sup> Coo cuidado ró jeē caca ndaā rō jíin jéē steen váha ró jnúhun ya, te cuiñi ñihin ró jíin ndihi. Chi núu súcuan sáha ró te quendōo váha ánuá maá ró jíin ñáyyu chuhun ni jnúhun cáhān rō.

*Ndese sáha váha yó jíin ñáyyu cácandíje*

## 5

<sup>1</sup> Ma cúxeēn rō nuū táca téé jéhnū, chi sa cahān váha ró jíin de jeē ma stívi de, nájñuhun cáhān rō jíin tátá rō. Te táca téé suchí, suni cahān váha ró jíin de nájñuhun jíin ñani rō.

<sup>2</sup> Te suni súcuan cahān rō jíin táca ñahan jéhnū, nájñuhun jíin náná rō. Te suni súcuan jíin táca ñahan súchí, nájñuhun jíin cuáha ró, te yáñúhún ndajnūhun ró jíin ña.

<sup>3</sup> Te ñayuu cácandíje na cuáha i jeē jíni ñúhún ñahan ni caquendōo ndáhú, te núu ni quendōo ndáhú ndije ña jeē tú na ñayuu condito ña.

<sup>4</sup> Chi ñin ñahan ní quendōo ndáhú, núu íyó séhe ña chí séhe chání ña jeē jévāha, te na cóto máá i ña. Chi cánuú cutúhva i jeē xíhna gā nuū ñáyyu vehe i squícu i coto i. Te na nácoto i náná i tátá i siquí jeē ní caccondito ña i. Chi yāha cúu jniñū váha jeē núnjahan ni Yaā Dios.

<sup>5</sup> Te ñin ñahan ní quendōo ndáhú ndije jeē máá ñin na ña, ñúhun ni ña jeē maá Yaā Dios condito ya ña, te tu jécuiñí ña jeē jicán tahú ña nduú ñuú.

<sup>6</sup> Te sa suhva núu máni ndíhví ni ña siquí táca jéé cúsi ni maá-ni ña, yūcuán na te vésú técu ña, te nájñuhun je ni jihí ña.

<sup>7</sup> Jniñū yáha ndacu ró núu ñáyyu, návāha ma cóo cuéchi siquí i.

<sup>8</sup> Te núu ñin ñayuu tu ndító i jnánhan vehe i, te víhyá gā ñayuu ini vehe i, núu súcuan te sáha i jniñū jeē tu quíjnánhan jíin jnúhun cándíje yó, te cúu i ñin jeē neé gá vésú ñáyyu tu cácandíje.

<sup>9</sup> Te ñahan viuda cuu quívi síhví ña nuū lista ñayuu jeē cáchindéé ñáhán ró jíin xúhun, te núu je ni jíinu ña uní xico cuiyá, te núu ni íyo ñin-ni yí ña.

<sup>10</sup> Te suni cánuú jéé cuajnúhún ñáyyu ña jeē váha jniñū ni sáha ña, núu jeē ni scuéhnū váha ña séhe ña, jíin jéé ní jéhe núu ña vehe nuū ñáyyu cájica, jíin jéé ní jejniñū ña nuū hermano cácandíje, jíin jéé ní chindéé ñáhán ña ñayuu cándoho jnúndóho, jíin jéé ni sáha ña táca gá jniñū váha.

<sup>11</sup> Te táca ñahan viuda jeē iyó suchí gá, chí ma soó ró síhví ña nuū lista. Chi sanaa te nducú ña jeē cúsi ni maá-ni ña, te ma cóndihví ni ña siquí Cristo, chí cuu ni ña condeca tucu ña tēe.

<sup>12</sup> Te súcuan jecondee cuéchi siquí ña, chí tu ní squícu ña jeē ni jéjnūhun ña ná ni jecosó síhví ña nuū lista.

<sup>13</sup> Te suni caca cuu ña táca-ni vehe te quee cúxí ña. Te nasūu máni jeē cáca cúxí ña, chí suni siquí jeē sajnúhún ña, te quívi nduu ña cahān ña jnúhun jeē tu íyó váha jeē cahán ña.

<sup>14</sup> Jeé yúcuán cúni rí jeē táca ñahan viuda jeē iyó suchí, na nándāha ña, te scuéhnū ña séhe, te coto váha ña vehe ña, návāha ñayuu cácuu contra ma cúu cahān i siquí ña.

<sup>15</sup> Chí sava ñahan viuda je ni cajica yátá ña te sáha ña jniñū jeē cuni Satanás.

16 Te núu ñn tēe chí ñn ñahan cándíje, núu íyó ñahan viuda vehe i, te na cóto máa i ña. Te ma cóndee gasto ña siquī grupo ñayuu cácanđíje, návāha cuu cuāha vāha i nuū ñahan viuda jeē tu ndé ñn coto ña.

17 Te tāca tēe jéhnú cándito ñayuu cácanđíje, na jécunaā doble yāhu de, te núu cándihvī ni de cástéén de cánacani vāha de jnūhun ya.

18 Chí cúu nájñūhun cáhán tutu ñi: Ma cánda stiquī caxīn tī trigo, núu ma cuāha ró jéē cáji tī. Te suni cáhán: Tēe jeē sájñiñu tátú, jíni ññhún quiyāhu de, áhí.

19 Ma cuajñūhún ró te núu jéquin ñayuu cuēchi siquī ñn tēe jéhnú cándito ñayuu cácanđíje te núu tu íyó úú chí úní testigo.

20 Te núu cásāha ñayuu cuēchi, te cánuú cuxeén rō nuū i, jító jínuú ndihí ñayuu, návāha na cónso İyo sava ga i.

21 Te cáhán ñihin ri jíin ró, jító máa Yaā Dios jíin Jítoho yō Jesucristo jíin táca ndajéhé yā jeē ní nacāji ya: Squícu vāha ró jñiñu yāha, te ma sáha ró cuenta ndese cúu ñn ñn i, chí inuú-ni sándaā rō siquī ndihí-ni i.

22 Ma cáni yachī rō ñn tēe jeē condiso jñiñu de nuū ñayuu cácanđíje, chí xīhna gā coto ndee rō de. Chí sanaa te stívi de, te cuēchi de suni condee siquī rō jíin de. Te coto ró máa ró jeē ma quívi ró jíin jñiñu néé.

23 Te siquī jeē núu-ni núu-ni cúhú chíji ró, te ma cóho ga rō máni ndute, chí suni coho ró jecu vino.

24 Cuēchi sava ñayuu chí je íyó ndijin nde ná tu quívi i nuū cúndaā cuēchi i. Te cuēchi sava ga i chí cúcuéé te natūu nahín.

25 Te suni súcuan táca jíinñu vāha, chí íyó ndijin. Te vesú ná tu natūu jñiñu vāha ún, te ma cúu quisāhi ní cáni, chí natūu nahín.

## 6

1 Tāca ñayuu cácuu mozo, na cóo yíññhún vāha i nuū patrón i, návāha ma cahán neé ñayuu siquī Yaā Dios jíin siquī jñūhun ya jeē castéén yō.

2 Te mozo jeē yíhi nuū patrón cácanđíje, ma cáni ni i jeē cūhva-ni sáha yíññhún i nuū de siquī jeē hermano cácanđíje cácuu de. Chí sa cuajñiñu vāha ga i nuū de, chí tēe cándíje tēe maní i jíin cúu tāca tēe un jéē sájñiñu i nuū. Jñūhun yāha stéén rō te stíhvi ní rō i.

### *Siquī jeē chíññhún vāha yó yá te cusī ni yō jíin cúhva jeē névāha-ni yó*

3 Te núu ndé tēe stéén de jñūhun tú ndaā jeē tu quíjnáhan jíin jñūhun vāha ndaā maá Jítoho yō Jesucristo, jíin jñūhun ní steén Yaā Dios jeē cácanđíje yó,

4 núu súcuan te máni tēe ndúxí tēe tu jécūhun cuiti ni cúu de. Chí cánéé xíní de, chí máni cúní de tejnáhan de siquī táca jñūhun stéén de. Te táca un sáha jeē cácuuésún ni, jíin jéē cátejnáhan, jíin jéē cácahān ndevāha, jíin jéē cájeni néé ni siquī jñáhan,

5 jíin jéē máni cástáhān jñáhan. Súcuan cásāha tēe jeē ní ndunéé xíní, jeē tu cájini jñūhun ndaā. Te cájeni ni de jeē nihín de cuehē xūhun siquī jñūhun cácanđíje de stéén de. Na cújyo ró núu ñayuu cándaā súcuan.

6 Te jendaā jeē yóhoyo vāha quéndō yó te núu chíññhún vāha yó yá, te núu cúsiñ ni yō jíin cúhva jeē névāha-ni yó.

7 Chí tú na vé ni cácu yó jíin ñayívi yāha, ni tú na vé condiso yó quíhñ yō jíin núu na cúu yō.

8 Te núu íyó jéē cáji yō jeē cusúcún yó, te na cúsiñ ni yō jíin yúcuan-ni.

<sup>9</sup> Chi ñayuu jeē cuní cucúcá, chi yachī quívi i cuēchi jeē jito ndee jexeén i. Te quívi i jíin cuéhē jniñu cánée jniñu stívi jeē ndíyo ni i. Te tācá un sáha jeē tívi ñáyuu te jnahnú ndetū i.

<sup>10</sup> Chi jeē ndíyo ni yō xūhún, yūcuan sáha jeē quejéé táca jniñu néé. Te sava ñayuu jeē ndíyo ni xūhún, ni castóo i jnūhun cá candíje i, te ni canihīn i cuehē ndasí jnúndóho.

*Jeē na ndúcú ndéyí yó siquī jnúhun cándíje yó*

<sup>11</sup> Te róhó chi tēe jéjníñu nuū Yaā Dios cúu ró, te cunu ró coto ró táca cuēchi yáha. Te condiquín ró jniñu ndaa, te chiñúhún váha ró Yaā Dios, te candíje vāha ró, te cundáhú ni ró jnáhan ró, te cuandeyí ni ró, te coo vítá ni ró.

<sup>12</sup> Te nducú ndéyí ró siquī jnúhun cándíje yó yá. Te cuiñi nihin ró jíin jnúhun jeē ni níhin tahú yō cotecu yō níí cáni. Chi jeē yūcuan cúu jeē ní cana ya rohó, te cájí ní cahān ró jeē vāha cándíje ró yá, jito jíinú cuehē ñayuu.

<sup>13</sup> Te cahān nihin ri jíin ró, jito máá Yaā Dios, Yaā jeē sáha jeē técu tācá-ni, jíin Jesucristo, Yaā jeē cájí ní cahān yā ni nacani ya jnūhun vāha nuū Poncio Pilato.

<sup>14</sup> Squícu vāha ró jniñu ndácu ya nuū rō, te ma stívi ró sáha ró, návaha ma cahán ñayuu cuēchi siquī rō. Te súcuan sáha ró níí ndé quívi ndíji Jítoho yō Jesucristo.

<sup>15</sup> Chi quíji ndijin yā máá quívi jeē ní jeni Yaā Dios. Te Yaā Dios chi máá ñin-ni ya cúu Yaā yōhyo ndetū, te jnií ya ndihi poder. Te cúu ya Rey nuū táca rey, jíin Jítoho nuū táca Jítoho.

<sup>16</sup> Te máñúhún-ni ya cúu jeē iyó níí cáni. Te ndéé yá ñin lugar nuū ndíi ndaxín, nuū ma cúu quívi yó. Te ni ñin ñayuu ñayívi yáha tu ní jito cuíti i nuū yā, te ni ma cúu coto i nuū yā. Te níí cáni na cóo yíñúhún yó nuū yā, chi jnií máá yá poder níí cáni. Amén.

<sup>17</sup> Te cahān ró jíin ñáyuu cucá ndajniñu ñayívi yáha, jéé ma cúndúxí i. Te ma ténuū i xūhún i, chi yachī naa ún. Chi sa suhva na ténuū i jeē coo vāha i sáha Yaā Dios, Yaā técu, chi máá yá jéhe cuehē yā tācá-ni jeē cúsiñi ni yō jíin.

<sup>18</sup> Te ndacu ró jniñu nuū i jeē na sáha vāha i, chi jeē sacúcá ndíje i máá i cúu jeē sáha i táca jniñu vāha. Te na cúu i ñayuu vāha ni jeē cuáha i jeē cúu jnáhan i.

<sup>19</sup> Te súcuan caya i cuehē jniñu vāha jeē coo cúcá i nuū yā níí tiempo jeē quíji. Te nihín tahú i cotecu i níí cáni.

*Jniñu sándēhi ndácu Pablo nuū Timoteo*

<sup>20</sup> Te róhó Timoteo, condito ró táca jniñu ní chihí ya ndaha ró. Te ma quívi nduu ró jíin táca jnúhun cáhá-ni, cuenta ñayívi yáha, jíin táca jnúhun stáhú jéé cácahān i jeē jnúhun ndíchí ndáá cúu.

<sup>21</sup> Chi sava ñayuu cándiquín táca jnúhun yáha, ni cajica yátá i ni castóo i jnūhun cá candíje i ya.

Te ñūhun ni rī jeē Yaā Dios na sáha ga yā jeē vāha róhó. Súcuan na cóo. Amén.

## CARTA UU JEE NI TEE SAN PABLO APOSTOL NUU TIMOTEO

<sup>1</sup> Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū jeē nácani ri jñuhun jeē ni jéjnūhun ya jeē cótecu yō ní cání siquī jeē yíhi yó ndaha Cristo Jesús.

<sup>2</sup> Te téé ri carta yáha cuájeē nuū rō Timoteo, chi cúu ro nájnūhun sēhe ri jeē maní ri jíin. Te ñuhun ni rī jeē Tatá yō Yaā Dios jíin Jítoho yō Jesucristo, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo sīi ni rō.

### *Jeē nácani de jñuhun Cristo*

<sup>3</sup> Níní tu náá ni rī cacān tahū rī jehē rō nuū Yaā Dios nduú ñuú, te nácuatáhú rí nuū yā jeē siquī rō. Chi nuū maá yá jejniñu ri, nájnūhun ni casáha táca jíi rī, te iyó ndoo ánuá rī nuū yā.

<sup>4</sup> Te núcūhun ni rī jeē ni ndáhyū rō ná ni quenda ri cuahān rī. Te cúu ni rī ndacoto jnāhan yó, návāha cusī ndasí ni rī.

<sup>5</sup> Te núcūhun ni rī jeē váha ndije cándíje ró Cristo, nájnūhun ni candíje náná jéhu ró Loida, jíin náná ró Eunice xīhna gā. Te cúcāhnu ni rī jeē suní súcuan cándíje máá ró vijna.

<sup>6</sup> Te jeē yúcuan nástíhvī ni rī rohó jéé na cóndíhvī gā ni rō jíin táhū jeē ni jéhe Yaā Dios nuū rō jeē nácani ró jñuhun ya. Te tahū un ní nihīn rō ná ni tee ri ndaha ri xinī rō.

<sup>7</sup> Chi Espíritu jeē ni jéhe Yaā Dios nuū yō, tu sáha jeē yūhu yó nacani yó jñuhun, chí sa sáha jeē iyó fuerza ini yō, jíin jéé cundáhú ni yō jnāhan yó, jíin jéé ndito iyó xinī yō.

<sup>8</sup> Núu súcuan te ma cúcanu rō nacani ndaā rō jñuhun máá Jítoho yō. Te suni ma cúcanu rō jeē siquī maá rí jeē íne ri vecāa siquī jñuhun ya. Chí sa cuāha ró jñuhun ndoho ró jíin rí siquī jeē cánacani yó jñuhun jnáma ya yohó, núu ndese ni jéhe Yaā Dios fuerza ini yō.

<sup>9</sup> Chi ni jnama ya yohó, te ni cana ya yohó jéé coo ndoo ánuá yō cuajniñu yó núu yā. Te tu ní cána ya yohó siquī jeē váha ni sáha yó, chí siquī jeē ní tee ni maá yá jeē cundáhú ni yā yohó jéé yíhi yó ndaha Cristo Jesús. Chi nde ná tu jecōo ñayiví, te je cundáhú ni yā yohó.

<sup>10</sup> Te vijna jeē ní quenda ndijin Jesucristo, Yaā jnáma yóhó, te ni steén cají Yaā Dios jeē cundáhú ni yā yohó. Chí máá Cristo ni snáa yā poder cuehyī jéhni yóhó, chí jíin jñuhun jnáma ya yohó ni steén cají yá nuū yō jeē cótecu yō ní cání chí ma jnahnú ndetú yō.

<sup>11</sup> Te ni jeni Yaā Dios ruhū jeē nácani ri jñuhun ún, te ni tají yá ruhū cúu ri apóstol jeē steén rī nuū ñayuu táca nación jeē tu jíin jñuhun ya.

<sup>12</sup> Te siquī un cúu jeē ndóho ri táca jnúndóho yáha íne ri vecāa. Te tu cúcanu rī, chí jíin rī ndese Yaā cúu Yaā candíje ri, te cúcāhnu ni rī jeē cúu coto ya jniñu jeē ní chihí ya ndaha ri nde vijna te nde quivī ndíji ya.

<sup>13</sup> Te cuiñi nīhin ró jíin táca jñuhun ya jeē steén ndaā, suu jñuhun jeē ni steén rī nuū rō. Te caca ró jíin jñuhun cándíje yó, te cundáhú ni rō jnāhan ró siquī jeē yíhi ró ndaha Cristo Jesús.

<sup>14</sup> Te condito ró táca jniñu váha jeē ní chihí ya ndaha ró, sáha poder maá Espíritu Santo jeē ndeé ini yō.

<sup>15</sup> Je jíni rō jeē tāca ñáyyu cáyūcu Asia ni castóo i ruhū. Te uū i cúu Figelo jíin Hermógenes.

<sup>16</sup> Te jícan tahú rī jeē cundáhú ni Jitoho yō ñayuu vehe Onesíforo, chí cuehē jínu ni nanihīn ni rī ni sáha de, te tu ní cúcanu de siquī rī jeē ní ine ri vecāa.

<sup>17</sup> Chi sa suhva ná ni quiji de ñuu Roma, te ni nanducú yúcún de ruhū nde ni nanihīn de ruhū.

<sup>18</sup> Te jícan tahú rī jeē máa Jitoho yō cundáhú ni yā de quivī ndíji ya. Te je jíni vāha máa ró ndese yōhoyo ni chindéé ñáhán de ruhū ná ni cahīyo ri ñuu Efeso.

### *Jeē cúu yó nájnūhun soldado vāha nuū Jesucristo*

## 2

<sup>1</sup> Núu súcuan te róhó, séhē mánī, na cóo fuerza ni rō siquī jeē yfhi ró ndaha Cristo Jesús te sáha ya jeē vāha róhó.

<sup>2</sup> Te tāca jnúhun jeē ní jini ró ní cahān rī, jító jínuū ñayuu cuehē, jnúhun ún na nástéén rō nuū tēe cásiquí vāha, návāha suni cuu stéén tucu máa de nuū sáva ga i.

<sup>3</sup> Te róhó na cuándeýi ni rō coto ró jnúndóho, chí cúu ró nájnūhun ñn soldado vāha nuū Jesucristo.

<sup>4</sup> Ni ñn soldado jeē ín nuū guerra, tu sájnéñu de máa de jíin jniñu máa de, chí cánúu jeē sáha de máni máa jéé ndácu tēe ní tejniñu de.

<sup>5</sup> Te suni súcuan tēe cásiquí deporte, ma nihín de premio te núu tú condihvī ni de cosíquī vāha de máa modo chíjñiñu.

<sup>6</sup> Te tēe sájniñu nihin ñuhun, máa de cúu jeē nihín xīhna gā jeē cuáha itu.

<sup>7</sup> Nacani ni rō siquī jeē cahān rī, te máa Jitoho yō sáha ya jeē jécūhun ni rō siquī ndihi.

<sup>8</sup> Te cocuhun ndasí ni rō Jesucristo, Yaā ní quiji yucūn rey David, te ni natecu yā mehñu ndíyi, nájnūhun cáhán jnúhun jnáma ya yohó jéé nacani ri.

<sup>9</sup> Te jeē siquí jnúhun un ndóho ri jnúndóho, te nde ni cajihni i ruhū ine ri vecāa nájnūhun ñn tēe ni sáha cuēchi xeēn. Te jnúhun Yaā Dios chí ma cúu cuhni i jeē ma cuité núu.

<sup>10</sup> Núu súcuan te jéndeýi ni rī jító ri tāca jnúndóho yáha siquī jeē cundáhú ni rī ñayuu jeē ní nacāji ya, návāha suni cācu máa i jeē quivī i ndaha Cristo Jesús, te quihīn i nuū cujéhu i ní cáni.

<sup>11</sup> Chí ndaā cahān jnúhun yáha:

Núu vésú na cúu yō jeē siquí yā, te suni cotecu yō jíin yá,

<sup>12</sup> te núu cuandeýi ni yō ndoho yó, te suni ndacu yó jniñu jíin yá.

Te núu ma cuajnúhún yó yā, te suni ma cuajnúhún yá yohó.

<sup>13</sup> Te vésú tu squícu vāha yó, te máa yá chí máni squícu ya, chí tu cúu sáfalta yā, chí squícu ya jeē ni cahān yā.

### *Tēe sájniñu squícu vāha jíin jnúhun ya*

<sup>14</sup> Jnúhun yáha na nástihvī ni rō ñayuu, te cahān nihin ro jíin i, jító máa Jitoho yō, jeē ma téjnáhan i siquī tāca jnúhun sáa-ni. Chí tu ndé jéjniñu cuiti, chí sa stívi ñáyyu jíni sōho.

<sup>15</sup> Te nducú ndéýi ró jeē cuajnúhún Yaā Dios rohó, jéé cúu ró tēe sájniñu squícu vāha jíin jnúhun ya, návāha ma cúcanu rō nuū yā siquī ní ñn, chí vāha nacani ró jnúhun ndaā yā.

<sup>16</sup> Te ma quivī nduu rō jíin táca jnúhun sáa-ni ñayivī yáha, chí suu sáha jeē ndúcuehē gā jniñu néé quívicoo ñayuu cácahān.

17 Te tāca jnūhun cástéén i chi cúu nájñūhun ñn ndīhyi; xeēn jeē sacáhu gá cuahān. Te Himeneo jiín Fileto cúu uū tēe jeē casáha súcuan.

18 Chi tēe un ní cajica yátá de nuū jnūhun ndaā, te cácahān de jeē jé ni cuu ni canatecu ndīyi. Te súcuan cásaca nuu de xinī sava ñayuu cácañdije.

19 Te Yaā Dios ni jeni ya ñayuu maá yá, te íyó cutú ndāā i jeē ma cáca yátá i, nájñūhun yósó núu tútu ñi: Je jíni Jitoho yō Yaā Dios tāca ñayuu jeē yñi ndaha maá yá. Te suni cáhán: Tāca ñayuu jeē ndácunehen síhví Cristo, na cújiyo i nuū jniñu néé, áchí.

20 Te ini ñn vehe cáhnu íyó cuéhē cohō, nasūu máni cohō oro cohō plata, chi suni cohō yujnu cohō ñuhun. Te íyó jéé fino te íyó jéé corriente.

21 Te núu ñn ñayuu sándoo i máá i jeē quéndá i nuū tācá jniñu néé, te cuu i nájñūhun ñn cohō fino. Te coo ndoo coo ñi i nuū Jitoho yō, te nihñn jniñu i ndese cúni maá yá. Te coo tūhva i jeē sáha i tācá jniñu váha.

22 Núu súcuan te cuu rō coto rō tāca jéé tú váha jeē cándiyo ni tēe suchí. Te condiquñ rō jniñu ndaā, jiín jnūhun cándije rō yá, jiín jnūhun cúndáhú ni, jiín jnūhun coyūcu máni jiín jnáhan. Te súcuan sáha rō ndé jiín tāca ñayuu ndoo ánuá jeē ndácunehen síhví máá Jitoho yō.

23 Te ma quívi nduu rō jiín tāca jnūhun cánéé íi jeē tu íyó cáji, chi je jíni rō jeē sáha jeē tejnáhan ñayuu.

24 Te mozo maá Jitoho yō, tú váha jeē tejnáhan de, chi sa suhva cánuú jéé coo váha ni de jíin tāca ñayuu. Te coo váha ni de stéén de, te cuandeyí ni de jíin i.

25 Te jíin jéé víta ni de te caní ichí de ñayuu nīhni ni. Chi sanaa te nacani ni i sáha Yaā Dios, te jecūhun ni i ndese íyó jnūhun ndaā.

26 Te nducájí ni i te cácu i nuū jexeén jeē ní jniñi ún i, chi ni cundeyí jíin i jeē sáha i jeē cuní maá.

*Siquí ndese coo ñayuu sáha néé quívi cuándihi*

### 3

1 Te suni na jécūhun ni rō jeē quívi cuándihi te quee quívi coo jñūndóho.

2 Chi coo ñayuu jeē chiñúhún máá, te ndiyo ni i xūhún, te sátéyí i máá i, te sándúxí i máá i. Te cahān neé i siquí Yaā Dios, te cunīhni ni i nuū tatá i nuū naná i, te ma nácuatáhú i, te ma chiñúhún i Yaā Dios.

3 Te ma cóo maní i jíin jnáhan i ni ma cundáhú ni i. Te sájñúhún i, te ma cúu casi i tāca jéé ndíyo néé ni i, te yōhyo xeēn coo i, te quiti ni i coto i tācá jniñu váha.

4 Te suni nastúu i jnáhan i, te ma yūhú i sáha i cuēchi, te coo ndúxí ndasí i, te nducú i jeē cúsiñ ni maá-ni i, te ma nducú i quívi i nuū Yaā Dios.

5 Te sáha-ni i jeē chiñúhún i ya, te casi i nuū poder yā jeē ma sáma modo i. Ma quívi nduu rō jiín ñayuu casáha súcuan.

6 Chi sava tēe ún quívi de vehe te stáhú de tācá ñahan cánéé jéé iyó ndasí cuéchi. Te yachí quívi coo ña jíin tāca jnūhun tú ndaā jeē cúsiñ ni ña jíin.

7 Te vésú niní scuáha ña na-ni jñūhun, te tu cúu cuíti jecūhun ni ña jñūhun ndaā yā.

8 Te nájñūhun ni casáha tēe tásí Janes jiín Jambres jenahán, jeē ní canducú de casi de nuū Moisés, suni súcuan sáha tēe ún, chi nducú de casi de nuū jñūhun ndaā. Chi coo nee jeē níjñúni de, chi ma candije ndije de jñūhun cándije yó.

9 Te ma quée jniñu sáha de, chi cuní tāca ñayuu jeē tēe cánéé xíní cácuu de, nájñūhun ni cajini ñayuu jeē ni íyo néé xíní ndíndúú tēe jeē ní nducú casi nuū Moisés.

*Jniñu sándāhi ndācu Pablo nuū Timoteo*

<sup>10</sup> Te rōhó chi je ni cutūhva vāha ró ndese steén rī, ndese jīca ndaā rī, ndese téē ni rī sáha rī, ndese cándīje rī yā, ndese néē rī paciencia, ndese cūndáhú ni rī jnáhan rī, jín ndese jéndeýí ni rī.

<sup>11</sup> Chi ni cajito xeēn ñayuu ruhū, te ni ndoho rī jnūndóho. Te jíní rō tāca jéē ní ndoho rī ñuu Antioquía, ñuu Iconio, jín ñuu Lистра. Te jíní rō ndese ni cajito xeēn i ruhū. Te máá Jítoho yō ní jnama ya ruhū nuū ndihí ún.

<sup>12</sup> Chi ndaā cúu jeē tāca ñáyuu jeē ndihví ni cuajniñu vāha nuū Cristo Jesús, ndoho i jeē coto xeēn ñayuu í.

<sup>13</sup> Te ñayuu casáha jniñu néé jín ñáyuu castáhú, chi sa víhyá gā cocuu i jín jniñu néé, chi stáhú i ñayuu, te suni candīje máá i jnūhun stáhú.

<sup>14</sup> Te rōhó chi sa cuiñi ñihin ró jín jéē ní cutūhva ró jín jéē ní cucáhnu vāha ni rō. Chi jíní rō ndese ñayuu cúu jeē ní castéēn nuū rō.

<sup>15</sup> Chi nde ná lulí ró, te je jíní rō ndese cáhan tutu íi jeē steén nuū rō ndese candīje ró jeē ni jíhī Cristo Jesús jehē rō návāha cācu ró.

<sup>16</sup> Te ní tutu íi cúu jnūhun jeē ni cáhān Yaā Dios, te vāha ñihín jniñu jeē steén nuū yō, jeē cahán nuū yō, jeē náchuhun ichí yóhó, jín jéē scuéhnu yóhó jín jniñu ndaā,

<sup>17</sup> návāha téē cájejniñu nuū Yaā Dios, ije ni de te coo tūhva vāha de sáha de táca jniñu vāha.

**4**

<sup>1</sup> Te cáhān rī jín ró, jíto Yaā Dios jín Jítoho yō Jesucristo, Yaā quiji ndacu jniñu, te sándaā yā jniñu ñayuu cátecu jín ñáyuu ní cajihí.

<sup>2</sup> Cáhān ñihin rī jeē na nácani ró jnūhun ya, te stíhví ni rō i candīje í. Te níni sáha ró súcuan núu núne i chí vésu tu núne í. Te sáha ró jéē na jécūhun ni í, te cahān rō nuū í, te caní ichí váha ró í, te jín cuéhē paciencia steén rō nuū í.

<sup>3</sup> Chi quee tiempo jeē ma cuájnuhún cuítí ñayuu jnūhun ya jeē steén ndaā vāha, chí sa cuájnuhún i jnūhun cúsví ni máá í, te nducú i cuéhē maestro jeē steén nuū i máni jnūhun jeē nújnahan ni i cuni nahín í.

<sup>4</sup> Te cujiyo i nuū jnūhun ndaā, te condihví ni i tāca jnūhun jeē máá cuento-ni cúu.

<sup>5</sup> Te rōhó chí níni coo ndito ni rō, te cuandeyí ni rō jín jnūndóho, te condihví ni rō nacani ró jnūhun jnáma ya yohó, te squícu vāha ró jín jniñu ya jeē sáha ró.

<sup>6</sup> Te ruhū chí je ni socó rī máá rí jeē cúu rī, te je cuacuyajni quísví cuu rī.

<sup>7</sup> Te je ni cundeyí rí jeē ní nducú ndéýí rí squísví jniñu vāha, te je ni jínu ni jica rí ñayísví yáha, te tu ní síáá rí jnūhun cándīje rí yā.

<sup>8</sup> Te víjna je íyó tūhva premio jeē ñihín rí squísví jeē ní jica ndaā rí. Chí Jítoho yō cuāha ya un núu rí máá quísví sándaā yā jniñu, chí máá yá cúu juez ndaā. Te nasūu núu máá ñin ruhū cuāha ya, chí suni cuāha ya nuū tāca ñáyuu jeē cúu ni i jeē ndíji ya chí maní i jín yá.

*Jeē cána Pablo quiji Timoteo nuū de*

<sup>9</sup> Nducú ndéýí ró quiji yachí rō nuū rí.

<sup>10</sup> Chí Demas ni stóo de ruhū, chí ndíyo ni de ndajniñu ñayísví yáha, te cuahān de ñuu Tesalónica. Te Crescente chí cuahān de Galacia, te Tito cuahān de Dalmacia.

<sup>11</sup> Te máá ñin na Lucas íne jín rí. Te jeē quiji ró, te condeca ró Marcos quiji ró jín de, chí vāha cuajniñu de jeē chindéé ñáhán de ruhū jín jniñu ya.

<sup>12</sup> Tíquico ni tají rí de cuahān de ñuu Efeso.

<sup>13</sup> Te jeē quiji ró, te condaha ró cotón jeē ni stóo ri vehe Carpo ñuu Troas. Te suni condaha ró tāca libro, te jeē cánuú gá cúu tācá tutu ní tee máá rí.

<sup>14</sup> Alejandro, tēe cúu herrero, yōhyo xeēn ni sāha de jíin rí. Te máá Jítóho yō cuāha ya yāhu de jeē súcuan ní sāha de.

<sup>15</sup> Te condito ró máá ró nuū de, chi yōhyo ni cuu de contra siquī jnūhun cástéén yō.

<sup>16</sup> Te ná ni ine ri jeē xíhna ñúhún núū tāca tóhō, te tú ni ñin tēe ní índichi jíin rí, chi ndihi de ni castóo de ruhū. Te ñúhún ni rí jeē Yaā Dios cone cáhnu ní yā nuū de.

<sup>17</sup> Te vēsú súcuan te máá Jítóho yō ni chindéé ñáhán yá ruhū, te ni jēhe ya fuerza ini rí, te súcuan ni sínu ri ni nacani ndihi ri jnūhun jnama ya yohó, ni cajini nahín ñáyyu tācá nación tu jíin jnūhun ya. Súcuan ni jnama Jítóho yō ruhū nuū tāca tēe xeēn.

<sup>18</sup> Te jnama ga yā ruhū nuū tācá jniñu néé, te condito ya ruhū nde quívi ri andívi núū ndácu ya jniñu. Te na cáhán yō jeē yóhyo luu cújéhnu ya ní cáni. Amén.

*Saludo jíin bendición jeē sándihí*

<sup>19</sup> Te cahān rō jeē sándeyí ni Prisca jíin Aquila, jíin ñáyyu vehe Onesíforo, achí rí.

<sup>20</sup> Erasto ni quendōo de ñuu Corinto. Te ni quendōo Trófimo ñuu Mileto, te cúhú de.

<sup>21</sup> Te condihvī ni rō quiji ró nde ná tu quejéé vico mójin. Sándeyí ni rō, achí Eubulo jíin Pudente jíin Lino jíin Claudia jíin tāca gá hermano.

<sup>22</sup> Te ñúhún ni rí jeē maá Jítóho yō Jesucristo na cóo ya jíin ró, te Yaā Dios sāha ga yā jeē váha róhó jíinánhan ró. Súcuan na cóo. Amén.



## CARTA JEE NI TEE SAN PABLO APOSTOL NUU TITO

<sup>1</sup> Máá rí cúu Pablo, mozo Yaā Dios jíin apóstol Jesucristo, chi ni tají Yaā Dios ruhū jeē scándíje ri ñayuu ní nacáji ya, návāha jecūhun ni i jnūhun ndaā yā jeē candíje yó,

<sup>2</sup> te cocuhun ni i jeē cótecu i nń cáni. Chi nde ná tu jecōo ñayiví te ni jejnūhun Yaā Dios jeē cótecu yō, te íyó ndāā jnūhun ni cahān yā.

<sup>3</sup> Te vijna jeē ní quee tiempo ni jeni ya, te stéén cají yá jnūhun ya nuū yō. Te ni tejniñu ya ruhū ni ndacu ya jniñu jeē nácani ri jnūhun ya ún. Chi Yaā jnáma yóhó cúu ya.

<sup>4</sup> Te tée ri carta yáha cuájeē nuū rō Tito, chi nájñūhun sēhe ri cúu ndije ró síquī jeē ínuú-ni cándíje yó yá. Te ñūhun ni rī jeē Tatá yō Yaā Dios jíin Jítóho yō Jesucristo, Yaā jnáma yóhó, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo sīñ ni rō.

### *Jniñu ya jeē ni sáha Tito nde isla Creta*

<sup>5</sup> Te ni stóo ri rohó ndé isla Creta, návāha sándaā rō síquī jniñu jeē cúmanī gā cundaā, te caní ró táca tée jéhu condito ñayuu cácandíje táca ñuu, nájñūhun ni ndacu ri jniñu nuū rō.

<sup>6</sup> Te tée jéhu un cánuú jeē ma cóo ni ñin jeē nihín ñayuu cuēchi síquī de. Te cánuú coo ñin-ni ñasihí de. Te sēhe de cánuú cuu i sūchi cácandíje jeē ma nihín ñayuu cuēchi síquī i jeē tu sáha váha i chí jéé níhni ni i nuū de.

<sup>7</sup> Chi tée cácu jéhu cándiso jniñu nuū ñayuu cácandíje, cánuú caca ndaā de chí cándiso jniñu de síquī jniñu Yaā Dios. Te ma satéyí de máá de, ma quití yachí ni de, ma cúu de tée nájñi, ma cuajnáhan de, te ma ndíyo ni de xūhún.

<sup>8</sup> Chi sa cánuú jéé níni cuáha núu de vehe nuū ñayuu cájica, te níni sáha de jniñu váha, te ndito coo xiní de, te coo de tée ndaā, te coo ndoo ánuá de, te casi de modo jeē cuní maá de.

<sup>9</sup> Te cánuú cuiñi níhin de jíin jnūhun ndaā jeē ni scuáha de, návāha cuu stíhví ni de ñayuu jíin táca jnūhun ndaā váha, te suni cuu sáha de jeē jécūhun ni ñayuu cácuu contra, te casi i yuhu i.

<sup>10</sup> Chi íyó cuéhē ñayuu níhni ni, te cástéén i inga modo jéni ni maá i jeē súcuan cácu ñayuu, te stáhú i ñayuu. Te jnáhan yó hebreo cúu jeē vihyá gā casáha súcuan.

<sup>11</sup> Te cánuú jéé casi rō yuhu táca tée ún, chí cástéén de jnūhun jeē tu íyó váha stéén de, chí cuní de níhin de xūhun síquī ún. Te súcuan sáca nuu de xiní ndihí ñayuu táca vehe.

<sup>12</sup> Te ñin tée isla Creta jeē nácani jnūhun, ni cahān de síquī jnáhan ñuu de: Jnáhan yó ñayuu Creta, chí máni ñayuu stahú cácuu i, te nájñūhun quití xéén casáha i, te máni ndíhví ni i caji cuéhē i, te cúxí i, áhí de.

<sup>13</sup> Te ndaā cúu jnūhun ni cahān tée ún. Jeē yúcuan na cúxeēn rō nuū i, návāha ndaā váha na cándíje i.

<sup>14</sup> Te ma sáha i cuenta táca jnūhun ni catava jnáhan yó hebreo, jeē maá cuento-ni cúu, ni ma squícu i jniñu cándacu tée ni quendacoo nuū jnūhun ndaā.

<sup>15</sup> Te ñayuu jeē ní ndundoo jeē níjnūní, máni modo íyó ndoo íyó váha jéni ni i jito i táca-ni. Te ñayuu tu cándíje jeē tu ní ndúndoo jeē níjnūní, máni jéni ni i

in modo tú ndoo tú vāha siquī tāca jēē jito i. Chi nde jeē njnūni i jín ánuá i iyó jnéhén.

<sup>16</sup> Te vēsú cácahān i jeē jini i Yaā Dios, te jín jniñu cásaha i te jini yō jeē tú ndije i. Chi ñayuu ndevāha ñayuu niñni ni cácuu i, te tu cúu sáha i ni in jniñu vāha.

*Jnūhun ya jeē steén ndaā vāha*

## 2

<sup>1</sup> Te máá ró chi níni na cáhān rō tāca jnūhun jeē quijnāhan jín jnūhun ya jeē steén ndaā vāha.

<sup>2</sup> Te cahān rō jín tāca téé jéhu jeē na cóo cáji ni de, te sáha yíñuhún de, te ndito coo xinī de, te candíje niñin de jnūhun cundáhú ni yā de, te cundáhú ni de jnāhan de, te cuandeyí ni de.

<sup>3</sup> Te suni súcuan tāca ñahan jéhu, na sáha yíñuhún ña, te ma sajnūhún ña, te ma nájini ña. Te na steén ña tāca jēē vāha.

<sup>4</sup> Te na steén ña nuū tācá ñahan súchí jēē coo manī ña jín yí ña jín séhe ña.

<sup>5</sup> Te ndito coo xinī ña, te coo ndoo ánuá ña, te coto vāha ña jniñu vehe ña, te coo vāha ni ña, te cuatáhú ña nuū yí ña, návāha ma cahān neé ñayuu siquī jnūhun Yaā Dios.

<sup>6</sup> Te suni súcuan stǎhví ni rō tāca téé suchí jeē ndito na cóo xinī de.

<sup>7</sup> Te rōhó, cuu ró in ejemplo nuū de jeē sáha ró tāca jniñu vāha. Te jeē steén rō nuū de te ndaā steén rō te coo ndije ni rō.

<sup>8</sup> Te ndaā vāha steén rō, návāha ma cúu cahān ñayuu siquī. Te súcuan te cucanu ñayuu cácuu contra, chi ma cúu cahān i ni in cuēchi siquī rō.

<sup>9</sup> Te cahān rō jín ñayuu cácuu mozo jeē na cuatáhú i nuū patrón i, te na sáha i tācá jniñu jeē núnahan ni de, te ma cahān maá i núu ndácu de jniñu nuū i.

<sup>10</sup> Te ma sacuíñná i ndajniñu de, chi na cúu i ñayuu ndaā ndije, návāha jín táca jniñu jeē sáha i, te cuni tāca ñayuu jeē yóhoyo luu cúu jnūhun jeē steén siquī Yaā Dios, Yaā jnáma yóhó.

<sup>11</sup> Chi vijna je ni steén Yaā Dios ndese sáha ya jeē vāha ñayuu, chi cúní yā jnama ya ndihi ñayuu ñayívi.

<sup>12</sup> Te jnūhun jeē vāha ni yā jín yó, suu steén nuū yō jeē na siáá yō jniñu neé jín táca jēē ndíyo neé ni yō. Te ndito na cóo xinī yō ini ñayívi yáha, te caca ndaā yō, te chiñuhún vāha yó Yaā Dios.

<sup>13</sup> Te suni steén nuū yō jeē cocuhun ni yō jeē quéndoo ndetū yō jeē quíji máá quívi jéhu jeē quénda ndijin Yaā Dios, Yaā cujéhu ndasí, suu Jesucristo, Yaā jnáma yóhó.

<sup>14</sup> Chi ni socó yā maá yá jehē yō, návāha jnama ya yohó núu tāca jniñu neé, te sándo ndihi ya anuá yō jeē cuu yó ñayuu maá yá, te condihví ni yō sáha yó jniñu vāha.

<sup>15</sup> Tāca jnūhun yáha cánuú steén rō, te stǎhví ni rō i, te cahān rō nuū i, chi súcuan ndíso jniñu ró. Te ma cuáha ro jnūhun jeē sajeé ni ni in i nuū rō.

*Ndese cánuú sáha ñayuu cácañde*

## 3

<sup>1</sup> Te na nástǎhví ni rō i jeē cuatáhú vāha i nuū tēe cácujeñu jín téé cándiso jniñu ñuu. Te na squícu i jniñu cándacu de, te coo ñamā ni i sáha i tācá jniñu vāha.

<sup>2</sup> Te ma cahán neé i siquī ni ñin ñayuu, te coyūcu maní i jíin ñáyuu, te coo vāha ni i, te coo vītá ni i jíin ndihi ñayuu.

<sup>3</sup> Chi máá yó suni ni cuu yó ñáyuu canéé jeē tu jécūhun ni nde saá, te ni cacunīhni ni yō nuū Yaā Dios. Te ni cacandíje yó táca jnúhun tú ndaā, te ni cajejnīñu saá-ni yó núu táca jéē ní ndiyo neé ni yō jíin na-ni jniñu ni cusī ni yō. Te ni cajica yó jíin jniñu neé jíin jnúhun cuésún ni. Chi ni cajito uhū ñayuu yohó, te ni cajito uhū yō i.

<sup>4</sup> Yūcuán na te Yaā Dios, Yaā jnáma yóhó, ní steén yā jeē vāha ni yā te cundáhú ni yā ndihi ñayuu ñayiví.

<sup>5</sup> Te ni jnama ya yohó, te tú na jniñu vāha ní cásaha yó jéē jnáma ya yohó, chi sa siquī jeē ní cundáhú ni yā yohó. Chi ni nacate ya anuá yō, te súcuan ni nacacu jeé yó, te ni ndujeé yó ní sáha ya jíin máá Espiritu Santo.

<sup>6</sup> Te yōhyo ni cunuú Espiritu Santo iní anuá yō, jeē ni sáha Yaā Dios jeē jíin Jesucristo, Yaā jnáma yóhó.

<sup>7</sup> Te súcuan te ni ndahva yā cuēchi yó siquī jeē vāha ni yā, te nihīn tahú yō cotecu yō níí cáni, nájñuhun ñuhun ni yō.

<sup>8</sup> Ndaā cúu jnúhun yáha, te cúní rī jeē niní cáhān nīhin ro táca jnúhun yáha, návāha ñayuu cacandíje Yaā Dios, na cóndihvī ni i cocuu i jíin jniñu vāha. Chi íyó vāha táca jéē yáha, te níhín jniñu jeē quéndōo vāha ánuá ndihi ñayuu.

<sup>9</sup> Te ma quívi nduu rō jíin táca jnúhun cánéé íi, jíin jnúhun siquī ndese vēji táca jíi yō, jíin táca jnúhun sáha jeē cátejnáhan i cácahān i jeē cánuú squícu yó ley Moisés. Chi máni jnúhun cáhá-ni jeē tu níhín jniñu cúu.

<sup>10</sup> Te núu íyó ñáyuu jeē sáha jeē ndusín iní ñayuu cacandíje, te cahān rō nuū i ñin uū jínu, te núu ma chúhun ni i, te quenehen ró i.

<sup>11</sup> Chí jíni rō jeē ñin ñayuu sáha súcuan, stívi ndasí i chí jíni i jeē tú vāha sáha i, te jeē yúcuan jécondee cuēchi siquī i.

### *Jeē cána Pablo quiji Tito nuū de*

<sup>12</sup> Te jeē taji rí Artermas chí Tíquico cuajeē de, yūcuán na te nducú ndéyí ró quiji ró núu rī ñuu Nicópolis, chí je ni cundaā ni rī jeē yúcuan condee rī tiempo mījin.

<sup>13</sup> Te condihvī ni rō chindéé ñáhán ró Zenas, tēe cúu abogado, te suni súcuan Apolos. Chi cuāha ró jéē jíni ñuhún de jeē quíngoo ga de ichi nuū quihín de. Te coto ró jéē ma cúmaní ni ñin nuū de.

<sup>14</sup> Te ñayuu cáhīn jíin yó, cánuú cutūhva i sáha i táca jniñu vāha, te chindéé ñáhán i ñayuu cúmaní nuū, návāha ma cótecu saá-ni i.

### *Saludo jíin bendición jeē sándihí*

<sup>15</sup> Táca ñáyuu cáyūcu jíin rí yáha, cácahān i jeē sándeýí ni rō. Te cahān rō jeē achí rí jeē sándeýí ni ñayuu jíñā jeē maní yō jíin siquī jeē cacandíje yó. Te ñuhun ni rí jeē na sáha ga Yaā Dios jeē vāha róhó jijnáhan ró. Súcuan na cóo. Amén.

## CARTA JEE NI TEE SAN PABLO APOSTOL NUU FILEMON

<sup>1</sup> Máá rí cúu Pablo, te íne ri vecāa jeē siquí jnúhun Cristo Jesús. Te jíin hermano yō Timoteo cátee ri carta yáha cuájeē nuū rō Filemón. Chi cúu ró tée jeē cáhiyo manī ri jíin, chi chándéé ñájnáhan ró jíin rí siquí jnúñu Yaā Dios.

<sup>2</sup> Te suni cátee ri carta yáha nuū ñáyyu cácandíje cándutútú ini vehe ró, te suni nuū hermana yō Apia, jíin núu Arquipo, tēe chándéé ñájnáhan jíin yó siquí jnúñu cánducú ndéyí yó jíin.

<sup>3</sup> Te cáñuhun ni rí jeē Tatá yō Yaā Dios jíin Jítóho yō Jesucristo, na sáha ga yā jeē váha rohó jíjnáhan ró, te sáha ya jeē coo ndeyí coo sīi ni rō.

### *Teē cúndáhú ni te cándíje vāha cúu Filemón*

<sup>4</sup> Te jeē jíicán tahú rí nuū Yaā Dios te tu náa ni rí cacān tahú rí jehē rō, te níni nácuatáhú rí nuū yā jeē siquí rō.

<sup>5</sup> Chi níhín rí jnúhun jeē váha cándíje ró jnúhun cúndáhú ni Jítóho yō Jesús rohó, te cúndáhú ni rō táca ñáyyu yíhi ndaha Yaā Dios.

<sup>6</sup> Te jíicán tahú rí jeē ñáyyu ni cacandíje siquí jeē cándíje máá ró, na jécúhun vāha ga ni i siquí táca jéē váha jeē sáha ya yohó jeē jíin Cristo Jesús.

<sup>7</sup> Chi cúsi ndasí ni rí te íyó ndeyí ni rí, hermano, siquí jeē cúndáhú ni rō ñáyyu cácandíje. Chi máá ró ni sáha jeē ní ndusi ni i.

### *Jeē jíicán Pablo ñin favor jehē Onésimo*

<sup>8</sup> Núu súcuan te cáhán ndahú rí jíin ró, vésú cuu ndacu ri nuū rō ndese cánúu sáha ró, chi cúu ri apóstol Cristo.

<sup>9</sup> Te tuú chi sa cáhán ndahú rí jíin ró siquí jeē cáhiyo manī yō. Te cúndáhú ni rō ruhū sáha ró jéē cuní ruhū Pablo, chi je jéhu ni, te íne ri vecāa jeē siquí jnúhun Cristo Jesús.

<sup>10</sup> Te cáhán ndahú rí jíin ró jehē mozo rō Onésimo jeē ní jeen ró te ni jinu. Te vijna te cúu i nájnūhun sēhe ri, chi ni scándíje ri i ini vecāa yāhá.

<sup>11</sup> Te nde saá chi tu ní cúu i mozo squícu nuū rō, chi ni jinu i. Te nde vijna chi vāha cuajníñu i nuū rō jíin núu rí.

<sup>12</sup> Te nátají rí i najeē i nuū rō. Núu súcuan te cahān vāha ró jíin i, te sáha ró cuenta jeē nájnūhun máá rí ni najinū, chi yōhyo manī rí jíin i.

<sup>13</sup> Te cusí ni rí núu jeē na cúu quendōo i jíin rí yāhá, návāha cuajníñu i nuū rí lugar máá ró níni jéē íne ri vecāa jeē siquí jnúhun vāha ya.

<sup>14</sup> Te tu ní cuní rí sáha ri súcuan, chi nde cuāha máá ró jnúhun. Chi nasūu jéē safuerza rí rohó, chi jeē váha ni rō te sáha ró favor jíin rí, nájnūhun cúsi ni máá ró.

<sup>15</sup> Chi sanaa te jeē siquí yáha cúu jeē ní jinu i ni cujiyo i nuū rō jecu-ni tiempo, suu návāha ví quendōo i jíin ró sáha Yaā Dios.

<sup>16</sup> Te vijna tuá cúu i ñin mozo jeē ní jeen ró, chi ni nduu i ñin jeē váha ga, suu ñin hermano jeē manī rō jíin. Te ruhū chi yōhyo manī rí jíin i, te nagā ni cuu máá ró jeē ma cōo manī rō jíin i. Te nasūu jéē manī rō jíin ñin tēe súcuan-ni, chi siquí jeē cúu i ñin hermano jeē cándíje nuū Jítóho yō.

<sup>17</sup> Te núu sáha ró cuenta jeē ruhū cúu jnáhan ró cándíje, núu súcuan te cahān vāha ró jíin i jeē jíinú i nuū rō, nájnūhun jeē ruhū cahān rō jíin.

<sup>18</sup> Núu na-ni falta ni sáha i nuū rō, chí núu táu i nuū rō, te cacān rō chunaa maá rí.

<sup>19</sup> Ruhū Pablo, jíin ndaha maá rí tée ri yāha jéē maá rí nachunaa. Súcuan cáhán rī vēsú cuu cahān rī jeē sa maá ró taú nuū rī sáha ró jéē cúsī ni rī siquī jeē ni scándije ri rohó te ni cācu ánuá rō.

<sup>20</sup> Núu súcuan, hermano, sáha ró favor yáha jíin rí siquī jeē candije ró Jítoho yō. Sáha ró jéē ndúsī ni rī, siquī jeē cúu ró hermano candije Cristo.

<sup>21</sup> Te tée ri yáha núu rō, chí cúcāhnu vāha ni rī jeē cuatáhú ró, te nde vihyá gā sáha ró vēsú jeē ni jíicān rī.

<sup>22</sup> Te suni jíicān rī jeē sátūhva ró núu cóndee rī, chí ñúhun ni rī jeē quénda ri yáhá te jeē rī nuū rō sáha Yāā Dios siquī jeē cájicān tahú rō jehē rī.

*Saludo jíin bendición jeē sándīhí*

<sup>23</sup> Epafra, tēe íne jíin rí vecāa jeē siquī jnúhun Cristo Jesús, cáhán de jeē sándeysí ni rō.

<sup>24</sup> Te suni súcuan cácahān Marcos, jíin Aristarco, jíin Demas, jíin Lucas, tēe cáchindéé ñájnáhan jíin rí siquī jníñu ya.

<sup>25</sup> Te ñúhun ni rī jeē Jítoho yō Jesucristo na sáha ga yā jeē váha róhó jíjnáhan ró. Súcuan na cóo. Amén.

## CARTA JEE CUAHAN NUU ÑAYUU HEBREO

*Jeē ní taji Yaā Dios Séhe ya ni nacani ya jñuhun*

<sup>1</sup> Tijní jínu te tijní modo ni cahān Yaā Dios jín táca jí yō nde jenahán, chi ni taji yá tēe ni canacani jñuhun ya.

<sup>2</sup> Te vijna te tiempo cuándihí yāha ní taji yá maá Séhe ya ni nacani ya jñuhun nuū yō. Te jín Séhe ya ni sáha ya ñayiví jín táca gá, te ndivíi jeē iyó ní chihi ya ndaha Séhe ya.

<sup>3</sup> Te Séhe ya yōhyo luu cújéhnú ya, nájñuhun luu cújéhnú máá yá. Te ndihí ndese cúu máá yá, suni súcuan cúu Séhe ya. Te jín poder jñuhun ni cahān Séhe ya te iyó cutú ndihí-ni. Te ni sándoo ya yohó táca cuéchi yó, te sáá te ni cucōo ya lado váha mesa maá Yaā cújéhnú nde andiví.

*Jeē cújéhnú ga Séhe Yaā Dios vēsú táca ndajéhé yā*

<sup>4</sup> Te ni ndujéhnú ndasí gá Séhe ya vēsú táca ndajéhé andiví, chi ni nihín yā tahū jeē ndiso ya jñiñú jéhnú ndasí gá vēsú jñiñú cándiso ndajéhé.

<sup>5</sup> Chi súcuan ni cahān Yaā Dios jín Séhe ya, te nasūu jín ndajéhé yā:

Máá ró cúu Séhe rí,

te vijna te ni sajehnú ri rohó jéē cúu ri Tatá rō.

Te suni ni cahān yā jñuhun Séhe ya, te nasūu jñuhun ndajéhé yā:

Máá rí cúu Tatá nuū Séhe rí,

te máá i cúu Séhe nuū rí.

<sup>6</sup> Te suni ná ni taji yá Séhe ya cújéhnú, ni quiji ini ñayiví yáha, te ni cahān yā: Ndhí ndajéhé rí na chíñúhún i Séhe rí.

<sup>7</sup> Te ni cahān tucu ya jñuhun ndajéhé yā:

Nájñuhun quée tachí, súcuan cájica ndajéhé rí sáha rí,

te táca un jéē cájejníñú nuū rí, nájñuhun yáñuhún cácuu.

<sup>8</sup> Te jñuhun Séhe ya chi sa suhva cáhán yā:

Máá ró cúu Yaā Dios, te ndacu ró jñiñú ní cáni,

te jñiñú ndácu ró, máni jñiñú ndaá cúu.

<sup>9</sup> Cúsí ni rō jín jñiñú váha, te jíto uhū rō jñiñú néé.

Jeē yúcuan ruhū, Yaā Dios maá ró, ni sáha rí

jeē yóhyo ga cúsí ni rō vēsú táca gá jeē iyó andiví.

<sup>10</sup> Te suni cáhán yā:

Máá ró cúu Jitoho, te nde xīhna ñúhún ni sáha ró jéē ni jécōo ñayiví.

Te andiví chi suni jeē ni sáha ró cúu.

<sup>11</sup> Te táca un chí naa, te máá ró chí ní cáni iyó ró.

Te táca un chí cutúhú nájñuhun cutúhú ñn sahna,

<sup>12</sup> te nacaquin jnahnū rō te nasama ró jíjnáhan.

Te máá ró chí ma sáma cuiti rō,

te quiví cótecu rō ma ndíhi cuiti.

<sup>13</sup> Te súcuan ni cahān tucu yā jín Séhe ya, te nasūu jín ndajéhé yā:

Cucōo ró lado váha rí nuū cújéhnú ró,

te na sáha rí jeē quende rō poder táca jéē cájito uhū rohó.

Achí yá.

<sup>14</sup> Te táca ndajéhé yā chí mozo-ni cácuu, te taji yá cuango jeē chindéé ñáhán ñayuu jeē nihín tahū jeē jnama ya.

*Jeē ma cūhuun ni yō jīn jnūhun jnāma ya yohó*

**2**

<sup>1</sup> Nūu súcuan te cánuú jéē váha ga chuhun ni yō tāca jnūhun ya jeē ní cajini yó, chí nūu tuú te sanaa te scuíta yó.

<sup>2</sup> Chi nde jenhán ní jeniñu ya ndajéhé yā ní cacastūhun jnūhun ya, te ní cajini ñayuu jeē iyó ndáa. Te ñayuu nihni ní jīn ñayuu tu ní cájendetū jnūhun ún, vetū-ni ní canihīn i castigo.

<sup>3</sup> Te nūu súcuan ni cuu, te yóhó, ¿ndese cācu yó nūu ma chūhun ni yō jnūhun cánuú gá jeē jnāma ya yohó? Chi xīhna gā maá Jítoho yō ní nacani ya jnūhun yáha, te sáa te tēe jeē ní cajini nahín ní canacani ndaa tucu máa de nuū yō.

<sup>4</sup> Te Yaā Dios suni ní chindéé ñáhán yá de jeē ní canacani de jnūhun ya. Chi ní sáha ya jīn de jeē ní casáha de sīn sīn jniñu jéhuu jeē nahán náa ní yō jíto yó poder yā. Te suni ní jēhe ya Espíritu Santo yā nuū ñn ñn yó, ndese ní nujnahan ní maá yá sáha yó.

*Jeē ní nduu Jesús jnāhan ñayuu*

<sup>5</sup> Te Yaā Dios nasūu nūu ndajéhé yā ní jēhe ya jnūhun jeē condiso jniñu siquī ñayiví jéē quíji, chí sa suhva nuū Séhe ya Cristo ní jēhe ya. Te siquī ñayiví un cúu jeē cahán rī yáha.

<sup>6</sup> Chi suhva yósó nūu tútu jeē ní cáhān David jīn yá:

¿Na vé cúu ñayuu jeē ñúhun ní ní i?

Te ndihví ní ní siquī i, te máa ñayuu cúu i.

<sup>7</sup> Chi jecu-ni tiempo ní sáha ní jeē nūu i nuū tācá ndajéhé ní.

Yūcuán na te sajhnu ní i te squéndōo yíñúhún ní i, te cani ní i jeē ndacu i jniñu nuū tāca jéē ní sáha ní.

<sup>8</sup> Te ndihi jeē iyó chí sáha ní jéē kujéhuu i siquī.

Achí tutu. Te jeē ní sáha Yaā Dios jeē kujéhuu i siquī ndihi, nūu súcuan te ma quéndōo ní ñn jeē ma cújéhuu i siquī. Te vésú súcuan te vijna te ná tu coto yó jéē kujéhuu i siquī ndihi jeē iyó.

<sup>9</sup> Te jeē jini yō vijna cúu Jesús, Yaā jeē ní nduu nūu jecu-ni tiempo nuū tācá ndajéhé yā. Chi ní ndoho ya jeē ní jihí yā jehē yō, te jeē yúcuán ní ndujéhuu luu tucu ya, te ndihi cáhīyo yíñúhún nūu yā. Chí jeē váha ní Yaā Dios jīn yó, jeē yúcuán ní jihí Jesús jehē yō.

<sup>10</sup> Te ndihi jeē iyó chí cuenta Yaā Dios cúu, chí máa yá ní sáha. Te suni ndéca ya cuehē ndasí séhe ya jeē quihín i andiví nūu luu kujéhuu i jīn yá. Te váha níhín jniñu jeē ní jēhe ya jnūndóho nuū Jesús, chí jeē ní ndoho ya súcuan te cuu condeca váha ya ñayuu ní jnama ya.

<sup>11</sup> Chi Jesús jeē ní sándoo ya i te máa i jeē ní candundoo i, chí ñn-ni Tátá i jīn yá. Te jeē yúcuán tu cúcanu Jesús jeē cahán yā hermano yā jīn i, vésú ndasí nūu i.

<sup>12</sup> Chí yósó nūu tútu jeē ní cáhān yā jīn Tátá yā:

Cachí na jnūhun ní nūu tācá hermano na, te mēhñu nūu cándutútú i cata ná ndese cújéhuu ní.

<sup>13</sup> Te suni cáhān yā nájñūhun cácahān hermano yā:

Ruhū chí cándije ri yā.

Te cáhān tucu yā:

Yāha íne ri jīn táca gá séhe Yaā Dios jeē ní jēhe ya nuū rī.

Achí Jesús.

14 Te nájñuhun cáccacu ñayuu jeē cúu i yiqui cúñu, suni súcuan ni cacu Jesús, návāha cuu yā jehē yō. Te súcuan ni snáá yā poder jexeén jeē squívī ñayuu nuū cuēchi te jíhī i.

15 Te ni cacu ya súcuan návāha cuu quenehen ya tāca ñayuu chíji jñuhun jeē yuhú i cuu i. Chi ní vida i ndóho i sáha ún.

16 Te jendaá tu ní quíji ya jeē chindéé ñáhán yá tācá ndajéhé yā, chi sa suhva jeē chindéé ñáhán yá ñayuu cáccandíje jeē ní nduu yucün Abraham.

17 Jeē yúcuan ní jini ñúhún nduu inuú yá jíin táca hermano yā, návāha cuu ya sutū kujéñu jeē squícu vāha ya tācá jniñu jehē i nuū Yaā Dios. Chi ni cundáhú ní yā i, te ni ndahva yā cuēchi i jeē ní sócō yā maá yá jehē i.

18 Chi suni máá yá ni ndoho ya jeē ní jito ndee jñúndóho ya, te jeē yúcuan cuu chindéé ñáhán yá ñayuu jeē jíto ndee jñúndóho i.

### *Cújéñu ga Jesús vēsú Moisés*

## 3

1 Hermano, ni cana Yaā Dios rohó, te cáccu ró ñayuu ndoo máá yá. Núu súcuan te na nácani vāha ni rō siquī Cristo Jesús, Yaā cúu apóstol jeē ní tejñiñu Yaā Dios, te suni cúu ya sutū kujéñu siquī jñuhun cáccandíje yó.

2 Chi ni squícu vāha ya nuū Yaā Dios, Yaā ní tee jniñu un siquī yā, nájñuhun ni squícu vāha Moisés nuū ñayuu jeē ní cáhān Yaā Dios jeē cáccu i ñayuu vehe ya.

3 Chi cújéñu ndasí gá Jesús vēsú Moisés, nájñuhun cújéñu ndasí gá tēe sáha vehe nasūu máá vehe.

4 Chi tācá vehe iyó tēe ni sáha. Te máá Yaā Dios cúu jeē ni sáha tāca jēe iyó.

5 Te Moisés ni squícu vāha de jíin jniñu jeē ní cuu de mozo ni condito de ñayuu vehe Yaā Dios. Te ni castühún de siquī tāca jñuhun jeē steén yā tiempo quíji.

6 Te Cristo chi sa cúu ya maá Séhe jeē ndácu jniñu nuū ñayuu vehe Tátá yā, te vāha squícu ya jeē ní jéjñuhun ya nuū i. Te suni máá yó cáccu ñayuu vehe ya, te núu na cuiñi ñihin yó jíin jñuhun cáccandíje yó ndé quiví sándihí, te núu cúsiñi ní yó jeē ñuhun ní yó tāca jēe vāha jeē coo.

### *Jñuhun jeē ndetātu ñayuu Yaā Dios*

7 Núu súcuan te na chúhun ni yō jeē cahán Espíritu Santo nuū tútu ñi: Vijna te núu cuni sōho ró jēe cahán Yaā Dios,

8 te ma cúnihni ni rō nájñuhun ni cacunihni ni ñayuu jenahán. Chi tu ní cájendetū i nuū yā ná ni cajica i nuū ñuhun téhé.

9 Chi yúcuan ní casáha jíi rō jniñu jeē ní quítī ni rī, achí yá, vēsú ni cajito i tācá jniñu ni sáha ri uū xico cuiyā.

10 Jeē yúcuan ní quítī ni rī jíin ñayuu tiempo un. Te ni cahán rī jeē máni jeē castóo i ichi ndaā, chi tu cáccu i condiquñi i jñuhun rī.

11 Te jeē yúcuan ní quítī ni rī, te ni cahán teyí rí jeē ma quívicoo cuiñi i nuū ndetátú i sáha rī. Achí yá.

12 Núu súcuan hermano, coto má conéé ánuá ni ñin ró jēe cáca yátá ró jeē tuá candíje ró Yaā Dios, Yaā técu.

13 Chi sa suhva tāca quívī na stíhví jñahan ni rō, níni gá iyó tiempo, návāha ma cúnihni ni ni ñin ró te stáhú rohó sáha ró cuēchi.



<sup>14</sup> Te núu na cuiñi nihin yó ndé quiví sándihi jíin jnúhun jeē ní quejée yó jíin, yūcuán na te cuu yó jnáhan Cristo.

<sup>15</sup> Chi cáhán tutu:

Vijna te núu cuni sōho ró jée cahán Yaā Dios, te ma cúnihni ni rō nájñuhun ni cunihni ni ñayuu jenahán.

Achí.

<sup>16</sup> ¿Te ndé-ni cúu ñayuu jeē ní jini jnúhun ya te ni cunihni ní? Suu ndihi ñayuu jeē ní scácu Moisés jeē ní quendacoo Egipto.

<sup>17</sup> ¿Te ndé-ni cúu ñayuu jeē ní quítí ni yā nuū uū xico cuiyā? Suu ñayuu jeē ní casáha cuēchi, te ní cajihí i nuū ñúhun téhé.

<sup>18</sup> ¿Te ndé-ni i cúu jeē ní cáhán teyí yá jeē ma quívicoo cuiti i nuū ndetátú i sáha ya? Suu máa ñayuu jeē tu ní cájendetū nuū yā.

<sup>19</sup> Núu súcuan te jíin yó jeē tu ní cúu quívicoo i nuū ndetátú i, siquí jeē tu ní cácadnje i ya.

## 4

<sup>1</sup> Te níni íyó gá jnúhun jeē ní jéjñuhun ya jeē quívicoo ñayuu nuū ndetátú i sáha ya, te na cónso íyo yó jée ma stívi yó, návaha tú coo jíin sava ró jée ma nihín rō quiví ró.

<sup>2</sup> Chi suni máa yó ní cajini sōho yó jnúhun jeē jnáma ya yohó, nájñuhun ñayuu jenahán un. Te nuū maá i tu ní jéjñiñu jnúhun ni cajini i ún, siquí jeē tu ní cácadnje i.

<sup>3</sup> Te yóhó jée cácadnje, máa yó cúu jeē quívicoo yó núu ndetātu yó. Te siquí ñayuu tu cácadnje ni cahán yā suhva:

Jeē yúcuan ní quítí ni rí, te ní cahán teyí rí jeē ma quívicoo cuiti i nuū ndetátú i sáha rí.

Te súcuan ni cahán yā vésú je íyó túhva nuū ndetátú i nde ná ni jecōo ñayiví.

<sup>4</sup> Chi súcuan yósó jnúhun nuū tútu ñ siquí quiví uxá:

Ní sínu Yaā Dios táca jée ní sáha ya, te ní ndetātu yá quiví uxá.

<sup>5</sup> Te suni nuū tútu un yósó tucu:

Ma quívicoo cuiti i nuū ndetátú i sáha rí.

Achí yá.

<sup>6</sup> Núu súcuan te sava ñayuu chi quívicoo nahín i nuū ndetátú i. Te ñayuu jenahán jée ní cajini jnúhun jeē jnáma ya i, tu ní quívicoo i siquí jeē tu ní cájendetú i nuū yá.

<sup>7</sup> Jeē yúcuan ní jeni tucu ya inga quiví jeē quívicoo ñayuu, te quiví un cúu vijna. Chi ná ni yāha cuehē tiempo jeē ní cahán yā jíin ñayuu jenahán, te yósó núu tútu jeē ní sáha ya jeē suni ní cahán David suhva:

Vijna te núu cuni sōho ró jée cahán yā,

te ma cúnihni ni rō núu súcuan.

Achí tutu.

<sup>8</sup> Te nde jenahán ní squívi Josué ñayuu Israel un ñuu nuū ndetátú i. Te tu ní cúu squívi de i nuū ndetātu ánuá i sáha ya. Chi núu súcuan te ma cahán gā Yaā Dios jíin táca ñayuu jeē vijna cúu quiví jeē quívicoo i nuū ndetátú i.

<sup>9</sup> Núu súcuan te íyó túhva nahín ñ nuū ndetātu ñayuu Yaā Dios, nájñuhun ni ndetātu máa yá.

<sup>10</sup> Chi ñayuu jeē quívicoo nuū ndetátú i jíin yá, chi ndetátú i jeē ní casájniñu i, nájñuhun ni ndetátú Yaā Dios nuū jñiñu ní sáha máa yá.

11 Núu súcuan te na ndúcú ndéyí yó quívi yó núu ndetātu yó un, te ma sáha ni iin yó cuéchi jeē ma cándíje yó, nájnūhun ni casáha i nde saá.

12 Chi jnūhun Yaā Dios ndító técu te iyó poder. Chi cúu nájnūhun iin espada jeē xeén ndindúú lado, chi nástúu cájí ndese iyó jéē níjnūni yó jíin ánuá yó, nájnūhun sáha espada jeē jéhnde te nástúu nuū ñujnáhan yiqui jíin meque. Te jnūhun ya nástúu ndihi ndese jéni ni yó jíin ndese cúní yó sáha yó.

13 Te tu iyó ni iin jeē yísahí jeē tu jíiní maá Yaā jeē náquihin cuenta, chi ndihi-ni jíiní vāha ya, te ndihi-ni túu ndijin nuū yā.

### *Jesús cúu sutū kujéhnū ga*

14 Te cánevāha yó iin sutū kujéhnū ga, te je ni ndaa ya ni ndívi ya nuū iyó Yaā Dios. Te Jesús Sēhe Yaā Dios cúu ya. Jeē yúcuan na cuífi nihin yó jíin jnūhun jeē ní cándíje yó.

15 Chi névāha yó iin sutū kujéhnū jeē jito ndáhú yóhó jeē tu fuerza yó squícu vāha yó. Chi nájnūhun ndóho yó jéē jito ndee jexeén yohó, suni súcuan ni ndoho ya jeē ní jito ndee un yá, vésú tú cuíti cuéchi ya.

16 Núu súcuan te ma yūhu yó, chi na quívi yó yuhu mesa yā, cúu jeē cacān tahú yó. Chi maní yā jíin yó, te cúndáhú ni yā yohó, te siquí jeē vāha ni yā te chíndéé ñáhán yá yohó táca jínu jeē jíiní ñúhún yó.

## 5

1 Chi táca sūtū jeē ní kujéhnū jenahán, ni nacáji Yaā Dios de mēhñu ñáyyu, te ni jeni ya de jeē cuífi de nuū yā jehé ñayuu, te socó de ndajníñu jíin quíti nuū yā jeē siquí cuéchi i.

2 Te cuu cahān vítā de jíin ñáyyu tu jécūhun ni jíin ñáyyu castívi, chi máá de suni tú na fuerza ini de squícu vāha de.

3 Jeē yúcuan cúu jeē suni cánuú sócō de quíti nuū yā jeē siquí cuéchi máá de, nasūu máá-ni jeē siquí cuéchi ñayuu.

4 Te ni iin tēu te cúu sájéhnū de máá de jeē cuu de sutū kujéhnū, chi sa máá Yaā Dios cúu jeē nacáji ya de, nájnūhun ni nacáji ya Aarón nde jenahán.

5 Te suni súcuan Cristo, tu ní sájéhnū ya máá yá jeē cuu ya sutū kujéhnū, chi sa Yaā Dios ni sáha, chi ni cahān yā jnūhun yáha:

Máá ró cúu Sēhe ri,  
te vijna te ni sájéhnū ri rohó jéē cúu ri Tatá rō.

6 Te suni cáhán tucu ya nuū tútu íi:  
Níí cáni cúu ró sūtū,  
nájnūhun sutū Melquisedec jenahán.

7 Te Cristo, ná ni condee ya ñayívi, te ni jicān tahú yā, te nde ni ndahyū yā te ni ndahyū cohó yá. Te ni cahān ndahú yá jíin Yaā Dios, Yaā jeē cúu jnama ya jeē ma cúu yā nuū. Te siquí jeē yíñúhún ní chíñúhún yá Yaā Dios, te ni chíndéé ñájnáhan Yaā Dios jíin yá nuū jnūndóho ún.

8 Chi vésú Sēhe Yaā Dios cúu ya, te ni jendetū yā ni ndoho ya ini ñayívi, te súcuan ní jíiní yā ndese cúu jnūhun jendetū.

9 Te ná ni cuu ni squícu ndihi ya jeē ní jendetū yā, te ni cucutú jnūhun jeē jnáma ya táca ñáyyu jendetū nuū yā, te cotecu i níí cáni.

10 Chi ní jeni Yaā Dios yā jeē cúu ya sutū kujéhnū nájnūhun sutū Melquisedec.

### *Siquí jeē ma cáca yátá i*

11 Te iyó cuéhē jnūhun jeē castūhun rí siquí táca jéē yáha. Te yíí cúu jeē jécūhun ni rō sáha ri, siquí jeē tu cáconi rō chuhun ni rō.

<sup>12</sup> Te je ni cunahán cácanđíje ró, te jini ñúhún jéé cúu ró téé stéén nuú. Te tuú chi sa cájini ñúhún tucu máá ró tēe stéén nuú rō tāca jnúhun Yaā Dios jeē tú yí cuiti. Chi sa ni canduu ró nájnūhun sūchi yíquin jéé jini ñúhún caxin i, chi ná tu ije i caji i jeē ndáva. Súcuán cácuu ró chi ná tu ije ró jíin jnúhun yí gá.

<sup>13</sup> Chi núu máni máá nájnūhun sūchi yíquin jéxin cácuu ró, núu súcuán te tu cúu jecūhun vāha ni rō jnúhun ndaā.

<sup>14</sup> Te ñayuu jeē jé ni ije, chi cáyeji i jeē ndáva, cúu jeē ní cutūhva vāha i te je cúu nácāji i jeē vāha jíin jéé neé.

## 6

<sup>1</sup> Núu súcuán te na yāha yó núu tāca jnúhun Cristo jeē tú-ni yí, te na quíhín yō nuú jnúhun yí gá, návāha na ije vāha ni yō jíin jnúhun ya. Te ma ndejéé tucu yó jíin jnúhun jeē ni scuáha yó xihna gā, suu jnúhun jeē nácani ni yō stóo yo cuéchi yó jéé cúu yō sāha, jíin jéé candíje yó Yaā Dios,

<sup>2</sup> jíin síquī jeē jéndute, jíin síquī jeē soó ndaha xinī ñáyuu, jíin síquī jeē nátecu ndíyī, jíin síquī jeē jnahnú ndetū ñayuu ní cáni.

<sup>3</sup> Núu súcuán te na yāha yó núu tāca jéé yāha te quívi yó núu jnúhun yí gá, te núu cuāha Yaā Dios jnúhun.

<sup>4</sup> Chi íyō ñáyuu jeē jé ni jecūhun ni i, te je ni jini i tāca jéé jéhe Yaā Dios, te je ni quívi i nuú jnúhun stéén Espíritu Santo,

<sup>5</sup> te suni je ni jini i jnúhun vāha Yaā Dios jíin ndese coo poder yā tiempo quiji.

<sup>6</sup> Te ñayuu un núu caca yátá i, te ma cúu ga ndejéé jeē i jeē nácani ni i. Chi jeē cáca yátá i cúu nájnūhun jeē nácagni tucu i Sēhe Yaā Dios jicá cruz, te cájēhe i jnúhun canu yā cájito ñayuu.

<sup>7</sup> Te ñayuu chi cácuu i nájnūhun ñuhun jeē cúun vāha saū nuú te ndóyo vāha. Te núu cánecoo jeē vāha caji tēe cásājniñu, yūcuán na te cúsiñi ni Yaā Dios jíin.

<sup>8</sup> Te núu máni iñu yóquin jíin yucū sajnéñu cánecoo nuú, núu súcuán te tu jéjñiñu cuiti, te squéndōo ñi yā, te ñin quívi te cayū. Súcuán jnahnú ndetū ñayuu cájica yátá.

### *Jeē ñúhun ni yō tāca jéé vāha jeē coo*

<sup>9</sup> Te máá ró jijnánah ró hermano, vēsú cácahān rī súcuán jíin ró, te cácuáhnu ni rī jeē cácuu ró ñayuu cuiñi ñihin, chi ñayuu ni jnama ya cácuu ró.

<sup>10</sup> Te Yaā ndaā cúu Yaā Dios, te tu náā ni yā jñiñu cásáha ró. Chi siquī jeē cáhīyo manī rō jíin yá te ni cacundáhú ni rō hermano rō cácanđíje, te ni cachindéé ñáhán ró i, te súcuán cásáha ró ndé vijna.

<sup>11</sup> Te cácuni rī jeē niní súcuán sāha ga ná ñin ná ñin ró ndé quívi sándñí, chi jeē sāha ró súcuán te ñihin rō ndíhi jeē cáñuhun ni rō.

<sup>12</sup> Te cácuni rī jeē ma cúhuun ni rō, chi sa ndacu ró ñáyuu cácanđíje jeē jíin paciencia cándetu i, te jeē yúcuán ñihín tahu i tāca jéé ni jéjnūhun ya.

<sup>13</sup> Chi quívi jeē ni jéjnūhun Yaā Dios nuú Abraham, te ni ndacunehen ya maá yá jeē ni jéjnūhun téyí yá, chi tuá na inga ndacunehen ya jeē cujéñu ga vēsú maá yá jeē cuu testigo yá.

<sup>14</sup> Te ni cahān yā: Jendaā ndije jeē vāha ndasí sāha ri jíin ró, te sāha ri jeē nducuehē ndasí yúcūn rō, achí yá jíin Abraham.

<sup>15</sup> Te jíin paciencia ni condetu de, te súcuán te ni ñihin de jeē ní jéjnūhun ya.

<sup>16</sup> Te núu cáhán teyí ñáyyuu, te ndácunehen i síhví ñin jeē cujéhnú ga vēsú maá i. Te núu íyó ñin jñūhun jeē tu cácanđije jñáhan, te núu ñin tēe cáhán teyí de jíin síhví Yaā Dios, yūcuán na te jécuiñi jeē cátejñáhan.

<sup>17</sup> Te suni súcuan Yaā Dios, chi ni jejnūhun téyí yá nuū ñáyyuu jeē cuāha ya tahū i. Chi ni cuni yā jeē cucáhnú vāha ni i jeē ma nácani yátá ni yā siquī jeē ni jéjnūhun ya nuū i.

<sup>18</sup> Chi ma nácani yátá cuiti ni yā siquī jñūhun jeē ni cáhān yā uū jínu, ñin jeē ni jéjnūhun ya, te inga jeē ni cáhān teyí tucu ya siquī suni jñūhun ún. Chi tu stáhú cuiti yā. Te jeē yúcuan máá yó jeē ní tūhva yó yá, chi yōhoyo íyó ndeyí ni yō, te cáñuhun teyí ni yō jeē squícu ya jeē ni cáhān yā.

<sup>19</sup> Te siquī jeē súcuan ñūhun ni yō, te suu sáha jeē quéndōo ñihin ánuá yō jíin jñūhun ya, te quéndōo ndaā ni yō, nájñūhun quéndōo ñihin barco jeē jñí gancho yūū. Te sáha jeē cúu quívi yó andiví núū íi gā, nájñūhun cuarto íi gā jeē ni íyo ichi yátá sahna ni ndita caa ini vehe íi jenahán.

<sup>20</sup> Te ini yūcuán chi xīhna gā Jesús ni quívi, návāha nune ya ichi quívicoo yó. Te jeē yúcuan ní cání cúu ya sutū cujéhnú nájñūhun sutū Melquisedec.

### *Jeē cúu Jesús sutū nájñūhun Melquisedec*

## 7

<sup>1</sup> Te máá Melquisedec ni cuu de rey ñuu Salem, te ni cuu de sutū nuū Yaā Dios, Yaā cujéhnú téyí. Te ni jejnahan de Abraham ná ni nandicó Abraham jeē ní cundeyí de ni cajejñáhan de jíin táca rey. Te ni jicān tahú de jehē Abraham.

<sup>2</sup> Te táca úxí ndajñíñu jeē ní quende Abraham nuū táca rey un, ni jēhe de ñin ñin siquī un núū Melquisedec. Te síhví Melquisedec cuní cahān: rey jeē sáha jñiñu ndaā. Te suni nání de rey Salem, te jñūhun Salem cuní cahān: jeē iyó ndeyí sñ ni. Te jeē yúcuan suni nání de: rey jeē sáha jeē iyó ndeyí sñ ni ñáyyuu.

<sup>3</sup> Te tu cáhán tutu jñūhun tátá de ni náná de ni táca jíi de. Ni tu cáhán núu ni cacu de, ni núu ni jihí de. Chi cúu de nájñūhun Jesús, Sēhe Yaā Dios, chi ní cání cúu de sutū.

<sup>4</sup> Te condēhe jíjñáhan ró náa jéhnú ni cuu Melquisedec, chi jíi jéhnú yó Abraham ni jēhe de ñin ñin siquī táca jéē úxí nuū de siquī táca jéē ní quende de nuū rey un.

<sup>5</sup> Te jíni yō jeē táca úxí ndajñíñu ni canihín ñáyyuu, ni cajēhe i ñin ñin siquī un ní caquihín tēe cácuu sutū yucūn Leví, nájñūhun cáhán ley Moisés. Te ni caquihín de nuū ñáyyuu cácuu jñáhan de, chi ñin-ni yucūn Abraham cácuu de jíin i.

<sup>6</sup> Te Melquisedec nasūu yucūn Leví cúu de, te vēsú súcuan te ni quihín de ñin ñin siquī táca jéē úxí nuū Abraham. Te suni ni jicān tahú de jehē Abraham, vēsú cúu Abraham tēe jeē ni jéjnūhun ya nuū.

<sup>7</sup> Te jíni vāha yó jéē tēe cujéhnú ga cúu jeē jicān tahú jehē tēe núu ga.

<sup>8</sup> Te ñayívi yáha chi táca sūtū cáquihín de ñin ñin siquī táca jéē úxí nuū ñáyyuu, vēsú cácuu te tēe cájihí. Te Melquisedec suni ni quihín de, te máá de chi cáhán tutu íi jeē técu de.

<sup>9</sup> Te suni cuu cahān yō jeē Leví, tēe jeē ní quihín ñin ñin siquī táca jéē úxí nuū ñáyyuu, suni nájñūhun nuū maá de ni quihín Melquisedec ñin ñin siquī táca jéē úxí. Chi jeē ni jēhe Abraham nuū Melquisedec, suu cúu nájñūhun jeē suni ni jēhe de jeē siquí Leví jíin ndihí ga yucūn de jeē quíji.

<sup>10</sup> Chi yucūn Abraham cúu Leví, te vēsú ná tu cacu de quiví jeē ni jéjnanhan Melquisedec Abraham, te nájnūhun jeē ni jéhe máá de cúu jeē ni jéhe Abraham.

<sup>11</sup> Te yucūn Leví ni cane sutū Aarón jiín táca gá sutū ní quijicoo. Te ni castéén de ley yā nuū ñayuu Israel jenahán. Te núu ní cúu sáha de jeē quendōo ndaā ñayuu jiín ley un núú, te tuá cánuú jeē núcuñí inga clase sutū lugar Aarón jiín yucūn de. Te inga clase sutū cúu Cristo jeē cúu ya nájnūhun sutū Melquisedec.

<sup>12</sup> Te núu nucuiñí inga clase sutū, te suni cánuú sáma ley siquí yucūn de.

<sup>13</sup> Núu súcuan te ni sáma ley un, chi cáhán tutu íi jeē Jítoho yō Jesús cúu inga clase sutū ún, te ni cacu ya chíji inga yucūn. Te yucūn ní quiji ya ún, tú ni ñin ní cúu sutū.

<sup>14</sup> Chi jíni vāha yó jéé chíji yucūn Judá ni cacu Jítoho yō. Te yucūn ún chi tu ní cáhán cuiti Moisés jeē cánecoo sutū.

<sup>15</sup> Te cáji cúu jeē ní nucuiñí Cristo jeē cúu ya inga clase sutū nájnūhun sutū Melquisedec.

<sup>16</sup> Te tu cúu ya sutū jeē ní cacu chíji yucūn Leví nájnūhun cáhán ley jenahán. Chi cúu ya sutū siquí jeē ndíso ya poder cotecu yā ñí cáni te ma cúu cuiti yā.

<sup>17</sup> Chi súcuan ni cahān Yaā Dios jnūhun ya:

Ñí cáni cúu ró sūtū,  
nájnūhun sutū Melquisedec.

<sup>18</sup> Núu súcuan te jniñu jeē ní ndacu ley jenahán siquí sutū, chi ni naa vijna, chi tu ní ñhín jniñu quendōo ñí cáni.

<sup>19</sup> Chi ley Moisés tu ní sáha jeē quendōo ndaā ñayuu. Te ni nihín yō ñin jnūhun vāha ga jeē ñūhun ni yō jeē ndáhva Cristo cuēchi yó, te súcuan ni cuyajni yó núu Yaā Dios.

<sup>20</sup> Te jíni jéé ni cahān teyí Yaā Dios te cúu Jesús sutū.

<sup>21</sup> Chi táca gá tēe ún, nasūu jíni jnūhun jeē ni cahān teyí yá ní cúu de sutū. Te Jesús chi ni cahān teyí Yaā Dios jeē cuu ya sutū, chi súcuan cáhán tutu: Ni cahān teyí máá Jítoho yō Yaā Dios, te ma nácani yátá ní yā:

Ñí cáni cúu ró sūtū,  
nájnūhun sutū Melquisedec.

Achí yá.

<sup>22</sup> Núu súcuan te jíni Jesús ni cucutú ñin contrato vāha ga vēsú ley jenahán.

<sup>23</sup> Te táca gá sutū ún, chi ni ñyo cuehē de, chi siquí jeē cájihí de te tu ní cúu cuiñí de ñí cáni.

<sup>24</sup> Te Jesús chi cúu ya sutū jeē cuiñí ñí cáni, chi técu yā ñí cáni.

<sup>25</sup> Jeē yucūn ndíso jniñu ya jnama ya ñayuu quijicoo nuū Yaā Dios, cotecu i ñí cáni. Chi ñí cáni técu yā te cáhán yā jehé íi jniñ Yaā Dios.

<sup>26</sup> Núu súcuan te vāha ndasí sutū kujéhnú cúu Jesús, jeē nájnūhun jíni ñūhún yó. Chi sutū íi cúu ya, te tú na cuēchi ya, te íyo ndoo ya, te tu cúu ya jnáhan ñayuu casáha cuēchi, te kujéhnú téyí yá nde nuū sucún gá andiví.

<sup>27</sup> Te máá yá tu jíni ñūhún sáha ya nájnūhun ni casáha sutū cácujeñu jenahán, jeē ndiquiví ni casocō de quití siquí cuēchi máá de xihna gā, te sáá te siquí cuēchi ñayuu. Chi ñin jínu-ni ni socō yā máá yá jehé yō, te ni cuu-ni.

<sup>28</sup> Chi ní jeni ley Moisés táca sutū kujéhnú jeē tú na fuerza squícu vāha. Yucúan na te cuéé gá te ni cahān teyí Yaā Dios. Te jíni jéé ni cahān teyí yá, te ni jeni ya Sēhe ya jeē cúu ya sutū kujéhnú, te sutū ndaā sutū vāha cúu ya ñí cáni.

*Jeē ndíso jniñu Cristo siquī ñn contrato jeē*

**8**

<sup>1</sup> Núu súcuan te jñuhun cánuú gá jeē jé ni cahān rī cúu yāhá: Névāha yó ñn sutú cujéñnu nájñuhun ni cahān rī, te ndéé yá lado váha mesa nuū ndácu jniñu maá Yaā cujéñnu nde andiví.

<sup>2</sup> Te vijna te cúu ya sutú nde andiví, jeē cúu ndije lugar iī jeē ni sáha maá Jítóho yō Yaā Dios, nasūu ñáyuu. Chi tu cáa nájñuhun vehe iī jengahán jeē ní casáha ñayuu.

<sup>3</sup> Te táca sūtú cujéñnu ni jeconā de jeē socó de ndajniñu jíin quiñi nuū Yaā Dios. Núu súcuan te Jesucristo suni ni jini ñuhún jeē socó yā jeē cúu ya sutú.

<sup>4</sup> Te núu ní iyo ga yā ini ñayiví, te ni ma quiñáhan jeē cúu ya sutú jíin táca gá sutú, chi níni cásocó gá de quiñi nájñuhun cáhān ley Moisés.

<sup>5</sup> Te jniñu cásáha de, tu quiñáhan jíin jéé iyó andiví. Chi cúu ñn muestra-ni jeē steén siquī andiví. Te cúu nájñuhun jeē ni cáhān Yaā Dios jíin Moisés quiñi ní quejéé de sáha de vehe iī jengahán: Coto váha ró jéé sáha ró táca ndajniñu nájñuhun jító jeē ní steén rī nuū rō nde xinī yúcu, áhí Yaā Dios jíin de.

<sup>6</sup> Te vijna te sáha Cristo jniñu jéñnu ndasí gá vesú jeē casáha táca sūtú ún, chi ndíso jniñu ya siquī contrato jeē jéé yóhoyo váha ga, chi ndíso jñuhun jéñnu ga jeē ní jéjñuhun Yaā Dios.

<sup>7</sup> Chi contrato ley xihna ñuhún, núu jeē ni sáha jeē quée vāha jniñu núu, te tuá cánuú jéé cóo contrato uū.

<sup>8</sup> Chi ñayuu jengahán un jéé tu ní cáquendōo ndaā, suhva ni cahān Yaā Dios jíin i, áhí tutu:

Quiji quiñi jeē nasáha ri ñn contrato jeē jíin ñáyuu Israel jíin ñáyuu Judá, áhí Jítóho yō Yaā Dios.

<sup>9</sup> Te ma cóo nájñuhun contrato jeē ní sáha ri jíin jíi i jengahán, quiñi jeē ní jniñi ri ndaha de jíjñáhan de, te ni quenehen ri de ini nación Egipto.

Chi tu ní cásquícu vāha de jíin contrato ley rī. Jeē yúcuan tuá ní táñuhún rí de, áhí Yaā Dios.

<sup>10</sup> Núu súcuan te suhva coo contrato jeē nasáha ri jíin ñáyuu Israel, nde na quiñi quiñi yúcuan, áhí Jítóho yō Yaā Dios:

Sáha ri jeē jécūhun ley rī nuū jeē níjñūn i, te suni ini anuá i tee ri jñuhun ley rī.

Te cuu ri Yaā Dios maá i, te maá i cuu ñayuu maá rí.

<sup>11</sup> Te tuá jíni ñuhún steén i nuū jñáhan i nuū ñāni i, návāha cuni i ndese Yaā cúu Jítóho i.

Chi ndihi i cuni ndese Yaā cúu ri, nde ñayuu núu ga jíin ndé ñayuu cujéñnu ga.

<sup>12</sup> Chi cone cáhnu ni rī nuū i jeē ní casáha i jniñu néé, te ni ma núcūhun ga ni rī cuēchi ni casáha i. Achí Yaā Dios.

<sup>13</sup> Te jeē ni cáhān yā jeē cuáha ya ñn contrato jeē cúu jeē ní cachi yā jeē tuá cuajniñu contrato xihna ñuhún. Te ñn jeē ní cutúhú jéé tuá jejniñu, chi jíni yó jeē je yajni naa.

*Vehe iī ñayiví yáha ní steén ndese cáa andiví*

## 9

<sup>1</sup> Te ndaā chi contrato xihna ñúhún ní ndacu jniñu ndese chiñúhún i ya, jíin ndese coo ñin vehe ñi ñi ñayivi yáha.

<sup>2</sup> Te ni cuvāha vehe ñi ún, te ni ñyo uū cuarto. Te cuarto xihna ñúhún jéē naní cuarto ñi, ni ñin candelero oro jíin mesa oro jíin pan ñi.

<sup>3</sup> Te ni ñyo sahma jéē ndíta caa jéē ndihyú inga cuarto jéē naní cuarto ñi ndasí gá.

<sup>4</sup> Te ñini un ní ñyo ñin altar oro nuū cayú sūje cútú, jíin yéjnū jéē ñúhun contrato ley, te máni oro cúu ní síquī yejnú. Te ñini yejnū un ñine ñin tijehēn oro jéē ñúhun maná jéē ní cuun andiví. Te suni ñine vara Aarón jéē ní nane numa, jíin tabla yuū jéē yosó jnúhun contrato ley.

<sup>5</sup> Te síquī yejnú un ní cahñin ndíndúú figura ndajéhé querubín jéē steén jéē ñine Yaā Dios. Te ni sáha cuandahū síquī tapa yejnū nuū ní cóso yuyú níñi jéē ndáhva cuēchi. Te tu núne yó cáhān gā yō síquī táca yúcuan vijna.

<sup>6</sup> Te ná ni jñu táca un, te nú-ni nú-ni quívicoo sutū ñini cuarto xihna ñúhún jéē casáha de jniñu jéē cúu de sutū.

<sup>7</sup> Te ñini cuarto uū, chi tu cúu quívicoo na-ni sutū jíin inga ñayuu, chi máñúhún-ni sutū kujéhu ga cúu jéē quíví, te suni ñin-ni vuelta jéē cuiyá. Te suni ma cúu quíví de núu tu níñi quiti jéē sóco de núu Yaā Dios jéē síquí cuēchi máá de jíin síquí cuēchi ñayuu.

<sup>8</sup> Te jíin yúcuan steén Espíritu Santo nuū yō jéē ná ni ñyo ga cuarto ñi xihna ñúhún ñini ñayivi, te tu ní núne ichi jéē quíví ñayuu ñini lugar ñi ndasí jéē cúu andiví.

<sup>9</sup> Chi táca yúcuan cúu jéē ní steén ndese cúu tiempo vijna. Chi jéē ní casocō i ndajniñu jíin quiti nuū Yaā Dios, chi tu ní cúu cuiti sáha jéē quéndōo ndoo ánuá ñayuu ní casocō ún.

<sup>10</sup> Chi táca un ní steén máni síquī yiquí cúñu yō, ndese caji yō, ndese coho yó, ndese ndundoo yó. Te ni jejniñu máá-ni nde ni quiji Cristo jíin ñin modo váha ga.

<sup>11</sup> Chi vijna je ni quiji Cristo, te cúu ya sutū kujéhu ga jéē ndíso jniñu ya síquí táca jéē váha jéē ní quiji vijna. Te cúu ya sutū ñini lugar ñi nde andiví jéē kujéhu ga te váha ga vésu cuarto ñi jenhán. Te nasūu jéē ní casáha ñayuu cúu, chi nasūu cuenta ñayivi yáha cúu.

<sup>12</sup> Te jéē ni quíví ya ñini lugar ñi ndasí gá nde andiví, te nasūu jíin níñi ndixúhú ni níñi becerro, chi jíin níñi maá yá ni quíví ya, ni sóco yā ñin jñu-ni jéē ní cání. Te súcuan ni jnama ya yohó jéē cótecu yō ní cání.

<sup>13</sup> Chi nde jenhán te níñi stíquī jíin níñi ndixúhú jíin yáa becerro jéē ní cáyū nuū altar, ni cacosō yuyú de síquí ñayuu jéē tu íyo ndoo ánuá i, te súcuan ni ndundoo i nuū yā.

<sup>14</sup> Te núu ni nihñ jniñu níñi táca quiti ún, te nagā ni cuu níñi maá Cristo. Chi Yaā ndoo cúu ya, te ni sóco yā maá yá nuū Yaā Dios, ni sáha Espíritu jéē iyó ní cání. Te níñi yā nácate ánuá yō nuū jniñu néé jéē cúu yō sáha. Te súcuan te cuu cuajniñu yó núu Yaā Dios, Yaā técu.

<sup>15</sup> Jéē yúcuan cúu jéē ndíso jniñu ya síquí ñin contrato jéē. Chi ni jihí yā, te súcuan ni quende yā cuēchi ni casáha ñayuu ná ni ñyo i chíji contrato xihna ñúhún. Te ñayuu jéē cána Yaā Dios i quívicoo i ndaha ya, nihñ i tahū i jéē cóo ní cání, nájnūhun ni jejnūhun ya.

<sup>16</sup> Chi cúu nájnūhun núu sáha ñin tēe acta jéē cahán síquí tahū, te nde na cúu de te nihñ jniñu.

17 Chi núu técu gā tēe ni sáha, te tu níhín jniñu. Te nde núu ni jihí de, te sáa te jéjníñu.

18 Te suni súcuan contrato xihna ñúhún, suni ni jini ñúhún cucutú jíin níñi quiti ní jihí. Te contrato jeé chi ni cucutú jíin níñi Cristo jeé ni jihí yā.

19 Chi ná ni cuu ni cachi Moisés tācá jniñu ndácuo contrato ley un núu ndivii ñayuu, te ni quihin de níñi becerro jíin níñi ndixúhú jíin ndute, te jíin íxi cácuéhé jíin yúcu hisopo ni cosó yuyú de síqui libro ley jíin síqui ndivii ñayuu.

20 Te ni cahān de: Yāha cúu níñi jeé cúcutú contrato ley jeé ní sáha Yāa Dios jíin yó, achí de.

21 Te suni níñi un ní cosó yuyú de nde maá vehe íi jíin tāca ndajniñu ni cajejniñu de jeé cáchiñúhún de ya.

22 Te je yajni ndihí ndajniñu, chí cáhán ley un jeé jíni ñúhún ndundoo jíin níñi. Te núu ma cáti níñi te ma cóne cáhnu ni yā nuú cuéchi núú.

### *Jeé ni sócō Cristo maá yá jeé quēnde yā cuēchi*

23 Núu súcuan te tācá ndajniñu un jéé cácuu muestra tāca jéé iyó andiví, ni jini ñúhún ndundoo jíin níñi quiti. Te tāca maá jéé iyó andiví, chí ni jini ñúhún ndundoo jíin níñi Cristo jeé yóhō vāha ga.

24 Te Cristo chí tu ní quívi ya íni lugar íi jeé ní casáha ñayuu, chí ñn muestra-ni ni cuu un jéé steén ndese iyó lugar íi ndije nde andiví. Chí maá andiví ní quívi ya, te vijna íne ya nuú Yāa Dios jeé cahán yā jehē yō.

25 Te maá sūtū cujēhu ga quívi de tāca cuíyā íni cuarto íi gā jeé sócō de níñi quiti. Te Cristo tu ní sócō yā maá yá cuehē jínu, chí ñn jínu-ni.

26 Chí núu jeé súcuan te cánuú jéé cuehē jínu ndoho ya nde ná ni jecōo ñayiví te nde vijna núú. Te tuú chí sa tiempo cuándihí yāhá ní quenda ndijin yā ñn jínu-ni jeé ní cáni, ni sócō yā maá yá jeé ní quēnde yā cuēchi.

27 Te nájnūhun ni cundaā jeé cúu tāca ñayuu ñn jínu-ni, yūcuán na te sándaā Yāa Dios jniñu í,

28 suni súcuan Cristo ni jihí yā ñn jínu-ni jeé ni sócō yā maá yá jeé ní quēnde yā cuēchi cuehē ñayuu. Yūcuán na te ndiji ya inga jínu, te nasūu jéé sócō tucu ya maá yá jeé quēnde yā cuēchi, chí sa suhva jeé jnáma ya ñayuu jeé cādetu í jeé ndíji ya.

## 10

1 Chí ley Moisés ni cuu ñn muestra-ni tāca jéé váha jeé ní quiji jíin Cristo, ñn jeé steén-ni ndese coo maá jéé váha. Jeé yúcuán tu cúu cuiti sáha ley un jéé quēndōo ndaā ñayuu jeé quíjicoo í nuú Yāa Dios jeé cásocō í quiti nuú cuíyá nuú cuíyá.

2 Chí núu ní cúu sáha ley un jéé quēndōo ndaā í, te jecuiñi jeé cásocō í quiti núú. Chí núu ní cúu, te ñn jínu-ni te je ni quēndōo ndoo ánuá ñayuu cásocō ún, te ma yūhu gá ánuá í jeé ní sáha í cuēchi núú.

3 Te tuú chí jeé cásocō í quiti ún tāca cuíyā, sa sáha jeé núcūhun ni í cuēchi í.

4 Chí níñi stíqui jíin níñi ndixúhú, ma cúu cuiti quēnde cuēchi.

5 Jeé yúcuán ná ni quiji Cristo íni ñayiví, te ni cahān yā jíin Yāa Dios: Jeé jéhu í quiti jíin jéé jéhe í ofrenda nuú ní, chí tu ní núnahan ni ní. Te ní sátūhva ní yiqui cúñu maá ná jeé sócō na.

6 Te tu ní cúsi ni ní jéé jéhu í quiti te sócō í tí jeé ndúndoo cuēchi í núú.

7 Yūcuán na te ni cahān ná: Yāha véji ná jéé squícu ná jniñu jeé núnahan ni ní, Tātā Yāa Dios.



Chi súcuan je yósó jnúhun na núū tútu.

Achí Jesús.

<sup>8</sup> Xihna gā ni cahān yā jeē tu ní núnahan ni Yaā Dios te tu ní cūsī ni yā jeē jéhni i quiti te jéhe i ofrenda, jíin jéē jéhmú i ti te sócō i ti jeē ndúndoo cuēchi i núú, nájñūhun ndácu ley jenahán jniñu.

<sup>9</sup> Te ni cahān gā yā: Yāha véji ná jéē squícu ná jniñu jeē núnahan ni ní, Tátā Yaā Dios. Te jeē ni cahān yā súcuan, te ni sáha ya jeē jécuiñi jeē cásocō i quiti, chi ni sócō yā maá yā.

<sup>10</sup> Te ni sáha Yaā Dios jeē iyó ndoo iyó íi yō nuū yā siquī jeē ni sáha Jesucristo jeē núnahan ni Yaā Dios, suu jeē ni sócō yā yiqui cúñu yā ñin jínu-ni jeē níí cáni.

<sup>11</sup> Te tāca sūtū ún ndiquivī ni cahīin de ni cajejniñu de nuū yā, te cuehē jínu cájehni de suu quiti jeē sócō sócō de. Te tācá un chi ma cúu cuiti quende cuēchi.

<sup>12</sup> Te Cristo chi ñin jínu-ni jeē níí cáni ni sócō yā maá yā jeē siquí cuéchi yó. Te sáa te ni cucōo ya lado váha Yaā Dios nuū kujéhu ya.

<sup>13</sup> Te yūcuan ndétu ya vijna nde quiji quivī jeē quēnde yā poder tāca jéē jíto uhū nuū yā.

<sup>14</sup> Chi jeē ni sócō yā maá yā ñin jínu-ni, te ni sáha ya jeē níí cáni quendōo ndaā ñayuu ni sándoo ya.

<sup>15</sup> Te maá Espíritu Santo suni cájí cáhán yā siquī jnúhun yáha, chi xihna gā cahán yā:

<sup>16</sup> Suhva coo contrato jeē nasáha ri jíin i, nde na quíji quivī yúcuan, áchí Jítoho yō Yaā Dios:

Sáha ri jeē jécūhun ley rī ini anuá i, te suni nuū jeē níjnūni i tee ri jnúhun ley rī.

<sup>17</sup> Yūcuán na te cáhán gā yā:

Ma núcūhun cuiti gā ni rī tāca cuéchi jíin jniñu néé ní casáha i.

Achí yá.

<sup>18</sup> Núu súcuan te núu je ni ine cáhnu ni yā nuū cuéchi yó, te tuá cánuú jéē sócō gā yō jeē siquí cuéchi yó.

### *Jeē ní nune ichi quívī yó núū Yaā Dios*

<sup>19</sup> Jeē yúcuan hermano, ma ñin jeē cáni ni yō, chi cuu quivī yó lugar ñi ndasí ndé nuū iyó Yaā Dios, siquī jeē ní jeti niñi Jesucristo.

<sup>20</sup> Chi ni nune ya ñin ichi jéē jéē cótecu yō níí cáni sáha ya. Chi ná ni jihī yā te ni tahndē sahma ndíta caa jeē ndihyú lugar ñi ndasí gá ini vehe ñi. Te súcuan ni steén Yaā Dios jeē nune quívī yó lugar ñi ndasí gá nuū iyó yá.

<sup>21</sup> Te Jesús cúu sūtū kujéhu ndasí jeē ndíto yóhó ñayuu cácuu sēhe Yaā Dios.

<sup>22</sup> Núu súcuan te na quívicoo yó núū Yaā Dios, te na cóo ndije ndaā anuá yō, te na cándije nihin yó jéē iyó ndáa ndíhi jnúhun ya. Chi jíin niñi Cristo ni ndundoo anuá yō nuū tāca cuéchi ni casáha yó, nájñūhun ni ndundoo yó núu yā jeē ní jendute yó jíin ndute.

<sup>23</sup> Te na cuíñi niñin yó jíin jnúhun jeē cácahān yō jeē ñūhun ni yō jeē sáha ya jeē váha jíin yó. Te ma cáca yátá yó, chi váha squícu máá Yaā Dios jeē ni jéjnūhun ya nuū yō.

<sup>24</sup> Te na nácani ni yō ndese stíhvī jnáhan ni yō jeē cundáhú gá ni yō jnáhan yó, jíin jéē sáha yó jniñu váha.

<sup>25</sup> Te níni na ndútútú yó chíñúhún yó yā, te ma cúhuun ni yō nájñūhun casáha sava i, chi sa víhyá gā na stíhvī jnáhan ni yō, chi je cájini yō jeē cuácuyajni quivī ndíji ya.

<sup>26</sup> Te núu je ni jecūhun ni yō te ni jetáhú yó jñūhun ndaa, te núu máni sáha sáha-ni yó cuéchi, núu súcuan te tuá na inga iyó jéé cūu siquī cuéchi yó.

<sup>27</sup> Chi sa quéndoo máni ga jñūhun xeēn siquī yō jeē quiji quiví juicio te quiji yáñuhūn xeēn jeē cayū ñayuu jeē cájito uhū i ya.

<sup>28</sup> Ñayuu squéhichī ley Moisés, te núu uū chí únī ñayuu cahán cuéchi siquī i, te cuu nahín i, te tuá na jñūhun cúndáhú ni iyó.

<sup>29</sup> Te nagá ni cuu jeē ma ndóho xeēn gā ñayuu jeē squéhichī i máa Séhe Yaā Dios, chi nájñūhun jeē jeñú nñhu i siquī yā. Te sáha i jeē tu ndé jéjñíñu nññi yā jeē ní jeti siquī contrato jeē ndúndoo i nuū yā nuú. Te súcuan sáha ndeváha i nuū maá Espíritu Yaā Dios jeē sáha jeē váha yóhó.

<sup>30</sup> Chi je jíni yō jeē ni cáhān maá yá: Máa rí sáha jeē ndutahū i siquī cuéchi i, máa rí cuáha castigo i, áchí Jítóho yō. Te suni cáhān: Máa Jítóho yō sándaā yā siquī cuéchi ñayuu yā.

<sup>31</sup> Núu súcuan te xeēn ndasí cúu jeē quiví ñayuu ini ndaha Yaā Dios, Yaā técu, jeē ndútahū i siquī cuéchi i.

<sup>32</sup> Te na núcūhun ni rō ndese ni cuu ichi yátá, nde náa sá ní quejéé ró caca ró jíin luz yā, te ni cajendeyí ni rō ni candoho ró tijni jñúndóho xeēn.

<sup>33</sup> Chi sava ró ní cacahān neé i nuū rō te ni castóho i róhó ní cajito ñayuu. Te sava ga rō ni cajēhe ró jñūhun cuiñi ró jíin ñayuu ni candoho súcuan.

<sup>34</sup> Chi ni cacundáhú ni rō ñayuu ní cahīin vecāa jeē siquī yā, te ni cacusñi ni rō vésú ni caquende ñayuu ndajñíñu ró. Chi ni casáha ró cuenta jeē ndé andiví cáneváha ró iin tahū jeē váha ndasí gá jeē coo ní cáni.

<sup>35</sup> Núu súcuan te ma siaá rō jñūhun jeē ní candíje ndije ró jéé váha ni yā, chi cuehē ndasí táhū nihīn rō siquī ún.

<sup>36</sup> Chi cánuú jéé cuándeyí ni rō náváha sáha ró jéé nújnahan ni Yaā Dios, te nihīn rō jeē ni jéjñūhun ya.

<sup>37</sup> Chi cáhān tutu i:

ñin núnúu-ni te ndee Yaā ndiji, te ma cucuéé yá.

<sup>38</sup> Te ñayuu jeē ní ndahva rī cuéchi i, cotecu i jeē candíje i jeē sáha ri jehē i.

Te núu na cáca yátá i, te ma cúsiñi ni rī jíin i.

Achí Yaā Dios.

<sup>39</sup> Te yóhó tu cácuu yó jñáhan ñayuu cájica yátá jeē jnahnú ndetū i. Chi sa cácandíje yó jéé nihín tahū yō cotecu anuá yō.

### *Siquī jñūhun cándíje*

## 11

<sup>1</sup> Te jeē candíje yó, suu cúu jeē cúndaā ndije ni yō jeē nihín yō táca jéé ñūhun ni yō, jíin jéé jíni váha yó jéé iyó ndije táca jéé tu cájito yó nuū vijna.

<sup>2</sup> Te ñayuu jenahán chi ni jejnúhún yá i siquī jeē súcuan ni cacandíje nihin i.

<sup>3</sup> Siquī jeē candíje yó cúu jeē jécūhun ni yō jeē ni sáha Yaā Dios ñayiví jíin jñūhun ni cahán-ni ya. Te jíin poder Yaā Dios jeē tu jito yó núu, ni jecōo táca jéé jito yó núu.

<sup>4</sup> Ni candíje Abel jeē sáha ya jehē de, te jeē yúcuan ní socō de jeē váha ga nuū Yaā Dios vésú Caín. Te jeē yúcuan ní jejnúhún yá jeē iyó ndaa de, chi ni jetáhú yá jeē ní sócō de quiti nuu yā. Te vésú ni jihí de, te cáhān gā ejemplo de jíin yó nde vijna, chi ni candíje ndaa de.

<sup>5</sup> Ni candíje Enoc jeē sáha ya jehē de, te jeē yúcuan ní naquihin ya de cuahān de andiví, te tu ní jihí de. Te tu ní cánanihīn ñayuu de, chi ni ndoñhún-ni de

ni sáha ya. Te áchí tutu jeē nde ná tu naquihin ya de te ni cusī ni yā jíin táca jée ni sáha de.

<sup>6</sup> Te núu tu cándije yó jée sáha ya jehē yō, te tú na modo cusī ni Yāā Dios jíin yó. Chi ñayuu jeē cuní quívicoo ndaha ya, cánuú jée candíje ndaā i jeē iyó yá jíin jée cuáha ya tahū nuū ñayuu jeē nducú i candíje i ya.

<sup>7</sup> Te Noé ni candíje de jeē sáha Yāā Dios jehē de, ná ni castūhun yá nuū de jeē coo jnūndóho jee ná tu coto de jeē coo. Te jeē yúcuan ní jendetū de ni sáha de barco cáhnu jeē naní arca, návāha cācu de jíin ní vehe de. Te jeē súcuan ni candíje de, te ni cane cuēchi siquī ñayuu jeē tu ní cándije i ya. Te ni ndahva yā cuēchi de siquī jeē ní candíje de jeē sáha ya jehē de.

<sup>8</sup> Te Abraham ni candíje de jeē sáha ya jehē de, te jeē yúcuan ní jetáhú de ná ni cahān yā jíin de jeē quihín de ñn lugar nuū cuáha ya cuu tahū de. Te ni quenda de cuahān de, vēsú tu jíin de ndé nuū quihín de.

<sup>9</sup> Ni candíje de jeē sáha ya jehē de, te jeē yúcuan ní condee tatú de nuū ñūhun jeē ní jéjnūhun ya jeē cuáha ya nuū de. Te ni condee de vehe ñni, te suni súcuan Isaac jíin Jacob, chi sēhe de ún suni inuú nihīn tahū i jíin de jeē ní jéjnūhun ya.

<sup>10</sup> Chi ni ñūhun ni de condee de máá ñuu andiví jée iyó cutú cimientu, te máá Yāā Dios ni jequin yā ni sama ya ñuu ún.

<sup>11</sup> Te suni ni candíje máá Sara jeē sáha ya jehē ña, te jeē yúcuan ní nihīn ña fuerza jeē ní jecūhun sēhe ña. Chi nde ná ni yāha ndasí cuiyā ña, te ni cacu ñn sēhe yí ña, chi ni candíje ña jeē squícu Yāā Dios jeē ní jéjnūhun ya.

<sup>12</sup> Te súcuan ni cuu jeē ní táhū cuehē ñayuu ni sáha ñn-ni Abraham, vēsú je jéhnu ndasí de. Te yucūn de ni nducuehē ndasí, nájnūhun quīmi andiví, jíin ñíti yumar, jeē ma cúu cuíti cahu yó.

<sup>13</sup> Te táca tée cándije un, ní cajihī de. Te vēsú tu ní cájito de jeē ní jéjnūhun ya, te ni cajini vāha de jeē cóo, te ni cacusī ni de jeē cóto de ñga tiempo. Te súcuan ni cacahān de jeē ñayuu ñuu jicá ñayuu tatú cácuu de ñni ñayiví yāha.

<sup>14</sup> Te táca tée jeē cahān súcuan, chi stéén cají de jeē nducú de ñn ñuu jeē cúu andiví núu cúu ñuu maá de.

<sup>15</sup> Chi núu jeē cánacani ní de siquī ñuú nuū ní quendacoo de, te iyó modo jeē nándicó cóo de te núu jeē cácuu de núu.

<sup>16</sup> Te tuú chi ni cacuu ndasí ní de coyūcú de ñga ñuu vāha ga jeē cúu ñuu andiví. Jeē yúcuan tu cúcanu Yāā Dios jeē naní yá Yāā Dios de jíināhan de, chi je ni sátūhva ya ñn ñuu nuū cóyūcú de.

<sup>17</sup> Ni candíje Abraham jeē sáha ya jehē de, te jeē yúcuan ní jehēn de jíin Isaac jeē socó de i, ná ni jito ndee ya de. Te ni iyo tūhva de jeē socó de sēhe de un jée mañūhún ni i nuū de, vēsú ni nihīn de jnūhun jeē ní jéjnūhun ya suhva siquī i:

<sup>18</sup> Isaac cúu tēe jeē squejée rí yucūn rō quihīn, achí jnūhun ni jejnūhun ya.

<sup>19</sup> Te ni sáha de cuenta jeē cúu nastécu Yāā Dios i. Te nájnūhun súcuan ni cuu, chi cuu cahān yō jeē nájnūhun ni jihī i te ni natecu i nuū de, chi ni jesi-ni ya jeē ma cáhni de i.

<sup>20</sup> Ni candíje Isaac jeē sáha ya jehē de, te jeē yúcuan ní cahān de jeē vāha tahū nihīn sēhe de Jacob jíin Esaú tiempo quiji.

<sup>21</sup> Te suni súcuan ni candíje Jacob, te jeē yúcuan, náa je yajni cuu de te ni cahān de jeē vāha tahū nihīn ndindúú sēhe yí José. Te yítuu de vara de, ni chiñūhún de Yāā Dios.

<sup>22</sup> Te suni súcuan ni candíje José, te jeē yúcuan, náa cuacuyajni cuu de, te ni cahān de jeē táca yucūn Israel, ñn quiví quendacoo i nación Egipto. Te ni ndacu de jniñu jeē chindūji i yiqui de ñuu nuū quívicoo i.

23 Te ná ni cacu Moisés, te tátá i náná i ni cacandíje de jeē sāha ya jehē de, te jeē yúcuan ní cacondito sāhí de i unī yoō. Chi ni cajito de jeē lúu cáa i, te tu ní cáyūhú de siquī acta jeē ní sāha rey jeē na cúū tāca súchi yí.

24 Te suni súcuan ni candíje Moisés, te jeē yúcuan ná ni jehnu de te tuá ni jéhe de jnūhun cuu de sēhe ñahan cúu sēhe síhí rey Egipto.

25 Chi sa ni cuu ni de ndoho de jíin táca jnāhan de ñayuu Yaā Dios, nasūu jéē cusī ni de jecu-ni tiempo jíin cuéchi.

26 Chi ni sāha de cuenta jeē núu cahān neé ñayuu siquī de jeē siquī Cristo, te yúcuan sāha jeē cucá ndasí gá de ndíhi jeē ndíso jnūhun Yaā Dios, vēsú jeē nihín de ndíhi ndajníñu cucá íyó nación Egipto. Chi ni ñuhun ni de jeē cuáha ya tahū de.

27 Te jeē súcuan ni candíje de, jeē yúcuan ní quenda de nación Egipto cuahān de. Te tu ní yúhú de jeē quití ni rey nuū de. Chi ni íin nīhin de siquī jniñu sāha de, chi ni sāha de cuenta jeē je jíto de nuū Yaā jeē tu cúu coto yó núu vijna.

28 Te jeē súcuan ni candíje de, te jeē yúcuan ní cahān de jeē na cáhni ñayuu londe pascua. Te ni ndacu de jniñu jeē na cóso yuyú i niñí tī yehyí i, návāha núu na quíji ndajéhé jeē cáhni yā táca sēhe nuú ñayuu Egipto, te ma cáhni yā sēhe nuú ñayuu Israel.

29 Te siquī jeē ní cacandíje ñayuu Israel jeē sāha ya jehē i, te ni cayāha-ni i mēhñu Mar Rojo, chi ni nune ya te ni natūu-ni ñuhun íchi. Te suni súcuan ni cacuni tēe Egipto yāha de núu, te ni nandihyū-ni ndute siquī de ni cajihí de.

30 Ni cacandíje soldado jeē sāha ya jehē de, te jeē yúcuan ní cotúú jeē ní condúu ndihyú ñuu Jericó, ná ni cajicó ndúu de uxā quiví.

31 Te Rahab, vēsú ñahan tǎjni ni ni cuu ña, te ni candíje ña jeē sāha ya jehē ña. Te ni chindéé ñahán ña tēe Israel jeē ní quijicoo ni condéhé yuhu ndese íyó ñuu ña. Te jeē yúcuan tu ní jíhí ña jíin ñayuu nīhni ni ñuu ña ún.

32 ;Te ndé jnūhun ga cahān rī núu súcuan? Chi tuá na tiempo jeē nácani ga rī jnūhun Gedeón jíin Barac jíin Sansón jíin Jefté jíin David jíin Samuel jíin táca tēe ni canacani jnūhun ya nde jenahán.

33 Ni cacandíje de jeē sāha ya jehē de jíjnāhan de, te jeē yúcuan ní cacundeyí de ni canajni de táca ñuu náhnu, te vāha ni candacu de jniñu nuū, te ni chindéé ñahán yá de nájñuhun ni jejñuhun ya. Te nuū sava de ni jesí Yaā Dios yuhu ndícaha jeē tu ní cáyeji tī de.

34 Te sava de tu ní cáyú de sāha ñuhūn jeē cayú xeēn. Te sava de ni cácu de jeē tu ní jíhí de jíin espada. Te sava de ni nanihín ni de náa tuá fuerza de núu, te ndacuí teyí ní íyo de nuū guerra, te ni cacundeyí de siquī soldado táca ñuu jicá jéē jíto uhū ún de.

35 Te sava ñahan ni natecu sēhe ña jeē ni jíhí i.

Te sava ga ñayuu chi sa suhva ni candoho xeēn i nde ni cajihí i. Te tu ní cájēhe i jnūhun jeē siaá i jnūhun ya te cácu i, chi ni catee ni i jeē natecu i coyūcu váha ga i andiví.

36 Te sava ga i ni casácatā ñayuu nuū i, te ni cacani ñayuu i, te nde ni cacounhí cadena i ni cahíin i vecāa.

37 Te ni cajēhe yuū xini i, te ni cajehnde i jíin sierra, te ni cajito ndee i jíin jnúndóho, te ni cajehni i jíin espada. Ni cajica cuu i cháha chúcuan, te máá ññí lánchi máá ññí ndíxuhú ní cañuhun i. Ni candoho ndáhú i, ni cajito i jnúndóho, ni castóho ñayuu i.

<sup>38</sup> Vāha ndasí ñáyuu ni cacuu i jeē tú cuiti ñayuu ñayīvi súcuan, te vēsú súcuan te ni casáha ñayuu jeē ní cajica cuu i nuū ñūhun téhé jíin chíji yucu, ni cahīin i yaū cava jíin yāū ñuhun.

<sup>39</sup> Te tāca ñáyuu yáha, vēsú ni jejnūhún yá i jeē ní cacandíje ñihin i jeē sáha ya jehē i, te tu ní cájito i nuū jeē ní jejnūhun ya.

<sup>40</sup> Chi ni sātūhva Yaā Dios ñin jniñu vāha ga, te suu cúu jeē sáha Cristo jíin yó, návāha ñin cáhnu-ni ñihīn yō tahū yō jíin i, te jeē yúcuan cúu jeē ná tu ñihīn i ndīhi tahū i.

*Jeē na cócunuū yō nuū maá ñin-ni Jesús*

## 12

<sup>1</sup> Te iyó cuéhē ndasí ñáyuu un jēē ní cacandíje ñihin i jeē sáha ya jehē i, te nájñūhun ni jicó ndūū i yóhó, cástéén gā i nuū yō nde vijna jeē suni súcuan na cándíje yó. Núu súcuan te suni maá yó, na téjiyo yó tāca jēē sajnēñu jíin cuéchi jeē ní cáan yó jíin. Te na cuándeiyí ni yō cunu yó jíin carrera jeē ní jéhe ya jeē cunu yó.

<sup>2</sup> Te na cócunuū vāha yó Jesús, Yaā jeē ni scándíje yóhó te sáha ya jeē íje vāha yó jíin jñūhun ya nde jñu ije yó. Chi maá yá ni jendeyí ni yā ni ndoho ya jicā cruz. Te vēsú jñūhun canu cúu jeē súcuan cuu yā, te tu ní sáha ya cuenta. Chi ni ñūhun ni yā jeē sa cusī ndasí ni yā ná ni cuu ni ndoho ya. Yūcuán na te ni cucōo ya lado vāha mesa nuū ndácu Yaā Dios jniñu.

<sup>3</sup> Te na nácani ni rō ndese ni jendeyí ni yā ni ndoho ya jeē ni sáha ndevāha ñayuu iyó cuéchi jíin yá. Te súcuan te ma cuíta ró ni ma ndīnuu ni rō jíin jñúndóho.

<sup>4</sup> Chi ni ná tu ndoho ró jēē ndé cuu rō jeē cánducú ndéiyí ró snāā rō cuéchi.

<sup>5</sup> Te sanaa te je ni canaa ni rō jñūhun cáhán tutu īi, jeē stihví ni Yaā Dios rohó jēē cácuu ró séhe ya:

Séhē, ma quití ni rō jeē snahnú Jitoho yō rohó,  
te ni ma ndīnuu ni rō núu cáhán yā nuū rō.

<sup>6</sup> Chi Jitoho yō snahnú yā ñayuu jeē maní yā jíin,  
te jéhe ya castigo tāca jēē náquihin ya cuu séhe ya.

Achí tutu.

<sup>7</sup> Núu súcuan te na cuándeiyí ni rō jeē snahnú Yaā Dios rohó, chi sáha ya jíin ró nájñūhun sáha tátá jíin séhe. Chi tú na séhe iyó jēē tu snahnú tátá i.

<sup>8</sup> Te núu ma snahnú yā rohó, nájñūhun ndóho tāca séhe, núu súcuan te nájñūhun séhe ndáhú cácuu ró, nasūu séhe ndíje ya.

<sup>9</sup> Te tátá yō ñayīvi yáha, suni ni snahnú de yóhó, te ni īyo yíñūhún yó jíin de. Te nagā ni cuu jeē ma cuándetū yō nuū maá Tátá yō andívi jeē snahnú yā yohó, te cotecu yō ñí cáni.

<sup>10</sup> Te ndaā chi maá de ni casnahnú de yóhó jecu-ni quivī, ndese ni cuu ni maá de. Te maá yá chi snahnú yā yohó ñin modo jeē quéndōo vāha ga yō, návāha coo ndoo yó nájñūhun iyó ndoo maá yá.

<sup>11</sup> Te ndaā chi tu cácusī ni yō maá hora jeē ndóho yó castigo, chi sa cúcuíhyá ni yō. Te cúcuéé gá te cuni yō jeē ní quéndōo ndaā yō te coo ndeyí sī ni yō jeē ni snahnú yā yohó.

*Siquí ñáyuu jeē casquéhichī i jñūhun cáhán Yaā Dios*

<sup>12</sup> Núu súcuan te ma cóo ró nájñūhun tēē ni cuíta lí ndaha te quísi i xinī yití, chi sa ndacuī na sáha ró maá ró nuū jñúndóho.

13 Te sáha ró ichi ndóó caca ndaā rō, návāha nduvāha róhó jéē tu fuerza ini, jeē cácuu ró nájñūhun tēe chácuá jeē tu cúu caca vāha.

14 Te na cóndihvī ni rō jeē condee manī rō jín táca ñáyuu, jín jéē cóo ndoo coo ñ rō nuū yā. Chi ma cúu coto ni ññ ñayuu nuū maá Jítoho yō te núu tu iyó ndoo í.

15 Te coto má cáca yátá ni ññ ró te scuíta ró jñūhun jeē sáha Yaā Dios jeē váha róhó, návāha tú cuu ró nájñūhun ññ yucū uvuá jeē stfvi te sáha dañó jín cuéhē ñayuu.

16 Te ni ññ ró ma cáca jnéni. Te ni ma cóo jéē ni rō nuū Yaā Dios, nájñūhun ni iyo Esaú. Chi máá ññ cohō ndeyu ni jicān de nuū ññani de, ni sama de jín derecho de jeē cúu de sūchi núu, te súcuan ni xícó de derecho de.

17 Te cájini rō jeē cucuéé gá te ni cuni de jeē na cáhān tatá de jeē váha tahū nihñ de, te tu ní cúu, chi tuá ni táññhún Yaā Dios de. Chi tu ní nihñ jññū jeē ní nacani ní de, vésú ni nducú ndéyí de te nde ndahyú de.

18 Te róhó jijnáhan ró tu ní quíjicoo ró núu íyo cúu, nájñūhun iyo ni cuu máa yucu nuū ni jéhe ya ley yā nuū ñáyuu Israel. Chi ni cane yáññhún yucu Sinaí, te nee lúchi jnúú jito, te quée tachī xeén.

19 Te ni jecu trompeta, te ni cahān Yaā Dios. Te ñayuu jeē ní cajini sōho jeē cahán yā, ni cacahān ndahú i jeē ma cahán gá yā jín í.

20 Chi tu ní cúndeyí i jín jñūhun jeē ní ndacu ya jññū nuū i, chi ni cahān yā: Vésú ññ quiti-ni núu quívi ti yucu yáha, jini ññhún cuu tñ jín yúu chí jín lanza, achí yá.

21 Te siquī jeē íyo ndasí cúu jeē cájito i ún, te ni cahān Moisés: Quísi i ruhū jeē yuhú rí, achí de.

22 Te vijna róhó jéē cácan díje, tu ní quíjicoo ró núu yúcu yúcuan. Chi sa suhva nuū maá yucu Sion jín núu maá ññu Yaā Dios, Yaā técu, ni quívicoo ró. Te ññ un cúu Jerusalén jeē iyó andiví, nuū cáhīyo tútú cuéhē ndasí mil ndajéhe cáchiññhún Yaā Dios.

23 Te ni quívicoo ró núu cáyūcu tútú ñáyuu cácan díje jeē cácuu sēhe Yaā Dios, jeē iyó lista i andiví. Te ni quívicoo ró núu Yaā Dios, Yaā sándaā jññū ndihí ñayuu, jín núu cáhīyo ánuá ñayuu vāha jeē jé ni squéndōo ndaā yā í.

24 Te suni nuū maá Jesús, Yaā ndíso jññū siquī contrato jeē ní quívicoo ró. Te yahu ndasí gá jññū sáha niññ yā jeē ní jéti jeē ndáhva cuēchi yó, nasūu niññ Abel jeē ní jicān cuēchi.

25 Núu súcuan te coto má squéhichī rō jñūhun jeē cahán yā jín ró jijnáhan ró. Chi ñayuu jeē tu ní cájetáhú ná ni cahān yā jín i ññayiví yáha, tu ní cáca cu i. Te xeén gá ndoho yóhó te núu ma cuatáhú yó nuū yā jeē cahán yā nde ichi ándiví núu súcuan.

26 Te nde saá ní quísi i ññayiví jéē ni cáhān yā. Te vijna chi cáhān yā: ññ na jínu quísi rí ññayiví, te nasūu máa-ni ññayiví, chí suni táca jéē ññ andiví, achí yá.

27 Te jñūhun yáha jéē cahán, ññ na jínu, chí cúní cahān jeē téjiyo ya táca jéē tu íyo cutú, suu jeē ní cuvāha, návāha na quéndōo jeē cóo cutú ní cáni.

28 Núu súcuan te cuāha Yaā Dios ññ ññu nuū yō jeē cóo cutú ní cáni. Te jeē yúcuan, na nácuatáhú yó nuū yā, te na chíññhún yó yā, te na cóo yíññhún yó, návāha cusñ ni yā jín yó.

29 Chi Yaā Dios maá yó cúu nájñūhun ññ ññhún jeē snáá ndihí jeē neé.

*Ndese sáha yó te cusñ ni Yaā Dios*

## 13

<sup>1</sup> Ma jécuiñī rō jijnáhan ró jéē cundáhú ni rō hermano rō cácanđje.

<sup>2</sup> Conahán ró jeē cánuú cuáha núu ró vehe nuū ñáyuu cájica. Chi iyó jínu jeē súcuan ni cajēhe núu ñáyuu vehe, te tu ní cájini i jeē nuū maá ndajéhé andiví ni cajēhe núu i vehe.

<sup>3</sup> Te conahán ró chindéé ñáhán ró ñáyuu cáhīn vecāa, chi sáha ró cuenta jeē nájnūhun cáhīn cáhnu ró jíin i vecāa. Te suni nacani ni rō jehē jnáhan ró jéē cándoho i sáha ñáyuu, chi núu súcuan coo jíin máá ró te suni ndoho ró.

<sup>4</sup> Coo yññuhún ró síquī jnúhun quíjnáhan ñáyuu, te ma cosíquí ndéē jnáhan ró. Chi máá Yaā Dios sándaā yā cuēchi ñáyuu tijni ni jíin ñáyuu casíquí ndéē jnáhan.

<sup>5</sup> Te ma ndíyo ni rō xūhún, chi na cóo sñ ni rō jíin jeē cánevāha ró. Chi máá yá ni cahān: Ma siaá cuiti rī rohó, ni ma stóo cuiti rī rohó, áchí yá.

<sup>6</sup> Núu súcuan te ma ñin jeē cáni ni yō, chi cuu cahān yō:

Máá Jítóho rī chindéé ñáhán yá ruhū,  
te ma yūhu rí núu na vé cuní ñáyuu sáha i jíin rí.

Achí yō.

<sup>7</sup> Te na núcūhun ni rō táca pastor rō, jeē ní castéén de jnúhun Yaā Dios nuū rō. Te sáha vāha ró cuenta ndese ni nihīn jñíñu jeē ní casáha de, te na ndácu ró de jeē ní cacandíje de jeē sáha ya jehē de.

<sup>8</sup> Te Jesucristo chi ñin-ni cáa ya ichi yátá jíin vijna jíin ní cáni.

<sup>9</sup> Núu súcuan te ma cuáha ró jnúhun candíje ró táca jnúhun jeē sñn cáhán jeē tu quíjnáhan jíin jnúhun máá yá. Chi iyó váha jeē na íje ánuá yō sáha jnúhun jeē váha ni yā jíin yō. Te tu jíni ññuhún yó jnúhun jeē tajnúni síquī jeē yéji yō, chi tu nihīn jñíñu cuiti jíin ñáyuu cáhīn jíin.

<sup>10</sup> Te máá yó chi cánevāha yó ñin jeē ni sócō máá jéhē yō, cúu Cristo. Te táca sūtū jeē cáscōō gā de modo jeē cahán ley jenahán, tú na vé nihīn de nuū yā jeē ni sócō yā máá yá.

<sup>11</sup> Te sutū cujéñnu ga, ná ni socō de ññī táca quiti ini cuarto ñi gā jeē síquī cuēchi, te yiqui cúñu ñi ni cajehmu de ichi yátá ñuu.

<sup>12</sup> Te suni súcuan ni ndoho máá Jesús ichi yátá ñuu, návāha jíin ññī máá yá te sándoo ya ñáyuu.

<sup>13</sup> Núu súcuan te ma cóo inuú gá ni yō jíin ñáyuu tu cacandíje, chi nájnūhun quihīn yō jíin yá ichi yátá ñuu, te na ndóho yó jíin yá jeē sácatā ñi.

<sup>14</sup> Chi ñayñvi yáha tu iyó ñuu nuū coo yó ní cáni, chi sa cánducú yó máá ñuu nuū cóyūcu yó quiví quíji.

<sup>15</sup> Núu súcuan te jeē jíin Jesucristo te níni na cáhán yō jeē yóhoyo cújéñnu Yaā Dios, chi suu cúu nájnūhun ñin jeē sócō yō nuū yā, suu jeē nácuatáhú yó nuū yā.

<sup>16</sup> Te ma náā ni rō sáha vāha ró núu jnáhan ró, te cuáha ró jéē cúmanī nuū ñi. Chi nájnūhun ñin jeē cáscōō rō nuū Yaā Dios cúu táca jéē yáha, te cúsnī ni yā jíin.

<sup>17</sup> Te cuandíje ró núu tēe cácuu pastor rō, te cuandetū rō nuū de. Chi cándito de róho jéē quéndoo vāha ánuá rō, chi cájini de jeē cánuú nacuáha de cuenta nuū yā. Te condihvi ni rō sáha vāha ró, návāha cusñi ni de síquī rō te ma cucuihyá ni de síquī rō. Chi núu tu súcuan te ma cóo jeē váha jíin ró.

<sup>18</sup> Te cacān tahú rō jehē rī jijnáhan rī. Chi váha iyó ni anuá rī jeē tú na cuēchi rī. Chi cácani rī caca yññuhún rī jíin táca jñíñu.

<sup>19</sup> Te suni cáhán ndahú rī jíin ró jeē cacān tahū ndasí ró jehē máá rí, návāha cuáha ya jnúhun jeē yachí gā cuajeē tucu rī nuū rō.

*Bendición jiín saludo jeē sándihí*

<sup>20</sup> Te máá Yaā jeē jéhe jnūhun ndeyí s̄h̄ ni nuū yō, ni nastécu yā Jitoho yō Jesucristo mehñu ndíyí. Te Jesús cúu pastor cujéhnu jeē ndíto ñayuu cácuu nájnūhun lanchi ya. Chi jiín níñi yā ni sácutú yā contrato jeé yá jeē coo ní cáni.

<sup>21</sup> Te ñúhun ni rí jeē Yaā Dios na sáha ya jeē ije ni rō jijnáhan ró, návāha cuu sáha ró táca jniñu váha ndese nújnahan ni yā. Te ñúhun ni rí jeē jiín fuerza Jesucristo jeē ndeé yá ini yō, na sáha Yaā Dios jeē cuu yó ñáyuu cúsh̄ ni yā jiín. Te na cáhán yō jeē yóhyo luu cujéhnu ya ní cáni. Amén.

<sup>22</sup> Hermano jijnáhan ró, cáhán ndahú rí jiín ró jeē cone cáhnu ni rō jeē stihví ni rí rohó jiín jecu-ni jnūhun ni tee ri nuū carta yáha.

<sup>23</sup> Te cástūhun rí jeē hermano yō Timoteo, je ni quenda de vecāa. Te núu yachí quiiji de yāhá, te cuajecoo ndindúú rí nuū rō coto jnáhan yó.

<sup>24</sup> Te cahān rō jiín táca téé cácuu pastor rō jiín táca hermano cácandíje jeē sándeýí ni de, áchí rí. Te ñayuu Italia suni cácahān i jeē sándeýí ni rō.

<sup>25</sup> Te ñúhun ni rí jeē na sáha ga Yaā Dios jeē váha róhó jijnáhan ró. Súcuan na cóo. Amén.



## CARTA JEE NI TEE SANTIAGO NUU ÑAYUU CACANDIJE

<sup>1</sup> Máá rí cúu Santiago, mozo Yaā Dios jín Jítoho yō Jesucristo. Te tée ri carta yáha cuájeē nuū rohó ñayuu cacandíje jeē cácuu ró ndihúxí uū yucūn Israel, te ni cajitē núu ró ní ñáyiví. Sándeýí ni ró jijnáhan ró.

### *Yaā Dios sáha jeē jécūhun ni yō*

<sup>2</sup> Ñání mání, na cúsi ndasí ni ró jijnáhan ró núu quiji tijni táca jnūndóho siquī rō.

<sup>3</sup> Chi cájini ró jeē núu jíto ndee jnūndóho rōhó núu cacandíje vāha ró, te yūcuan sáha jeē cútūhva ró cuándeyí ni ró.

<sup>4</sup> Te na cuándeyí ni ró nde ije vāha ró jín, návāha cuu sáha ró ndihi jniñu vāha, te ma cúmaní jeē squícu vāha ró núu yā.

<sup>5</sup> Te núu ndé ñn ró cúmaní jecūhun ni ró caca ndíchí ró jín jnúhun Yaā Dios, na cácan ró nuū yā, te sáha ya jeē jécūhun ni ró. Chi sáha ya ndihi jeē cájicān ñayuu, te tu cúxeēn yā nuū i jeē jicán i.

<sup>6</sup> Te jeē jicán rō, te cánuú candíje ró jéē sáha ya jeē jicán rō, te ma cáni siquī ni ró. Chí ñayuu jéni siquí ni, cúu i nájnūhun ndute mar jeē ndóna jísó cóyo cuahān cháha chúcuan sáha tachí.

<sup>7</sup> Nayuu ún ma cáni ni i jeē sáha Jítoho yō jeē jicán i.

<sup>8</sup> Chí ñayuu jeē jéni ñn jéni uū ní, chí mání násāma ni i jín táca jniñu cásáha i.

<sup>9</sup> Tācá hermano ndahú, na cúsi ni de jeē sáha Yaā Dios jeē cujéhu de.

<sup>10</sup> Te hermano cucá, na cúsi ni de núu ni ndundáhú de. Chí táca téē cucá, yachí naa jeē cucá de, nájnūhun náā ita yucū.

<sup>11</sup> Chí núu ni cane niāndii te cújihní, te íchí-ni yucū, te cóyo-ni ita, te náa-ni jeē lúu cáa. Te suni súcuan ndoho táca téē cucá níni sá jicu de jín jniñu de.

### *Siquí jeē jíto ndee jnūndóho yóhó*

<sup>12</sup> Yóhō ndetū téē jeē jéndeýí ni de núu jíto ndee jnūndóho de. Chi núu je ni cundeýí de jín, te nihin de premio jeē cujéhu de cotecu de ní cáni. Chí súcuan ni jejnūhun Yaā Dios jeē cuáha ya nuū ñayuu jeē maní jín yā.

<sup>13</sup> Núu ñn ñayuu jicán ini i jeē sáha i cuēchi, te ma cáni ni i jeē nuū Yaā Dios vēji jeē jicán sáha i cuēchi. Chí ni ñn ma cúu cuiti sáha jeē quívi Yaā Dios cuēchi, te ni máá yá tu squívi ya ni ñn ñayuu nuū cuēchi.

<sup>14</sup> Chí sa suhva jeē ndíyo néé ni máá i, suu sáha jeē jicán ini i sáha i cuēchi, te scánda ini i chí stáhú un i.

<sup>15</sup> Te jeē ndíyo néé ni i, yūcuan quéjéé cuēchi. Te cuēchi ún, núu je ni cunihin, te sáha jeē jnahnú ndetū ñayuu.

<sup>16</sup> Núu súcuan te ma stívi ró cani ni ró jijnáhan ró, ñání mání.

<sup>17</sup> Táca jéē cútahū yō jeē vāha jeē lúu iyó, chí vēji nde andiví núu máá Yaā Dios, Yaā ni sáha táca jéē ndíndeē ñn andiví. Te máá yá tu násāma cuiti ini yā nájnūhun násāma nduva jín cuándahū.

<sup>18</sup> Te ni sáha ya jeē cótecu yō ní cáni, chí ni candíje yó jnúhun ndaā yā. Te ni nduu yó nájnūhun sēhe nuū yá nuū táca gá sēhe ya jeē quíji, chí súcuan ni nujnahan ni yā sáha ya.

### *Siquí ndese chíñhún ndáa yō yā*

19 Núu súcuan te tāca róhó ñánī mánī, ñama na chúsóhó ró jnūhun ya, te sa suhva ma cahán yachī rō, ni ma quití yachī ni rō.

20 Chi ñayuu cáquití ni, tu sáha i jniñu ndaā jeē cuní Yaā Dios.

21 Núu súcuan te na siáá rō tācá jniñu jnéhén jíin jniñu neé jéē ni cáyá jíin rō. Te na cóo vītá ni rō te cuatáhú ró jnūhun ya jeē ni quívi ini anuá rō. Chi jnūhun un ndíso poder jeē cácu ánuá rō.

22 Te na squícu ró jéē steén jnūhun ún, te nasūu máá jéē cúnī sōho ró súcuan-ni, chí núu súcuan te cástáhú ró maá ró, chí tu níhín jniñu núu tu squícu ró.

23 Chi tēe jeē jíni sōho de jnūhun ya súcuan-ni, te tu squícu de, cúu de nájnūhun ñin tēe jeē jíto de nuū espejo ndese cáa nuū de.

24 Te jíto vāha de nuū de, te cuahān-ni de, te nāā ni de ndese cáa nuū de.

25 Te núu ñin tēe tu nāā ni de jnūhun jíni sōho de, chí sa suhva chūhun vāha ni de jeē cahán maá ley ndaā Jesús jeē ni sáha libre yohó, te núu cuiñi níhin de jíin, te squícu de jeē ndácu, yūcuán na te quéndōo ndetū de jíin jniñu vāha jeē sáha de.

26 Te núu ndé ñin ró jéni ni rō jeē chiñúhún vāha ró Yaā Dios, te núu tu ndíto ró yáá ró, núu súcuan te stáhú ró maá ró, te tu ndé jéjníñu jeē chiñúhún ró yā.

27 Ñayuu jeē chiñúhún ndoo chíñúhún ndaā i máá Tátá yō Yaā Dios, chí jniñu yáha sáha i: Chíndéé ñáhán i sūchi ní caquendōo ndáhú jíin ñahan ní caquendōo ndáhú, núu na-ni jnūndóho íyó. Te tu sájnéhén i ánuá i jíin jniñu neé íyó ñáyívi.

### *Ma cúhichī ni yō coto yó ñayuu ndahú*

## 2

1 Ñánī mánī, cácanjíe ró Jítoho yō Jesucristo jeē cujéhnu luu ya. Núu súcuan te ma sáha ró cuenta ndese cúu ñin ñin ñayuu, chí inuú sáha ró jíin ndíhi i.

2 Chí íyó jínu quívi ñin tēe ini vehe nuū cándutútú ró, te yñi xehyu oro ndaha de, te ñūhun de sahma vāha. Te suni íyó jínu quívi ñin tēe ndáhú, te ñūhun de sahma tahndé.

3 Te tú vāha núu sáha yíñúhún ró jíin tēe ñūhun sahma vāha, te cahān rō jíin de: Cucōo ní lugar vāha yáhá. Te cahān rō jíin tēe ndáhú: Yūcuán cuiñi ní, chí yáha cucōo ní nuū ñūhun, achi rō.

4 Chí núu cásáha ró súcuan, te tu jéni vāha ni rō siquī jnāhan ró, chí sñn sáha ró jíin tēe cúcá jíin tēe ndáhú.

5 Ñánī mánī, chusóhó ró jnūhun cahán rī: Yaā Dios ni nacāji ya ñayuu ndahú ini ñayívi yáha jéē cóo cúcá i jíin jnūhun cácanjíe i ya, te níhín i tahū i ñuu nuū ndácu ya jniñu. Chí ni jéjnūhun ya cuāha ya un núu ñayuu jeē maní jíin yá.

6 Te máá ró chí sa suhva cájēhe ró jnūhun canu ñayuu ndahú. ¿Te á násūu tēe cúcá cúu jeē castáhú róhó síquī jeē níhín de xūhun ró, te yachī jéquin de cuēchi síquī rō nuū tohó?

7 Te suni cácahān neé de síquī Cristo, te suu síhví máá yá cúu jeē cánani ró cristiano.

8 Vāha cásáha ró te núu cásquícu ndije ró máá jnūhun jéhnu ga jeē cahán ley, nájnūhun yósó núu tútu ñi: Cundáhú ni rō jnāhan ró nájnūhun cundáhú ni rō maá ró, achi.

9 Te núu sñn sáha ró jíin ñayuu cúcá jíin ñayuu ndahú, núu súcuan te cuēchi cásáha ró, te jécondee cuēchi síquī rō jeē stívi ró ley Yaā Dios.

10 Chi núu ñn ñayuu stívi i ñn-ni jniñu ndácu ley, te vésu na squícu i ndihí ga, te nájnūhun ni stívi i ndihí ley, te ndihí un jécondee cuēchi siquī i.

11 Chi Yaā jeē ni cáhān jeē ma cósiquí ndéē jnáhan ró, suni ni cahān yā jeē ma cáhni rō ndīyi. Te vésu tu ní cásiquí ndéē jnáhan ró, te núu ni jehni rō ndīyi, núu súcuan te je ni stívi ndihí ró ley.

12 Te tāca jéē cahán rō jíin jéē sáha ró, chi sáha ró cuenta jeē sándaā yā ndihí un jíin máá ley Jesús jeē ni sáha libre rohó.

13 Chi quiví sándaā yā jniñu, te ñayuu jeē tu ní cundáhú ni jnáhan, suni ma nihín i jnūhun cundáhú ni. Te ñayuu ní cundáhú ni jnáhan, cusī ni i jeē ní ndahva yā cuēchi i máá quiví sándaā yā jniñu.

### *Tu jéjníñu jeē candíje yó núu tu squícu yó*

14 Ñānī mánī, núu cáhān ñn tēe jeē candíje de jeē sáha ya jehē de, te núu tu sáha de jniñu váha, ¿te ndé jéjníñu jeē candíje de ún? ¿A cuu cācu ánuá de jíin jéē cahán-ni de jeē candíje de, te núu tu sáha de jniñu váha?

15 Te núu ñn hermano yō chí hermana yō, cúmanī sahma i jíin jéē cáji i tāca quívī,

16 te núu ñn ró cáhān jíin i: Cuandeyí ni rō, te cusúcun váha ró te caji váha ró, achi rō jíin i, te núu tu ní jéhe ro jéē jíni ñūhún i cotecu i, ¿te ndé jéjníñu jeē cahán rō súcuan?

17 Te suni súcuan cúu jeē núu áchí ró jeē candíje ró jeē sáha ya jehē rō, te núu tu sáha ró jniñu váha, núu súcuan te tu ndé jéjníñu cuiti jeē cahán-ni ró jéē candíje ró.

18 Te sanaa te cahān ñn ñayuu: Róhó chi cándíje ró jéē sáha ya jehē rō, te ruhū chi sáha ri jniñu váha. ¿Na jíin stéén rō jeē candíje ró jeē sáha ya jehē rō, te núu tú na jniñu váha sáha ró? Te ruhū chi sáha ri jniñu váha te súcuan stéén rī jeē candíje ri jeē sáha ya jehē rī.

19 Ndaā chi cándíje ró jeē iyó ñn-ni Yaā Dios. Te va iyó váha núu súcuan. Te tachī chi suni súcuan cácandíje, te cáquisi i jeē cáyūhú, chi tu cásáha jniñu váha.

20 ¿Te naun tu jécūhun ni rō? ¿A tu jíni rō jeē núu tu sáha ró jniñu váha, te tu ndé jéjníñu cuiti jeē cahán rō jeē candíje ró?

21 Te jíi yō Abraham, ni ndahva yā cuēchi de siquī jeē ni sáha de jniñu váha. Chi ni jetáhú de jeē ni cáhān yā jeē cahni de sēhe de Isaac socó de i nuū altar.

22 Te jécūhun ni rō jeē siquī jeē ní candíje de jeē sáha ya jeē ni jéjnūhun ya nuū de, jeē yúcuan ní jetáhú de jeē ni cáhān yā jeē socó de sēhe de. Te jeē ní jetáhú de, suu ni steén jeē candíje ndije de jeē sáha ya jeē ni jéjnūhun ya nuū de.

23 Te súcuan ni cundaā jnūhun cáhān tutu īi: Abraham ni candíje de jeē ni jéjnūhun ya nuū de, te jeē yúcuan ní ndahva yā cuēchi de, áchí tutu. Te ni conanī de amigo Yaā Dios.

24 Núu súcuan te je ni cajini rō jeē ndáhva Yaā Dios cuēchi ñayuu jeē casáha i jniñu váha siquī jeē cácandíje i jeē sáha ya jehē i, te nasūu máá jéē cahán-ni i jeē candíje i.

25 Te suni súcuan Rahab, vésu ñahan tíjni ni ni cuu ña xīhna gā, te ni ndahva yā cuēchi ña siquī jeē ni sáha ña jniñu váha. Chi ni jéhe núu ña vehe nuū tāca mozo ni tají Josué, te ni chuhichí ña de inga ichi, návāha cācu de nuū téé cánducú cahni de. Te jeē yúcuan ní ndahva Yaā Dios cuēchi ña.

<sup>26</sup> Te ñin ñayuu núu tuá anuá i nuū yiqui cúñu i, te ndīyí cúu i. Te suni súcuan núu cándije yó jeē sāha ya jehē yō, te núu tu sāha yó jniñu váha, te nájñuhun ndīyí cúu yó.

*Jñuhun siquī yaá yó*

**3**

<sup>1</sup> Ñánī mánī, ma cáni ni cuehē rō cuu ró maestro steén jñuhun ya. Chi cájini rō jeē yóhó jéē steén jñuhun, cuehē gā cuēchi ndenehen ya siquī yō.

<sup>2</sup> Chi ndīhi yó stívi cuēhē jniñu. Te núu ñin tēe cuu condito de yáa de jeē ma stívi de jíin ni ñin jeē cahán de, núu súcuan te yōhyo vāha tēe cúu de, te suni cuu condito de ní gá de jeē ma stívi de.

<sup>3</sup> Chi cúu nájñuhun jeē chíhi yó freno yuhu caballo, te súcuan snáhnú yō ní tī jeē quihín tī jíin yó ndé nuū cuní yō.

<sup>4</sup> Te suni súcuan tāca barco, vēsú náhnú ndasí, te vēsú nīhin chúndahá táchī, te jíin ñin tímón lulí-ni te cuu scuicó tēe scáca, te quihín de jíin ndé nuū cuní de.

<sup>5</sup> Te suni súcuan cúu yáa yó, chi vēsú lulí-ni, te cuehē teyí sāha yó jíin. Te suni jíin yó jeē ñin ñuhūn lulí cuu jñi jeē cayú ñin yucu cáhnú ndasí.

<sup>6</sup> Te suni súcuan yáa yó, chi sāha nájñuhun ñin ñuhūn, chi scuíquín cuehē teyí jniñu néé. Te yáa yó cúu ñin parte lulí yiqui cúñu yō, te sāha jeē quívi ní yó cuēchi. Te infierno cúu jeē scuíquín jñuhun néé jíin yáa yó, te yáa yó scuíquín cuehē jniñu néé ní tiempo jeē iyó yó ñi ñayīvi.

<sup>7</sup> Te ñayuu chi cuu snáhnú i tācá quití jíin saa jíin cóo jíin quití ñuhūn nuū mar, te je ni snahnú i cuehē tī.

<sup>8</sup> Te ni ñin ñayuu ma cúu condito i yáa i. Chi ñin jeē neé jéē ma cúu condito i cúu. Te nájñuhun yuhu cóo jeē ñuhūn chitú veneno jeē jéñi, súcuan cúu yáa yó.

<sup>9</sup> Jíin yáa yó chíñuhún yó Tatá yō Yaā Dios, te suni jíin yáa yó cahán ndevāha yo siquī ñayuu jeē ni sāha ya ánuá i nájñuhun iyó máa yá.

<sup>10</sup> ñin-ni yuhu cáne jñuhun chíñuhún yó yá jíin jñuhūn cáhán ndevāha yó. Ñánī mánī, tu iyó váha cuiti jeē súcuan.

<sup>11</sup> ¿A ñin-ni tesōcó cáne ndute váha jíin ndute úvuá, chí naún?

<sup>12</sup> Ñánī mánī, ¿á cuu cuun ndehē oliva xinī yūjnu higo, te á cuu cuun ndehē higo xinī yoyúcú uva, chí naún? Te suni súcuan ñin tesōcó ma cúu cane ndute úhvuá jíin ndute váha.

*Jñuhun ndíchí jéē véji nuū Yaā Dios*

<sup>13</sup> Te núu ndé ñin ró ndíchí te jécūhun vāha ni, núu súcuan te jíin jéē jíca ndaā rō steén rō jeē súcuan cúu ró. Te na cóo suchí ni rō modo jeē jéhe jñuhun ndíchí yá.

<sup>14</sup> Te núu cácuésún teyí ni rō te ndúcú ró jéē cujéñu máa ró, núu súcuan te ma cutéyí ró caní ni rō jeē ndíchí ró. Chi suu cúu jeē stahú ró, te cúu ró contra siquī jñuhun ndaā.

<sup>15</sup> Chi ñayuu cándāa súcuan, nasūu núu Yaā Dios véji jeē ndíchí i. Chi cuenta ñayīvi, jíin cuenta anuá neé ñayuu, jíin cuenta máa jéxeén cúu.

<sup>16</sup> Chi nuū iyó ñayuu cucuésún ni jíin ñayuu nducú jéē cujéñu máa, suni yūcuan iyó jñuhūn sáca núu jíin táca jniñu néé.

<sup>17</sup> Te jñuhūn ndíchí jeē véji nuū Yaā Dios, núu ni sāha jeē ní ndundíchí ñayuu, yūcuán na te iyó ndoo ánuá i. Te suni yúcu maní i jíin jñáhan i, te vítá ni i, te tú

nĩhni ni i. Te cundáhú ni i jnánhan i, te sáha i jniñu váha. Te suni iyó ndáa i, te tu stáhú i.

<sup>18</sup> Te ñayuu cáyūcu manĩ jĩn jnánhan, jĩn jnũhun manĩ casáha i tǎcǎ jniñu ndaā, te nanihĩn i jeē quéndōo ndaā i.

*Jeē ma cutóo ni yō jeē iyó ini ñayĩví*

## 4

<sup>1</sup> ¿Te ndese quéjéé jeē cájejnánhan ró jĩn jeē cátejnánhan ró? Quéjéé síquĩ jeē cándiyo néé ni rō, te yōhyo scánda ini anuá rō.

<sup>2</sup> Chi cándiyo ni rō, te tu cáneváha ró, te suu sáha jeē cájehni rō ndĩyĩ. Cándiyo ni rō jeē névaha jnánhan ró, te tu nihĩn rō, te suu sáha jeē cátejnánhan ró te cájejnánhan ró. Te tu cánihĩn rō jeē cuní rō, chi tu cájicǎn rō nuũ Yaā Dios.

<sup>3</sup> Te núu cájicǎn rō, te tu cánihĩn rō, chi tu cájicǎn váha ró, chi manĩ jeē cusĩ ni maá ró cúu jeē cájicǎn rō nuũ yā.

<sup>4</sup> Ñayuu castóo Yaā Dios cácuu ró. ¿A tu cájini rō jeē núu cutóo ni rō jeē iyó ini ñayĩví, yūcuan cúu jeē cájito uhũ rō Yaā Dios? Chi ñayuu jeē cutóo ni jeē iyó ñayĩví, ndúu i ñayuu jĩto uhũ nuũ Yaā Dios.

<sup>5</sup> Te tu cáhán saá-ni jnũhun yáha jeē yosó núu tútu iĩ: Máa Espĩritu jeē ni jéhe Yaā Dios jeē ndeé ini yō, cúcuĩñĩ ni yā jeē súcuan casáha yó, chi manĩ yā jĩn yó, achí.

<sup>6</sup> Te jeē váha ni Yaā Dios, te jéhe ya fuerza ini yō jeē ma sáha yó súcuan. Chi cáhán tutu iĩ: Yaā Dios jesi yā nuũ ñayuu casáha téyĩ máa, te váha ni yā chindéé ñáhán yá ñayuu casáha suchí máa, achí.

<sup>7</sup> Núu súcuan te cuandetũ rō nuũ Yaā Dios. Te cuiñĩ nihĩn ró jeē ma cuátáhú ró jexeén, te cunu coto róhó jijnánhan ró.

<sup>8</sup> Manĩ gǎ coo ró jĩn Yaā Dios, te víhyá gǎ steen yā jeē manĩ yā jĩn ró. Róhó jeē casáha cuéchi, na sándoo ró máa ró, stóo ró cuéchi. Te róhó jeē cácuni rō coo manĩ rō jĩn Yaā Dios níni jeē cácuni rō cutóo ni rō jeē iyó ini ñayĩví, na sándoo ró ánuá rō jeē tuá coo ró súcuan.

<sup>9</sup> Na jnáhuhũ ni rō, te cucuíhyá ni rō, te na ndáhyú rō síquĩ jeē iyó cuéchi ró. Te vēsú ni cajecũ rō, te vijna na ndáhyú cohó ró. Te vēsú ni cacusĩ ni rō, te vijna na ndúcuĩhyá ni rō.

<sup>10</sup> Na sásuchí ró maá ró nuũ Yaā Dios, te sájéhnu ya rohó.

*Ma cóndihvĩ ni yō síquĩ cuéchi jnánhan yó*

<sup>11</sup> Hermano jijnánhan ró, ma cahán neé ró síquĩ jnánhan ró. Chi tēe jeē cahán neé síquĩ jnánhan, chí jeē ndihví ni síquĩ cuéchi jnánhan, nájñũhun jeē síquĩ ley yā cahán neé de, chí tu squĩcu de ley jeē cundáhú ni yō jnánhan yó, te nájñũhun cahán de jeē tu iyó ndáa ley yā. Te núu cahán rō jeē tu iyó ndáa ley yā, núu súcuan te nasũu jeē squĩcu ró, chí sa jeē cahán rō síquĩ.

<sup>12</sup> Iyó ĩn-ni Yaā jeē ni jéhe ley, te máa-ni ya cúu jeē sándaā síquĩ cuéchi. Te jnama ya ñayuu cácandĩje te snáhnũ ndetũ yā ñayuu tu cácandĩje. Núu súcuan ¿te na jniñu ndĩso ró jeē sándaā rō síquĩ jnánhan ró?

*Tú vāha jeē satéyĩ yó maá yó*

<sup>13</sup> Vijna te cáhán rĩ jĩn róhó jeē cácahān: Vijna chí sájnē te quihĩn yō ñuu yúcuau, te coyūcu yó ĩn cuiyā, te cuaan yó xico yó, te nihĩn yō síquĩ, achí ró.

<sup>14</sup> Te tu jínĩ cuiĩ rō ndese coo sajnē. ¿Chi na vé va víhĩ cúu vida rō? Cúu nájñũhun ĩn vicō nũhũn jéé ĩn núnúu-ni núcũhun, te yūcuán na te ndéchĩ-ni cuahān.

<sup>15</sup> Chi sa vāha ga na cāhān rō: Nūu cūnī maá Jítóho yō te cotecu yō te sāha yō jée yāha chí jée yúcuan, achi rō.

<sup>16</sup> Te sa suhva māni cácutéyí ni rō cácahān rō. Te tú vāha jeē súcuan cácutéyí ni rō.

<sup>17</sup> Te nūu ñn ñayuu jiní i sāha i jniñu vāha, te nūu tu sāha i, te cuēchi cúu nūu súcuan.

### *Jñuhun cāhān nuū tēe cúcá*

## 5

<sup>1</sup> Te cāhān rī jiní táca róhó tēe cúcá, jée na ndáhyú rō te ndahyū cohó ró siquī jñundóho jeē quíji nuū rō.

<sup>2</sup> Chi ndajniñu cúcá cánevāha ró, je téhyú. Te sahma vāha ró, je tēe tiquixin.

<sup>3</sup> Te oro jiní plata cánevāha ró, chí je cáne xehyu. Te xehyu un stéén jeē ní casáha ró jniñu stáhú jiní xuhun rō. Te yúcuan cúu jeē ndúñihin cuēchi siquī rō, nájñuhun ñn ñuhūn jeē snáa yiqui cúñu rō. Chi ní cacaya cuehē rō ndajniñu vāha quiví cuándihí yāha.

<sup>4</sup> Te táca tēe ni cajehnde trigo rō, tu ní cáchunaa vāha ró yāhu de. Te vijna cácana jee de nuū Yaā Dios, Yaā cúu Jítóho nuū táca ndajéhé andiví, jeē súcuan ní casáha ró. Te jiní sōho ya jeē cácana jee tēe ni cajehnde ún.

<sup>5</sup> Cátecú vāha ndasí ró ñni ñayiví yāha, te casáha ró táca jée cácusñ ni maá ró. Te cájito yúcún ró maá ró, te cúu ró nájñuhun quiti néñu jeē ndétu quiví cúu.

<sup>6</sup> Te ni catee ró cuēchi siquī ñayuu ndaā, te nde ni cajehni rō i. Te tu ní cúu casi i jeē casáha ró.

### *Jeē na cóo paciencia ni yō te cacān tahú yō*

<sup>7</sup> Hermano, nūu súcuan te coo paciencia ni rō condetu ró ndé quiví ndiji maá Jítóho yō. Tēe sájniñu ñuhun, cánuú coo paciencia ni de condetu de nde quíji saū néhen jiní saū néñu isa, te sáa te nihñ de nuní vāha jeē jéhe itu.

<sup>8</sup> Te suni súcuan coo paciencia ni rō, te ndeyí coo ni rō condetu ró, chí cuacuyajni ndee maá Jítóho yō.

<sup>9</sup> Te ma cahán sōo ró siquī jeē sāha jnāhan ró, hermano, návāha ma jécondee cuēchi siquī rō. Chi maá Yaā jeē sándaā cuēchi, je yajni ndiji ya.

<sup>10</sup> Ñānī mánī, conahan ró jijnāhan ró ndese ni casáha tēe ni canacani jñuhun maá Jítóho yō nde jenahán, chí ni cacuu de ñn ejemplo nuū yō. Chi vēsú ni candoho de, te ni Iyo paciencia ni de.

<sup>11</sup> Te cāhān yō jeē ñayuu cájendeyí ni jiní jñundóho, ndetū cúu i sāha Yaā Dios. Chi ní cajini ró jñuhun ndese ni jendeyí ni Job jiní jñundóho, te suni cájini rō jeē yóhoyo vāha ga ni quendōo de ni sāha maá Jítóho yō ná ni yāha jñundóho. Chi yóhoyo cúndáhú ni yā yohó, te vāha ndasí ni yā jiní yō.

<sup>12</sup> Ñānī mánī, jeē cánuú gá cúu jeē ma cahán cāha ró sihví Yaā Dios jiní jñuhun cácahān teyí ró. Ma cahán rō verdad de Dios, Yaā ndeé andiví, ni ma cahán rō verdad de Dios, Yaā chíí ñayiví, te ni ñn ga jñuhun súcuan ma cahán teyí ró. Chi nūu cahān rō jeē cuu, te súcuan-ni cahān rō. Te nūu cahān rō jeē tuú, te súcuan-ni cahān rō, ma scáa gā rō cahān rō, návāha ma ndénehen Yaā Dios cuēchi siquī rō.

<sup>13</sup> Te nūu íyó ñn ró jée ndóho jñundóho, te na cácan tahú rō. Te nūu íyó ñn ró jée cúsní ni, te na cáta ró yaa jeē chiñúhún ró yá.

<sup>14</sup> Te núu íyó ñn ró jéē cuhú, te na cána ró tēe jéhnú cándito ñayuu cácañdije. Te na cácañ tahu de jehē ñayuu cuhú. Te jíín síhví máá Jítoho yō na chíhi de aceite i.

<sup>15</sup> Te núu cácañdije de jeē sáha Jítoho yō jeē cájicāñ tahu de, yūcuáñ na te jnama ya ñayuu cuhú. Chí nasávāha ya i, te núu ní sáha i cuēchi, te cone cáhnu ní yā nuū i.

<sup>16</sup> Núu súcuan te nacani ndaā rō cuēchi ró núu jnáhan ró, te cacāñ tahu rō jehē jnáhan ró návāha nduvāha ró jíjñáhan ró. Chí núu ñn tēe ndaā ndíhví ní de jíicāñ tahu de, te yōhyo vāha níhín jníñu, chí sáha ya jeē jíicāñ de.

<sup>17</sup> Chí Elías, tēe ní nacani jñūhun Yaā Dios jenahán, suni ñn tēe jeē nájnūhun íyó máá yó ní cuu de. Te ní jíicāñ tahu ndasí de jeē ma cúun saū, te tu ní cúun saū uní cuiyā íñu yoō.

<sup>18</sup> Yūcuáñ na te ní jíicāñ tahu tucu de, te ní cuun saū, te ní canecoo tucu tāca jéē jéhe ñuhun.

<sup>19</sup> Ñání mání, núu ñn ró ní stóo ichi ndaā, te núu inga rō nachuhichí ró jnáhan ró,

<sup>20</sup> núu súcuan te cuni rō jeē núu ní nachuhichí ró tēe ní quíhví cuēchi, te je ní jnama ró de jeē jnahnú ndetū de núu, te súcuan íyó jñūhun cáhnu ní nuū cuēhē cuēchi de.

## CARTA HN JEE NI TEE SAN PEDRO APOSTOL NUU ÑAYUU CACANDIJE

<sup>1</sup> Máá rí cúu Pedro, apóstol jeē ní tají Jesucristo, te tée ri carta yáha cuájeē nuū rohó ñayuu ní cajité núu, te cáyūcu jíca ró ní Ponto, Galacia, Capadocia, Asia, jíin Bitinia.

<sup>2</sup> Te máá Tátá yō Yaā Dios ni nacāji ya rohó, chi súcuan ni tee ni yā nde ná tu jecōo ñayiví. Te jíin Espíritu Santo ni sáha ya jeē iyó ndoo íyó íi ró cájetáhú ró núu yā, te ni nacate ya anuá ró jíin níñi Jesucristo. Te ñúhun ni rí jeē na cáya gā táca jéē váha jeē sáha ya rohó, jíin jéē coo ndeyí coo sī ni ró jijnáhan ró.

*Jeē ñúhun ni yō táca jéē váha jeē cóo andiví*

<sup>3</sup> Na cáhan yō jeē yóhoyo cújéhu Yaā Dios, Yaā cúu Tátá máá Jítoho yō Jesucristo. Chi ni cundáhú ndasí ni yā yohó, te ni sáha ya jeē ní nacacu jeē yó, siquī jeē ní natecu Jesucristo mēhñu ndíyi. Te jeē yúcuan níni cáñuhun ni yō táca jéē váha jeē coo.

<sup>4</sup> Chi nihīn ró tahū jeē ñúhun váha ini andiví jeē cúu ró jijnáhan ró. Te tahū un má náā cuiti, ni ma tívi cuiti, ni ma ndíhi cuiti.

<sup>5</sup> Chi cávandje ró jéē sáha Yaā Dios jehē ró, te jeē yúcuan ndíto ya rohó jíin poder yā, náváha jnama ya rohó quíví sándihí, chi ni sándaá yā jeē súcuan coo.

<sup>6</sup> Jeē yúcuan cácusī ndasí ni ró, vēsú cájito ró cuéhē ndinuū jnūndóho jecu-ni quíví.

<sup>7</sup> Chi nájnūhun jeē stuhvá ñayuu oro jíin ñúhūn, jíto ndee i núu jeē váha cúu, suni súcuan cánuú coto ndee jnūndóho róhó núu cávandje nihin ró chí tuú. Chi jeē cávandje nihin ró, chi yahu ndasí gá cúu vēsú oro, ndajníñu jeē náā. Te yúcuan cúu jeē cuajnúhūn yá rohó, te sájéhu ya rohó, te squéndōo yífúhūn yá rohó quíví quenda ndijin Jesucristo.

<sup>8</sup> Te vēsú tu ní cájito ró núu yā, te cáhīyo manī ndasí ró jíin yá. Te cávandje nihin ró yá vēsú tu cájito ró núu yā vijna. Te yóhoyo luu cácusī ndasí ni ró, chí nde tuá níhín cuiti yō jnūhun castūhun yó ndese cúsi ni yō.

<sup>9</sup> Te nihīn tahú ró jeē cácu ánuá ró, chi jeē yúcuan cúu jeē cávandje ró.

<sup>10</sup> Te tée ni canacani jnūhun Yaā Dios nde jenahán, ni cananducú yúcún de ni cacajnúhun váha de siquī jnūhun ndese jnama ya yohó. Te ni cacachi de ndese sáha Yaā Dios jeē váha róhó jijnáhan ró.

<sup>11</sup> Chi nde ná tu coo, te ni steén Espíritu Cristo nuū de jijnáhan de ndese quiiji jnūndóho siquī Cristo jíin ndese luu ndujéhu tucu ya jeē yáha jnūndóho ún. Te ni cananducú yúcún de jeē na jécūhun ni de ndé quíví quiiji Cristo te ndese coo táca jéē ni cáhān máá Espíritu jeē ndeé ini de.

<sup>12</sup> Te ni steén Yaā Dios nuū de jeē násūu máá de coto jniñu jeē ní canacani de ún, chi sa máá yó cúu jeē cóto. Te vijna je ni cajini sōho máá ró jnūhun ún, chí táca tée nácani jnūhun jnama ya yohó, ni canacani de nuū ró, ni sáha poder Espíritu Santo jeē ní quiiji ichi andiví. Te jnūhun ún chi nde máá ndajéhé Yaā Dios cánanducú náváha na jécūhun ni.

*Cúni yā jeē coo ndoo ánuá yō*

<sup>13</sup> Jeē yúcuan ndíto na cóo xinī ró jijnáhan ró, te cáji coo ni ró. Te cocuhun ndasí ni ró jeē níhín ró táca jéē váha jeē sáha Yaā Dios rohó quíví quenda ndijin Jesucristo.



14 Te na cúu ró séhe jeē cájetáhú váha. Te ma sáha ga rō tācá jniñu jeē ní cacusī ni rō sáha ró nde ná tu jecūhun ni rō jñūhun Yaā Dios.

15 Chi sa suhva na cóo ndoo ánuá rō jíin táca jniñu cásáha ró, chi Yaā ní cana rohó, Yaā iyó ndoo cúu ya.

16 Chi súcuan cáhán tutu iī: Na cóo ndoo ró jíjnáhan ró, chi ruhū iyó ndoo ri, achí yá.

17 Te núu cácahān rō Tatá rō jíin Yaā Dios, núu súcuan te na cáca yíñúhún ró nuū yā tāca quivī jéē cájica ró ñayivī yáha. Chi máá yá sándaā síquī ndese ni casáha iin iin yó, te tu sáha ya cuenta ndese cúu iin iin yó, chi inuū sáha ya jíin ndihí yó.

18 Chi ni jnama ya rohó núu tācá costumbre jeē ní cajequin jíi rō, jeē ní cajejníñu cáha ró núu. Te cájini váha ró jéē yahu cúu jeē ní jnama ya rohó. Chi tu ní chúnaa yā jíin ndajníñu jeē náá, nájnūhun oro jíin plata,

19 chi sa suhva jíin níñi Cristo jeē yáhu ndasí gá cúu. Chi ni socō yā máá yá nájnūhun iin londe, quiti íyó váha íyó ndoo.

20 Chi jeē yúcuan ní jeni Yaā Dios maá Cristo nde ná tu jecōo ñayivī, te ni cane ndijin Cristo maá tiempo cuándihí yáha, náváha quendōo váha ánuá rō jíjnáhan ró.

21 Te jeē jíin Cristo te cácañdije ró Yaā Dios. Chi ní sáha Yaā Dios jeē ní natecu yā mehñu ndíyí jíin jéē ní ndujéñu ya. Te jeē yúcuan cácañdije ró Yaā Dios, te cáñuhun ni rō coto ró yá.

22 Te vijna chi je ni candundoo ánuá rō, chi ni cajetáhú ró jñūhun ndaā ní sáha Espíritu jíin ró, náváha cundáhú ndije ni rō hermano cácañdije. Núu súcuan te na cundáhú ndasí ni rō jnáhan ró nde jíin ini jíin ánuá rō.

23 Chi je ni canacacu jeé ró, te nasūu chíji yucūn ñayuu jeé cúu. Chi sa jñūhun Yaā Dios jeé ndito técu ní cáni ní sáha jeé ní nacacu ró.

24 Chi súcuan cáhán tutu iī: Nájnūhun yucū cúu ndihí táca ñáyuu, chi jecu-ni quivī técu i. Te nájnūhun ita yucū cúu jeé cujéñu i. Chi íchí-ni yucū, te ndáhvá-ni ita.

25 Te jñūhun Jitoho yō Yaā Dios, sa quéndōo ní cáni.

Achí tutu. Te jñūhun un cúu máá jñūhun jnáma ya yohó jéē ní canacani ri nuū rō.

## 2

1 Núu súcuan te na siáá rō tācá jniñu neé, táca jéē stahú, jéē tú ndije, jeé cucuésún ní, jíin jéē sajnúhún síquī jnáhan.

2 Te nájnūhun sūchi yíquín sá ní cacu jeé jéxin te jéñu, súcuan na cóndihvī ni rō scuáha ró jñūhun ndaā yā, náváha cuehnu ró jíin te cācu ánuá rō.

3 Chi je cájini rō jeé yóhyo váha ní máá Jitoho yō.

### *Cristo cúu nájnūhun yuū yítuu vehe*

4 Núu súcuan te manī gā coo ró jíjnáhan ró jíin Jitoho yō Cristo. Chi cácuu ró nájnūhun templo nuū ndeé Yaā Dios, chi ndeé yá ini anuá rō. Te Cristo cúu nájnūhun iin yuū cánuú gá jeé yítuu yíquī templo, te sáha ya jeé cótecu rō níí cáni. Te ñayuu vésú ní casquéhichí i ya, te Yaā Dios chi je ni nacāji ya Cristo chí cánuú ndasí yá, nájnūhun nácāji yó iin yuū váha jeé quítuu yíquī vehe.

5 Te máá ró chí cácuu ró nájnūhun iin iin yuū jeé cúváha templo Yaā Dios, te cotecu rō níí cáni. Te na cuáha ró jñūhun jeé sama ya rohó jíjnáhan ró jéē cúváha templo yā, cúu jeé ndeé Espíritu yā ini anuá rō nájnūhun ini iin templo.

Te suni cúní Yaā Dios jeē cuu ró sūtū cáhīyo ndoo cájejnīñu nuū yā. Chi siquī jeē ni sāha Jesucristo jehē rō, te na sócō rō maá ró jeē cuajniñu ró núu yā sāha ró táca jniñu váha jeē nújnahan ni Yaā Dios.

<sup>6</sup> Chi súcuan cáhán tutu iī:

Vijna te nde ñuu rī Sion jéquin rī ñin yuū jeē cánuú gá jeē quítuu yiquī vehe, chí ni nacāji rī yā nájñuhun ñin yuū váha jeē cánuú téyí.

Te ñayuu jeē candíje i ya, jnama nahín yá i.

Achí Yaā Dios, áchí tutu.

<sup>7</sup> Te maá ró jeē cácandíje ró, chi yuū váha jeē cánuú téyí cúu ya nuū rō. Te nuū ñáyuu tu cácandíje chi tuú, chí sa cúndaā jeē cahán tutu iī:

Maá yúu jeē ní casquéhichī tēe cásama vehe,

suu cúu yuū cánuú gá yítuu yiquī vehe.

<sup>8</sup> Te suni cúndaā jñuhun jeē cahán tutu siquī ñayuu tu cácandíje:

Cúu ya nájñuhun ñin yuū jeē cácachihī i jehē i,

nájñuhun toto jeē cotúú i sāha.

Achí. Chi jeē cácachihī i jehē i cúu jeē casánihni ni i nuū jñuhun ya. Te je ni cundaā jeē jñahnú ndetū i siquī jeē cáacunihni ni i.

### *Jñuhun ñayuu maá Yaā Dios*

<sup>9</sup> Te maá ró cácuu ñayuu jeē ní nacāji Yaā Dios. Te suni cácuu ró sūtū cájejnīñu nuū maá Yaā cúu Rey, te ñayuu cáhīyo ndoo, jíin ñáyuu maá yá cácuu ró. Súcuan ni sāha Yaā Dios rohó návāha nacani ró jñuhun ndese yōhyo jéñu jniñu sāha ya, chí maá yá ni cana róhó ná ni coyūcu ró nájñuhun nuū néé. Te ni squívicoo ya rohó núu luz yā jeē yóhyo váha stéén yā ini anuá rō.

<sup>10</sup> Chi nde saá te nasūu ñáyuu Yaā Dios cácuu ró, te vijna je ni nduu ró ñáyuu maá yá. Te nde saá chí ná tu cundáhú ni yā rohó, te vijna je cundáhú ni yā rohó jíjnahan ró.

### *Jeē cuajniñu váha yó núu Yaā Dios*

<sup>11</sup> Ñānī mánī, ini ñayīvi yáha cácuu ró nájñuhun ñayuu ñuu jicá jéē cájica cuu tátú. Núu súcuan te cáhán ndahú rī jíin ró jéē ma sāha ró táca jniñu jeē ndíyo néé ni rō jíin modo maá ró. Chi táca un cájejnahan jíin ró, ndúcú jéē jñahnú ndetū anuá rō.

<sup>12</sup> Te ndaā na cáca ró méhñu ñáyuu tu jíin jñuhun Yaā Dios. Chi vésú cácahān i siquī rō, nájñuhun cácahān i siquī ñáyuu casáha jniñu néé, te núu na cóto i jniñu váha casáha ró, te quivī sándaā Yaā Dios jniñu te cahān i jeē yóhyo cújéñu ya.

<sup>13</sup> Jeē siquī maá Jítoho yō te cuatáhú ró nuū táca tóhō cándiso jniñu nuū ñáyuu. Cuatáhú ró nuū maá rey, chí tēe cújéñu ga cúu de.

<sup>14</sup> Te cuatáhú ró nuū táca gobernador jeē ní jeni rey návāha stóho de ñayuu casáha jniñu néé te cuajnúhūn de ñayuu casáha jniñu váha.

<sup>15</sup> Chi cúní Yaā Dios jeē sāha ró jniñu váha, te jeē súcuan sāha ró te táca ñáyuu canéé jéē tu cájecūhun ni, casi i yuhu i.

<sup>16</sup> Te na cáca ndaā rō jeē cácuu ró ñáyuu ni nduu libre anuá, te nasūu jéē ní nduu libre rō jeē sāha ró jniñu néé. Chí sa cácuu ró mozo Yaā Dios, te cuajniñu váha ró núu yā.

<sup>17</sup> Coo respeto rō nuū táca ñáyuu. Cundáhú ni rō hermano cácandíje. Conso iyo ró núu Yaā Dios. Coo yíñuhún ró nuū maá rey.

### *Jeē na ndóho yó jehē jñahan yó nájñuhun ni ndoho Cristo*

<sup>18</sup> Róhó jéē cácuu mozo, cuatáhú ró nuū patrón rō, te coo respeto rō nuū de. Te nasūu máá-ni nuū tēe váha ni jíin tēe vítā ni, chí suni nuū tēe xeēn ni.

19 Chi ñin jeē váha cúu núu jéndeýí ni ñin tēe jeē stóho cāha ñáyuu de siquí jeē squícu de nuū Yaā Dios.

20 Chi núu cástóho i róhó jéē casáha ró cuēchi, te ni ñin ma cuajnúhún róhó núu jéndeýí ni rō jíin jeē ndóho ró. Te núu cástóho i róhó jéē casáha ró jniñu váha, te núu jéndeýí ni rō jíin, yāha cúu jeē váha jeē nújnahan ni Yaā Dios.

21 Chi jeē yúcuan cúu jeē ní cana ya rohó jíjnahan ró. Chi suni máa Cristo ni ndoho ya jeē siquí rō, te súcuan ni cuu ya ñin ejemplo nuū rō jeē na ndóho ró jéhē jnahan ró, te súcuan condiquín rō ichi ya.

22 Te máa yá tú cuiti na cuēchi ní sáha ya, ni tú cuiti na jnūhun stáhú ní cáhán yā.

23 Ná ni cacahān neé i nuū yā, te tu ní nácahān neé yá. Te ná ni castóho i ya, te tu ní téjnahan ya jíin i, chi sa ni chihi ya máa yá ndaha Yaā Dios, Yaā sándaā váha siquí ndihí ún.

24 Te ni condiso máa Cristo cuēchi yó jíin yiquí cúñu yā ná ni jihí yā jicā cruz, návāha quenda yó chíji cuēchi te caca ndaā yō. Chi ni tují yā, te jeē yúcuan ní canduvāha ánuá rō.

25 Chi ni casana ró nájnūhun lanchi, te vijna je ni candicó ró ni ndāvícoo ró núu Cristo, Yaā cúu pastor rō te ndíto váha ya anuá rō.

*Ndese cánuú coyūcu váha yí jíin ñasihí*

### 3

1 Suni súcuan róhó ñasihí jíjnahan ró, cuatáhú ró nuū yí rō, návāha núu cúu de tēe tu cándíje jnūhun ya, te cuu scándíje ró de, jeē tuá niní jíin jéē cahán rō, chi máa jíin jéē casáha váha ró.

2 Chi cuni de jeē cájica ndaā rō te cáhīyo respeto rō.

3 Te jeē casáha luu ró máa rō, chi nasūu máni máa ichi síquí rō sáha ró, jeē sáha luu ndasi ró xiní rō, chí jéē cúhun ró síquí oro chí sahma váha ga.

4 Chi sa nducú ró jeē quéndōo luu ánuá rō, te coo luu ró ñin modo jeē ma náā cuiti, suu jeē cóo vítá ní rō te coo nahín ni rō. Chi yāha cúu jeē yahu ndasi gá nuū Yaā Dios.

5 Chi ñahan ní cahīyo ndoo ánuá nde jenahán, suni súcuan ni casáha luu ña ánuá ña. Chi ní cañuhun ni ña Yaā Dios, te ni cajetáhú ña nuū yí ña.

6 Te súcuan ni sáha Sara, chi ni jetáhú ña nuū yí ña Abraham, te ni cahān yíñuhún ña jíin de. Te róhó jíjnahan ró, núu sáha váha ró te núu ma yūhu ró ni ñin, yūcuán na te coo ró nájnūhun ni iyo Sara.

7 Te suni súcuan róhó yí, na cóo vítá ní rō jíin ñasihí ró. Te yíñuhún coo ró jíin ña, siquí jeē núu ga fuerza ña vēsú rohó, te suni siquí jeē inuú ní canihín tahú rō cotecu rō ní cáni siquí jeē váha ni Yaā Dios. Te súcuan sáha ró návāha tú casi nuū jnūhun jícan tahú rō.

*Jnūhun ñayuu cándoho siquí jeē cájica ndaā*

8 Núu súcuan te inuú na cáni ní rō jíjnahan ró, te cucuíhyá ni rō jeē ndóho jnahan ró, te cundáhú ni rō i nájnūhun ñani rō. Te na cóo maní rō te cani suchí ni rō.

9 Núu casáha neé ñáyuu jíin ró, te ma nasáha neé ró jíin i. Te núu cacahān neé i nuū rō, te ma nácahān neé ró núu i. Chi sa suhva cacān tahú rō jeē na quéndōo váha i. Chi Yaā Dios ni cana ya rohó jéē suni súcuan quéndōo váha ró.

10 Chi súcuan cáhán tutu ñi:  
Ñayuu cácuni cotecu váha te cusí ni táca quíví,  
na cóto i yuhu i jeē ma cáhán neé i,

te na cóto i jeē ma cáhán i jñūhun stáhú.

<sup>11</sup> Na cújiyo i nuū jniñu neé, te na sáha i jniñu váha.

Na ndúcú i coyūcu mánī i, te na cóndihvī ni i jíin.

<sup>12</sup> Chi máá Jítoho yō ndító ya ñayuu ndaā,

te jíni nahín yá jeē cájicān tahú i.

Te ñayuu casáha jniñu neé, chi tu jétáhú yá i.

Achí tutu.

<sup>13</sup> Te ni ñin ma sáha neé jíin ró te núu mánī jniñu váha cándihvī ni rō sáha ró.

<sup>14</sup> Te vēsú núu ndóho ró síquī jeē cájica ndaā rō, te yōhoyo ndetū cácuu ró. Núu súcuan te ma yūhu ró coto ró i, ni ma cunéé ni rō.

<sup>15</sup> Chi sa jíin ini jíin ánuá rō chiñúhún ró maá Jítoho yō Cristo. Te níní coo tūhva ró nastió cuñī vīta ró te cahān yiñúhún ró jíin ñayuu jeē castichí rohó síquī táca jée cáñuhun ni rō.

<sup>16</sup> Te caca ndaā rō jeē tú na cuēchi condee anuá rō, návāha ñayuu cácahān neé síquī rō, cucanu i jeē ni stáu yáhu i róhó jée cájica ndaā rō chi cácanđje ró Cristo.

<sup>17</sup> Chi núu cúní Yaā Dios te váha ga jeē ndóho ró síquī jeē casáha ró jniñu váha vēsú síquī núu sáha ró jniñu neé.

<sup>18</sup> Chi máá Cristo suni ni ndoho ya, te ñin jínu-ni ni jihī yā jeē síquī cuéchi ndihī yó. Yaā váha cúu ya, te ni ndoho ya jehē yohó ñayuu ní casáha jniñu neé, návāha quñvicoo yó núu Yaā Dios sáha ya. Chi ni jihī yiqui cúñu yā, te ánuá yā chi técu-ni ní cáni.

<sup>19</sup> Te ná ni jihī yā te ni jehēn anuá yā ni nacani ya jñūhun nuū anuá ñayuu cáyindihyū.

<sup>20</sup> Chi nde jenhán tu ní cájetáhú i, ná ni ñyo paciencia ni Yaā Dios te ni condetu ya níní sáha Noé barco jeē naní arca. Te jíin arca un ní cācu jecu-ni ñayuu, chi unā-ni i ni cācu nuū ndúte.

<sup>21</sup> Te nájnūhun ni cacācu i nuū ndúte, súcuan cúu jeē jéndute yó vijna te cácu ánuá yō. Te jeē jéndute yó, nasūu jée ndúndoo yiqui cúñu yō, chi sa jeē jícan yō nuū Yaā Dios jeē ndúndoo ánuá yō. Te súcuan te cācu yó, chi ni cundúú yó jíin Jesucristo nuū jñūhun ni natecu yā.

<sup>22</sup> Te ni ndaa ya cuanuhun yā andiví, te ndéé yá ichi ndáváha Yaā Dios nuū cujéhnū ya. Te táca ndajéhé andiví, jíin jée cándacu jniñu, jíin jée cájni poder, cájendetū nuū yā.

*Jeē na cuájniñu yó jíin táhū jeē ni jéhe ya nuū yō*

## 4

<sup>1</sup> Núu súcuan te nájnūhun ni ndoho Cristo jehē yō jíin yiqui cúñu yā, suni súcuan na táva ni maá ró ndoho ró. Chi ñayuu jeē ní ndoho jíin yiqui cúñu, tuá sáha i cuéchi.

<sup>2</sup> Núu súcuan te ní tiempo jeē cuahán gā rō, na sáha ró jniñu jeē cuní Yaā Dios, te ma sáha ga rō jniñu jeē ndíyo neé ni rō jíin modo maá ró.

<sup>3</sup> Chi nde ní véji ró, te ni casáha ró cuéhē cuéchi jeē cánujnahan ni rō síquī jeē tu ní cájini rō jñūhun Yaā Dios. Te tiempo un mánī máá jée neé ni casáha ró, te ni candiyo ni rō táca jée neé, ni canajini ró, ni casáha ró vico neé, ni cajihī ndasí ró nuū vico ró, te ni cachíñúhún ró ídolo jeē ni cáhān Yaā Dios jeē ma chíñúhún yó.

<sup>4</sup> Te cáacunéé ni i jeē tuá cájica ró jíin i jeē sáha ró táca cuéchi xeēn jíin i. Te jeē yúcuan cúu jeē cácahān neé i síquī rō.

<sup>5</sup> Te máá i chi ñn quiv̄i te nacuāha i cuenta nuū maá Yaā jeē iyó túhva ya sándaā yā jniñu ñayuu técu jíin ñáyuu ní cajih̄i.

<sup>6</sup> Chi jeē yúcuau suni ni quiji jñūhun vāha ya nuū tāca ndíyi ná ni cotecu i. Te ni cundaā siqūi cuēchi ni casáha i ñayiv̄i yáha, nájnūhun cūndaā siqūi ndihi ñayuu, návāha nacani ni i te cotecu anuá i ñí cáni nájnūhun técu Yaā Dios.

<sup>7</sup> Te je cuacuyajni quiv̄i jeē nāā tāca jéē iyó. Núu súcuau te ndito na cóo xin̄i rō jijnáhan rō, te condih̄vi ni rō cacān tahū rō.

<sup>8</sup> Te jeē cánuú gá cúu jeē cundáhú ndas̄i ni rō jnáhan rō. Chi núu cundáhú ni yō jnáhan yó, te iyó jnúhun cáhnu ni nuū cuehē cuēchi.

<sup>9</sup> Sáha vāha rō jíin ñáyuu jeē jin̄i i vehe rō, te ma cúxi ni rō.

<sup>10</sup> Tāca rō cuajniñu rō núu jnáhan rō, núu ndese iyó máá táhū rō jeē ni jéhe Yaā Dios jeē cuajniñu rō núu yā. Te sqūicu vāha rō jíin táhū jeē s̄in s̄in ni jéhe ya nuū ñn ñn rō.

<sup>11</sup> Núu tahū jeē nácani rō jnúhun cúu, te na cáhán rō nájnūhun jeē maá Yaā Dios cahán. Te núu tahū jeē chindéé ñáhán rō jnáhan rō cúu, te na sáha rō jíin fuerza jeē ni jéhe ya nuū rō, návāha jíin ndihi jeē casáha rō te cahán ñayuu jeē yóhoyo cújéhnu Yaā Dios siqūi jeē ni sáha ya jíin Jesucristo. Te na cáhán yō jeē luu cújéhnu Cristo te jñá ya poder ñí cáni. Amén.

### *Jeē ndóho yó siqūi jeē candíje yó Cristo*

<sup>12</sup> Ñān̄i mán̄i, núu vēji jñūndóho xeēn jeē coto ndee rohó, te ma cunéé ni rō cani ni rō jeē maá rō ni nih̄in jñūndóho xeēn gā.

<sup>13</sup> Chi sa cus̄i ni rō jeē cándoho rō jecu jñūndóho jeē ní ndoho Cristo, návāha suni cus̄i ndas̄i ni rō quiv̄i quéndā ndijin̄i yā jeē cújéhnu luu ya.

<sup>14</sup> Te yóhoyo ndetū ni rō núu cácahān neé i nuū rō siqūi jeē cándíje rō Cristo. Chi máá Espiritu Yaā Dios jeē cújéhnu ndas̄i, ndéé yá ini rō. Máá i chi cácahān neé i siqūi yā, te máá rō chí cáchiñúhún rō yā.

<sup>15</sup> Te núu ndoho rō, te na ndóho rō siqūi jeē cándíje rō Cristo. Te ma ndóho rō siqūi tāca cuēchi nájnūhun cándoho ñayuu jéhni ndíyi, ñayuu sacuíhná, ñayuu sáha jniñu neé, jíin ñáyuu quiv̄i nduu nuū jniñu jnáhan jeē tu cánuú quiv̄i nduu.

<sup>16</sup> Te sa núu ñn rō ndóho siqūi jeē candíje rō Cristo, te ma cúcanu rō, chí sa nacuatáhú rō nuū Yaā Dios siqūi jeē cúu rō cristiano.

<sup>17</sup> Chi je ni jin̄i quiv̄i jeē quejéé sándaā Yaā Dios cuēchi, te x̄ihna gā ñayuu cácuu sēhe ya sándaā yā cuēchi. Te núu x̄ihna gā cuēchi máá yó quejéé yá sándaā yā, núu súcuau te xeēn gā coo jeē ndénehen ya cuēchi siqūi ñáyuu jeē tu ní jétáhú jnúhun vāha ya.

<sup>18</sup> Te núu yóhoyo ȳi cácu ñayuu vāha, núu súcuau ¿te ndese cácu ñayuu casáha jniñu neé jíin táca cuēchi?

<sup>19</sup> Núu súcuau te rōhó jéē cándoho siqūi jeē súcuau cúni Yaā Dios, ma jécuiñ̄i rō sáha rō jniñu vāha, te na chíhi rō máá rō ndaha máá Yaā jeē ni sáha rōhó, chí sqūicu ya jeē ni jéjnūhun ya.

### *Jeē jéhe de consejo ñayuu cácdíje*

## 5

<sup>1</sup> Vijna te na cáhán r̄i jíin táca rōhó téé jéhnu cándito ñayuu cácdíje, chí suni téé jéhnu ndíto ñayuu cácdíje cúu máá r̄i. Te cúu r̄i testigo jeē ní jito r̄i ndese ni ndoho Cristo. Te suni ndujéhnu r̄i jíin rō sáha Cristo quiv̄i quéndā ndijin̄i yā.

<sup>2</sup> Na cóto yúcún rō ñayuu jeē ndeé jniñu rō condito rō, jeē cácuu i nájnūhun lanchi Yaā Dios. Te na cus̄i ni rō condito rō i, chí súcuau cúni Yaā Dios. Te

nasūu síquī jeē sáfuerza yā rohó, ni nasūu síquī jeē nihín rō xūhún, chi sa síquī jeē cuní rō cuajniñu rō.

<sup>3</sup> Te nasūu jeē ndacu nihin rō jniñu nuū ñáyuu cándito rō, chi sa nducú rō cuu rō ñin ejemplo nuū i jeē cácuu i lanchi ya.

<sup>4</sup> Yūcuán na te quiví quénda ndijin maá Yaā cúu Pastor cujéñnu nuū rohó téé cácuu pastor lanchi ya, te cuáha ya premio nuū rō jijnáhan rō jéé yóhyo luu te ma náa cuiñi.

<sup>5</sup> Te suni róhó táca téé suchí, na cuándetū rō nuū táca téé jéñnu jiñā. Te ndihi róhó ñáyuu cácañdeje, cuandetū rō nuū jnáhan rō, te caní suchí ni rō. Chi suhva cáhán tutu:

Yaā Dios jési yā nuū ñáyuu casáha téyí máá,  
te vāha ni yā chíndéé ñáhan yá ñayuu casáha suchí máá.

Achí.

<sup>6</sup> Núu súcuan te na cáni suchí ni rō, chi cáyihí rō ndaha Yaā Dios jeē jñí poder. Te sájéñnu ya rohó, na jínú maá quiví.

<sup>7</sup> Táca jéé cánacani ndasí ni rō síquī, chihi rō ndaha máá yá te máá yá coto, chi ndíto ya rohó.

<sup>8</sup> Te cáji na cóo xiní rō te ndito coo ni rō. Chi jexeén jeē jító uhū rohó, jíca cuu ndúcú squiví róhó jijnáhan rō núu cuéchi. Te xeñ gā sáha vēsú ndicaha jeē Iyo ndáhyú.

<sup>9</sup> Te cuiñi nihin rō jéé ma cúndeyí jexeén jiín rō, te nihin candíje rō jnúhun cúndáhú ni yā rohó. Chi cájini rō jeē suni súcuan cándoho hermano rō jeé cáyūcu ní cáhnu ñayiví.

<sup>10</sup> Te núu ni jínu jeē ndoho rō jecu-ni tiempo, te Yaā Dios chi sáha ya jeé ije vāha ni rō jiín jnúhun ya, jiín jéé cuiñi nihin rō, te cuáha ya fuerza ini rō, te quendōo cutú rō ní cáni. Chi máá yá cúu jeé sáha táca jéé vāha yóhó, te ni cana ya yohó jéé cujéñnu luu yó jiín yá ní cáni, síquī jeé nduú yó jiín Jesucristo.

<sup>11</sup> Te na cáhán yō jeé yóhyo luu cújéñnu ya te jñí ya poder ní cáni. Amén.

### *Saludo jeé sándihí*

<sup>12</sup> Jíni rí jeé Silvano cúu ñin hermano jeé squícu vāha. Te máá de cuajeē nuū rō jiín carta yáha jéé ní tee rí jecu jnúhun. Te jiín yáha stñví ni rí rohó, te cáhán rí jiín rō jeé ndaá cúu jeé táca jéé vāha ni sáha Yaā Dios rohó, suu stéén nuū rō jeé cundáhú ndije ni yā rohó. Te na cuiñi nihin rō jiín jnúhun yáha.

<sup>13</sup> Ñayuu cácañdeje jeé cáyūcú ñuu Babilonia, jeé ní nacáji ya i nájnūhun ni nacáji ya rohó, cácahān i jeé sándeyí ni rō. Te Marcos, téé cúu nájnūhun sēhe rí, suni súcuan cáhán de.

<sup>14</sup> Te núu na cáhán rō jiín jnáhan rō, te techūhu mání rō ndaha i.

Te na cóo ndeyí coo sñí ni ndihí rō jéé cáyihí rō ndaha Jesucristo. Súcuan na cóo. Amén.

## CARTA UU JEE NI TEE SAN PEDRO APOSTOL NUU ÑAYUU CACANDIJE

<sup>1</sup> Máá rí cúu Simón Pedro, te cúu rí mozo Jesucristo, te cúu rí apóstol jeē ní tají yá. Te tée rí carta yáha cuájeē nuū rō jijnáhan rō, jeē ní sáha Yaā Dios jeē inuū-ni jíin rí jijnáhan rí ni canihín rō jñuhun luu váha jeē cácadnje yó yá. Chi Yaā ndaā cúu Yaā Dios, suu máá Jesucristo jeē jnáma yóhó.

<sup>2</sup> Te jñuhun ní rí jeē na sáha ga yá jeē váha ndasí róhó jíin jeē yóhoyo coo ndeyí coo síi ní rō siquí jeē cájecūhun váha ní rō ndese Yaā cúu Yaā Dios jíin Jítoho yō Jesús.

### *Siquí ndese cánuú coo ñayuu cácadnje*

<sup>3</sup> Te Yaā Dios, jíin poder yá ní jêhe ya nuū yō tāca jéē sáha jeē cúu caca ndaā yō nuū yá jíin jéē chíñúhún váha yó yá. Chi ní steén yá maá yá nuū yō, chi cúu ya Yaā jeē ní cana yóhó, siquí jeē yóhoyo cújénu ya jíin táca jniñu jénu sáha ya.

<sup>4</sup> Jeē yúcuan ní jejnūhun ya tāca jéē yóhoyo jénu yóhoyo váha sáha ya yohó, návaha jíin táca ún te nduu ró nájñuhun iyó máá yá, te cácu ró nuū jniñu jeē cándiyo néé ní ñayuu casáha i ini ñayívi yáha.

<sup>5</sup> Núu súcuan te na ndúcú ndeyí ró jíin jñuhun yáha. Te jeē cácadnje ró, te siquí ún na chisóo ró jeē caca ndaā rō. Te jeē cájica ndaā rō, te siquí ún chisóo ró jeē cóndihví ní rō jecūhun váha ní rō.

<sup>6</sup> Te siquí ún chisóo ró jeē casi rō modo jeē cuní maá ró. Te siquí ún chisóo ró jñuhun cuandeyí ní rō, te siquí ún chisóo ró jeē chíñúhún váha ró Yaā Dios.

<sup>7</sup> Te siquí ún chisóo ró jeē cóo maní rō jíin jñáhan rō, te siquí ún chisóo ró jeē cundáhú ní rō jñáhan rō.

<sup>8</sup> Chi núu cayá táca jniñu yáha jíin ró, te suu sáha jeē ma cótecu saá-ni ró, chi sa quee váha jniñu sáha ró, siquí jeē cájecūhun ní rō ndese Yaā cúu Jítoho yō Jesucristo.

<sup>9</sup> Te ñayuu jeē tu casáha jniñu yáha, nájñuhun jeē cáhoyo cuáá i, chi tu jécūhun ní i jñuhun ya, te je ní naa ní i jeē ní sándoo ya i tāca cuéchi ní casáha i ichi yátá.

<sup>10</sup> Jeē yúcuan na ndúcú ndeyí ró hermano, návaha coo seguro jeē ní cana ya rohó jíin jéē ní nacáji ya rohó. Chi núu sáha ró táca jniñu yáha, te ma cáca yátá cuiti rō.

<sup>11</sup> Yúcuan na te nune váha ichi quívi ró ini ñuu máá Jítoho yō Jesucristo, Yaā jnáma yóhó, nuū ndácu ya jniñu ní cáni.

<sup>12</sup> Jeē yúcuan ma jécuiñi rí sáha rí jeē núcūhun ní rō tāca jñuhun yáha, vésú je cájini ró te cáhīn níhin ró jíin jñuhun ndaā jeē cácadnje ró.

<sup>13</sup> Chi jéni ní rí jeē iyó váha stíhví ní rí rohó vijna técu gā rí, návaha nucūhun ní rō.

<sup>14</sup> Chi máá Jítoho yō Jesucristo ní castūhun yá nuū rí jeē tuá cotecu nahán rí ñayívi yáha.

<sup>15</sup> Jeē yúcuan na ndúcú ndeyí gá rí stíhví ní rí rohó, návaha núu je ní jihí rí, te níni nucūhun ní rō tāca jñuhun yáha.

### *Jeē ní cajito de jeē cújénu Cristo*

<sup>16</sup> Ná ní castéén rí jñuhun máá Jítoho yō Jesucristo nuū rō, ndese ndiji ya jíin poder yá, te tu ní cácahan rí in cuento-ni jeē ní catava ndichí ñayuu. Chi ná

ni cahīyo ri jīn yá xinī yúcu, te ni cajito jīn núū rī jeē tucu ni nduu ya jeē ni nduluu jéhu ya.

17 Chi ni cajini rī jeē Tatá yō Yaā Dios ni cahān yiñúhún yá jīn Jesús, te ni sajehu ya Jesús. Chi ichi ándiví ní quiji jñuhun luu, ni cahān Yaā Dios: Yāha cúu Sēhe ri jeē maní ndasí rī jīn, te cúsi ní rī jīn, áchí yá.

18 Te ni cajini sōho rī jñuhun un jéē ni cáhān ichi ándiví, chi ni cahān ri jīn máá Jítóho yō xinī yúcu iī ún.

19 Te súcuan cájini yō jeē iyó ndāā ndije tāca jñuhun ni catee tēe ni canacani jñuhun ya nde jenahán. Te vāha jeē na chūhun ni rō jñuhun un jínáhan ró, chi suu cúu nájñuhun iin luz jeē cayú nuū néē, nde na cúndijin quiví ndíji ya, te stéén yá iní anuá rō nájñuhun jeē ndíndēē lucero.

20 Te xīhna gā na jécūhun ni rō jeē ni iin jñuhun cáhān tutu iī, nasūu jéē súcuan-ni ni cajeni ní tēe cúu.

21 Chi tāca tēe ndoo jeē ní canacani jñuhun ya nde jenahán, tu ní cácahān cuiti de jñuhun jeē cúu ni maá de. Chi sa suhva ni canacani de jñuhun Yaā Dios jeē ni stéén Espiritu Santo nuū de.

*Siquī tēe cástéén jñuhun stáhú*  
(Judas 4-13)

## 2

1 Te mēhñu ñáyyu Israel ún suni ni cahīyo tēe ni canacani jñuhun stáhú. Te suni súcuan coo tēe stéén jñuhun stáhú méhñu ró. Te squiví de jñuhun stáhú jéē tvi ñáyyu sáha. Te ni ma cuajnúhún de Jítóho yō jeē jnáma ya de, te súcuan sáha de jeē jnahnú ndetū yachi de.

2 Te cuehē ñáyyu condiquin i modo neé jéē castéén de. Te sáha de jeē cahán neé ñáyyu siquī jñuhun vāha ya jeē cúu ichi ndāā.

3 Te siquī jéē cándiyo ni de xūhún, te quende de xūhun ró siquī jñuhun stáhú stéén de nuū rō. Te tu quixín jñúndóho jnahnú ndetū de, chi nde jenahán je ndétu jñuhun ndonda ya siquī cuéchi de.

4 Chi tu ní íne cáhnu ni Yaā Dios nuū tācá ndajéhé yā jeē ní casáha cuéchi, chi sa ni jnaa yā infierno cáyindihyū nuū néē, cánuhnī jīn cadena. Te ni chindihyū yā nde quiví sándaā yā siquī.

5 Te suni tu ní íne cáhnu ní yā nuū ñáyyu jenahán, chi sa ni scúun ya saū xeén siquī ñáyyu ni casáha neé un. Te máá-ni Noé, tēe ni nacani jñuhun ndāā, ni scácu ya de jīn úxā gā ñáyyu.

6 Te suni ni ndonda ya siquī cuéchi ñáyyu ñuu Sodoma jīn ñuu Gomorra, te ni cayú ñuu i ni nduu máá yāā na. Te súcuan cúu i iin ejemplo nuū tāca gā ñáyyu sáha neé jéē quiji ga.

7 Te ni scácu ya Lot, chi tēe ndāā ni cuu de, te ni cucuhyá ndasí ni de ni jito de jniñu neé ní casáha ñáyyu neé un.

8 Chi tēe vāha un ní condee de mēhñu ñáyyu ún, te ndiquiví ni nacani cuíhyá ni de jeē ní jini sōho de ni jito de tācá jniñu neé ní casáha i.

9 Núu súcuan te máá Jítóho yō chi jnáma ya ñáyyu cáchiñúhún núū yā, te núu vēji jñúndóho siquī i. Te chindihyū yā ñáyyu casáha neé, návāha ndoho i castigo quiví sándaā yā cuéchi i.

10 Te vīhyá gā stóho ya tēe casáha jniñu jnéhén jéē ndíyo neé ni de, te cácuu jéē ni de siquī jniñu ndácu máá Jítóho yō. Nihni ndasí ni de, te cáchundeyí ni de sáha de jeē cácuu maá de, te tu cáyūhú de cahān ndevāha de siquī tāca jéē cácujehu nuū sucún.



<sup>11</sup> Te ni máá ndajéhé jeē cáhīn nuū Jítoho yō, vēsú cácujuhnu ga yā jíin fuerza jíin jniñu ndíso ya, te tu cácahān ndevāha ya siquī tāca jēē cácujuhnu ún.

<sup>12</sup> Te tēe ún chi cácuu de nájñuhun quiti yúcú jēē ni jéconā tī jíin modo sāha ti, te cátaḥū tī návāha nihīn ñayuu tī cahni i ti. Chi cácahān neé de siquī tāca jēē tu cájecūhun ni de. Te cuu de nájñuhun jíhí tācá quiti ún.

<sup>13</sup> Te jeē ní castóho de ñayuu, suni súcuan nanihīn de ndoho de. Te cácusī ni de jíin tāca jēē cácajni ni de, te cásaḥa de tācá jniñu jeē cándiyo neé ni de. Te cácuu de tēe quini jeē casáha jniñu cúcanu ñayuu. Te jeē cándutútú de jíin ró vico ró, te níni cácusī ni de jíin jniñu neé jniñu stáhú.

<sup>14</sup> Te cándiyo ni de cájito de ñahan, te tu cájecuīñī de sāha de cuéchi. Te cástáhú de ñayuu tahya ni. Chi ni cacāan de jíin jñuhun ndíyo ni de tācá ndajniñu. Te tēe jnahnū ndetū cácuu de.

<sup>15</sup> Te ni casana de, chi ni castóo de jñuhun jeē cúu ichi ndaā. Te ni candiquīn de modo Balaam, tēe ni nacani jñuhun nde jenahán, séhe Beor. Chi tēe un ní cusī ni de nihīn de xūhun síquī jñuhun neé jēē cahán de.

<sup>16</sup> Te ñin burro ni cahān tī nájñuhun ñin ñayuu, vēsú quiti ñihīn cúu ti. Te ni cahān tī nuū tēe ún, te súcuan ni jesi tī jeē ma quihín de cahān de tāca jñuhun neé stívi.

<sup>17</sup> Te tāca tēe súcuan chi cácuu de nájñuhun tesōco íchi, nájñuhun vicō jeē stehí táchī. Te jnahnū ndetū de quivicoo de nuū neé nuū lúchi jnúú coyúcú de níi cáni.

<sup>18</sup> Chi yōhoyo cóсандúxí de máá de jíin jñuhun cácahān saá-ni de. Te cánducú de squíví tucu de sava ñayuu nuū jniñu neé jniñu ndíyo ni. Te súcuan cástáhú de ñayuu jeē sa ní quenda i ní cácu i nuū ñáyuu casáha jniñu neé.

<sup>19</sup> Te cácahān de jeē cáhīyo libre i sāha i ndese-ni cúni máá i, te ni máá de tu cáhīyo libre de, chi cácuu de mozo nuū cuéchi, chi máni jniñu jnéhén casáha de. Chi tācá jniñu jeē cúndeyí jíin ñin tēe jeē sāha de, suu yúcuan ndúu de mozo nuū.

<sup>20</sup> Chi núu je ni cajini de ndese Yaā cúu máá Jítoho yō Jesucristo, Yaā jnáma yóhó, te núu súcuan ní quenda de ní cácu de nuū jniñu jnéhén íyó ini ñayiví, te yúcuan na te núu ndívicoo tucu de nuū jniñu un jēē cúndeyí tucu jíin de, núu súcuan te neé gá quendōo de jeē sándihí vēsú jeē xīhna ñuhún.

<sup>21</sup> Chi váha ga núu jeē tu ní cájini de jñuhun ichi ndaā nuū, vēsú jeē ní cajini de, te stóo tucu de jniñu ndoo jeē ní ndacu ya nuū de.

<sup>22</sup> Chi cúndaā jíin de nájñuhun cáhán ñin jñuhun jenahán: Ina ni nacaji tī jeē ní ndujen ti. Te quini ní ndundoo, ni nacuchi tucu ti ndehyū, achí.

### *Siquī jeē ndíji Jítoho yō*

## 3

<sup>1</sup> Ñánī mánī, yāha cúu carta uū jeē tēe ri nuū rō. Te jíin ndíndúú carta yāha cúni rī jeē nacani ní rō siquī ndihí jeē váha ndaā jeē jeni íchí rí rohó.

<sup>2</sup> Te na núcūhun ní rō tāca jñuhun jeē ní canacani tēe ndoo Yaā Dios nde jenahán, jíin jniñu ní ndacu máá Jítoho yō, Yaā jnáma yóhó. Te suu cúu jeē ní castéén tēe cácuu apóstol nuū rō.

<sup>3</sup> Te xīhna gā jñuhun yāha na jécūhun ní rō: Jeē nuū cuándihí quiví te quijicoo tēe sácatā siquī jñuhun ndaā yā, chí sāha de tācá jniñu neé jēē ndíyo ni máá de.

<sup>4</sup> Te cahān de jíjnāhan de: ¿Najehē cúu jeē tu ndíji Cristo nájñūhun ni jejnūhun ya? Chi nde quiví ní cajihí jíi yō te nde vijna, tu ndé sáma cuiṭi ndihi jeē iyó ndé ná ni jecōo ñayiví, achi de.

<sup>5</sup> Chi tu cácuani de jecūhun ni de jeē ndé jenahán ní cuvāha andiví jíin jñūhun ni cahān Yaā Dios. Te ni ndacu ya jñiñu jeē na cuvāha ñayiví jíin ndute, te mēhñú ndute ni nane ñuhun íchi.

<sup>6</sup> Te suni jíin ndute ni naa ñayiví jenahán, chi ni ndaa ndute jeē ní cuun saū xeén.

<sup>7</sup> Te suni súcuan jíin jñūhun ni cahān Yaā Dios ni sátūhva ya jeē cayú andiví jíin ñayiví iyó vijna. Chi máa quiví juicio te cayú ndihi, te jahnū ndetū ñayuu ni casáha néé.

<sup>8</sup> Te suni ma náa ni rō jñūhun yáha, ñánī mánī: Jeē nuū máa Jítoho yō chi ñin quiví cúu nájñūhun mil cuiyā, te mil cuiyā cúu nájñūhun ñin quiví-ni.

<sup>9</sup> Chi nasūu jée cucuéé máa Jítoho yō siquí jñūhun ni jejnūhun ya, nájñūhun cájeni ni sava ñayuu. Chi sa suhva iyó paciencia ni yā nuū yō, chi tu cúni yā jeē jnahnú ndetū ni ñin yó, chi sa cúni yā jeē ndihi yó nacani ni yō stóo yó cuéchi yó.

<sup>10</sup> Te quiví ndíji máa Jítoho yō, ñin sanaa-ni te quee, nájñūhun ñin sanaa-ni te quee ñacuñhá jecuáa. Te quiví ún chi ñihin ndasí andiví, te naa-ni. Te ndihi jeē iyó andiví chi naa sáha ñuhūn. Te ñayiví jíin táca jée iyó ini, ndihi cayū.

<sup>11</sup> Te núu súcuan naa táca un, te cánuú ndasí jée coo ndoo ánuá rō te chiñuhún váha ro yá jíjnāhan rō.

<sup>12</sup> Te condetu ró te condihví ni rō jeē na queé yachí quiví ndíji Yaā Dios. Te quiví ún cayú andiví te naa-ni, te táca jée iyó chi ndute sáha yáñuhūn.

<sup>13</sup> Te máa yó chi cándetu yó andiví jée jíin ñayiví jée, chi súcuan ni jejnūhun Yaā Dios. Te yūcuán chi máni jñiñu ndaā jíin jñiñu váha coo.

<sup>14</sup> Núu súcuan, ñánī mánī, níni jée cándetu ró jée squícu táca jñiñu yáha, te na ndúcú ndéyí ró návaha quiví ndíji ya te ñihin yā rohó jée cayūcu mánī rō, te coo ndoo ró jée tú na cuéchi rō.

<sup>15</sup> Te na jécūhun ni rō jeē siquí jeē iyó paciencia ni máa Jítoho yō, jeē yúcuan cácu yó. Chi hermano yō Pablo jeē maní yō jíin, suni súcuan ni tee de nuū rō, chi súcuan ni steén Yaā Dios jñūhun ndíchi yá nuū de.

<sup>16</sup> Te cáhán de siquí jñūhun yáha núu táca carta jeē ní tee de. Te nuū carta de un iyó jecu jñūhun jeē yí jécūhun ni yō. Te ñayuu tu jécūhun ni jíin ñayuu tu íje jíin jñūhun cándíje, cánasama i modo steén jñūhun yí un, nájñūhun násama i jeé cahán sava ga tutu íi. Te súcuan sáha i jeē jnahnú ndetū máa i.

<sup>17</sup> Te rohó ñánī mánī, vijna te je ni cajini rō ndese coo táca jñiñu yáha. Núu súcuan te coto má condiquín rō jñūhun stáhu cástéén ñayuu casáha néé. Chi núu tuú te snáa rō jñūhun cáhīin ñihin ró jíin.

<sup>18</sup> Chi sa na condihví gā ni rō cuni rō ndese Yaā cúu máa Jítoho yō Jesucristo, Yaā jnáma yóhó. Te na íje ga ni rō jíin jñūhun cúndáhú ni yā rohó. Te na cáhán yō jeē yóhoy luu cújehnu ya nde vijna jíin ní cáni. Súcuan na cóo. Amén.

## CARTA HN JEE NI TEE SAN JUAN APOSTOL NUU ÑAYUU CACANDIJE

### *Jñuhun cotecu yō ñí cáni*

<sup>1</sup> Jñuhun cátee ri cuajeē nuū rō jijnáhan ró cúu jñuhun máá Yaā jeē je íyó ndé ná tu jecōo táca jéé iyó. Te ni cajini sōho ri jeē ni cáhān yā, te ni cajito jínúu rī yā, chi ni cajito vāha ri nuū yā, te ni cajñi ri yā. Te máá yá cúu Jñuhun cotecu yō ñí cáni.

<sup>2</sup> Chi Yaā yáha jéé sáha ya jeē cótecu yō, ni quenda ndijin yā. Te cácahān rī jñuhun ya, chi ni cajito ri yā. Te cácastūhun rī nuū rō jijnáhan ró síquī Yaā cúu Jñuhun cotecu yō ñí cáni, Yaā ni condee jíin Tátá yō Yaā Dios, te ni quenda ndijin yā nuū rī jijnáhan ri.

<sup>3</sup> Jeē ní cajito ri jíin jéé ní cajini sōho ri, yūcuan cúu jeē cácastūhun rī nuū rō, návāha coo inuú ni rō jíin yó jijnáhan yó. Te jendaá chi cáhīyo inuú ni yō jíin máá Tátá yō Yaā Dios jíin Séhe ya Jesucristo.

<sup>4</sup> Te jñuhun yáha cátee ri cuajeē nuū rō, návāha cusñi teyí ni rō jijnáhan ró.

### *Yaā Dios cúu luz*

<sup>5</sup> Te yáha cúu jñuhun ni steén Jesucristo nuū rī, te vijna cácastūhun rī nuū rō: Yaā Dios cúu luz, chi yōhyo ndaā yā, te tú cuiti na jñiñu néé íyó jíin yá.

<sup>6</sup> Núu cácahān yō jeē cáhīyo inuú ni yō jíin yá, te núu cájica yó nájñuhun nuū néé jeē sáha yó jñiñu néé, núu súcuan te cástáhú yó, te nasúu jñiñu ndaā casáha yó.

<sup>7</sup> Te núu cájica yó jíin luz yā jeē casáha yó jñiñu ndaā, nájñuhun íyó máá yá jíin luz yā jeē sáha ya jñiñu ndaā, yūcuán na te cáhīyo inuú ni yō jíin táca jñáhan yó. Te ñiñi máá Séhe ya Jesucristo sándoo yóhó nuū ndiñi cuēchi yó.

<sup>8</sup> Núu cácahān yō jeē tú na cuēchi yó, te cástáhú yó máá yó jeē jéni ni yō súcuan, te tu ñúhun jñuhun ndaā ini yó.

<sup>9</sup> Te núu nacani ndaā yō cuēchi yó núu yā, te cone cáhnu ni yā nuū cuēchi yó, te sándoo ya yohó ndiñi jeē neé casáha yó. Chi jíin yō jeē Yaā vāha Yaā ndaā cúu ya.

<sup>10</sup> Te núu cácahān yō jeē tú na cuēchi yó, te nájñuhun sáha yó jéé Yaā stahú cúu ya, te tu cándije ndije yó jñuhun ya.

### *Cristo cúu Yaā cahán jehē yō*

## 2

<sup>1</sup> Táca jñuhun yáha téé ri cuajeē nuū rohó jéé cácuu ró nájñuhun sēhe ri, návāha ma sáha ró cuēchi jíijnáhan ró. Te núu ndé ñn ró ní sáha cuēchi, te íyó máá Yaā cahán jehē yō nuū máá Tátá yō Yaā Dios. Jesucristo Yaā ndaā cúu ya.

<sup>2</sup> Te ni socō yā máá yá jeē ndahva yā cuēchi yó, te nasūu cuēchi máá-ni yó, chi suni cuēchi ñayuu ñí ñáyiví.

<sup>3</sup> Núu squícu yó jñiñu ndácu Yaā Dios nuū yō, jíin yúcuuan cúcáhnu ni yō jeē jíiní ndije yó ndese Yaā cúu ya.

<sup>4</sup> Te núu cáhán ñn ñayuu: Ruhū chi jíiní rī ndese Yaā cúu ya, te núu tu squícu i jñiñu ndácu ya, núu súcuan te stáhú i, te tu cáhán i jñuhun ndaā.

<sup>5</sup> Te sa ñayuu squícu jnūhun ya, je ni ije vāha ni i jeē maní i jíin yá. Súcuan te cuni yō núu ndúú yó jíin yá chí tuú.

<sup>6</sup> Núu cáhán ñn ñayuu jeē nduú i jíin yá, cánuú jéē caca ndaā i nájñūhun ni jica Jesucristo.

### *Jniñu jée ndácu ya nuū yō*

<sup>7</sup> Hermano, nasūú ñn jniñu jée ndácu ri nuū rō jeē cahán rī jeē na cundáhú ni rō jnáhan ró. Chi jniñu jeē je cájini rō nde ná ni quejéé ró candíje ró cúu. Te jniñu yáha jeē ndácu ya, vēji nde jenahán, te suu cúu jnūhun ni cajini sōho ró ndé quivī ní quejéé ró candíje ró.

<sup>8</sup> Te vēsú súcuan, te níni jniñu jée cúu, te jniñu ndaā cúu nuū Cristo jíin núu maá ró jijnáhan ró. Chi je cuayáha jniñu nées jéē iyó núu nées, te je stéen maá luz ndaā ini anuá yō vijna.

<sup>9</sup> Núu ñn ñayuu cáhán i jeē jíca i jíin luz yā, te núu jíto uhū i jnáhan i, ñayuu ún chí jíca ga i nájñūhun nuū nées jíin cuéchi.

<sup>10</sup> Te ñayuu jeē cundáhú ni jnáhan, chí jíca i jíin luz yā, cúu jeē sáha i jniñu váha. Te ni ñn ma cúu sáha jeē quivī i cuéchi.

<sup>11</sup> Te ñayuu jíto uhū jnáhan, chí iyó i nuū nées, te jíca i nuū nées. Te tu jíni i ndé chí quíhín i, chí nuū nées un ní jesi jeē tu jécūhun ni i.

<sup>12</sup> Róhó jéē cácuu sēhe, téé ri jnūhun yáha cuájeē nuū rō, chí jeē siquí Jesucristo te ni ine cáhnu ni Yaā Dios nuū cuéchi rō.

<sup>13</sup> Róhó tátá jijnáhan ró, suni téé ri nuū rō, chí cájini rō ndese Yaā cúu Yaā iyó ndé xīhna ñūhún. Róhó téé suchí jijnáhan ró, suni téé ri nuū rō, chí ni cacundeyí ró jeē tu ní cúu squívi jexeén rohó cuéchi.

Róhó jéē cácuu sēhe, téé ri jnūhun yáha cuájeē nuū rō, chí cájini rō ndese Yaā cúu maá Tátá yō Yaā Dios.

<sup>14</sup> Róhó tátá jijnáhan ró, suni téé ri nuū rō, chí cájini rō Yaā iyó ndé xīhna ñūhún. Róhó téé suchí jijnáhan ró, suni téé ri nuū rō, chí cáhīn nīhin ró, te cácandíje ró jnūhun Yaā Dios, te ni cacundeyí ró siquí jexeén.

<sup>15</sup> Ma cutóo ni rō siquí ñayiví, ni táca jéē iyó ini ñayiví. Chi núu ndé ñayuu cutóo ni i siquí ñayiví, ñayuu ún tu iyó mání i jíin Tátá yō Yaā Dios.

<sup>16</sup> Chí táca jéē cúu cuenta ñayiví, nasūu ndé nuū Tátá yō Yaā Dios vēji, chí cuenta ñayiví cúu. Te yūcuan cúu táca jéē cájini ni yō jeē cuní modo neé maá yó, jíin jéē ndíyo ni yō jeē jíto yó núu, jíin jéē sandúxí yó maá yó siquí ndajñiñu névāha yó.

<sup>17</sup> Te cuandihí ñayiví jíin táca jéē ndíyo neé ni yō. Te ñayuu casáha jeē cuní maá Yaā Dios, chí cotecu i ní cáni.

### *Jnūhun ndaā jíin jnūhun stáhú*

<sup>18</sup> Róhó jéē cácuu nájñūhun sēhe ri, cáhán rī jíin ró jeē cuandihí quivī. Te je ni cajini jnūhun ró jéē quíji maá téé cuu contra siquí Cristo. Te nde vijna je ni canecoo cuehē téé jeē cácuu contra siquí Cristo. Te jeē yúcuan jíni yō jeē cuándihí quiví.

<sup>19</sup> Mēhñu maá yó ni quendacoo de, te nasūu jnáhan yó cácandíje cácuu de. Chí núu jeē jnáhan yó cácuu de, te quendoo de jíin yó nuú. Te ni quenda de cuangoo de, návāha cuni cají yó jéē násūu jnáhan yó cácuu ndihí de.

<sup>20</sup> Te maá ró jijnáhan ró, chí Cristo ni jēhe ya Espíritu Santo, ndeé yá ini anuá rō, te jeē yúcuan cájini rō jnūhun ndaā.

<sup>21</sup> Núu súcuan te tée ri yáha cuájeē nuū rō, siquī jeē cájini rō jnūhun ndaā, nasūu siquī jeē tu cájini rō. Te cájini rō jeē tú na jnūhun stáhú íyó nuū jnūhun ndaā.

<sup>22</sup> ¿Ndé ñn cúu jeē cahán máni jnūhun stáhú? Suu tēe jeē cahán jeē Jesús, tu cúu ndije ya Cristo, Yaā ní tají Yaā Dios. Yúcuan cúu tēe jeē cúu contra siquī Cristo, chi tu jéjnhún de máá Tátá yō Yaā Dios jíin Séhe ya.

<sup>23</sup> Tāca ñáyuu jeē tu jéjnhún i Séhe ya, suni tu íyó máá Tátá jíin i. Te ñayuu jeē jejnúhún i Séhe ya, suni íyó máá Tátá jíin i.

<sup>24</sup> Núu súcuan te chuhun vāha ni rō maá jnūhun ni cajini sōho ró ndé jeē xíhna ñúhún. Te núu ñúhún vāha ni rō jnūhun ní cajini sōho ró ndé jeē xíhna ñúhún, yūcuán na te suni ndúú ró jíin máá Tátá yō jíin Séhe ya.

<sup>25</sup> Te yāha cúu jnūhun jeē ni jéjnhún Jesucristo nuū yō: jeē cótecu yō ní cáni sáha ya.

<sup>26</sup> Jnūhun yáha ní tee ri nuū rō jeē cástūhun rí siquī ñáyuu cánducú stáhú róhó.

<sup>27</sup> Te máá ró jijnáhan ró, chi ni jēhe Jesucristo Espíritu Santo, ndeé yá ini anuá rō. Te jeē yúcuan tu jíni ñúhún jéē steén ni ñn ñayuu nuū rō ndé vé cúu jendaá, chi máá Espíritu cúu jeē steén ndíhi nuū rō, te steén yā jnūhun ndaā, chi tu stáhú cuiti yā. Núu súcuan te caca ndúú ró jíin Cristo, nájnhún steén Espíritu nuū rō.

<sup>28</sup> Séhē jijnáhan ró, vijna te na cáca ndúú ró jíin Cristo, návāha núu na quénda ndijin yā, te ma yūhu yó, ni ma cúcanu yō nuū yā quiví ndíji ya.

<sup>29</sup> Chi je cájini rō jeē Yaā ndaā cúu Jesucristo, te suni na jécūhun ni rō jeē táca ñáyuu casáha jniñu ndaā, séhe Yaā Dios cácuu i.

### *Jnūhun ñayuu cácuu séhe Yaā Dios*

## 3

<sup>1</sup> Nacā jeē yóhoyo ni cundáhú ni Tatá yō Yaā Dios yohó, chi ni nihín yō jnūhun cuu yó séhe ya, te suu cúu ndije yó. Jeē yúcuan, ñáyuu ñayiví tu cájini i jeē cúu yó séhe ya, chi tu jíni i ndese Yaā cúu máá yá.

<sup>2</sup> Nání mání, vijna te cúu yó séhe Yaā Dios, te ná tu cuni yō ndese coo yó ní cáni. Te je jíni yō jeē quiví quénda ndijin Jesucristo, te nduu yó nájnhún íyó máá yá, chi coto yó núu yā ndese íyó yá.

<sup>3</sup> Te táca ñáyuu jeē súcuan ñúhún ni í, chi sándoo i ánuá i, nájnhún íyó ndoo Jesucristo.

<sup>4</sup> Te ñayuu casáha cuēchi, chi stívi i ley Yaā Dios. Chi núu sáha yó cuéchi, te stívi yó ley yā.

<sup>5</sup> Te je cájini rō jeē ní quiji Jesucristo ini ñayiví návāha quende yā cuéchi yó. Te máá yá tú na cuéchi ya.

<sup>6</sup> Te táca ñáyuu jeē nduú i jíin yá, tu cájica i jíin cuéchi. Te táca ñáyuu cájica jíin cuéchi, tu jíni i ya, ni tu jécūhun ni i ndese Yaā cúu ya.

<sup>7</sup> Séhē jijnáhan ró, coto ró jéē ma stáhú ni ñn i róhó. Chi na jécūhun ni rō jeē ñáyuu casáha jniñu ndaā, máá i cácuu ñayuu ndaā, nájnhún íyó ndaā máá yá.

<sup>8</sup> Te ñayuu casáha cuēchi, máá i cácuu séhe jexeén. Chi jexeén cúu jeē sáha cuéchi vēji nde jeē xíhna ñúhún. Jeē yúcuan ní quiji Séhe Yaā Dios, jeē snáá yā táca jniñu néé sáha jexeén.

<sup>9</sup> Ní ñn ñayuu jeē cúu séhe Yaā Dios, tu jíca i jíin cuéchi, chi ni sáha Yaā Dios jeē ní nduu i nájnhún íyó máá yá. Te ma cúu ga caca i jíin cuéchi, chi séhe Yaā Dios cácuu i.

<sup>10</sup> Súcuan cuni yō ndé ïn cúu sēhe Yaā Dios jíin sēhe jexeén: Tāca ñáyuu jeē tu sáha jniñu ndaā, jíin jeē tu cúndáhú ni jnáhan, nasūu sēhe Yaā Dios cúu i.

*Jeē na cúndáhú ni yō jnáhan yó*

<sup>11</sup> Yāha cúu jnūhun jeē ní cajini sōho ró ndé jeē xihna ñúhún: jeē na cúndáhú ni yō jnáhan yó.

<sup>12</sup> Te ma sáha yó nájnūhun ni sáha Caín, jeē ní cuu de sēhe jexeén, te ni jehni de ñani de. ¿Te najehē ni jehni de ñani de? Siqūi jeē ñani de ni sáha jniñu ndaā te máni jniñu néé ní sáha máá de.

<sup>13</sup> Hermano jijnáhan ró, ma cunéé ni rō te núu ñayuu ñayiví cáquití ni i nuū rō.

<sup>14</sup> Te máá yó chí siqūi jeē cundáhú ni yō jnáhan yó, súcuan jíni yō jeē jé ni cácu yó jéē cōtecu yō níí cáni. Te ñayuu jeē tu cúndáhú ni jnáhan, iyó i jíin jnūhun jnahnū ndetū i.

<sup>15</sup> Chí tāca ñáyuu quití ni nuū jnáhan, nájnūhun ñayuu jéhni ndīyi cúu i. Te cájini rō jeē ñáyuu jéhni ndīyi, ma nihín tahú i cōtecu i níí cáni.

<sup>16</sup> Jeē ni jíhī Cristo jehē yō, yūcuan cúu jeē steén cají ndese cúu jnūhun cúndáhú ni. Te máá yó, chí suni súcuan jíni ñúhún cundáhú ni yō jnáhan yó vésú na cúu yō jehē i.

<sup>17</sup> Te núu névāha yó jéē cōtecu yō ñayiví, te núu jíni yō jeē cúmanī nuū jnáhan yó, te núu tú cundáhú ni yō i cuāha yó jéē jíni ñúhún i, núu súcuan ¿te á iyó máni yō jíin Yaā Dios, chí naún?

<sup>18</sup> Séhē jijnáhan ró, ma cundáhú ni yō jíin máá jnūhun cáhán-ni yó, chí sa suhva na cúndáhú ndije ni yō nde jíin jniñu sáha yó.

*Ndese cucáhnū ni yō jeē váha sáha yó núu Yaā Dios*

<sup>19</sup> Te súcuan cundaā ni yō jeē squícu yó jnūhun ndaā, te cucáhnū ni yō jeē váha sáha yó núu yā.

<sup>20</sup> Chí núu ánuá yō tú váha sáha siqūi jeē iyó cuéchi yó, te Yaā Dios chí cújéhnū ga yā vésú anuá yó, te jíni ndíhi ya tācá un.

<sup>21</sup> Núu súcuan ñánī mánī, núu vāha sáha ánuá yō siqūi jeē tú na cuéchi yó, yúcuán na te cucáhnū ni yō jeē váha sáha yó núu Yaā Dios.

<sup>22</sup> Te tāca jéē cacán yō nuū yā, te sáha ya jeē cahán yō, chí squícu yó jniñu ndácu ya te sáha yó jniñu jeē cúsi ni yā.

<sup>23</sup> Te yāha cúu jniñu ndácu ya: jeē na cándíje yó jéē ni sáha Sēhe ya Jesucristo jehē yō, jíin jeē na cúndáhú ni yō jnáhan yó, nájnūhun ni ndacu ya jniñu nuū yō.

<sup>24</sup> Te tāca ñáyuu squícu jniñu ndácu Yaā Dios, ndúu i jíin yá, te ndéé yá ini anuá i. Te jíin máá Espíritu jeē ni jéhe ya jeē ndeé ini anuá yō, jíin yúcuán te jíni yō jeē ndeé Yaā Dios ini yō.

*Jnūhun jeē véji nuū Espíritu jíin jnūhun cáhán contra Cristo*

## 4

<sup>1</sup> Ñánī mánī, ma cándíje ró tāca téé jéē cáhán de jeē jíin Espíritu Yaā Dios cánacani de jnūhun. Chí sa suhva coto ndee rō de, núu nde nuū Yaā Dios véji jnūhun cáhán de, chí tuú. Chí ini ñayiví je ni canecoo cuehē téé cánacani jnūhun stáhú, te cáhán de jeē ndé nuū Yaā Dios véji.

<sup>2</sup> Te súcuan nacuni rō ndé-ni i cúu jeē jíin Espíritu Yaā Dios cáhán: tāca ñáyuu jeē cáhán ndaā jeē ní quiji Jesucristo, ni nduu ya téé, máá i cúu jeē jíin Espíritu Yaā Dios cáhán.

<sup>3</sup> Te tãca ñayuu jeë tu cájejnúhún jeë súcuan ni nduu ya tēe, máá i chi nasūu jíin Espíritu Yaā Dios cácahān i. Chi sa suhva cácuu i contra siquī Cristo. Te je ni cajini jnūhun ró jéë quíjicoo ñayuu súcuan, te vijna je cáhīyo i ini ñayīví.

<sup>4</sup> Séhē jijnáhan ró, máá ró cácuu séhe Yaā Dios, te je ni cacundeyí ró siquī tée cástáhú un. Chi jéhu ga cúu poder máá Yaā jeë ndeé ini ró, vésú poder máá jéë ndeé jíin ñayuu ñayīví jéë castáhú.

<sup>5</sup> Máá i cácuu cuenta ñayīví, te jeë yúcuan cácahān i jnūhun cuenta ñayīví. Te ñayuu cácuu cuenta ñayīví, cájini nahín i jnūhun ún.

<sup>6</sup> Te máá yó chi séhe Yaā Dios cácuu yó. Te ñayuu jeë cájini i ndese Yaā cúu Yaā Dios, máá i cájini nahín i jnūhun cácahān yō. Te ñayuu jeë násūu séhe Yaā Dios cácuu, máá i tu cájini nahín i jnūhun cácahān yō. Te súcuan nacuni yō ndé-ni cúu jeë cahán jnūhun ndaā jíin ndé-ni cúu jeë cahán jnūhun stáhú.

### *Máni jnūhun cúndáhú ni iyó jíin Yaā Dios*

<sup>7</sup> Nánī mánī, na cúndáhú ni yō jnáhan yó, chi jnūhun cúndáhú ni, nde nuū Yaā Dios vēji. Te tãca ñayuu cundáhú ni jnáhan, chi séhe Yaā Dios cúu i, te jíni i ndese Yaā cúu Yaā Dios.

<sup>8</sup> Te ñayuu jeë tu cúndáhú ni jnáhan, tu jíni i ndese Yaā cúu Yaā Dios, chi máni jnūhun cúndáhú ni iyó jíin Yaā Dios.

<sup>9</sup> Súcuan ni steén Yaā Dios ndese cúndáhú ni yā yohó, chi ni tají yá Séhe ya ni quiji ini ñayīví yáha, vésú mañúhún-ni ya iyó, návaha cotecu yō ní cáni sáha ya.

<sup>10</sup> Te yáha cúu jnūhun cúndáhú ni: nasūu jéë xihna máá yó ni íyo manī yō jíin Yaā Dios, chi sa suhva máá yá cúu jeë ní cundáhú ni yā yohó. Te ni tají yá Séhe ya ni quiji, návaha socó yá máá yá jeë quende yá cuéchi yó.

<sup>11</sup> Nánī mánī, núu súcuan ni cundáhú ni Yaā Dios yohó, te suni súcuan cánuú jeë cundáhú ni yō jnáhan yó.

<sup>12</sup> Ni ññ ñayuu tu ní jíto cuiiti nuū Yaā Dios. Te núu cúndáhú ni yō jnáhan yó, te ndeé Yaā Dios ini anuá yō, te je ni ije vāha ni yō jíin jnūhun cúndáhú ni.

<sup>13</sup> Te máá Espíritu Santo jeë ni jéhe ya jeë ndeé ini yō, máá yá steén jeë nduú yó jíin Yaā Dios, te ndeé Yaā Dios ini yō.

<sup>14</sup> Te ni cajito ri te cácastūhun rí jeë máá Tátá yō ni tají yá Séhe ya ni quiji návaha jnama ya ñayuu ñayīví.

<sup>15</sup> Te núu ndé ñayuu jejnúhún i jeë Séhe Yaā Dios cúu Jesús, te nduú i jíin Yaā Dios, te Yaā Dios ndeé yá ini i.

<sup>16</sup> Te máá yó, je ni jini yō te ni candíje yó jéë cundáhú ni Yaā Dios yohó. Chi máni jnūhun cúndáhú ni iyó jíin Yaā Dios. Te ñayuu cundáhú ni jnáhan, nduú i jíin Yaā Dios, te ndeé yá ini anuá i.

<sup>17</sup> Te súcuan cúu jeë íje vāha ni yō jíin jnūhun cúndáhú ni, návaha ma yūhu yó quīví sándaā yá jniñu yó. Chi nájnūhun cúndáhú ni Cristo, suni súcuan cándāa máá yó ini ñayīví yáha.

<sup>18</sup> Te núu manī yō jíin yá, te tu yúhú yó nuū yā. Chi núu ni ije yó jíin jnūhun manī yō jíin yá, te tú na siquī yuhú yó nuū yā. Chi jnūhun yúhú un cúu jeë yuhú yó ndoho yó castigo. Jeë yúcuan ñayuu cáyuhú chi ná tu ije vāha i jíin jnūhun manī i jíin yá.

<sup>19</sup> Te yohó chi manī ndasí yó jíin Yaā Dios, chi xihna gā máá yá ni cundáhú ni yā yohó.

<sup>20</sup> Te núu ñn ñayuu cahán i jeē maní i jíin Yaā Dios, te núu quítí ni i nuū jnáhan i, núu súcuan te ñayuu stahú-ni cúu i. Chi núu ñn ñayuu tu iyó mání i jíin jnáhan i jeē jíto i nuū, te ni ma cúu coo maní i jíin Yaā Dios jeē tu jíto i nuū yā.

<sup>21</sup> Chi je ni ndacu ya jniñu yáha nuū yō: Ñayuu jeē maní i jíin Yaā Dios, suni na cóo maní i jíin jnáhan i.

*Jeē cúndeyí yó siquī jeneé iyó ini ñayiví*

## 5

<sup>1</sup> Tāca ñayuu jeē cácadnje i jeē Jesús cúu Cristo, Yaā ní tají Yaā Dios, máa i cácuu sēhe Yaā Dios. Te ñayuu maní jíin Yaā cúu Tátá, suni cákundáhú ni i ñayuu cácuu sēhe ya.

<sup>2</sup> Súcuan jíiní yō jeē cundáhú ni yō ñayuu cácuu sēhe ya, núu maní yō jíin yá te squícu yó jniñu ndácu ya.

<sup>3</sup> Chi jeē squícu yó jniñu ndácu Yaā Dios cúu jeē maní yō jíin yá. Te jniñu ndácu ya chi tú vēyi.

<sup>4</sup> Chi tāca ñayuu cúu sēhe Yaā Dios, cúndeyí i siquī jeneé iyó ini ñayiví. Te jeē candnje yó jéé cundáhú ni yā yohó, yūcuan cúu fuerza jeē sáha jeē cúndeyí yó.

<sup>5</sup> Máa-ni ñayuu jeē candnje jeē Jesús cúu Sēhe Yaā Dios, máa i cúu jeē cúndeyí siquī jeneé iyó ini ñayiví.

*Jnūhun cáhán ndaā siquī Sēhe Yaā Dios*

<sup>6</sup> Te jeē ní quiji Jesucristo ini ñayiví, chi ni jendute ya jíin ndute, te ni jeti niñí yā jeē ni jíhí yā jehē yō. Te nasūu máa ñn-ni jeē ní jendute ya jíin ndute, chi suni ni jeti niñí yā. Te máa Espíritu Yaā Dios cahán ndaā siquī yā, chi nuū maá Espíritu vēji jnūhun ndaā.

<sup>7</sup> Chi ini andiví iyó úní jeē cácahān ndaā siquī jnūhun yáha: máa Yaā cúu Tátá, jíin Yaā cúu Jnūhun, jíin Espíritu Santo. Te ndinúni yá, chi ñn-ni cúu ya.

<sup>8</sup> Te ini ñayiví suni iyó úní jeē steén ndaā: máa Espíritu, jíin jéé ní jendute Jesús, jíin jéé ní jeti niñí yā. Te ndinúni yáha, chi inuú-ni stéén siquī yā.

<sup>9</sup> Te cájetáhú yó jnūhun cácahān ndaā tēe, te jēhnu ga cúu jnūhun cáhán maá Yaā Dios. Te jnūhun ni cahān yā cúu jnūhun siquī Sēhe ya.

<sup>10</sup> Ñayuu cácadnje jeē Sēhe Yaā Dios cúu Jesús, je ni cacundaā ni i jnūhun yáha jeē ni cáhān Yaā Dios. Te ñayuu jeē tu cácadnje jeē ni cáhān Yaā Dios, nájjnūhun cása i jeē Yaā stahú cúu ya, chi tu cácadnje i jnūhun ni cahān ndaā yā siquī Sēhe ya.

<sup>11</sup> Te jnūhun ndaā un cúu jeē ni sáha ya jeē cótecu yō ní cáni, te Sēhe ya ndíso jnūhun cotecu yō.

<sup>12</sup> Ñayuu jeē iyó Sēhe ya jíin i, je ni nihín tahú i cotecu i. Te ñayuu jeē tu iyó Sēhe ya jíin i, ma nihín tahú i cotecu i.

*Jnūhun consejo jeē sándihí*

<sup>13</sup> Jnūhun yáha tée ri nuū rohó ñayuu cácadnje Sēhe Yaā Dios, návaha cucáhnú ni rō jeē ni nihín tahú rō cotecu rō ní cáni.

<sup>14</sup> Te cúcáhnú ni yō Yaā Dios, chi jíiní yō jeē núu na vé jicán yō nuū yā jeē suni cúni máa yá, te jíiní nahín yá jeē jicán yō.

<sup>15</sup> Te núu jíiní yō jeē jíiní nahín yá jeē jicán yō, núu súcuan te suni jíiní yō jeē sáha ya jeē jicán yō.

<sup>16</sup> Núu ñn ñayuu jíiní i jeē sáha jnáhan i cuēchi jeē násūu cuēchi jeē jnahnú ndetū i cúu, te na cácan tahú i nuū Yaā Dios, te cuáha ya jnūhun cotecu jnáhan



i, te núu nasūu cuéchi jeē sáha jeē jnahnú ndetū i cúu. Iyó cuéchi jeē jnahnú ndetū i sáha, te tu cáhán rī jeē cacán tahu rō jehē ñayuu sáha cuéchi súcuan.

<sup>17</sup> Tācá jniñu néé cúu cuéchi, te iyó cuéchi jeē násūu jéē jnahnú ndetū i cúu.

<sup>18</sup> Te jíní yō jeē tāca ñayuu cácuu sēhe Yaā Dios, tu jíca i jíin cuéchi. Chi Yaā cúu Sēhe Yaā Dios, ndíto vāha ya i. Te tú na vé cúu sáha jexeén jíin i.

<sup>19</sup> Te jíní yō jeē sēhe Yaā Dios cácuu yó. Te ñayuu ní ñáyiví yíhi i ndaha jexeén.

<sup>20</sup> Te suni jíní yō jeē ní quiji Sēhe Yaā Dios, te ní sáha ya jeē jécūhun ní yō, návāha cuni yō ndese Yaā cúu máá Yaā ndaā. Te ndúú yó jíin Yaā ndaā, suu jíin máá Sēhe ya Jesucristo. Máá yá cúu ndije Yaā ndaā, te máá yá sáha jeē cótecu yō ní cáni.

<sup>21</sup> Séhē jijnáhan ró, na cújiyo ró núu tāca jéē násūu Yaā ndaā cúu. Súcuan na cóo. Amén.

## CARTA UU JEE NI TEE SAN JUAN APOSTOL

### *Jnūhun ndaā jīn jnūhun cūndáhú ni*

<sup>1</sup> Maa ná cúu tēe jéhu ndiso jniñu, te tēe ná carta yáha cuájeē nuū ni jēē cúu ní hermana ni nacāji Yaā Dios, jīn nuū séhe ní jijnáhan i. Te manī na jīn ní jijnáhan ní sáha jnūhun ndaā yā, te nasūu máá-ni ná, chi suni tāca ñáyuu jinī jnūhun ndaā.

<sup>2</sup> Te manī na jīn ní jijnáhan ní síquī jeē cácanđije yó jnūhun ndaā yā jeē iyó ini anuá yō, te coo jīn yó ní cání.

<sup>3</sup> Te ñūhun ni na jēē Tatá yō Yaā Dios jīn Séhe ya Jitoho yō Jesucristo, na sáha ga yā jeē váha nihín, te cundáhú ni yā nihín, te sáha ya jeē coo ndeyí coo sīi ni ní, jīn jnūhun ndaā jīn jnūhun cūndáhú ni.

<sup>4</sup> Yōhoyo ni cusīi ni ná, chi ní jini na jēē sava séhe ní cájica i jīn jnūhun ndaā, nájñūhun ni ndacu máá Tátá yō Yaā Dios jniñu nuū yō.

<sup>5</sup> Hermana, cáhán ndahú ná jīn ní jeē na cūndáhú ni yō jnáhan yó. Te jnūhun tēe ná yáha cuájeē nuū ní, nasūu ñin jniñu jēé sá ndacu ya cúu, chi jniñu ní ndacu ya nuū yō nde ná ni quejeé yó candije yó cúu.

<sup>6</sup> Te jeē cundáhú ni yō jnáhan yó cúu jeē caca yó nájñūhun ni ndacu ya jniñu nuū yō. Te jniñu ní ndacu ya cúu jeē caca ní jīn jnūhun cūndáhú ni, nájñūhun ni cajini sōho ní ndé ná ni quejeé ní candije ní.

### *Siquī tēe cástáhú*

<sup>7</sup> Chi cuehē tēe cástáhú ni canecoo de ní ñáyiví, te tu cájejnúhún de jeē ní quiji Jesucristo ni nduu ya tēe. Te tēe tu cájejnúhún súcuan, cácuu de tēe stáhú, te cácuu de contra síquī Cristo.

<sup>8</sup> Coto ní jēē ma snāa ni táhú síquī jniñu váha ni casáha ní, chi sa suhva jeē na nihín ni ndihí tahū ní.

<sup>9</sup> Núu ndé ñáyuu jniñi inga jnūhun, te tu quéndōo i jīn jnūhun ni steén Cristo, núu súcuan te tu iyó Yaā Dios jīn i. Te ñáyuu quéndōo jīn jnūhun ni steén Cristo, chi iyó Tátá yō jīn i, te suni iyó Séhe ya jīn i.

<sup>10</sup> Te núu jinū ñin ñáyuu vehe ní, te núu tu quijnáhan jnūhun stéén i jīn jnūhun yáha, te ma cuáha ní jnūhun condee i vehe ní, ni ma cahán ni jnūhun ndeyí ni jīn i.

<sup>11</sup> Chi ñáyuu cahán jnūhun ndeyí ni jīn i, chíndéé ñájnáhan jīn i síquī jniñu néé casáha i.

### *Jnūhun sandihí*

<sup>12</sup> Iyó cuehē gā jnūhun cahán na jīn ní jijnáhan ní, te tu cúní na tee ná núu tútu jīn tinta. Chi ñūhun ni na cuájeē ná coto jnáhan yó, te ndajnūhun yó, náváha cusīi ndasí ni yō.

<sup>13</sup> Tāca séhe cuhū ní, ñahan jeē suni ni nacāji ya, cácahán i jeē sándeyí ni ní. Súcuan na cóo. Amén.

## CARTA UNI JEE NI TEE SAN JUAN APOSTOL

### *Jeē jejnūhún de tēe nání Gayo*

<sup>1</sup> Maaá rí cúu tēe jéhnū ndíso jníñu, te tēe rí carta yáha cuájeē nuū rō, amigo Gayo, chí manī rí jíin ró sáha jñūhun ndaā.

<sup>2</sup> Nánī mánī, jícan tahu rí jeē vāha na quihín tācá jniñu sáha ró, jíin jēe na cóo vāha ró, nájnūhun íyó vāha ánuá rō jíin jñūhun ya.

<sup>3</sup> Yōhyo ni cusī ni rí ná ni quecoo sava hermano te ni cacastūhún de nuū rí ndese vāha squicu ró tāca jniñu ndaā, chí jíca ndaā rō.

<sup>4</sup> Tuá na inga sáha jeē cúsi gā ni rí, chí mánī jeē nihín rí jñūhun jeē cájica ndaā ñayuu cácuu nájnūhun sēhe rí siquī jeē ni scándíje rí i.

<sup>5</sup> Nánī mánī, yōhyo vāha sáha ró jēe chindéé ñáhán ró tācá hermano, te víhyá gā núu tēe ñuu jíca cácuu de.

<sup>6</sup> Chí tēe un ní canacani de jñūhun nuū ñáyuu cácadíje yāhá, ndese cúndáhú ni rō de. Te jícan rí jeē chindéé ñáhán gá rō de, núu na vé jíni ñúhún de jeē caca ga de ichi nuū quihín de, nájnūhun nujnahan ni Yaā Dios.

<sup>7</sup> Chí tēe un ní quendacoo de cájica de siquī jniñu Jesucristo. Te tú na vé cáquihin de nuū ñáyuu jeē tu jíni jñūhun Yaā Dios.

<sup>8</sup> Jeē yúcuan cánuú coto yó de, chindéé ñáhán yó de jeē cánacani de jñūhun ndaā.

### *Siquī jeē tú vāha sáha Diótrefes*

<sup>9</sup> Je ni tee rí ñn carta nuū ñáyuu cácadíje jíñā. Te Diótrefes, tu jétáhú de jñūhun cáhán rí, siquī jeē cuní de cujéhnū maaá de nuū i.

<sup>10</sup> Jeē yúcuan, núu na jéé rí te cahán rí nuū de siquī jniñu sáha de, chí yōhyo sájnūhún de te cáhán de jñūhun stáhú síquī rí jijnáhan rí. Te nasūu maaá yúcuan-ni sáha de, chí suni tu jétáhú de tācá hermano jéngoo nuū de, te jési de jeē ma cuátáhú ñáyuu nuū tācá hermano un. Te ñayuu cájetáhú nuū hermano un, quénehen de i nuū cándutútú ñayuu cácadíje.

<sup>11</sup> Nánī mánī, ma ndácu ró ñáyuu casáha jniñu neé, chí sa suhva ñayuu casáha jniñu vāha. Chí sēhe Yaā Dios cácuu ñayuu casáha jniñu vāha. Te ñayuu casáha jniñu neé, tu cájini i ndese Yaā cúu Yaā Dios.

### *Jeē cácahán i jeē vāha sáha Demetrio*

<sup>12</sup> Tāca ñáyuu chí cácahán i jeē vāha sáha Demetrio. Te jniñu ndaā jeē sáha de, stéen jeē tēe ndaā cúu de. Te suni súcuan cácahán maá rí, te cájini rō jeē íyó ndáa jñūhun cáhán rí.

### *Jñūhun sandíhí*

<sup>13</sup> Íyó cuéhé gā jñūhun cahán rí jíin ró, te tu cuní rí tee rí jíin tinta jíin pluma.

<sup>14</sup> Chí ñúhún ni rí cuajeē yachī rí coto jnáhan yó, te ndajnūhun yó.

<sup>15</sup> Te ñúhún ni rí jeē na cóo ndeyí coo sī ni rō. Tācá amigo yō yāha cácahán i jeē sándeýí ni rō. Te suni cahán rō jíin ñn ñn amigo jíñā jeē sándeýí ni i, áchí rí, te cocahán yō.

## CARTA JEE NI TEE SAN JUDAS APOSTOL NUU ÑAYU CACANDIJE

<sup>1</sup> Máá rí cúu Judas ñani Jacobo, te mozo Jesucristo cúu ri. Te tée ri carta yáha cuájeē nuū rohó ñáyyu jeē ní cana máá Tátá yō Yaā Dios, te ni sáha ya jeē iyó ndoo iyó íi rō nuū yā jeē cácuu ró ñáyyu manī yā jíin. Te Jesucristo ndíto vāha ya rohó jéē cáyihī ró ndaha ya.

<sup>2</sup> Te ñūhun ni rī jeē na cúndáhú gá ni yā rohó, te sáha ya jeē coo ndeyí coo sīī ni rō, te coo manī ndasí yá jíin ró, te na ndúcuehē gā tāca jéē yáha nuū rō.

*Siquī tēe cástéén jñūhun stáhú  
(2 Pedro 2.1-17)*

<sup>3</sup> Ñánī manī, yōhoyo ní cuu ni rī tee ri nuū rō siquī jñūhun ni jnama ya rohó jíin rúhū jijnáhan yó. Te ni jini rī jeē cánuú gá tee ri carta jeē stihví ni rī rohó návāha nducú ndeyí ró jeē ma cási ñayuu nuū jñūhun cacandíje yó. Te jñūhun ún chí je ni jēhe ya ññ jinu-ni nuū tāca ñáyyu maá yá.

<sup>4</sup> Chí sava tēe ni castáhú de rōhó ní quīvicoo de mēhñu ró. Te tēe ún chí nde jenahán je cáhán tutu íi jeē jnahnú ndetū de siquī jñiñu casáha de. Cácuu de tēe ndevāha, chí cácahān de jeē vāha ni Yaā Dios, te jeē yúcuan vetū-ni sáha de jniñu neé, cácahān de. Te tu cájejnúhún ndije de Jitoho yō Jesucristo jíin Yaā Dios, jeē mañúhún-ni ya kujéhnu nuū yó.

<sup>5</sup> Te vijna chí vēsú je cájini vāha ró, te cúnī rī jeē na núcūhun ni rō ndese ni sáha máá Jitoho yō. Chí ni jnama ya ñayuu Israel jenahán, ni chindéé ñájñáhan ya i jeē ní jinu i ini ñuu tatú Egipto cuahān í. Te vēsú súcuan te cuéé gá te ni snáa yā sava i jeē tu ní cácaandíje í.

<sup>6</sup> Te suni nucūhun ni rō siquī ndajéhé yā jeē ní castóo jniñu ndíso, te ni castóo nuū ní ndeē andiví. Te Yaā Dios ní chindihyū yā jijnáhan, te cándetu nde quiji quiví cáhnu jeē sándaā yā jniñu. Te cánuhñí jíin cadena, cáyūcu ní cáni nuū cunú nuū neé.

<sup>7</sup> Te suni ní stóho ya ñayuu ñuu Sodoma jíin ñuu Gomorra jíin sava ga ñuu jeē ní iyo yajni, chí suni ní casáha neé i nájñūhun ní casáha tācá ndajéhé un ndé jenahán gá. Te máá i ni cajica jnéni i te ni casáha i tāca cuéchi neé ndasí. Te ni canihñi i castigo ñuhūn jeē cayú ní cáni, te súcuan cúu i ññ ejemplo nuū ndihī ñayuu.

<sup>8</sup> Te tēe cástáhú jeē ní quīvicoo mēhñu ró, vēsú cájini de jeē súcuan ni sáha ya, te cájeni cáhá ni de, te casáha jnéhén de yiqui cúñu de, te cásquéhichī ni de tēe cándacu jniñu Jitoho yō, te cácahān ndevāha de siquī tāca jéē cácujeñnu nuū sucún.

<sup>9</sup> Te nasūu súcuan ní sáha ndajéhé Miguel, vēsú ndajéhé kujéhnu ga cúu ya. Chí tu ní cáhán ndevāha ya ni tu ní ndácunehen ya cuéchi siquī jexeén ná ni casásáhán jnáhan ya jíin jéxeén un jeē siquī yiqui cúñu Moisés ná ni jihī de. Chí suhva-ni ni cahān yā: Máá Yaā Dios, Yaā cúu Jitoho, cuxeēn yā nuū rō, ni chí Miguel.

<sup>10</sup> Te tēe cástáhú yáha chí cácahān neé de siquī tāca jéē tu cájecūhun ni de. Te tāca modo cánevāha de siquī jeē sá cáa de, nájñūhun quiti yúcú jéē sá cáa ti, suu yúcuan sáha jeē jnahnú ndetū de.

11 Nacā xeēn ndoho de núu súcuan, chí tu cájetáhú de Yaā Dios, nájnūhun jeē tu ní jétáhú Caín. Te siquī jeē cácu ni de nihīn de xūhún te cástéén de jnūhun stáhú, nájnūhun ní sáha Balaam. Te jnahnú ndetū de nájnūhun Coré, tēe ní jihī siquī jeē ní cunīhni ní de.

12 Tēe yáha núu cándutútú de jíin ró jeē cáyeji manī rō, te cásáha de jniñu cúcanu rō. Chí cáyeji cájiji sī ní de, te tu cásáha de cuenta ndese caji inga ñayuu, chí máni máa de ndíhvī ní de caji vāha de. Te cácuu de nájnūhun vicō íchi jée stehí táchī. Te suni cácuu de nájnūhun yujnu jeē tu jéhe ndehē máa tiempo. Te cácuu de nájnūhun yujnu jeē ní quenda nde jíin yoho, te tú cuiti gā na modo nane numa.

13 Te nájnūhun jeē jisó cóyo ndute mar te cáne tiñū, súcuan jícu de jíin jniñu néé jée cúu jnūhun canu. Te cácuu de nájnūhun quīmi jeē ní sana ichi. Te je iyó túhva nuū néē nuū lúchi jnúú coyūcú de ní cáni.

14 Te jeē ní yāha iñū yucūn Adán, te ní cacu Enoc, te ní nacani de jnūhun jeē ní steén Yaā Dios nuū de siquī táca tēe yáha, áchi de: Máa Jítoho yō ní steén yā nuū rī jeē iñ quivī te quiji ya jíin cuéhē mil ñayuu máa yā.

15 Te sándaā yā jniñu táca ñayuu, te snáhnú ndetū yā táca ñayuu casáha néé. Chí máni jniñu néé cásáha i siquī jeē canéé máa i, te cácahān i cuéhē jnūhun ndevāha siquī yā. Ní achi Enoc.

16 Táca tēe yáha máni cácahān sōó de, te cácahān de siquī ñayuu. Te máni jeē cúsi ní máa de cánducú de. Te cácahān de jeē tēe téyí cácuu de, te cácahān yíñúhún de jíin ñayuu návāha nihīn de jecu nuū i.

### *Jeē stihví ni Judas ñayuu cácañdije*

17 Te máa ró jijnáhan ró ñánī mánī, na núcūhun ní rō jnūhun jeē jé ní canacani tēe cácuu apóstol máa Jítoho yō Jesucristo.

18 Chí ní cacahān de: Nde nuū cuándihī quivī te quijicoo tēe sácatā siquī jnúhun ndaā yā, te sáha de táca jniñu néé jée ndíyo ní máa de. Súcuan ní cacastūhún apóstol.

19 Tēe un cúu jeē casásīn ñayuu. Te máni cándihví ní de táca jée cutíndí ní máa de, chí tu ndéé Espiritu yā jíin de.

20 Te máa ró ñánī mánī, na íje vāha ní rō jíin jnúhun ndoo ndasí jée cácañdije ró. Te cacān tahú ró jíin fuerza Espiritu Santo.

21 Te quendōo nihīn ró jíin jnúhun jeē cundáhú ní Yaā Dios rohó. Te condetu ró quivī jeē cótecu ró ní cáni sáha máa Jítoho yō Jesucristo siquī jeē cundáhú ní yā rohó.

22 Te sava ñayuu jeē cájeni siquī ní, nducú ró modo scandíje ró i.

23 Te sava ga i chí nducú ndéyí ró jeē cácu i nuū cuéchi i, jeē nájnūhun stáa ró i nuū ñuhún. Te cundáhú ní rō i jnama ró i, te coto ró máa ró, te cuquini ní ró coto ró nde sahna i jeē ní cujnéhén jíin jniñu néé cásáha i.

### *Jnūhun cújéhnu Yaā Dios ní cáni*

24 Te Yaā Dios chí máñúhún-ni máa yá cúu Yaā ndichí, Yaā jnáma yóhó. Te iyó poder yā jeē coto ya rohó jée ma quivī ró cuéchi, jíin jée sáha ya jeē cuíñi ró núu ndíndēe yá, te quivī ún coo ndoo ró núu yā, te cusī ndasí ní rō sáha ya.

25 Te na cáhán yō jeē yóhoyo luu cújéhnu ya siquī jeē ní sáha ya jíin Jítoho yō Jesucristo. Te na cáhán yō jeē cújéhnu téyí yá, te ndácu ya jniñu jíin poder jeē ndíso ya nde jenahán ndasí jíin ndé vjna jíin ndé ní cáni. Súcuan na cóo. Amén.

## JNIÑU QUIJI JEE NI JITO NDIJIN SAN JUAN

### *Jeē ni stéén Jesucristo tācá jniñu quiji*

<sup>1</sup> Jñuhun yáha cúu jeē ní cachi Yaā Dios nuū Jesucristo ndese coo tācá jniñu quiji, nāvāha nacistūhun yá nuū ñáyuu cácanđje jeē cácuu i mozo yā. Te stéén yā nuū i tācá jniñu jeē yachī coo. Te ni tají yá ndajéhé yā ni quiji ya ni stéén ndijin yā jniñu un núu ruhū Juan jeē cúu ri mozo yā.

<sup>2</sup> Te máá rí cástūhun ndáā rī siquī tāca jéē ní jito ri ún, te nácani ndaā rī jñuhun Yaā Dios jín jñuhun jeē ní cahān ndaā Jesucristo.

<sup>3</sup> Yōhyo ndetū ñayuu cahu tutu yáha, te suni yōhyo ndetū ñayuu cuni nahín jeē cáhu ñayuu tāca jñuhun yáha jeē ní cachi Yaā Dios, te chuhun ni i. Chi je cuacuyajní quivī coo tācá jniñu yósó nuū tútu yáha.

### *Jeē téé Juan carta nuū ndihúxá grupo ñayuu cácanđje*

<sup>4</sup> Máá rí cúu Juan, te téé ri jñuhun yáha cuájjeē nuū rohó, ndihúxá grupo ñayuu cácanđje jeē cáyūcu Asia. Te ñuhun ni rī jeē máá Yaā Dios na sáha ga yā jeē váha rōhó jíjnáhan ró, te sáha ya jeē coo ndeyí coo sī ní rō. Chi máá yá cúu Yaā iyó vijna, te ni íyo ya ní cáni, te coo ya ní cáni. Te ñuhun ni rī jeē suni súcuan sáha ndihúxá Espíritu jeē cáhīn ya yuhu mesa nuū ndácu Yaā Dios jniñu.

<sup>5</sup> Te ñuhun ni rī jeē suni súcuan sáha Jesucristo, Yaā cahán ndaā tāca jñuhun. Te xīhna gā máá yá ni natecu mēhñu ndíyi. Te cújéhu ya nuū tāca rey jeē iyó ñayiví. Te máá yá cundáhu ní yā yohó, te ni nacate ya yohó núu cuéchi yó jíin níñi yā.

<sup>6</sup> Te ni sáha ya jeē ní nduu yó rey jíin sūtū cájejníñu nuū Tatá yā Yaā Dios. Te na cahán yō jeē yōhyo luu cújéhu ya te jñi ya poder ní cáni. Amén.

<sup>7</sup> Cuni sōho jíjnáhan ró, chi ndiji Cristo jíin vícō. Te ndivii ñayuu coto i nuū yā, te nde jíin ñayuu jeē ní castújí i ya. Te tāca raza ñayuu ní cáhnu ñayiví ndahyū i jeē tu ní cácanđje i ya. Súcuan nahín coo.

<sup>8</sup> Suhva cáhán máá Jítoho yō, Yaā jñi ndihi poder: Máá rí cúu nájnūhun letra A xīhna ñuhún jíin letra Z jeē sándihí na, chi máá rí ni squejéé ndihi te máá rí sínu, achí máá Yaā iyó vijna, te ni íyo ya ní cáni, te coo ya ní cáni.

### *Jeē ní jito Juan jeē cújéhu luu Cristo*

<sup>9</sup> Máá rí cúu hermano rō Juan jíjnáhan ró. Te inuú-ni ndóho ri jñundóho jíin ró siquī jeē cácanđje yó Jesucristo, te inuú-ni ndácu Yaā Dios jniñu nuū yō, te inuú-ni jéndeýí ní yō sáha Jesucristo. Te siquī jeē ní nacani ri jñuhun Yaā Dios jíin jéē ní cachi ndaā rī jñuhun Jesucristo, jeē yúcuan ní cajñi i ruhū cuenta preso, te ni cachune i ruhū isla jeē naní Patmos.

<sup>10</sup> Te in domingo ni jito ndijin rī jeē ni stéén máá Espíritu Santo nuū rī. Te ni jini sōho ri in jeē cána jee níhin ichi yátá rī nájnūhun jeē tívi trompeta.

<sup>11</sup> Te ni cahān jíin rí:

Máá rí cúu nájnūhun letra A xīhna ñuhún jíin letra Z jeē sándihí na, chi máá rí cúu Yaā iyó ndé xīhna ñuhún te coo ri ní cáni. Te na téé ró nuū in tutu tāca jéē cóto ró, te tají ró quihīn nuū ndihúxá grupo ñayuu cácanđje jeē cáyūcú i ní cáhnu Asia, suu iní ñuu Efeso, jíin ñuu Esmirna, Pérgamo, Tiatira, Sardis, Filadelfia, jíin Laodicea. Achí.

<sup>12</sup> Yūcuán na te ni ndicó cóto ri jeē cóto ri ndé ñn cúu jeē cahán jín rí. Te ná ni ndicó cóto ri te ni jito ri uxā candelero oro.

<sup>13</sup> Te mēhñú ndihúxá candelero un ñdichi maá Yaā ni nduu tēe. Te ññhun ya ñn sahna cáni jeē jinú nde nuū jehé yā. Te núhñi ñn cinturón oro jicā yā.

<sup>14</sup> Te ñxi xíní yā chí yaa nájññhun ñxi lánchi, nájññhun yuhvā volcán. Te tinūu ya ndíndēe nájññhun yáññññ.

<sup>15</sup> Te jehé yā xínú jito nájññhun cāa cuaán jéē ni ndúhvā nuū horno. Te ññññ ndasí cáhán yā, nájññhun ññññ cuehē yūte náñnu.

<sup>16</sup> Te ndaváha ya jññ ya uxā quñmi. Te yuhu ya quénda jeē cáa nájññhun espada jeē xeén ndindúú lado, te suu cúu jññhun ya jeē niní sándaā yā siquī cuéchi. Te nuū yā cáa nájññhun niándii jeē náñdii ndaxín.

<sup>17</sup> Te ná ni jito ri yā te ni cotúú rí nuū jéhé yā nájññhun jeē ni jññ rí. Te ni soó ya ndaváha ya siquī rí, te ni cahán yā:

Ma yñu ró. Máá rí cúu Yaā iyó ndé xñhna ññññ te coo ri ññ cáni.

<sup>18</sup> Te Yaā técu cúu rí. Chí ni jññ rí te ni natecu rí, te vijna chí técu rí ññ cáni. Te máá rí jññ poder siquī cuéhyī jéhñi ññyuu jín siquī lugar nuū cáyñcu ánuá ndñyi.

<sup>19</sup> Núu súcuan te tee ró núu tútu táca jéē ní jito ró, jeē cúu vijna jín jéē cóo ichi núu.

<sup>20</sup> Te yāha cúu jññhun sáhi siquī ndihúxá quñmi ni jito ró jññ ndaváha rí, jín siquī ndihúxá candelero oro. Ndhúxá quñmi ún cúu nájññhun ndihúxá jeē cácuññnu nuū ndihúxá grupo ññyuu cácadñje. Te ndihúxá candelero cúu nájññhun ndihúxá grupo ññyuu cácadñje.

*Jññhun cuahán nuū ndihúxá grupo ññyuu cacandñje:*

*Jññhun cuahán ñnu Efeso*

## 2

<sup>1</sup> Tee ró jññhun yáha na quíhñ nuū jeē cuññnu nuū ññyuu cácadñje ñnu Efeso: Súcuan cáhán ruhē, Yaā jeē jññ ndihúxá quñmi jín ndaváha rí, te jíca cuu rí mēhñú ndihúxá candelero oro.

<sup>2</sup> Je jíní rí táca jñññ váha cásaáa ró, jeē cáñdñhvī ni rō siquī jññhun rí, jín jéē cájendeyí ni rō. Te jíní rí jeē tu cájēhe ró jññhun quññññ ññyuu casáha néé mēhñu ró. Te jíní rí jeē ní cajito ndee rō tēe cástáhú jeē cácahán de jeē cúu de apóstol, te ni cajini rō jeē tēe stáhú cácuu de.

<sup>3</sup> Te ni cajendeyí ni rō ni candoho ró jñññññ, te tu ní ndñnuu ni rō jeē cácuu ndasí ró jín jñññ rí.

<sup>4</sup> Te vēsú súcuan te íyó jecu jeē cahán rí nuū rō, chí tuá cáhñyo maní váha ró jín rí nájññhun ni íyo maní rō jín rí quñññ jehé.

<sup>5</sup> Núu súcuan te nucñhun ni rō ndese ni castóo ró jññhun jeē ni íyo maní rō jín rí, te nacani ni rō, te na sáha ró nájññhun ni casáha ró ndé quñññ ún. Te núu ma nácani ni rō, te yachí jeē rí te stáa rí candelero rō nuū ññ, cúu jeē ma cuñññ ga rō jín ññyuu cácadñje.

<sup>6</sup> Te vēsú súcuan te íyó ññ jeē váha cásaáa ró, chí tu cánññññ cuiti ni rō cájito ró jñññ néé cásaáa ññyuu cáñdñquñ jññhun jeē steén Nicolás. Te suni máá rí tu nájñññ cuiti ni rí jito rí.

<sup>7</sup> ññyuu iyó sóho na chúsóhó i jeē cahán maá Espíritu Santo jín táca grupo ññyuu cácadñje. Táca ññyuu jeē cúñdeyí siquī jeneé, cuáha rí jññhun caji i ndehē

jeē cúun xinī yǐjnu jeē sáha jeē cótecu i níí cáni. Te yujnu un íin nuū jardín Yaā Dios nde andiví, áchí yá.

### *Jnūhun cuahān űuu Esmirna*

<sup>8</sup> Te tee ró jnūhun yáha na quíhín nuū jeē cujéhnū nuū űáyuu cácanđíje űuu Esmirna: Súcuān cáhān ruhū, Yaā jeē iyó ndé xihna űúhún te coo rí níí cáni, te ní jhī rī te ní natecu rī.

<sup>9</sup> Je jíni rī tǎcá jniñu váha cásáha ró, jíin jnúndóho cándoho ró, jíin jeē cándoho ndáhú ró. Te vēsú súcuān te cúcá ró ndíhi jeē ndíso jnūhun rī. Te jíni rī jeē cácahān neé űayuu siquī rō jijnáhan ró. űayuu un cácahān i jeē űáyuu hebreo, űayuu maá Yaā Dios cácuu i, te tuú chí cástáhú-ni i, chí sa űayuu yíhi ndaha Satanás cácuu i.

<sup>10</sup> Te ma yūhú cuiti rō tǎca jéē ndoho ró. Chí jexeén je yajni sáha jeē quivicoo sava ró vecāa jeē cóto ndee rohó jijnáhan ró, te ndoho ró jnúndóho uxī quiví. Te na cuíñi níhin ró ndé cuu rō, te cuāha rí premio jeē cótecu rō níí cáni.

<sup>11</sup> űayuu iyó sóho na chúsohó i jeē cahán maá Espírítu Santo jíin tǎca grupo űayuu cácanđíje. Tǎca űáyuu jeē cúndeyí siquī jeneé, ma níhín i jnúndóho jeē jnahnú ndetū i cuu i vuelta uū, achí yá.

### *Jnūhun cuahān űuu Pérgamo*

<sup>12</sup> Te tee ró jnūhun yáha na quíhín nuū jeē cujéhnū nuū űáyuu cácanđíje űuu Pérgamo: Súcuān cáhān ruhū, Yaā jeē névaha espada jeē xeén ndíndúú lado, te suu cúu jnūhun rí jeē sándaā rí siquī cuéchi.

<sup>13</sup> Je jíni rī tǎcá jniñu váha cásáha ró, te jíni rī jeē cáyūcu ró mēhñu űáyuu jeē ndácu Satanás jniñu nuū. Te vēsú súcuān te cáhīin níhin ró jíin jnūhun rí, te tu ní cánayūhu ró jeē cácanđíje ró rúhū, ní quiví ní jhī Antipas, tēe ní squícu váha ní nacani ndaā jnūhun rí. Chí űuu rō cáyūcu űáyuu cájejniñu nuū Satanás, te ní cajehni i Antipas.

<sup>14</sup> Te vēsú súcuān te iyó jecu jeē cahán rī nuū rō jijnáhan ró. Chí mēhñu róhó űayuu űuu Pérgamo iyó sava űayuu cándiquīn jnūhun ní steén Balaam. Chí tēe un ní steén de nuū Balac ndese squíví de űayuu Israel cuéchi jeē cáji i jeē ní sócō nuū ídolo jíin jéē cosíquí ndéē jnāhan i.

<sup>15</sup> Te suni iyó sava űayuu mēhñu ró jeē cácanđíje ga i jnūhun ní steén Nicolás, te jnūhun ún chí tu nújnahan cuiti ní rī.

<sup>16</sup> Núu súcuān te nacani ní rō siquī cuéchi ró. Chí núu tuú te yachí jeē rí jíin espada jeē quénda yuhu rí, te suu cúu jnūhun rí jeē sándaā rí siquī cuéchi. Te jíin yúcuān te stóho rí űayuu jeē candíje ga jnūhun neé un.

<sup>17</sup> űayuu iyó sóho na chúsohó i jnūhun jeē cahán maá Espírítu Santo jíin tǎca grupo űayuu cácanđíje. Tǎca űáyuu jeē cúndeyí siquī jeneé, scáji rí i maná jeē yísáhi ichi ándiví. Te suni cuāha rí íin yuū cuijín núu i, te nuū ún condee íin síhví jéé, te ní íin űayuu ma cúni síhví un, chí máa-ni i jeē níhín. Achí yá.

### *Jnūhun cuahān űuu Tiatira*

<sup>18</sup> Te tee ró jnūhun yáha na quíhín nuū jeē cujéhnū nuū űáyuu cácanđíje űuu Tiatira: Súcuān cáhān ruhū, maá Séhe Yaā Dios jeē ndíndēe tñūnu rí nájñūhun yáñuhūn. Te jehé rí xíñú jíto nájñūhun cáa cuaán jéé ní ndúhvä.

<sup>19</sup> Je jíni rī tǎcá jniñu váha cásáha ró, chí cácuandáhú ní rō jnāhan ró, te cácanđíje níhin ró rúhū, te cájejniñu ró núu rī, te cájendeyí ní rō. Te jíni rī jeē vihýá gǎ cásáha ró vijna vēsú nde quiví jehé.



<sup>20</sup> Te vēsú sūcuan te íyó jecu jeē cahán rī nuū rō. Chi íyó ìn ñahan mēhñu ró jeē naní Jezabel, te cájēhe ró jñuhun stéén ña nuū rō. Te áchí ña jeē nácani ña jñuhun Yaā Dios. Te tuú chi jíin jñuhun stéén ña te stáhú ña ñayuu cácanđije jeē cácuu i mozo rī. Te sáha ña jeē casíquí ndéē jñahan i, jíin jeē cáyeji i jeē ní sóco nuū ídolo.

<sup>21</sup> Te ní jēhe ri tiempo jeē na nácani ní ña, te tu cúní ña nacani ní ña stóo ña jeē casíquí ndéē ña.

<sup>22</sup> Núu sūcuan te na sáha ri jeē jécava ña jíin cuéhyī. Te tāca ñáyuu casíquí ndéē jíin ña, suni cuāha ri jñundóho xeēn nuū i, te núu ma nácani ní i stóo i jñiñu néé nájñuhun sáha ña.

<sup>23</sup> Te sáha ri jeē cúu ñayuu jeē ní scándije ña. Te sūcuan cuni tāca grupo ñayuu cácanđije jeē maá rí cúu Yaā jíin ndihi ndese cáa jeē níjnūnī jíin ánuá ñayuu. Te cuāha ri yāhu ìn ìn ró núu ndese ní casáha ró.

<sup>24</sup> Te sava ga rō jeē cáyūcú ñuu Tiatira, jeē tu ní cájetáhú jñuhun stéén ñahan ún, ní tu ní cájnií ró jñuhun jeē cácahān i jeē jñuhun sāhi gá Satanás cúu, jíin máá ró cahán rī jeē ma tée ga rī inga jñiñu siquí rō.

<sup>25</sup> Chi máá-ni jeē na quéndōo ñihin ró jíin jñuhun ndaā cácanđije ró, te quéndōo ñihin ró jíin ndé quivī ndji ri.

<sup>26</sup> Tāca ñáyuu jeē cūndeyí síquí jeneé, jíin jeē squícu vāha jñiñu cúní rī nde vijna te nde quivī sándihí, sáha rī jeē kujéhnu i ndacu i jñiñu nuū tācá nación,

<sup>27</sup> nájñuhun ní sáha Tátá rī jeē kujéhnu ri ndácu ri jñiñu. Te ndacu ñihin i jñiñu nuū tācá nación. Te nájñuhun cúun yúu i quísi tahú, sūcuan squéhichī i ñayuu tu cájendetū nuū rī.

<sup>28</sup> Te sáha ri jeē coto i ruhū jeē luu kujéhnu ri quenda ndijin rī, nájñuhun jíto i lucero jeē cáne cūndijin.

<sup>29</sup> Ñayuu iyó sóho na chúsóhó i jñuhun jeē cahán maá Espíritu Santo jíin táca grupo ñayuu cácanđije. Achí yá.

### *Jñuhun cuahān ñuu Sardis*

## 3

<sup>1</sup> Te tee ró jñuhun yáha na quíhín nuū jeē kujéhnu nuū ñáyuu cácanđije ñuu Sardis: Sūcuan cáhān ruhū, maá Yaā jeē névāha ndihúxá Espíritu Yaā Dios jíin ndihúxá quími. Je jíin rī tācá jñiñu casáha ró, te cácahān ñayuu jeē cátecu rō, te nuū rī chí nájñuhun ndíyi cácuu ró.

<sup>2</sup> Na nátahū ní rō, te ndejéé ñihin ró jíin jñiñu jeē jecu na iyó te ndúcú naa. Chi je jíin rī jeē tu squícu vāha vāha ró núu Yaā Dios.

<sup>3</sup> Te na núcūhun ní rō tāca jñuhun jeē ní castéén nuū rō. Te cuatáhú ró jñuhun ún te nacani ní rō siquí cuéchi ró. Chi núu tú natahū ní rō, te cuajeé ri nuū rō ìn sanaa-ni nájñuhun jeē ìn sanaa-ni te quíji ñacuíhna, te ma cúní rō na hora jinū rī nuū rō.

<sup>4</sup> Te vēsú sūcuan te íyó nahín jecu rō ñuu Sardis jeē tu ní casáha ró cuéchi, jeē cúu nájñuhun jeē tu ní sájnehén ró sahma ró. Jeē yúcuan cuíjín yaa coo sahma ró caca ró jíin rí, chí ñayuu vāha cácuu ró.

<sup>5</sup> Chi tāca ñáyuu jeē cūndeyí síquí jeneé, cuāha ri sahma cuijín yaa cuhun i. Te ma ndáhva rī síhvi i nuū libro jeē yosó síhvi ñáyuu cotecu níí cáni. Te cuajnúhún rí i nuū Tátá rī jíin núu tācá ndajéhé yā.

<sup>6</sup> Ñayuu iyó sóho na chúsóhó i jñuhun jeē cahán maá Espíritu Santo jíin táca grupo ñayuu cácanđije. Achí yá.

### *Jnūhun cuahān ñuu Filadelfia*

<sup>7</sup> Te tee ró jnūhun yáha na quihín nuū jeē cujéhnu nuū ñáyyuu cácanđije ñuu Filadelfia: Súcuan cáhán ruhū, Yaā ndoo Yaā ndaā, te névāha ri ndacáa rey David. Te máá rí núne jeē quívi ñayuu nuū ndácu ri jniñu, te ni ñin ma cúu casi, te máá rí jesí, te ni ñin ma cúu nune.

<sup>8</sup> Je jíni rī tācá jniñu váha cásáha ró. Te ni nune ri nájnūhun ñin yéhyí quívi coo ró, te ni ñin ma cúu casi. Chi vésú jecu-ni fuerza ró iyó, te ni cacandije ró jnūhun rī, te tu cájesi ró yuhu ró jéé cácanđije ró rúhū.

<sup>9</sup> Te iyó sava ñayuu yíhi ndaha Satanás, te cácahān i jeē ñáyyuu hebreo, jíin ñáyyuu maá Yaā Dios cácuu i, te tuú chi cástáhú-ni i. Núu súcuan te sáha ri jeē jécóo i nuū rō te jecuiñi yití i nuū rō, te cuni i jeē maní rī jíin ró.

<sup>10</sup> Te vāha ni casquicu ró jnūhun ní cahān rī jeē cuándeýi ní rō. Te jeē yúcuan jnama ri rohó quívi jeē quíji ñin jnūndóho xeēn siquī ñáyyuu ní cáhnu ñayiví, jéé cóto ndee ún i jíjnahan i.

<sup>11</sup> Te yachī ndiji rī. Núu súcuan te quendōo ñihin ró jíin jnūhun cácanđije ró, návāha ni ñin ma quénde premio rō.

<sup>12</sup> Tāca ñáyyuu jeē cúndeýi síquī jeneé, sáha ri jeē cuu i nájnūhun sihīn yuū luu ini templo Yaā Dios maá rí. Te ma cújiyo i nuū ndeé yá un. Te tee ri sihví Yaā Dios maá rí jneé i, jíin sihví jéé máá rí, jíin sihví ñuu Yaā Dios maá rí. Te ñuu un cúu Jerusalén jeé, te cuun quiji ichi ándiví ndé nuū Yaā Dios maá rí.

<sup>13</sup> Ñayuu iyó sóho na chúsóhó i jnūhun jeē cahán maá Espíritu Santo jíin táca grupo ñayuu cácanđije. Achí yá.

### *Jnūhun cuahān ñuu Laodicea*

<sup>14</sup> Te tee ró jnūhun yáha na quihín nuū jeē cujéhnu nuū ñáyyuu cácanđije ñuu Laodicea: Súcuan cáhán ruhū, maá Yaā cúu jnūhun ndaā, Yaā cúu testigo vāha jeē cahán ndaā. Te máá rí ni sáha ndihi jeē ni cáhān Yaā Dios jeē na jécōo.

<sup>15</sup> Je jíni rī tācá jniñu cásáha ró. Te cácuu ró nájnūhun jeē tú mījin ni tú jihní, cúu jeē jecu-ni cácanđije ró jnūhun rī, te ni tu cájito uhū rō ni tu cándihvī ni rō siquī. Te nacā jeē váha núu jeē mījin ró chí jéé jihní ró nuū.

<sup>16</sup> Te tuú chi máá yívixi-ni ró, chí ni tu cájito uhū rō ni tu cándihvī ni rō siquī. Te jeē yúcuan squéhichí rī rohó nájnūhun ñin jeé tésihí rí jeé séyūhu rí jeē tu újnahan ni rī.

<sup>17</sup> Te cácahān rō jeē cucá ró, te quéndōo vāha ró, te tu cúmaní ni ñin nuū rō. Te tu cásáha ró cuenta jeē cuécá íi cándoho ró, te ndáhú ndasí ró, te cácuáa ró, te máá ñi lí rō. Te tāca jéé yáha cúní cahān jeē tu cácanđije vāha ró.

<sup>18</sup> Núu súcuan te cáhān rī jíin ró jeē nuū rī cuaan ró oro jeē ni ndúhvā nuū ñuhún te ni nduu máá nene, te suu cúu jeē sáha ri jeē coo cúcá ndije ró ndihi jeé ndíso jnūhun rī. Te nuū rī cuaan ró sahna cuijín cuhun ró, návāha tú cucanu rō jeé maá ñi lí rō, cúu jeé quéndōo ndaā rō sáha rī. Te cuaan ró tájñá nuū rī, quívi tinūu ró, návāha ndundijin tinūu ró, cúu jeé jecūhun ni rō jnūhun rī.

<sup>19</sup> Tāca ñáyyuu jeē cundáhú ni rī, chí cáhān rī nuū i te stóho rī i, návāha na chūhun ni i. Núu súcuan te na cóndihvī ni rō jíjnahan ró, te nacani ni rō jeé stóo ró cuéchi ró.

<sup>20</sup> Cuni sóho, chí íin ri yehyí ánuá rō te cáhān rī. Te núu ndé-ni róhó cuni sóho te nune ró yéhyí ánuá rō, te quívi ri caji rī staā jíin ró, te suni caji maá ró jíin rí. Te suu cúu jeé cóndee rī anuá rō.

21 Tāca ñāyuu jeē cūndeyí síquī jeneé, cuāha ri jñūhun conene i jíin rí nuū mesa nuū ndácu ri jniñu. Chi máá rí suni ni snáa rí poder jeneé, te ni cucōo ri jíin Tátá rí nuū mesa nuū ndácu ya jniñu.

22 Ñayuu iyó sóho na chúsóho i jñūhun jeē cahán maá Espiritu Santo jíin táca grupo ñayuu cácanđje. Achí yá.

*Tāca jéē cáyūcú andiví cáchiñúhún núu yā*

## 4

1 Yūcuán na te ni ndacoto ri, te ni jito ri jeē núne ñn yéhyí andiví, te máá Yaā jeē ni cáhān jíin rí jeē xíhna ñúhún, ni cahān tucu jíin rí nájñūhun jeē tvi trompeta. Te ni cahān:

Caa quiji ró yáha, te na steén rí nuū rō tācá jniñu jeē cóo ichi núu gā, achí yá.

2 Te máá Espiritu Santo ni scóto-ni ya ruhū. Te ni jito ri jeē andiví ñn ñn mesa nuū ndácu jniñu, te néne máá yá nuū mesa un.

3 Te máá yá jeē néne yūcuan cáa ya nájñūhun ndíndēē ñn yuū quiyi ndíi chí ñn yuū cuehé ndíi. Te ñn ticō vēhnde ní jicó ndúu yuhu mesa yā, te ndíndēē nájñūhun ñn yuū cuií ndíi.

4 Te xiin mesa yā ni jito ri jeē ní jicó ndúu ocō cuñ gā mesa nuū ndácu jniñu. Te nuū mesa un néne ocō cuñ tēe jéhu cándiso jniñu. Te cáñuhun de sahma cuijín yaa, te xiní de cáñuhun corona oro.

5 Te nde nuū mesa nuū ndácu ya jniñu ndíndēē taja te ññin te cáhān taja. Te ichi núu mesa yā ñn ndihúxá Espiritu Yaā Dios, jeē cáa nájñūhun uxā yiti náhnu jeē cayú ñuhūn.

6 Te ichi núu mesa yā ún suni iyó nájñūhun ñn mar jeē jito quiyi nájñūhun vidrio.

Te xiin mesa yā un ní jicó ndúu cuñ jeē técu. Te iyó cuehē tinūu ní cáhnu ichi núu jíin ichi yátá un.

7 Te ñn jeē técu un cáa nájñūhun ndicaha. Te inga cáa nájñūhun stiquí. Te jeē uní chí néne nuū té. Te jeē cuñ chí cáa nájñūhun yaha chócó jéē jicó núu tachí.

8 Te ndicúun jeē técu un iyó íñū ndijēn jeē ñn ñn. Te máni máá tñūu cúu ní cáhnu nde jíin ní chíjī ndijēn. Te nduú ñuú tu jécuiñi cuiti jeē cahán:

Yaā ñi Yaā ndoo ndasí

cúu máá Jítoho yō Yaā Dios, Yaā jññ ndihí poder,

Yaā iyó vijna, te ni ñyo yá ní cáni, te coo ya ní cáni.

Achí.

9 Chi máni jeē cácahān ndicúun un jéē cujéhu ndasí máá Yaā jeē néne nuū mesa, Yaā jeē técu ní cáni cuiti. Te yíñúhún cácahān un jíin yá, te nácuatáhú núu yā.

10 Te tāca jínu jeē casáha súcuan, te ndihócó cuñ tēe jéhu cándiso jniñu, cájécuiñi yití de nuū Yaā jeē técu ní cáni cuiti, cáchiñúhún de ya. Te cástaa de corona de, cájequin de ichi núu jehé mesa yā. Te cácahān de:

11 Jítoho ná te Yaā Dios na cúu ní.

Te vāha ndasí Yaā cúu ní jéē cácahān i jeē luu cújéhu ní,

te cáhíyo yíñúhún i nuū ní, te jññ ní ndihí poder.

Chi máá ní ni sáha ndihí jeē iyó,

te síquí jeē súcuan ni cuu ni máá ní te ni jecōo ndihí.

Achí de jíjñāhan de.

*Jeē ní nune Londe Yaā Dios tutu***5**

<sup>1</sup> Yūcuán na te ni jito ri jeē Yaā néne mesa jeē ndácu jniñu, ndaváha ya jniñi ya ñn tutu cáni jeē ní tuu. Te yósó jnúhun ndíndúú lado tutu ún, te ndíhyú jíin úxā sello.

<sup>2</sup> Te ni jito ri ñn ndajéhé yā jeē ndíso poder, te ni cahān jee:

¿Ndé ñn cúu tēe vāha ndasí jeē cóndiso jniñu cahnde sello te nune tutu yáha? áchí ndajéhé yā.

<sup>3</sup> Te ni andiví ni ñayiví ni jeē iyó chíji ñayiví, tu ní íyo ni ñn jeē cóndiso jniñu nune tutu ún, ni jeē cóto nuū.

<sup>4</sup> Te ni ndahyū ndasí rí, chí tu ní íyo ni ñn jeē cóndiso jniñu nune te cahu tutu ún, ni jeē cóto nuū.

<sup>5</sup> Yūcuán na te ni cahān ñn tēe jéhnú un jíin rí:

Ma ndahyú rō, chí iyó ñn Yaā ndíso jniñu jeē cahnde yā ndihúxá sello ndíhyú tutu, te nune ya. Te máa yá chí iyó cuéhē poder yā, nájnūhun jeē iyó cuéhē fuerza ñn ndícaha. Te ni cacu ya chíji yucūn Judá, jeē cúu yucūn rey David. Te ni snáa yā poder táca jéneé.

<sup>6</sup> Yūcuán na te ni jito ri Yaā jeē cúu Londe Yaā Dios jeē ní cajehni i te ni natecu. Te Londe un íin ya nuū íin mesa Yaā Dios, mēhñu ndicúún jeē técu, jíin tēe jéhnú cándiso jniñu. Te iyó úxā ndíqui jíin úxā tinūú Londe ún. Te tinūú un cúu ndihúxá Espíritu Yaā Dios jeē ní tají yá ni jengoo ñí cáhnu ñayiví.

<sup>7</sup> Te Londe un ní jequihin ya tutu jeē jniñi ndaváha Yaā jeē néne nuū mesa.

<sup>8</sup> Te ná ni quihin ya tutu ún, te ndicúún jeē técu jíin ndihóco cuñn tēe jéhnú cándiso jniñu, ni cajecuiñi yití núu yā. Te ná ñn ná ñn tēe jéhnú un cándaha yaa jeē nani arpa, jíin cóhō cúu oro jeē ñúhun chítú súje cutú. Te súje cutú un cúu máa táca jnúhun jeē cájicān tahuñ ñayuu yíhi ndaha Yaā Dios.

<sup>9</sup> Te ni cajita de ñn yaa jeé, te suhva cáhán:

Vāha ndasí Yaā cúu ní jéē quihin ní tutu te cahnde ni sello jeē ndíhyú.

Chí ni cajehni i níhín, te jíin níñi ní nacuaan ní ñayuu

mēhñu táca raza, táca yuhu, táca ñuu, táca nación, návāha cuu i ñayuu Yaā Dios.

<sup>10</sup> Te ni sáha ní jéé cuu i rey jíin sútú nuū Yaā Dios,

te ndacu i jniñu ini ñayiví.

Achí de cájita de.

<sup>11</sup> Te ni jito ga rí, te ni jini sōho ri jeē cácahān cuehē ndajéhé yā jeē ní cajicó ndúú xiin mesa yā, jíin xiin ndicúún jeē técu, jíin xiin tēe jéhnú cándiso jniñu. Te iyó cuéhē ndasí millón ndajéhé un.

<sup>12</sup> Te suhva ni cacahān jee ya:

Vāha ndasí Yaā cúu Londe jeē ní cajehni i.

Te jeē yúcuán jniñi ya poder, te yōhyo cúca yá,

te yōhyo ndíchí yá, te ndíso ya cuehē fuerza,

te cáhíyo yíñúhún ndíhi nuū yā, te luu cújéhnú ya,

te cácahān i jeē vāha ndasí Yaā cúu ya.

Achí.

<sup>13</sup> Te suni ni jini sōho ri jeē cácahān ndíhi jeē ní sáha Yaā Dios jeē iyó ini andiví jíin ini ñayiví jíin chíji ñayiví jíin ini mar. Te ndívi un ní cacahān:

Cúsñi ni yō cahán yō jeē yóhyo vāha Yaā cúu máa Yaā néne mesa nuū ndácu ya jniñu,

jíin Yaā cúu Londe Yaā Dios.

Te na cóo yíñúhún yó núū yā, chí cújéhnū luu ya,  
te jní ya poder ní cání cuiṭi.

Achí.

<sup>14</sup> Te ní cacahān ndicúún jeē técu:

Súcuan na cóo, áchí.

Te ndihóco cuūn tēe jéhnū cándiso jníñū ní cajecuiñī yití de, te ní cachiñúhún de nuū Yaā jeē técu ní cání cuiṭi.

*Siquī ndihúxá sello*

## 6

<sup>1</sup> Yūcuán na te ní jito ri jeē Yaā cúu Londe Yaā Dios, ní jehnde yā ñin jeē uxá sello un. Te ní jini sōho ri jeē cahán ñin jnáhan ndicúún jeē técu ún, nájnūhun cáhán taja:

Nehen te cuni rō.

<sup>2</sup> Te ní ndacoto ri, te ní jito ri ñin caballo cuijín. Te jeē yosó síquī tī un ndáhá ñin arco jeē stáva nduva. Te ní jecūhun ñin corona xinī. Te ní quenda ní jejnáhan, te ní cundeyí síquī ndihi.

<sup>3</sup> Yūcuán na te Londe un ní jehnde yā sello uū. Te ní jini sōho ri jeē cahán inga jnáhan ndicúún jeē técu:

Nehen te cuni rō.

<sup>4</sup> Te ní quenda ñin caballo cuehé, te jeē yosó síquī tī ndiso jníñū jeē snáā jnūhun cáyūcu mánī ñayuu ñayiví, te quejéé i cahni jnáhan i. Te ní nihīn ún ñin espada cáhnu.

<sup>5</sup> Yūcuán na te Londe un ní jehnde yā sello unī. Te ní jini sōho ri jeē cahán inga jnáhan ndicúún jeē técu:

Nehen te cuni rō.

Te ní ndacoto ri, te ní jito ri ñin caballo jnuú. Te jeē yosó síquī tī ndáhá ñin balanza jeē chícuāha, chí coo jnamā xeēn.

<sup>6</sup> Te méhñū ndicúún jeē técu un ní jini sōho ri ñin jeē cahán:

Maá ñin kilo-ni trigo nihīn i jíin yáhu i jeē sájniñū i ñin quiví. Te núu cebada, te unī-ni kilo nihīn i jíin yáhu i jeē sájniñū i ñin quiví. Te aceite jíin vino chí ma sáha ró jéé cúmanī. Achí.

<sup>7</sup> Yūcuán na te Londe un ní jehnde yā sello cuūn. Te ní jini sōho ri jeē cahán tucu inga jnáhan ndicúún jeē técu:

Nehen te cuni rō.

<sup>8</sup> Te ní ndacoto ri, te ní jito ri ñin caballo cuaán yaa, te jeē yosó síquī tī cúu máá cuehyí jéhnī ñayuu. Te ichi yátá un ndíquín máá jnúhun jeē quiví ñayuu lugar nuū cáyūcu ánuá ndiyí. Te ndándúú un cándiso jníñū jeē ndóna síquī ñin jeē ndicúún parte ñayiví, te cuu sáha jeē cúu ñayuu jíin guerra, jíin jnámā, jíin cuehyí xeén, jíin táca quiti xeén jeē iyó ñayiví.

<sup>9</sup> Yūcuán na te Londe un ní jehnde yā sello uhūn. Te chíji altar cáhnu ní jito ri anuá ñayuu jeē ní cacandíje jnūhun Yaā Dios te ní canacani ndaā i jnūhun ya, te síquī yūcuan ní cajehni ñayuu i.

<sup>10</sup> Te ní cacana jee ánuá un:

Jitoho ná Yaā Dios, maá ní cúu Yaā ndoo te vāha squícu ní jéé ní jéjnūhun ní. ¿Te nasaa ga tiempo coo te sándaā ní jéhé ná, te nacuaáha ní jéé ndútahū ñayuu ñayiví jéé ní cajehni sáñá? áchí.

<sup>11</sup> Yūcuán na te ní jéhe ya sahma cuijín cuhun i jíjnáhan i, te ní cahán yā jíin i jeē na ndétátú i jecu gā tiempo. Chí íyó gá hermano i jeē cájejniñū nuū yā, jeē suni jíini ñúhún cuu i návāha jínu número i, áchí yá.

<sup>12</sup> Yūcuán na te Londe un ní jehnde yā sello iñū. Te ni jito ri jeē ni jnáa ndasí. Te ni cujnúú níandii nájnūhun ñin sahma jnúú. Te ní yóō ní nduu nájnūhun niñí.

<sup>13</sup> Te quimi andiví ní ningoyo nuū ñūhun nájnūhun níngoyo ndehē yihí yujnu higo sáha tachí nihin.

<sup>14</sup> Te andiví ní cujiyo cuahān nájnūhun jeē nátuu ñin tutu cáhnu. Te tācá yucu jíin táca isla ni cujiyo cuango inga lado.

<sup>15</sup> Te tāca rey ñayiví, jíin jéé cácujeñnu, jíin jéé cucá, jíin táca capitán, jíin jéé cándiso poder, jíin mozo jeē ní cajeen ñayuu, jíin téé cásájniñu cuenta maá, ní cachisāhi maá ini yaū cava jíin méhñu cava chíji yucu.

<sup>16</sup> Te ni cacahān i jíin yucu jíin cava:

Ndicó cáva siquī rí, na quisāhi rí návāha tú coto maá Yaā néne mesa ndácu jniñu, jíin Yaā cúu Londe jeē cuáha ya castigo xeēn ruhū.

<sup>17</sup> Chi ni quee maá quiví cáhnu jeē cuáha ya castigo, ¿te ndé ñin canda condichi nuū yā? achí i jíjnāhan i.

*Ñayuu tāca yúcūn Israel jeē ni jécondee sello jneē*

## 7

<sup>1</sup> Te ná ni cuu jniñu yáha, te ni jito ri cuūn ndajéhé yā jeē cáhñin ndicúún lado ñayiví. Te cájesi yā nuū ndicúún tachí, návāha ma queé nuū ñūhun ni nuū mar ni nuū ní ñin yujnu.

<sup>2</sup> Te suni ni jito ri inga ndajéhé yā, vēji ichi nuū cáne niāndii. Te ndáhá yá sello Yaā Dios, Yaā técu. Te ni cahān jee ya jíin ndicúún ndajéhé un jéé ndíso jniñu jeē sáha dañó nuū ñūhun íchi jíin núu mar:

<sup>3</sup> Ma sáha ró dañó nuū ñūhun ni nuū táca yujnu ni nuū mar, chí nde na téé yó sello jneē tāca ñayuu cájejniñu nuū Yaā Dios yō.

<sup>4</sup> Te ni jini sōho ri jeē achí jéé iyó ciento uū xico cuūn mil ñayuu jeē ni jécondee sello jneē. Te ñayuu un cácuu tāca yúcūn ñayuu Israel.

<sup>5</sup> Te iyó úxí uū mil ñayuu cácuu yucūn Judá jeē ni jécondee sello, jíin úxí uū mil yucūn Rubén, jíin úxí uū mil yucūn Gad,

<sup>6</sup> jíin úxí uū mil yucūn Aser, jíin úxí uū mil yucūn Neftalí, jíin úxí uū mil yucūn Manasés,

<sup>7</sup> jíin úxí uū mil yucūn Simeón, jíin úxí uū mil yucūn Leví, jíin úxí uū mil yucūn Isacar,

<sup>8</sup> jíin úxí uū mil yucūn Zabulón, jíin úxí uū mil yucūn José, jíin úxí uū mil yucūn Benjamín. Ndihi yucūn yáha cúu jeē ni jécondee sello.

*Ñayuu cuehē jeē cáñuhun sahma cuijín*

<sup>9</sup> Te ná ni cuu jniñu yáha te ni ndacoto ri, te ni jito ri cuehē ndasí ñayuu. Te cúu i ñayuu tācá nación jíin táca raza jíin táca yuhu jíin táca ñuu. Te cáhñin i nuū mesa nuū ndácu Yaā Dios jniñu jíin núu maá Yaā cúu Londe. Te siquī jeē cuehé ndasí i, te ni ñin ma cúu cahu nasaa i cúu. Te cáñuhun i sahma cuijín, te cándahá i ñuū.

<sup>10</sup> Te ni cacana jee i:

Yaā Dios maá yó cúu jeē ní jnama yóhó,  
Yaā jeē néne nuū mesa jeē ndácu jniñu,  
jíin Yaā cúu Londe Yaā Dios.  
Achí i jíjnāhan i.

11 Te ndihi ndajéhé ni cajicó ndúú yā cáhīn ya xiin mesa Yaā Dios, jíin xiin tēe jéhnú cándiso jniñú, jíin xiin ndicúún jeē técu. Te ni cajecuiñi yiti yá ni cachiñúhún yá Yaā Dios ichi núu mesa yā.

12 Te ni cacahān yā:

Amén. Cúsi ni yō cahán yō jeē yóhoyo vāha Yaā cúu Yaā Dios maá yó.

Te luu cújéhnú ya te ndichí yá.

Te na nácuatáhu yó nuū yā, te na cóo yíñúhún yó núu yā.

Chi jniñi ya poder, te ndíso ya cuehē fuerza jeē nñi cáni cuiiti. Amén.

Achí táca ndajéhé yā.

13 Yūcuán na te ni cahān ñn tēe jéhnú un jíin rí:

¿Ndé ñayuu cúu yāha jeē cáñuhun sahma cuijín, te ndé chi véjicoo i?

14 Te ni cahān rí jíin de:

Máa ní cúu jeē jini, Tátā.

Te ni cahān de jíin rí:

Yāha cácuu ñayuu jeē ní cayāha i jeē ní cajito i jnūndóho xeēn. Te ni canacate i sahma i jíin níñi maá Londe, te ni nduyaa vāha, cúu jeē ní ndundoo ánuá i ni sáha ya.

15 Jeē yúcuán cúu jeē cáhīn i nuū mesa nuū ndácu Yaā Dios jniñú, te cájejniñú i ini templo yā nduú ñuú. Te Yaā jeē néne nuū mesa, coto ya i jeē quéndōo vāha i nuū yā.

16 Te ma cúu gā i sōco, te ma jichí gā i ndute. Te ma cayú gā i nuū niāndii, ni ma ndóho ga i jeē jihni.

17 Chi máa Yaā cúu Londe jeē néne nuū mesa jeē ndácu jniñú, coto ya i nájñuhun jeē cúu i lanchi ya. Te condeca ya i quihīn yā jíin i nuū cáne ndute jeē cótecu i sáha. Te Yaā Dios nacuaa yā ndute núu i jíināhan i, te ma ndahyú gā i. Achí tēe jéhnú ún.

*Siqui sello uxā jíin cohō cúu oro*

## 8

1 Te Londe un ní jehnde yā sello uxā jeē ndihyú tutu ún, te nayúú-ni ni iyo ini andiví nájñuhun sava hora.

2 Te ni jito ri ndihúxá ndajéhé jeē cáhīn nuū Yaā Dios. Te ni cajēhe uxā trompeta nuū ndajéhé un.

3 Yūcuán na te ni quee inga ndajéhé, ndáhá yá ñn cohō cúu oro, te ni jecuiñi yā nuū altar. Te ni jēhe cuehē sūje cutú núu yā, návāha socō yā jíin jñuhun cájicān tahu ndihi ñayuu cácandije Yaā Dios. Te ni socō yā nuū altar oro jeē índichi ichi núu mesa nuū ndácu Yaā Dios jniñú.

4 Te nuū cohō cúu jñi ndajéhé un ní cane ñuhmā sūje cutú, ni caa nuū Yaā Dios nde jíin jñuhun cájicān tahu ñayuu cácandije Yaā Dios.

5 Yūcuán na te ni quihīn ndajéhé un cohō cúu un. Te ni scutú yá tícua ñuhūn jeē cayú nuū altar. Te ni jete yā nde ini ñayiví. Te ni sáha jeē ní cáhān taja, te ni ñhīn, te ni ndindēe taja, te ni jñā.

*Jñuhun siqui trompeta*

6 Yūcuán na te ndihúxá ndajéhé jeē cándāhá ndihúxá trompeta, ni casátuhva ya jeē tivi yā.

7 Te ndajéhé ñn ni tivi yā trompeta. Te ni cuun ññi ini ñayivi jíin ñuhūn jeē ní sácā núu jíin níñi. Te ni cayú ñn jeē uní parte ñayiví, jíin ñn jeē uní parte ujnū, jíin ñn jeē uní parte ite cuii.

<sup>8</sup> Te ndajéhé uū ni tiví yā trompeta. Te ñin nájñūhun ñin yucu cáhnu jeē cayú ñūhūn ni ñingava cuahān nuū mar. Te ñin jeē uní parte mar ni nduu ñiñí.

<sup>9</sup> Te ni jihí ñin jeē uní parte quiti ñūhun nuū mar. Te ni naa cuehē barco, chi ñin ñin jeē tāca úní ni naa.

<sup>10</sup> Te ndajéhé uní ni tiví yā trompeta. Te ni ñingava ñin quími cáhnu ichi ándiví, te cáyú nájñūhun cáyú ñin yiti cáhnu. Te ni ñingava siquí ñin ñin jeē tāca úní yūte jíin núu cáne ndute.

<sup>11</sup> Te quími un nání quími uvuā. Te ñin jeē uní parte ndute ni cuu uvuā. Te ni cajihí cuehē ñayuu ní sáha jeē ní cuu uvuā ndute ún.

<sup>12</sup> Te ndajéhé cuūn ni tiví yā trompeta. Te ñin jeē uní parte niāndii jíin yóō jíin quími ni tiví. Te ni ndunee ñin jeē uní parte i, te tuá ni cúndijin ñin jeē uní parte nduú jíin ñuú.

<sup>13</sup> Te ni ndacoto ri, te ni jini sóho ri jeē cána jee ñin ndajéhé yā jeē ndáva cuahān sava ándiví:

Nacā xeēn gā ndoho ñayuu cáyūcú ini ñayiví, chi je yajni cuecu uní gā trompeta jeē tiví uní gā ndajéhé, achí yá.

## 9

<sup>1</sup> Te ndajéhé uhūn ni tiví yā trompeta. Te ni jito ri jeē ichi ándiví ní ñingava ñin quími nde ini ñayiví. Te nuū quími un ní jéhe ndacáa jeē núne túhñchi cúntú ndasí.

<sup>2</sup> Yūcuán na te ni nune un túhñchi, te ni cane ñuhmā ni caa nájñūhun ñuhmā ñin ijñū cáhnu. Te ñuhmā un ní sáha jeē ní cunee niāndii jíin ní núu tachí.

<sup>3</sup> Te nuū ñuhmā un ní canecoo tíca ndicuéhyí, ni jitē núu tí ní cáhnu ñayiví. Te ni jéhe ya jñūhun jeē sáha tí nájñūhun cásaáha tisuhma xeēn jeē iyó ini ñayiví.

<sup>4</sup> Te ni ndacu ya jñiñū nuū tí jeē ma sáha tí daño ite jíin yúcú cuíi jíin yujnu, chi máni ñayuu jeē tu ndéé sello Yaā Dios jneē i cúu jeē tuu tí.

<sup>5</sup> Te tu ní jéhe ya jñūhun jeē cáhni tí ñayuu, chi máni jeē sóho tí i uhūn yoō. Te sáha tí jeē jetú i nájñūhun jeē jetú ñayuu jeē túu tisuhma i.

<sup>6</sup> Te quiví ún nducú ndasí ñayuu modo cuu i, te ma nihín i modo. Te vésú cuní i cuu i, te tú na modo cuu i.

<sup>7</sup> Te tíca ndicuéhyí un cáa tí nájñūhun caballo jeē cáhíyo túhva quingoo nuū cuájñahan. Te xiní tí ñūhun nájñūhun corona oro. Te néé tí nuū téé.

<sup>8</sup> Te iyó ixí tí jeē cáa nájñūhun ixí xiní ñahan. Te jñūhun tí cáa nájñūhun jñūhun ndicaha.

<sup>9</sup> Te níí tí ndihyú nájñūhun sahma cáa. Te ñhin ndijēn tí nájñūhun ñhin jeē cuángoo cuehē caballo nuū guerra cáñuhun tí carreta.

<sup>10</sup> Te suhmā tí ndíso iñū nájñūhun tisuhma. Te jíin súhmā tí cuu stóho tí ñayuu uhūn yoō.

<sup>11</sup> Te iyó ñin jeē kujéñnu nuū tí, te suu cúu ndajéhé jexeén jeē ndíto túhñchi cúntú ndasí un. Te ndajéhé un yuhu hebreo naní Abadón, te yuhu griego naní Apolión, jeē cuní cahān maá jéé snáa.

<sup>12</sup> Te ni yāha ñin jñūndóho, te iyó uū gā jñūndóho jeē quíji.

<sup>13</sup> Te ndajéhé iñū ni tiví yā trompeta. Te ni jini sóho ri ñin jñūhun jeē ni cáhān nde méññū ndicúun yiquí altar oro jeē íin nuū Yaā Dios.

<sup>14</sup> Te ni cahān un jíin ndajéhé iñū jeē ndahá trompeta:

Nandají ró ndicúun ndajéhé jeē nuhní yuhu yūte cáhnu jeē naní Eufrates, achí.



15 Te ni nandajī ndicúún ndajéhé un, návāha cahni ñn jeē uní parte ñayuu ñayiví. Chi je cáhiyo tūhva ndajéhé un jeē siquí maá hora jíin quíví jíin yóó jíin cuiyā jeē cóo súcuan.

16 Te ni jini sōho ri jeē achí jéē iyó úū ciento millón soldado jeē cáyoso caballo.

17 Te ni steén gā yā nuū rī, te ni jito ndijin rī tācā caballo. Te tēe cáyoso siquí tī cáñuhun de camisa cāa jeē cuehé, jeē ndeé, jíin jéē cuaán. Te xinī caballo un cándāa nájñuhun xinī ndicaha. Te yuhu tī quénda ñuhūn jíin ñūhmā jíin azufre.

18 Te jíin úní jeē quénda yuhu caballo un, te ni jihí ñn jeē uní parte ñayuu, suu jíin ñūhūn jíin ñūhmā jíin azufre.

19 Chi yuhu tī jíin súhmā tī iyó fuerza jeē cáhni tī ñayuu. Chi suhmā tī cándāa nájñuhun coó, te iyó xíní, te jíin yúcuán stóho tī ñayuu.

20 Te sava ga ñayuu jeē tu ní jíhí jíin tāca jñúndóho yáha, tu ní nácani ni i stóo i ídolo jeē ní casáha i. Te tu ní stóo i jeē cáchiñúhún i tāca táchí jíin ídolo jeē ní cuvāha jíin oro jíin plata jíin cáa cuaán jíin yúú jíin yujnu. Te tācā un chi tu cúu coto, ni tu cúu cuní sōho, ni tu cúu caca.

21 Te ni tu ní cánacani ni i stóo i jeē jéhni i ndīyí, jíin jéē satásí i, jíin jéē jíca jnéni i, jíin jéē sacúhna i.

*Ndajéhé jeē ndahá libro lulí*

## 10

1 Te ni jito ri ñnga ndajéhé yā jeē ndiso poder, ni cuun ya ichi ándiví. Te ñúsúcun yá vicō, te xiní yā ñuhun ticō vēhndé. Te nuū yā ndíndēe nájñuhun niándii, te síhin ya cáa nájñuhun uū síhín jeē cáa ná cáa ñuhūn.

2 Te ndahá yá ñn libro lulí jéē núne. Te ni jeni ya jehē váha ya nuū mar, te jehé jecó yá nuū ñuhun íchi.

3 Te ni cana jee téyí yá, nájñuhun jeē ndahyú ndicaha. Te ná ni cana jee ya, te ni cacahān uxā taja.

4 Te ná ni cacahān uxā taja, te je iyó tūhva ri jeē tēe ri jñuhun un núú. Te ni jini sōho ri ñn jñuhun ichi ándiví jeē ní cáhān jíin rí:

Chuvāha ró táca jñuhun jeē ní cacahān uxā taja ún, te ma steén rō, ni ma tēe ró, áchí.

5 Yúcuán na te ndajéhé jeē ní jito ri jeē ín nuū mar jíin núū ñuhun, ni ndonehen ya ndaha váha ya ichi ándiví.

6 Te ni ndacunehen ya síhví máá Yāa jeē técu ní cáni, Yāa ni sáha ándiví jíin ñáyiví jíin mar jíin táca ndíhi jeē iyó ini. Te jíin síhví yá un ní cahān teyí ndajéhé:

Ma cucuéé gá jeē jínu ñayiví.

7 Chi núu na quejéé ndajéhé uxā tiví yā trompeta, yúcuán na te squícu-ni Yāa Dios jñuhun sáhi yá, nájñuhun ni castūhun yá nuū táca mozo yā, tēe ni canacani jñuhun ya nde jenahán, áchí ndajéhé.

8 Yúcuán na te máá jéē ní jini sōho ri jeē ní cáhān ichi ándiví, ni cahān tucu jíin rí:

Cuáhān te quihin ró libro lulí jéē núne jeē ndahá ndajéhé jeē ín nuū mar jíin núū ñuhun, áchí.

9 Te ni jehēn ri nuū ndajéhé un, te ni jicān rí jeē na cuáha ya libro lulí un núú rí. Te ni cahān yā:

Quihin te caji rō. Chi vixí sáha ini yuhu ró nájñuhun ndūxi, te chíji ró chí cuhiyá sáha, áchí yá.

<sup>10</sup> Yūcuán na te ni quihin ri libro lulí jeē ndahá ndajéhé yā, te ni yeji rī. Te vixī ni sáha ini yuhu ri nájnūhun ndūxi. Te ná ni cuu ni yeji rī, te ni jitē iyá ni rī.

<sup>11</sup> Te ni cacahān jín rí:

Cánuú jéē nacani tucu rō jnúhun Yaā Dios, ndese coo siquī ñayuu cuehē ñuu jín cuehē nación jeē sán sán yuhu, jín siquī cuehē rey cándacu jniñu, áhí jín rí.

*Siquī uū testigo yā*

## 11

<sup>1</sup> Yūcuán na te ni cajēhe iin yujnu nuū rī, jeē cúu iin cūhva jeē chícuāha. Te ni cacahān jín rí:

Ndocuñī te chicuāha ró templo cáhnu Yaā Dios jín altar, te cahu ró nasaa ñayuu cúu jeē cáchiñūhún nuū yā yūcuán.

<sup>2</sup> Te ma chícuāha ró patio yatā templo. Chi je ni jēhe ya nuū ñayuu tācá ñuu jicá. Te coyūcú i ini ñuu iī yāhá, te uū xico uū yoō cueñū i siquī ñuu.

<sup>3</sup> Te tají rí uū testigo rī jeē nácani jnūhun ri mil uū ciento unī xico quivī. Te cuhun de sahma ndáyí jéē cácuuñhyá ni de siquī cuechi ñayuu, achí yá.

<sup>4</sup> Te ndindúú testigo un cúu nájnūhun ndindúú yujnu olivo jín ndindúú candelero jeē iin nuū Yaā Dios, Yaā chíí ñayiví.

<sup>5</sup> Te na-ni ñayuu núu nducú sáha ndevāha jín ndindúú testigo un, te quenda ñuhūn yuhu ndindúú de, te cayū ndihi ñayuu cájito uhū i de. Te súcuan cuu tāca ñayuu jeē nducú sáha ndevāha jín de.

<sup>6</sup> Te iyó poder ndindúú testigo un jéē cási de jeē ma cúun saū ní tiempo jeē nácani de jnūhun ya. Te suni iyó poder de sáha de jeē nduu niñī tācá ndute. Te cuu stíví de ñayiví jín ndinuū jnūndóho, núu nasaa jínu cácuni de.

<sup>7</sup> Te ná ni jīnu ni canacani de jnūhun ya, yūcuán na te quenda quití xéén jeē néne túhchi ún. Te cuajnáhan jín ndindúú de, te cundeyí jín de, te cahni de.

<sup>8</sup> Te ndiyí ún cava nuū yáhu ñuu cáhnu nuū ní cajehni i máá Jítoho yō jicā cruz. Te ñuu un cacahān yatá i jeē ñuu Sodoma jín Egipto cúu, siquī jeē xeēn cuēchi iyó ñuu ún.

<sup>9</sup> Te ñayuu tācá ñuu, tāca yúcūn, tācá yuhu, tācá nación, chi coto i jeē cáva ndindúú ndiyí un únī quiví yosáva, te ma cuáha i jnūhun jeē quíndūji.

<sup>10</sup> Te ñayuu ní cáhnu ñayiví cusīñ ndasí ni i jeē ní cajihí de, te sáha i vico, te cuāha i regalo nuū jnáhan i. Chi ndindúú téé ni canacani jnūhun ya ún, ní casáha de jeē ní candoho ndasí ñayuu ñayiví.

<sup>11</sup> Te jeē yáha unī quiví yosáva ún, te Yaā Dios sáha ya jeē nastáa tachī de, te ndonda-ni de. Te yūhú ndasí ñayuu coto i jeē ní canatecu de.

<sup>12</sup> Yūcuán na te cuni sōho de jeē cána jee ichi ándiví:

Caa ró quijicoo ró ndé yāhá, áhí.

Te ndaa de mēhñu vícō quingoo de andiví, cuni ñayuu cájito uhū i de.

<sup>13</sup> Te máá hora un jnáa ndasí, te ndicó cáva naa iin jeē uxí parte ñuu ún. Te jín ñujnáa ún cuu uxā mil ñayuu. Te tāca gá ñayuu jeē ndóo, yūhú ndasí i, te cahān i jeē cūjēhu Yaā Dios jeē ndeé andiví.

<sup>14</sup> Súcuan yáha jnūndóho uū, te yachí coo jnūndóho unī.

*Siquī trompeta uxā*

<sup>15</sup> Te ndajéhé uxā ni tiví yā trompeta. Te ni jini sōho ri ni cacahān jee ichi ándiví. Te súcuan ni cacahān:

Tācá nación ñayiví je ni nuquihí ndaha máá Jítoho yō Yaā Dios

jín Cristo jeē ní tají yá.  
Te ndacu ya jniñu ní cáni cuiṭi.  
Achí.

<sup>16</sup> Yūcuán na te ndihóco cuñ tēe jéñnu cándiso jniñu jeē cánene de mesa de ichi núu Yaā Dios, ni cajecuiñi yití de, ni cachiñúhún de ya.

<sup>17</sup> Te ni cacahān de:  
Na cútahū na núu ní, Tátā Yaā Dios,  
chi máá ní jniñi ndihí poder,  
te cúu ní Yaā iyó vijna, te ni iyo ní ní cáni, te coo ní ní cáni.  
Te ni najniñi ní ndivii jeē iyó,  
te jín poder ni ní quejéé ní ndácu ní jniñu nuū.

<sup>18</sup> Ñayuu tācá nación ni caquiṭi ní i siquiṭi ní.  
Te vijna chi ni quee quiṭi jeē cuáha ní castigo i,  
jín jéē sándaā ní jniñu tāca ndíyi.  
Te cuāha ni táhū nuū tāca mozo ni jéē ní canacani jñuhun ní,  
jín núu tāca ñayuu cájejniñu nuū ní, jín ñayuu cachiñúhún núu ní,  
cúu ñayuu cácujeñnu jín jéē tuú.  
Te vijna te snáhnú ndetū ni ñayuu castívi ñayṭi.  
Achí de jínáhan de.

<sup>19</sup> Yūcuán na te ni nune templo Yaā Dios jeē iyó andiví. Te ni cajito ñayuu jeē yúcuán íne yejñu jeē ñúhun contrato yā. Te ni ndindéé taja, te niñin, te cáhán taja, te ni jñāa, te ni cuun xeēn ñiñí.

*Jñuhun ñahan jín cóo cáhnu*

## 12

<sup>1</sup> Yūcuán na te ini andiví ní cane ñin jeē nahán náā ni yō jíto yó: ñin ñahan jeē ñúhun ña niāndii nájnūhun sahma, te ñin jehē ña siquiṭi yóo, te ñúhun ñin corona xiní ña jeē ndeé uxí uū quimi.

<sup>2</sup> Te ñúhun sēhe ña. Te ni ndahyū cohó ña jeē ndóho ña jéñnde chíji ña jeē scácu ña i.

<sup>3</sup> Yūcuán na te ini andiví ní cane tucu inga jeē náā ni yō jíto yó: ñin cóo cuehé cáhnu ndasí. Te iyó úxā xiní tī jín úxí ndiqui tī. Te ndihúxá xiní tī ñúhun corona.

<sup>4</sup> Te jín súhmā tī ni stáa tī ñin jeē uní parte quimi jeē iyó andiví, te ni síngoo tī ini ñayṭi. Te ni ine tī nuū ñahan jeē scácu sēhe ún, ndétu tī cocó tī sēhe ña jeē jé yajni cacu i.

<sup>5</sup> Te ni scácu ña ñin sēhe yí, te sūchi un ní jeconā jeē ndácu ñihin i jniñu nuū ndívi nación. Yūcuán na te ni ndoñúhún sēhe yí ña ún, ni ndaa i cuahān i nde nuū ñin mesa Yaā Dios nuū ndácu ya jniñu.

<sup>6</sup> Te ñahan un ní jinu ña cuahān ña nde nuū ñúhun téhé núu iyó ñin lugar jeē ni sátúhva Yaā Dios. Te yūcuán condee ña niñin ña jeē cáji ña mil uū ciento uní xico quiṭi.

<sup>7</sup> Yūcuán na te ni cajejnáhan ini andiví. Chi ndajéhé jéñnu ga jeē naní Miguel jín táca ndajéhé jeē cácuu mozo nuū yā, ni cajejnáhan jín cóo cáhnu. Te coo un jín táca ndajéhé máá, ni cajejnáhan jín yá.

<sup>8</sup> Te tu ní cácuñdeyí tī, te tuá ní cúu coyūcu tī andiví.

<sup>9</sup> Súcuán ni cuu jeē ní quenehen ya coo cáhnu un jéē iyó ndé jenahán ndasí. Te nání tī jexeén jín Satanás, te máá tī cúu jeē stahú ndihí ñayuu ñayṭi. Te ni scáne ya tī nde ini ñayṭi jín táca ndajéhé tī.

10 Yūcuán na te ni jini sōho ri ñn jñuhun jeē cahán jee ichi ándiví:

Je ni quee quiví jeē jínu jnama ya yohó, jíin jéē steen ndijin yā jeē jñí ya poder, jíin jéē ndácu ya jniñu, jíin jéē ndíso jniñu máá Cristo jee ní tají yá. Chi je ni quenehen ya maá jéē cahán cuēchi siquī táca hermano yó. Chi nduú ñuu ní cahán cuēchi siquī i nuū Yaā Dios maá yó.

11 Te ni cacundeyí i siquī Satanás un, ní sáha jñuhun jeē ni jíhi Yaā cúu Londe, jíin jéē ní cacahán ndaa i jñuhun Yaā Dios, jíin jéē tu ní cundáhu ní i máá i, chí ni jéhe i jñuhun candíje i vēsú núu cuu i jeē siquí yā.

12 Núu súcuan te na cúsi ndasí ni táca róhó jéē cáyucú andiví. Te nacā xeēn ndoho táca róhó jéē cáyucú ini ñayiví jíin núu mar. Chi ni cuun jexeén ni jinū nuū rō jijnáhan ró. Te quítí xeēn ni, chí jíin jeē tuá coo cuehē gā tiempo jeē stahū ñayuu. Achí.

13 Te ni jini coō cáhnu ún jéē ní scáne ya maá cuáhán ini ñayiví, te ni jinu ti jíin ñahan ní scácu sēhe yí, jeē xeēn sáha ti jíin ña núu.

14 Te ni cajēhe uū ndijēn yaha chócó cáhnu nuū ñahan ún, návāha ndava ña quihín ña lugar ña nuū ñuhun téhé, te cācu ña nuū coō ún. Te yūcuán condee ña uní cuiyā yosáva, te nihín ña jeē caji ña.

15 Te yuhu coō un ní cane ndute nájñuhun ñn yūte cáhnu, cuahán yatá ña návāha jneni ña.

16 Te máá ñuhun chí ni chindéé ñáhán ñahan ún, chí ni nune-ni, te ni nungoo yūte jeē ní cane yuhu coō ún.

17 Yūcuán na te xeēn ni quítí ni coō cáhnu ni jito ti ña. Te cuahán tí cuajnáhan tí jíin táca gá sēhe ña, suu ñayuu casquícu jniñu ndácu Yaā Dios te cácandíje vāha i jñuhun Jesucristo.

*Jñuhun siquí uū quítí xéén*

## 13

1 Te ni indichí rī yumár. Te ni jito ri jeē ní cane ñn quítí xéén ini mar. Te iyó úxā xiní tí jíin úxí ndiquí ti. Te ndihúxí ndiquí ti ñuhun corona. Te ndihúxá xiní tí ndeé ñn síhví neé jéē quítí ní Yaā Dios sáha.

2 Te quítí xéén jeē ní jito ri ún, cáa tí nájñuhun cuiñí, te ndaha tí cáa nájñuhun ndaha oso, te yuhu tí cáa nájñuhun yuhu ndícaha. Te nuū quítí un ní jéhe coō cáhnu poder maá jíin mesa nuū ndácu máá jniñu. Te ní sáha jeē cujéhnu ndasí quítí ún.

3 Te ni jito ri jeē ní tújī ñn xiní tí, jeē jé yajni cuu tí nuú. Te ni nduvāha tí jeē ní tújī tí. Te nahán ní naa ní ñayuu ní cáhnu ñayiví ní jito i, te ni cajetáhu i nuú tí.

4 Te ni cachiñúhún i coō cáhnu siquí jeē ní sáha tí jeē cujéhnu ndasí quítí xéén un, te suni ní cachiñúhún i quítí xéén un. Te ní cacahán i:

Tú ni ñn jeē cujéhnu nájñuhun quítí yáha, te tú ni ñn cundeyí cuajnáhan jíin tí, áhí i jijnáhan i.

5 Te tu ní jési ya jeē cahán tí jeē quítí téyí cúu tí, jíin jéē cahán ndevāha tí siquí yā. Te ní nihín jniñu tí jeē ndácu tí jniñu uū xico uū yoó.

6 Te ní quejéé tí ní cahán ndevāha tí siquí Yaā Dios, jíin síquí síhví yá, jíin síquí nuū ndeé yá, jíin síquí táca jéē iyó andiví.

7 Te tu ní jési ya jeē cuajnáhan tí jéē cuajnáhan máá Yaā Dios, te cundeyí tí jíin i. Te suni ní nihín jniñu tí jeē ndácu tí jniñu nuū ñayuu táca yúcūn, táca ñuu, táca yuhu, táca nación.

<sup>8</sup> Te ñayuu ñí cáhnu ñayīví jéē tu yósó síhví i nuū tútu, ni cachiñúhún i quiti xéén un. Te Yaā cúu Londe jeē ní cajehni i, máá yá névaha tutu un jéē yósó síhví ñáyuu cotecu ñí cáni, te je yósó síhví i nde quivī ni jécōo ñayīví.

<sup>9</sup> Ñayuu iyó sóho na chúshó váha i jñūhun cahān rī yāhá.

<sup>10</sup> Tāca ñáyuu jeē sāha jeē quivī jñāhan vecāa, suni vecāa cone máá i. Te tāca ñáyuu jeē jéñi jñāhan jín espada, suni jín espada cuu máá i. Núu súcuan te ñayuu maá Yaā Dios chí jini ñúhún cuandeyí ni i jín jnúndóho te ma jécuiñī i candíje i jñūhun cúndáhú ni yā i.

<sup>11</sup> Yūcuán na te ni jito ri inga quiti xéén jeē ní cane chíji ñuhun. Te íyó úu ndiqui ti jeē cáa nájñūhun ndiqui lánchi. Te nájñūhun tachī coō cáhnu, súcuan tachī cahān tī.

<sup>12</sup> Te nájñūhun ndácu quiti xéén xihna ñúhún jniñu, suni súcuan ndácu quiti uū ún jniñu, ín ti nuū quiti xihna ñúhún. Te quiti uū sāha ti jeē chíñúhún táca ñáyuu ñí cáhnu ñayīví nuū quiti xihna ñúhún, quiti ní tújī jeē jé yajni cuu tī te ni nduvāha ti.

<sup>13</sup> Te quiti uū suni sāha tācá jniñu jéñu jeē nahán náa ni yō jíto yó. Chi ni scúun tī ñuhún ichi ándiví ní quiji ini ñayīví, ní cajito ñayuu.

<sup>14</sup> Te ni stahú tī ñayuu ñayīví jín táca jniñu jéñu jeē ni níñin tī poder jeē sāha ti, jíto jínúu quiti xihna ñúhún. Te ni ndacu tī jniñu jeē na sāha ñayuu imagen quiti xihna ñúhún, quiti ní tújī jín espada, jeē jé yajni cuu tī te ni nduvāha ti.

<sup>15</sup> Te quiti uū ni níñin tī poder jeē chutáchí tī xijnī imagen quiti xihna ñúhún, návaha cuu cahān, te cahni táca ñáyuu jeē tu cájatáhú i chíñúhún i máá.

<sup>16</sup> Te tāca ñáyuu cujéñu jín ñáyuu tu cújéñu, táca ñáyuu cucá jín ñáyuu ndahú, táca ñáyuu sájniñu cuenta máá jín mozo jeē ní cajeen ñayuu, ni sāha ti jeē ní jécondee ñn jñunī ndavāha i chí jnéē i.

<sup>17</sup> Te ni ñn ñayuu ma cúu cuaan i xícó i te núu tu ndiso i jñunī jeē cúu síhví tī chí jñunī número jeē cúu síhví tī.

<sup>18</sup> Jñūhun ndíchí cúu jeē cahān rī yāhá: Tāca ñáyuu jécūhun váha ni cuu tava i cuenta número quiti xéén un, chí número un cúu síhví ñn tēe. Te número un cúu iñū ciento unī xico iñū.

*Yaa jeē cájita 144,000 ñayuu*

## 14

<sup>1</sup> Yūcuán na te ni ndacoto ri, te ni jito ri jeē ín máá Yaā cúu Londe xinī yucu Sión. Te cáhñin ciento uū xico cuñ mil ñayuu jín yá. Te jneē i ndéé síhví máá yá jín síhví Tátá yā Yaā Dios.

<sup>2</sup> Te ni jini sóho ri jeē níñin ndasí ichi ándiví, nájñūhun jeē jíca cuehē yūte chí jéē cahān níñin taja. Te jeē níñin un sāha nájñūhun jeē cátee cuehē ñayuu yaa jeē naní arpa.

<sup>3</sup> Te cáhñin i ichi núu mesa nuū ndácu Yaā Dios jniñu, jín núu ndicúún jeē técu, jín núu ndihóco cuñ tēe jéñu cándiso jniñu. Te ni cajita i ñn yaa jeé. Te ni ñn ñayuu tu cúu cutūhva i yaa ún, chí máni máá ciento uū xico cuñ mil ñayuu jeē ní jnama ya i ini ñayīví.

<sup>4</sup> Te tāca tēe yāha cácuu jeē tu ní cásaha cuēchi jín ñahan cásaha néé, chí tēe ndoo ánuá cácuu de. Te cándiquñ de Londe ndé-ni cúu-ni nuū cuahán yā. Chí ni jnama ya de ini ñayīví, te máá de cácuu tēe jeē xihna gā ni cacandíje nuū Yaā Dios jín núu Yaā cúu Londe.

<sup>5</sup> Te tú cuiti na jñūhun stáhú cácahān de, chí tēe ndoo ánuá cácuu de, cáhñin de nuū mesa Yaā Dios.

*Jnūhun jeē ní cacahān ndinúní ndajéhé yā*

<sup>6</sup> Yūcuán na te ni jito ri inga ndajéhé yā jeē ndáva cuahān sava andiví. Te ndiso ya jnūhun jeē jnáma Yaā Dios ñayuu cotecu i ní cáni. Te ni nacani ya jnūhun un núū táca ñayuu ní cáhnu ñayiví, nuū ñayuu táca nación, táca yúcun, táca yuhu, táca ñuu.

<sup>7</sup> Te ni cahān jee ya:

Conso iyo ró núū Yaā Dios, te na cáhán rō jeē yóhoyo cújéhnú ya, chi je ni quee quiví jeē sándaā yā siquí rō ndese ni casáha ró. Te na chíñúhún ró yā, chí máá yá ni sáha andiví jíin ñáyiví jíin mar jíin táca núū cáne ndute, áchí ndajéhé yā.

<sup>8</sup> Yūcuán na te ndíquín inga ndajéhé yā vēji, te ni cahān yā:

Je ni naa iī ñuu teyí Babilonia. Chi ni sáha jeē ñayuu táca nación casiquí ndéē i Yaā Dios jeē ní castoo i ya te cándiquín i ídolo jíin táca jniñu néé, áchí ndajéhé uū.

<sup>9</sup> Yūcuán na te ndíquín inga ndajéhé uní vēji, te ni cahān jee ya:

Xeēn coo siquí ñayuu cáchiñúhún quití xeēn jíin imagen tí, te jéhe i jnūhun condee jnuní tí jneé i chí ndaha i.

<sup>10</sup> Chí nihín i castigo xeēn siquí cuéchi ni casáha i, chí quití ni Yaā Dios nuū i, te tuá cone cáhnu ni yā. Te ndoho i nuū cayú ñuhún jíin azufre, coto táca ndajéhé Yaā Dios jíin Yaā cúu Londe.

<sup>11</sup> Te ñuhmā nuū cándoho i cánda ní cáni cuítí. Te nduú ñuu tu ndétátú ñayuu cándoho ún jeē ní cachíñúhún quití xeēn jíin imagen tí, jíin jéē ní jécondee jnuní síhví tí.

<sup>12</sup> Jeē yúcuan ñayuu maá Yaā Dios jeē casquícu i jniñu ndácu ya te cácandíje váha i Jesús, cánuú jéé cuándeýí ni i. Achí ndajéhé uní.

<sup>13</sup> Yūcuán na te ni jini sōho ri ñin jnūhun ichi ándiví jéē ní cahān jíin rí:

Tee ró jnūhun jeē cahān rí jíin ró yāhá: Nacā jeē ndetū táca ñayuu cácandíje Jitoho yō jeē cájihí vijna jíin ndé ní cuáhān yō. Jendaá chi ndetátú i jeē ní casáha i jniñu váha, te jniñu i un má náá chí sáha jeē quendōo váha i ní cáni, áchí Espíritu.

*Jeē ní nastútú yá ñayuu ñayiví*

<sup>14</sup> Yūcuán na te ni ndacoto rí, te ni jito rí ñin vicō cuijín. Te nuū vicó un néne Yaā ní nduu tēe. Te xiní yā ñuhun corona oro, te ndáhá yá ñin hoz xeēn.

<sup>15</sup> Te ni quenda inga ndajéhé yā ini templo, te ni cana jee, te cáhán jíin Yaā néne nuū vicó un:

Cahnde ní jíin hoz ní, te nastútú ní ñayuu ñayiví. Chi je ni quee quiví jeē nastútú ní i nájnūhun táhndé trigo jeē jé ni cuaan, áchí.

<sup>16</sup> Yūcuán na te Yaā néne nuū vicó ni nastútú yá ñayuu váha ini ñayiví, nájnūhun táhndé trigo jíin hoz.

<sup>17</sup> Yūcuán na te ni quenda inga ndajéhé yā ini templo jeē iyó andiví, te suni ndáhá yá ñin hoz xeēn.

<sup>18</sup> Te nde nuū altar ni quenda tucu inga ndajéhé, te ndiso jniñu ya siquí ñuhún altar. Te ni cana jee ya, te cáhán yā jíin ndajéhé jeē ndahá hoz xeēn:

Cahnde rō jíin hoz xeēn rō, te nastútú ró ñayuu casáha néé ini ñayiví, nájnūhun jeē cájehnde i chutū ndehē uva jeē jé ni jíchi, áchí.

<sup>19</sup> Te ndajéhé un ní jehnde yā jíin hoz yā, te ni nastútú yá ñayuu casáha néé ini ñayiví, nájnūhun ndútútú ndéhē uva. Te ni jnaa ya i nuū nihín i castigo xeēn Yaā Dios, nájnūhun jnáa i ndehē uva nuū taxín.

<sup>20</sup> Te ni jēhe ya castigo i yatā ñūū, te ni jica ñiñi i nájñūhun ndūxi uva. Te ni ndaa ni jinū cūhva jeē sucún yuhu caballo, te ni jica cuahān nde unī ciento kilómetro.

*Ndihúxá ndajéhé jín ndihúxá jñūndóho jeē sándihí*

## 15

<sup>1</sup> Te ni jito ri inga jniñu jéhu ichi ándiví jéē nāā ni yō jito yó. Chi cáhīn uxā ndajéhé yā jeē cuāha ndihúxá jñūndóho sandihí na. Te jeē jīnu ndihúxá jñūndóho yáha, te jīnu jeē cuāha Yaā Dios castigo xeēn siquī cuéchi.

<sup>2</sup> Te suni ni jito ri ñin jeē cáa nájñūhun mar, te cáa nájñūhun vidrio jeē ndíndēe nájñūhun ñuhūn. Te yumar un cáhīn ñayuu ni cacundeyí siquī quiti xéén jín imagen tī, jín jéē tu ní cáquihin i jñunī número jeē cúu síhví tí. Te cándāhá i yaa jeē naní arpa jeē ni jéhe Yaā Dios nuū i.

<sup>3</sup> Te cájita i yaa jeē ní tava Moisés, tēe cúu mozo Yaā Dios, jín yaa maá Yaā cúu Londe. Te súcuan cáhān yaa ún: Yōhoyo nāā ni na cájito ná ndihí jniñu jéhu teyí jéē sáha ní, Tátā Yaā Dios, chi jñí ní ndihí poder. Te máni jniñu ndaā jniñu vāha sáha ní, jeē cúu ní Rey nuū táca nación.

<sup>4</sup> Tú ni ñin i iyó jéē ma cónso Iyo i nuū ní, Tátā Yaā Dios. Te ndihí i cahān nahín i jeē yóhoyo cújéhu ní. Chi máñúhún ni máá ní cúu Yaā ndoo Yaā ñ. Te quijicoo ñayuu táca nación, chiñúhún i níhín, chi je ni cajini i jeē ndaā vāha sáha ní táca jniñu. Achí i cájita i.

<sup>5</sup> Yūcuán na te ni ndacoto ri, te ni jito ri jeē ini ándiví núne cuarto ñi ini templo nuū ñne tabla yuū jeē yosó ley yā.

<sup>6</sup> Te ini templo un ní quendacoo ndihúxá ndajéhé jeē cándiso jniñu siquī ndihúxá jñūndóho. Te cáñuhun ya sahna fino iyó ndoo te xíñú. Te núhni cinturón oro jicá yā.

<sup>7</sup> Te ñin jñāhan ndicúún jeē técu ni jéhe ñin ñin cohō oro nuū ndihúxá ndajéhé un. Te ini cohō un ñūhun chitú castigo xeēn jeē ni jéhe Yaā Dios, Yaā técu ñí cáni.

<sup>8</sup> Te ni chitú ndí ñuhmā ini templo, te suu ni steen jeē yóhoyo cújéhu Yaā Dios jín poder jñí ya. Te ni ñin tu ní cúu quiví ini templo, chi nde na ndihí ndihúxá jñūndóho jeē cuāha ndihúxá ndajéhé yā.

*Siquī ndihúxá cohō jeē ñūhun castigo*

## 16

<sup>1</sup> Yūcuán na te ini templo ni jini sōho ri ñin jñūhun cáhān jee jín ndihúxá ndajéhé yā:

Cuangoo te cati ró siquī ñayiví ndihúxá cohō jeē ñūhun castigo xeēn jeē ni jéhe Yaā Dios, achí.

<sup>2</sup> Te cuahān ndajéhé ñin, te ni jeti ya cohō yā siquī ñayiví. Te táca ñayuu jeē ndeé jñuní quiti xéén un jín jéē cáchiñúhún imagen tī, ni canecoo ndihyí xeēn jeē jetú ndasí.

<sup>3</sup> Te ndajéhé uū ni jeti ya cohō yā nuū mar, te ndute mar ni nduu nájñūhun ñiñí ndiyí. Te ni cajihí táca quiti jeē ñūhun ini mar.

<sup>4</sup> Te ndajéhé unī ni jeti ya cohō yā ini tāca yúte jíin tāca núu cáne ndute, te ni nduu niñi.

<sup>5</sup> Te ni jini ri jeē cahán ndajéhé jeē ndíso jniñu siquī ndúte:

Tátá Yaā Dios, maá ní cúu Yaā ndoo Yaā ñi, Yaā iyó vijná, te ni iyo ní níf cáni. Te ndaā sáha ní jeē súcuan ni ndonda ní síquī cuéchi i.

<sup>6</sup> Chi ni casáha i jeē ní jeti niñi ñayuu ndoo ní jíin ñayuu ní canacani jñuhun ní. Te vijná chi ni sáha ní jeē cájihu i niñi, chi ñayuu casáha jniñu neé cácuu i, jeē cánuú ndoho i súcuan.

<sup>7</sup> Te ni jini sōho ri jeē cahán inga nde nuū altar:

Tátá Yaā Dios, máa ní cúu jeē jniñi ndihí poder. Te jniñu váha jniñu ndaā ni sáha ní jeē ní ndonda ní síquī cuéchi i. Achí.

<sup>8</sup> Te ndajéhé cuūn ni jeti ya cohō yā síquī níandii, te ni jēhe Yaā Dios jñuhun jeē ndujíhni ndasí níandii návāha cayū ñayuu.

<sup>9</sup> Te xeēn ndasí ní cayū tāca ñayuu. Te vēsú súcuan te tu ní cánacani ni i stóo i cuéchi i, ni tu ní cácahān i jeē cujéhnu Yaā Dios. Chi sa suhva ni cacahān ndevāha i síquī yā jeē ni jēhe ya tācá castigo yáha nuū i.

<sup>10</sup> Te ndajéhé uhūn ni jeti ya cohō yā nuū mesa nuū ndácu quití xéén jniñu. Te ni cunee ní cáhnu nuū ndácu ti jniñu. Te cánacayíhi ñayuu yuhu i jeē cájetū ndasí i.

<sup>11</sup> Te vēsú súcuan te tu ní cánacani ni i stóo i jniñu neé casáha i. Chi sa ni cacahān ndevāha i síquī Yaā Dios andiví síquī jeē cájetū ndasí i jíin ndíhyi xeēn cándoho i.

<sup>12</sup> Te ndajéhé iñu ni jeti ya cohō yā síquī yúte cáhnu jeē naní Eufartes. Te ni ichi ndihí ndute yúte ún, návāha nune ñin ichi jeē quíjicoo tāca rey ichi núu cáne niāndii.

<sup>13</sup> Te ni jito ri jeē ini yuhu coō cáhnu jíin ini yuhu quití xéén jíin ini yuhu máa téé nácani jñuhun stáhú ní canecoo unī tachí jeē cáa nájnūhun sáhvá.

<sup>14</sup> Te tachí ún chi ndajéhé jexeén cácuu, te casáha jniñu jéhnu jeē náa ni ñayuu cájito i. Te ni quendacoo tachí un jeē nastútú tāca rey níf cáhnu ñayiví, jéē cuajnáhan de síquī Yaā Dios quiví jeē ndíji ya. Te máa yá cúu jeē jniñi ndihí poder.

<sup>15</sup> Cuni sōho jíináhan ró, chi sanaa ni rō te ndiji ri, nájnūhun jeē ñin sanaa-ni te quíji ñacuíhná. Te nacá jeē ndetū ñayuu jeē ndito ni i, te ndito yúcún i sahma i, návāha ma cáca vichí lí i, cúu jeē tú na cuéchi coo síquī i jeē cucanu i nuū tāca ñayuu, achí yá.

<sup>16</sup> Te ni canastútú táchí un tāca rey, ni candutútú ñin lugar jeē yuhu hebreo naní Armagedón.

<sup>17</sup> Te ndajéhé uxā ni jeti ya cohō yā nuū tachí. Te ini templo andiví jíin núu mesa nuū ndácu ya jniñu, ni cane ñin jñuhun jeē ni cáhān jee:

Je ni jíinu, achí.

<sup>18</sup> Yūcuán na te ni ndindéé taja, te níhin, te cáhān taja, te ni jnáa ndasí. Chi nde níf cáni jeē iyó ñayuu ñayiví, tu ní jnáa níhin ndasí nájnūhun jeē ni jnáa ni jito ri.

<sup>19</sup> Te máa ñuu cujéhnu Jerusalén, ni cusín ni nduu unī parte, te níf cáhnu ñayiví ni naa tācá ñuu. Te ñuu teyí Babilonia, chi ni sáha nahín yá jeē ní ndutahū i castigo xeēn, chi ni quití ndasí ni yā síquī cuéchi i.

<sup>20</sup> Te ni naa tāca isla, te suni yucu tuá gā.



21 Te ichi ándiví ní cuun ñíñí náhnu síquī ñayuu, jeē véyi nde uū xico kilo. Te ni cacahān ndevāha ñayuu síquī Yaā Dios jeē ní cuun ndasí ñíñí, chí ñn jñúndóho xeēn ni cuu.

### *Jeē ndonda ya síquī ñuu neé Babilonia*

## 17

1 Yūcuán na te ni quiji ñn jnáhan ndihúxá ndajéhé jeē ní candáhá ndihúxá cohó ún, te ni cahān yā jíin rí:

Nehen, te na stéén rí nuū rō ndese coo castigo síquī maá ñahan jnéni jeē cúu ñuu cujéhnú íne nuū iyó cuéhé ndute.

2 Chí táca rey ñayívi nájnūhun ni casíquí ndéē de jíin ñahan ún, cúu jeē ní castóo de Yaā Dios te cándiquín de jnūhun néé ní steén ña. Te ni sáha ña jeē ñáyuu ní cáhnu ñayívi, nájnūhun náñini i te cásíquí ndéē i Yaā Dios cúu jeē ní castóo i ya te cásáha ndasí i cuéchi. Achí ndajéhé yā.

3 Te ni sáha ga Espíritu Santo jeē ní jito ndijin rí, te ndajéhé yā un cuáhān yā jíin rí nde nuū ñūhun téhé. Te ni jito rí ñn ñahan, yósó ña ñn quití xéén cacuéhé. Te ní cáhnu tí ndéē jnūhun néé jéé quití ni Yaā Dios sáha. Te iyó úxā xiní tí jíin úxí ndiqui tí.

4 Te ñahan un ñūhun ña sahma ndihí jíin sahma cuéhé, te suni ñūhun ña síquī oro jíin yūu luu jíin perla jeē ndeé yahu. Te ndáhá ña ñn cohó oro jeē ñūhun chítú jíin jniñu néé ndasí jíin jniñu jnehén jéé jíca jnéni ña.

5 Te jneé ña ndéé ñn síhví jéé cúu ñn jnūhun sáhi, te suhva cáhán: Yāha cúu ñuu teyí Babilonia, jeē cúu nájnūhun náná táca jéé cájica jnéni jíin jéé casáha néé ndasí ini ñayívi, achí.

6 Yūcuán na te ni jini rí jeē ñahan un náñini ña jeē nájnūhun ni jihi ña ñíñí ñayuu maá Yaā Dios jíin ñíñí ñayuu ni cajihí síquī jeē ní canacani ndaā i jnūhun Jეს. Te nahán ní naa ni rí ni jito rí ña.

7 Yūcuán na te ni cahān ndajéhé un jíin rí:

¿Naun náa ni rō jito ró? Na cástūhun rí nuū rō ndese cúní cahān jnūhun sáhi síquī ñahan un jíin quití xéén yósó ña, jeē iyó úxā xiní tí jíin úxí ndiqui tí.

8 Quití xéén jeē ní jito ró, chí ni cotecu tí, te vijna chí tuá tí. Te ndenda tucu tí iní túhncí cúnú, te yūcuán na te quihín tí nuū jnahnú ndetū tí. Te ñayuu cáyūcu ní cáhnu ñayívi, naa ni i coto i nuū quití un jéé ní cotecu tí te ni jihí tí, te natecu tucu tí. Te cácuu i ñayuu jeē tu yósó síhví i nuū tútu jeē yósó síhví ñáyuu cotecu ní cáni jeē ní jécósó síhví i nde quiví ni jécóo ñayívi.

9 Táca ñáyuu jécūhun vāha ní, cuu tava i cuenta ndese cúu: Ndhúxá xiní tí cácuu nájnūhun uxā yucu nuū néne ñahan ún.

10 Te ndihúxá xiní tí suni cácuu nájnūhun uxā rey. Te uhūn rey un je ni naa jeē ndácu de jniñu, te ñn de ndácu jniñu vijna, te inga de chí ná tu quiji de. Te núu na quíji de te jecu-ni tiempo coo de.

11 Te quití xéén jeē ní cotecu te tuá iyó tí vijna, máá tí cuu rey unā. Te ñn jnāhan ndihúxá rey un cúu tí. Te suni quihín tí nuū jnahnú ndetū tí.

12 Te ndihúxí ndiqui jeē ní jito ró cúu nájnūhun uxí rey, te ná tu ndacu de jniñu jñnáhan de. Te máá de jíin quití xéén un, chí nihín jniñu de cuu de rey jecu-ni tiempo.

13 Te ndihúxí rey un chí squíjnāhan de jnūhun, te nacuāha de poder de jíin jniñu ndíso de nuū quití xéén un návāha ndacu tí jniñu.

14 Te cuajnáhan de jíin Yaā cúu Londe. Te Yaā cúu Londe quende yā poder de jíinánhan de. Chi máá yá cúu Jitoho nuū tāca jítoho, te máá yá cúu Rey nuū tāca rey. Te ñayuu cáhlin jíin yá, chi ní nacāji Yaā Dios i te ní cana ya i, te cásquicu vāha i. Achí ndajéhé un.

15 Te ní cahān gā yā:

Cuehē ndute jeē ní jito ró núu néne ñahan jíca jnéni, suu cúu ñayuu cuehē táca ñuu, táca yuhu, táca naciún.

16 Te ndihúxi ndiqui jeē ní jito ró jēē névāha quiti xéén un, suu cácuu rey jeē coto uhū de ñahan jíca jnéni un. Te sáha de jeē quendōo ndáhú ña te quendōo vichi líi ña. Te caji de cūñu ña te cahmu de ña nuū ñuhún.

17 Chi Yaā Dios scánda ya ini de jeē na sáha de jniñu cúní yā. Te squijnáhan de jnūhun jeē nacuāha de jniñu ndíso de nuū quítí xéén un, ndacu ti jniñu nde na squicu táca jnūhun ní cahān Yaā Dios.

18 Te ñahan jeē ní jito ró cúu máá ñuu teyí jéē cujéhnú nuū tāca rey ñayívi. Achí ndajéhé un.

### *Siqui jeē naa ñuu Babilonia*

## 18

1 Yūcuán na te ní jito ri jeē ní cuun inga ndajéhé yā ní quiiji ichi ándiví. Te cújéhnú ndasí yá. Te jeē ndíndēe yá te ní ndíndēe núu ñayívi.

2 Te ní cana jee ya:

Je ní naa ii ñuu teyí Babilonia. Te ní nduu vehe tāca táchi, nuū ñuhún ndinuū tachí neé, jíin táca téji, quiti quíni jeē tu nújnahan ní yō.

3 Chi ñuu un cúu nájnūhun in ñahan ndevāha, te ní sáha ña jeē ñáyuu tāca naciún, nájnūhun nájni i te cásiqui ndēe i Yaā Dios, cúu jeē ní castóo i ya te cásáha ndasí i cuéchi. Te tāca rey ñayívi, nájnūhun ní casíqui ndēe de jíin ñahan ún jeē ní cajetáhú de jnūhun neé ní steén ña. Te ñayuu ní ñayívi jéē cájeen cáxicó, ní cacucúca i jíin cuehē jeneé jeē ní nevāha ña.

4 Yūcuán na te ní jini sōho ri inga jnūhun jeē ní cahān ichi ándiví:

Máá ró jeē cácuu ró ñáyuu maá rí, quendacoo ró ini ñuu jíñā, návāha ma quívi nduu ró jíin táca cuéchi jeē sáha ña, te návāha ma ndóho ró jnúndóho xeén jeē ndoho ña.

5 Chi ní cayā cuehē ndasí cuéchi ña, nájnūhun in montón cáhnu ndasí jéē ní cusúcún ndé andiví. Te vijna te nduxeén Yaā Dios siquí cuéchi ña.

6 Stóho ró ña nájnūhun ní sáha ña jeē ní ndoho sava ga ñayuu. Te nachunaa ró nuū ña doble jnúndóho jeē ní jéhe ña nuū inga ñayuu. Te sáha ró jeē nandicó cóo doble siquí ña vésú jeē ní sáha ña siquí inga ñayuu.

7 Te yōhoyo ní satéyí ña máá ña, te cúca ndasí ní cotecu ña. Te suni jíin cúhva yúcuan nacuāha ró jéē ndóho xeén ndasí ña. Chi jéni ní ña: Yāha néne ri ndácu ri jniñu, te tu cúu ri ñahan viuda, te ma quiiji cuíti jnúndóho ndoho ri, achí ña.

8 Jeē yúcuan cúu jeē in quívi ní te quiiji cuehē jnúndóho siquí ña. Chi cuu ndívi, te cucuíhyá ndasí ní ña, te coo jnamā, te cayū ña nuū ñuhún. Chi yōhoyo iyó poder maá Jitoho yō Yaā Dios, Yaā ní ndonda siquí cuéchi ña, achí.

9 Te tāca rey ñayívi jéē ní casíqui ndēe de jíin ña te ní cotecu cucá ndasí de jíin ña, ndahyū de te ndahyū cohó de coto de jeē cánda ñuhmā cayú ña.

10 Te cuiñi jíca de chi yūhú de coto de jeē súcuan ndoho ña castigo. Te cahān de jíinánhan de:

Nacá jeē xeēn ndóho ró, ñuu cujéhnu Babilonia, chi yá-ni ñuu teyí ní cuu ró núu. Te vijna chi ñn núnúu-ni te ni quee castigo jeē nāá rō, achi de jijnáhan de.

<sup>11</sup> Te tāca téē ñayivi jée cájeen caxícó ñuu ún, ndahyū de te ndahyū cohó de jehē. Chi tuá ndé ñn cuaan ndajniñu caxícó de.

<sup>12</sup> Te ndajniñu caxícó de un cúu oro, plata, yuū luu jín perla jeē ndeé yahu, jín sahma fino jín sahma seda jeē ndihí jín jée cuehé. Te suni tācá yujnu jeē asñ jéen xicō, jín tāca ndajniñu luu jeē ni sáha jín marfil jín yujnu lúu jeē ndeé yahu jín cáa cuaán jín cáa hierro jín yúu cuijín luu.

<sup>13</sup> Te suni caxícó de canela jín tāca jíhyo asñ jín sūje cutú jín sūje uvuā jín tāca perfume jín vino jín aceite jín harina fina jín trigo. Te suni caxícó de quití ndiso jín lanchi jín caballo jín carreta, te nde ñayuu caxícó de jeē sájniñu sáá-ni i.

<sup>14</sup> Te cahān de jín ñuu ún:

Ni cuiyo ndihí ndajniñu cúcá jeē ní nujnahan ndasí ni rō. Te tāca jée lúu jeē váha jeē ní cotecu cucá ró, chi ni naa ndihí, te ma nánihñ cuiti gā rō, achi de jijnáhan de.

<sup>15</sup> Te tāca téē ni cajeen ni caxícó ní cacucúca jée siquí ndajniñu ñuu ún, chi cuiñi jícá de jeē yūhú de coto de castigo coo ñuu ún. Te ndahyū de te ndahyū cohó de.

<sup>16</sup> Te cahān de jijnáhan de:

Nacá jeē xeēn ndóho ñuu teyí yáha. Chi ni cuu nájñuhun ñn ñahan jeē ni ñuhun sahma fino, sahma ndihí jín jée cuehé. Te ni ñuhun ña siquí oro jín yúu luu jín perla jeē ndeé yahu.

<sup>17</sup> Te vijna te ñn núnúu-ni te ni naa ndihí tācá ndajniñu váha ún, achi de jijnáhan de.

Te cuiñi jícá táca téē cáscaca barco, jín ñayuu cuángoo nuū barco, jín téē cásajniñu ini barco, jín táca gá tēe cásajniñu nuū mar.

<sup>18</sup> Chi coto de ñuhmā jeē cayú ñuu ún, te cana jee de jijnáhan de:

¿Ndeé íne ga ñuu teyí jée cujéhnu nájñuhun ni íyo ñuu yáha? achi de.

<sup>19</sup> Te cosō de ticachā ñuhun xiní de jeē cácuulhyá ni de. Te ndahyū de te ndahyū cohó de. Te cana jee de jijnáhan de:

Nacá jeē xeēn ndóho ñuu teyí yáha. Chi jín ndajniñu cúcá jeē ni íyo ñuu un ní cacucúca táca ñayuu cánevāha barco cájica nuū mar. Te vijna te ñn núnúu-ni te ni naa ndihí-ni, achi de.

<sup>20</sup> Te na cúsiñ ni tāca róhó jée cáyucú andiví, siquí jeē ní naa ñuu ún. Te na cúsiñ ni rohó, táca téē apóstol, jín téē cánacani jñuhun Yaā Dios, jín ñayuu maá Yaā Dios. Chi ni sáha néé ñuu un siquí rō jijnáhan ró, te jeē yúcuan ní ndonda Yaā Dios siquí, achi de.

<sup>21</sup> Yūcuán na te ñn ndajéhé ndiso poder, ni quihin ya ñn yuū cáhnu nájñuhun ñn yōso cáhnu, te ni scáne ya ini mar. Te ni cahān yā:

Nájñuhun ni naa yōso yáha, suni súcuan naa Babilonia, ñuu cujéhnu téyí. Te ma núcoo cuiti gā jeē cóto yó núu.

<sup>22</sup> Te ni cahān yā jín ñuu ún: Ini calle rō ma cúni sōho cuiti gā ñayuu jeē scáta i yaa arpa jín flauta jín trompeta. Te suni ma cóo cuiti gā ñayuu casáha táca ndajniñu. Te suni ma cúni sōho ga i jeē ñññn tācá molino rō.

<sup>23</sup> Te ni ñn lámpara ma sáha ga jeē cúndijin nuū rō. Te ni ma cúni sōho ga i vico jeē cácusñ ni ñahan tēe nándāha mēhñu ró. Te ñayuu ní cajeen ni caxícó

nuū rō, ni cacujéhnū ndasí i ini ñayīví. Te ni stahú ró ñayuu tācá nación jín jniñu tasí jín jniñu mágica. Achí ndajéhé un.

<sup>24</sup> Te ñuu un ní nihīn castigo xeēn, chí siquī ñuu un ndéé cuēchi jeē ní jeti niñī tāca tēe ní canacani jnūhun Yaā Dios, jín tāca ñayuu maá yá, jín tāca gá ñayuu ní cajehni i ní cáhnu ñayīví.

## 19

<sup>1</sup> Te ná ni cuu tāca jēe yáha, te ni jini sōho ri jeē cahán jee cuehē ndasí ñayuu ini andiví:

Yōhō cújéhnū Yaā Dios. Chí Yaā Dios maá yó cúu jeē ní jnama yóhó.

Te máa yá cújéhnū ndasí, te máa yá jní ndihí poder.

<sup>2</sup> Te ndaā te vāha sándaā yā tācá jniñu,

chí ni ndonda ya siquī cuēchi ñuu neé cújéhnū ún.

Chí ni stívī un ñayuu ní cáhnu ñayīví jín jnūhun cásiquí ndéé Yaā Dios.

Te ní sáha ya jeē ní ndutahū ñuu un síquī jeē ní jehni tāca mozo yá.

Achí i jínáhan í.

<sup>3</sup> Te ni cacahān tucu i:

Yōhō cújéhnū ya. Chí ní cáni canda ñuhmā ñuu un jēe cayú, achí.

<sup>4</sup> Te ndihóco cuñ tēe jéhnū cándiso jniñu, jín ndicúun jeē técu, ni cajecuiñī yití de, te ni cachiñhún de Yaā Dios, Yaā nēne nuū mesa ndácu jniñu. Te ni cacahān:

Amén. Súcuan na cóo. Yōhō cújéhnū ya.

<sup>5</sup> Te nde nuū mesa nuū ndácu ya jniñu ni cahān in jnūhun:

Róhó jēe cájejniñu nuū Yaā Dios,

jín róhó jēe cándiso Iyo nuū yā,

jeē cácujehnū jín jēe tu cácujehnū,

na cáhán rō jeē yóhō vāha Yaā cúu ya.

Achí.

### *Vico jeē nándāha Yaā cúu Londe*

<sup>6</sup> Te ni jini sōho ri jeē cacahān ñayuu cuehē ndasí, te nihīn nájñūhun nihīn cuehē yūte, te nájñūhun jeē cahán nihīn taja. Te ni cacahān:

Yōhō cújéhnū ya. Chí Jitoho yō Yaā Dios, Yaā jní ndihí poder,

vijna te ndácu nihīn ya jniñu.

<sup>7</sup> Te na cúsiñ ni yō, te siñ ndasí na cóo ni yō,

te na cáhán yō jeē yóhō cújéhnū ya.

Chí ni quee quiví jeē nándāha máa Yaā cúu Londe.

Te je íyó túhva ñahan nandāha jín yá, te suu cúu ñayuu maá Yaā Dios.

<sup>8</sup> Te ni nihīn ña jnūhun cuhun ña sahma fino jeē ndóo ndasí te xíñú.

Achí i jínáhan í. Te sahma fino un cúu tācá jniñu ndaā jeē casáha ñayuu maá Yaā Dios.

<sup>9</sup> Te ni cahān ndajéhé yā jín rí:

Tee ró jnūhun yáha: Nacā jeē ndetū tāca ñayuu jeē ní cana ya quingoo vico nándāha Yaā cúu Londe.

Te ni cahān gā ndajéhé un jín rí:

Tāca jnūhun yáha cúu jnūhun ndaā ni cahān Yaā Dios, achí yá.

<sup>10</sup> Te ni jecuiñī yití rí nuū jehé ndajéhé un jēe chiñhún rí yā nuú. Te ni cahān yā jín rí:

Ma sáha ró súcuan. Chi ruhū suni mozo Yaā Dios cúu ri, nájñuhun máá ró jíin táca hermano rō jeē cácandíje vāha jñuhun Jesús. Sa suhva nuū maá Yaā Dios chiñúhún ró. Achí yá.

Chi jñuhun síquī Jesús cúu jeē cácahān ndaā ñayuu cánacani jñuhun Yaā Dios.

### *Yaā yosó síquī caballo cuijín*

<sup>11</sup> Yūcuán na te ni jito ri jeē núne andiví. Te ni cane ñn caballo cuijín, te Yaā yosó síquī tī naní yá Yaā ndaā, Yaā squícu, chi squícu ya jeē ni jéjnūhun ya. Te ndaā sándaā yā jñiñu te ndaā ndóna ya síquī táca jéneé.

<sup>12</sup> Te tinūu yá ndíndēe nájñuhun yáñuhūn. Te xiní yā ñúhun cuehē corona. Te yósó ñn síhví yá jeē maá-ni ya cúu jeē jiní.

<sup>13</sup> Te ñúhun ya ñn sahma jeē ni ñúndaji nuū niñí, te naní yá Jñuhun Yaā Dios.

<sup>14</sup> Te táca ndajéhé yā jeē iyó andiví, cáyosó caballo cuijín, cándiquīn yatā yā. Te cáñuhun sahma fino cuijín iyó ndoo.

<sup>15</sup> Te ini yuhu máá Yaā jeē yosó síquī caballo, quénda jeē cáa nájñuhun ñn espada xeēn. Te espada un cúu jñuhun ya jeē stóho ya ñayuu táca nación. Te ñihin ndacu ya jñiñu nuū i. Te sándaā yā síquī cuéchi i nájñuhun jeē jeñú síquī ndehé uva cájexīn. Te cuāha ya castigo xeēn ndoho i jeē quití ni yā síquī cuéchi i. Chi máá yá jñí ndihí poder.

<sup>16</sup> Te sahma ya jíin síhin ya yosó jñuhun yáha: Rey nuū táca rey jíin Jítoho nuū táca jítoho, áchí.

<sup>17</sup> Yūcuán na te ni jito ri ñn ndajéhé yā jeē ín nuū níandii. Te ni cana jee ya xiní táca quití ndáva nuū tachí:

Ndutútú ró quijicoo ró cuxíni ró ñn vico cáhnu sáha Yaā Dios.

<sup>18</sup> Te caji rō cūñu táca rey jíin capitán jíin téé téyí, jíin cūñu táca caballo jíin téé ni cayosó síquī tī. Te suni caji rō cūñu táca gá ñayuu, cúu ñayuu casájniñu cuenta maá jíin mozo jeē ní cajeen ñayuu, cúu ñayuu cácujeñnu jíin ñayuu tu cácujeñnu. Achí ndajéhé yā.

<sup>19</sup> Yūcuán na te ni jito ri maá quití xéén jíin táca rey ñayiví jíin cuéhē soldado de. Te ni candutútú de jeē cuajnáhan de jíin máá Yaā yosó caballo jíin táca ndajéhé yā.

<sup>20</sup> Te ni jñí ya quití xéén cuahān tī preso jíin téé ni nacani jñuhun stáhú jeē ni sáha táca jñiñu jéñnu jeē ní jito jíinú quití xéén. Chi jíin jñiñu jéñnu un cúu jeē ni stáhú de táca ñayuu jeē ní cajéhe jñuhun condiso jñuní quití xéén, jíin jéé ní cachiñúhún imagen tī. Te quití xéén un jíin téé ni nacani jñuhun stáhú un, cátecu ndíndúú te ni scáne ya nuū laguna ñuhūn jeē cayú jíin azufre.

<sup>21</sup> Te jíin espada jeē cáne yuhu Yaā yosó caballo ni cajihí táca soldado quití xéén un. Te táca quití ndáva nuū tachí ni candutú chíji ti ni cayeji tī cūñu de jíjnáhan de.

### *Síquī mil cuiyā*

## 20

<sup>1</sup> Te ni jito ri jeē ní cuun ñn ndajéhé yā ichi ándiví. Te ndáhá yá ndacáa jeē núne tūhñchi cúnú ndasí. Te suni ndáhá yá ñn cadena cáhnu.

<sup>2</sup> Te ni jñí ya maá cóo cáhnu jeē iyó ndé jenahán ndasí, te naní tī jexeén jíin Satanas. Te ni jihni yā jeē conuhní mil cuiyā.

<sup>3</sup> Te ni scáne ya ini tūhñchi cúnú ndasí. Te ni jesi vāha ya, te ni sácutú yá yuyáú, návāha ma stáhú gá un ñayuu táca nación, chi nde na jínu mil cuiyā. Te jeé yáha mil cuiyā ún, yūcuán na te cánuú jéé ndaji caca cuu jecu na tiempo.

<sup>4</sup> Te ni jito ri tāca mesa nuū ndácu jniñu, te yūcuan cáyūcu tāca ñáyuū jeē ní canihñ jniñu i sándaā i jniñu. Te suni ni jito ri anuá tāca ñáyuū jeē ní cajehnde xinī i siquī jeē ní canacani i jñuhun Jesús jín jñuhun Yaā Dios. Te tu ní cáchiñúhún i quitī xéén jín imagen tī, ni tu ní cájēhe i jñuhun jeē cóndee jñunī tī jñee i chí ndaha i. Te ni jito ri jeē ní natecu i te ni candacu i jniñu jín Cristo mil cuiyā.

<sup>5</sup> Yāha cúu ndīyī jeē nátecu xīhna gā. Te tāca gā ndīyī, tu ní cánatecu i, chí nde jeē jínu mil cuiyā.

<sup>6</sup> Te nacā jeē ndetū tāca ñáyuū ndoo ánuá jeē nátecu xīhna gā. Chi ma cúu cuiṭi i vuelta uū. Te cuu i sutū nuū Yaā Dios jín núu Cristo, te ndacu i jniñu jín yá mil cuiyā.

<sup>7</sup> Te jeē jínu mil cuiyā ún, te ndajī Satanás te quenda nuū yíndihyū.

<sup>8</sup> Te stáhú tucu ñáyuū tācá nación ní cáhnu ñayīví. Te stáhú ñáyuū ñuu Gog jín Magog. Te sáha jeē ndutútú tāca soldado ñuu un jéé cuajnáhan de. Te coo cuehē ndasí de nájñuhun ñīṭī yumar.

<sup>9</sup> Te cuiṭē núu de quingoo de ní cáhnu ñayīví. Te cuicó ndúu de ñuu nuū cáyūcu ñáyuū maá Yaā Dios, ñuu jeē maní yā jín. Te Yaā Dios chí scúun ya ñuhūn ichi ándiví, te cayū ndihí de.

<sup>10</sup> Te jexeén jeē ní stáhú tāca ñáyuū ún, chí scáne ya quihñ nuū laguna ñuhūn jeē cayū jín azufre. Te yūcuán chí xīhna gā ní scáne ya quitī xéén jín téé ni nacani jñuhun stáhú. Te yūcuán ndoho nduū ñuū ní cáni cuiṭi.

### *Jeē sándaā yā jniñu nuū mesa cuijín*

<sup>11</sup> Yūcuán na te ni jito ri ñn mesa cuijín cáhnu, te néne máá Yaā ndácu jniñu. Te ñayīví jín andiví ní ndoñúhún cuáhān jeē ní jito ya nuū, chí tuá ní cúu quendōo nuū yā.

<sup>12</sup> Te ni jito ri tāca ndīyī, jeē ní cujéhnu jín jéé tu ní cujéhnu, cáhñin nuū Yaā Dios. Te ní sáha ya jeē núne tāca libro, te suni ni nune inga libro jeē yosó síhví ñáyuū cotecu ní cáni. Te ní sándaā yā siquī tāca ndīyī ún, núu ndese jniñu ní casáha i jín ndese yósó núu tāca libro un.

<sup>13</sup> Te tāca ndīyī jeē ní cajihī nuū mar, ni nanecoo. Te suni ni nanecoo tāca ndīyī jeē ní cajihī i, jeē íne i máá lugar nuū cáyūcu ánuá ndīyī. Te ní sándaā yā siquī, núu ndese ní casáha ñn ñn i.

<sup>14</sup> Yūcuán na te cuehyī jéhni ñáyuū jín lugar nuū cáyūcu ánuá ndīyī, ní snáā yā ní scáne ya cuangoo núu laguna ñuhūn. Te jeē ndóho ñáyuū nuū laguna ñuhūn, yūcuan cúu jeē cúu i vuelta uū.

<sup>15</sup> Te yūcuan ní scáne ya tāca ñáyuū ní casáha jniñu néé jéé tu yósó síhví i nuū libro jeē yosó síhví ñáyuū cotecu ní cáni.

### *Andiví jéé jín ñayīví jéé*

## 21

<sup>1</sup> Yūcuán na te ni jito ri andiví jéé jín ñayīví jéé. Chí andiví jín ñayīví xīhna ñuhūn ní naa. Te suni tuá mar.

<sup>2</sup> Te ruhū Juan, ni jito ri ñuu ñi jeē cúu Jerusalén jeé. Te ñuu un ní cuun vējī ichi ándiví núu néne Yaā Dios. Te ñuu ún luu cáa nájñuhun ñn ñahan jeé ní sátúhva ña ni cucutú ña jeē nándāha ña jín yī ña.

<sup>3</sup> Te ni jini sōho ri ñn jñuhun jeē ní cáhān jee ichi ándiví:

Condêhé, chi vijna te ndéé Yaā Dios mēhñu ñáyuu. Te condee yā jiín i jijnáhan i, te cuu i ñayuu maá yá. Te maá yá condee yā jiín i jeé cúu ya Yaā Dios i.

<sup>4</sup> Te nacuaa yā ndute tínúú i jijnáhan i. Te ma cúu gā ñayuu, ni ma ndahyú gā i, ni ma cucuíhyá gā ni i, ni ma jetú gā i. Chi je ni yáha táca jnúndóho jeé ni iyo, áchí.

<sup>5</sup> Yūcuán na te ni cahān maá Yaā néne nuū mesa:

Condêhé, chi nasáha jeé rí táca jéé iyó, áchí yá.

Te suni ni cahān yā:

Teé ró jnúhun yáha. Chi táca jnúhun yáha cúu jnúhun jeé jiní ndije ró jéé ndaa cúu.

<sup>6</sup> Te ni cahān gā yā:

Je ni jīnu. Máá rí cúu nájñuhun letra A xīhna ñúhún jiín letra Z jeé sándihí na, chi máá rí ni squejéé ndihi te máá rí sínu. Te táca ñáyuu cájichí, súcuan-ni cuáha ri coho i ndute cáne jeé cótecu i ní cáni.

<sup>7</sup> Táca ñáyuu jeé cúndeyí síquī jéneé, nihīn i ndihi jeé yáha cuu tahū i. Te cuu ri Yaā Dios i, te cuu i sēhe ri.

<sup>8</sup> Te táca ñáyuu jeé cáyuhú ndoho síquī jnúhun ri, jiín ñáyuu tu cácandíje, jiín ñáyuu casáha jniñu néé, jiín ñáyuu cájehni ndīyí, jiín ñáyuu cájica jnéni, jiín ñáyuu casáha tási, jiín ñáyuu cáchiñúhún ídolo, jiín táca ñáyuu castáhú, ñayuu ún chi quíwicoo i laguna ñuhún jeé cayú jiín azufre. Te yūcuán cúu jeé cúu i vuelta uū.

### *Jerusalén jeé*

<sup>9</sup> Yūcuán na te ni quiji iin jnáhan ndihúxá ndajéhé jeé ní candahá ndihúxá cohō jeé ni ñúhun chitú ndihúxá jnúndóho sandihí. Te ni cahān yā jiín rí:

Nehen, te na stéén rī nuū rō ñahan jeé nándāha ña cuu ña ñasihí Yaā cúu Londe, áchí yá.

<sup>10</sup> Te ni sáha ga Espíritu Santo jeé ní jito ndijin rī, te ndajéhé un ní jeca ya ruhū cuahān yā jiín rí xiní iin yucu cáhnu súcún. Te ni steén yā nuū rī maá ñuu ií cujéhnu jeé cúu Jerusalén, te ni cuun vēji nde andiví nuū néne Yaā Dios.

<sup>11</sup> Te ndíndéé ndasí ñuu un nájñuhun ndíndéé Yaā Dios. Te xíñú nájñuhun xíñú iin yuū luu jeé ndeé yahu ndasí, nájñuhun yuū cuijín jeé quiyí nájñuhun vidrio.

<sup>12</sup> Te yuhu ñuū un ní jicó ndúú iin jeé cáhnu súcún ndíhyú ñuu ún. Te íyó úxí uū yehyí. Te táca yéhyí un iin iin ndajéhé yā. Te táca yéhyí un yósó síhví ndihúxí uū yucún Israel.

<sup>13</sup> Te lado nuū cáne niándii iyó úní yehyí. Te lado norte suni íyó úní yehyí. Te lado sur suni íyó úní yehyí. Te lado nuū quée niándii suni íyó úní yehyí.

<sup>14</sup> Te íyó úxí uū yuū náhnu jeé cúu cimientu maá jéé ndihyú ñuu ún. Te táca yúu un yósó síhví ndihúxí uū apóstol maá Yaā cúu Londe.

<sup>15</sup> Te ndajéhé jeé ni cahān jiín rí, ndáhá yá iin yujnu oro jeé chícuāha yá ñuu un jiín táca yéhyí jiín máá jéé ndihyú ñuu ún.

<sup>16</sup> Te ñuu ún chi iin cūhva-ni cúu ndicúún lado. Chi jeé cáni jiín jéé jité, iñuú-ni cúu. Te ndajéhé un ní chicuāha yá ñuu un jiín yujnu ún. Te néé uū míl uū ciento kilómetro jeé iin iin lado. Te iñuú-ni cūhva jeé cáni, jeé súcún, jiín jéé jité.

<sup>17</sup> Te suni ni chicuāha yá maá jéé ndihyú ñuu ún, te néé uní xico cuñ metro jeé súcún. Te yūcuán cúu cūhva jejníñu ñayuu, jeé suni jéjníñu ndajéhé un.

<sup>18</sup> Te máá jéé ndihyú ñuu un ní cuvāha jíin yūu cuijín quiyi. Te ñuu ún chi máá nene oro cúu, te cáa nájñuhun vidrio quiyi.

<sup>19</sup> Te tāca yūu jeé cúu cimientu maá jéé ndihyú ñuu ún, ní cucutú jíin ndinuú yuú luu jeé ndeé yahu. Yuú ñn cúu yuú cuijín quiyi. Te jeé uú cúu yuú ndeé ndí. Te jeé uní cúu yuú pinto. Te jeé cuún cúu yuú cuí ndí.

<sup>20</sup> Te jeé uhún cúu yuú pinto jeé ñúhun raya. Te jeé ñúú cúu yuú cuehé pinto. Te jeé uxá cúu yuú cuaán quiyi. Te jeé uná cúu yuú cuí ndeé. Te jeé ñn cúu yuú cuaán ndí. Te jeé uxí cúu yuú cuí cuijín. Te jeé uxí ñn cúu yuú cuehé cuaán. Te jeé uxí uú cúu yuú ndihí ndí.

<sup>21</sup> Te ndihúxí uú yehyí un cácuu uxí uú perla jeé ndeé yahu. Te ñn ñn yéhyí cúu ñn ñn perla. Te máá nene oro cúu calle cáhnu ñuu ún, te quiyi nájñuhun vidrio.

<sup>22</sup> Te tú na templo ni jíto ri ini ñuu ún, chi ñí cáhnu ñuu un ndeé máá Jítoho yō, Yaā jñí ndihí poder, jíin Yaā cúu Londe.

<sup>23</sup> Te ñuu ún tu jíni ñúhún cundijin jíin luz niándii jíin yóo. Chi jeé ndíndēe máá Yaā Dios cúu jeé cundijin ñuu ún. Te luz ñuu un cúu máá Yaā cúu Londe.

<sup>24</sup> Te ñayuu tācá nación ñayīvi jéé ní jnama ya, caca i jeé cundijin luz ñuu un nuú i. Te tāca rey ñayīvi quijicoo de ñuu ún, quindeca de tācá ndajniñu jeé ndeé yahu jíin jéé cujéhnu de sáha.

<sup>25</sup> Te tāca yéhyí ñuu ún ma cóndihyū cuiti nduú, chi tú na jecuáa coo.

<sup>26</sup> Te ini ñuu ún quijicoo ñayuu tācá nación, quindeca i tācá ndajniñu jeé ndeé yahu jíin jéé cujéhnu i sáha.

<sup>27</sup> Te ma quívicoo cuiti ni ñn jeé jnehén. Ni ma quívicoo ñayuu casáha jniñu neé jíin jéé castáhu. Chi quívicoo máni máá ñayuu jeé yosó síhví i nuú libro jeé yosó síhví ñayuu cotecu ñí cáni, jeé névāha Yaā cúu Londe.

## 22

<sup>1</sup> Yūcuán na te ndajéhé yā ni steén yā nuú rī ñn yūte íyó ndoo. Te ndute un sáha jeé cótecu yō ñí cáni. Te xíñú nájñuhun vidrio, te cáne nuú mesa nuú ndacu Yaā Dios jniñu jíin Yaā cúu Londe.

<sup>2</sup> Te jica yūte ún sava mēhñu calle cáhnu ñuu ún. Te ndíndúú lado yuyúte un yíhi yujnu jeé cótecu yō ñí cáni sáha. Te yujnu un jéhe ndehē uxí uú jínu jeé ñn cuiyā, chi tāca yóo cúun ndehē. Te ndaha yúcu i cúu tajnā jeé ndúvāha ñayuu tācá nación.

<sup>3</sup> Te tācá-ni jeé ni cáhān yā jeé násūu jéé váha cúu, ma cóo ini ñuu ún. Te ini ñuu ún cuiñi máá mesa nuú ndacu Yaā Dios jniñu jíin Yaā cúu Londe. Te ñayuu cácadje jeé cácuu i mozo yā, chíñúhún i ya.

<sup>4</sup> Te coto i nuú yā, te condee síhví yá jneē i.

<sup>5</sup> Te ma cóo ga jecuáa ñuu ún. Te ñayuu cáyūcu yúcuan tuá jíni ñúhún i jeé cundijin lámpara nuú i, ni jeé cundijin niándii. Chi jeé ndíndēe máá Jítoho yō Yaā Dios cúu jeé cundijin nuú i. Te ndacu i jniñu ñí cáni cuiti.

### *Jeé cuácuyajni ndiji Cristo*

<sup>6</sup> Yūcuán na te ni cáhān ndajéhé un jíin rí:

Tāca jnúhun yáha cúu jnúhun jeé jíni ndije ró jéé ndaā cúu. Te Jítoho yō Yaā Dios, máá yá sáha jíin tée cánacani jnúhun ya jeé jíin Espíritu yā cánacani de. Te suu máá yá ni tajj yá ndajéhé yā návāha steén nuú ñayuu cácuu mozo yā tācá jniñu jeé yachī coo.

<sup>7</sup> Ndiji yachī rí, achí yá.

Te nacá jeé ndetū ñayuu chusóhó jnúhun Yaā Dios jeé yosó nuú tútu yáha.



<sup>8</sup> Te ruhū Juan, ni jini sōho ri tāca jnūhun yáha, te ni jito ri tācá jniñu yáha. Te ná ni jini sōho ri ni jito ri, yūcuán na te ni jecuiñi yiti rí nuū jehé maá ndajéhé jeé ni stéén tācá jniñu yáha núū rī, jeé chiñúhún rí yā nuú.

<sup>9</sup> Te ni cahān ndajéhé un jíin rí:

Ma sāha ró súcuan. Chi ruhū suni mozo Yaā Dios cúu ri, nájnūhun maá ró jíin tāca hermano rō jeé cānacani jnūhun ya, jíin ndihi ñayuu cājetáhú jnūhun yósó nuū tútu yáha. Sa suhva nuū maá Yaā Dios chiñúhún ró. Achí yá.

<sup>10</sup> Te ni cahān gā ndajéhé un jíin rí:

Ma chísāhi ró tāca jnūhun Yaā Dios jeé yosó núū tútu yáha, chi je cuacuyajni tiempo jeé cūndaā ndihi.

<sup>11</sup> Te ñayuu casáha jniñu néé, na sāha ga maá i jniñu néé. Te ñayuu jnehén ánuá, na quéndōo maá i súcuan. Te sa ñayuu casáha jniñu ndaā, na sāha ga i jniñu ndaā. Te ñayuu cáhiyo ndoo ánuá, na cáca ndoo ga i súcuan. Achí ndajéhé un.

<sup>12</sup> Jendaá jeé ndiji yachī rī, achí Jesús. Te quiji ri jíin táhū cuāha ri nuū ñin ñin ñayuu, núu ndese jniñu ni casáha i.

<sup>13</sup> Máa rí cúu nájnūhun letra A xīhna ñúhún jíin letra Z jeé sándihí na, chí íyó rí nde xīhna ñúhún te coo ri ní cāni.

<sup>14</sup> Nacā jeé ndetū ñayuu jeé jéhe i jnūhun ndundoo ánuá i nájnūhun ndúndoo sahma. Chí cuu caji i ndehē yujnu jeé sāha jeé cótecu i ní cāni, te cuu quivicoo i yéhyí ñuu ñi ún.

<sup>15</sup> Te ichi fuera ñuu ún cuiñi ñayuu tu cácadije, jíin ñayuu casáha tási, jíin ñayuu cájica jnéni, jíin ñayuu cájehni ndiyi, jíin ñayuu cáchiñúhún ídolo, jíin ñayuu cácusñi ni stahú jnahan.

<sup>16</sup> Máa rúhū Jesús, ni tají rí ndajéhé rī návāha castūhun yá tāca jnūhun yáha nuū tāca grupo ñayuu cácadije. Te maá rí ni sāha jeé ni íyo rey David, te ni quiji ri nuū yucún David. Te cúu ri nájnūhun lucero ndíndēe cáne cūndijin. Achí yá.

<sup>17</sup> Te maá Espíritu Santo jíin maá ñahan jeé nándāha jíin Yaā cúu Londe, cácahān:

Nehen, quivicoo ró ndaha ya, achí.

Te tāca ñayuu jeé jíini sōho, suni na cáhán i:

Nehen, quivicoo ró ndaha ya.

Te tāca ñayuu cájichí jeé cácuni i coho i, na quivicoo i ndaha ya, te súcuan-ni na cóho i ndute jeé cótecu i ní cāni sāha.

<sup>18</sup> Te tāca ñayuu jíini sōho jnūhun Yaā Dios jeé yosó núū tútu yáha, cáhán ñihin ri jíin i: Núu ndé ñayuu chisóo i nuū jnūhun cáhán tutu yáha, te Yaā Dios chisóo yá jnundóho cáhán tutu yáha, ndoho i.

<sup>19</sup> Te núu ndé ñayuu quende i jecu jnūhun cáhán tutu yáha, te Yaā Dios quende yā tahū i jeé yosó núū libro jeé yosó síhví ñayuu cotecu ní cāni, te ma ñihín i tahū i ñi ñuu ñi ún. Te tutu yáha cúu jeé cáhán siquí tācá un.

<sup>20</sup> Te Yaā jeé ni cáhān tāca jnūhun yáha, suhva cáhán yā:

Jendaá jeé ndiji yachī rī, achí yá.

Amén. Súcuan na cóo. Jitoho ná Jesús, jíicán tahú na jéé ndíji yachī ní.

<sup>21</sup> Te ñúhún ni rī jeé Jítoho yō Jesucristo na sāha ga yā jeé váha róhó jíjnāhan ró. Amén.